

कुल्वी बाईबिल

The Open Kulvi Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>.

This Bible is provided at the cost of printing by the Digital Bible Society ([dbs.org](http://dbs.org)). This Bible, and many others, are available for free download in a variety of digital formats at [dbs.org/bibles](http://dbs.org/bibles).

मत्ती.....	4
मरकुस .....	24
लूका .....	37
यूहन्ना .....	60
प्रेरिता रे कौम .....	76
रोमियो.....	94
1 कुरिन्थियों .....	103
2 कुरिन्थियों .....	111
गलातियों.....	117
इफिसियों .....	121
फिलिप्पियों.....	124
कुलुस्सियों .....	127
1 थिस्सलुनीकियों .....	130
2 थिस्सलुनीकियों .....	133
1 तीमुथियुस.....	135
2 तीमुथियुस.....	138
तीतुस .....	140
फिलेमोन.....	142
इब्रानियों .....	143
याकूब.....	149
1 पतरस .....	152
2 पतरस .....	155
1 यूहन्ना.....	157
2 यूहन्ना.....	160
3 यूहन्ना.....	161
यहूदा .....	162
प्रकाशित वाक्य.....	163

# मती

## परिचय

मती रा सुसमाचार यह शुभ संदेश देआ सा कि यीशु मसीह ही सौ मुक्तिदाता सा जुणी री एणै री भविष्यवाणी हुई ती । परमेश्वरे पराणै नियमा न हजार बोरष पैहले आपणै लोका न केरुदे वायदे बै तेई मुक्तिदाता द्वारा पुरा केरु । ऐ शुभ संदेश केवल यहूदी लोकै री तेईये नेई अथी, जौखे यीशु पैदा हुआ होर तेई रा पालन पोषण केरु, पर दुनिया री तेईये सा ।

मती रै सुसमाचारा बै बड़ी सावधानी संघे व्यवस्थित केरुदा सा । एथा री शुरूआत मसीह रै जन्मा न होआ सा, तैबै तेईरे वपतिस्मा होर परीक्षा रा वर्णन सा, होर तैबै गलील प्रदेशा न प्रचार, शिक्षा होर बमारी ठीक केरने री सेवा रा वर्णन सा । एथा न बाद एई सुसमाचारा न यीशु री गलीला न यरुशलैमा री यात्रा होर यीशु री जिन्दगी री आखरी हफते री घटना रा वर्णन सा । जुणीन तेईरा कूसा पेन्धे चढ़ना होर जिन्दा होणा सा ।

येई सुसमाचारा न यीशु बै एक महान गुरु रे रूपा न दर्शाऊदा सा । तेईरी शिक्षा बै पौज हिस्से न बाँडी सका सी । (1) पहाड़ी उपदेश जो स्वर्गा रे राज्य रै लोका रै चरित्र, कर्तव्य विशेषअधिकार होर आखरी आशा न सम्बन्धित सी । (5-7); (2) बारा चले बै सेवा री तेईये तयार केरना (अध्याय 10); (3) स्वर्गा रे राज्य रे बारे न उदाहर्ण (अध्याय 13 ) (4) शिष्यता रै बारे न शिक्षा(अध्याय 18 ); होर (5) स्वर्ग राज्य रे एणै रे बारे न होर एणु आळै जुगा रै बारे न आखरी शिक्षा (अध्याय 24,25 ) ।

रूपरेखा

वंशावली होर यीशु मसीह रा जन्म 1:1-2:23

यूहन्ना वपतिस्मा देणु आळै रा सेवा कार्य 3:1-12

यीशु रा वपतिस्मा होर परीक्षा

गलीला न यीशु री लोका री सेवा 4:12-18:25

गलीला न यरुश्लैमा तकर यात्रा 19:1-20:34

यरुशलैमा न आखरी सप्ताह 21:1-27:66

प्रभु यीशु रा जिन्दा होणा होर तेई हेरिणा 28:1-20

## यीशु री वंशावली

1 अब्राहमै री सन्तान, दाऊदै री सन्तान, यीशु मसीह री वंशावली  
2 अब्राहमा न इसहाक पैदा हुआ, इसहाका न याकूब पैदा हुआ होर याकूबा न यहूदा होर तेइरै भाई पैदा हुएे । 3 यहूदा होर तामारा न फिरिस होर जोरह पैदा हुएे; फिरिसा न हिस्त्रोन पैदा हुआ होर हिस्त्रोना न एराम पैदा हुआ । 4 एराम न अम्मीनादाब पैदा हुआ, अम्मीनादाबा न नहशोन होर नहशोना न सलमोन पैदा हुआ । 5 सलमोन होर राहाबा न बोअज्र पैदा हुआ । होर बोअज्र होर रुता न ओबेद पैदा हुआ होर ओबेदा न यिशै पैदा हुआ । 6 होर यिशै न दाऊद राजा पैदा हुआ । 7 होर दाऊदा न सुलेमान तेसा बेटड़ी न पैदा हुआ जो पैहिलै उरिय्याह री लाड़ी ती । 8 होर सुलेमाना ना रहबाम पैदा हुआ, रहबामा ना अबिय्याह पैदा हुआ; अबिय्याह ना आसा पैदा हुआ होर आसा ना यहोशफात पैदा हुआ, यहोशफाता ना योराम होर योरामा ना उज्रियाह पैदा हुआ । 9 उज्रियाह ना योताम होर योतामा ना आहाज पैदा हुआ; होर आहाजा ना हिजकिय्याह पैदा हुआ । 10 होर हिजकिय्याह न मनशिशह होर मनशिशहा न आमोन पैदा हुआ होर आमोना न योशिय्याह पैदा हुआ । 11 होर बन्दी होइया बेबीलोन ज्राणै रै बौकै योशिय्याह न यकुन्याह होर तेइरै भाई पैदा हुएे ।

12 बन्दी होइया बेबीलोन पुजणै न बाद यकुन्याह न शालतिएल पैदा हुआ होर शालतिएला न जरुब्बाबिल पैदा हुआ । 13 जरुब्बाबिला न अबीहूद हो अबीहूदा न इल्याकीम पैदा हुआ होर इल्याकीमा न अजोर पैदा हुआ । 14 अजोरान न सदोक होर सदोका न अखीम पैदा हुआ; होर अखीमा न इलीहूद पैदा हुआ । 15 होर इलीहूदा न इलियाज्जर होर इलियाज्जारा न मत्तान होर; मत्ताना न याकूब पैदा हुआ । 16 याकूबा न युसुफ पैदा हुआ जे मरियमा

रा लाड़ा होर जुणी न यीशु जो मसीह सा पैदा हुआ । 17 इब्राहिमा न लेइया दाऊदा तक सेभ चौदह पीढ़ी हुई होर दाऊद न बेबीलोना बै बन्दी होइया पजाइणै तक चौदह पीढ़ी हुई ।

## यीशु रा जन्म

18 ऐबै यीशु मसीह रा जन्म एण्टे तैरहे हुआ कि जैबै तेइरी आमा मरियमै री मँगणी युसुफा सँघे हुई, ता तिन्हरै कड्डा मिलणै न पैहिलै ना मरियम पवित्र आत्मा संघे सुजदी रौही । 19 तेसरै लाड़ै युसुफे जो धर्मी ती होर तेसा बै बदनाम नी ती केरना चाँहदा तेसा बै चुप-चाप छोड़नै रा विचार केरु । 20 जैबै सौ इन्हा गल्लै रै बारै ना सोचदा लागा ती ता प्रभु रा स्वर्गदूत तेइबै सुपनै ना हेरुइया बोलदा लागा; "ओ युसुफ दाऊदै री सन्तान तू आपणी लाड़ी मरियमा बै आपणै ओखै आणनै बै मत डौरदा किबैकि जे तेसरै पेटा ना सा सौ पवित्र आत्मै री धिरै ना सा ।" 21 तेसा बेटा जौणना होर तू तेइरा नाँ यीशु रखेई, किबैकि तेई आपणै लोका रा तिन्हरै पापा ना उद्धार केरना । 22 ऐ सेभ किछ एथै री तक हुआ कि जे वचन प्रभुए भविष्यवक्तै रै द्वारा बोलू सा सौ पूरा लोड़ी हुआ । 23 कि, "हेरा कुँआरी सुजदी रौहणा होर एक बेटा जौणना होर तेइरा नाँ इम्मानुएल रखिणा जौसरा मतलब सा 'परमेश्वर आसा सँघे ।" 24 युसुफे नीजा ना उठिया प्रभु रै दूतै रै बोलणै रै मुताबिक आपणी लाड़ी आपू आगै आणी । 25 होर जौ दौई तेसै बेटै बै जन्म नी धिना सौ तेसा सँघे नी सुता होर जैबै तेसै बेटै बै जन्म धिना ता युसुफे तेई शोहरु रा ना यीशु रखू ।

### ज्योतिषी रा एणा

2 हेरोदेस राजे रै बौक्ता ना ज़ैबै यहूदिया ज़िल्लै रै बैतलैहमा ना यीशु रा जन्म हुआ ता हेरा, पूर्व दिशा ना कई ज्योतषी यरुशलेम ना एजिया पुछ्दै लागै । 2 यहूदी रा राजा जौसरा जन्म हुआ सा कौखै सा? किबैकि आसै पूर्व दिशा न तेइरा तारा हेरु सा होर आसै तेइबै नमस्कार केरदै आरे सी । 3 ऐ शुणिया हेरोदेस राजा होर यरुशलेमै रै सारै लोका डौरै । 4 होर तेइयै यरुशलेमै रै सारै महापुजारी होर धर्मज्ञानी ना कड्डे केरिया पुछ्, मसीहा रा जन्म कौखै होणा चाहिये? 5 तिन्है तेइबै बोलू, यहूदिया ज़िल्लै रै बैतलैहमा न किबै कि भविष्यवक्तै ऐण्ढाए लिखू सा । 6 हे बैतलैहम, जे यहूदा देशा ना सा, तू कौसी बी रीतियै यहूदै रै अधिकारी ना होछा नी आँथी, किबैकि तो ना एक राजा निकळणा होर तेई मेरी प्रजा इस्त्राइलै री हेर शुण केरनी । 7 तैबै हेरोदेस राजे चुप केरदै ज्योतषी शाधिया तिन्हा ना पुछ्, कि तारा ढीक कुणी बौक्ते हेरुआ दा ती । 8 होर तेइयै ते ऐण्ढै बोलिया बैतलैहमा बै भजे कि ज़ाईया तेई बालकै रै बारै न ठीक-ठीक पता केरा होर जैबै सौ मिलला ता मुँबै खबर देइत् ताकि हाँबी ज़ाइया तेइबै प्रणाम केरनू । 9 ते राजे री गल शुणिया नौठै होर हेरा, जे तारा तिन्है पूर्व दिशा ना हेरु ती सो तिन्हा आगै-आगै चैलू होर जौखै सो शोहरु ती तेसा जैगहा आगै पुजिया रुकु । 10 तेई तारै बै हेरिया ते बोहु खुश हुऐ । 11 होर तेई घौरा ना पुजिया सो शोहरु तेइरी आमा मरियमा सँघै हेरु होर टुँबडै पौडिया तेईबै प्रणाम केरु होर आपणै-आपणै झोले खोलिया तेइबै सुना, लोबान होर गन्धरसे री भेंट चढाई । 12 होर सुपनै ना ऐ चिताउणी पाइया कि हेरोदेसा आगै बापस हेरीत् जान्दै ते होरी बौतै आपणै-आपणै देशा बै नौठै ।

### मिस्र देशा बै जाणा

13 तिन्हरे जाणै ना बाद हेरा प्रभु रै एकी दूतै सुपनै ना युसुफा बै हेरुइया बोलू, उठ; तेई शोहरु होर तेइरी आमा बै लेइया मिस्र देशा बै जा होर जैबै तक हाँऊ तौभै नी बोलनू तू तौखै रौही किबैकि हेरोदेस एई शोहरु बै तोपणू आला सा कि एइबै मारिया खेत केरला । 14 सौ रातियै उठिया शोहरु होर तेइरी आमा लेइया मिस्र देशा बै नौठा । 15 होर हेरोदेस मौरनै ढौई तौखै रौहू कि सौ वचन जो प्रभुऐ भविष्यवक्तै रै द्वारा बोलू ती कि मैं आपणा बेटा मिस्रा ना शाधू सौ पूरा होला । 16 जैबै हेरोदेसै ऐ हेरु कि ज्योतषियै मूँ सँघै धोखा केरु तैबै सौ झिका सँघै भौरुआ होर लोका बै भेजिया ज्योतषी ना पुछ्ऐदै ठीक-ठीक बौक्ते रै मुताबिक बैतलैहम होर औरलै पौरलै सारै शोहरु जो दूई बौषै रैती होर एथा ना होछै ती मारनै द्याऐ । 17 तैबै जे वचन यिरमियाह भविष्यवक्तै बोलू ती सौ पूरा हुआ । 18 कि रामाह ना एक बड़ा विलाप होर रोणा शुणुआ, राहेल आपणै शोहरु री तेंइयै रौंदी लागी ती होर शान्त नी ती होणा चाहदी किबैकि एबै ते नेई रौहे ।

### मिस्र देशा न वापस एणा

19 हेरोदेसै रै मौरनै ना बाद प्रभु रै दूतै मिस्रा ना युसुफा बै सुपनै न हेरुइया बोलू, 20 कि उठ, शोहरु होर तेइरी आमा बै लेइया इस्त्राइलै रै देशा बै जा किबैकि जो शोहरु रै प्राण लेणा चाहा ती, ते मूँऐ । 21 सौ उठु शोहरु होर तेइरी आमा लेइया इस्त्राइलै रै देशा बै आऊ । 22 पर ऐ शुणिया की अरखिलाउस आपणै बापू हेरोदेसै री जैगहा ना राज केरदा लाग़ा सा सौ तौखै जाणै ना डौरु होर सुपनै ना चिताउणी पाइया गलील देशा बै नौठा । 23 होर नासरत ग्रँ ना रौहदा लाग़ा ताकि सो वचन पूरा होला, जो भविष्यवक्तै रै द्वारा बोलुआ ती, कि तेई नासरी कहलाइणा ।

### यूहन्ना बतिस्मा देणू आळा

3 तिन्हा ध्याडै ना यूहन्ना बपतिस्मै देणू आला एजिया यहूदियै रै जंगला ना ऐ प्रचार केरदा लाग़ा कि, 2 मन फिरात्; किबैकि स्वर्गा रा राज्य नेड आऊ सा । 3 ऐ सौऐ सा जौस री चर्चा यशायाह भविष्यवक्तै केरी ती कि जंगला ना एक हाक पाणू आळै री आवाज ऐंदी लागी सा कि प्रभु रा मार्ग त्यार केरा, तेइरी सडका सिधी केरा । 4 ऐ यूहन्ना ऊँटै रै चंबडै रै झिकडै ला

ती होर आपणै चैकै ना चंबडै रा पट्टा बोना ती । सौ टिटडै होर बोणे रा मखीर खा ती । 5 तैबै यरुशलेम, सारै यहूदिया होर यरदन नौई रै औरलै-पौरलै सारै देशै रै लोका तेई हागै बपतिस्मै लेदै आऐ । 6 होर आपणै-आपणै पापा बै मनिया यरदन नौई ना तेइना बपतिस्मा लेऊ । 7 जैबै तेइयै बोहु सारै फरीसी होर सद्की बपतिस्मा लेदै आपू हागै एँदै हेरै ता तेइयै तिन्हा बै बोलू, ओ शैताना रै शोहरुओ तुसा बै कुणियै दैसू कि एणू आऐ दण्डा ना भैगा? 8 तुसै पाप छौडनै लायक कोई कोम ता केरा । 9 होर आपणै -आपणै मना न ऐ मता सोचा, कि आसरा बापू इब्राहीम सा; किबैकि हाँऊ तुसा न सच बोला सा परमेश्वर इन्हा पात्थरा इब्राहीमा री तेंइयै सन्तान पैदा केरी सका सा । 10 होर ऐबै कराहडू बूटै रै जलाडै हागै रखू सा । जुण बुटा शोभलै फौल नी आणदा तेई काटिणा होर औगी ना फुकिणा । 11 हाँऊ ता तुसा बै पाणी लाइया बपतिस्मा देआ सा पर जे मूँ ना बाद एणू आला सा सौ मूँ ना शक्तिशाली सा । हाँऊ तेइरी बूट चेकणै रै लायक बी नी आँथी । तेई तुसा बै पवित्र आत्मा होर औगियै लाइया बपतिस्मा देणा । 12 तेइरा शूप तेइरै होथा ना सा होर तेई आपणा खौह शोभली तैरहा साफ केरना होर गेहूँ ता तेई आपणै खत्तै ना कड्डा केरने पर भूज ऐण्डी औगी ना पाणा जो कदी बी नी हिशणी ।

### यूहन्ना द्वारा यीशु रा बतिस्मा

13 तेई बौक्ते यीशु गलीला ना यरदन नौई रै कनारै यूहन्ना आगै तेई न बपतिस्मै लेँदा आऊ । 14 पर यूहन्ना ऐण्ढै बोलिया तेई बै रोकदा लाग़ा कि मुँबै तेरे हौथे बपतिस्मै लेणे री जरूरत सा होर तू मूँ हागै आऊ सा? 15 यीशुऐ तेइबै ऐ जवाब धिना कि ऐबै तू ऐण्ढाए होणे दै किबैकि आसरा एसा रीतियै धार्मिकता बै पूरा केरना उचित सा । तैबै तेइयै तेइरी गल मनी । 16 यीशु बपतिस्मै लेइया फट पाणी ना बाहरै आऊ होर हेरा, तेइरी तेंइयै स्वर्ग खुलू होर तेइयै परमेश्वरै री आत्मा कबूतरा साही आपू पँधै उतरदी हेरी । 17 होर ऐण्डी आकाशवाणी हुई, ऐ मेरा प्रिय बेटा सा जूणीना हाँऊ बोहु खुश सा ।

### यीशु री परीक्षा

4 तैबै तेई बौक्ते पवित्र-आत्मै यीशु जंगला बै नेऊ ताकि शैतानै रै द्वारा यीशु री परीक्षा होली । 2 सौ चाली ध्याडी होर चाली राती ना भूखा होर शोखा रौहू, तैबै तेईबै भूख लागी । 3 तैबै परखणू आलै तेईबै नेड एजिया बोलू, अगर तू परमेश्वरा रा बेटा सा ता बोल कि इन्हा पाथरै री रोटी बणली । 4 तेइयै जवाब धिना, पवित्र शास्त्रा न ऐ लिखू सा कि माहू केवल रोटीयै लाइया केलही, नी बल्कि परमेश्वरै रै मुँहा ना निकलणू आलै हर एकी वचनै लाइया जिन्दै रौहणा । 5 तैबै शैतानै सौ पवित्र नगर यरुशलेमा बै नेऊ होर मन्दिरे री सैभी न उथडी जैगा पँधै खडा केरु । 6 होर तेइबै बोलू, अगर तू परमेश्वरा रा बेटा सा ता आपणै आपू बै औखै ना भ्याँऊ शेट; किबैकि शास्त्रा न लिखू सा कि, तेई तेरै बारै ना आपणै स्वर्गदूता बै आदेश देणा होर तिन्हा तू हौथा हौथ चेकणा ताकि तेरी जोंघा ना पाथरै लाइया ठोकर नी लोडी लागी 7 यीशुऐ तेइबै बोलू, “शास्त्रा न ऐ बी लिखू सा: तू आपणै प्रभु परमेश्वरै री परख मत केरदा ।” 8 तैबै शैतानै सो बोहु उथडै ढौगा पँधै नेऊ होर सारी दुनियै रै राज-पाठ रिहाऊ, 9 होर तेइबै बोलू, “अगर तू टुँबडै पौडिया मुँभे प्रणाम केरला होर मेरी भक्ति केरला ता मूँ ऐ संभ किछ तौभै देणा ।” 10 तैबै यीशुऐ तेइबै बोलू, “हे शैतान दूर हो, किबैकि शास्त्रा न लिखू सा, कि तू सिर्फ आपणै प्रभु परमेश्वरा बै प्रणाम केर होर तेइरी भक्ति केर ।” 11 तैबै शैतान तेई हागै ना भैगू होर स्वर्गदूत एजिया तेइरी सेवा केरदै लागै ।

### यीशु री सेवा केरने री शुरुआत

12 जैबै तेइयै ऐ शुणू कि युहन्ना ढौकणे द्याऊ सा ता सौ गलीला बै नौठा । 13 होर नासरता बै छौडिया कफरनहूमा ना जे झीलै रै कनारै जबूलून होर नपताली रै देशा ना सा ज़ाइया रौहदा लाग़ा । 14 ताकि जे यशायाह भविष्यवक्तै रै द्वारा बोलुआ सा सौ पूरा होला । 15 “जबूलून होर नपताली रा देश, झीलै री बौता ना यरदन हागै होरी जाति रा गलील । 16 जे लोका निहारै ना बेटै ती तिन्है बडा प्याशा हेरु होर जे मोऊती रै देशा ना होर छाया ना बेटै ती तिन्हा पँधै प्याशा चमकू । 17 तेई बौक्ते यीशुऐ प्रचार केरना होर

एण्डा बोलणा शुरु केरु कि, “मन फिरात् किबैकि स्वर्गा रा राज्य नेड सा ।”

### पैहले चले बै शधाणा

18 तेइयै गलीलै री झीलै रै कनारै दूई भाई शमौन जुणी बै पतरस बोला सी होर तेई रा भाई अन्द्रियास झीला ना जाल पाँदै हेरै । किबैकि ते मैच्छी ढौकणु आलै ती । 19 होर तिन्हा बै बोलू, “मूँ पिछै एजा, मूँ तुसै माहू ढौकणु आलै बणाणै ।” 20 ते झटपट आपणै जाल छौड़िया तेई पिछै होंडदै लागे । 21 होर तौखैना आगै जेही जाइया तेइयै होर दूई भाई जब्दी रा बेटा याकूब होर तेइरा भाई यूहन्ना हेरु । ते आपणै बापू जब्दी सँघै किस्ती ना आपणै जाल ठीक केरदे लागै ती । तेइयै ते बी शाधे । 22 ते झटपट आपणी किस्ती होर बापू छौड़िया तेई पिछै चोले ।

### यीशु रा बमारी बै ठीक केरना

23 यीशु सारै गलीला ना घूमदा तिन्हरी सभा ना उपदेश देंदा होर परमेश्वरै रै राज्य रा प्रचार केरदा रौहू होर लोकै री हर तरहै री बीमारी होर कमजोरी बै दूर केरदा रौहू । 24 सारै सीरिया देशा ना तेइरा यश फैलदा रौहू । लोका सेभ बीमारा बै जे कई किस्मै री बीमारी होर दुःखा ना डूबै ती होर जुणी बै चेट्ट फसै ती, जुणी बै मिर्गी एजा ती होर जुणीबै ध्रंग हुआ ती तेई आगै आणै होर तेइयै ते सब ठीक केरै । 25 गलील होर दिकापुलिस, यरुशलेम, यहूदिया होर यरदन नौई रै पौरा ना भीड़ै री भीड़ तेई पिछै हुई ।

### यीशु रा पहाड़ी उपदेश

5 सौ एसा भीड़ा बै हेरिया उथडी ज़ैगा पेंधा बै नौठा होर ज़ैबै बेठा ता तेइरै चेलै तेई हागै आरे । 2 तैबै सौ तिन्हा बै ए उपदेश देंदा लागा,

### शोभला वचन

3 धन्य सी ते, जुणा मनै रै दीन सी किबैकि स्वर्गा रा राज्य तिन्हा सा । 4 धन्य तै जुणा शोक केरा सी किबैकि तिनहा बै शान्ति मिलणी । 5 धन्य सी तै जुणा शोक केरा सी किबैकि तिनहा बै शान्ति मिलणी । 6 धन्य तै जुण धर्म रै भुखे हो शोखे सी, किबैकि तिन्हा रोजणा । 7 धन्य सी ते जो दया केरा सी किबैकि तिन्हा पेंधे बी दया केरिनी । 8 धन्य सी ते जो सारै मन साफ़ सी किबैकि तिन्हा परमेश्वर हेरना । 9 धन्य सी ते जो मेल करणु आलै सी किबैकि तिन्हा परमेश्वरै रै बेटै कहलाइणा । 10 धन्य सी ते जुणा धर्म री वजहा ना दुःख सहन केरा सी किबैकि स्वर्ग रा राज्य तिन्हा सा । 11 धन्य सी तुसै, ज़ैबै लोका झूठ बोली बोलिया तुसरै खिलाफ हर प्रकारै री बुरी गला केरले । 12 खुश होर मगन होईत् किबैकि तुसरी तैइयै स्वर्गा ना बड़ा इनाम सा किबैकि तिन्हा ते भविष्यवक्ता जो तुसा ना पैहिलै ती एसा रीतियै सताए ती ।

### लुण होर पियाशा

13 तुसै धौरती रै लुण सी, पर अगर लूणा रा स्वाद बिगड़ला ता सौ कुणी चीज़े लूणा केरिना? तैबै सौ कौसी कोमा रा नी सिवाय एथै रै कि स बाहरै शेटिला होर माहू री ज़ोंघा हेठै जखड़िला । 14 तुसै दुनियै रै प्याशै सी, जुण ग्राँ ढौगा पेंधे सा सौ छुपी नी सकदा । 15 लोक दीऊँआ बकेइया माँजै हेठै नी बल्कि दीपदानी पेंधे रखा सी, तैबै तुई लाइया घौरा रै सैभी लोका बै प्याशा होआ सा । 16 तैण्डाए तुसरा प्याशा माहू सामनै लोडी चमक कि ते तुसरै भलै कोमा बै हेरिया तुसरै बापू री जे स्वर्गा ना सी सराहणा केरले ।

### कनूने री शिक्षा

17 “ए मता सोचदै कि माहणु मूसै री धर्मविधि या भविष्यवक्तै लिखूँदै बै नष्ट केरदा आऊ सा । हाँऊ तैथा बै नष्ट केरदा नी बल्कि पूरा केरदा आऊ सा ।” 18 हाँऊ तुसा बै सच बोला सा कि ज़ैबै तक धौरती होर आसमान खत्म नी होले, मूसै री धर्मविधि रा एक-एक शब्द होर एक-एक अक्षर बणी रौहणा । तेई तैबै तक बणी रौहणा ज़ैबै तक सौ पूरा नी होला । 19 जो इन्हा होछी-होछी आज्ञा ना एकी बै बी नी मैनला होर तैण्डाए होरी बै बी सिखा सा,

सौ स्वर्ग रे राज्य ना सैभी ना होछा सा । पर जुण तिन्हा आज्ञा बै मैना सा होर सिखा सा सौये स्वर्ग राज्य ना सैभी ना बड़ा सा । 20 किबैकि हाँऊ तुसा बै बोला सा कि अगर तुसरी धार्मिकता शास्त्री होर फरीसी ना ज़ादा नी होली ता तुसै स्वर्ग राज्य ना कदी बी नी प्रवेश होणा ।

### झिक होर हत्या

21 तुसै शुणु सा, कि पैहिलैकाल लोका बै बोलू ती कि हत्या हेरीत केरदै, होर जुण हत्या केरला सो कचहरी ना सज़ा रा हकदार सा । 22 पर हाँऊ तुसा बै बोला सा, कि जुण आपणै भाई पेंधे गुस्सा केरा सा सौ कचहरी ना सज़ा रा हकदार सा होर जुण आपणै भाई बै नकम्मा बोला सा सौ महासभा ना सज़ा रा हकदार सा होर जुण बोलला, “हे मूर्ख” स नरकै री औगी री सज़ै रै लायक सा । 23 अगर तू आपणी भेंट वेदी हागै आणला होर तौखै तू याद केरला कि मेरै भाई रै मना ना मेरी तैइयै किछ विरोध सा ता आपणी भेंट वेदी हागै छोड़ । 24 होर ज़ाइया पैहिलै आपणै भाई सँघे मेल मिलाप केर तैबै एजिया भेंट चढ़ा । 25 ज़ैबै तक तू आपणै मुद्दई सँघे बोला ना सा तेई सँघे फटाफट मेल मिलाप केर कोइछै एण्डा नी लोडी हुआ कि मुद्दई तौभै हाकिमै रै हवालै केरला होर हाकिम तौभै सपाही रै हवालै केरला होर तौभै जेला ना पालै । 26 हाँऊ तुसा बै सच बोला सा ज़ैबै तक तू कौड़ी-कौड़ी नी चुकाला तैबै तक त तौखना नी छुटणा ।

### बुरे कौम

27 तुसै शुणु सा कि ए बोलू सा, ‘व्यभिचार हेरीत् केरदै ।’ 28 पर हाँऊ तुसा बै ए बोला सा, जुण कौसी बेटडी पेंधे बुरी नजर डाह सा तेइयै आपणै मना ना तेसा सँघे व्यभिचार केरु । 29 अगर तेरी दैहिणी औछी ना तू पाप केरा सा ता तू तेसा बै खोलिया शेट किबैकि तेरी तैइयै ए भला सा कि तेरे आंगा ना एक नष्ट होला होर तेरी सारी देह नरका ना नी पाणी पौडली । 30 अगर तेरा दैहिणा हौथ त ना पाप करा सा ता तू तेई बै काटिया शेट किबैकि तेरी तैइयै ए भला सा कि तेरे एकी अंगा ना एक नाश होला होर तेरी सारी देह नरका नी पौडली ।

### तलाक

31 ए बी बोलुआ सा, ‘ज़ैबै कोई आपणी लाडी बै तलाक देणा चाहा सा ता सौ तेसा बै तलाक देला ।’ 32 पर हाँऊ तुसा बै बोला सा, ‘जुण आपणी लाडी बै व्यभिचार छौड़िया कौसी होरी वजहा ना छौड़ा सा ता स तेसा ना व्यभिचार करा सा होर जे कोई तलाक शुधा सँघे व्याह केरा सा सौ व्यभिचार केरा सा ।’

### कसम

33 तुसै ए बी शुणु सा कि आसरै बुजुर्गा बै बोलू ती कि झूठी कसमा हेरीत् खौँदै पर आपणै प्रभु री तैइयै आपणी कसमा पूरी केरीत् । 34 पर हाँऊ तुसा बै ए बोला सा कि कदी बी कसमा हेरीत् खौँदै ना ता स्वर्ग री किबैकि सौ परमेश्वर रा सिंहासन सा । 35 ना धौरती री किबैकि सौ तेइरै जोंघै री चोऊकी सा, ना यरुशलैमै री किबैकि सौ महाराजै रा नगर सा । 36 आपणी मुँडी री बी कसम हेरीत् खान्दै किबैकि तू चोड़ै रा एक बाल बी शेता या काला नी केरी सकदा । 37 पर तुसरी गैला न हाँ ता हाँ होर नेई ता नेई हो, किबैकि जो एथा ना ज़ादा होआ सा सौ बुराई धिरै ना होआ सा ।

### बदले री भावना

38 तुसै शुणु सा कि ए बोलुआ सा, ‘औछी रै बदलै औछी होर दोंदै रै बदलै दोंद ।’ 39 पर हाँऊ तुसा बै बोला सा कि कौसी भी बुराई रा सामना हेरीत केरदै, पर जुण तेरै दैहिणै गलोटै ना थप्पड़ बाहला ता तू तेई धिराबै दुजा गलोटा बी फेरै । 40 जुण तेरा कुरता नेणा चाहला तेईबै आपणा चोगा बी दै । 41 अगर कोई आपणै कौमा री तैइयै एक मील नेला ता तू तेई सँघे दूई मीला

दोई जा । 42 मुँगणू आरे बै नाँ मता केरदै । जुण तुसा ना उधार मुँगा सी तिन्हा बै दैआत् ।

### दुश्मना सेंघे प्यार

43 तुसै शुणू सा कि ऐ बोलू सी, कि तू आपणै पड़ेसी सेंघे झुरी रैखा होर बैरी सेंघे बैर । 44 पर हाँऊ तुसा बै बोला सा कि आपणै बेइरी सेंघे बी झुरी रैखा होर जुणा तुसा बै तंग केरा सी तिन्हरी तैइयै प्रार्थना केरा । 45 ऐण्डा केरनै सेंघे तुसा परमेश्वरै री सन्तान ठेहरना किबैकि सौ भलै होर बुरै दुही पेंधे धुपा भेजा सा होर तिन्हा दुही बै बराबर गाश देआ सा । 46 अगर तुसै आपू सेंघे झुरी केरनू आरे सेंघे झुरी केरा सी ता तुसरा की फायदा होणा किबैकि पापी बी ऐण्डा केरा सी । 47 होर अगर तुसै आपणै भाई बै केल्ही नमस्तै केरा सी ता तुसै कुण बड़ा कोम केरा सी कि पापी बी ऐण्डा नी केरदै? 48 तुसै सिद्ध बणा, जैण्डा तुसरा स्वर्गा ना रोहणूआळा परमेश्वर सिद्ध सा ।

### दान

6 होशियार रोहा! तुसै होरी ना रिहाणै री तैइयै धर्मै रै कोम मता केरदै, नी ता तुसै आपणै परमेश्वरा ना किछ बी इनाम नेई पाणा । 2 जैबै तू दान केरला, ता आपणा नाँ मत खौजणै ध्यान्दा, जैण्डा कपटी लोका सभा होर गली ना केरा सी ताकि लोका तिन्हरी बड़ाई केरलै । हाँऊ तुसा बै सच बोला सा तिन्है आपणा इनाम पाऊ सा । 3 पर जैबै तू दान केरला, ता तेरै बाँउरे हौथा बै पता नी लोड़ी चैलू कि तेरा दैहिणा हौथ की केरा सा । 4 ताकि तेरा दान गुप्त लोड़ी रौहू, होर तैबै तेरा परमेश्वर हेरला ता, तेई तौभै इनाम देणा ।

### प्रार्थना

5 होर जैबै तू प्रार्थना केरला, ता कपटी साही हेरी केरदा किबैकि लोका ना रिहाणै री तैइयै सड़का ना खड़े होइया प्रार्थना केरना तिन्हा बै शोभला लाग़ा सा । हाँऊ तुसा बै सच बोला सा तिन्हा बै आपणा इनाम मिलू । 6 पर जैबै तू प्रार्थना केरला ता दुआर बन्द केरिया आपणै परमेश्वरा आगै प्रार्थना केर तैबै परमेश्वरा तौभै इनाम देणा । 7 प्रार्थना केरदी बार होरी लोका साही हक-बक नी केरनी; किबैकि ते बुझा सी कि बोहू बोलणै सेंघे परमेश्वरा तिन्हरी प्रार्थना शुणनी । 8 तुसै तिन्हा साही मता बणदै किबैकि तुसरा परमेश्वर मुँगणै ना पैहलै ज़ाणा सा कि तुसरी ज़रूरत की सा । 9 तुसै एसा रीतिरे प्रार्थना केरीत, “हे आसरे बापु जी जो तू स्वर्गा ना सा; तेरा नाँ पवित्र मनुआ लोड़ी ।” 10 एसा धोरती ना तेरा राज्य लोड़ी आऊ; तेरी इच्छा जैण्डा स्वर्गा ना पूरी होआ सा, तैण्डा एसा धोरती ना बी पूरी लोड़ी हुई । 11 रोज़की रोटी आसा बै देंदा रोह । 12 जैण्डा आसै आपणै अपराधी बै माफ केरा सी, तू बी आसरे अपराधा बै माफ केर । 13 “आसा बै परीक्षा ना मत पौडनै देंदा पर हर बुराई ना बचा; किबैकि राज्य, पराक्रम होर महिमा सदा तेरै सी ।” आमीन । 14 अगर तुसै लोकै रै अपराधा बै माफ केरलै ता परमेश्वरा बी तुसरै अपराध माफ केरनै । 15 अगर तुसै लोकै रै अपराधा बै माफ नी केरलै ता परमेश्वरा बी तुसरै अपराध माफ नी केरनै ।

### ब्रत

16 जैबै तुसै ब्रत केरलै ता कपटी साही मुँह बणाइया मता बेशदै किबैकि ते लोका बै रिहाणै री तैइयै आपणा मुँह बणाइया बेशा सी, कि तिन्है ब्रत केरू सा । हाँऊ तुसा बै सच बोला सा कि तिन्हा बै तिन्हरा इनाम मिलू । 17 पर जैबै तू ब्रत केरला ता आपणी मुँडी ना तेल पाई होर मुँह धोई । 18 ताकि लोका बै पता नी चैलू लोड़ी कि तू ब्रत केरदा लाग़ा सा । बल्कि तेरा परमेश्वर जुणी बै तू हेरी नी सकदा, सौ तौभै हेरला कि तू ब्रत केरदा लाग़ा सा । तैबै तेरै परमेश्वरा जे किछ कोम तू चुपचाप केरा सा तूईरा रा तौभै इनाम देणा ।

### स्वर्गा रा धन

19 आपणी तैइयै एसा धोरती ना धन कड्डा मता केरदै किबैकि तेईबै कीड़े नाश केरा सी होर चोर चोरिया नेई सका सी । 20 बल्कि आपणी तैइयै स्वर्गा ना धन कड्डा केरा, तौखे ना ता कीड़ा नष्ट केरी सकदा, ना चोर चोरी सकदा । 21 याद रैखा ज़ौखै तुसरा धन होला तौखे तुसरै मन बी लागी रोहणा ।

### शरीरा रा पियाशा

22 देही रा दीऊआ औछी सी; अगर तेरी औछी साफ होली ता तेरी पूरी देह प्याशी सा । 23 पर तेरी औछी अगर बुरी सी ता तेरी पूरी देह निहारी सा । जे प्याशा आन्ध्रै सा सौ अगर निहारा होला ता सौ निहारा केतरै खतरनाक (किद्ध) होणा ।

### परमेश्वर होर धन

24 कोई बी माहू दूई स्वामी री सेवा नी केरी सकदा, किबैकि तेई एकी सेंघे बैर होर दूजै सेंघे झुरी रैखणी । तुसै धन होर परमेश्वर दुही री सेवा नी केरी सकदै । 25 हाँऊ तुसा बै बोला सा, आपणी ज़ानी री तैइयै फिक्र मता केरदै कि आसा की खाणा होर की पीणा? न आपणी देही री तैइयै कि आसा की लाणा? कि ज़ान रोटी ना होर देह झिकड़ै ना ज़ादा कीमती नी आँधी? 26 चीड़-चकारू बै हेरा न ते बाँहदै, न ते काटदै होर न ते कोठड़ी ना नाज़ भोरदै । पर तुसरा परमेश्वर बापू तिन्हरा पेट भौरा सा । तैबै कि तुसै तिन्हा चीड़-चाकरू ना ज़ादा कीमती नी आँधी? 27 तुसा मौँझै ऐण्डा कुण सा जो कि चिन्ता फिक्र केरिया आपणी उम्रा बै बढ़ाई सका सा? 28 होर झिकड़ै री तैइयै किबै फिक्र केरा सी? बोणा रै फुला पेंधे ध्यान दैआत् कि ते कैण्डै बैदा सी, ते न मेहनत केरदै न कोतदै । 29 तैबै बी हाँऊ तुसा बै बोला सा कि सुलैमान राज़े बी आपणी सारी जिन्दगी ना तन्हा ना बढ़िया झिकड़ै नी लाए । 30 जैबै परमेश्वर थाचै रै गाह बै सज़ाई सका सा जो औज़ ता सा पर काल तेसा औगी ना फुकिणा हे थोड़ा वशाह केरनू आरे लोको कि तेई तुसै नी सज़ाणै? 31 तुसै चिन्ता केरिया ऐ मता बोलदै कि आसा की खाणा, की पीणा होर की लाणा? 32 किबैकि होरा लोका इन्हा जिज़ा बै तोपदै रोहा सी होर तुसरा परमेश्वर बापू ज़ाणा सा कि तुसा बै इन्हा चीज़े री ज़रूरत सा । 33 तुसै पैहिलै तेइरै राज्य हो धर्म री खोज केरा ए सारी चीज़ा तुसा बै मिलणी । 34 तैबै कालकी तैइयै चिन्ता मता केरदै किबैकि कालके ध्याड़े आपणी तैइयै आपै चिन्ता केरनी । औज़की तैइयै औज़का दुःख रज़ सा ।

### दूजै पेन्धे दोष नेई लाणा

7 दोष मता लान्दै, ताकि तुसा पेंधे भी दोष नी लाणा लोड़ी । 2 किबैकि जैण्डा तुसै होरी पेंधे दोष ला सी, तैण्डाए तुसा पेंधे बी दोष लाग़ाणा । होर जुणी नापै तुसै नापा सी तेही नापा सेंघे तुसरी तैइयै बी नापिणा । 3 तू आपणै भाई री औछी रै आह्ले बै किबै हेरा सा जैबै कि तौभै आपणी औछी रै लकड़ा रा पता नी चैलदा? 4 जैबै तेरी आपणी औछी ना एतरा बडा लकड़ सा ता तू आपणे भाई बै कैण्डै बोली सका सा कि एज हाँऊ तेरी औछी रै आह्ले बै खोलनू? 5 हे कपटी पैहिलै आपणी औछी रै लकड़ा बै खोल । तैबै तू आपणै भाई री औछी रै आह्ले बै शोभली तैरहा हेरिया खोली सका सा । 6 पवित्र चीज़ा कुतै बै मता देंदै होर न आपणै मोती बै सुँगरा हागै पान्दै । कोइन्छे ऐण्डा नी लोड़ी हुआ कि ते तिन्हा बै खूरै लाइया जखड़लै होर पिछै फिरिया तुसा बै खालै ।

### मुँगलै ता मिलणा

7 मुँगलै ता तुसा बै देणा; तोपलै ता तुसा बै मिलणा होर खटखटालै ता तुसरी तैइयै दुआर खोलिणा । 8 किबैकि जुण मुँगा सा तेईबै देआ सी, जुण तोपा सा तेईबै मिला सा होर जुण खटखटा सा तेईरी तैइयै दुआर खोलिया सा । 9 तुसा मौँझै ऐण्डा बापू कुण सा जो आपणै शोहरू बै रोटी री जैगहा ना पाथर देला? 10 या मैछी मुँगला ता कीड़ा देला? 11 जैबै तुसै बुरै होइया आपणे

बाल-बच्चें बें शोभली चीजा देणा ज़ाणा सी ता परमेश्वरा तुसाबें शोभली चीजा किबें नी देणी? 12 ज़ैण्डा व्यवहार तुसै होरी ना चाहा सी तुसै बी तिन्हा सेंघें तैण्डाए व्यवहार केरा । व्यवस्था होर भविष्यवक्ता बी एण्डी शिक्षा देआ सी ।

### सैंगड़ा होर चौड़ा

13 सोंगड़े दुआरें आघें ज़ाणें री कोशिश केरा किबैकि चौऊड़ा सा सौ दुआर जे विनाश करा सा । बोहू सी जो तेई दुआरें आघें ज़ा सी । 14 सोंगड़ा सा सौ दुआर होर मशिकल सा स बौत जे ज़िदगी देआ सा होर थोड़ें सी जो तेसाबें पा सी ।

### जैण्डा बूटा तैण्डाए फौळ

15 झूठें भविष्यवक्ता ना होशियार रौहात् जो भेड़ें रें रूपा ना तुसा हागें एजा सी पर आन्ध्र ना ते खाणू आरें भेड़ियें सी । 16 तिन्हरें व्यवहारा ना तुसा ते पछियाणनै । कि लोका जिद्वी झौकड़ा ना अँगूर चोड़ा सी? 17 ठीक एण्डी तैरहा हर एक शोभलें बूटें ना शोभलें फ़ौल लागा सी होर नक्कमै बूटें ना बुरें फ़ौल लागा सी । 18 शोभलें बूटें ना बुरें फ़ौल नी लागी सकदें होर नक्कमै बूटें ना शोभलें फ़ौल लागी सकदें । 19 जुणी बूटें ना शोभलें फ़ौल नी लगदें तेईबें काटा सी होर ओगी ना फुका सी । 20 तिन्हरें फ़ौला ना तुसै तिन्हाबै पछियाणी सका सी । 21 जुणा मुँबें हे प्रभु हे प्रभु बोला सी तिन्हा ना हर एक स्वर्गा बें नी ज़ाणा पर जुण परमेश्वरें री आज्ञा पेंधें चला सा सौहें स्वर्गा बें जाई सका सा । 22 तेई ध्याड़ें ना बोहू लोका मुँबें बोलणा; हे प्रभु कि आसै तैरें ना ना भविष्यवाणी नी केरी, कि आसै तैरें ना ना लोकें रें चेटू नी खोलें होर कि आसै तैरें ना ना चमत्कार नी केरें? 23 तैबें मूँ तिन्हा बें खुलिया बोलणा, "हाँऊ तुसा बें नी ज़ाणदा, हे बुरें कोम केरनू आरें लोको मूँ हागें ना दूर ज़ाआत् ।

### घौर बणाणें आळें दुई माहणु बुद्धिमान होर मुख

24 जुण मेरी गला बें शुणा सा होर मैना सा सो तेई समझदार माहू साही सा जुणिये आपणा घौर पैकी ज़ैगहा पेंधें बणाऊ । 25 गाश आऊ, औढा आऊ होर व्याना चैलू पर सौ घौर नौ ढौऊ किबैकि तेइरी मनियाद पैकी ज़ैगहा पेंधें पौई ती । 26 पर जुण मेरी गला बें शुणा सा पर तिन्हा पेंधें नी चैलदा सौ तेई मूर्ख माहू साही सा जुणिये आपणा घौर बालू पेंधें बणाऊ । 27 गाश आऊ, औढा आऊ होर व्याना चैलू होर सौ घौर ढौऊ होर तेइरा सत्यानाश हुआ । 28 ज़ैबें यीशुए ए गला केरी ता लोकें री भीड़ तेइरें उपदेश शुणिया हैरान हुई । 29 किबैकि सौ यहूदी धर्मगुरु साही नी बल्कि आपणें पूरें अधिकारा सेंघें उपदेश देआ ती ।

### कोढ़ी री बमारी ठीक केरनी

8 ज़ैबें सौ ढौगा पेंधें ना भ्याऊँ आऊ ता लोकें री बोहू बड़ी भीड़ तेई पिछें चैलदी लागी । 2 होर हेरा, एकी कोढ़िये एजिया तेईबें प्रणाम केरु होर बोलू: हे प्रभु अगर तुसै चाहलें ता मुँबें शुद्ध केरी सका सी । 3 यीशुए आपणें हौथे लाइया सौ छुंगू होर बोलू, "हाँऊ चाहा सा कि तू शुद्ध होला होर सौ तुरन्त आपणें कोढ़ा ना ठीक हुआ । 4 यीशुए तेईबें बोलू: शुण कौसी बें हेरी बोलदा पर ज़ाइया पुजारी बें रिहा होर मूसै री विधि रें मुताबिक चढ़ावा चढ़ा ताकि तिन्हरी तैइयें गवाही होली ।

### एक सुबेदारा रा बशाह

5 ज़ैबें यीशु कफरनहूमा बें आऊ ता एकी सुबेदारें एजिया तेई आगें विनती केरी । 6 "हे प्रभु मेरें घौरा ना मेरा नोकर ध्रेंगें री बिमारिये लाइया दुःखी सा ।" 7 यीशुए तेईबें बोलू, "मूँ एजिया सौ ठीक केरना ।" 8 सुबेदारें जवाब धिना, "हे प्रभु हाँऊ एस लायक नी आँथी कि तुसै मेरें घौरा एलें । तुसै सिर्फ वचन बोललें ता मेरें नोकरा ठीक होणा । 9 किबैकि हाँऊबी कौसी रें अधीन सा होर सिपाही मेरें अधीन सी । ज़ैबें हाँऊ एकी बें ज़ाणें बें बोला सा ता सौ ज़ा सा होर दुजें बें एणें बें बोला सा ता सौ एजा सा होर आपणें नोकरा बें बोला सा कि एण्डा केर ता सौ केरा सा 10 ए शुणिया यीशु बें हैरानी हुई होर जे तेई पिछें

एन्दै लागें ती तिन्हा बें बोलू एण्डा वशाह केरनू आरें मुँबें इस्राइला ना बी नी मिलें । 11 हाँऊ तुसा बें बोला सा, कि पूर्व होर पश्चिमा ना बोहू सारें लोका एजिया अब्राहम, इसहाक होर याकूबा सेंघें स्वर्ग रें राज्य ना बेशणा । 12 पर राज्य री सन्तान बाहरें निहारें ना पाइणें होर तौखें तिन्हाबें बोहू दुःख होणा । 13 यीशुए सुबेदारा बें बोलू, "ज़ा ज़ैण्डा तेरा वशाह सा तैण्डा तेरी तैइयें लोड़ी हुआ ।" होर तेइरा नोकर तेसा घड़ियें ठीक हुआ ।

### कई प्रकारा रें बमार ठीक केरने

14 ज़ैबें यीशु पतरसै रें घौरा बें आऊ ता तेइयें तौखें पतरसै री शौशू हेरी जुण कि बीमार ती । 15 यीशुए तेसरा हौथ छुंगू होर सौ ठीक हुई होर सौ उठिया तेइरी सेवा केरदी लागी । 16 सोनकी घेरें तिन्हें बोहू सारें बीमार लोका यीशु हागें आणें जुणीबें चेटू फसै ती । यीशुए ते चेटू आपणें वचना सेंघें खोलें होर सारें बीमार माहू ठीक केरें 17 ताकि यशायाह भविष्यवक्ते बोलू दा वचन पूरा लोड़ी हुआ कि तेइयें आपू आसरी कमजोरी होर बीमारी चैकी ।

### यीशु रा चले बणणें री कीमत

18 यीशुए आपणें चोहू पासै लोकें री भीड़ हेरिया झीला पौरें ज़ाणें रा हुक्म धिना । 19 एकी धर्मविधि ज़ाणनू आलें यीशु हागें एजिया तेईबें बोलू, "हे गुरु जी, जौखें बी तू ज़ाला मूँ पिछें एणा ।" 20 यीशुए तेइबें बोलू, "गीदड़ें रें होर चीड़ू री बी रौहणें री ज़ैगहा होआ सा पर माहू रें बेटें अर्थात् मुँ आगें मुँडी गजिहाणें री बी ज़ैगहा नी आँथी ।" 21 एकी होरी चलें तेइबें बोलू, "हे प्रभु पैहिलें मुँबें ज़ाणें दै कि हाँऊ आपणें बापू बें पौथिया एनू ।" 22 यीशुए तेइबें बोलू, "तू मूँ पिछें एज होर जे परमेश्वरें री नजरी ना मूँएदें सी तिन्हा आपणें मुरदें पौथणें दै ।"

### तूफाना बें शान्त केरना

23 ज़ैबें सौ किस्ति ना चैदू ता तेइरें चेलें बी तेई पिछें चैलें । 24 शुणा, झीला ना एक बड़ा तूफान आऊ होर किस्ति पाणी ना डुबदी लागी होर यीशु सुतादा ती । 25 तैबें तिन्हें भेटी एजिया सौ बझेऊ होर बोलू, "हे प्रभु आसा बें बचा आसै डुबदें लागें सी ।" 26 तेइयें तिन्हा बें बोलू, "तुसै आपणा वशाह कम केरिया किबें लागें सी डौरदें? तैबें तेइयें उठिया औढा होर पाणी बें शान्त होणें रा हुक्म केरु होर सौ शान्त हुआ ।" 27 तैबें लोका हैरान होइया बोलदें लागें, "ए कण्डा माहू सा औढा होर पाणी बी एइरें हुक्कमा बें मैना सी ।"

### दुष्टात्मा न ग्रस्त माहणु बें ठीक केरना

28 ज़ैबें सौ झीला पौरें गिरसेनी रें देशा ना पुजू ता तौखें तेइबें चेटू फसैदें दूई माहू मिलें । तिन्हरी डौरें तेसा बौतें आघें कोई बी नी ती जान्दा । 29 तिन्हें ज़ोरा सेंघें तेइबें बोलू, ओ परमेश्वरें रें बेटेआ; आसाबें तौ सेंघें की कोम? कि तू बौक्ता ना पैहिलें आसा बें दुःख देणें री तैइयें ओखें आऊ सा? 30 तिन्हा ना थोड़ी दूर सुंगरा रा एक छुण्ड चौरदा लागी ती । 31 चेटुए तेई आगें विनती केरी कि तू आसा बें सुंगरें रें छुण्डा बें भेज । 32 यीशुए तिन्हा चेटू बें बोलू, ज़ाआत्, ते निकलिया सुंगरा बें फ़सै होर सारा छुण्ड पानी ना डुबिया मूँआ । 33 सुंगर चारनू आलें भैगें होर ग्रॉ ना ज़ाइया सैभी बें ए गला दैसी । 34 होर हेरा, सारें ग्रॉ रें लोका यीशु सेंघें मिलदें आरें होर तेई हेरिया विनती केरदें लागें कि आसरें ग्रॉ ना फेटें जा ।

### ध्रन्गा रें बमारी बें ठीक केरना

9 तैबें सौ किस्ति ना चैदिया आपणें ग्रॉ बें आऊ । 2 होर कई लोकें एक ध्रंगा रा मरीज माँजें पेंधें यीशु आगें आणू । यीशुए तिन्हरा बशाह हेरिया तेई ध्रंगें रें मरीजा बें बोलू, ओ बेटा, हौंसला रख तैरें पाप माफ हुऐ । 3 कई धर्मविधि ज़ाणनू आलें साँचू कि ए ता परमेश्वरें री निन्दा केरदा लागी सा । 4 यीशुए तिन्हरी मनै री गल ज़ाणिया बोलू, तुसै आपणें-आपणें मना ना बुरा विचार किबें सोचदें लागें सी? 5 सान की सा, एण्डा बोलणा कि तैरें पाप माफ हुऐ या एण्डा बोलणा कि उठ होर चैलदा फिरदा लाग । 6 पर तुसै ज़ाणि

लेआ कि माहू रै बेटै बे यानिकि मुँबे एसा धौरती ना पापा बे माफ केरनै रा बी हक सा । तैबे तेइयै ध्रंगे रै मरीजा बे बोलू, उठ आपणै माँजै बे चैक होर आपणै घौरा बे जा । 7 सौ उठिया आपणै घौरा बे नौठा । 8 लोका ऐ हेरिया डौरै होर परमेश्वरै री महिमा केरदै लागै जुणियै माहू बे ऐण्डा केरनै रा हक धिना ।

### मत्ती बे शाधिणा

9 तौखैना आगै जाइया यीशुऐ मत्ती नाँ रा एक माहू चुँगी लेणै री चोऊकी आ गै बेटा दा हेरू होर तेइबै बोलू, “मूँ पिछै एज” । स उठिया तेई पिछै चैलू । 10 जैबे सौ घौरा एजिया रोटी खाँदा बेटा ता बोहू सारै चुँगी लेणू आलै होर पापी एजिया यीशु होर तेइरै चेलै सँघे रोटी खाँदै बेटे । 11 ऐ हेरिया फरीसी लोकै तेइरै चेलै बे बोलू, “तुसरा गुरु चुँगी लेणू आलै होर पापी सँघे किबै खा-पीआ सा?” 12 ऐ शुणीया यीशुऐ तिन्हाबै बोलू, “भलै चँगै माहू बे बेइदै री जरूरत नी आँथी बल्कि बिमार माहू बे बैधै री जरूरत सा । 13 एथा रा मतलब तुसै जाणि लेआ । हाँऊ बलिदान नी बल्कि दया चाहा सा किबैकि हाँऊ धर्मी री तँइयै नी पर पापी माहू री तँइयै आऊ सा ।”

### ब्रता रा प्रश्न

14 तैबे युहन्नै रै चेलै तेई हागै एजिया बोलू, “की वजहा सा कि आसै होर फरीसी एतरै ब्रत केरा सी पर तेरै चेलै ब्रत नी केरदै?” 15 यीशुऐ तिन्हा बे बोलू, “जाँ ढौई दुल्हा बराती सँघे सा कि ते शोग केरी सका सी? पर तिन्हा ध्याडै एणा जैबे दुल्हा तिन्हा ना लग केरिना तेई बौकै तिन्हा ब्रत केरना ।” 16 कोरै कपडै रा टौलू पराणै झीकडै ना कोई नी लान्दा किबैकि सौ टौलू तेई झीकडै बे खींचा सा होर सौ नौऊआ कपडा चिरिया सा । 17 होर लोका नौऊआ दाखरस पराणी मशका ना नी रैखदै किबैकि ऐण्डा केरनै सँघे ते मशका फुटा सी होर दाखरस ता मशका दुहै नाश होआ सी । पर नौऊआ दाखरस नौऊई मशका ना भौरा सी होर ते दुहै बचा सी ।

### मुँदी शोहरी होर बमार बेटडी

18 यीशु तिन्हा सँघे इन्हा गला केरदा लागा ती कि एकी सरदारै एजिया तेईबै प्रणाम केरू होर बोलू, “मेरी बेटा ऐबे मुँई सा पर तू एजिया तेसा पँधे आपणा हौथ रैख ता तेसा जिन्दै होणा ।” 19 यीशु उठिया आपणै चेलै सँघे तेई पिछै नौठा । 20 होर शुणा, एकी बेटडियै जुणी बे बारा बौषा ना ओरै लोहू बैहणै री बिमारी ती तेसै पिछै ना एजिया यीशु रै कुरतू रा पल्ला छुँगू । 21 किबैकि सौ आपणै मना ना ऐ सोचा ती अगर हाँऊ यीशु रै झिकडै जेही बी छुँगू ता मूँ ठीक होणा । 22 यीशुऐ मुडिया सो हेरी होर बोलू, “बेटी हौंसला रैख तेरै बशाहै तू ठीक केरी होर सौ बेटडी तेसा घँडिऐ ठीक हुई ।” 23 जैबे यीशु तेई सरदारै रै घौरा ना पुजु होर हुलड मचाणू आलै लोका बे बोलू, 24 “औखैना हटा, ऐ शोहरी मुँदी नी आँथी पर सोदी लागी सा ।” तैबे ते लोका तेइरा मजाक उडाँदै लागे । 25 पर जैबे भीड तौखैना बाहरै खोली ता यीशुऐ भीतरै जाइया शोहरी रा हौथ ढौकू होर सौ जिन्दी हुई । 26 एसा घटनै री चर्चा सारै देशा ना फैली ।

### दुई काणै रा उदाहरण

27 जैबे यीशु तौखैना आगै नौठे ता दुई काणै तेई पिछै पुकारदै-पुकारदै चैलै, कि ओ दाऊदै री सन्तान आसा पँधे दया केर । 28 जैबे सौ घौरा पुजु ता ते काणै तेई हागै आऐ होर यीशुऐ तिन्हाबै बोलू, “तुसाबै बशाह सा कि हाँऊ तुसाबै ठीक केरी सका सा?” तिन्हा तेइबै बोलू; हाँ प्रभु जी । 29 तैबे तेइयै तिन्हरी औछी बे छुँगिआ बोलू, “जैण्डा तुसरा बशाह सा तैण्डा तुसरी तँइयै लोडी हुआ ।” 30 होर तिन्हरी औछी खुली होर यीशुऐ तिन्हाबै बोलू, ध्यान डाहीत एसा गला कौसीबे हेरीत दैसदै । 31 पर तिन्हे ऐ गल जाइया सारै देशा ना फैलाई ।

### एक गूंगे बे ठीक केरना

32 जैबे यीशु होर तेइरै चेलै बाहरै जान्दै लागै ती ता लोकै एक नाँडा माहू तौखे आणू । तेईबै चेटू फसू ती । 33 जैबे यीशुऐ तेइना सो चेटू खोलू ता सौ नाँडा माहू दुणदा लागा होर लोका हैरान होइया बोलदै लागै, इस्राइला ना ऐण्डा पैहिले नी हुआ । 34 पर फरीसी लोकै बोलू, ऐ ता चेटू रै प्रधानै री मजती सँघे चेटू खोला सा ।

### मजदूर थोडे सी

35 यीशु शहर होर ग्रॉ ना जाइया तिन्हरी धर्मसभा ना उपदेश देआ ती, होर परमेश्वरै रै राज्य रा प्रचार केरदा होर लोकै री हर किस्मै री बिमारी ता कमजोरी बे दूर केरदा रौहू । 36 जैबे तेइयै भीडा धिरै हेरू ता तेइबै लोका पँधे दया आई किबैकि ते फुआला बगैर भटकी दी भेडा साही बेचैन ती । 37 तैबे यीशुऐ आपणै चेलै बे बोलू, “फसल ता पोकी सा पर मजदूर थोडे सी । 38 ऐबे तुसै छेतै रै मालका हागै विनती केरा कि सौ आपणी फसल काटणै री तँइयै मजदूर भेजला ।

### यीशु रै बारा चले

10 तैबे यीशुऐ आपणै बारा चेलै शाधै होर तिन्हा बे शक्ति होर अधिकार धिना, कि ते हर किस्मै रै चेटू बे खोललै होर लोकै री हर किस्मै री बीमारी होर कमजोरी बे दूर केरलै । 2 होर तिन्हा बारा चेलै रै नाँ ए सी; शमोन जौसाबै पतरस बोला सी तेइरा भाई अन्द्रियास, जब्दी रा बेटा याकूब होर तेई रा भाई युहन्ना । 3 फिलिप्पुस, बरतुलमै, थोमा, चुँगी लेणू आला मत्ती, हलफई रै दुई बेटे याकूब होर तद्वै । 4 शमोन कनानी, यहूदा इस्करियोती जुण यीशु बे ढौकणै घा सा ।

### बारा चले रा सेवा कार्य

5 इन्हा बारा चेलै बे यीशुऐ ऐ हुकम धिना कि तुसै होरी जाति रै बिचा ना हेरीत जान्दै होर सामरी रै ग्रॉ बे हेरीत जान्दै । 6 पर इस्राइली लोकै रै बीचा ना जाईत् । 7 जान्दै-जान्दै ऐ प्रचार केरीत् कि स्वर्गा रा राज्य नेड आऊ सा । 8 बीमार लोका बे ठीक केरा, मुँदै बे जिन्दै केरा, कोढ़ी बे ठीक केरा, लोकै रै चेटू खोला । तुसाबै पूरा-पूरा मिलू सा पूरा-पूरा दैआत् । 9 आपू आगै सुना, रूपा होर ताँबा हेरीत् रैखदै । 10 बौतै री तँइयै न झोआ, न दुई कुरतै न दुई जोडी बूट होर न शोठा हेरीत् पान्दै किबैकि मजदूर बाँ तेई री रोटी मिलणी जरूरी सी । 11 जुणी बी घौरा बे तुसै जालै तेई घौरा ना रौहीत होर तौखना विदा होईत् । 12 घौरा आन्ध्रै जान्दी घेरै तेई घौरा बे होर तौखै रौहणू आलै लोका बे आशीष देईत् । 13 तेई घौरा न अगर आशीष पाणै लायक कोई होला ता तुसरी आशीष तिन्हा पँधे ठहरनी नी ता तेसा आशीष तुसा आगै वापस एणा । 14 जुण तुसाबै ग्रहण नी केरला होर तुसरी गला बे नी शुणला ता तेई ग्रॉ ना निकलदी घेरै आपणै जोंघे रै धुडे बै झाडीत् । 15 हाँऊ तुसाबै सच बोला सा कि फैसलै रै रोजा ना तेई ग्रॉ री हालत सदोम होर अमोर देशा ना बी बुरी होणी ।

### एणु आळा दुःख

16 शुणा, हाँऊ तुसाबै भेडा साही भेडियै रै बिचा ना भेजा सा । तुसे कीडे साही होशियार होर कबूतरा साही भोलै बेणा । 17 पर लोका ना बचिया रौहा किबैकि तिन्हा तुसै महासभा ना खडै केरनै होर आपणी पँचायता ना कोडै मारनै । 18 तुसा मेरै गवाह होणै री तँइयै हाकिम, राजै होर होरी जाति रै लोका सामनै पजाइणै । 19 जैबे ते तुसाबै ढोकणै घालै ता चिन्ता मतेइत् केरदै कि आसा की केरना होर की दुणना किबैकि जे किछ तुसा दुणना होला सौ तेसा घडीयै तुसाबै दसिणा । 20 किबैकि बोलणू आलै तुसै नी होणै पर परमेश्वरै री आत्मा तुसा आन्ध्रै ना बोलणा । 21 भाई, आपणा भाई होर बापू आपणा बेटा ढौकिया मारनै री तँइयै देणा होर शोहरू आपणै आमा-बापू रै खिलाफ होइया ता मारनै घाणै । 22 मेरै नाँ री वजहा ना सैभी लोका तुसा

सैंधे बैर रखणा पर जे अन्ता तक धीरज रैखलें तिन्हारा उद्धार होणा । 23 जैबे ते तुसाबै एकी ग्रॉ ना सतालै ता तुसै दुजै ग्रॉ बँ भैगेईत् । हाँऊ तुसाबै सच बोला सा, तुसरै इस्राइलै रै सैंभी ग्रॉ ना घूमणै ना पहिलै माळू रै बेटै अर्थात् मूँ एणा । 24 चेला आपणै गुरु ना बड़ा नी होन्दा होर ना गुलाम आपणै स्वामी ना । 25 चेलै रा गुरु रै बराबर होणा होर गुलामा रा आपणै स्वामी रै बराबर होणाए बड़ी गल सा; जैबै तिन्है घौरा रै मालका बै शैतान बोल् ता तेई घौरै रै होरा लोका बै बी तिन्हा शैतान बोलणा ।

### कुणी सेंधे डौरना

26 पर तिन्हा ना मतेईत् डौरदै किबैकि किछ बी खौटू दा नी आँधी जो खोलिणा नी होर किछ छिपू दा नी जौसरै बारै ना जाणिना नी । 27 जे हाँऊ तुसाबै निहारै ना बोला सा तेईबै तुसै प्याशै ना बोला होर जे तुसै कोनै-कोनै शुणा सी तेईबै तुसै ऊथडी जैगहा ना प्रचार केरा । 28 जो देही रा नाश केरा सी पर आत्मा रा नी तिन्हा ना मता डौरदै पर तेई ना डौरा जुण आत्मा होर देह दुही बै नरका ना नाश केरी सका सा । 29 कि एकी ढैबुए ना दूई चिडू नी बिकदै? तैबै बी परमेश्वरै री मर्जी बगैर तिन्हा ना एक बी धौरती बै नी ओळदै । 30 तुसरै चोढै रै शराल बी गिणुए दै सी । 31 तुसै डौरदै मता तुसै बोहू चिडू ना बी जादा कीमती सी ।

### यीशु बै अपनाणा या नेई अपनाणा

32 जुण बोहू माळू सामणै मुँभै मैना सा मूँबी सौ परमेश्वर बापू सामनै मैनाणा । 33 पर जुण माळू सामनै मेरा नाँह केरा सा परमेश्वर बापू सामनै मूँबी तेइरा नाँह केरना ।

### यीशु रै एणै रा परिणाम

34 ऐ मता बूझदै कि हाँऊ धौरती पैंधे मेल कराँदा आऊ सा; हाँऊ मेल करान्दा नी पर तलवार चलाँदा आऊ सा । 35 हाँऊ बटै बै बापू ना, बेटी बै तेसरी आमा ना होर नूशा बै तेसरी शौशू ना अलग केरदा आऊ सा । 36 माळू रै बेइरी तिन्हैरै घौरकै माहणु होणै । 37 जुण आमा-बापू बै मूँ ना जादा प्यारा जाणा सा होर जुण आपणै बेटै बेटी बै मूँ ना जादा प्रिय जाणा सा सौ मेरै लायक नी आँधी । 38 होर जुण आपणै दुःख सहन केरिया मूँ पिछै नी चलदा सौ मेरै लायक नी आँधी । 39 जुण आपणै प्राण बचाणा चाहला तेई ते नाश केरनै होर जुण मेरी तैइयै आपणै प्राणा रा नाश केरा सा तेई ते बचाणै ।

### इनाम

40 जुण तुसाबै ग्रहण केरा सा स मुँबै ग्रहण केरा सा होर जो मुँबै ग्रहण केरा सा सो मेरै भेजणु आलै बै ग्रहण केरा सा । 41 जुण भविष्यवक्ता बै भविष्यवक्ता जाणिया ग्रहण केरा सा तेई भविष्यवक्ता रा बदला पाणा होर जुण धर्मी बै धर्मी जाणिया ग्रहण केरा सा तेई धर्मी रा बदला पाणा । 42 जुण इन्हा होछै मुँझै एकी बै बी मेरा चेला जाणिया सिर्फ एक कटोरा ठँडा पाणी प्याला हाँऊ तुसाबै बोला सा तेई आपणा इनाम कौसी रीतियै बी नी खोणा ।

### यीशु होर यूहन्ना बतिस्मा देणुआळा

11 यीशु आपणै बारा चेलै बै हुकम देणै ना बाद तौखेना नौठा होर गलील जिल्लै रै ग्रॉ घूमि-घूमिया परमेश्वरै रै राज्य रै बारै ना प्रचार केरदा लागा । 2 यूहन्ना जैबै जेला ना यीशु रै कोमै रै बारै ना शुणू ता तेइयै आपणै चेलै आगै संदेशा भेजू । 3 तिन्है चेलै जाइया यीशु ना पुछू कि तुसै तेहै सी जो एणू आलै ती कि आसै होरी रा इंतजार केरना । 4 यीशुए तिन्हा बै बोल्, “जेकिछ तुसै शुणदै लागै सी होर हेरदै लागै सी जाइया यूहन्ना बै दैसा ।” 5 कि काणै हेरदै लागै सी, लूलै-लंगडै ओढदै लागै होर कोढी ठीक होँदै लागै सी, टाऊणै शुणदै लागै सी होर मूँएँ जिनदै लाए सी केरनै । दीन दुःखी बै शुभ संदेश दैसणा लाऊ सा । 6 सौ धन्य सा जुण मुँभै मैना सा । 7 जैबै यूहन्ना चेलै तौखना जाँदै लागै ती ता यीशुए लोकै री भीडा बै बोल्, “तुसै सुनसान जैगहा ना की हेरदै आये सी? कि तुसै बागरीए लाइया हिलदै लागै दै

डँडै हेरदै आये सी । 8 कि तुसै शोभलै झिकडै लाउदै मर्दा हेरदै आये सी । शुणा, शोभलै झिकडै लाणु आलै ता राजै री कोठी ना मिला सी । 9 कि तुसै कोई भविष्यवक्ता बै हेरदै आये सी । हाँऊ तुसाबै दैसा सा जुण तुसै हेरू सा सौ भविष्यवक्ता ना बी बड़ा सा । 10 ऐ सौहै सा जौसरै बारै ना शास्त्रा ना लिखू सा; शुण, मैं तो ना पैहिलै आपणा दूत भेजणा लाऊ सा । तेई तेरी तैइयै बौत त्यार केरनी । 11 हाँऊ तुसाबै सच बोला सा बपतिस्मा देणू आलै यूहन्ना ना बड़ा कोई माळू पैदा नी हुआ । तैबै बी स्वर्ग राज्य ना होछे ना होछे माळू बी यूहन्ना ना बड़ा सा । 12 बपतिस्मै देणू आलै यूहन्ना रै बौता ना औजा तक स्वर्गा रा राज्य बोहू दुःखा बै झेलदा रौहू सा होर एई राज्य बै बुराई रै जरिरे चटैरनै री कोशिश केरदी रौही । 13 यूहन्ना रै एणै तक सैंभी भविष्यवक्तै होर “मूसै री धर्मविधियै” भविष्यवाणी केरी ती । 14 अगर तुसै धर्मविधि होर भविष्यवक्तै जेकिछ बोलू सा तेथा मैनाणे बै त्यार सी ता जौसरै एणै री भविष्यवाणी हुई ती यूहन्ना सौहै एलियाह भविष्यवक्ता सा । 15 जुण शुणी सका सा तेईयै ध्याना सेंधे शुणीत् । 16 “ओजकै जुगै रै लोकै री तुलना हाँऊ कुणी सेंधे केरनू? ते बजारा बेटै दै तिन्हा बचै साही सी जो एकी होरी बै पुकारिया बोलदै लागै सी, 17 ‘आसै तुसरी तैइयै बैउसरी बजाई पर तुसै नी नौचै । आसै दुःखै री गीत लाये पर तुसै नी रूपै ।’ 18 बपतिस्मै देणू आला यूहन्ना आऊ । सौ होरा साही खाँदा पीदा नी ती आँधी पर लोकै बोलू कि तेई ना चेटू सा । 19 तैबै माळू रा बेटा आऊ । जो होरा साही खा-पीआ सा पर लोका बोला सी, ‘हेरा एई माळू बै ऐ ता पेटू होर पियकड सा । ऐ चुँगी लेणू आये होर पापी रा सेंगी सा । पर तेई रै कोमै लाइया तेई री बुद्धि रा पता चैला सा कि सौ केतरा सिद्ध सा ।”

### अविश्वासी पेन्धे हाय

20 तैबै यीशुए ते शहर होर ग्रॉ धिक्कारै जुणि ना यीशुए बोहू सारै चमत्कार केरै ती किबैकि तौखलै लोकै पाप केरना नी ती छोडू । 21 हे खुराजीन होर बैतसैदा, तुसा मुँझै जे चमत्कार केरै ते अगर सूर होर सैदा ना केरै होँदै ता तौखलै लोका टाट ओढिया होर आपणै शरीरा ना भौस (स्वाह) मौईआ केबकै पाप केरना छोडदै । 22 पर हाँऊ तुसा लोका बै बोला सा फैसलै रै रोजा ना सूर होर सैदा ना जादा सजा तुसाबै मिलणी । 23 हे कफरनहूम, तू की सोचा सा कि तू स्वर्गै री महिमा ढौई उथडै केरिना? तौ ता नरका बै जाणा किबैकि जे चमत्कार तौ ना केरै अगर ते सदोम शहरा ना केरै होँदै तातेई नगरा औजा तक टिकी रौहणा ती । 24 पर हाँऊ तौभै बोला सा फैसलै रै रोजा ना तेरै लोकै री हालत सदोम शहरै रै लोका ना जादा बुरी होणी ।

### मुं आगै इजा होर राम केरा

25 तेई बौकै यीशुए बोल्, “हे परम पिता, तू स्वर्ग होर धौरती रा मालक सा हाँऊ तेरी स्तूति केरा सा किबैकि तैं ए गला ज्ञानी होर समझदार माळू ना छुपाइया रेखी होर जे भोलै भालै सी तिन्हरी तैइयै प्रगट केरी ।” 26 हे परम पिता ऐ एथे री तक हुआ किबैकि तौभै ऐ ठीक लागा । 27 “मेरै पवित्र बापुए सबकिछ मेरै हवालै केरू सा । कोई नी जाणदा कि बेटा कुण सा केवल बापू जाणा सा होर कोई बी पवित्र बापू बै नी जाणदा केवल बेटा जाणा सा । ए सिर्फ बेटा प्रकट केरी सका सा । 28 हे थकै दै होर बोझै लाइया दबुए दै लोको मूँ हागै एजा मूँ तुसाबै सुख चैन देणा । 29 मेरै जुए बै आपू पैंधे लेआ तैबै मूँ ना सिखात् किबैकि मेरा मन कोमल सा होर तुसा बै बी आपणी तैइयै सुख चैन मिलणा । 30 किबैकि जे जुआ हाँऊ तुसाबै दैदा लागा सा सो नरम सा होर जे बोझ हाँऊ तुसा पैंधे पाँदा लागा सा सौ हल्का सा ।

### सब्ता रा प्रभु

12 एक बार यीशु रामै ध्याडै ना नाजै रै छेतै आघे जाँदा लगा ती । तेइरै चलै बै भूख लागी होर ते गेहूँ रै सिला बै चोडिया होर हौथे लाइया मौइया खाँदै लागै । 2 किछ फरीसी लोकै ऐ हेरू होर बोल्, “हेर तेरै चेलै सोकेरदै लागै सी जो रामै रै ध्याडै ना मूसै री धर्मविधि रै मुताबिक केरना ठीक नी आँधी ।” 3 यीशुए तिन्हा ना पुछू, “कि तुसै पवित्र शास्त्रा नी पौडू कि जैबै दाऊद राजै बै होर तेइरै सेंघी बै भूख लागी ता तिन्है की केरू ती?”

4 तेइयै परमेश्वरै रे मन्दिरा ना जाइया परमेश्वरा बै चढ़ाई दी रोटी खाई होर आपणै सँघी बै बी धिनी । जैबै कि ऐ मूसै री धर्मविधि रे खिलाफ ती । इन्हा रोटी बै सिर्फ पुजारी खाई सका ती । 5 मूसै री धर्मविधि ना तुसै नी पौडू कि रामै रे ध्याडै ना पुजारी आपू नियमा बै बगाडा सी होर तिन्हा बै कोई किछ नी बोलदा । 6 पर हाऊ तुसाबै बोला सा औखै सो सा जो मन्दिरा ना बी बडा सा । 7 शास्त्रा ना जे लिखू सा अगर तुसै जाणदै कि, 'हाँऊ लोका ना दया चाहा सा पशु री बाँई नी ता तुसा ते दोषी नी ठहराणै जे निर्दोष सी ।' 8 "माहू रा बेटा रामै रे ध्याडै रा बी प्रभु सा ।"

### शुकेंदे होथा आलै माहणु बै ठीक केरना

9 तैबै सौ तौखना चैलू होर यहूदी सभाघोरा ना पुजु । 10 तौखै एक शुकें दे होथा आला माहू ती । लोकै यीशु पेंधे दोष लागै री तेइयै तेई ना पुछू, "मूसै री विधि रे मुताबिक रामै रे ध्याडै ना कोई बै ठीक केरना सही सा?" 11 पर यीशुए तिन्हा बै जवाब धिना, तुसा मौँझे ऐंढा कुण सा "मैना कि तुसा मुँझे कौसी हागै एक भेड सा होर सौ रामै रे ध्याडै ना कुँऐ ना पौडा सा कि तुसा सौ ढौकिया बाहरै नी खोलणी?" 12 तैबै माहू ता भेडा ना जादा जरूरी सा । मूसै री धर्मविधि रामै रे ध्याडै ना भला केरनै री अनुमति देआ सा । 13 तैबै यीशुए तेई शुकें दे होथा आलै माहू बै बोलू, "आपणा होथ आगै केर" होर तेइयै आपणा होथ आगै केरु । सो बिल्कुल ठीक हुआ । 14 तैबै फरीसी तौखना नौठै होर यीशु बै मारनै री तरकीब सोचदै लागै ।

### परमेश्वरा रा चुनुदा दास

15 यीशुए ऐ गल जाणी होर तौखना नौठा । लोकै री भीड बी तेई पिछै चौली । यीशुए ते तिन्हरी बीमारी ना ठीक केरै । 16 होर तिन्हा बै बोलू कि तुसै मेरै बारै ना लोका बै किछ हेरीतू दैसदै । 17 कि भविष्यवक्ता यशयाह रे द्वारा प्रभुए जै बोलू ती सौ पूरा होला; 18 "ऐ मेरा सेवक सा जुण मैं छान्दू सा । ऐ मेरा प्यारा सा एई ना हाँऊ बोहू खुश सा । मूँ आपणी आत्मा एई पेंधै रैखणी । एई सैभी देशै रे लोका बै फैसलै री खबर देणी । 19 तेई झगडा नी केरना होर न धूम मचाणी होर बजारा ना कोई बी तेईरी आवाज नी शुणना । 20 तेई झुकू दा सरकंडा नी चोडना होर धूँआ देणू आली बौती नी बुझाणी, जौ तक कि सौ फैसलै बै जीतला नी । 21 तैबै सैभी लोका सिर्फ तेई रे नाँ न आशा रैखणी ।

### यीशु होर बालजबूल

22 तैबै लोकै यीशु आगै एक ऐण्डा माहू आणू जो काणा ती होर नाँडा ती किबै कि तेई ना चेटू ती । यीशुए सौ ठीक केरु होर सौ हेरदा होर दुणदा लाग़ा । 23 तैबै सारै लोक हेरान होइया बोलदै लागै, "ऐ कि दाऊद राजै री सन्तान सा!" 24 पर फरीसी ऐ शुणिया बोलदै लागै कि ऐ ता चेटू रे प्रधान शैताना री मजती सँघे चेटू बै खोला सा । 25 यीशुए तिन्हरी मनै री गल जाणिया बोलू, "जुणी राज्य ना फूट पौडा सा तेई राज्य रा नाश होआ सा होर जुणी ग्राँ या घोरा ना फूट पौडा सा सौ बी नाश होआ सा । 26 चेटू अगर चेटू बै खोला सा ता तेई रा राज्य कैण्डे बैणी रौहणा । 27 अगर ऐ सच सा कि हाँऊ बालजबूलै री मजती सँघे चेटू खोला सा ता तुसरा वँश कौसरी मजती सँघे चेटू खोला सी? ऐबै तिन्हाए तुसरा फैसला केरना । 28 अगर हाँऊ परमेश्वरै री आत्मै री शक्ति सँघे चेटू बै खोला सा ता परमेश्वरा रा राज्य तुसा हागै पुजु सा । 29 कोई ताकतवर माहू रे घोरा ना घुसिया तेई रे घोरा बै कैण्डे लूटी सका सा जाँ तक कि सौ तेई बै बोनला नी । तेई ताकतवर माहू बै बोनणै ना बाद सौ तेइरै घोरा बै लूटी सका सा । 30 जुण मूँ सँघे नी आँधी सौ मेरै वरौधा ना सा होर जुण भेडा बै कडा केरनै ना मेरी मजत नी केरदा सौ तिन्हाबै बिखेरा सा । 31 हाँऊ तुसाबै बोला सा कि हर निन्दा होर पाप माफ केरिनै पर जुणा पवित्रात्मै री निन्दा केरा सी तिन्हा बै माफी नी मिलणी । 32 जुण माहू रे बेटै रे खिलाफ बोला सा तेइबै माफी मिली सका सा पर जुण पवित्र आत्मै रे खिलाफ किछ बोलला तेइबै माफी नी मिलणी न एई जुगा ना, न एणु आलै जुगा ना ।

### बूटा होर तेई रा फौळ

33 अगर तुसै बूटै बै शोभला बोला सी ता तेइरै फ़ौआ बै बी शोभला बोला या बूटै बै नक्कमा बोला सी ता तेइरै फ़ौआ बै बी नक्कमा बोला; किबैकि बूटा तेइरै फ़ौए लाइया पछियाणिया सा । 34 ओ कीडै रे शोहरुओ बुरै होइया शोभली गैला कैण्डे केरी सका सी किबैकि जे मना आन्ध्रै सा सौहै बाहरै निकला सा । 35 भला माहू आपणै मनै रे भलै भण्डारा ना भली गला खोला सा होर बुरा माहू आपणै मनै रे बुरै भण्डारा ना बुरी गला खोला सा । 36 पर हाँऊ तुसाबै बोला सा जे नक्कमी गला माहू केरलै फैसलै रे रोज़ा ना तिन्हा इन्हा गला रा लेखा देणा पौऊ । 37 किबैकि तुसै आपणी गलै री वजहा ना निर्दोष होर आपणी गलै री वजहा ना दोषी ठहरना ।

### स्वर्गीय नशाणी री मांग

38 तैबे किच्छ गुरुए ता फरीसीये तेईबे बोलू गुरु जी आसे तुसा न एक चिन्ह हेरणा चाहा सी । 39 यीशुये तिन्हा बै बोलू, "एई जुगै रे बूरे लोका चिन्ह चमत्कार हेरणा चाहा सी । भविष्यवक्ता योनै रे चिन्ह छौँडिया होर कोई चिन्ह तिन्हा बै नेई देणा 40 किबैकि ज़ैण्डा योना त्राई ध्याडै होर त्राई राती मौँछी रे पेटा ना रौहू ती तैण्डाए माहू रे बेटै बी त्रा ध्याडी होर त्रा राती धौरती भीतरै रौहणा । 41 फैसलै रे रोज़ा ना नीनवै रे लोका एई जुगै रे लोका सँघे खडै होइया ते दोषी ठहराणै किबैकि निनवै शैहरै रे लोकै योनै रे उपदेश शुणिया पाप केरनै छौँडै ती । पर औखै ता सो सा जो योना ना बी बडा सा । 42 फैसलै रे रोज़ा ना दक्षिणै री राणी एई जुगै रे लोका सँघे खडै होइया एई जुगै रे लोका पेंधे दोष लाग़ा किबैकि सौ धौरती रे दुजै किनारै ना सुलैमान राजा रा उपदेश शुणदी आई ती पर औखै ता सौ सा जो सुलैमान राजा ना बी बडा सा ।

### अशुद्ध आत्मा री बापसी

43 जैबै कोई चेटू माहू बै छौँडा सा ता स आराम केरनै री तैइयै सुनसान ज़ेहा तोपा सा पर नी मिलदी । 44 तैबै स बोला सा कि मूँ तेही घोरा बै ज़ाणा जे मैं छौँडू ती । होर तेसा बै सौ घोरा साफ-सुथरा होर सज़ाऊ दा मिला सा । 45 तैबै सौ एज़ा सा होर आपू सँघे सौत होरी चेटू बै बी आणा सा जे तेई चेटू ना बी बुरै होआ सी । होर तेई माहू री दशा पैहिलै ना बी जादा बुरी होआ सा ।

### यीशु री आम्मा होर भाई

46 यीशु हाजी लोका सँघे गला केरदा लगा ती कि तेइरै आमा होर भाई-बन्धु तेई सँघे गला केरनै री तैइयै बाहरै एजिया खडै हुए । 47 कौसिये यीशु बै बोलू, "शुण तेरी आमा होर भाई-बन्धु बाहरै खडै सी होर ते त सँघे गला केरना चाहा सी ।" 48 यीशुए तेइबै बोलू, "कुण सा मेरी आमा होर कुणा सी मेरे भाई-बन्धु?" 49 तैबै तेइयै आपणै चेलै धिराबै इशारा केरिया बोलू, "ए सी मेरी आमा होर भाई-बन्धु ।" 50 किबैकि जे कोई मेरे बापू री जे स्वर्गा न सा इच्छा पूरी केरा सी होर तेथा पेंधे चैला सा सौहै मेरे भाई, बहन होर आमा सी

### बेजा बाहणु आळै रा उदाहरण

13 तेही ध्याडै ना यीशु तेई घोर छौँडिया उपदेश देणै री तैइयै झीलै रे किनारै जाइया बेटा । 2 जैबै तेइरै चोहू पासै बोहू सारै लोकै री भीड कडा हुई ता सौ एकी किस्ति पेंधे चढ़िया बेटा होर लोकै री भीड किनारै पेंधे खडी रोही । 3 तेइयै तिन्हा बै पठाउणी (कथा ) ना बोहू सारी गला दैसी: एक बेजै बाहणु आला बेजै बाँहदा निकता ।" 4 जैबै सौ बेजै बाँहदा लाग़ा ती ता किछ बेजा बौतै रे किनारै ना पौडू होर सौ चिडूए चुगू । 5 किछ बेजा रडखडी जमीना ना पौडू माटा नी मिलणै री वजहा सौ बेजा छेकै निकता । 6 पर जैबै धुपा आऊ ता ते झोट शुकै किबैकि तिन्हरै जलाडै पैकै नी ती आँधी । 7 किछ बेजा कौडै रे झोकडा जाँदरै पौडू, ज़ौकड बढदा रौहू होर ते दबाए । 8 पर किछ बेजा शोभली जमीना ना पौडू होर शोभली फ़सल त्यार हुई ।

जेतरा बाहू ती तेथा ना तीह गुणा, शौठ गुणा होर शौऊ गुणा । 9 जुणा शुणी सका सी तिन्है ध्याना सेंधै शुणीत् ।

### उदाहणा रा उदेश्य

10 तैबै यीशु रै चेलै तेई आम्गै एजिया बोलू, "तू लोका सेंधै पठाउणी होर कथा ना किबै गला केरा सा?" 11 यीशुऐ तिन्हा बै बोलू, "स्वर्ग राज्य रै भेद ज्ञाणनै र हक सिर्फ तुसाबै धिना सा तिन्हा बै नी ।" 12 किबैकि जुणी हागै थोडा सा तिन्हा बै होर देणा होर तिन्हा हागै बोहू होणा । पर जुणी हागै किछ बी नी ओंथी तिन्हा आम्गै ना सौ बी वापस मुगिणा जो तिन्हा आम्गै सा । 13 एसा वजहा ना हाऊ तिन्हा सेंधै पठाउणी होर कथा ना गला केरा सा किबैकि ते हेरिया बी नी हेरदै होर शुणिया बी नी शुणदै होर ना समझदै । 14 ऐण्डै तरहै तिन्हा पेंधै यशायाह भविष्यवक्तै री भविष्यवाणी पूरी होआ सा, "तुसा कोनै लाइया ता शुणना पर तुसरी समझना ना किछ नी एणा, होर तुसा ओछियै ता हेरना पर तुसाबै किछ पता नी चैलणा ।" 15 किबैकि इन्हा लोका रा मन मोटा हुआ सा । ते कोनै लाइया उथडा शुणा सी होर तिन्है आपणी ओछी बन्द करी सी । कोइछे ऐण्डा नी लोडी हुआ कि ते ओछियै लाइया हेरलै, कोनै लाइया शुणलै होर मनै लाइया समझलै होर पाप केरना छोडिया मूँ धिराबै फिरलै होर हाऊ तिन्हा उद्धार केरनू । 16 पर धन्य सी तुसरी ओछी कि ते हेरा सी होर कोन ते शुणा सी । 17 हाऊ तुसाबै सच बोला सा, बोहू सारै भविष्यवक्तै होर धर्मात्मा लोकै ए गल हेरनी चाही पर नी हेरी सकै होर शुणनी चाही पर नी शुणी सकै ।

### बेजा बाहणु आळै रै उदाहरणा री व्याख्या

18 "ऐबै तुसै बेजै बाहणु आलै री कथा रा मतलब शुणा; 19 जे परमेश्वरा रा वचन शुणा ता सा पर समझदा नी, जे तेइरै मना ना सा तेथा बै दुष्ट एजिया नेआ सा । ऐ सौ बेजा सा जो बौतै रै किनारै पौडू ती । 20 रडखडी जमीना ना पौडू दा बेजा सौ सा जो वचन शुणिया खुशी सेंधै मना सा । 21 पर आपणै मना ना वचनै री जड पक्की नी हाणै दँदा । जैबै दुःख क्लेश एजा सा ता सौ ठोकर खा सा । 22 झौकडा मुँडै पौडू दा बेजा स सा जो वचना बै शुणा सा पर दुनियादारी री चिन्ता होर डैबुऐ रा लालच वचना बै दबा सा होर सौ माहू कामयाब नी होन्दा । 23 शोभली जमीना ना बाहू दा बेजा सौ सा जे माहू वचना बै शुणा सा होर समझा सा होर कामयाब होआ सा । ऐ कामयाबी तीह गुणा, शौठ गुणा होर शौऊ गुणा तक होआ सा ।"

### जंगली बेजे रा उदाहरण

24 यीशुऐ तिन्हाबै एक होर कैथा दैसी: "स्वर्ग रा राज्य तेई माहू साही सा जुणियै आपणै छेता ना शोभला बेजा बाहू । 25 पर जैबै लोका सोदै लागै ती ता तेइरै बेइरियै एजिया गेहूँ रै बीचा ना जंगली बेजा बाहू होर नौठा । 26 जैबै गेहूँ रा बेजा लगा होर तेथा ना सिला लागै ता गेहूँ रै बिचा ना जंगली बेजै रै झोटडू बी हेरिदै लागै । 27 तैबै छेतै रै मालकै रै नोकरै एजिया तेइबै बोलू, "मालिक तुसै ता छेता ना शोभला बेजा बाहू ती तैबै ए जंगली बेजै रै झोटडू कौखना लागै?" 28 तेइयै बोलू, "ऐ कौसी बेइरी रा कोम सा । तेइरै नोकरै पुछू तू की चाहा सा कि आसै जाइया जंगली बेजै रै झोटडू बै पेचाऊँ?" 29 छेतै रै मालकै बोलू, "नैई, किबैकि जैबै तुसै झकड पेचलै तैबै तेथा संघे गेहूँ भी पेचणै । 30 फसला पौकणै ढौई दुही बै सेंधै-सेंधै बढनै दैआ, होर जैबै फसल काटणै रा बौक एला ता मूँ काटणू आलै बै बोलणा कि तुसै पहिले जंगली बेजै रै झोटै रै पूळै बणाइया तिन्हा बै फूका, होर गेहूँ बै कठा केरिय मेरे नाज जमा केरणु आए घौरा न रखा ।"

### राई रै बेजे रा उदाहरण

31 यीशुऐ तिन्हा बै एक होर कैथा दैसी: "स्वर्ग राज्य राई रै हौछे दाणै साही सा, जो कौसि माहणु नेइया छेता ना बाहू । 32 ऐ बेजा सैभी ना हौछा होआ सा पर बडा होइया ऐ सैभी ना बडा झोट बैणा सा । ऐ एतरा बडा बैणा सा कि चीडू-चकारु बी एथै री डाली पेंधै रौहा सी"

### खमीरा रा उदाहरण

33 यीशुऐ तिन्हा बै एक होर कैथ दैसी: "स्वर्ग रा राज्य तेई मलेडै साही सा जो कौसी बेटडियै त्रा मुठी पिठै ना मलाऊ होर होंदै-होंदै सौ सारा पिठा मलेडुआ ।"

### उदाहरणा रा इस्तेमाल

34 यीशुऐ लोका बै सबकिछ पठाउणी होर कथा ना दैसू । 35 ऐ एथै री तक हुआ कि परमेश्वरै भविष्यवक्तै रै द्वारा जे बोलू ती सौ पूरा होला: "मूँ पठाउणी होर कैथा बोलणै री तेंइया आपणा मुँह खोलणा । सृष्टि बैणनै ना लेइया ओजा तक जे गला छिपी होर गुप्त रौही तै मूँ प्रकट केरनी ।"

### जंगली बेजे रा उदाहरण

36 तैबै यीशु भीडा बै विदा केरिया घौरा बै आऊ । तैबै तेइरै चेलै एजिया तेइबै बोलू, "आसा बै जंगली बेजै री कैथा रा मतलब समझा ।" 37 यीशुऐ बोलू, "शोभलै बेजै बाहणु आला माहू रा बेटा अर्थात् हाऊ सा, 38 ऐ संसार छेत सा, शोभला बेजा राज्य री सन्तान सा होर जंगली बेजा दुष्टै री सन्तान सा । 39 जुणी बेइरियै सौ बेजा बाहू सौ शैतान सा, फसल काटणा संसार रा अन्त सा होर काटणू आलै स्वर्गदूत सी । 40 जैण्डै जंगली बेजै रै झोट कडा केरिया फूकै संसारै रै अन्ता ना बी एंढा होणा । 41 माहू रै बेटै आपणै स्वर्गदूत भेजणै होर तिन्हा सारै ठोकर देणू आलै होर बुरै कोम होर पाप केरनू आलै कडा केरनै, 42 होर ते ओगी रै कुण्डा ना पाणै जौखै कि तिन्हा बै बोहू दुःख होर कष्ट होणा । 43 तेई बौकै धर्मी परमेश्वरै रै राज्य ना सूरजा साही चमकणा । जौसरै कोन सी तिन्है ध्याना सेंधै शुणीत् ।"

### गुजुहोंदे खजाने रा उदाहरण

44 "स्वर्ग राज्य छेता ना गजिहाउदै धना साही सा जे कौसी माहू बै मिलू होर तेइयै सौ तौखै पौथू होर सोएतरा खुश हुआ कि तेइयै जाइया आपणा सबकिछ बेचू होर सौ छेत लेऊ ।"

### कीमती मोती रा उदाहरण

45 "स्वर्ग रा राज्य समाना लेणू आलै साही सा जो शोभलै मोती तोपदा लागा ती । 46 जैबै तेइबै कीमती मोती मिलै ता तेइयै आपणा सबकिछ बेचू होर ते मोती लेऐ ।"

### जाला रा उदाहरण

47 जैबै पाणी भौरुआ ता मैछी ढौकणू आलै जाल खिचू होर बेशिया शोभली-शोभली मौछी आपणै भाण्डै ना कडा केरी होर माडी-माडी मौछी फेटै शैटी । 48 संसारै रै अन्ता न ऐण्डा होणा । स्वर्गदूता एजिया दुष्ट धर्मी ना अलग केरनै, 49 होर ते ओगी रै कुण्डा ना पाणै जौखै कि तिन्हा बै बोहू दुःख होर कष्ट होणा । 50 तौखे रोणा होर दौद पिशणा होणा ।

### पुराणी होर नऊई शिक्षा

51 कि तुसै ए सारी गला समझी? तिन्है बोलू, "हाँ जी ।" 52 यीशुऐ तिन्हा बै बोलू, "हर एक शास्त्र ज्ञाणनू आला जे स्वर्ग राज्य रा चला बैणू सा सो तेई गृहस्ती माहू साही सा जो आपणै भण्डारा ना नोऊई होर पराणी चीजा खोला सा ।"

### नासरता न यीशु रा आदर नेई केरु

53 इन्हा पठाउणी होर कैथा खत्म केरै ना बाद यीशु तौखना चैलू, 54 होर आपणै इलाकै बै वापस आऊ । तैबै तेइयै यहूदी री धर्मसभा ना उपदेश देणा शुरु केरु । तैबै हर कोई हैरान होइया बोलदा लागा, "एइबै ऐण्डी बुद्धि री गला कौ ना मिली होर ऐण्डी चमत्कारी शक्ति कौ ना मिली?" 55 कि ऐ तेई

बढ़ई रा बेटा नी आँथी? कि एई री आमा रा नाँ मरियम नी आँथी? याकूब, युसुफ, शमौन होर यहूदा एइरै भाई ता सी ।<sup>56</sup> कि एइरी सारी बहणी आसा बिचै नी आँथी? ता एइबै ऐ सबकिछ कौखना मिलू? <sup>57</sup> तिन्है यीशु स्वीकार नी केरू । तैबै यीशुऐ बोलू, “कोई बी गुरु आपणै घोर घाँट ना आदर नी मिलदा ।” <sup>58</sup> तिन्हैरै कम वशाह होणै री वजहा ना यीशुऐ तौखै बोहू चमत्कार नी केरै

### यूहन्ना बपतिस्मादेणु आळै री हत्या

**14** तेई बौकै गलील जिल्लै रै राजा हेरोदेसै जैबै यीशु रै बारै ना शुणू, <sup>2</sup> ता तेइयै आपणै सेवका बै बोलू, “ऐ यूहन्ना बपतिस्मै देणु आला सा जो मूँऐ दै ना जिन्दा हुआ सा होर एण्डै चमत्कारै रै कोम केरदा लागा सा ।” <sup>3</sup> ऐ सौहै हेरोदेस राजा सा जुणियै यूहन्ना बँदी बनाइया शाँगीयै बोनिया जेला ना पाऊ ती । <sup>4</sup> किबैकि युहन्ना तेइबै आपणै भाई री लाडी हेरोदियास रैखणै री तैइयै नाँह केरू ती कि एण्डा केरना तेरी तैइयै ठीक नी आँथी । <sup>5</sup> एसा वजहा ना राजा हेरोदेस यूहन्ना बै मारन चाहा ती पर स लोका ना डौरा ती किबैकि ते यूहन्ना बै भविष्यवक्ता मैना ती । <sup>6</sup> पर जैबै हेरोदेस राजा रा जन्म धियाड़ा आऊ ता हेरोदियासै री बेटियै हेरोदेस होर तेइरै पाहुणै सामनै नोचिया हेरोदेस राजा खुश केरू । <sup>7</sup> तैबै हेरोदेस राजै कसम खाइया तेसाबै बोलू कि जै किछ तू मुँगणा चाहली हाँऊ वचन देआ सा मूँ सौ तौभै देणा । <sup>8</sup> आपणी आमै री गला ना एजिया तेसै बोलू, “मुँभै थाई ना रैखिया बपतिस्मै देणु आलै यूहन्ना री मुँडी दै ।” <sup>9</sup> राजा बोहू दुःखी हुआ पर आपणी कसम होर पाहुणै री वजहा ना तेइयै तेसरी माँग पूरी केरनै रा हुकम धिना । <sup>10</sup> हेरोदेस राजै जेला बै यूहन्ना री मुँडी काटणै री तैइयै माहू भेजै । <sup>11</sup> यूहन्ना री मुँडी थाई ना रैखिया आणी होर शोहरी हागै धिनी । तेसै सो मुँडी आपणी आमा हागै नेई । <sup>12</sup> तैबै यूहन्ना रै चेलै आए होर तिन्है तेइरी लाश नेइया पौथी होर जाइया यीशु बै दैसू ।

### पॉज हजार मर्दा बै रोटी खयाणी

<sup>13</sup> जैबै यीशुऐ यूहन्ना रै बारै ना शुणू ता स किस्ति पैंधै चैदिया सुनसान जैगहा बै नौठा । ऐ शुणिया लोका ग्राँ-ग्राँ ना एजिया पैदल यीशु पिछै चैलै । <sup>14</sup> यीशु जैबै किस्ति ना बाहरै आऊ ता लोकै री बड़ी भीड़ हेरिया तिन्हा पैंधै दया आई होर तेइयै तिन्हा सँघलै बीमार माहू ठीक केरै । <sup>15</sup> जैबै सोझ हुई ता तेइरै चेलै एजिया बोलू, “ऐ सुनसान जैगहा सा होर बड़ी देर हुई सा तू इन्हा लोका बै विदा केर ताकि ते ग्राँ ना जाइया आपणै खाणै रा होर रौहणै रा इंतजाम केरलै ।” <sup>16</sup> पर यीशुऐ तिन्हा बै बोलू, “इन्हा जाणा जरूरी नी आँथी । तुसै इन्हा बै किछ खाणै बै दैआतू ।” <sup>17</sup> चेलै यीशु बै बोलू, “आसा आगै सिर्फ पॉज रोटी होर दूई मैच्छी सी ।” <sup>18</sup> यीशुऐ बोलू, “तिन्हा मूँ हागै आणा ।” <sup>19</sup> तेइयै भीड़ै रै लोका बै गाह पैंधै बेशणै बै बोलू । तैबै यीशुऐ पॉज रोटी होर दूई मौछी लेइया स्वर्गा धिराबै हेरिया रोटी होर मौछी री तैइयै परमेश्वरा रा धन्यवाद केरू । तैबै रोटी चोड़िया आपणै चेलै बै धिनी होर चले ते लोका बै बोडी । <sup>20</sup> सेभियै रोजणै ढोई खाऊ । एथा ना बाद चले बैची दी रोटी री बारा टोकरी भौरी । <sup>21</sup> बेटडी होर शोहरू छौड़िया तौखै खाणू आलै कोई पॉज हजार मर्द ती ।

### यीशु रा पाणी पेन्धे चलणा

<sup>22</sup> ऊँईन बाद यीशुऐ आपणै चेलै किस्ति ना बशाइया आपू ना पैहिलै गलील जिल्लै री झीला पारा बै भेजै <sup>23</sup> भीड़ै रै लोका बै विदा केरै ना बाद यीशु केलहा प्रार्थना केरदा ढोंगा पैंधबै नौठा । सोझकी घेरै यीशु तौखै केलहा ती । <sup>24</sup> तेई बौकै किस्ति पाणी री लैहरा सँधै डगमगाँदी लागी ती किबैकि बागर सामनै धिरै ना चलदी लागी ती । <sup>25</sup> रातकै कोई चोरुथै पौहरै यीशु झीला पैंधै चैलिया तिन्हा आगै आऊ । <sup>26</sup> तेइरै चेलै जैबै सो झीला पैंधै चैलदा हेरू ता ते डौरै होर बोलदै लागै, “ऐ ता कोई भूत सा ।” ते डौरै लाइया लेरा मारदै लागै । <sup>27</sup> यीशुऐ तिन्हा सँधै गला केरी होर बोलू, “हौंसला रैखा ऐ हाँऊ सा होर मता डौरदै ।” <sup>28</sup> पतरसै तेइबै बोलू, “अगर तुसै सी ता मुँभै पाणी पैंधै चैलिया आपू आगै एणै बै बोल ।” <sup>29</sup> यीशुऐ बोलू, “एज ।” पतरस किस्ति ना

उतरिया पाणी पैंधै यीशु धिराबै चैलू । <sup>30</sup> पर सौ बागरी हेरिया डौरू । सो डुबदा लागा होर सो चिल्लाऊ, “प्रभु जी मुँभै बचातू ।” <sup>31</sup> यीशुऐ तुरन्त आपणै हौथे लाइया ढौकू होर बोलू, “ओ थोड़ै बशाह केरनू आलै तँ आपणै मना ना शक किबै केरू?” <sup>32</sup> जैबै ते किस्ति पैंधै चढै ता बागर रुकी । <sup>33</sup> किस्ति पैंधलै लोकै यीशु री जय-जयकर केरी होर बोलू, “तू सचमुच परमेश्वरा रा बेटा सा ।”

### गन्नेसरत न बमारा बै ठीक केरना

<sup>34</sup> ते झील पार केरिया गन्नेसरत जगहा ना पुजै । <sup>35</sup> तौखलै लोकै सो पछियाणू होर औरै-पौरै सेभ जैगहा तेइरै एणै री खबर भेजी ताकि सारै बीमार माहू बै तेई आगै आणलै । <sup>36</sup> होर ते विनती केरदै लागै कि तू आसा बै आपणै झिकड़ै रा पल्लू छुँगणै दै । होर जुणियै छुँगू ते ठीक हुऐ ।

### रीती रिवाज मैनणु आळै री तैइये प्रशन

**15** भीड़ा बै विदा केरिया यीशु किस्ति ना बेशिया मगदन इलाकै बै आऊ । <sup>2</sup> “तेरै चेलै बुजुगै रै रीति-रिवाजा बै किबै चोड़ा सी? ते रोटी खाणै ना पैहलै आपणै हौथ किबै नी धोदें?” <sup>3</sup> यीशुऐ जवाब धिना, “तुसै बी आपणै रीति-रिवाजा री तैइयै परमेश्वरै री विधि बै किबै चोड़ा सी?” <sup>4</sup> किबैकि परमेश्वरै ता बोलू ती, “तू आपणै आमा-बापू रा आदर केर होर जुण आमा-बापू बै बुरा बोलला तेइबै सजा मिलणी ।” <sup>5</sup> अगर तुसै आपणै आमा-बापू बै ऐ बोला सी कि मैं आपणा सेभ किछ परमेश्वरा बै चढ़ाऊ सा होर हाँऊ तुसरी किछ मजत नी केरी सकदा ता तुसै तिन्हरा की आदर केरू? <sup>6</sup> एण्डै तेरहै तुसै आपणै रीति-रिवाजा री वजहा ना परमेश्वरै री विधि बै चोड़ा सी । <sup>7</sup> हे ढोंगियो, तुसरै बारै ना यशायाह भविष्यवक्तै ठीक भविष्यवाणी केरी ती कि, <sup>8</sup> ए आपणै शोँढे लाइया मेरा आदर केरा सी पर इन्हरा मन मूँ ना दूर रोहा सा । <sup>9</sup> मेरी तैइयै तिन्हरी भक्ति व्यर्थ सा किबैकि तिन्हरी शिक्षा माहूऐ बणाए दै नियम सी ।

### अशुद्ध केरणु आळी गैला

<sup>10</sup> यीशुऐ भीड़ै रै लोक आपू आगै शाधै होर तिन्हा बै बोलू, “शुणा होर समझा ।” <sup>11</sup> माहू रै मुँहै आधे जे भीतरा बै जा सा सो तेईबै अपवित्र नी केरदा बल्कि तेइरै मुँहा ना निकलू दा शब्द तेइबै अपवित्र केरा सा । <sup>12</sup> तैबै यीशु रै चेलै तेई हागै आए होर बोलू, “कि तू जाणा सा कि तेरी गला रा फरीसी लोकै बुरा मैनू? <sup>13</sup> यीशुऐ जवाब धिना, “हर सौ बूटा जे स्वर्गै रै परमेश्वरै नी लाऊ दा तेई पेचिणा ।” <sup>14</sup> तिन्हा बै जाणै दैआ किबैकि ते काणै सी । काणा अगर काणै बै बौत रिहाला ता तिन्हा दुही खाचै ना पौड़ना । <sup>15</sup> तैबै पतरसै यीशु बै बोलू, “एसा पठाउणी रा मतलब आसा बै दैस ।” <sup>16</sup> यीशुऐ बोलू, “कि तुसै हाजी बी नी समझू?” <sup>17</sup> कि तुसै नी जाणदें जे मुँहा ना जा सा सो पेटा ना पुजा सा । <sup>18</sup> पर जे मुँहै आधे बाहरै निकला सा सो तेइरै मना ना निकला सा होर तेइबै अपवित्र केरा सा । <sup>19</sup> किबैकि बुरै विचार, खून केरनै रा विचार, व्यभिचार, चोरी केरनै रा विचार, झूठ बोलणा होर निन्दा केरना ए बुरै विचार मना ना निकला सी । <sup>20</sup> इन्हरी वजहा ना माहू अपवित्र बैणा सा । हौथ धोए बगैर रोटी खाणै सँधै कोई अपवित्र नी होंदा ।

### कनानी जाति री बेटडी रा बशाह

<sup>21</sup> तैबै यीशु तेसा जैगहा छौड़िया सूर होर सैदा बै नौठा । <sup>22</sup> तौखै एक कनान ग्राँ री बेटडी आई होर रोँदी लागी, “हे प्रभु, दाऊदै री सन्तान मूँ पैंधे दया केर । मेरी बेटी बै बुरी तैरहा चेटू फैसू सा ।” <sup>23</sup> यीशुऐ तेसाबै एक शब्द बी नी बोलू । तेइरै चेलै तेई हागै आए होर विनती केरदै लागै, “एसा बै विदा केर किबैकि ऐ आसा पिछै एन्दी लागी सा होर रोँदी लागी सा ।” <sup>24</sup> यीशुऐ जवाब धिना, “हाँऊ सिर्फ पापा ना डुबै दै इस्राइली लोकै री तैइयै भेजु सा होरी री तैइयै नी ।” <sup>25</sup> तैबै तेसै बेटडियै टुँबडै पौड़या यीशु हागै विनती केरी, “हे प्रभु मुँभै बचातू ।” <sup>26</sup> यीशुऐ जवाब धिना, “बच्चै री रोटी नेइया घोरके कुतै बै देणा ठीक नी आँथी ।” <sup>27</sup> तेसै बेटडियै बोलू, “ऐ ठीक सा प्रभु, पर कुतै बी ता मालकै री मेजा ना शौद्ध दै चूर-चार खा सी ।” <sup>28</sup> तैबै यीशुऐ तेसा बेटडी बै

बोलू, "तेरा वशाह बड़ा सा । जे तू चाहा सा स तेरी तैइयै पूरा लोड़ी हुआ ।" होर तेसरी बेटी तुरन्त ठीक हुई ।

### कई किस्मा री बमारी ठीक केरनी

29 तैबै यीशु तोखना चैलू होर गलील जिल्ले री झीलै रै किनारे ना पुजू । सौ उपदेश देणै री तैइयै एकी धारा पैधे चैदिया बेठा । 30 लोके री बोहू बड़ी भीड़ तौखे आई । तिन्है आपू सेंधे लँगड़े, काणै, नाँवै, टुण्डे होर बोहू सारै बीमार माहू आपू सेंधे आणै होर यीशु री जोंघा हागै रैखे होर यीशुए ते ठीक केरै । 31 जैबै लोकै हेरू कि लँगड़े ओँदवै लागै, टुण्डे ठीक हुऐ, नाँवै बोलवै लागै होर काणै हेरवै लागै ता ते बड़ै हैरान हुऐ होर इस्राइलै रै परमेश्वरै री जय-जयकार केरवै लागै ।

### चार हजार लोका बै खियाणा

32 यीशुए आपणै चेलै शाधै होर तिन्हा बै बोलू, "मुँभै एसा भीड़ा पैधे तरस एजा सा, किबैकि ए लोका त्रा रोजा ना मूँ सेंधे सी होर इन्हा हागै खाणै बै किछ नी ओँधी । हाँऊ इन्हा बै भूखा विदा नी केरी सकदा । कोइँछै ऐण्डा नी लोड़ी हुआ कि ए बेहोश होइया लोमै पौडलै ।" 33 तैबै तेइरै चेलै बोलू, "एतरी बड़ी भीड़ै री तैइयै एसा सुनसान जैगहा ना एतरी रोटी कौखना मिलणा?" 34 तैबै यीशुए तिन्हा ना पुछू, "तुसा हागै केतरी रोटी सी?" तिन्है बोलू, "सौत रोटी होर किछ मैच्छी सी ।" 35 यीशुए भीड़ै रै लोका बै धौरती बेशणै बै बोलू होर तिन्हा सौत रोटी होर मैच्छी लेइया परमेश्वरा रा धन्यवाद केरू, 36 होर रोटी चोडिया आपणै चेलै बै दंदा लागा होर तेइरै चेलै ते लोका ना बोडी । 37 सैभी लोकै रौजदी ढौई खाई । तैबै चेलै बैची दी रोटी री सौत टोकरी भौरी । 38 बेटडी होर बच्चै छौडिया तौखे चार हजार मर्दे रोटी खाई । 39 भीड़ा बै विदा केरिया यीशु किस्ति ना बेशिया मगदन इलाकै बै आऊ ।

### स्वर्गीय नशाणी री मांग

16 तैबै फरीसी होर सदकी लोका यीशु आगै आए । तिन्है यीशु बै परखणै री तैइयै तेइबै कोई चमत्कार केरनै बै बोलू ताकि ऐ पता लागला कि तेइबै परमेश्वरा ना अनुमति मिली सा । 2 यीशुए जवाब धिना, "साँझकी घेरै तुसै बोला सी कि मौसम ठीक रौहणा किबैकि आसमान लाल सा, 3 होर दोती बोला सी कि औज मौसम धूँधला रौहणा किबैकि आसमान धूँधला होर लाल सा ।" तुसै सगै रै लच्छणा बै ज्ञाणा सी पर बौकै रै लच्छणा बै नी ज्ञाणी सकदै । 4 एई जुगै रै बुरै कोम केरनू आलै लोक चिन्ह चमत्कार तोपा सी पर तिन्हा बै योनै रै चिन्ह छौडिया होर कोई चिन्ह नी मिलणा होर यीशु तिन्हा छौडिया नौठा ।

### फरीसी होर सदकी री शिक्षा रा खमीर

5 यीशु रै चेलै झीला पारा बै आए पर तिन्है रोटी आणनी बिसरी । 6 यीशुए तिन्हा बै बोलू, "होशियार रौहात! फरीसी होर सदकी लोकै रै खमीरा ना बचिया रौहा ।" 7 तिन्है आपू ना विचार केरिया बोलू, "होई सका सा आसै रोटी नी आणी तैबै एइयै ऐण्डा बोलू ।" 8 यीशुए तिन्है मनै री गल ज्ञाणिया बोलू, "तुसै रोटी नी आणी ऐण्डै सोत्रिया तुसै आपणा वशाह किबै कम लाऊ केरना?" 9 कि तुसै हाजी बी नी समझदै । याद केरा कि जैबै पोंज हजार लोकै रोटी खाई ता तुसै पोंज रोटी री केतरी टोकरी भौरिया चैकी? 10 कि तुसाबै याद नी जैबै चार हजार लोकै रोटी खाई ता तुसै सौत रोटी री केतरी टोकरी भौरी? 11 किबै नी समझदै कि मँ तुसाबै रोटी रै बारै ना नी बोलू? मँ ता तुसाबै फरीसी होर सदकी लोकै रै खमीरा ना बचणै बै बोलू । 12 तैबै ते चेलै समझै कि रोटी रै खमीरा ना नी बल्कि एथा रा ऐ मतलब सा कि आसा फरीसी होर सदकी लोकै री बहकाणू आई शिक्षा ना बचिया रौहणा ।

### पतरसा रा यीशु बै 'मसीह' मैनणा

13 यीशु कैसरिया फिलिप्पी रै देशा बै आऊ होर आपणै चेलै ना पुछदा लागा, "लोका मेरै बारै ना की बोला सी कि हाँऊ कुण सा?" 14 चेलै बोलू,

"किछ युहन्ना बपतिस्मा देणू आला बोला सी, किछ बोला सी कि तू एलिय्याह सा होर किछ बोला सी कि तू यिर्मयाह या भविष्यवक्ता ना कोई एक सा ।" 15 यीशुए तिन्हा बै बोलू, "तुसै मेरै बारै ना की बोला सी कि हाँऊ कुण सा?" 16 शमोन पतरसै बोलू, "तू जिन्दै परमेश्वरा रा बेटा मसीह सा ।" 17 यीशुए तेइबै बोलू, "योनै रै बेटै शमोन! तू धन्य सा किबैकि तौभै ऐ गल कोई माहूए नी दैसी पर मेरा बापू जो स्वर्गा रा परमेश्वर सा तेइयै ऐ गल तौ पैधे प्रगट केरी ।" 18 हाँऊ बोला सा कि तू पतरस सा होर मूँ एई पाथरा पैधे आपणी कलीसिया बणाणी । मोऊती री शक्ति रा तथा पैधे कोई असर नी होणा । 19 मूँ तौभै स्वर्ग राज्य री कुँजी देणी: "जेकिछ तू एसा धौरती पैधे बोनला तेई स्वर्गा ना बोनिया होर जे तू एसा धौरती पैधे खोलला तेई स्वर्गा ना खोलिया ।" 20 तैबै यीशुए आपणै चेलै बै बोलू कि तुसै एसा गल कौसी बै हेरीत् दैसदै कि हाँऊ मसीह सा ।

### आपणी मौऊती रै बारे यीशु री भविष्यवाणी

21 तेई बौकै यीशुए आपणै चेलै बै बोलू, "मेरा यरूशलेमा बै ज्ञाणा जरूरी सा कि तौखे हाँऊ यहूदी धर्मशास्त्री, बुजुर्ग यहूदी नेता होर प्रधान पुजारी रै हौथे दुःख चैकणू होर मारिनु होर त्रीजै ध्याडी जिन्दा होनु ।" 22 तैबै पतरसै तेइबै बोलू, "हे प्रभू! परमेश्वर तौ पैधे दया केरला होर तौ सेंधे ऐण्डा नि लोड़ी हुआ ।" 23 तैबै यीशुए तेई धिराबे मुडिया बोलू, "हे शैतान मूँ सामनै ना दूर हो । तू मेरी तैइयै टोकरा रा कारण सा । तू परमेश्वरै री गला ना मन नी लाँदा पर माहू री गैला ना मन ला सा ।"

### यीशु रै पीछे चलणै रा मतलब

24 तैबै यीशुए आपणै चेलै बै बोलू, "जुण मूँ पिछै एणा चाहा सा सो आपणा नाँह केरला होर आपणा दुःख चैकणै री तैइयै त्यार रौहला होर मूँ पिछै एला ।" 25 जुण आपणै प्राण बचाणा चाहला तेई ते नाश केरने पर जुण मेरी तैइयै आपणै प्राण देला तेई ते बचाणै । 26 अगर कोई आपणै प्राण देइया सारै संसारा बै प्राप्त केरा सा तथा रा की फायदा? 27 माहू रा बेटा स्वर्गदत्ता सेंधे परमेश्वरै री महिमा ना एणा होर तेई बौकै तेई हर एक माहू रा तिन्है कर्म रै मुताबक फैसला केरना कि कुणी बै की इनाम देणा । 28 हाँऊ तुसाबै सच बोला सा ओखे किछ ऐण्डै सी तिन्हा तैबै तक नी मोरना जैबै तक कि ते माहू रै बेटै बै तेइरै राज्य ना एन्दै नी हेरलै ।

### यीशु रा रूप बदलणा

17 छौह रोजा बाद यीशु पतरस, याकूब होर तेइरै भाई युहन्ना सेंधे उथडै ढौगा पैधे सुनसान जैगहा बै नौठा । 2 तौखे तिन्हा सामनै यीशु रा रूप बदलुआ । तेइरा मुँह सुरजा साही चमकदा लागा होर तेइरै झिकडै बी चमकदै लागै । 3 तैबै चानक मूसा होर एलिय्याह तिन्हा सामनै प्रगट हुऐ होर यीशु सेंधे गला केरदै लागै । 4 ऐ हेरिया पतरसै यीशु बै बोलू, "प्रभु ऐ केतरा शोभला सा कि आसै ओखे सी । अगर तू चाहा सा ता हाँऊ ओखे त्रा मण्डप बणानू एक तेरी तैइयै, एक मूसै री तैइयै होर एक एलिय्याह री तैइयै ।" 5 पतरस हाजी गला केरदा लागा ती कि एकी चमकदै बादलै ते एजिया खौटै होर बादला ना आकाशवाणी हुई, "ऐ मेरा प्यारा बेटा सा जुणी ना हाँऊ बोहू खुश सा । एइरी शुणा ।" 6 जैबै चेलै ऐ शुणु ता ते टुँबडै मुण्डै धौरती पौडै । 7 तैबै यीशु तिन्हा हागै आऊ होर तिन्हा बै बोलू, "डौरदै मता, खैडै होआ ।" 8 जैबै तिन्है खैडै होइया हेरू ता तौखे यीशु केल्हा ती । 9 जैबै ते ढौगा पैधे ना एन्दै लागै ती ता यीशुए तिन्हा बै बोलू, "जेकिछ तुसै हेरू सा होरी बै तैबै तक हेरीत् दैसदै जैबै तक कि माहू रा बेटा मोरै ना बाद जिन्दा नी केरिला ।" 10 तैबै तेइरै चेलै तेइना पुछू, यहूदी धर्मविधि ज्ञानु आलै किबै बोला सी कि एलिय्याह रा पैहिलै एणा पक्का सा?" 11 यीशुए तिन्हा बै जवाब धिना, "एलिय्याह एन्दा लागा सा तेई हर चीजा ठीक-ठाक केरनी ।" 12 पर हाँऊ तुसाबै बोला सा कि एलिय्याह ऐबै तक आऊ सा पर लोकै सो पछियाणू नी होर लोकै तेई सेंधे जैण्डा सोचू तैण्डा व्यवहार केरू । तिन्हरी वजहा ना माहू रा बेटा बी तैण्डाए सताइणा । 13 तैबै तेइरै चेलै समझू कि ऐ बपतिस्मै देणू आलै युहन्ना रै बारै ना बोलदा लागा सा ।

### दुष्टआत्मा ग्रस्त होछे शोहरू बै ठीक केरना

14 जैबै यीशु भीड़ा हाम्गे वापस आऊ ता एक माहू तेई हाम्गे आऊ होर टुँबड़े पौडिया प्रणाम केरिया बोलू, 15 "हे प्रभू मेरै बेटे पैंधे दया केर । तेइबै मिर्गी एजा सा होर बोहू तडफा सा । स आंगी होर पाणी ना पौडदा रोहा सा ।" 16 में सौ तेरै चेलै आम्गे आणू पर ते एइबै ठीक नी केरी सकै । 17 यीशुए जवाब धिना, "हे भटकै दै अविश्वासी लोको! मूँ कैबै तक तुसा सैंधे रोहणा होर तुसरी सौहणी? तेइबै मूँ हाम्गे आणा ।" 18 तैबै यीशुए चेट्ट बै हुक्कम धिना होर स तेई ना निकता होर स शोहरू तेसा घड़ियै ठीक हुआ । 19 तैबै तेइरै चेलै केल्है जेही यीशु ना पुछू, "आसै एई ना चेट्ट किबै नी खोली सकै?" 20 यीशुए तिन्हा बै दैसू, "किबैकि तुसा ना वशाह री कमी सा । हाँऊ तुसाबै सच बोला सा अगर तुसा ना राई रै दाणै जेतारा बी वशाह होला ता तुसै एई दौगा बै बोली सका सी, 'औखै ना हट होर तौखै जा ता तेई जाणा । तुसरी तैइयै किछ बी मुश्किल नी होणा ।" 21 जैबै यीशु रै चेलै गलील जिन्नै ना यीशु सैंधे मिलै ता यीशुए तिन्हा बै बोलू, "माहू रा बेटा माहू री वजहा ना दौकिणू आला सा,

### आपणी मौऊती रै बारे न यीशु री दबारा भविष्यवणी

22 तिन्हा स मारना पर त्रीजै रोजै तेई भी जिन्दै होणा!" ए शुणिया तेइरै चेलै हैरान हुऐ । 23 तैबै ते बड़े उदास हुऐ।

### मंदिरा रा कर

24 जैबै यीशु होर तेइरै चेलै कफरनहूमा बै आऐ ता मन्दिरै री चुँगी लेणू आलै पतरसा आम्गे आऐ होर बोलू, कि तेरा गुरु मन्दिरै री चुँगी नी देँदा?" 25 पतरसै जवाब धिना, "हाँ सो देआ सा ।" होर घोरा बै नौठा । पतरसै रै बोलणै ना पैहिलै यीशुए बोलू, "शमौना तेरा की वचार सा? धौरती रै राजै कौसना चुँगी लेआ सी? आपणै बच्चै ना या होरी रै बच्चै ना?" 26 पतरसै जवाब धिना, "हारी रै बच्चै ना ।" तैबै यीशुए तेइबै बोलू । "अर्थात् तेइरै बच्चै बै छूट सा ।" 27 पर आसा ते लोका नराज नी केरनै । तू झीला हाम्गे जा होर मैच्छी दौकणै बै कौंडा शेट । जे पैहली मैच्छी दौकिली तेसरा मुँह खोली होर तौभै तेसरै मुँहा ना एक सिक्का मिलणा । तेई आणिया मेरी होर आपणी तैइयै तिन्हा बै देई ।

### स्वर्गा रै राज्य न बडा कुण?

18 तैबै यीशु रै चेलै तेई हाम्गे एजिया पुछू, "स्वर्ग रे राज्य ना सैभी ना बडा कुण सा?" 2 तैबै यीशुए एक बच्चा आपू आम्गे शाधू होर तिन्हा सामनै खड़े केरिया बोलू, 3 "हाँऊ तुसाबै सच बोला सा जैबै तक तुसै एई बच्चै साही नी बणलै स्वर्ग राज्य ना नी जाई सकदै ।" 4 अगर कोई आपणै आपू बै एई बच्चै साही नम्र बणा सा सौहै स्वर्ग राज्य ना सैभी ना बडा सा । 5 होर जुण एई बच्चै साही नम्र माहू बै मेरै नाँ ना ग्रहण केरा सा सो मुँभै ग्रहण केरा सा ।

### पाप केरने री परीक्षा

6 पर जुण मूँ पैंधे वशाह केरनू आलै नम्र माहू रै बौतै री बाधा बैणा सा तेई री तैइयै ऐ शोभला सा कि तेइरै गौआ ना गरका पाथर बोनिया सौ समुद्रा ना पाइला । 7 मुश्किलै री वजहा ना मुँभै सँसारै रै लोकै री तैइयै दुःख सा । मुश्किला ता एणी पर दुःख ता मुँभै तिन्हरी तैइयै सा जोसरी वजहा ना मुश्किला एजा सी । 8 अगर तेरै हौथ या जौघा तेरै वशाह री रुकावट बणा सी ता तिन्हा बै काटिया शेट किबैकि इन्हा हौथा जौघा सैंधे नरकै री आंगी ना पाइणै ना खरा तेरी तैइयै ऐ सा कि तू बगैर हौथै जौघै स्वर्गा बै जाला होर तौभै कदी बी नी खत्म होणू आई जिन्दगी मिलली । 9 अगर तेरी औछी तेरै वशाह री तैइयै रुकावट बणा सा ता तू तेसाबै खोलिया शेट किबैकि नरका बै जाणै ना खरा तेरी तैइयै ऐ सा कि तू काणै होइया स्वर्गा बै जाला ।

### राठी दी भेड़ा रा उदाहरण

10 "होर हेरा, मेरै इन्हा मासूम चेलै ना कौसी बै बी बेकार हेरीत् समझदै । हाँऊ तुसाबै दैसा सा कि इन्हरी हेर-शुण केरनू आलै स्वर्गदूतै री पहुँच स्वर्गा ना मेरै परमेश्वर बापू हाम्गे लगातार रोहा सा ।" 11 "माहू रा बेटा भटकै दै लोका रा उद्धार केरनै री तैइयै आऊ सा ।" 12 "तुसै की सोचा सी? अगर कौसी माहू हाम्गे शौऊ भेड़ा सी होर तिन्हा ना एक भेड़ राहइली ता कि तेई नदीनुए भेड़ा छौडिया सो एक भेड़ दौगा ना जाइया नी तोपणी?" 13 जैबै सो तेइबै मिलली ता हाँऊ तुसाबै सच बोला सा तेइबै एतरी खुशी तिन्हा नदीनुए भेड़ै री तैइयै नी होणी जो राहुई दी नी ती आँधी पर एसा एकी भेड़ै री तैइयै तेइबै बोहू खुशी होणी । 14 ऐण्डी इच्छा स्वर्गै रै परमेश्वर बापू री बी सा कि कोई बी माहू नी भटकला ।

### पापी रै प्रति व्यवहार

15 अगर तेरा भाई तेरै खिलाफ अपराध केरा सा ता तेइबै केल्है ना जाइया समझा अगर स तेरी शुणला ता तँ आपणा भाई पाऊ । 16 अगर सौ नी शुणला ता आपू सैंधे एक-दूई होर माहू नेइया हर एक गल तिन्हरी गवाही ना तिन्हरै मुँहै लाइया पक्की केर । 17 अगर सो तिन्हरी बी नी शुणला ता कलीसिया बै दैस । अगर सो कलीसियै री बी नी शुणला ता तू तेई बै अधर्म होर चुँगी लेणू आला बुझिया छौड़ी दै ।

### रोकणा होर मौका देणा

18 "हाँऊ तुसाबै सच बोला सा जेकिछ तुसै एसा धौरती पैंधे बोनलै स स्वर्गा ना प्रभु बोनणा होर जेकिछ तुसै एसा धौरती ना खोललै स प्रभु स्वर्गा ना खोलणा ।" 19 हाँऊ तुसाबै ऐ बी दैसा सा, "अगर तुसा मुँझै दूई माहू एसा धौरती पैंधे कौसी गलै री तैइयै एक मन होइया प्रार्थना केरलै ता परमेश्वर बापू सो तुसरी तैइयै पूरी केरनी ।" 20 किबैकि जौखै मेरै नाँ ना दूई या त्रा माहू कड्डा होआ सी तौखै हाँऊ तिन्हा सैंधे होआ सा ।

### निर्दय दासा रा उदाहरण

21 तैबै पतरस यीशु आम्गे नौठा होर बोलू, "प्रभु, अगर मेरा भाई मेरै खिलाफ अपराध केरदा रोहा सा ता मूँ सो केतरी बार माफ केरना? अगर सो सौत बार अपराध केरा सा ता तैबै बी?" 22 यीशुए बोलू, "सौत बार केल्ही नी बल्कि हाँऊ तौभै दैसा सा, सौतै रै सतर गुणा बार तू तेइबै माफ केर ।" 23 स्वर्ग राज्य री तुलना तेई राजै सैंधे केरी सका सी जुणीयै आपणै नोकरा ना हिसाब लेणा चाहू । 24 जैबै तेइयै हिसाब लेणा शुरू केरु ता तेई हाम्गे एक ऐण्ढा माहू आणू जुणी हाम्गे दस हज़ार तोड़े रा कर्ज ती । 25 पर सो तेथा बै चुकाई नी ती सकदा । तेइरै स्वामियै तेइरी लाडी, बाल-बच्चै होर जायजाद बेचिया कर्जा पूरा केरने रा हुकम धिना । 26 तैबै तेइरा नोकर तेई राजै री जौघा पैंधे पौडिया गिड़गिड़ादा लागा, 'सब्र केरा, मूँ सारा कर्जा चुकाणा ।' 27 तेई नोकरै रै स्वामी बै तेई पैंधे दया आई होर तेइरा कर्जा माफ केरिया सो छौड़ी धिना । 28 जैबै सो नोकर तौखना जाँदा लागा ती ता तेइबै तेइरा सैधी एक होर नोकर मिलू जुणबै तेइयै किछ देबुऐ धिनै ती । तेइयै सो गौळा ना दौकू होर तेइबै बोलू, "जे मेरा कर्जा तौ आम्गे सा तेई तू दै ।" 29 तैबै तेइरै सैंधियै तेइ री जौघा पैंधे पौडिया बोलू, 'सब्र केर, मूँ तेरा कर्जा देणा ।' 30 पर तेइयै नाँह केरु होर जाँ तक तेइयै सो कर्जा नी चुकाऊ तेइयै सो जेल बी केराऊ । 31 होरा नोकर ऐ हेरिया बड़ै दुःखी हुऐ होर तिन्है जाइया एथै री खबर आपणै मालका बै धिनी । 32 तैबै तेइरै मालकै सो शाधु होर बोलू, "ओ दुष्ट नोकरा, में तौ पैंधे दया केरिया तेरा सारा कर्जा माफ केरु । 33 जैण्डी दया में तौ पैंधे केरी तू बी तेई पैंधे केरी सका ती । 34 तेइरै मालका बै बड़ी झिक आई होर तैबै तक सजा काटणै बै बोलू जैबै तक कि सो कर्जा चुकाला नी । 35 जैबै तक तुसै पूरै मने आपणै भाई-बन्धु बै माफ नी केरलै तैबै तक परमेश्वर बापू बी तुसाबै माफी नी देणी ।

### तलाका रै बारे न यीशु री शिक्षा

19 इन्हा गला करै ना बाद सो गलीला ना वापस एजिया यहूदियै रै एरियै बै यरदन नौई पोरै बै नौठा । 2 लोके री बोहू बड़ी भीड़ तेई पिछै ती जे तेइयै ठीक केरी । 3 तेई परखदै किछ फरीसी लोका तौखै आरे होर बोलू, “कि ऐ सही सा कि कोई बी कौसी बी वजहा ना आपणी लाडी बै तलाक देला?” 4 यीशुऐ जवाब धिना, “कि तुसै शास्त्रा ना नी पौढू कि दुनिया बणाणू आलै शुरु ना ऐ मर्द बेटडी केरिया बणाऐ?” 5 होर बोलू ती, ‘एसा वजहा ना आपणै आमा-बापू बै छौडिया मर्दा आपणी लाडी सँघै एक देह होइया रौहणा ।’ 6 ते दूई नी बल्कि एक रूप होआ सी । ऐबै जुणा परमेश्वरै जोड़ै सी ते अलग नी करनै । 7 तिन्है बोलू, “तैबै मूसै किबै लिखू सा कोई मर्द आपणी लाडी बै तलाक देई सका सा ।” 8 यीशुऐ तिन्हा बै बोलू, “मूसै ऐ विधान तुसा लोकै रै कठोर मनै री वजहा ना धिना ती पर शुरु ना ऐण्डी कोई रीति नी ती आँधी ।” 9 हाँऊ तुसाबै बोला सा कि जुण व्यभिचार छौडिया कौसी होरी वजहा ना आपणी लाडी बै तलाक देआ सा होर होरी री बेटडी सँघै ब्याह केरा सा ता सो व्यभिचार केरा सा । 10 तेइरै चेलै तेइबै बोलू, “अगर एक बेटडी होर मर्द रै बीचा ना ऐण्डी स्थिति सा ता कौसी रा व्याह नी केरना सही सा ।” 11 यीशुऐ तिन्हा बै बोलू, “हर कोई एई उपदेशा बै ग्रहण नी केरी सकदा । एई उपदेशा बै सिर्फ ते ग्रहण केरी सका सी जुणी बै एथै री सहनशक्ति धिनी सा ।” 12 किछ ऐण्ढे सी जो आपणी आमै रै पेटा ना ऐ खुसरै (बे उलाद) पैदा हुऐ सी । किछ ऐण्ढे सी जो लोकै खुसरै बणाऐ होर किछ ऐण्ढे सी जुणियै स्वर्ग राज्य री वजहा ना व्याह नी केरनै रा फैसला लेऊ सा । जुण एई उपदेशा बै ग्रहण केरी सका सा केरला ।

### शोहरु बै आशीर्वाद

13 तैबै लोकै किछ बालक यीशु हागै आणै कि सो तिन्हरी मुँडी पँधै हौथ रैखिया तिन्हा बै आशीर्वाद देला होर तिन्हरी तैइयै प्रार्थना केरला । पर तेइरै चेलै ते डॉटे । 14 यीशुऐ तिन्हा बै बोलू, “बच्चै बै रौहणै दैआ तिन्हा बै मता रोकदै इन्हा मूँ हागै एणै दैआ किबैकि स्वर्ग रा राज्य इन्हरा सा ।” 15 तैबै तेइयै बच्चै री मुँडी पँधै आपणा हौथ रैखू होर तौखना नौठा ।

### धनी जवान होर हमेशा रा जीवन

16 तौखै एक माहू ती स यीशु आगै आऊ होर बोलू, “गुरु, हमेशा री जिन्दगी पाणै री तैइयै मूँ कि शोभलै कोम केरनै पोऐ?” 17 यीशुऐ तेइबै बोलू, “शोभला की सा, एथै रै बारे ना तू मुम्बे किबै लागा सा पुछ्दा? किबैकि शोभला ता सिर्फ एकै सा! तैबै बी अगर तू अन्नत जिन्दगी बै पाणा चाहा सा ता तू हुकमा रा पालन केर ।” 18 तेइयै यीशु ना पुछू, कूणा जेही हुकम? तैबै यीशुऐ बोलू, “हत्या नी केरनी, व्यभिचार मत केरदा, चोरी मत केरदा होर झूठी गवाही मत देंदा ।” 19 आपणै बापू होर आपणी आमा रा आदर केर, जैण्ढा तू आपू बै झुरा सा तैण्ढा तू आपणै पड़ेशी सँघै बी झुरी केर ।” 20 तेइयै यीशु ना पुछू, “हाँऊ इन्हा सैभी गला बै मैना सा । ऐबै मूँ ना कौस गलै री कमी सा?” 21 यीशुऐ तेइबै बोलू, “अगर तू सिद्ध होणा चाहा सा ता जा आपणा सबकिछ बेच होर कँगाला बै बाँड ताकि तौभै स्वर्ग ना धन मिलला । तैबै मूँ पिछै एज ।” 22 पर जैबै तेई नोऊजवानै ऐ शणू ता सो दुःखी होइया तौखैना भेगू किबैकि सो बड़ा सेठ ती । 23 यीशुऐ आपणै चेलै बै बोलू, “हाँऊ तुसाबै सच बोला सा कि सेठा रा स्वर्ग राज्य बै जाणा मुशकिल सा ।” 24 हाँऊ तुसाबै बोला सा कि सेठ माहू रै स्वर्ग राज्य बै जाणै ना ऊँटा रा सिऊँणियै फेटै निकणा सान सा । 25 ऐ शुणिया यीशु रै चेलै बड़ै हैरान होइया तेई ना पुछू, “तैबै कोसरा उद्धार होई सका सा?” 26 यीशुऐ तिन्हा हेरिया बोलू, “माहू री तैइयै ऐ मुशकिल सा पर परमेश्वर सबकिछ केरी सका सा ।” 27 पतरसै यीशु बै बोलू, “हेरा, आसै सबकिछ छौडिया तुसा पिछै चेलै सी आसा बै की मिलणा?” 28 यीशुऐ तिन्हा बै बोलू, “हाँऊ तुसा लोका बै सच बोला सा कि नोऊँरे जुणा ना जैबै माहू रा बेटा आपणी राजगद्दी पँधै बेशला ता तुसा बी बाहरै गद्दी पँधै बेशिया परमेश्वरै रै लोका रा न्याय केरना ।” 29 होर जुणियै मेरी तैइयै आपणै घौर-बार, भाई-बैहण, बापू या आमा, बच्चै होर

जमीन जैगहा छोड़ी तेईबै शौऊ गुणा मिलणा होर अन्नत जिन्दगी रा हकदार बेणना । 30 पर किछ पैहलै सी तिन्हा पिछलै होणा होर किछ पिछलै सी तिन्हा पैहिलै होणा ।

### बारी रै मजदूरा रा उदाहरण

20 स्वर्गा रा राज्य एकी जमींदारा साही सा जो दोती-दोतियै आपणै अंगूरै रै बगीचै नौठा कि सो तौखै मजदूरा बै लाला । 2 तेइयै मजदूरै री दिहाडी एक चाँदी रा सिक्का रैखी होर ते बगीचै बै कोम केरदै भेजै । 3 सो लगभग नोऊ बाज्रै भी घौरा ना निकलू होर तेइयै हेरू कि किछ लोका बजारा ना बेकार खड़ै सी । 4 तैबै तेइयै तिन्हा बै बोलू, “तुसै बी मेरै अंगूरै रै बगीचै बै जाआतू । मूँ तुसाबै जो सही होला सो देणा ।” 5 तैबै ते बी बगीचै बै कोमा केरदै नौठै । बारा बाज्रै होर त्रा बाज्रै भी तेइयै तैण्ढाऐ केरू । 6 लगभग पोंज बजणू आलै ती सो भी घौरा ना नौठा होर तेइयै भी किछ लोका बजारा ना औरै-पौरै खड़ै हेरै होर तिन्हा ना पुछू, ‘तुसै ओखै पूरी ध्याड किबै बेकार खड़ै रौहा सी?’ 7 तिन्है तेइबै बोलू, ‘किबैकि आसै कौसियै ध्याडी पँधै नी लाऐ ।’ तेइयै तिन्हा बै बोलू, ‘तुसै बी मेरै अंगूरै रै बगीचै जाआतू ।’ 8 जैबै सोझ हुई ता बगीचै रै मालकै आपणै मुनशी बै बोलू, ‘मजदूरा बै शाधिया जे बादा ना लाऐ ती तिन्हा ना शुरु केरिया जे पैहलै लाऐ ती ते आऐ होर तिन्हा हर एकी बै एक-एक चाँदी रै सिक्के मिलै । 10 तैबै जुणा पैहलै लाऐ ती ते आऐ होर तिन्है सोचू कि आसा बै बोहू मिलणा पर तिन्हा हर एकी बै बी एक-एक चाँदी रा सिक्का मिलू । 11 तिन्है सिक्के ता लेऐ पर ते जमींदारा पँधै कुडकुडाइया बोलदै लागै, 12 ‘जे बादा ना लागै ती तिन्है सिर्फ एक घँटा कोम केरू तँ तिन्हा बै बी एक-एक चाँदी सिक्के धिनै जैबैकि आसै पूरी ध्याड धूपै ना मेहनत केरी ।’ 13 तैबै जमींदारै तिन्हा ना एकी बै जवाब धिना, ‘सँघी मैं तौ सँघै कोई हेर-फेर नी केरी । कि आसै ऐ गल नी ती केरी ती कि मूँ तौभै एक चाँदी रा सिक्का देणा?’ 14 जे तेरा बेणा सा तेइबै ने होर जा । हाँऊ बादा ना रैखै दै मजदूरा बै बी एतरी मजदूरी देणा चाहा सा जेतरी तौभै देणी लाई सा । 15 कि मुँभै आपणै धैना पँधै हक नी आँधी । हाँऊ शोभला सा कि तौभै एथा ना जलन होआ सा? 16 एसा रीतियै जे पिछलै सी तिन्हा पैहिलै होणा होर जे पैहिलै सी तिन्हा पिछलै होणा ।

### आपणी मौऊती रै बारे न यीशु री त्रीजी भविश्यवाणी

17 जैबै यीशु आपणै बारा चेलै सँघै यरुशलैमा बै जाँदा लागा ती ता तेइयै ते सुनसान जैगहा बै नेऐ होर बोलू, 18 “शुणा, आसै यरुशलैमा बै चोलै सी । तौखै माहू रा बेटा मुख्य पुजारी होर यहूदी धर्मविधि जाणनू आलै रै हौथा ना देइणा । तिन्हा तेइबै मौऊती री सजा देणी ।” 19 तैबै सो होरी जाति रै हौथा ना देइणा कि ते तेइरा मजाक उडालै होर तेइबै कोड़ै मारलै होर क्रूसा पँधै चढालै पर तेई त्रीजै ध्याडी भी जिन्दै होणा ।

### एक आमा री प्रार्थना

20 तैबै जब्दी रै बेटै री आमा आपणै बेटै सँघै यीशु आगै आई होर तेइबै प्रणाम केरिया तेइना किछ मुँगदी लागी । 21 यीशुऐ तेसा ना पुछू, “तू की चाहा सा?” तेसै बोलू, “मुँभै वचन दै कि मेरै ए दूई बेटै तेरै राज्य ना एक देहिणी धिरै होर एक बाँऊँई धिरै बेशलै ।” 22 यीशुऐ जवाब धिना, “तुसै नी जाणदै कि तुसै की लाऊ सा मुँगणा । कि तुसै तेई दुःखै रै प्यालै बै पीई सका सी जुणी बै हाँऊ पीणू आला सा?” तिन्है तेइबै बोलू, “हाँ आसै पीई सका सी ।” 23 यीशुऐ तिन्हा बै बोलू, “तुसा सो दुःखा रा प्याला ता पीणा पर देहिणै बाँऊँरे बेशणै रा हक देणू आला हाँऊ नी आँधी पर परमेश्वर बापू सा । तेइयै जौसरी तैइयै त्यार केरू सा ते बेशी सका सी ।” 24 ऐ शुणिया तिन्हा दस चेलै बै इन्हा दूई भाई पँधै झिक आई । 25 तैबै यीशुऐ तिन्हा बै आपू हागै शाधिया बोलू, “तुसै नी जाणदै कि जे राज्रै यहूदी नी आँधी ते लोका पँधै आपणी शक्ति रिहाणा चाहा सी होर तिन्हरै नेता लोका पँधै आपणा हक जमाणा चाहा सी ।” 26 पर तुसा बिचै न ऐण्ढा नी लोडी हुआ बल्कि तुसा मोंझै जे बड़ा बणना चाहला सो तुसरा सेवक बणला । 27 होर जो कोई प्रधान बणना चाहला सो

तुसरा दास बणला । 28 तुसै माहू रै बेटे साही बैणा जो कि सेवा करौंदा नी बल्कि सेवा केरने री तैइयै आऊ सा होर बोहू सारै प्राणै रै बदलै आपणै प्राण देला ।

### दुई काणै रा उदाहरण

29 जैबै तै यरीहो ग्राँ आघे जाँदें लागै ती ता लोकै री बोहू बड़ी भीड़ तेई पिछे चैली । 30 तौखेँ बौतै रै किनारै दुई काणै बेटे ती । जैबै तिन्है शुणू कि तिसै यीशु जाँदा लाग़ा सा ता ते चिल्लाँदै लागै, "हे प्रभू! दाऊदैं रै बेटे आसा पेंधे दया केर ।" 31 पर भीड़ै रै लोकै तिन्हा बै धमकाइया चुप रौहणै बै बोलू पर ते होर बी ज़ोरा सेंधे चिल्लाँदै लागै, "प्रभू! दाऊदैं रै बेटे आसा पेंधे दया केर ।" 32 तैबै यीशु रूकू होर तिन्हा बै बोलू, "तुसै की चाहा सी कि हाँऊ तुसरी तैइयै की केरनू?" 33 तिन्है यीशु बै बोलू, "प्रभू आसै हेरना चाहा सी ।" 34 यीशु बै तिन्हा पेंधे दया आई । यीशुए तिन्हरी औछी छुँगी होर ते तुरन्त हेरदें लागै होर ते यीशु पिछे चैलै ।

### यरुश्लेमा न विजय प्रवेश

11 जैबै यीशु होर तेइरै चेलै जैतून दौंगे री बैतफेगै जैगहा ना पुजै ती यीशुए आपणै दूई चेलै आपू ना आगै भेजै होर तिन्हा बै बोलू, 2 तुसै सामने रै एई ग्राँ बै जाआतू होर तौखेँ तुसाबै गधी बोनुईदी मिलणी होर तेसा सेंधे तेसा रा बच्चा बी होणा । तिन्हा बै खोलिया मूँ आगै आणा । 3 अगर तुसाबै कोई किछ बोलला ता तुसै बोलीतू प्रभु बै इन्हरी जरूरत सा । तैबै तेई ते तुरन्त भेजणै । 4 ताकि भविष्यवक्ता रा ऐ वचन पूरा होला, 5 सिंयोनै री नगरी बै बोला, हेर तेरा राजा तौ आगै एँदा लाग़ा सा । सो नम्र सा होर गधै पेंधे बेठा सा । 6 तैबै तेइरै चेलै नौठै होर तिन्है तैण्ढाए केरू जैण्ढा यीशुए तिन्हा बै बोलू ती । 7 तिन्है गधी होर तेसरा बच्चा आणू होर तिन्हा पेंधे आपणै झिकडै पाए होर यीशु तिन्हा पेंधे बेठा । 8 भीड़ै रै बोहू सारै लोकै आपणै झिकडै बोला ना बछाए होर किछ लोकै बूटै शाह्नी काटिया बोला ना बछाई । 9 जे लोका यीशु रै आगै-पीछे चैलदै लागै ती ते यीशु री जय-जयकार केरिया बोलदै लागै ती, "होशन्ना! दाऊदैं री सन्तान होशन्ना । धन्य सा सौ जूण प्रभु रै नाँ ना एजा सा ।" 10 जैबै सौ यरुश्लेमा ना पुजू ता पूरै शैहरा ना खलबली मची होर लोका बोलदै लागै, "ऐ कुण सा?" 11 लोकै बोलू, "ऐ गलील ज़िल्लै रै नासरत ग्राँ रा भविष्यवक्ता यीशु सा ।"

### मन्दिरा न व्यपारी बै खोलीणा

12 यीशुए परमेश्वरै रै मन्दिरा बै जाइया ते लोका मन्दिरा ना बाहरै खोलै जे तौखेँ समान बेचदे लागै ती । तेइयै सुनै-चाँदी बेचणू आऐ री ओर कबूतरा बेचणू आऐ री सारी दुकाना उलट-पुलट केरी । 13 यीशुए तिन्हा बै बोलू, "शास्त्र बोला सी, 'मेरा घोर प्रार्थना रा घोर होणा पर तुसै लोकै ऐ डाकू री खोह बणाई सा ।'" 14 मन्दिरा ना किछ काणै होर लँगड़े-लूलै यीशु आगै आऐ होर तेइयै ते ठीक केरै । 15 जैबै मुख्य पुजारी होर यहूदी धर्मगुरुए ते नोखेँ कोम हेरै जो यिशुए केरै ती होर यीशु री जय-जयकार शुणी कि, होशन्ना! दाऊदैं री सन्तान धन्य सा ता ते झिकुए । 16 तिन्है यीशु ना पुछू, "तू शुणा सा ते की बोलदै लागै सी?" यीशुए तिन्हा बै बोलू, "हाँ, हाँऊ शुणा सा । कि तुसै धर्मशास्त्रा ना नी पौढू, तै बालक होर दूध पीणू आऐ बचैह ना अपार स्तूति कराई?" 17 तैबै सौ तिन्हा बै छोड़िया बैतनिय्याह बै नौठा होर तौखेँ रात काटी ।

### बिना फौला रै अंजीरा रा बूटा

18 आगलै रोज़ दोतिऐ जैबै यीशु वापस एँदा लाग़ा ती ता तेइबै भूख लागी । 19 बौतै रै किनारै तेइयै एक अंजीरा रा बूटा हेरू होर तेई कोछेँ नौठा पर तौखेँ तेइबै पौचै रै अलावा होर किछ नी मिलू । तैबै यीशुए तेई बूटै बै बोलू, "ऐबै ना बाद त ना कदी फ़ौल नी लगणै होर सौ अंजीरा रा बूटा तुरन्त शुकू ।" 20 जैबै चेलै ऐ हेरू ता तिन्है बड़ी हैरानी सेंधे पुछू, "ऐ अंजीरा रा बूटा एतरी छेकै केण्डे शुकू?" 21 यीशुए तिन्हा बै जवाब धिना, "हाँऊ तुसाबै सच बोला सा अगर तुसा ना भरोसा सा होर तुसै शक नी केरदै ता तुसै बी जो मैं एई बूटै

सेँधे केरू एँदा केरी सका सी बल्कि अगर तुसै एई दौगा बै बोललै, "ओखेँ ना उठ होर समुद्रा न जा ता सो होणा ।" 22 अगर तुसाबै भरोसा सा ता प्रार्थना ना तुसै जे बी मुँगलै सौ तुसाबै मिलणा ।

### यीशु रै अधिकारा पेन्धे प्रश्न

23 जैबै यीशु मन्दिरा ना जाइया उपदेश देँदा लाग़ा ती ता मुख्य पुजारी होर यहूदी बुजुर्गै एजिया यीशु ना पुछू, "एण्डी गला तू कुणी हका सेंधे केरा सा होर ऐ हक तौभै कुणियै धिना?" 24 यीशुए तिन्हा बै जवाब धिना, "हाँऊ तुसा ना एक प्रश्न पुछा सा, अगर तुसै मुँभै जवाब देलै ता मुँबी तुसाबै दसणा कि हाँऊ इन्हा गला कुणी हका सेंधे केरा सा ।" 25 दसा यहून्ना बै बपतिस्मा कौ ना मिलू? परमेश्वरा ना कि माहू ना? ते आपू ना वचार केरदै लागै, "अगर आसै परमेश्वरा धिरै ना बोललै ता एई आसा ना पुछणा, तैबै तुसै तेई पेंधे वशाह किबै नी केरदै?" 26 अगर आसै माहू ना बोललै ता आसा बै लोकै री डौर सा किबैकि ते यहून्ना बै भविष्यवक्ता मैना सी । 27 तिन्है यीशु बै बोलू, "आसै नी जाणदैं । तैबै यीशुए तिन्हा बै बोलू, "हाँऊ बी तुसाबै नी देसदा कि हाँऊ इन्हा गला कुणी हका सेंधे केरा सा ।"

### दूई बेटे रा उदाहरण

28 दसा तुसै लोका एथेँ रै बारै ना की सोचा सी? एकी माहू रै दूई बेटे ती । तेइयै बड़े बेटे बै बोलू, "बेटैआ औज तू मेरै अँगुरै रै बगीचै बै ज़ा होर कोम केर ।" 29 पर बेटे जवाब धिना, "मेरा मूढ नी आँथी । पर बाद ना तेइरा मूढ बदलू होर सौ नौठा ।" 30 तैबै सो बापू दूजे बेटे आगै नौठा होर तेइबै बी बगीचै ना कोम केरने बै बोलू । तेई बेटे जवाब धिना, "ओ जी हाँऊ ज़ा सा पर सौ नी नौठा ।" 31 दसा इन्हा दूई ना बापू रा कोम कुणियै केरू? तिन्है बोलू, "बड़े बेटे ।" यीशुए तिन्हा बै बोलू, "हाँऊ तुसाबै सच बोला सा चुँगी लेणू आलै होर वैश्या परमेश्वरै रै राज्य बै तुसा ना पैहिलै जाणा ।" 32 किबैकि बपतिस्मै देणू आला यहून्ना तुसाबै ज़िन्दगी री सही बौत रिहाणै री तैइयै आऊ होर तुसै तेइरा वशाह नी केरू । पर चुँगी लेणू आलै होर वैश्या तिन्है तेइरा वशाह केरू । जैबै तुसै ऐ हेरू ता तुसै बाद ना बी पाप केरने नी छोड़ै होर न तेइरा वशाह केरू ।

### दुई किसाना रा उदाहरण

33 एक होर कैथ शुणा, "एक ज़मींदार ती । तेइयै एक अँगूरा रा बगीचा लाऊ होर तूँई रै चोहू पासै बाड लाऊ । तैबै अँगूरा रा रस खोलणै री तैइयै एक गद्दा कोतू होर तैथा रा ठेका देइया दूर देशा बै नौठा ।" 34 बै अँगूर कौढणै रा बौगत आऊ ता बगीचै रै मालकै तिन्हा ठेकैदारा आगै आपणै नोकर भेजै कि ते फ़सला रा हिस्सा आणलै । 35 पर ठेकैदारै ते नोकर दौकै होर ते मारै किछ पाथरै लाइया मारै । 36 तैबै तेइयै पैहिलै ना जाद होर नोकर भेजै । पर ठेकैदारै तै बी मारै । 37 बाद ना तेइयै तिन्हा हागै आपणा बेटा भेजू कि एइरा ता तिन्हा आदर केरना । 38 पर ठेकैदारै जैबै मालका रा बेटा हेरू ता ते आपू ना वचार केरिया बोलदै लागै, "ऐ ता तेइरा वारिस सा एजा आसा ऐ मारना होर एइरा हक लेणा ।" 39 तिन्है सो दौकिया बगीचै ना बाहरै केरू होर मारू । 40 तुसै की सोचा सी जैबै अँगुरै रै बगीचै रा मालक एला ता तेई तिन्हा ठेकैदारा सेंधे की केरना? 41 तिन्है तेइबै बोलू, "तेई ते बड़ी बेरहमी सेंधे मारनै होर सो बगीचा होरी ठेकैदारा बै देणा जे फ़सला रा हिस्सा तेइबै देलै ।" 42 यीशुए तिन्हा बै बोलू, "कि तुसै शस्त्रा रा स वचन नी पौढू: 'जुण पाथर घोर बणाणू आलै बेकार समझू सौहै पाथर कुणै रा पाथर बैणू । एण्ढा प्रभुए केरू जे आसरी नज़री ना अदभुत सा ।" 43 हाँऊ तुसाबै बोला सा परमेश्वरा रा राज्य तुसा ना छीनिणा होर तिन्हा लोका बै देणा जो तेइरै राज्य रै मुताबक बताव केरा सी । 44 जुण एई पाथरा पेंधे पौडला तेइरै टुकडै-टुकडै होणै होर जुणी पेंधे ऐ पाथर पौडला तेई एई पाथरा हेठै पौथिणा । 45 जैबै मुख्य पुजारी होर फरीसी लोकै ऐ कैथा शुणी ता तिन्है जाणू कि आसरेँ बारै ना बोलदा लाग़ा सा । 46 तैबै तिन्है तेइबै दौकणै री कोशिश केरी पर ते लोका ना डौरा ती किबैकि ते यीशु बै गुरु मैना ती ।

### ब्याह री धामा रा उदाहरण

22 एक बार भी यीशु लोका सँधै कैथे रै रूपा ना गला केरदे लागै होर बोलू, <sup>2</sup> "स्वर्गा रा राज्य तेई राजे साही सा जुणिये आपणै बेटे रै ब्याह री दावत धिनी । <sup>3</sup> राजे आपणै नोकर तिन्हा लोका शाधदै भेजे जुणीबै ब्याह रा छँदा लाऊ ती पर ते नी आरे । <sup>4</sup> तेइये आपणै नोकर भी भेजे । तेइये बोलू, जे लोका ब्याह री धामे री तेइये शाधै सी तिन्हा बै बोला कि धाम त्यार सा । तुसै ब्याह री धामे री तेइये एजा । <sup>5</sup> पर लोके कोई ध्यान नी धिना होर ते आपणै-आपणै कोमा नौठे । <sup>6</sup> किछ लोके ता राजे रै नोकर ढोके होर तिन्हा सँधै मार-पीट केरी । <sup>7</sup> तैबै राजे आपणै सिपाही भेजे होर तिन्हे ते नोकरा बै मारनू आलै छौडे होर तिन्हे नगरा ना ओग लाई । <sup>8</sup> तैबै राजे आपणै नोकरा बै बोलू, "ब्याह री धाम त्यार सा पर जे शाधै ती ते लोका एसा धामा लायक सिद्ध नी हुरे ।" <sup>9</sup> एबै तुसै सडका बै होर गली बै जाआत् जो बी तुसाबै मिललै तिन्हा ब्याह री धामा बै आणा । <sup>10</sup> तैबै ते नोकर सडक होर गली बै नौठे । तिन्हा बै भलै-बुरै जे बी लोका मिलै तिन्हे ते शाधिया आणे होर ब्याह रा घोर पूरा पाऊणै सँधै भौरुआ । <sup>11</sup> पर जैबै राजा मेहमाना बै हेरदा आऊ ता तौखे तेइये एक ऐण्डा माहू हेरु जुणिये ब्याह रै झिकडे नी ती लाएदै । <sup>12</sup> राजे तेईबै बोलू, "हे सँधी, ब्याह रै झिकडे लाए बगैर तू आखे आन्ध्रै कैण्डे आऊ? पर तेइये किछ नी बोलू ।" <sup>13</sup> तैबै राजे आपणै नोकरा बै बोलू, "एइरै हौथ जोधा बोनिया बाहरै निहारै ना शेता । जोखे लोका बै बोहू दुःख सौहणा पौड़ा सा ।" <sup>14</sup> "किबैकि शाधुरे ता बोहू सी पर चुनुरे दै थोडे सी ।"

### कैसरा बै कर्ज देणा

<sup>15</sup> तैबै फरीसिरे जाइया एक सभा रैखी कि ते यीशु बै तेइरी आपणी गला ना कैण्डे फसाई सका सी एथा रा विचार केरी सकलै । <sup>16</sup> तिन्हे आपणै किछ चेलै यीशु आगे भेजे । तिन्हे लोके यीशु बै बोलू, "गुरु आसै जाणा सी कि तू सच्चा सा तू परमेश्वरै रै बारै ना शिक्षा देआ सा । कुण की सोचा सा तू एथे री चिंता नी केरदा । <sup>17</sup> तू आसा बै दैस तेरा विचार की सा? राजे बै चुंगी देणा सही सा कि नी? <sup>18</sup> यीशुए तिन्हेरै मनै री गल जाणी होर तेइये बोलू, "ओ कपटियो! तुसै मुँभै किबै परखणा चाहा सी?" <sup>19</sup> मुँभै एक सिक्का दैआत् । तिन्हे एक सिक्का धिना । <sup>20</sup> तैबै यीशुए तिन्हा बै बोलू, "एथा ना कौस री मोहर होर फोटू सा?" <sup>21</sup> तिन्हे तेइबै बोलू, "महाराजे बै दैआत् होर जे परमेश्वरा रा सा तेई परमेश्वरा बै दैआत् ।" <sup>22</sup> ए शुणिया तिन्हा बै बड़ी हैरानी हुई होर ते यीशु बै छौड़िया तौखना नौठे ।

### मुण्डे न जिन्दा होणा होर ब्याह

<sup>23</sup> तेही ध्याडे ना किछ सदुकी लोका तौखे आरे जो भीरी जिन्दै होणै बै नी मैनदै यीशु आगे आरे होर तेई ना पुछू, <sup>24</sup> "गुरु मूसै री विधि रै मुताबक अगर कोईरी औलाद मौरा सा ता तेइरा भाई तेसा विधवा सँधै ब्याह केरिया आपणै भाई रा वंश बढ़ाणे री तेइये औलाद पैदा केरला ।" <sup>25</sup> मना कि आसै सौत भाई सी । पैहिलै भाई रा ब्याह हुआ होर स बे-औलाद मुँआ । तैबै तेइरै भाइये तेसा सँधै ब्याह केरु । <sup>26</sup> ऐण्डे तैरहै तै सौतै रै सौत भाई बे-औलाद मुँए । <sup>27</sup> बाद ना सौ बेटडी बी मुँई । <sup>28</sup> एबै आसै ए पुछा सी कि आगली जिन्दगी ना सौ तिन्हा सौत भाई मौँझे कौस री लाडी होणी? किबैकि तिन्हे सैभी भाइये तेसा सँधै ब्याह केरु ती । <sup>29</sup> यीशुए तिन्हा बै जवाब धिना, "तुसै भूल केरा सी किबैकि तुसै शास्त्र होर परमेश्वरै री शक्ति बै नी जाणदै ।" <sup>30</sup> तुसै एसा गलाबै समझा कि तेसा आगली जिन्दगी ना तिन्हा लोका ब्याह-शादी नी केरनी होर ना तौखे ब्याह ना देइणा । बल्कि तिन्हा स्वर्गदूता साही होणा । <sup>31</sup> मुँए दै जिन्दै होणै रै बारै न परमेश्वरै की बोलू सा कि तुसै नी पौडू कि, <sup>32</sup> 'हाऊ अब्राहमा रा परमेश्वर सा, इसहाका रा परमेश्वर सा होर याकूबा रा परमेश्वर सा ।' सौमुँए दै रा नी बल्कि जिन्दै रा परमेश्वर सा ।" <sup>33</sup> जैबै लोके ए शूणू ता ते तेइरै उपदेश शुणिया बडे हैरान हुरे ।

### सैभी न बडी आज्ञा

<sup>34</sup> जैबै फरीसिये शूणू कि यीशुए सदुकी लोका चुप कराए ता सब कडा हुरे । <sup>35</sup> तिन्हा ना एकी यहूदी धर्मविधि जाणनू आलै यीशु बै फसाणे री सोचा सँधै तेइना पुछू, <sup>36</sup> "गुरु, व्यवस्था ना सैभी ना बडा हुकम कुण सा?" <sup>37</sup> यीशुए तेइबै बोलू, "तू आपणै प्रभु परमेश्वरा सँधै आपणै पूरै मनै, पूरी आत्मा होर सारी बुद्धि सँधै झुरी केर ।" <sup>38</sup> ए सैभी ना पैहला होर सैभी ना बडा हुकम सा । <sup>39</sup> ऐण्डाए दुजा हुक ए सा, "जैण्डा तू आपू बै झुरा सा तैण्डा तू आपणै पडेसी सँधै बी झुरी केर ।" <sup>40</sup> सारी व्यवस्था होर भविश्यवक्तै रै ग्रँथ इन्हा दूई हुकमा पँधे टिकै सी ।

### मसीह कुणी रा शोहरु सा?

<sup>41</sup> जैबै फरीसी कड्डे ती ता यीशुए तिन्हा ना पुछू, <sup>42</sup> "मसीह रै बारै ना तुसै की सोचा सी कि सौ कौस रा बेटा सा?" तिन्हे तेइबै बोलू, "दाऊदा रा ।" <sup>43</sup> यीशुए तिन्हा बै बोलू, "दाऊद तैबै आत्मा ना भौरुइया तेइबै प्रभु किबै बोला सा?" <sup>44</sup> प्रभुए मेरै प्रभु बै बोलू, मेरी दैहिणी धिरे बेश जैबै तक कि हाँऊ तेरै दुश्मना बै तेरै अधीन नी केरनू ।" <sup>45</sup> जैबै दाऊद तेइबै प्रभु बोलू ता सौ तेइरा बेटा कैण्डे होई सका सा? <sup>46</sup> कोई बी जवाब नी देई सकै होर न तैदी ना बाद कोई बी यीशु ना किच पुछणै री हिम्मत केरी सकै ।

### शास्त्री होर फरीसी न साबधान

23 यीशुए आपणै चेलै होर भीडे रै लोका बै बोलू, <sup>2</sup> "यहूदी धर्मविधि जाणनू आलै होर फरीसी मूसै री गद्दी पँधे बेठे दै सी ।" <sup>3</sup> ते जेकिछ बी बोललै तेथा पँधे चलेइत् होर तेथा बै मनेइत् । पर जे ते केरा सी तेथा बै हेरीत् केरदै किबैकि ते बोला सी पर केरदै नी । <sup>4</sup> ते लोके री कोन्हा पँधे एतरा बोझ पा सी कि ते तुंई बै चैकिया चैली नी सकदै पर आपू ते तेथा बै गुठिये लाइया बी सकाणा नी चाँहदै । <sup>5</sup> ते शोभलै कोम एथे री तक केरा सी कि लोका तिन्हा बै हेरलै । ते आपणै ताबीजा बै चौउड़ा होर कुरतै री झालरा बै बडा तुंई री तक केरा सी कि लोका तिन्हा बै धर्मात्मा समझलै । <sup>6</sup> ते सभा ना जाइया उथडी-उथडी जैगहा ना जाइया बेशा सी । <sup>7</sup> बजारा ना ते लोका ना आपणा आदर चाहा सी कि ते तिन्हा बै नमस्कार केरलै होर तिन्हा बै गुरु बोललै । <sup>8</sup> पर तुसै लोका ना आपू बै गुरु हेरीत् बोलणे दयादै किबैकि तुसरा सच्चा गुरु ता बस एकै सा होर तुसै सारै भाई-बैहण सी । <sup>9</sup> धौरती पँधे लोका बै तुसै आपू बै बापू हेरीत् बोलणे दैदै किबैकि तुसरा बस एकै बापू सा जो स्वर्गा ना सा । <sup>10</sup> होर लोका ना आपू बै स्वामी हेरीत् बोलणे दयादै किबैकि तुसरा बस एकै स्वामी सा होर सौ मसीह सा । <sup>11</sup> तुसा सैभी ना महानू माहू सौ सा जुण तुसरा सेवक बणला । <sup>12</sup> जुण आपणै-आपू बै बडा बणाला तेई होछे केरिना होर जुण आपणै-आपू बै होछा बणाला तेई बडे केरिना ।

### शास्त्री होर फरीसी रै पाखण्ड

<sup>13</sup> "हे कपटी शास्त्री होर फरीसी लोको! लानत् सा तुसा पँधे, तुसै माहू री तेइये स्वर्गा रा दुआर बन्द केरा सी । तुसै न ता आपू तेई दुआरे आन्धे जान्दै न तिन्हा माहू बै जाणै दैदै ।" <sup>14</sup> "ओ कपटी शास्त्री होर फरीसी लोको, लानत् सा तुसा पँधे किबैकि तुसै विधवे री सम्पति बै हडप केरा सी । तुसै लोका ना रिहाणे री तेइये बडी-बडी प्रार्थना केरा सी । एथे री तेइये तुसाबै बोहू सजा मिलणी ।" <sup>15</sup> "हे कपटी शास्त्री होर फरीसी लोको लानत् सा तुसा पँधे । तुसै कौसी बै आपू धिराबै फेरने री तेइये सारै पाणी होर धौरती ना घूमा सी । जैबै सौ तुसा धिराबै फिरा सा ता तुसै तेइबै दुगणै नरकै रै भागीदार बणा सी ।" <sup>16</sup> "हे काणे धर्मगुरुओ! लानत् सा तुसा पँधे जो बोला सी कि अगर कोई मन्दिरे री कसम खाला ता किछे नी पर अगर कोई मन्दिरे रै सुने री कसम खाला ता तेई कसम पूरी केरनी पौई ।" <sup>17</sup> "हे मुख्र होर काणे लोको! बडा कुण सा? सुना या मन्दिरे जुणिये कि सुना शुद्ध होआ सा ।" <sup>18</sup> तुसै ए बी बोला सी, "अगर कोई वेदी री कसम खाला ता किछे नी पर जुण वेदी पँधे चढाउदी दी चीजे री कसम खा सा तेई स कसम पूरी केरनी पौई ।" <sup>19</sup> "ओ काणे लोको, बडा कुण सा? वेदी पँधे चढाइदी चिजा कि स वेदी जुणिये कि ते

चढ़ाईदी चीजा शुद्ध होआ सी ।<sup>20</sup> अगर कोई वेदी री कसम खा सा ता स वेदी सँधे तिन्हा चिजै री बी कसम खा सा ।<sup>21</sup> जुण मन्दिरै री कसम खा सा सौ मन्दिरा सँधे मन्दिरा आन्ध्रली चिजै री बी कसम खा सा ।<sup>22</sup> जुण स्वर्गै री कसम खा सा सौ परमेश्वरै रै सिंहासना सँधे तेथा पँधे बेठै दै री बी कसम खा सा ।<sup>23</sup> हे कपटी धर्मगुरुओ होर फरीसी लोको लानत् सा तुसा पँधे; तुसै पदिनै, सौंफ होर ज़रै रा दशवाँस ता देआ सी पर विधि री ते ज़रूरी गल्ला तुसै छौड़ी धिनी सी । ज़रूरी ऐ सा कि तुसै तिन्हा गल्ला बै बी पूरी केरदै ।<sup>24</sup> ओ काणै धर्मगुरुओ, तुसै मच्छरा बै ता छाना सी पर ऊँटा बै निंगा सी ।<sup>25</sup> हे कपटी धर्मगुरु होर फरीसी लोको, लानत् सा तुसा पँधे; तुसै कटोरै होर थाई बै बाहरै ना ता माँजा सी पर भीतरै ना ते मैली होआ सी ।<sup>26</sup> ओ काणै फरीसी लोको, पहिलै कटोरै होर थाई बै भीतरै ना माँजा कि ते बाहरै ना बी साफ होली ।<sup>27</sup> हे कपटी धर्मशास्त्री होर फरीसी लोको, लानत् सा तुसा पँधे, तुसै चूने लेसुईदी कब्रा साही सी जो बाहरै ना ता साफ हेरिया सी पर भीतरै मुदँ रै हाडके होर गन्दगिये लाइया भोरुइदी सी ।<sup>28</sup> एसा रीतिये तुसै बी माहू बै बाहरै ना ता धर्मी हेरिया सी पर भीतरै कपट होर बुरै-बुरै विचारै लाइया भोरुएदै सी ।

### शास्त्री होर फरीसी पेन्धे दण्डै री भविश्यवाणी

<sup>29</sup> हे कपटी धर्मशास्त्री होर फरीसी लोको लानत् सा तुसा पँधे, तुसै भविष्यवक्तै री कब्रा बै सजा सी होर धर्मी लोके री तँइये कब्रा बै बणा सी ।<sup>30</sup> होर बोला सी, अगर आसै दादू-बा रै बौगतै ना होंदै ता भविष्यवक्तै री हत्या ना तिन्हा सँधे सौँझा नी ती होणा ।<sup>31</sup> एसा रीतिये ता तुसै आपणी तँइये गवाही आपे देआ सी कि तुसै भविष्यवक्तै रै खूनी री सन्तान सी ।<sup>32</sup> तुसै आपणै दादू-बा रै पापा रा घडोलू भौरा ।<sup>33</sup> हे कीडै साही चापलूस लोको, तुसा नरके री सजा ना कीहाँ बचणा? <sup>34</sup> एबै तुसै शुणा, हाँऊ तुसा हागँ भविष्यवक्ता, बुद्धिमान होर धर्मविधि जाणनु आलै बै भेजा सा; होर तुसा तिन्हा ना केतरै ता मारनै होर क्रूसा पँधे चढ़ाणै होर आपणी सभा ना कोडै लाइया मारनै होर एकी ग्राँ ना दूजै ग्राँ बै भागणै ।<sup>35</sup> धर्मी हाबिल ना लेइया बिरक्याह रै बेटै जकर्याह तक जो कि तुसै मन्दिर होर वेदी रै बिचा ना मारै ती होर जेतारै धर्मी लोका रा खून एसा धौरती पँधे हुआ सा सौ तुसरी मुँडी पँधे पौड़ना ।<sup>36</sup> हाँऊ तुसाबै सच बोला सा, ए सारी गल्ला ई बौगतै रै लोका पँधे पौड़नी ।

### यरुशलेम री तँइये दुःख

<sup>37</sup> हे यरुशलेम! तू जे भविष्यवक्ता बै मारा सा होर तिन्हा बै पाथरै लाइया मारा सा जे त आगँ भेजिया सी । केतरी बार में चाहू कि जैण्डै मुर्गी आपणै बचचै बै आपणै पँखा हेठै कठा केरा सा हाँबी तेरै शोहरू बै कठा केरनु पर तँ नी चाहू ।<sup>38</sup> हेरा, तुसरा घौर तुसरी तँइये खाली छौड़िया सा ।<sup>39</sup> किबैकि हाँऊ तुसाबै बोला सा कि एबै ना लेइया जैबै तक तुसै नी बोललै कि, “धन्य सा सौ जो प्रभु रै नाँ ना एजा सा तैबै तक तुसा हाँऊ कदी बी नी हेरना ।

### मंदिरा रै नाशा री भविश्यवाणी

**24** जैबै यीशु मन्दिर छौड़िया ज़ान्दै लागै ती ता तेइरै चेलै मन्दिरै री बनावट रिहाणै री तँइये तेई हागँ आरे ।<sup>2</sup> यीशुए तिन्हा बै बोलू, “कि तुसै ए सब नी हेरदै? हाँऊ तुसाबै सच बोला सा, ओखै एकी पाथरा पँधे दूजा पाथर नी रोहणा जे ढाईणा नी ।

### दुःख होर क्लेश

<sup>3</sup> जैबै सौ जैतून ढौगा पँधे बेठा ती ता चेलै तेई हागँ एजिया बोलू, आसा बै दैस कि ए गल्ला केबै होणी होर तेरै एणै री की निशाणी होणी? होर दुनिये रै अन्त होणै री की निशाणी होणी? <sup>4</sup> यीशुए तिन्हा बै जवाब धिना, होशियार रौहा कि कोई तुसाबै भरमाला नी ।<sup>5</sup> किबैकि बोहू ऐण्डै हाँणे जुणी मेरै नाँ ना एजिया बोलणा कि हाँऊ मसीह सा होर तिन्हा बोहू सारै लोका भरमाणै ।<sup>6</sup> तुसा लडाई-झगडै री गल्ला शुणनी पर तुसै घबरोंदै हेरीत् किबैकि इन्हरा होणा ज़रूरी सा पर तेई बौगतै अन्त नी होणा ।<sup>7</sup> किबैकि जाति-जाति आपू

ना लडीना, एकी राज्य होरी राज्य सँधे लडीना, ज़ैगहा-ज़ैगहा अकाल पौड़ना होर जौजरी होणी ।<sup>8</sup> इन्हा सारी गल्ला सँधे दुःखै री शुरुआत होणी ।<sup>9</sup> तैबै तिन्हा दुःख देणै री तँइये तुसै ढौकणै घाणै होर तिन्हा तुसै मारनै होर सब जाति रै लोका मेरै नाँ री वजहा ना तुसा सँधे बैर रखणा ।<sup>10</sup> तैबै बोहू सारै लोका ठोकरा खाणी होर एकी-दूजै सँधे बैर रखणा ।<sup>11</sup> बोहू सारै झूठे भविष्यवक्ता खडै होणै होर तिन्हा बोहू सारै लोका भरमाणै ।<sup>12</sup> होर अधर्म बढ़नै रै री वजहा ना बोहू सारै लोके री झुरी ठण्डी होणी ।<sup>13</sup> पर जो अन्त होणै तक धीरज रखला तेही रा उद्धार होणा ।<sup>14</sup> होर परमेश्वरै रै राज्य रा शुभ संदेश सारी दुनिया ना प्रचार केरिना कि सब जाति पँधे गवाही होली तैबै अन्त होणा ।

### महासंकटा री शुरुआत

<sup>15</sup> दानिय्येल भविष्यवक्तै जुणी उजाड़नु आई चीजै रै बारै ना चर्चा केरी ती जैबै तुसै तेसा चीजा बै चोखी ज़ैगहा ना खडी हुईदी हेरलै, <sup>16</sup> तैबै तुसै जे यहूदिया जिल्लै ना सी तिन्हा ढौगा बै भगेईत् ।<sup>17</sup> जो घोरै रै छापरा पँधे सी ते आपणा समान नेह्लै री तँइये नी औसलै ।<sup>18</sup> जो छेता ना सी ते आपणै झिकडै नेह्लै री तँइये पिछै नी हटलै ।<sup>19</sup> तिन्हा ध्याडै ना जै सुजदी सी होर दुध प्याणू आई सी तिन्हा पँधे बोहू दुःख एणू आ सा किबैकि ते ढौगा बै नी भेगी सकदी ।<sup>20</sup> प्रार्थना केरा कि तुसाबै ठण्डे रै मौसमा ना या रामे रै ध्याडै ना भगणा नी पौड़ला ।<sup>21</sup> किबैकि तेई बौगतै ऐण्डा भारी दुःख होणा जैण्डा कि संसारै री शुरुआता ना लेइया औजा तक नी हुआ होर नी होणा ।<sup>22</sup> होर अगर ते ध्याडै कम नी ती केरिदै ता कोई बी प्राणी नी ती बचणा पर जो लोका परमेश्वरै चुनै सी तिन्हरी वजहा ना ते ध्याडै केरिनै ।<sup>23</sup> तेई बौगतै अगर कोई तुसाबै बोलला कि हेरा मसीह ओखै सा कि तौखै सा तुसै वशाह हेरीत् केरदै ।<sup>24</sup> किबैकि झूठे मसीह होर झूठे भविष्यवक्ता उठिया खडै होणा होर तिन्हा बडै-बडै चिन्ह चमत्कार होर अदभुत कोम रिहाणै कि ते परमेश्वरै चुनै दै लोका बै भरमालै ।<sup>25</sup> शुणा, मैं पहिलै ए सबकिछ तुसाबै बोलू सा ।<sup>26</sup> अगर ते तुसाबै बोललै, हेरा सौ बोणा ना सा ता तुसै बाहरै हेरीत् निकलदै । अगर ते बोललै कि सौ कोठी ना सा ता तुसै वशाह हेरीत् केरदै ।<sup>27</sup> किबैकि जैण्डे बजड़ाह पूर्वा ना पश्चिमा तक चमका सा तैण्डाए माहू रै बेटै रा यानिकी मेरै एणै री बी ऐण्डी निशाणी होणी ।<sup>28</sup> जौखै लाश होली तौखै इलणी-काऊडै बी कठा होणै ।

### महाणु रै बेटे रा दबारा एणा

<sup>29</sup> तिन्हा ध्याडै रै दुःखा ना बाद सूरज निहारा होणा होर जोथा रा प्याशा नी रोहणा, तारै आसमाना ना शौढ़नै होर आसमानै री सारी शक्ति हिलाइणी ।<sup>30</sup> तैबै माहू रै बेटै रा यानिकी मेरा चिन्ह आसमाना ना हेरिना । तैबै धौरती रै सैभी कुलै रै लोका छाती पिटणी होर माहू रै बेटै बै बडी शक्ति सँधे आसमाना ना बाद पँधे एन्दै हेरना ।<sup>31</sup> तेई तुरही री बडी छेडा सँधे आपणै दूत भेजणै होर तिन्हा आसमानै रै एकी किनारै ना लेइया होरी किनारै तक चारों दिशा ना परमेश्वरै चुनैदै लोका कठा केरनै ।

### अंजीरा रै बूटे रा उदाहरण

<sup>32</sup> अंजीरै रै बूटै ना ए उदाहरण सीखा; जैबै तेई री शाणी नरम होआ सी होर पौचा निकलदै लागा सी ता तुसै जाणा सी कि गर्मी रै ध्याडै नेड सी ।<sup>33</sup> एसा रीतिये जैबै तुसै इन्हा सैभी गल्ला बै हेरलै, ता जाणी लेआ कि परमेश्वरा रा राज्य नेड सा ।<sup>34</sup> हाँऊ तुसाबै सच बोला सा, जैबै तक ए सारी गल्ला पूरी नी होली तैबै तक एसा पीढी रा अन्त नी होणा ।<sup>35</sup> आसमान होर धौरती खत्म होई सका सी पर मेरी ए गल्ला कदी बी खत्म नी होणी ।

### जागदै रौहा

<sup>36</sup> तेई ध्याडै होर तेसा घडी रै बारै ना कोई नी जाणवा न स्वर्गदूत न बेटा पर परमेश्वर बापू जाणा सा ।<sup>37</sup> जैण्डा नूहै रै ध्याडै ना हुआ, तैण्डाए माहू रै बेटै रा एणा बी होणा ।<sup>38</sup> किबैकि जैण्डा जल-प्रलय रै पहलके ध्याडै ना जुणी रोजा तक नूह जहाजा नी चढू तेई ध्याडै तक लोका खँदै-पीदै ती होर तिन्हा

ना ब्याह-शादी होआ ती । 39 होर जैबै तक कि ते प्रलय रै पाणिये नी नेरे तैबै तक तिन्हा बै किछ बी पता नी चल्लू; तैण्ढाएे माह्लू रै बेटे रा एणा बी होणा । 40 तेई बौगतै दूई लोका छेता ना होणै तिन्हा ना एक नेइणा होर दूजा छौडी देइणा । 41 दूई बेटडी चक्की पिशदी होणी तिन्हा ना एक नेईणी होर दूजी छौडी देईणी । 42 ऐबे जागदै रौहा, किबैकि तुसै नी जाणदै कि तुसरै प्रभु कौस ध्याडै ना एणा । 43 पर एसा गल्ला जाणी लेआ कि अगर घोरका मालक जाणदा कि चोरा कुणी बौगतै एणा ता स जागदा रौहदा होर आपणै घौरा ना चोरी नी ती होणै देदा । 44 तुसै बी त्यार रौहा किबैकि जौस घडी रै बारै ना तुसै सोचदै बी नेई तेसा घड़ीएे माह्लू रै बेटे बी एणा ।

### विश्वासयोग्य दास होर दुष्ट दास

45 विश्वासयोग्य होर बुद्धिमान नोकर कुण सा जुण तेई मालकै आपणै नोकरा पैंधे प्रधान बणाऊ कि तिन्हा बै ठीक बौगता ना रोटी देला? 46 धन्य सा सौ नोकर जुणबै तेइरा मालक ऐण्ढा केरदा हेरा सा । 47 हाँऊ तुसाबै सच बोला सा; तेई मालका स नोकर आपणी सारी सम्पति पैंधे प्रधान बणाणा । 48 पर अगर सौ दुष्ट नोकर सोचला कि मेरै मालकै रै एणै ना देर सा, 49 होर आपणै सैंघी नोकरा बै मारदा लगला होर पियकड़ लोका सैंघे खाला-पीला, 50 ता तेई नोकरा रा मालक ऐण्ढे ध्याडै ना एला जुणी रै बारै ना स नोकर जाणदा बी नी । 51 होर ऐण्ढे बौगतै कि स नी जाणदा होर तेई मालका स नोकर झिड़का देइया तेइरा हिस्सा कपटी लोका सैंघे ठहराणा । तौखे तेइबे बोहू दुःख-कष्ट होणा ।

### दस कुंवारी शोहरी रा उदाहरण

25 तैबै स्वर्ग रा राज्य तिन्हा दस कुंवारी साही होणा जे आपणी मशाल लेइया दुल्है सैंघे मिलदी निकली । 2 तिन्हा ना पोंज मूर्ख ती होर पोंज समझदार ती । 3 मूर्ख तिन्है आपणी मशाला ता आणी पर आपू सैंघे तेल नी आणू । 4 पर जो समझदार ती तिन्है मशाला सैंघे आपणी कुप्पी ना तेल बी भौरू । 5 जैबै दुल्है रै एणै ना देर हुई ता ते सब सुती । 6 औधी रातिये धूम मची कि, हेरा दूल्हा एन्दा लागा सा तेई सैंघे मिलणे री तैइयै चोला । 7 तैबै ते दस कुंवारी आपणी-आपणी मशाला बै ठीक केरदी लागी । 8 मूर्ख तिन्है समझदार तिन्हा कुंवारी बै बोलू, आपणे तेल ना किछ तेल आसा बै बी देआत किबैकि आसरी मशाला हिशदी लागी सी । 9 पर समझदार तिन्है कुंवारीयें जवाब धिना, ऐ तेल आसरी होर तुसरी तैइयै पूरा नी होणा । भला ता ऐ सा कि तुसै तेल बेचणू हागै ना लेइया आणा । 10 जैबै ते तेल लेंदी जान्दी लागी ती ता दूल्हा पुजू होर जे त्यार ती ते तेई सैंघे ब्याह रै घौरा बै नौठी होर दुआर बन्द केरुआ । 11 एथा ना बाद ते होरा कुंवारी बी एजिया बोलदी लागी, ओ स्वामी आसरी तैइयै दुआर खोल । 12 तेइयै जवाब धिना, हाँऊ तुसाबै सच बोला सा कि हाँऊ तुसाबै नी जाणदा । 13 जागदै रौहा किबैकि तुसै ना ता तेई ध्याडै बै जाणदै न तेसा घड़ी रै बारै ना जाणदै ।

### तोड़ै रा उदाहरण

14 किबैकि ऐ तेई माह्लू री दशा साही सा जुणिये परदेश जाँदी घेरै आपणी सम्पति आपणै नोकरै रै हवालै केरी । 15 तेइयै एकी बै पोंज तोड़ै, दूजै बै दूई होर त्रीजै बै एक तोड़ा धिना । हर एकी बै तिन्हरी समर्थे रै अनुसार धिना होर परदेशा बै नौठा । 16 जुणी बै पोंज तोड़ै मिलै ती तेइयै तुरन्त जाइया तेथा सैंघे लेण-देण केरु होर पोंज तोड़ै होर कमौए । 17 एसा रीतिये जुणी बै दूई मिलै ती तेइयै दूई होर कमौए । 18 पर जुणी बै एक मिलू ती तेइयै जाइया माटा कोतु होर तेइबै मिलूदा स एक तोड़ा तेई माटे ना पौथू । 19 बोहू ध्याडै बाद तिन्हा नोकरा स माक आऊ होर तिन्हा ना लेखा लेंदा लागा । 20 जुणी बै पोंज तोड़ै मिलै ती तेइयै पोंज तोड़ै होर आणिया बोलू, स्वामी तैं मुँबै पोंज तोड़ै धिनै ती हेर में पोंज तोड़ै होर कमौए । 21 तेइरै मालकै तेइबै बोलू, हे भरोसै लायक नोकरा तू धन्य सा किबैकि तू थोड़ै जेही ना भरोसै लायक रौहू । मूँ तू बोहू चीजा रा हकदार बणाणा । आपणै मालकै री खुशी ना शामिल हो । 22 जुणी बै दूई तोड़ै मिलै ती तेइयै बी एजिया बोलू, हे स्वामी तैं मुँबै दूई तोड़ै धिनै ती हेर में दूई होर कमौए । 23 तेइरै मालकै तेइबै बोलू, हे

भरोसै लायक नोकरा तू धन्य सा किबैकि तू थोड़ै जेही ना बी भरोसै लायक बणी रौहू । आपणै मालकै री खुशी ना शामिल हो । 24 तैबै जुणी बै एक तोड़ा मिलू ती तेइयै एजिया बोलू, हे स्वामी हाँऊ तौभै जाणा सा कि तू बड़ा कठोर माह्लू सा । तू जौखे नी बाँहदा तौखे ना काटा सा । 25 हाँऊ डौरू होर जाइया तेरा तोड़ा माटे ना पौथिया रैखू । हेर जो तेरा सा सौ ऐ सा । 26 तेइरै मालकै तेई नोकरा बै जवाब धिना, हे दुष्ट होर आलसी नोकरा; जैबै तू जाणा ती कि हाँऊ जौखे नी बाँहदा तौखे ना काटा सा होर जौखे नी शेटदा तौखेना कठा केरा सा, 27 तैबै तैं मेरा रपेइया सराफे बै किबै नी धिना कि हाँऊ एजिया तिन्हा ना ब्याजा समेत लेंदा । 28 एई तोड़ै बै एई आगै ना वापस लेआतु होर जुणी आगै दस सी तेइबै देआतु । 29 किबैकि जौस आगै सा तेईबै होर देइया होर तेई हागै बोहू होणा पर जुणी हागै नी आँधी तेइना सौ बी वापस लेइया जो तेई आगै सा । 30 एई नकमै नोकरा बै बाहरै निहारै न शेता जौखे एई बै बोहू दुःख होर कष्ट सौहणा पौऊ ।

### न्याय रा ध्याडा

31 जैबै माह्लू रा बेटा आपणी महिमा ना एला होर सैभै स्वर्गदूत तेई सैंघे एलै ता तेई आपणी महिमे री राजगद्दी पैंधे बेशणा । 32 होर सब जाति तेई सामने कठा केरिनी । जैण्ढा फुआल भेडा बै बौकरी ना अलग केरा सा तैण्ढाएे तेई ते एकी होरी ना अलग केरने । 33 होर तेई भेडा आपणी दैहिणी धिरे होर बौकरी बाँउई धिरे खडी केरनी । 34 तैबै राजे आपणे दैहिणी धिरलै तिन्हा बै बोलणा, ओ मेरे बापू रै धन्य लोको, एजा तेई राज्य रै हकदार बेणा जो सँसारै रै शुरुआती ना लेइया तुसरी तैइयै त्यार केरु सा । 35 किबैकि हाँऊ भूखा ती होर तुसै मुँबे खाणै बै धिना, हाँऊ शोरखुआ ती तुसै मूँ ना पाणी प्याऊ, हाँऊ परदेशी ती तुसै हाँऊ आपणै घौरा ना रौहणै धिना । 36 हाँऊ नंगा ती तुसै मुँबे झिकडै धिनै, हाँऊ बिमार ती तुसै मेरा ध्यान डाहू, हाँऊ बन्दी घौरा ना ती तुसै मुँबे मिलदै आए । 37 तैबै धर्मी लोका तेइबै जवाब देणा, हे प्रभु आसै कैबै तू भूखा हेरु होर त ना रोटी ख्याई? आसै कैबै तू शोखा हेरु होर त ना पाणी प्याऊ? 38 आसै तू कैबै परदेशी हेरु होर आपणे घौरा ना रौहणै धिना? आसै कैबै तू नंगा हेरु जो तौभै झिकडै धिनै? 39 आसै कैबै तू बीमार हेरु होर बन्दी घौरा ना हेरु जो तौभै मिलदै आए? 40 तैबै राजे तिन्हा बै जवाब देणा, हाँऊ तुसाबै सच बोला सा कि तुसै वशाह केरनु आए मॉङ्गे होछे ना होछे भाई सैंघे जे बी केरु स मूँ सैंघे केरु । 41 तैबै तेई बाँउई धिरलै तिन्हा बै बोलणा, ओ श्रापित लोको, मूँ हागै ना फेटे नरकै री तेसा आगी बै जात जे में शेतान होर तेइरै दूते री तैइयै त्यार केरी सा । 42 किबैकि हाँऊ भूखा ती तुसै मुँबे खाणै बै नी धिना, हाँऊ शोखा ती तुसै मूँ ना पाणी नी प्याऊ । 43 हाँऊ परदेशी ती तुसै हाँऊ आपणै घौरा ना नी रौहणै धिना । हाँऊ नंगा ती तुसै मुँभे लाणै बै झिकडै नी धिनै । हाँऊ बीमार ती होर बन्दी घौरा ना ती पर तुसै मुँभे मिलदै नी आए । 44 तैबै तिन्हा जवाब देणा, हे प्रभु आसै कैबै तू भूखा, शोखा, परदेशी, नंगा, बीमार होर बन्दी घौरा ना हेरु जो तेरी सेवा टहल नी केरी? 45 तैबै तेई तिन्हा बै जवाब देणा, हाँऊ तुसाबै सच बोला सा, तुसै बशाह केरनु आए मॉङ्गे होछे ना होछे भाई सैंघे जो नी केरु स मूँ सैंघे बी नी केरु । 46 होर इन्हा नरकै री सजा भुगतणी पर धर्मी माह्लू बै स्वर्गा ना हमेशै री जिन्दगी मिलणी जो कदी बी नी खत्म होणी ।

### यीशु रै बरोधा न धोखा धडी

26 जैबै यीशुए ए सारी गल्ला बोली ता सौ आपणै चेलै बै बोलदा लागा, 2 तुसै जाणा सी कि दूई रोजा बाद फसह री जाच होणी होर माह्लू रै बेटे कूसा पैंधे चढाणै री तैइयै ढोकणै घाइणा । 3 तैबै महापुजारी होर लोकै रै पराणिये काइफा नाँ रै बरामदै ना कठा हुए । 4 होर आपू ना विचार केरदै लागे कि आसा यीशु केण्डे ढोकणा होर मारना । 5 पर ते बोला ती कि जाचै रै बौगतै नी, कोइछे ऐण्ढा नी लोड़ी हुआ कि लोका ना हलचल मचली ।

### बैतनिय्याहा न यीशु रा अभिषेक

6 जैबै यीशु बैतनिय्याहा ग्रॉ ना एकी कोदी रै घौरा ना ती, 7 ता एक बेटडी संगमरमरै रै भाँडे ना कीमती इत्र लेइया यीशु हागै आई होर जैबै यीशु रोटी

खाँदा बेठा ती ता तेइरी मुँडी पेंधे परु । 8 जैबै तेइरै चेलै ऐ हेरु ता ते झिकुरे होर बोलू । ऐ इत्र किबै ऐण्डा बर्बाद केरु? 9 एइबै ता शोभली कीमतिये बेचिया कँगाला बै बोंडी सका ती । 10 ऐ जाणिया यीशुऐ तिन्हा बै बोलू, तुसै एसा बेटडी बै किबै सता सी? ए...सै मूँ सेंघे भलाई केरी सा । 11 कँगाल तुसा सेंघे हमेशा रोहा सी पर मूँ तुसा सेंघे हमेशा नी रोहणा । 12 तेसै मेरी देही पेंधे जे इत्र परु सा सौ मेरै पौथिणे री तेंइयै केरु सा । 13 हाँऊ तुसाबै सच बोला सा कि सारी दुनिया ना जौखै बी एसा शोभली खबरा रा प्रचार केरिला तौखै एसा बेटडी रै कोमा रा जिक्र बी एसरी यादी ना केरिना ।

### यहूदा इस्करोती रा विश्वासघात

14 तैबै बारा चेलै मुँझै ना यहूदा इस्करियोति नाँ रै चेलै महापुजारी हागै जाइया बोलू, 15 अगर हाँऊ यीशु बै तुसरै हौथे ढौकणै घानू ता तुसा मूँभे की देणा? तिन्है तेइबै तीह चाँदी रै सिक्के तोलिया धिनै । 16 होर स तैदी ना बाद यीशु बै ढौकणै रा मौका तोपदा लागा ।

### प्रभु- भोज

17 अखमीरी रोटी रै साजै रै पहिले रोजे चेलै यीशु हागै एजिया पुछदै लागै; तू की चाहा सा कि आसै तेरी तेंइयै फसह री रोटी खाणै री तेंइयै त्यारी केराऊँ? 18 यीशुऐ बोलू, तुसै ग्राँ बै जात तौखै तुसाबै एक माहू मिलणा । तुसै तेई हागै जाइया बोलीत कि, गुरु बोला सा कि मेरा बाँगत नेड आऊ सा । मूँ आपणै चेलै सेंघे तेरी हागै साजा मनाणा । 19 चेलै ऐ गल मैनी होर फसह रा साजा त्यार केरु । 20 सोनकी घेरै यीशु आपणै बारा चेलै सेंघे रोटी खाणै री तेंइयै बेठा । 21 जैबै ते फसह री रोटी खाँदै लागैदें ती ता यीशुऐ बोलू, हाँऊ तुसाबै सच बोला सा कि तुसा मुँझै ना एकि हाँऊ ढौकणै घाणा । 22 एसा गला शुणिया ते चेलै ऊदास हुए होर हर एक चला पुछदा लागा, हे गुरु कि हाँऊ ता नी? 23 यीशुऐ जवाब धिना, जुणिये मूँ सेंघे थाई ना हौथ पाऊ सा तेई हाँऊ ढौकणै घाणा । 24 माहू रै बेटै रै बारै ना जे लिखू सा स ता पूरा होणा पर दुःख ता तेई री तेंइयै सा जुणी माहू रा बेटा ढौकणै घाणा । अगर स माहू पैदा नी ती होदा ता तेइरी तेंइयै ऐ भला होदा । 25 तैबै तेइबै ढौकणै घाणू आऐ यहूदा इस्करियोतिये बोलू, हे गुरु कि स हाँऊ सा?

### पतरसा रै ना केरने री भविष्यवाणी

26 यीशुऐ तेइबै बोलू, तैं बोलू: तैबै यीशुऐ रोटी चेकी होर प्रार्थना केरिया चोड़ी होर चेलै बै देँदी घेरै बोलू, एसा बै खात ऐ मेरी देह सा । 27 तैबै यीशुऐ कटोरा चेकू होर प्रार्थना केरिया चेलै बै देँदी घेरै बोलू, तुसै सैभिये एई कटोरै ना पीआ । 28 किबैकि ऐ वायदै रा सौ लोहू सा जे बोहू लोकै रै पापै री माफी री तेंइयै बहाइणा । 29 हाँऊ तुसाबै सच बोला सा कि मूँ ऐ दाखरस तेई ध्याडै तक कदी बी नी पीणा जैबै तक कि हाँऊ परमेश्वर बापू रै राज्य ना तुसा सेंघे नौँऊआ नी पीनू । 30 तैबै ते फसह रा भजन गाइया जैतून ढौगा पेंधेबै नौँठे ।

### गतसमनी न प्रार्थना

31 तैबै यीशुऐ तिन्हा बै बोलू, तुसा सैभी औज राती मेरै कारण ना ठोकर खाँणी किबैकि ऐ लिखू सा कि मूँ फुआल मारना होर छुण्डै री भेडा तितर-बितर होणी । 32 पर मूँ जिन्दै होणे ना बाद तुसा ना पैहलै गलीला बै जाणा । 33 पतरसै तेइबै बोलू, अगर सारै तेरै बारै ना ठोकर खालै ता खालै पर मूँ ठोकर नी खाणी । 34 यीशुऐ तेइबै बोलू, हाँऊ तौभै सच बोला सा औज राती मुर्गे रै बाँग देणे ना पहलै त त्रा बार मेरा नाँह केरना कि तू मुँभै नी ज़ाणदा । 35 पतरसै तेइबै बोलू, अगर मुँभै त सेंघे मौरना बी पौडला तैबै बी मूँ नी मुकरना । होरा सैभी चेलै बी ऐण्डा बोलू ।

### यीशु रा धोखे सेंघे ढोकिया

36 तैबै यीशु आपणै चेलै सेंघे गतसमनी जेगहा बै आऊ होर आपणै चेलै बै बोलू कि तुसै ओखे बेशा होर मूँ आगे जाइया प्रार्थना केरनी । 37 यीशुऐ पतरस होर जब्दी रै दूई बेटे आपू सेंघे नेरे । तैबै यीशु उदास होर व्याकउल

होदा लागा । 38 तैबै यीशुऐ चेलै बै बोलू, मेरा जीऊ बोहू उदास सा ओखे तक कि मेरै प्राण निकलदै लागै सी । तुसै ओखे उहरा होर मूँ सेंघे जागदै रोहा । 39 तैबै स थोडा आगे जाइया टुँबडा पौडू होर प्रार्थना केरदा लागा, हे मेरै बापू, अगर होइ सका सा ता एसा दुःखै री घडी मूँ ना दूर केरा पर तैबै बी मेरी नी पर तुसरी इच्छा पूरी लोडी हुई । 40 तैबै तेइयै एजिया आपणै चेलै सोँदै हेरे होर पतरसा बै बोलू, कि तुसै एक घडी बी मूँ सेंघे जागी नी सके? 41 जागदै रोहा होर प्रार्थना केरदै रोहा कि तुसै परीक्षा ना नी लोडी पौडै । 42 तैबै यीशुऐ दूजी बार जाइया प्रार्थना केरी; हे मेरैपरमेश्वर बापू अगर ऐ दुःख मेरै भुगतै बगैर नी हटी सकदा ता तेरी इच्छा पूरी लोडी हुई । 43 तैबै यीशुऐ एजिया ते चेलै भी सुतै दे हेरे किबैकि तिन्हरी ओछी नीजै लाइया भौरुइदी ती । 44 होर तिन्हा छोड़या भी नौठा होर सौहै गल बोलिया त्रीजी बार प्रार्थना केरी । 45 तैबै तेइयै एजिया आपणै चेलै बै बोलू, एबै सोँदै रोहा होर वशाँ केरा: हेरा स घडी आई होर माहू रा बेटा पापी रै हौथे ढोकिया । 46 उठा चोला, मुँभे ढौकणै घाणू आला नेड पुजू सा ।

### बड़ी सभा रै सामणै यीशु

47 यीशु बोलदा लागा ती कि यहूदा जे बारा चेलै मुँझै एक ती सौ आऊ होर तेई सेंघे महापुजारी होर पराणिये री भीड तलवारी होर शोठे लेइया आई । 48 यहूदै तिन्हा बै बोलू ती कि जुणी बै हाँऊ माँकी देनू तुसै तेइबै ढोकैइतू । 49 होर तुरन्त यीशु हागै एजिया बोलू, हे गुरु नमस्कार होर तेइबै माँकी धिनी । 50 यीशुऐ तेइबै बोलू, हे सेंघी जुणी कोमे री तेंइयै तू आऊ सा तेइबै केर । तैबै तिन्है एजिया यीशु ढोकू । 51 होर यीशु रै एकी चेलै आपणी तलवारी सेंघे एकी सिपाही रा कोन काटू । 52 तैबै यीशुऐ तेइबै बोलू, आपणी तलवार बन्द रख किबैकि जो तलवार चला सी तिन्हा सैभी तलवारीरिये लाइया नाष्ट केरिना । 53 कि तू नी समझदा कि हाँऊ आपणै परमेश्वर बापू हागै विनती केरी सका सा होर तेई तुसा नी बी जादै स्वर्गदूत ऐभै मूँ हागै भेजणै? 54 पर पवित्र शास्त्रै री गला रा पूरा होणा जरूरी सा । 55 तेसा घडिये यीशुऐ भीडै रै लोका बै बोलू, कि तुसै तलवारी होर उँडै लेइया मुँभे डाकू साही ढोकणै री तेंइयै आऐ सी? हाँऊ हर रोज मन्दिरा ना तुसा सामनै उपदेश देआ ती पर तुसै हाँऊ नी ढोकू । 56 पर ऐ सब एथै री तक हुआ कि भविष्यवक्तै रै वचन पूरे होलै । तैबै सब चेलै तेइबै छोड़या भैगै ।

### पतरसा रा ना केरना

57 तिन्है यीशु ढोकिया कैफा नाँ रै, महापुजारी हागै नेऊ जौखे धर्मविधि ज़ाणनू आलै होर पराणिये कठा हुऐ ती । 58 होर पतरस तेइ पिछै-पिछै महापुजारी रै बराँडै तक नौठा होर भीतरै जाइया पहरैदारा सेंघे नतीजै हेरदा बेठा । 59 महापुजारी होर सारी सभा यीशु बै मारनै री तेंइयै तेइरै खिलाफ झूठी गुआही देणे री तेंइयै त्यार ती । 60 पर बोहू सारी झूठी गुआही सेंघे बी यीशु पेंधे दोष साबित नी हुआ । 61 आखिरा ना दूई माहूऐ एजिया बोलू, हाँऊ परमेश्वरै रै मन्दिरा बै ढाई सका सा होर त्राई रोजा ना बणाई सका सा । 62 तैबै महापुजारिये खडै होइया बोलू, कि तू कोई जवाब नी देदा? ए लोका तेरे खिलाफ की गुआही देआ सी? पर यीशु चुपचाप रोहू । 63 महापुजारिये तेइबै बोलू, हाँऊ तौभै जिन्दै परमेश्वरै री कसम देआ सा कि अगर तू परमेश्वरा रा बेटा सा ता आसा बै बोल । 64 यीशुऐ तेइबै बोलू, तैं आपूऐ बोलू बल्कि हाँऊ तुसाबै ऐ बी बोला सा कि ऐबै ना तुसा माहू रा बेटा सर्वशक्तिमान परमेश्वरै री दैहिणी धिरै बेठैदै होर आसमानै रै बादलै ना एन्दै हेरना । 65 तैबै महापुजारिये आपणै झिकडै चिरिया बोलू, एइयै परमेश्वरै री निन्दा केरी सा ऐबै आसा बै गुआही री की जरूरत सा? 66 हेरा तुसै ऐबै ऐ निन्दा शुणी । तुसै की समझा सी? तिन्है जवाब धिना, ऐ ज़ानिया मारनै लायक सा । 67 तैबै तिन्है तेइरै मुँहा बै थुकू, स मुँकै लाइया मारु होर तेइरै थपुड़ बाहै, 68 होर बोलू, हे मसीह, भविष्यवाणी केर कि तेरै कुणिये बाही?"

### पतरसा रा ना केरना

69 पतरस बाहरै बराँडै ना बेठा ती कि एकी बेटडिये तेई हागै एजिया बोलू, तू बी ता गलीला ना यीशु सेंघे ती । 70 तेइयै सैभी सामनै नाँह केरु कि हाँऊ

नी जाणदा कि तू की लागी सा बोलदी? 71 तैबे पतरस बाहरै डेही हागै नौता ता एकी होरी बेटडियै बी तौखै बेठै दै लोका बै बोलू, ऐ बी ता यीशु नासरी सेंधे ती । 72 तेइयै भी कसम खाइया नाँह केरु कि हाँऊ तेई माहू बै नी जाणदा । 73 थोड़ी देर बाद जे लोका तौखै ती तिन्है पतरसा हागै एज्या बोलू, सचियै तू बी ता तिन्हा माहू ना एक सा किबैकि तेरी बोली तेरा भेद खोला सा । 74 तैबे सौ कसम खाँदा लागा कि हाँऊ तेई माहू बै नी जाणदा होर मुर्गे तुरन्त बाँग धिनी । 75 तैबे पतरसा बै यीशुए बोली दी गल याद आई कि मुर्गे रै बाँग देणै ना पहिलै त मेरा त्रा बार नाँह केरना होर सौ बाहरै जाइया बडै दुःखी होइया रोंदा लागा ।

### पिलातुसा रै सामणै यीशु

27 जैबे दोत हुई ता महापुजारी होर लोके एक होइया यीशु बै मारनै री योजना बणाई । 2 तिन्है स बोनू होर पिलातुस राजै रै हवालै केरु ।

### यहूदा री आत्महत्या

3 जैबे तेइबे ढौकणै घाणू आलै यहूदै हेरु कि यीशु दोषी ठहराऊ सा ता सौ पछताऊ होर तेइयै ते तीह चाँदी रै सिक्के तिन्हा हागै वापस आणै । 4 हओर बोलू, मैं मोरनै री तैइयै एक निर्दोष माहू ढौकणै घाइआ पाप केरु सा । तिन्है बोलू, आसरा की सा तुहै जाण । 5 तैबे तेइयै ते सिक्के मन्दिरा शेटै होर भैगू होर जाइया आपू बै फाँसी लाई । 6 महापुजारियै ते सिक्के आणै होर बोलू, इन्हा सिक्के रा मन्दिरा ना रखणा ठीक नी आँथी किबैकि ऐ लोहू री कीमत सा । 7 तैबे तिन्है आपू ना सलाह केरिया तिन्हा सिक्के लाइया परदेशी बै पौथणै री तैइयै खमारा रा एक छेत लेऊ । 8 एसा वजहा ना तेई छेता बै औजा तक लोहू रा छेत बोला सी । 9 तैबे यिर्मियाह भविष्यवक्तै बोलू दा स वचन पूरा हुआ, कि तिन्है ते तीह सिक्के वापस लेऐ जे इस्राइली लोकै तेइरी तैइयै देणै करै ती । 10 होर जेणढे प्रभुए मुँभे हुकम केरु तिन्है लाइया खमारै रै छेतै री कीमत धिनी ।

### पिलातुसा रै सवाल

11 जैबे यीशु पिलातुस राजै सामनै खड़ा ती ता तेइयै यीशु ना पुछू, कि तू यहूदी रा राजा सा? यीशुए तेइबे बोलू, तू आपूए लागा सा बोलदा । 12 जैबे महापुजारी होर पराणिये तेई पेंधे दोष लाँदे लागै ती ता यीशुए किछ बी जवाब नी धिना । 13 तैबे पिलातुस तेइबे बोलू, कि तू नी शुणदा कि ए लोका तेरै खिलाफ एतरी गुआही दैदे लागै सी? 14 पर यीशुए तेइबे एकी गला रा बी जवाब नी धिना । औखै तक कि पिलातुस बी बड़ा हैरान हुआ ।

### मकाणै रा हुकम

15 राजै रा एक नियम ती कि साजै रै ध्याडै ना लोके री तैइयै स एक कैदी बै छोड़ी सका ती जुणीबे लोका चाहा सी । 16 तेई बौगतै बरअब्बा नाँ रा एक डाकू कैद ती । 17 जैबे ते कठा हुऐ ता पिलातुस तिन्हा बै बोलू, तुसै कुणी बै चाहा सी कि हाँऊ तुसरी तैइयै छोड़नू? बरअब्बा या यीशु बै जो मसीह सा । 18 किबैकि पिलातुस जाणा ती कि तिन्है यीशु जलनै री वजहा ना ढौकू ती । 19 जैबे पिलातुस राजगद्दी पेंधे बेठा ती ता तेइरी लाडियै तेई हागै एक संदेशा भेजू कि तू तेई धर्मी होर सच्चै माहू सेंधे किछ मतेई केरदा । मैं तेइरै बारै ना एक सुपना हेरु सा होर हाँऊ औज पूरी ध्याडी ना बेचैन रौही । 20 पर मुख्य पुजारी होर बुजुर्ग यहूदी नेतै भीडै रै लोका बहकाए कि ते पिलातुसा हागै बरअब्बा बै छोड़नै होर यीशु बै मारनै री माँग केरलै । 21 पिलातुस तिन्हा ना पुछू, इन्हा दूई ना तुसै कुणी बै चाहा सी कि तुसरी तैइयै छोड़नू? तिन्है बोलू, बरअब्बा को । 22 पिलातुस तिन्हा ना पुछू, जैबे यीशु जुणी बै मसीह बोला सी तेइरा की केरना? सँभिये तेइबे बोलू, यीशु बै क्रूसा पेंधे चढ़ा । 23 पिलातुस बोलू, किबे तेइयै की बुराई केरी सा? ते होर बी जोरा सेंधे बोलदै लागै, तेइबे क्रूसा पेंधे चढ़ा । 24 तैबे पिलातुस पाणिये लाइया आपणै हौथ धोए होर बोलू, हाँऊ एई धर्मी माहू रै लोहू ना निर्दोष सा तुसै जाणा । 25 सँभी लोकै जवाब धिना, एइरा लोहू आसा पेंधे होर आसरी सन्ताना पेंधे पौडला । 26 तैबे

पिलातुस तिन्हरी तैइयै बरअब्बा छोड़ू होर यीशु तिन्हरै हवालै केरु कि ते कोडै मारिया तेइबे क्रूसा पेंधे चढ़ालै ।

### सपाई द्वारा यीशु री बेईजती

27 तैबे राजै रै सिपाहिये स किले आन्ध्रै नेऊ होर सारी पलटन तेइरैचोहू पासै कठा हुई । 28 तैबे तिन्है तेइरै झिकडै उतारै होर तेइरै लाल रंगै रै चमकीलै झिकडै लाए होर, 29 तेइरै कोडै रा मुकट बणाइया तेइरी मुँडी पेंधे रखू । तेइरै दैहिणै हौथा ना उँडा धिना होर तेई आगै टुँबडै पौडिया जेमहाराज केरिया तेइरा मजाक केरदै लागै । 30 तेई पेंधे थुकू होर तेही उँडे लाइया तेइबे मारदै लागै । 31 जैबे तिन्है तेइरा ठठा केरु ता तिन्है तेइरै ते लाल झिकडै उतारै होर तेइरै तेही रै झिकडै लाए । तैबे तिन्है स क्रूसा पेंधे चढ़ाणै री तैइयै नेऊ ।

### यीशु रा क्रूसा पेन्धे चढ़ाणा

32 बाहरै जाँदी घेरै तिन्हा बै शमौन नाँ रा एक कुरेनी माहू मिलू । तिन्है स बेकारा ना ढौकू कि स यीशु रा क्रूस चेकला । 33 जैबे ते गुलगुता नाँ री जैगहा ना जुणिवे खोपरी री जैगहा बोला सी पुजै, 34 ता तिन्है यीशु बै पित मलू दा दाखरस पीणै बै धिना पर यीशुए स चरखू होर पीणै ना नाँह केरु 35 तैबे तिन्है स क्रूसा पेंधे चढ़ाऊ होर चिठी पाइया तेइरै झिकडै आपू ना बाँडे । 36 ते तौखै बेशिया तेइरी पहरेदारी केरदै लागै । 37 तिन्है तेइरा दोषपत्र तेइरी मुँडी उजी धिरै लाऊ कि, “ऐ यहूदी रा राजा सा” । 38 तैबे तिन्है तेइरी दैहिणी होर बाँउई धिरै दूई होरा डाकू बी चढ़ाए । 39 एणू-जाणू आलै मुडी थलाई थलाइया तेइरी निन्दा केरा ती, 40 होर बोला ती, हे मन्दिरा बै ढाणू आऐ होर त्रा रोजा ना बणाणू आलै आ आपणै-आपू बै ता बचा । अगर तू परमेश्वरा रा बेटा सा ता क्रूसा पेंधे ना उतर । 41 एसा रीतिये महापुजारी होर धर्मविधि जाणनू आलै बी ठठा केरिया बोला ती, एइयै होरा ता बचाए पर ऐ आपू बै नी बचाई सकदा । 42 ऐ त “इस्राइला रा राजा सा” । अगर ऐ क्रूसा पेंधे ना उतरला ता आसा विश्वास केरना । 43 तेइयै परमेश्वरा रा भरोसा रखू सा, अगर स एइबै चाहा सा ता ऐबै एइबै छुडाला किबैकि एइयै बोलू ती “हाँऊ परमेश्वरा रा बेटा सा” । 44 जे डाकू तेई सेंधे क्रूसा पेंधे चढ़ाए ती ते बी तेइरी निन्दा केरा ती ।

### यीशु रा प्राण छोड़ना

45 दुजै पौहरा ना लेइया त्रीजै पौहरा तक तेई सारै देशा ना निहारा रौहू । 46 त्रीजै पौहरै यीशुए बडी जोरा सेंधे बोलू, “एली-एली लमा शबक्तनी? कि हे मेरै परमेश्वर तँ हाँऊ किबै छोड़ू? 47 जो तौखै खडै ती तिन्है ऐ शुणिया बोलू, ऐ ता एलियाह बै पुकारदा लागा सा । 48 तिन्हा मुँजै ना एक ठोर मारिया भैगू होर गुदड़ लेइया स सिरकै ना उबौऊ होर उँडे पेंधे रखिया तेइबै चुशणै बै धिना । 49 होरिये बोलू, रुका हेरदै कि एलियाह एईबे बचा सा कि नी । 50 तैबे यीशुए जोरा सेंधे बोलिया प्राण छोड़ै । 51 होर शुणा मन्दिरा रा परदा उजै ना लेइया बुनै ढौई चिरुआ होर तेथे रै दूई टुकडै हुऐ होर धौरती ना जौजरी हुई । 52 ओखै तक कि मूँएदै कई धर्मी लोकै कब्रा खुली होर ते जिन्दै हुऐ । 53 ते कब्रा ना निकतै होर यीशु रै जिन्दै होणै ना बाद शैहरा होर ग्रॉ ना बोहू सारै ना हेरुए । 54 तैबे सिपाही होर जो तिन्हा सेंधे ती जेकिछ हुआ तेथा हेरिया डौरै होर बोलू, “ऐ सचियै परमेश्वरा रा बेटा ती” । 55 तौखै बोहू सारी बेटडी गलीला ना यीशु री सेवा केरदी तेई सेंधे आई ती ते दूरा ना हेरदी लागी ती । 56 तिन्हा ना मरियम मगदलीनी, याकूब होर योसेसे आमा मरियम होर जब्दी रै बेटे री आमा ती ।

### यीशु रा दफनाया जाणा

57 जैबे सोन हुई ता अरमतियाह ग्रॉ रा युसुफ जोकि एक सेठ माहू ती होर यीशु रा चेला बी ती स आऊ होर पिलातुस राजै हागै जाइया यीशु री लाश मुँगी । 58 पिलातुस राजै लाश देणै रा हुकम केरु । 59 युसुफे लाश नेइया साफ कपडै ना लपेटी, 60 होर स नोउई कब्रा ना रैखी होर कब्रा बाहरै एक

बड़ै पाथर डाहिया तौखना नौठा । <sup>61</sup> मरियम मगदलीनी होर दुजी स मरियम तौखै कब्रा सामनै बेठी ती ।

### कब्रा पेंधे पौहरा

<sup>62</sup> दुजै रोजे महापुजारी होर फरीसी पिलातुस राजे सेंघे मिले होर बोलू, <sup>63</sup> महाराज, तेई भरमाणू आलै बोलू सा कि मू त्रीजै ध्याडी जिन्दै होणा । <sup>64</sup> तुसै हुकम केरा कि आसै त्रा रोजा तक कब्रै री पहरेदारी केराऊं । कोइँछे तेइरै चेलै एजिया तेइरी लाश नी लोडी चोरी होर लोका बै बोललै कि स जिन्दा हुआ सा । तैबै ऐ दूजा धोखा पिछलै धोखै ना बी बुरा होणा । <sup>65</sup> पिलातुसै तिन्हा बै बोलू, तुसा हागै ता पहरेदार सी जात होर आपणी समझै रै मुताबिक पहरेदारी केरा । <sup>66</sup> तैबै तिन्है पहरेदार नेऐ होर कब्रा ना मोहर लाइया पहरेदारी केरदै लागै ।

### यीशु रा जिन्दा होणा

**28** अरामै रै ध्याडै बाद तुआरै री दोतियै मरियम मगदलीनी होर दुजी मरियम कब्रा हागै नौठी । <sup>2</sup> शुणा एक बड़ी जौजरी हुई होर एक स्वर्गदूत तौखै उतरू तेइयै भेटी एजिया स बडा पाथर हटाऊ होर तेई पेंधे बेठा । <sup>3</sup> तेइरा रूप बज्रडाह साही चमकदा लागा ती होर तेइरै झिकडै हिँऊँआ साही शेते ती । <sup>4</sup> ते सिपाही जे कब्रा रा पैहरा देँदै लागै ती ते डौरै लाइया कोमदै लागै होर मूँएँदै साही हुरे । <sup>5</sup> तैबै स्वर्गदूतै तिन्हा बेटडी बै बोलू, डौरदी मता; हाँऊँ जाणा सा कि तुसै यीशु बै तोपदी लागी सी जो कूसा पेंधे चढाऊ ती । <sup>6</sup> सौँ औँखै नी औँथी । जैण्डा तेइयै बोलू ती सौँ मौँरै ना बाद जिन्दा हुआ सा । एजा तेसा जैगहा बै हेरा जौखै स रैखू ती । <sup>7</sup> तुसै तुरन्त जात होर तेइरै चेलै बै बोला कि सौँ जिन्दा हुआ सा होर तुसा ना

पहलै गलीला बै जाँदा लागा सा । तुसा सौँ तौखै हेरना । जे में बोलू तेई बै याद रखेइत् । <sup>8</sup> ते बेटडी तुरन्त यीशु रै चेलै बै दैसणै री तैँइयै कब्रा बै छौँडिया नौठी । ते डौरै ती पर खुश ती । <sup>9</sup> चानक यीशु तिन्हा बै मिलू होर बोलू, ओ हो तुसै सी । ते बेटडी यीशु हागै आई होर तिन्है यीशु री जाँघा ढौकी । <sup>10</sup> तैबै यीशुए तिन्हा बै बोलू, डौरदी मता मेरे भाई-बन्धु हागै जाइया तिन्हा बै बोला गलीला बै चौला तुसा हाँऊँ तौखै हेरना ।

### पौहरेदारा री खबर

<sup>11</sup> ते बेटडी बौता ना ती कि सिपाही पहरेदार ती तिन्है ग्रॉँ ना जाइया ऐ घटना मुख्य पुजारी बै दैसी । <sup>12</sup> तिन्है बुजुर्ग यहूदी नेता सेंघे मिलिया एक योजना बनाई । तिन्है सिपाही बै बोहू सारै ढबुएँ देइया बोलू, <sup>13</sup> तुसै लोका बै बोलीत् कि यीशु रै चेलै राती जैबै आसै सोँदै लागै ती आए होर यीशु री लाश चोरिया नेई । <sup>14</sup> अगर तुसरी ऐ गल राज्यपाला हागै पुजा सा ता आसा स समझाणा होर तुसाबै किछ नी होणै देणा । <sup>15</sup> पहरेदारै तिन्हा ढबुएँ नेइया तैण्डाए केरू होर ऐ गल यहूदी रै बिचा ना एसा रीतिरे फैली सा ।

### यीशु रा कूसा पेंधे चढाया जाणा

<sup>16</sup> तैबै ते ग्यारा चेलै तेसा जैगहा बै नौठै जो जैगहा यीशुए तिन्हा बै दैसी ती । <sup>17</sup> जैबै तिन्है यीशु हेरू ता तिन्है तेइरी जय जयकार केरी पर कौसी-कौसी बै शक हुआ । <sup>18</sup> तैबै यीशुए तिन्हा हागै एजिया बोलू, “स्वर्ग होर धौरती रा सारा हक मुँभे धिना सा । <sup>19</sup> ऐबै तुसै जात होर सैभी देशै रै लोका बै मेरा चेला बणात् होर तिन्हा बै परमेश्वर बापू, बेटै होर पवित्र आत्मै रै नाँ ना बपतिस्मा दैआत् । <sup>20</sup> तिन्हा बै तिन्हा सारै हुकम मनणा सिखात् जो में तुसाबै सीखाई । शुणा, हाँऊँ दनियै रै अन्त तक तुसा सेंघै सा ।

# मरकुस

## परिचय

मरकुस री शुरुआत ओखे न होआ सा "परमेशवरे रे बेटे यीशु मसीह रा सुसमाचार । "ऊँई न यीशु बै एक अधिकारा संघे कौम केरणु आळै माहणु रै रूपा न दर्शाऊ सा ।

तेई रा अधिकार तेई री शिक्षा न, दुष्टात्मा पेन्धे तेईरा अधिकार, होर लोका रे माफ़ केरने न प्रगट हुआ । ऐथा न यीशु आपू बै "माहणु रा शौहरू" बोला सा । यीशु ऊँईरी तकर आऊ सौ लोका रै पाप माफ़ केरने बै होर पापा न आजाद केरने री तेईये आऊ होर आपणी जान देणै री तकर आऊ । मरकुस यीशु री शिक्षा होर वचना पेन्धे नेई बल्कि तिन्हरे कौमा पेन्धे जोर देआ सा । तैबै सौ तेईरी कथा बै सीधे, होर सरल होर प्रभावशाली रूपा न प्रगट केरा सा । यूहन्ना बसिस्मा देणु आळा होर यीशु रा बसिस्मा होर यीशु री परीक्षा रै बारे न पूरी जानकारी होर लिखणु आळा तुरंत यीशु री शिक्षा होर चंगाई री सेवा रे बारे न वर्णन केरदा लागा सा जैँढे-जैँढे वौक्त जांदा रौहु तैँढे-तैँढे यीशु रै मैनणु आले होर तेई बै शोभली तैरह समझदे लागे । पर यीशु रै दुश्मन होरजादा गुस्सा होआ सी । आखरी अद्याययीशु रै आखरी बौक्ता री जिन्दगी होर जिन्दगी होर आखरीहफते रै बारे घटी हुन्दी गैला बै प्रस्तुतु केरा सा, जुणी न खास सा, तेई रा क्रुसा पेन्धेचढ़ाणा होर तेईरा जिन्दा होणा ।

रूपरेखा

सुसमाचारा री शुरुआत 1:13

गलीला न यीशु री जनसेवा 1:14-9:50

गलीला न यरुशलेमा तक यात्रा 10 :1-52

यरुशलेमा न आखरी हफता 11:1-15:47

यीशु रा जिन्दा होणा 16:1-8

जिन्दे होईया प्रभु रा हेरीणा होर स्वर्गा बै जाणा 16:9-20

## यूहन्ना बसिस्मा देणुआळै रा प्रचार

1 परमेश्वरा रै बेटे यीशु मसीह री शोभली गल्ला री शुरुआत । 2 जैँडा यशयाह भविष्यवाणी री कदाबा न लिखूदा सा "हेर हाँऊ दूता बै तेरे आगै भेजा सा "जूण तेरी तेंइए बौत सिधि केरला । 3 जंगला न एक बोलणु आळै री हाक् शुणदी लागी सा कि प्रभु री बौत तैयार केरा, होर तेइरी सडका सिधि केरा ।" 4 यूहन्ना आऊ, जूण जंगला न बपतिस्मा देआ ती" होर पापै री माफ़ी री तेंईये मन बदलणेरी री तकर बपतिस्मा रा प्रचार केरा ती । 5 सारे यहूदिया देशा रे, होर यरुश्लेमारै सेभ रोहणु आळै निकलिया तेई आगै बै नौटे होर आपणै पापा बै मनिया यरदन नौई न तेई न बपतिस्मा लेऊ । 6 धन्य तै जूण धर्म रै भूखे होर शोखे सी, किबैकि तिन्हा रोजणा । 7 होर ऐ प्रचार केरा ती मेरे बाद सौ ऐणु वाला सा, जूण मुं न भी बडी शक्ति आळा सा । हाँउं ता ऊँई रै बराबर भी नी आथी कि टुम्बलै होइया तिनैरै बूटे रै तस्मै खोलनु । 8 हाँउं ता पाणी लाईया बपतिस्मा देआ सा पर तेई तुसा बै पबित्र आत्मा रा बपतिस्मा देणा ।

## यीशु रा बसिस्मा होर परीक्षा

9 तिन्हा रोजा न प्रभु यीशुए गल्लिला रै नासरता न एजीया यरदना न यूहन्ना न बपतिस्मा लेऊ । 10 होर जैँबै प्रभु यीशु पाणी न निकलिया उजै आऊ ता तैबै तेइयै सरग खुलदा होर कबूतरै आत्मा रै जरिये आपू पांघे उतरदा हेरु । 11 होर ऐ आकाशवाणी हुई, "तू मेरा शोभला बेटा सा हाँउं तौ न खुश सा ।" 12 तैबै आत्मे तैबै प्रभु यीशु बौणा धीरै बै भेजू । 13 बौणा न चाली रोजा तक शैतानै तिन्हरी परीक्षा लेई । होर सौ बौणा रै पशु संघे रौहु, होर स्वर्गदूत प्रभु यीशु री सेवा केरदे रौहे ।

## यीशु री सेवा कार्य री शुरुआत

14 युहन्ने रै ढौकिणै धियाणै न बाद प्रभु यीशुए गल्लिला न एजीया परमेशवरै रै राज्ये री शोभली गल्ला बै दसदे लागे । 15 होर बोलु "बौक्त पूरा हुआ सा, होर परमेश्वरा रा राज्य नेड़ सा मन फिरा होर शोभली गल्ला पांघे बशाह केरा ।"

## मच्छली ढौकणुआळै रा शाधणा

16 गलिल्ले री झिल्ले रै भौड़ा-भौड़ा जांदी घेरै, प्रभु यीशुए शमोन होर तेईरा भाई अन्द्रियास झिल्ला न जाल भौँदें हेरै किबैकी ते मैच्छी ढौकणु आळे ती । 17 प्रभु यीशुए तिन्हा बै बोलु, मुं पीछे न ऐजा मुं तुस्सै माळु ढौकणु आळै बणाणै सी । 18 ते तैबै जाला बै छौड़िया प्रभु यीशु पीछे नौटे । 19 थौड़ी आगे जाइया, परभी यीशुए जब्दी रै बेटे याकूब होर तेइरा भाई यूहन्ना बै किशती पांघे जाल सधेरदै हेरै । 20 प्रभु यीशुए ते तैबै शधाए होर ते आपणै बापू जब्दी रै नौकरा संघे किशती छौड़ीया, प्रभु यीशु रै पीछे औन्ददै लागे ।

## दुष्टात्मा न भौरु होंदेमाहणु रा ठीक होणा

21 तैबै ते कफरनहूमा बै आए, होर प्रभु यीशु तैभै अरामै रै धियाडै न आराधनालया न जाइया उपदेश शुणादें लागे 22 होर लोका प्रभु यीशु री गल्ला न हैरान हुए किबैकी प्रभु यीशु तिन्हा शाश्वती सेन्ही नीं, पर एक राजे सेन्ही उपदेश देआ ती । 23 तेई बौकता न तिन्है रै घौरा न एक माळु ती जूणी न बुरी आत्मा ती । 24 तेइए लेरा पाइया बोलु ओ यीशु नासरी आसा बै तौ संघे कि कौम? कि तू आसा बै मारणै री तक आऊ सा? हाँउं तुस्सा बै जाणा सा, तू कुण सा? परमेश्वरा रा पबित्र माळु ।" 25 प्रभु यीशुए तेइबै झिडकाईया बोलु, चुप रौह, होर एडन निकलिया जा ।" 26 तैबै बुरी आत्मा तेइबे मरोडीया होर बड़ा फियाड़ा बोलिया लेरा पाइया निकती । 27 ऊँई पांघे सारै माळु हैरान हुए आपू



### भीड़ा रा यीशु पीछे चलना

7 होर यीशु आपणें चेलें सेंघे झीला धिरें बै नौठा होर गलील ज़िलें न लोकें री एक बड़ी भीड़ तेई पिछे चली। 8 ऐ शुणिया कि यीशु चमत्कार केरा सा, यहूदिया होर यरुशलम होर इदुमिया न, होर यरदन नौई पारें न, होर सूर होर सैदै रें औरें-पौरें न बोहु बड़ी भीड़ कडा हुई। 9 यीशुऐ आपणें चेलें बै बोलू, भिड़े री वजहा न लोका मूं पेंधें नी लोडी पौड़े, मेरी तैइयै एक होछी किस्ती त्यार रखा। 10 किबैकी यीशुऐ बोहु लोका ठीक केरे ती, एसा वजहा न जेतारें लोका बीमार ती ते सैभ यीशु बै छुगणें री कोशिश केरदै लागें ती। 11 होर चेट्ट आलें लोका बी जैबै तेइबै हेरा ती, तेई हागें लोमै पौड़ा ती होर जोरा सेंघे क्रीजा मारिया बोला ती, "तू परमेश्वरा रा बेटा सा। 12 होर यीशुऐ तिन्हा बै बोहु घेरें बोलू, कि मुँभे प्रगट मता केरदै।

### बारा चले बै चुनना

13 तैबै यीशु ढोंगा पेंधे नौठा होर जुणिबै सौं चाहा ती ते आपू हागें शाधें होर ते तेई हागें आपे। 14 तैबै यीशुऐ बारा चेलें चुनै कि ते तेई सेंघे रोहलें होर सौं तिन्हा बै प्रचार केरनै री तैइयै भेजला। 15 होर तिन्हा बै चेट्ट खोलणें रा हक धिना। 16 होर ते बारा चेलें ए सी, शमौन जुणि रा नाँ यीशुऐ पतरस रखू। 17 जव्दी रा बेटा याकूब, होर याकूबा रा भाई यूहन्ना, जुणी रा नाँ तेईऐ बुअनरगिस, मतलब गर्जना रा बेटा रखू। 18 होर अन्द्रियास, फिलिप्पस, बरतुल्मै, मती, थोमा, हलफई रा बेटा याकूब, तदै होर शमौन कनानी। 19 होर यहूदा इस्करयोती, जुणीऐ सौं ढौकणें छाऊ।

### यीशु होर बलजबूल

20 तैबै यीशु घोरा बै आऊ होर एतरी भीड़ कटा हुई कि तेइबे रोटी खाणें रा बी मौका नी मिलू। 21 जैबै तेइरें रिस्तैदारें ए गैला शुणी ता ते यीशु बै ढौकदै निकदै किबैकि ते बोला ती कि एइरा दिमाग ठीक नी आँथी। 22 होर जुणा शास्त्री यरुशलमा न आए ती ते ऐण्डा बोला ती कि तेई आन्ध्रै शैतान सा होर सौं चेट्ट रें प्रधानें री मजती सेंघे चेट्ट बै खोला सा। 23 यीशुऐ ते आपू हागें शाधें होर उदाहरण देइया तिन्हा बै बोलू, शैतान कैण्डे शैताना बै खोली सका सा? 24 अगर कौसी राज्य न फूट पौडली ता सौं राज्य कैण्डे स्थिर रोही सका सा? 25 होर अगर कौसी घोरा न फूट पौडली ता सौं घोर कैण्डे स्थिर बणी रोहणा? 26 शैतान अगर आपणा विरोधी बणिया आपू न फूट पाला ता तेई रा राज्य कैण्डे बणिया रोही सका सा? तेइरा ता अन्त नी होणा? 27 कोई भी माणहु कोई तकडै माणहु रें घोरा ना जाईया चोरी नी केरी सकदा, जैबै तक कि सौं तेई माणहु बै बोनिया नी रखला, होर तैबै सौं तेइबै लूटी सका सा। 28 हाँऊ तुसा बै सच्च बोला सा कि माणहु रें बैटै रें सैभ पाप होर बुराई जुणा ते केरा सी माफ़ केरिनै। 29 पर जो कोई पवित्र आत्मै री निन्दा केरला, सौं कदी भी माफ़ नी केरिना, बल्कि सौं हमेशै रें पापा रा दोषी ठहरा सा। 30 किबैकी ते सैभ बोला ती कि तेई आन्ध्रै चेट्ट री आत्मा सा।

### यीशु री आमा होर भाई

31 तैबै तेईरी आमा होर भाई आए, होर बाहरें खड़े होईया सौं शदाऊ। 32 होर भीड़ तेई रें आसै-पासै बैठी ती, होर तिन्है तेइबै बोलू, हेर, तेरी आमा होर तेरें भाई तौभे बाहरें तोपदै लागे सी। 33 यीशुऐ तिन्हा बै जवाब धिना कि, "मेरी अमा होर भाई कुणा सी?" 34 होर जुणा लोका तेइरें आसै-पासै बैठे ती तिन्हा धिरें हेरिया बोलू, "हेरा, मेरी आमा होर भाई ए सी।" 35 किबैकि जुण परमेश्वरें री इच्छा पेंधे चला सा सौंहे मेरा भाई, बहण होर आमा सा।

### बेजा बाहणु आळें रा उदाहरण

4 यीशु झीलें रें बौद्धा न उपदेश देंदा लागा होर लोकें री एतरी बड़ी भीड़ कटा हुई कि यीशु एकी किस्ती न चढिया बेठे होर लोका झीलें रें बौद्धा न खड़े रोहै। 2 होर सौं उदाहरण देइया तिन्हा बै बोहु सारी गला सिखाँदा लागा होर आपणें उपदेशा न तिन्हा बै बोलू, 3 शुणा, एक बाहु आला, बेजै

बाँहदा निकता। 4 होर बाँहदी घेरें किछ बेजा बौतै री बौद्धा न औलू होर चिडुऐ चुगू। 5 होर किछ बेजा रडखडी जमीना पेंधे शौद्ध होर तेई बेजै बै बढनै री तैइयै बोहु माटा नी मिलू होर डूघा माटा नी मिलणें री वजहा न सौं छेकै निकता। 6 होर जैबै धूपा निकता ता सौं फुकुआ होर पकी जद नी होणें री वजहा न शुक्। 7 होर किछ बेजा झोकडा मौँझे शौद्ध होर सौं झोकडै लाइया पौथुआ होर कोई फ़ौल नी लागे। 8 पर किछ बेजा शोभली धौरती पांधे पाए होर बहडे, होर बड़िया फौळ धिन्ने, कोईये तिह गुणा, होर कोईये शौउ गुणा फौळ धिन्ना। 9 तैबै तेइयै बोलू, "जुणी हागें शुणनै री तैइयै कोन सी, ते शुणलै।"

### दृष्टांता रा उदेश्य

10 जैबै सौं केल्ला रोहू तेइरें चेलें होर सेंघियै ई उदाहरणें रें बारें न पुछू। 11 यीशुऐ तिन्हा बै बोलू, तुसा बै ता परमेश्वरें रें राज्य रें भेदै री समझ धिनी सा, पर बाहरलें लोकें री तैइयै सारी गैला उदाहरणा न होआ सी। 12 ताकि ते हेरिया बी नी हेरलें होर बुझलें नी होर शुणदी घेरें शुणलै बी पर समझलें नी, ऐण्डा नी लोडी हुआ कि पापा न फिरलें होर माफ़ केरिलें।

### बेजा बाहणु आळें उदाहरण

13 यीशुऐ तिन्हा बै भी बोलू, "कि तुसै ई उदाहरणा बै नी समझदै? ता होरा उदाहरण कैण्डे समझणें? 14 बाहणु आला परमेश्वरें रें वचना बै बाहा सा। 15 बौतै रें बौद्धा रा बेजा सौं सा कि जैबै तिन्है वचन शुणू ता शैतान तैबरें तिन्हरें मना न बाहुरे दै वचना बै नेआ सा। 16 होर रडखडी जमीना रा बेजा सौं सा, जुणा वचना बै शुणिया बड़ी खुशी सेंघे ग्रहण केरा सी। 17 पर ये वचना न जड़ नी ढौकणें री बजह न थोडे रोज टिका सी होर जैबै वचना री बजह न कोई दुःख या क्लेश एजा सा ता ते ठोकर खा सी। 18 होर झोकडा न शौद्ध दा बेजा सौं सा, जुणिये वचन शुणू, 19 होर संसारे री चिंता, ढबुरे रा धोखा होर हर किस्मै री चीजा रा लालच तिन्हरें मना न भौरुइया वचना बै दबा सा होर ते फलदै नी। 20 होर शोभली जमीना रा बेजा सौं सा, जुणा वचना बै शुणिया ग्रहण केरा सी होर फौळा सी, कोई तीह गुणा, कोई साठ गुणा, कोई शौऊ गुणा।

### दिऊये रा उदाहरण

21 यीशुऐ तिन्हा बै बोलू, कि दीऐ बै एथे री तक आणा सी कि तेइबे भाँडे या माँजै हेठे रखलै? 22 किबैकि कोई चीज छुपी दी नी आँथी, पर ऊँई री तक सा कि प्रगट होली होर न किछ गुप्त आँथी पर एथे री तक सा कि प्रगट होली। 23 अगर कौसी रें शुणनै रें कोन सी ता सौं शुणला। 24 यीशुऐ तिन्हा बै भी बोली, "होशियार रोहा कि तुसै की शुणा सी। जुणी नापै तुसै नापा सी तेही नापै लाइया तुसरी तैइयै बी नापिणा होर तुसाबै बोहु देइणा। 25 किबैकि जुणि हागें सा तेइबै होर देणा होर जुणि हागें नी आँथी तेइना सौं बी वापस लेइणा जो तेई हागें सा।

### निकलनू आळें बेजे रा उदाहरण

26 यीशुऐ तिन्हा बै बोलू, "परमेश्वरा रा राज्य ऐण्डा सा, जैण्डा कि कोई माहु जमीना न बेजा शेता सा, 27 होर राती बै सुता होर ध्याडी बै जगला होर सौं बेजा ऐण्डा बढू कि तेइबै पता नी चलू। 28 जमीन आपणें आप फ़ौल आणा सा, पैहलै टीरा फुटा सी, तैबै लूडी लागा सी होर तेथा न बाद लूडी न त्यार दाणें। 29 पर जैबै दाणा पौकिया त्यार होआ सा, तैबै सौं दाची ला सा किबैकि काटणें रा बाँगत आऊ सा।

### राई रें दाणें रा दृष्टान्त

30 होर यीशुऐ भी बोलू, "आसै परमेश्वरें रें राज्य री तुलना किजी सेंघे केरनी, होर कुणी उदाहरणा सेंघे तुँई बै दैसी सका सी? 31 सौं राई रें दाणें साही सा; जैबै तेइबै जमीना न बाहा सी ता जमीनै रें सैभी बेजै न होछा होआ सा। 32 पर जैबै सौं बेजा उगा सा ता सैभी सागपाता न बड़ा होआ सा होर

तेथे री शाह्नी एतरी बड़ी होआ सी कि आसमाना न उडनू आलै चिडू तेथा पेंधे रोही सका सी । 33 सौ तिन्हा बै एण्डे बोहू सारै उदाहरण देइया तिन्हरी समझै रै मुताबिक वचन शुणा ती । 34 होर सौ बागैर उदाहरणै रै तिन्हा बै किछ नी ती बोलदा; पर केल्है न सौ आपणै निजी चेलै बै सैभी गैला रा अर्थ दसा ती ।

### तूफाना बै शान्त केरना

35 तेई रोजे जैबै सोन्ह हुई ता तेइयै आपणै चेलै बै बोलू, एजा आसा पारै धिरै बै जाणा। 36 होर तिन्है सौ भीड़ छौड़िया आपू सेंधे किस्ती न नेऊ होर तेई सेंधे बोहू किस्ती ती । 37 तैबै बड़ा भारी बागर ब्याना हुआ होर पाणी रै छलाकै एतरे हुऐ कि किस्ती न पाणि भौरिदा ती । 38 पर सौ आपू किस्ती रै पिछलै हिस्सै ना सोदा लागा ती । तैबै तिन्है सौ बझेऊ होर तेइबै बोलू, “हे गुरु, कि तौभै फिक्र नी आँधी कि आसै नाश होंदै लागै सी?” 39 तैबै तेइयै उठिया बागर ब्याना झिड़कू होर पाणी बै बोलू, “शान्त रौह! होर बागर ब्याना रूकू होर बड़ी शान्ति हुई । 40 होर तिन्हा बै बोलू, “तुसै किबै डौरा सी? कि तुसा बै हाजी तक बशाह नी?” 41 ते बोहू डौरै होर आपू न दुण्णिदै लागै, “ऐ कुण सा कि बागर होर पाणी बी एइरा बोलिया शुणा सी?”

### दुष्टात्मा संघे भौरू होंदे माहणु बै ठीक केरना

5 ते झीलै पार गिरसेनी रै देशा न पुजै। 2 जैबै सौ किस्ती न उतरू ता एक एण्डा माहणु जुणि न चेटू री आत्मा ती, कब्रान न निकलिया एकदम तेई सेंधे मिलू । 3 सौ कब्रान न रौहा ती होर तेइबै कोई बी शाँगीयै लाइया नी ती बोनी सकदा, 4 किबैकि तेइबै बार-बार शाँगीयै लाइया बोना ती होर सौ तिन्हा बै चोडा ती । तेइबै कोई वशा न नी ती केरी सकदा । 5 सौ लगातार रात ध्याड कब्रान न होर ढोंगा न चिलौदा रौहा ती होर आपणै आपू बा पाथरै लाइया घायल केरा ती । 6 सौ यीशु बै हेरिया दूरा न दौडू होर तेइबै प्रणाम केरू। 7 होर जोरा सेंधे चिलाइया बोलू, “हे यीशु नासरी परम प्रधान परमेश्वरै रै बेटै, मेरा त सेंधे की कोम? हाँऊ तौभै परमेश्वरै री कसम देआ सा कि मुँभे कष्ट मत देदा। 8 किबैकि यीशुए तेइबै बोलू ती, “हे चेटू री आत्मा, एई माहू न निकलिया एज।” 9 यीशुए तेइना पुछू, “तेरा नाँ की सा?” तेइयै बोलू, “मेरा नाँ सेना सा; किबैकि आसै बोहू सी ।” 10 होर तेइयै यीशु हागै विनती केरी कि, “आसा बै एई देशा न बाहरै मत भेजदा।” 11 तौखै ढोंगा पेंधे सूंगरा रा एक छुण्ड चौरदा लागा ती । 12 होर तिन्है विनती केरिया तेइबै बोलू, “आसा बै तिन्हा सूंगरा बै भेज कि आसै तिन्हा आन्ध्रै जालै।” 13 तैबै यीशुए तिन्हा बै हुकम केरू होर चेटू री आत्मा निकलिया तिन्हा सूंगरा बै फसी । तेई छुण्डा न लगभग दूई हजार सूंगर ती होर ते झपटिया नौई न पौड़िया मूँरे। 14 तिन्हा बै चारनू आलै भैगिया नगर होर ग्रॉ न दसू होर जेकिछ हुआ ती लोका तुई हेरदै आए। 15 यीशु हागै एजिया तिन्है चेटू फसू दा सौ महुँ झिकडै लाइया होशी न बेठा दा हेरू। ए हेरिया ते लोका डौरै। 16 जुणी लोकै ए घटना हेरी ती तिन्है चेटू आलै महुँ रै बारै न होर तिन्हा सूंगरै रै बारै न तिन्हा बै दसू। 17 तैबै ते यीशु हागै विनती केरदै लागै कि आसरै एरियै न फेटै जा। 18 जैबै सौ किस्ती न चढदा लागा ता, जुणिबे चेटू ती सौ यीशु हागै विनती केरदा लागा कि मुँभे आपू सेंधे रौहणै दै। 19 पर यीशुए तेइबै बोलू, “आपणै घौरा जाइया आपणै लोका बै दस कि त पेंधे दया केरिया प्रभुए तेरी तैइयै कण्डै बड़ै कोम केरै सी । 20 सौ दिकापुलिसा न जाइया एसा गैला रा प्रचार केरदा लागा कि यीशुए मेरी तैइयै कण्डै बड़ै कोम केरै होर सैभै लोका हैरान होआ ती ।

### याईर री मुईन्दी शोहरी होर एक बमार बेटडी

21 जैबै यीशु भी किस्ती न पारै बै नौठा ता लोकै री एक बड़ी भीड़ तेई हागै कठा हुई । यीशु हाजी झीलै रै बौढा न ती कि, 22 याईर नाँ रा एक अराधना घौरा रा प्रधान आऊ होर तेइबै हेरिया तेइरी जोंघा पेंधे पौऊ, 23 होर विनती केरी कि, “मेरी होछी बेटे मौरनू आली सा; तू एजिया तेसा पेंधे हाँथ रख कि सौ ठीक होइया जिन्दी रौहली।” 24 तैबै यीशु तेई सेंधे नौठा; होर लोकै री बड़ी भीड़ तेई पिछै चली होर भीड़ै री वजहा न लोका तेई पेंधे पौडा ती । 25 एक एण्डी बेटडी ती जुणिबै बारा बौषा न लोहू बहणै री बीमारी ती । 26 होर

तेसै बोहू वेयदा न बड़ा दुःख चेरू होर बोहू खचें केरनै न बाद बी तेसाबे कोई फायदा नी हुआ, पर होर बी जादा बीमार हुई ती । 27 सौ यीशु रै बारै न शुणिया तेई पिछै आई होर तेइरै झिकडै छुँगी। 28 किबैकि सौ बोला ती कि, “अगर हाँऊ यीशु रै झिकडै बै छुँगली ता मूँ ठीक होणा।” 29 होर एकदम तेसरा खून बहणा बन्द हुआ होर तेसै आपणी देही न जाणू कि हाँऊ तेसा बीमारी न ठीक हुई सा । 30 यीशुए तुरन्त जाणू कि मूँ न शक्ति निकती सा होर भीड़ा न पिछै फिरिया पुछू, “मेरै झिकडै कुणियै छुँगै?” 31 तेइरै चेलै तेइबै बोलू, “तू हेरा सा कि भीड़ त पेंधे पौडवी लागी सा होर तू बोला सा कि, “हाँऊ कुणियै छुँगू?” 32 तैबै यीशुए तेसा बेटडी हेरनै री तैइयै, जुणियै सौ छुँगू ती चोहू पासै हेरू। 33 तैबै सौ बेटडी आपणी भलाई हेरिया डौरदै-डौरदै होर कोमदै-कोमदै आई होर तेइरी जोंघा पेंधे पौड़िया आपणा सारा हाल शुणाऊ। 34 यीशुए तेसा बेटडी बै बोलू, “बेटी तेरै भरोसै तू ठीक हुई; शोभली तरहै जा होर आपणी एसा बीमारी न बचिया रोह।” 35 यीशु हाजी बोलदा लागा ती कि, अराधना घौरै रै सरदारै रै घौरा न एजिया लोकै बोलू, “तेरी बेटे ता मूँई, एबै गुरु बै किबै दुःख देआ सा?” 36 जे गल ते लोका केरदै लागै ती यीशुए सौ अनसुनी केरिया अराधना घौरै रै सरदारा बै बोलू, “डौरदा मत सिर्फ भरोसा रख।” 37 होर यीशुए सिर्फ पतरस, याकूब होर याकूबा रा भाई यूहन्ना आपू सेंधे नेरे होर कोई नी एणै धिनै। 38 अराधना घौरै रै सरदारै रै घौरा न पुजिया तेइयै लोका बड़ै भारी रोदै हेरै। 39 तैबै यीशुए भीतरै जाइया तिन्हा बै बोलू, “तुसै किबै हला मचा सी होर रोआ सी, शोहरी मूँई दी नी आँधी बल्कि सोदी लागी सा ।” 40 ते सैभै यीशु रा मजाक उड़ादै लागै । तेइयै ते सारै बाहरै खोलै होर शोहरी रै आमा बापू होर आपणै सेंघी सेंघे भीतरै नौठा। 41 होर शोहरी रा हाँथ ढौकिया तेसा बै बोलू, “तलीता कूमी!” जौसरा मतलब होआ सा, “हे शोहरी हाँऊ तौभै बोला सा, उठ।” 42 होर सौ शोहरी एकदम उठिया आँढदी लागी, किबैकि सौ बारा बौषै री ती । तैबै लोका बड़ै हैरान हुऐ । 43 यीशुए तिन्हा बै समझाइया बोलू, “ऐ गल कोहियै नी लोडी जाणी होर एसा बै किछ खाणै बै दैआ।”

### नसरता न यीशु री बेईजती

6 तौखै न निकलिया यीशु आपणै देशा बै आऊ होर तेइरै चेलै बी तेई पिछै नौठै। 2 रामै रै ध्याडै न यीशु अराधना घौरा न उपदेश देदा लागा होर बोहू सारै लोका हैरान हुऐ होर बोलदै लागै, “एइबै ए गैला कौखै न आई? ऐ कुण ज्ञान सा जे एइबै धिना सा? एइरै हाँथे कण्डै सामर्थे रै कोम प्रगट होआ सी?” 3 ऐ सौहै बढई नी आँधी जो मरियमा रा बेटा होर याकूब, योसेस, यहूदा होर शमौना रा भाई सा? कि तेइरी बेहणी आसरै बिचा न नी रौहदी? एसा वजहा न तिन्है तेइरै बारै न ठोकर खाई। 4 यीशुए तिन्हा बै बोलू, “भविष्यत्ता रा आपणै देश, आपणै परिवार होर आपणै घौर छौड़िया होर कोइछै निरादर नी होंदा।” 5 यीशु तौखै कोई सामर्थे रै कोम नी केरी सकू, सिर्फ थोड़ै जेही बीमार लोका पेंधे हाँथ रखिया ते ठीक केरै । 6 यीशु बै तिन्हैरै अविश्वासा पेंधे हैरानी हुई होर सौ सैभी ग्रान न प्रचार केरदा फिरू ।

### बारा चले रा भेजणा

7 यीशुए आपणै बारा चेलै आपू हागै शाधै होर तिन्हा बै दूई-दूई केरिया भेजदा लागा; होर तिन्हा बै चेटू री आत्मा पेंधे हक धिना। 8 यीशुए तिन्हा बै हुकम केरू, “बौतै री तैइयै शोठै रै अलावा होर किछ मता नेंदै, न रोटी, न झोआ, न बटुए न दबुऐ। 9 पर बूट लातू होर दूई-दूई कुरतै मता लाँदै। 10 यीशुए तिन्हा बै बोलू, “जुणी घौरा बै तुसै जालै तौखै तैबै तक रुकिया रौहीत जैबै तक कि तुसै तौखना विदा नी होलै।” 11 जुणी जौगै रै लोका तुसा बै ग्रहण नी केरलै होर तुसरी नी शुणलै, तौखना चलदी घेरै आपणै बूटै रै धूडै बै तुडकेईत ताकि तिन्हा पेंधे गवाही होली। 12 तैबै तिन्है जाइया प्रचार केरू कि आपणै मना बै पाप केरनै न फेरा । 13 होर बोहू सारै लोका न चेटू री आत्मा खोली होर बोहू सारै लोका तिन्हा पेंधे तेल मौइया ठीक केरै ।

### यूहन्ना बपतिस्मा देणु आळै री हत्या

14 होर हेरोदेस राजै यीशु रै बारे न शुणू, किबैकि तेईरा नाँ चोहू पासै फेळू ती, होर तेईरे बोलू कि, यहून्ना बपतिस्मा देणु आला मुएदे ना जिन्दा हुआ सा, तैबे ता तेई ना ए समर्था रै कोम होन्दै लागै सी। 15 होर किछ लोकै बोलू, ए एलिय्याह सा, पर होरिये बोलू, भविष्यद्वक्ता या भविष्यद्वक्ता मौझे कोई सा। 16 हेरोदेसै ए शुणीया बोलू, “जुणी यहून्ने री मैं मुंडी काटणै घाई ती सौहै जिन्दा हुआ सा।” 17 हेरोदेस राजै आपणै भाई फिलिप्पुसै री लाडी हेरोदियासा सेंधे व्याह केरू ती होर यहून्ने तुंई री वजहा न हेरोदेस राजै री निन्दा केरी ती होर हेरोदेसै यहून्ना लोका न ढौकणै घाऊ होर बन्दी घौरा न पाऊ। 18 किबैकी यहून्ने हेरोदेसा बै बोलु ती, कि आपणै भाई री लाडी बै डाहणा तौभे ठीक नी आथी 19 ऐसा बजह ना हेरोदियास तेई ना दुशमणी रखा ती होर सौ यहून्ना बै मरवाणा चाहा ती, पर ऐण्डा नी हुआ। 20 किबैकी हेरोदेस यहून्ना बै पवित्र होर धर्मो माणहु मनीआ डोरा ती, होर तेईबै बचा ती, होर तेईरी शुणीया घबरा ती, पर खुश होइया शुणा ती। 21 होर सही बोके जैबे हेरोदेसे आपणे जन्म धियाडे ना प्रधान, सेनापति होर गलिले रे बडे-बडे लोका बै धाम धीनी। 22 होर तेसा हेरोदियासे री शौहरी भीतरे आई, होर नौचिया हेरोदेस होर तेई रे सेंघी खुश केरे, तैबे राजे शौहरी बै बोलु, तू चाए किछ मुंगली मुं तौभे देणा। 23 होर तेसा सेंघे वाईदा केरू, कि मु आपणे ओधे राज्य ना जै किछ तू मुंगली तौभे देणा। 24 तेसे बाहरे जाईया आपणी आम्मा पूछी कि हाँऊ कि मुगणु? तेसे बोलु, यहून्ना बपतिस्मा देणु आळै रा मुंडी मुंग। 25 सो फट राजे आगे आंधरे आई, होर राजे ना प्रार्थना केरी, कि हाँऊ चाहा सा कि तुसे एभेयहुन्ना बपतिस्मा देणु आरे रा मुंड एकी थालू ना मेरे तेंई मंगा। 26 तैबे राजा बड़ा उदास हुआ, पर आपणै वायदे री बजह सेंघे होर सेंघे बेठेन्दे लोका री बजह ना नां नी केरना चाहा ती। 27 होर राजे फट एक सपाही बै आज्ञा देईया भेजू, कि तेईरी मुंडी काटिया आणा। 28 तेइए जेला ना जाईया तेइरा मुंडी काटी, होर थालू ना पाईया आणु होर शौहरीबै धिना, होर तेसे आपणी आम्मा बै धिना। 29 ए शुणीया तेइरे चले आए होर तेइरी लाश चकिया कन्ना ना रखी।

### चले री बापसी होर सुनसान जैगहा

30 प्रेरिते यीशु आगे कट्टे हुए, होर जै किछ तिनहें केरू ती, होर सिखाऊ ती, सेभ यीशु बै दसु। 31 तैबे यीशुए तिनहा बै बोलु, तुसे जंगला ना एकांत जगह ना जाईया थोड़ा राम केरा, किबैकी बोहु लोका एन्दे-जान्दे रोहा ती, होर तिनहा बै रोटी खाणै रा भी मौका नि ती मिलदा। 32 तैबे ता सो किशती ना बैशिया अलग सुनसान जगह बै नौठे।

### पाँज हजार मर्दा बै खियाणा

33 होर बोहु लोकै सो जांदे भाळे होर पछियाणे, होर सेभ लोका नगरा ना कट्टे होईया पैदल दौडदे लागे होर तिनहा ना पेहले तौखे पूजे। 34 होर यीशुए निकलिया बोहु बडी भीड हेरी, होर तिनहा पांधे दया केरी, किबैकी तै तिनह भेडा बराबर ती जूणीरा कोई फूआल नि होंदा, होर सो तिनहा बै बोहु गल्ला सिखान्दा लागे। 35 जैबे धीयाडा ऊडदा लागे ता तेइरे चले तेई आगे एजीया बोलदे लागे, ए सुनसान जगह सा होर धियाडा भी बोहु हुआ सा। 36 इन्हा बै भेजा कि ए चारे पासे रे ग्रां होर बस्तियाँ ना जाईया आपू बै किछ खाणै बै आणलै। 37 यीशुए तिनहा बै जवाब धिना, कि तुसे इन्हा बै खाणै बै देआ, तिनहें यीशु बै बोलु, आस कि शोऊ दीनारे री रोटी आणीया इन्हा बै खियाणी? 38 यीशुए तिनहा बै बोलु जाईया हेरा कि तुसा आगे कैतरी रोटी सा? तिनहें पता लाईया बोलु, कि पाँज रोटी होर दुई मछली सी। 39 तैबे यीशुए तिनहा बै आज्ञा धीनी, कि सेभी बै होरे गाह पांधे लाईणी ना बशात। 40 ते शोऊ-शोऊ होर पजा-पजा केरिया लाईणी ना बेठे। 41 होर यीशुए ते पाँज रोटी होर दुई मछली होथा ना लेई, होर स्वर्गा धीरे बै हेरिया धन्यावाद धिना, होर रोटीया चोड़ी-चोड़िया चले बै देंदा लागे, कि तै लोका बै बोंडें, होर तै दुई मछली भी तिनहा सेभी ना बोंडी। 42 होर सेभ खाईया रोजै। 43 होर तिनहें

दुकड़े ना भौरुइन्दी बारा टोकरीयां चकी, होर किछ मछली ना भौरुइन्दी भी चकी 44 जूणीए रोटी खाई, तै पाँज हजार मर्द ती।

### यीशु रा पाणी पेन्धे चैलणा

45 फिरि यीशुए फट आपणे चले जबरदस्ती किशती पांधे बशाये, की सो तेई ना पेहले पारे बैतसैदा बै जाल्ले, जाँ तक कि यीशु लोका बै विदा केरलै। 46 होर तिनहा बै विदा केरिया सो ढोगा पांधे प्रार्थना केरदा नौठा। 47 होर जैबे सोन्ह हुई ता किशती झिल्ला मौंझै ती, होर सो केला धोरती पांधे ती। 48 जैबे तेइए हेरू कि सो किशती चलांदे-चलांदे घबराऊरे सी, किबैकी बाग्र उल्टी धीरे बै ती, ता यीशु चौथे पहर रे लगभग तिनह आगे आऊ, होर तिनहा ना आगे जाणा चाहा ती। 49 पर तिनहें तेईबै झिल्ला पांधे होण्डदे हेरिय बुझु, कि ए ता कोई भूत सा, होर सेभ लेरा मारदे लागे, होर घबराऊरे। 50 पर यीशुए फट दुगु होर बोलु, बशाह रखा, हाँऊ सा, डोरदे मता। 51 तैबे सो तिनहा आगे किशती पांधे आऊ, होर बाग्र भी रुकी, होर ते सेभ बडे हैरान हुए। 52 किबैकी ते आपणी बुधि री कमी री बजह ना तिनहा रोटी रे बारे ना नि ती बुझदे।

### गन्नेसरता न बमार माहणु बै ठीक केरना

53 होर ते किशती ना उतरिया, गनेसरता बै नौठे, होर किशती बौडे लाई। 54 होर जेबे सो किशती न उतरे, ता लोकै ते पछियाणीया। 55 आसे-पासे रे देशा ना दौडे, होर जेतरे बमार ती तिनहा सभी बै माँजे पांधे, जौखे सो ती तौखे आपदे रोहे। 56 होर जोखै-जौखे सो ग्रां, नगरा या बस्ती ना जा ती, ता लोका तौखे बमारा बै बजारा ना रखिया तेइना प्रार्थना केरा ती, कि ते तिनहा बै आपणै झिकडै केले छुंगणै दे, होर जेतरे तेई रे झिकडै छुंगा ती, सेभ ठीक होआ ती।

### रीती -रिवाज मैणु आळै पेन्धे सवाल

7 तैबे किछ फरीसी होर धर्मशास्त्री जे कि यरुशलेमा न आरे ती यीशु हागै कठा हुए। 2 तिनहें हेरू कि तेइरै चेलै हौथ धोए बगैर रोटी खाँदें लागै सी। 3 किबैकि आपणै बजुर्गे री रीति रै मुताबिक फरीसी होर यहूदी शोभली तरहै हौथ धोए बगैर रोटी नी ती खाँदें। 4 होर बजारा न एणै न बाद ते रोटी खाणे न पैहिले हौथ धोआ ती। एण्डी होरा 5 एता केरिया इन्है फरीसी होर धर्मशास्त्रिये यीशु न पुछू, “तेरे चेलै बजुर्गे री रीति बै किबै नी मँनदें? बल्कि हौथ धोए बगैर रोटी खा सी।” 6 यीशुए तिनहा बै बोलु, की यशायाह भविष्यद्वक्ते तुसा बेईमाना रे बारे ना ठीकसा भविष्यदवाणी केरी, जेण्डा लिखू सा, ए लोका मुहाँ ना ता मेरा आदर केरा सी, पर इन्हा रे मन मुं ना दूर सी। 7 होर ए मेरी उपासना व्यर्थ केरा सी किबैकि ए लोका बै माहूए बणाई दी रीती बै धर्म नियमै रै रूप न सिखा सी। 8 तुसै परमेश्वरै रै हुकम छौड़िया माहूए बणाई दी रीति रा सहारा लेंदें लागै सी। 9 यीशुए तिनहा बै बोलु, “तुसै परमेश्वरै रै हुकम चोड़नै न बडै माहिर हुए सी ताकि तुसे आपणी रीति बै मनवालै।” 10 उदाहरणै री तेंइयै मूसै बोलू, “आपणै आमा-बापू रा आदर केरा होर जुण आपणै आमा-बापू बै बुरा बोलला, सौ मोऊती री सजा रा हकदार सा।” 11 पर तुसै बोला सी कि अगर कोई माहू आपणै आमा-बापू बै बोला सा कि मेरी जुणि चीजा न तुसा बै लाभ होई सका ती सौ मैं परमेश्वरा बै भेंट केरी सा, 12 ता तेई बोक्ता ना बाद तुसे तेई बै आपणै आम्मा या बापू री किछ भी सेवा नी केरने देंदें। 13 एण्डी तरहे तुसे आपणै बणाएदे रीति रुअजा री बजह ना; परमेश्वरा री आज्ञा बै टाळा सी, होर भी एण्डे बोहु कौम सी

### माहणु बै अशुद्ध केरणु आळी गैला

14 होर यीशुए लोका आपू आगे बै शाधे होर बोलु, तुसे सेभ मेरी शुणा, होर समझा। 15 एण्डी कोई चीज नी आँथी जो बाहरा न माहू भीतरै जाइया तेइबै अशुद्ध केरली, बल्कि जे चीजा माहू रै भीतरै न बाहरै एजा सी, ते माहू बै अशुद्ध केरी सका सी। 16 जूणी रे शुणनु आए कौन सी, ता तै शुणा। 17 जैबे यीशु भीडै रै लोका बै छौड़िया घौरा भीतरै नौठा ता तेइरै चेलै यीशु न एई उदाहरणा रा मतलब पुछू। 18 तैबे यीशुए चेलै बै बोलू, “कि तुसै किछ बी नी

समझें?" कि तुसै नी हेरदै कि कोई बी चीज जे किच्छ माहू भीतरै जा सा सौ तेई माहू बै अशुद्ध नी केरी सकदी। तैबे यीशुऐ चेलै बै बोलू, "कि तुसै किछ बी नी समझै?" कि तुसै नी हेरदै कि कोई बी चीज जे माहू भीतरै जा सा सौ तेई माहू बै अशुद्ध नी केरी सकदी। 19 किबैकि सौ तेइरै दिला नी बल्कि तेइरै पेटा बै जा सा हार पखानै न होइया बाहरै निकला सा। 20 यीशुऐ बोलू, "माहू रै भीतरा न जे निकला सा, सौ माहू बै अशुद्ध केरा सा। 21 किबैकि माहू रै दिला आन्ध्रै न बुरै विचार, बुरै कोम, चोरी केरना, खून केरना, 22 व्यभिचार, लालच, दुष्टता, छल कपट, ईश-निन्दा, चुगलखोरी, घमण्ड हार मूर्ख विचार बाहरै एजा सी।" 23 ए सारी बुरी गैला भीतरै न एजा सी हार माहू बै अशुद्ध बणा सी।

### सुरुफिनीकी जाति री बेटड़ी रा बशाह

24 तैबे यीशुऐ सौ जेगा छौड़ी हार सूरै रै और-पौरलै प्देशा बै नौठा। तौखे सौ एकी घौरा बै नौठा। सौ नी ती चाँहदा कि तेइरै ऐणै रा कौसी बै पता चलला। पर सौ आपू बै छुपाई नी सकू। 25 एक बेटड़ी जुगि री शोहरी बै चेटू री आत्मा फसी ती यिशु हागै आई हार तेइरी जोंघा पँधै पौई। 26 सौ बेटड़ी यूनानी ती हार सीरिया देश री फिनीकी नाँ री जेगा न पैदा हुई ती। तेसै आपणी बेटी ना चेटू री आत्मा खोलणै री तँइयै यीशु हागै विनती के री। 27 यीशुऐ तेसा बै बोलू, "पहलै शोहरू बै रोजणै दै किबैकि शोहरू री रोटी लेइया कुतै बै देणा ठीक नी आँधी।" 28 तेसे तेइबे जबाब धिना, ऐ ता सच सा प्रभु, तैबे भी कुते होरी रै टेबला हेते रा चूरा खा सी। 29 यीशुऐ तेसा बै बोलू, ऐसा गल्ला री बजह ना जा, तेरी शौहरी ना बुरी आत्मा नौठी। 30 हार तेसे आपणै घौरा एजीया हेरू, कि शौहरी मांजे पांधे सा, हार बुरी आत्मा तेसा आंधरे नज नौठी सा।

### टाऊणै हार हकलाणु आळै माहणु बै ठीक केरना

31 सौ सूर हार सैदा रे देशा ना निकलिया दिकपुलिस देशा ना होईया गलिला री झिल्ला आगे पुजू। 32 हार लोकै एक टाऊणै बै जूण हकला भी ती, यीशु आगे आणीया प्रार्थना केरी, कि आपणै हौथ एई पांधे रख। 33 तैबे यीशुऐ सौ भिडा ना अलग नेउ, हार तेइरी कौना ना गुठी भौरी हार थूक लाईया तेइरी जीभ छुंगी। 34 हार तेइरे कौन खुले, हार जीभे री गौठ भी खुली, सो ऐबे साफ-साफ बोलदा लाग। 35 बोलू, कि कोई आगे हेरित दसदे, पर जेतरा तिन्हा बै ना केरी तेतरा बोहु तिन्हें प्रचार केरू। 36 तैबे यीशुऐ तिन्हा बै हुकम केरू कि कौसी बै किछ हेरीत दसदै पर तेइयै लोका बै जेतरा रोकणा चाहू तिन्है ऐ गल तेतरी जादा फैलाई। 37 लोका हैरान होइया बोलदै लागै, "यीशु जे केरा सा, भला केरा सा। ओखे तक कि सौ टाऊणै बै शुणनै री शक्ति देआ सा हार नँडै बै बोलणै री।

### चार हजार माहणु बै खियाणा

8 तिन्हा ध्याडै न दूजै मौके न लोकै री एक बडी भीड कठा हुई। तिन्हा हागै खाणै बै किछ नी ती आँधी। यीशुऐ आपणै चेलै शोधै हार तिन्हा बै बोलू, 2 "मुँभे इन्हा लोका पँधे दया एन्दी लागी सा किबैकि इन्हा लोका बै मुँ सँधे त्रा ध्याडै हुऐ सी हार इन्हा हागै खाणै बै किछ नी आँधी, 3 अगर हाँऊ इन्हा बै भूखा घौरा बै भेजा सा ता इन्हा बौता न बेहोश होणा हार किछ ता बोहू दूरा न आऐ सी।" 4 तेइरै चेलै जवाब धिना, "एई जंगला न इन्हा बै ख्याणै री तँइयै एतरा भोजन कौखना मिली सका सा?" 5 यीशुऐ तिन्हा न पुछू, "तुसा हागै केतरी रोटी सी?" तिन्है जवाब धिना, "सौत रोटी।" 6 तैबे तेइयै तिन्हा बै धौरती बेशणै रा हुकम केरू हार आपणै चेलै ते सौत रोटी मुँगी, परमेश्वरा रा धन्यवाद केरू हार रोटी चोड़िया आपणै चेलै बै बोंडणै री तँइयै धिनी हार तिन्है चेलै ते भीडै रै लोका न बोंडी। 7 तिन्हा हागै किछ होछी मैच्छी बी ती, यीशुऐ धन्यवाद केरिया तिन्हा बोंडणै बै बी बोलू। 8 लोकै रौजद तक रोटी खाई हार तिन्है बैचै दै टुकड़ै री सौत टोकरी भौ री। 9 तौखे कोई चार हजार मर्द ती। तैबे यीशुऐ ते विदा केरै।

### फरीसी द्वारा स्वर्गा री नशाणी री मांग

10 तैबे यीशु फट किस्ती न बेशिया दलमनूता ज़िलै बै नौठा। 11 तैबे फरीसी लोका आऐ हार यीशु न प्रश्न पुछदै लागै, तिन्है यीशु बै स्वर्गीय चिन्ह प्रगट केरनै बै बोलू। तिन्है ऐ यीशु री जाँच केरनै री तँइयै बोलू ती। 12 तैबे यीशुऐ लोमा शाह लेऊ हार बोलू, "एसा पीढ़ी रै लोका चिन्ह चमत्कार किबै चाहा सी? इन्हा बै कोई चिन्ह नी देइणा।" 13 तैबे सौ तिन्हा बै छौड़िया वापस किस्ती बै आऊ हार झीला पारा बै नौठा।

### फरीसी हार हेरिदेसा रा खमीर

14 चले रोटी नेणा बिसरी, हार किश्ती ना तिन्ह आगे सिर्फ एके रोटी ती। 15 यीशुऐ तिन्हा बै चेतावनी देइया बोलू, "होशियार! फरीसी हार हेरोदेसै रै खमीरा न बचिया रौहा।" 16 आसा हागै रोटी नी आँधी, ते आपू न विचार केरदै लागै। 17 ते की लागै सी बोलदै, ऐ जाणिया यीशुऐ तिन्हा बै बोलू, "रोटी नी होणै रै बारै न तुसै किबै लागै सी सोच-विचार केरदै? कि तुसै हाजी बी नी समझदै? कि तुसरी बुद्धि एतरी जढ हुई सा? 18 तुसरी आँछी सी, कि तुसै हेरी नी सकदै? तुसरे कोन सी, कि तुसै शुणी नी सकदै? कि तुसा बै याद नी? 19 कि जैबे मैं पाँज झार माणहु बै पाँज रोटी चोड़ी ती ता तुसै दुकड़ै ना भौरिया केतरी टोकरियाँ चकी ती? तिन्हें तेइबे बोलू, बारा टोकरियाँ। 20 "हार जैबे मैं चार हजार माहू री तँइयै सौत रोटी रै टुकरै केरै ती ता, तुसै केतरी टोकरीभौरिया चेकी ती?" तिन्है बोलू, "सौत टोक री।" 21 यीशुऐ तिन्हा बै भी बोलू, "कि तुसै हाजी बी नी समझै?"

### बैतसदा न एक काणै माहणु बै ठीक केरना

22 तैबे ते बैतसदा बै आऐ। तौखे किछ लोकै एक काणा माहू यीशु हागै आणू हार तेई हागै प्रार्थना केरी कि सौ तेई काणै माहू बै छुँगला। 23 यीशुऐ तेई काणै माहू रा हौथ ढौकू हार स ग्राँ बाहरै नेऊ। यीशुऐ तेई काणै माहू री आँछी पँधे थुकू, आपणै हौथ तेई पँधे रखै हार तेइना पुछू, "तौ ना किछ हेरिया सा?" 24 तेइयै उझै हेरिया बोलू, "मुँ ना किछ लोका हेरिदै लागै सी। ते औरै-पौरै चैलदै बूटै साही लागदै लागै सी।" 25 जैबे यीशुऐ तेइरी आँछी पँधे दुजी बार आपणै हौथ रखै ता तेई माहूऐ आपणी आँछी पूरी खोली हार तेइना सबकिछ साफ-साफ हेरिदा लाग। 26 तैबे यीशुऐ सौ घौरा बै भेजू हार बोलू, "ग्राँ बै हेरी जाँदा।"

### पतरसा रा यीशु मसीह बै अपनाणा

27 तैबे यीशु हार तेइरै चेलै फिलिप्पी रै औरलै-पौरलै ग्राँ बै नौठे। बौता न यीशुऐ आपणै चेलै न पुछू, "लोका की बोला सी कि हाँऊ कुण सा?" 28 चेलै जवाब धिना, "बपतिस्मै देणू आला यूहन्ना, पर किछ लोका तौभे एलिय्याह बोला सी हार किछ लोका बोला सी कि ऐ भविष्यवक्ता न कोई एक सा।" 29 तैबे यीशुऐ तिन्हा न पुछू, "हार तुसै की बोला सी कि हाँऊ कुण सा?" पतरसै जवाब धिना, "तू मसीह सा।" 30 तैबे यीशुऐ तिन्हा बै चिताउणी धिनी कि ते यीशु रै बारै न कौसी बै नी दसलै।

### आपणी मौऊती रै बारै न यीशु री भविश्यवाणी

31 हार यीशुऐ तिन्हा बै समझाणा शुरु केरू, "माहू रै बेटै बै बोहू दुःख चकणा पौडू हार बुजुर्ग, प्रधान याजक हार धर्मविधि जाणनू आलै स नकारना हार तेइरी बेइजती केरनी हार स पक्का मारिना हार तेई त्रिजै ध्याडी मुँएँदै न जिन्दै होणा।" 32 यीशुऐ आपणै चेलै बै ऐ साफ-साफ दसू। तैबे पतरसै यीशु एकी धिरै नेऊ हार तेइबै झिडकदा लाग। 33 पर यीशुऐ पिछै मुड़िया आपणै चेलै पँधे नजर पाई हार पतरसा बै फटकारिया बोलू, "शैतान मुँ न दूर हो, तू परमेश्वरै री गैला रा भरोसा नी रखदा बल्कि माहू री गैला पँधे भरोसा रखा सा।"

### यीशु पीछे चलणें रा मतलब

34 तैबें यीशुए चेलें समेत लोके री भीड़ बी आपू हागें शाधी होर बोलू, "अगर कोई मूँ पिछे एणा चाहा सा ता स आपणा सैभ किछ छोड़ला होर आपणा क्रूस चेरिया मूँ पिछे एला।" 35 किबैकि जुण आपणी जिनंदगी बें बचाणा चाहा सा, तेई स गवाणी होर जुण मेरी तैइयें होर मेरें शुभ सँदेशै री तैइयें आपणी जिनंदगी देला तेईरी जिनंदगी बचणी। 36 अगर कोई आपणी आत्मा रा नाश केरिया सारें संसारा बें प्राप्त केरा सा ता तेता रा की फायदा? 37 किबैकि कोई बी माहू कौसी चीजें रें बदलें जिनंदगी नी पाई सकदा। 38 अगर कोई एसा व्यभिचारी होर पापी पीढ़ी न मेरें नाँ न होर मेरें वचना न शर्मिया सा ता माहू रें बेटे बी, जैबें सौ पवित्र स्वर्गदूता सँघें आपणें परमेश्वरें री महिमा समेत एला ता तेई बी तिन्हा माहू न शर्मिणा।

9 यीशुए तिन्हा बें बोलू, "हाँऊ तसाबें सच बोला सा, औखें जो खडै सी, तइन्हा न किछ एण्डे सी तिन्हा परमेश्वरें रें राज्य शक्ति सँघें एन्दा हेरें बगैर मोऊती रा महसूस नी केरना।"

### यीशु रा रूप बदलना

2 छौह रोजा बाद यीशु पतरस, याकूब होर यूहन्ना सँघें एकी उथडें ढोंगा पँधें नौठा। तौखें तिन्हा सामनें यीशुए आपणा रूप बदलू। 3 तेइरें झिकडें एकदम शेतें होइया चमकदें लागे। धोरती ना कोई बी धोबी झिकडें बें धोइया एतरें चमकदार नी केरी सकदा। 4 भविष्यक्ता एलिय्याह होर मूसा बी प्रकट हुए। ते यीशु सँघें गैला केरदें लागे ती। 5 तैबें पतरसें यीशु बें बोलू, "हे गुरु ए केतरा शोभला सा कि आसैं औखें सी। आसाबें त्रा मण्डप बणाणें दै, एक तेरी तैइयें, एक मूसै री तैइयें होर एक एलिय्याह री तैइयें।" 6 पतरसें ए एथे री तक बोलू किबैकि तेइबें किछ बी समझ नी ती लागा दा एन्दा कि की बोलला। ते बोहू डोरें ती। 7 तैबें एकदम ते एकी बादलें घेरें होर बादला ना ए आकाशवाणी हुई, "ए मेरा प्यारा बेटा सा एइरी शुणा।" 8 होर जैबें तिन्हें चोहू पासैं हेरू ता तिन्हें आपू सँघें सिर्फ यीशु हेरू होर कोई नी। 9 ढोंगा ना उतरदी बार यीशुए तिन्हा बें आज्ञा धिनी कि, "जैबें तक माहू रा बेटा मूँएदें ना जिनंदा नी होला तैबें तक जेकिछ तुसैं हेरू कौसी बें हेरीतू दैसदें।" 10 तिन्हें ए गल आपणें मना ना रैखी पर ते सोच-विचार केरदें लागे कि मूँएदें ना जिनंदे होणें रा की मतलब सा? 11 तैबें तिन्हें यीशु ना पुछू, "धर्मविधि जाणनू आलैं किबें बोला सी कि एलिय्याह भविष्यक्ता पैहिलें एणा निर्धारित सा?" 12 यीशुए तिन्हा बें बोलू, "हाँ, सैभी गैलें री ठीक व्यवस्था केरनै री तैइयें एलिय्याह पैहिलें एणा। पर माहू रें बेटे रें बारें न ए किबें लिखुआ सा कि तेइबें बोहू दुःख झेलणा पौड़ना होर बड़जत केरिना। 13 पर हाँऊ तुसा बें सच बोला सा, कि एलिय्याह ता आऊँदाए सा, होर जै किछ तेई रें बारें ना लिखू ती, तिन्हें जै चाहू तेंढा केरू।

### दुष्टात्मा सँघे भौरू होंदे शोहरू बें ठीक केरना

14 होर जैबें सो चले आगे आऊ, ता हेरू कि तिन्हा रें चारे पासे बडी भीड़ लागी सा होर शास्त्री तिन्हा सँघे बैहस बाजी केरदें लागे सी। 15 होर यीशु बें हेरिया सैभ लौका हैरान हुए, होर तेई री धीरे टोर मारिया तेई बें नमस्ते केरी। 16 तेई ए तिन्हा ना पुछू कि तुसे इन्हा सँघे कि बैहस केरा सी? 17 भिडा ना ऐकी माणहुए बोलू, कि ओ गुरु जी, मैं आपणा शौरू जूणी न बुरी आत्मा सा तो आगे बें आणु ती। 18 जोखे भी सो आत्मा तेई बें ढोका सा, तौखे धोरती लोमा पा सा, होर मुंहा ना झाग खोला सा, होर दोंद पिशा सा, होर शुकदा लागा सा, मैं तेरे चले बें खोलणें बें बोलू, पर तिन्हा ना नी निकती। 19 ए शुणीया यीशुए तिन्हा बें जबाब धिना, हे अविश्वासी लौको, कदी तक मुं तुसा सँघे रोहणा? होर कदी तक तुसा री दाह सहन केरनी? तेईबें मुं आगे आणा। 20 तेबे तिन्हें सो शौरू यीशु आगे आणु, होर जैबें तेइए सो हेरू, ता तेसे आन्वे फट सो मरोड़ीया धोरती पांधे शेटू, होर मुंहा ना झाग निकलिया जांदा रोहू। 21 यीशुए तेई रें बापू ना पुछू, कि ऐई रा ए हाल कदी ना औरू सा। 22 तेईए बोलू कि बचपना ना, बुरी आत्मे ए शौरू नाश केरने री तेईए कदी ओगी ना शेटू ता कदी पाणी ना, पर अगर तू किछ केरी सका सा ता, आसा पांधे दया

केर होर आसा रा उधार केर। 23 यीशुए तेई बें बोलू, यदि केरी सका सा, ए तें की गल केरी? बशाह केरनु आए बें सैभ मिला सा। 24 शौरू रें बापूए पफ लेरा मारिया बोलू, ओ प्रभु हाँऊ बशाह केरा सा, मेरी बेबशाही रा किछ उपाय केरा। 25 जैबें यीशुए हेरू, कि लौका री बोहु भीड़ कट्टा लागी होंदी, ता तेईए बुरी आत्मा बें झिडकिया बोलू, हे गूगी होर टाऊणी आत्मा, हाँऊ तौभे आज्ञा देआ सा, कि ऐई शौरू ना बाहरे निकल, होर फिरि कदी भी ऐई आन्धरे मत जांदी। 26 तेबे सो बोहु लेरा मारिया, होर बोहु मरोड़ीया निकती, होर शौरू मुंआदा जै हुआ, कई लौका बोल्दे लागे कि ए ता मुंआ। 27 पर यीशुए तेईरा हौथ ढोकिया सो चकु, होर सो खडा हुआ। 28 जैबें यीशु घौरा बें आऊ, ता तेईरे चले ऐकान्ता ना पुछदे लागे, कि आसे तेसा बुरी आत्मा बें किबे नी खोली सके? 29 यीशुए तिन्हा बें बोलू, कि ए जाति बिना प्रार्थना केरिया होर कोई भी तरीके नी निकलदी।

### आपणी मौऊती रें बारे न यीशु री दबारा भविष्यवणी

30 फिरि तै तौखे ना चौले, होर गलीला ना होईया जांदे लागे ती, होर चाह ती कि कोई भी तेई बें नी पछियाणला। 31 होर सो आपणें चले शिक्षा देआ तीहोर तिन्हा बें बोला ती, कि माणहु रा बेटा माँणहु रें हौथा ढोकीणा, होर तिन्हा सो मकाणा, होर तेई मौरने रें त्रा रोजा बाद जिनंदा होणा। 32 पर ए गल तिन्हा रें समझा ना नी आई, होर तै पुच्छणें ना डोरा ती।

### सैभी न बडा कुण सा

33 तेबे तै कफरनहूमा बें आये, घौरा ऐजीया यीशुए तिन्हा ना पुछू, कि बौता ना तुसे कुणी गला पांधे बैहस केरदें लागे ती। 34 तै चुप रोहे, किबैकी बौता ना तै ऐसा गल्ला पांधे बैहस केरदें लागे ती, कि आसा मौँझे बडा कुण सा? 35 तैबें यीशुए बैशिया बारा रें बारा चले शाधे, होर तिन्हा बें बोलू, अगर कोई बडा होणा चाहा सा, ता सैभी ना होछा होर सेवा केरनू आये बणा। 36 यीशुए एक होछा शौरू तिन्हा मौँझे खडा केरू, होर तेईबें फाडे ना चकिया तिन्हा बें बोलू। 37 जूण कोई मेरे नाँ पांधे एण्डे शौरू बें ग्रहण करा सा, सो मुम्बें ग्रहण करा सा, होर जूण कोई मुम्बें ग्रहण करा सा सो मेरे भेजणु आये बें ग्रहण सा।

### जुण आसा रें खिलापा नेई अथी सौ आसा सँघे सा

38 तेबे यहुन्ने यीशु बें बोलू, ओ गुरु जी, आसे एक माणहु तेरे नाँ न बुरी आत्मा खोलदे हेरू होर आसे तेई बें मना केरदें लागे, किबैकी सो आसा पीछे नेई ऐंदा लागा ती। 39 यीशुए बोलू, तेईबें मना मता केरदें, किबैकी एण्डा कोई नी आथी कि मेरे नाँ न कोई समर्था रा कौम केरी सके, होर फट मेरी बुराई केरला। 40 किबैकी जूण आसारे बरखलाप नी आथी, सो आसा धीरे सा। 41 होर जै कोई तुसा बें एक गलास पाणी रा तुसा बें ए सोचिया पियाला कि तुसे मसीह रें सी ता हाँऊ सच बोला सा कि तेई आपणा बाँडा ( प्रतिफल ) कोई भी तरीके नी खोणा।

### ठोकरा री बजाह बणना

42 पर अगर कोई इन्हा होच्छे मौँझे जूण मुं पांधे बशाह केरा सी बुरा बर्ताव केरला, तेई री तेईरे ए शोभला सा कि एक बडा पोट तेई रें गौला ना बोनीआ, सो समुद्र ना शेटू लोडी। 43 अगर तेरा हौथ तौभे ठोकर खिया सा ता तेई बें काटिया शेट टुंडे होईया स्वर्गा ना प्रवेश केरी। 44 तेरे तेईये ए शोभला सा कि दुई हौथ होन्दे नरक मौँझे तेसा औगी ना पाऊ लोडी जूण कदी भी नी राहशणें री नी आथी। 45 होर अगर तेरे पैर तौभे ठोकर खिया सा ता तेई बें काटिया शेट। 46 लंगड़ा होईया तेरे तेईये स्वर्गा ना जाणा ऐसा गल्ला ना शोभला सा कि दुई पैर होन्दे तू नरक बें जाला। 47 होर अगर तेरी होच्छी तौभे ठोकर खिया सा ता खोलिया शेट, काणें होईय परमेश्वरा रें राज्य ना पवेश केरना तेरे तेईये शोभला सा कि दुई होच्छी होईया भी तू नरका बें जाला। 48 जौखे तिन्हा रा कीडा नी मौरदा होर औग नी हेशदी। 49 किबैकी हर एक माणहु औगी लाईया लुणा केरीणा। 50 लुण शोभला सा, पर अगर लुणा रा स्वाद बिगडू ता किजी लाईया लुणा केरना? आपू आंधरे लुण रखा होर आपू ना मिली-जुलिया रोहा।

## तलाका रै बारे न यीशु री शिक्षा

10 तेबे यीशु ऊठिया यहूदिया रे देशा ना होर यरदन पारे बै आऊ, होर भीड़ यीशु आगे फिरि भी कड़ा हुई, होर सो आपणै तरीके ना तिन्हा बै शिक्षा देदा लाग। 2 तेबे फरीसी यीशु आगे ऐजिया तेइरी परीक्षा करेने री तेंइये तेई ना पुछदे लागे, लाड़े रा लाड़ी बै छोडणा ठीक सा की नेई? 3 यीशुए तिन्हा बै जबाब धिना, की मूसे तुसा बै की आज्ञा धीनी सा? 4 तिन्हें बोलु, मूसे ता त्यागपत्र लिखणै होर छोडणै री तेंइये आज्ञा धीनी सा। 5 तिन्हा बै बोलु, एन्डा ता नि कि तुस्सा रे कठोर मना री बजह ना मूसे तुसा बै ऐ आज्ञा धीनी। 6 पर ऐसा सृष्टि री शुरुआता ना परमेश्वरे मर्द-बैटडी करिया बणाये सी। 7 ऐसा बजह ना माणहु आपणै आम्मा-बापू बै छोडिया आपणी लाडी संघे रोहणा, होर तिन्हा दुई एक जान होणा। 8 तेबैता सो ऐबे दुई नेई पर ऐके जान सी। 9 जूण परमेश्वरे जोडे सी, तिन्हा बै माँणहु अलग मता करदें। 10 होर घौरा चले इन्हा गल्ला रै बारे ना भी पुछू। 11 यीशुए तिन्हा बै बोलु, जुण कोई आपणी लाडी बै छोडिया होरि संघे व्याह केरला ता सो, पहली लाडी रे बरखलाप व्यभिचार केरा सा। 12 होर अगर लाडी आपणै लाडे बै छोडिया, कोई होरि संघे व्याह केरा सा, ता सो व्यभिचार केरा सा।

## शोहरू बै आशीर्वाद

13 फिरि लौका शुरु बै तेई आगे आणदे लागे, कि तिन्हा पांधे हौथ रखे, पर चले तिन्हा बै डांटदें लागे। 14 यीशुए ऐ सेभ हेरिया झिक्का संघे तिन्हा बै बोलु, शोउरू बै मुं आगे ऐणै देआ, इन्हा बै मता रोकदे, किबैकी परमेश्वरा रा राज्य एण्डे लौका रा सा। 15 हाँऊ तुसा बै सच-सच बोला सा, कि जै कोई परमेश्वरा रे राज्य बै शौरू बराबर नेई अपनाला, सो कदी भी परमेश्वरा रे राज्य ना नेई जाई सकदा। 16 होर तेईए सो फाहडें ना चके, होर तिन्हा बै आशीष धीनी।

## धनी माणहु होर हमेशा री जिन्दगी

17 होर जैबे यीशु बौता ना हौण्डदा लागी, ता एक माणहु ठौर मारदा-मारदा आऊ, होर जाहनु ना बैशिया पुछदा लागी, ओ शोभले गुरु, हमेशा रा जीवन पाणै री तेंईए हाँऊ कि केरनु? 18 यीशुए तेई बै बोलु, तू मुम्बे शोभला किबे बोला सा? कोई शोभला नेई आथी, ऐके सा मतलब परमेश्वर। 19 तू आज्ञा बै ता जाणा सा, खून नी केरना, व्यभिचार नी केरना, चौरी नी केरनी, झूठी गुआही नी देणी, धोखा नी देणा, आपणै आम्मा बापू रा आदर केरना। 20 तेइए यीशु बै बोलु, इन्हा गल्ला बै ता जैबे हाँऊ शौरू ती तेबे ना औरू मंदा लागी सा। 21 यीशुए तेई पांधे आपणी नजरा फेरी, होर तेईबै प्यार केरु होर बोलु, तो ना एकी गल्ला री कमी सा, जा, जै किच्छ तेरा सा तेइबे बैचिया गरीबा ना बौन्द, होर तोभे स्वर्गा ना धन मिलणा, होर एजीया मुं पीछे होण्ड। 22 ऐसा गल्ला ना बाद सो उदास हुआ, होर सो बड़ा दुखी होईया नौठा, किबैकी सो बोहु अमीर ती। 23 यीशुए चारे पासे हेरिया आपणै चले बै बोलु, अमीर माँणहु रा परमेश्वरा रै राज्य ना जाणा कैंदा मुशकल सा। 24 चले तेई री गला ना बड़े हैरान हुए, ऊँई पांधे यीशुए तिन्हा बै भी जबाब धिना, ओ शौरूओ, जूण धन दौलता पांधे बशाह केरा सा, तेई रा परमेश्वरा रे राज्य ना प्रवेश केरना केतरा मुशकल सा। 25 परमेश्वरा रे राज्य ना अमीर माणहु रा प्रवेश केरना ऊँटा रा सूई रे छिन्डे ना निकलना आसान सा। 26 होईया आपू ना दूणदे लागे, तेबे कुणीरा उद्धार होई सका सा? 27 यीशुए तिन्हा धीरे हेरिया बोलु, माणहु ना ता ऐ होई नी सकदा, पर परमेश्वरा ना होई सका सा, किबैकी परमेश्वरा ना सेभ किच्छ होई सका सा। 28 यीशु बै बोलदा लागी, हेर आसे ता सेभ किच्छ छोडिया तो पिच्छे चले सी। 29 यीशुए बोलु, हाँऊ तुसा बै सच बोला सा, कि कोई ऐंडा नी आथी, जूणीए मेरे होर सुसमाचारे री तेंईए घौर या भाई या बैहण या आम्मा या बापू या बाल-बच्चे या छेत छोडें होले। 30 होर एई बोक्त शोऊ गुणा नी मिलला, घौर होर भाई होर बैहण होर आम्मा होर बापू होर बाल-बच्चे होर छेता बै, अत्याचारा संघे होर परलौका ना हमेशा रा जीवन। 31 पर बोहु जूणा पेहले सी, तिन्हा पिच्छे होणा, होर जूणा पिच्छे सी, तिन्हा पेहले होणा।

## आपणी मौऊती रै बारे न यीशु री भविश्यवाणी

32 होर तै यरुश्लेमा बै जांदे-जांदे बौता ना ती, होर यीशु तिन्हा ना आगे-आगे होण्डदा लागी, होर सो हैरान ती होर तेई पीछे-पिच्छे हौंडदे डौरदे लागे ती, तेबे भी सो तिन्हा बारा चले संघे सोए गल्ला दूणदा लागी, जूण यीशु पांधे ऐणु आई ती। 33 कि हेरा, आसे यरुश्लेमा बै जा सी, होर माँणहु रा बेटा महायाजक होर शास्त्री रै हौथा दौकीणा, होर सो तिन्हा तेइबे मौती री सजा शणाणी, होर अन्य जाति रे हौथा ना देणा। 34 तिन्हा तेईरा मजाक उड़ाणा, होर तेई पेन्धे थूकणा, होर तेईबै कोडे मारणै, होर तेईबै मार बजणी, होर त्रीजे रोज जिन्दे होणा 35 तेबे जब्दी रे बेटे याकूब होर यहूने यीशु आगे ऐजिया बोलु, ओ गुरु जी, आसे चाहा सी, कि जै किच्छ आसे तो ना मुंगलै, सो ऐ तू आसा री तेंईए केर। 36 यीशुए तिन्हा बै बोलु, तुसे की चाहा सी कि हाँऊ तुसा री तेंईए केरनु? 37 तिन्हें तेईबै बोलु, आसा बै ऐ दे, कि आसे तेरी महिमा केरने री तेंईए एक तेरे सीधे हौथे एक तेरे उल्टे हौथे बैशला। 38 यीशुए तिन्हा बै बोलु, कि तुसा बै नी पता कि तुसे कि लागे सी मुंगदे? जूण कटोरा हाँऊ पिणु आ सा, तुसे तेईबै पी सका सी? होर जूण बपतिस्मा हाँऊ लेणु आ सा, तुसे लेई सका सी? 39 तिन्हें तेई बै बोलु, आसे केरी सका सी, यीशुए तिन्हा बै बोलु, जूण कौला हाँऊ पीणु आ सा पी सका सी, होर जूण बपतिस्मा हाँऊ लेणु आ सा, लेई सका सी। 40 पर परमेश्वरे जूणी री तेंईए जगह तयार केरी सा, तिन्हा बै छोडिया, होरि कोई बै आपणै सीधे होर उल्टे हौथा बशाणा मेरा कौम नी आथी। 41 ऐ शुणीया बाकि दस याकूब होर यूहन्ना री मीश केरदे लागे। 42 होर यीशुए सो आपू आगे शाधिया बोलु, तुसे जाणा सी कि जूण अन्य जाति रे अधिकारी बुझिया सी, तै तिन्हा पांधे रोभ चला सी, होर तिन्हा मौँझे जूण बडे सी, तिन्हा पांधे अधिकार डाह सी। 43 पर तुसा ना एण्डा नी आथी, पर जै कोई तुसा मौँझे बडा होणा चाहा सा, सो आपणै आपा बै तुसा रा सेवक बणला। 44 होर जै कोई प्रधान बणना चाहा सा, सो सभी रा दास बणला।

## काणै बरतिमाई बै ओछि दान

45 किबैकी माणहु रा बेटा तेबे नी आऊ, कि तेईरी सेवा केरी लोड़ी, पर तेबे आऊ कि सेभी री सेवा केरनी, होर बोहु लौका बै छुड़ाणै री तेंईए आपणी जान देला। 46 होर सो यरीहो ना आये, सो होर तेइरे चले, होर एक बडी भीड़ यरीहो ना निकती ती, ता तिमाई रा बेटा बरतिमाई एक अन्धा भिखारी सडका रे कनारे बैठा ती। 47 ऐ शुणीया कि नासरता रा यीशु सा, लेरा मारी-मारिया जोरा संघे बोलदा लागी, ओ दाऊदे रे बेटेया, यीशु मुं पांधे दया केर। 48 बोहु लौके तेई बै बोलु कि चुप रोह, पर सो होर भी बोलदा लागी, कि ओ दाऊदा रे बेटेया, मुं पांधे दया केर। 49 तेबे यीशुए रुकिया बोलु, एई बै शाधा, तेबे तिन्हें तेई काणै बै शाधिया बोलु, हौसला रख, खडा हो यीशु तौभे शाधा सा 50 तेईए आपणा झिकडा फट शेटू, होर यीशु आगे आऊ। 51 तेबे यीशुए तेई बै बोलु, तू कि चाहा सा कि हाँऊ तेरे तेंई केरनु? काणै माणहुए तेई बै बोलु, ऐ कि हाँऊ हेरनु। 52 यीशुए तेई बै बोलु, जा, तेरे बशाहे तू ठीक केरु, होर सो एकदम हेरदा लागी, होर बौता ना यीशु पिच्छे होण्डदा लागी।

## यरुशलेमा न जीत हासिल

11 जैबेते यरुश्लेमा रे नेडे जैतून दौगा पांधे बैतफगे होर बैतनिय्याह रे नेडे आये, ता तेइए आपणै दुई चले ऐ बोलिया भेजे। 2 कि आपणै सामणै आये ग्रं बै जा, होर तेई ग्रं ना पुजदे तुसा बै एक गधी रा बच्चा जूणी पांधे कोई भी कैधी नि बैठादां, बोनुआंदा मिलणा, तेई बै खोलिया आणा। 3 अगर तुसा ना कोई पुछला, ता बोलित प्रभु बै ऐईरी जरूरत सा, होर तेई सो फट ओखे भेजणा। 4 तिन्हें बै जाईया सो बच्चा दरुआजे आगे चौका ना बोनुआन्दा मिलू, होर सो खोलदे लागे। 5 जूण तौखे खडे ती, तिन्हा मौँझे कोई-कोई बोलदे लागे कि ऐ की केरा सी? 6 तिन्हें जेंडा यीशुए बोलु ती, तेंडा तिन्हा बै बोलु, तेबे तिन्हें सो जाणै धिनै। 7 होर तिन्हें गधी रा बच्चा यीशु आगे आणु, तिन्हें तेई पांधे आपणै झिकडे रखे होर सो तेई पांधे बैठा। 8 होर बोहु लौके आपणै झिकडे बौता ना बछाये, होर कई लौके छेता ना होरि डाली

काटी-कटिया बछाई।<sup>9</sup> होर जै लौका आगे-आगे होर पिच्छे-पिच्छे होंडा ती, जोरे-जोरे बोला ती, कि होशाना, धन्य सो सा जै प्रभु रे नाँ ना एजा सा।  
 10 आसा रे बापू दाऊदा रा राज्य जे ऐन्दा लाग़ा सा, धन्य सा, स्वर्गा ना होशाना।<sup>11</sup> होर सो यरुशलैमा ना पुजिया मंदरा बै आऊ, होर चारे पासे सेभ चीजा हेरिया, तिन्हा बारा चले संघे बैतनिय्याह बै नौठा किबैकी सौन्झ हुई ती।

### बिना फौळारै अन्जीरा रा बूटा

12 दूजे रोज जैबे ते बैतनिय्याह ना निकते, ता तेई बै बडी भूख लागी।  
 13 होर सो दुरा ना अंजीरै रे बूटै बै हेरिया किच्छ पाणै री सोचिया नेडे नौठा, पर तेई बूटै ना पौचे बै छोडिया किच्छ नी मिलू, किबैकी फोला रा बोक्त नेई ती।<sup>14</sup> ऊई पांधे यीशुए बोलु, औजा ना बाद कोई तेरा फोल नी खाला। होर तेईरै चले शुणदे लागे ती।

### मंदिरा न बपारी बै खोलिणा

15 फिरि तै यरुश्लेमा बै आये, होर यीशु मंदरा बै नौठा, होर जै लौका तौखे बेचणै- खरीदणै रा कौम केरदे लागे ती तिन्हा बै बाहरे खोलदा लाग़ा, होर व्यापरी रै मांजे, होर कबूतर बेचणु आए रे मेज उल्टे केरे।<sup>16</sup> होर मंदरा ना होईया कोई बै भांडे लेईया ऐणै-जाणै नि धिना।<sup>17</sup> तैबै यीशुए शिक्षा देंदी घेरै तिन्हा बै बोलू, “कि शास्त्रा ना ऐ नी लिखू दा, मेरा घोर सैभी जाति रै लोकै री तैइयै प्रार्थना रा घौर होणा?” पर तुसै स ‘चोरा रा आडा बणाऊ सा।’  
 18 जैबै प्रधान याजक होर धर्मविधि जाणनु आलै ऐ शुणु ता ते यीशु बै मारनै री कोई तरकीब सोचदै लागै किबैकि भीडे रै सैभै लोका तेइरै उपदेशा ना हैरान ती। किबैकि ते तेई ना डौरा ती।<sup>19</sup> जैबै सोझ हुई ता ते नगरा ना बाहरै निकतै।

### शुकंदे अन्जिरा रै बूटे न शिक्षा

20 जैबे दौती उठिया सो तौखे ना जांदे लागे,<sup>21</sup> तैबै पतरसै याद केरदै यीशु बै बोलू, “हे गुरु, हेर! जुणी अंजीरै रे बूटै बै तै श्राप धिना ती स शुक सा!”  
 22 यीशुए तिन्हा बै जवाब धिना, “परमेश्वरा पैंधे भरोसा रखा।<sup>23</sup> हाँऊ तुसाबै सच बोला सा, अगर कोई एई दोग़ा बै ऐण्डा बोलला, ‘तू उखड़िया समुद्रा ना पौड़ होर तेइरै मैना ना कौसी किस्मा रा शक नी होला होर पक्का भरोसा होला ता तेइरी तैइयै तैण्डाए होणा।<sup>24</sup> हाँऊ तुसाबै दसा सा कि तुसै प्रार्थना ना जेकिछ मुंगलै होर भरोसा केरले ता स तुसाबै मिलू होर तुसरा हुआ सा।  
 25 होर जैबै तुसै प्रार्थना केरदै खडै होआ सी होर तुसाबै कोई ना किछ गिला-शिकवा सा ता तेइबै माफ केरा ताकि स्वर्गा रा परमेश्वर तुसरै पापै री तैइयै तुसाबै माफ केरला।<sup>26</sup> अगर तुस्सै माफ नी केरले ता तुस्सारा पिता जो स्वर्गा न सा, तेई भी तुस्सरै पाप माफ नी केरने।

### यीशु रै अधिकारा पेन्धे सवाल

27 तैबै ते यरुशलैमा बै वापस आए। जैबै यीशु मन्दिरा ना टैहलदा लाग़ा ती ता प्रधान याजक होर धर्मविधि जाणु आलै होर बुजुर्ग यहुदी नेता यीशु हागै आए।<sup>28</sup> होर बोलू, “तू इन्हा कोमा बै कुणी हका सैंधे केरा सा? इन्हा केरनै रा हक तौभै कुणियै धिना?”<sup>29</sup> यीशुए तिन्हा बै बोलू, “हाँऊ तुसा ना एक प्रश्न पुछा सा, अगर तुसै मुँभे जवाब धिना ता मूँ तुसाबै दसणा कि हाँऊ इन्हा कोमा बै कुणी हका सैंधे केरा सा।<sup>30</sup> जुणु बपतिस्मा यूहन्ना देआ ती सौ तेइबै परमेश्वरा ना मिलू ती कि माहू ना? मुँभे जवाब दैआ।”<sup>31</sup> ते यीशु रै प्रश्ना पैंधे आपू ना विचार केरदै लागै कि, “अगर आसै बोला सी कि परमेश्वरा ना मिलू तै एई आसा ऐ बोलणा कि तुसै तेइरा विश्वास किबै नी केरदै? <sup>32</sup> तैबै तै आपू ना सोच-विचार केरदै लागे कि अगर आसे बोलु, कि स्वर्ग धीरे ना, ता एई बोलणा, कि तेबे तुसे बशाह किबे नी केरु <sup>33</sup> तैबै तिन्हा यीशु बै जवाब धिना, “आसै नी जाणदै।” तैबै यीशुए तिन्हा बै बोलू, “मूँबी तुसाबै नी दसणा कि हाँऊ इन्हा कोमा बै कुणी हका सैंधे केरा सा।”

### दुष्ट किसाना रा उदाहरण

12 यीशु पठाउणी ना तिन्हा बै बोलदा लाग़ा, “एकी माहूए अँगूरा रा एक बगीचा लाऊ हो तेई बगीचै रे चोहू पासे दीवार खड़ी के री। तैबै अँगूरा रा रस खोलणै री तैइयै एक कुँआ बणाऊ होर किसाना बै किराए पैंधे देइया यात्रा केरदा निकता।<sup>2</sup> तैबै अँगूर पौकणै रै मौसमा ना तेइयै तिन्हा हागै आपणा एक दास भेजू ताकि स बगीचै रै अँगूरा रा हिसा आणला।<sup>3</sup> पर तिन्हा किसानै ढौकिया तेई दासै री पिटाई केरी होर सौ खाली हाँथ वापस भेजू।<sup>4</sup> तेइयै एक होर दास तिन्हा हागै भेजू। तिन्हा तेइरी मुण्डी ना बाहिया तेइरा बुरी तरहा अपमान केरु।<sup>5</sup> तेइयै तैबै एक होर दास भेजू होर तिन्हा तेइरा खून केरु। तेइयै ऐण्डे कई होर दास बी भेजै होर तिन्हा तिन्हरी पिटाई केरी होर केतरै तिन्हा जानियै मकाए।<sup>6</sup> ऐबै ऐके रोहु ती, जूण तेइरा प्यारा बेटा (शौहर) ती, होर सेभी ना बाद तेइये ऐ सोचिया आपणा बेटा भेजू की तै मेरे बेटे री ता इजत केरले।<sup>7</sup> तिन्हा किसानै एकी होरी बै बोलू, “ऐ ता तेइरा वारिस सा। एजा आसा ऐ मारना होर आसा वारिस होणा।<sup>8</sup> होर तिन्हा स ढौकिया मारु होर जानियै मकाइया बगीचै बाहरै शेदु।<sup>9</sup> ऐबै अँगूरै रै बगीचै रै मालका की केरना? तेई एजिया ते किसान मारनै होर बगीचा होरी बै देणा।<sup>10</sup> कि तुसै शास्त्रा रा स वचन नी पौदू: ‘स पाथर जो कारीगिरै बेकार मैनु, सौहै कुणै रा पाथर बैणु।’<sup>11</sup> ऐ प्रभुए केरु जो आसरी नजरी ना अद्दुत् सा।<sup>12</sup> तिन्हा ऐ समझू ती कि यीशुए ऐ तिन्हा रै खिलाफ़ बोलु होर ते यीशु बै बन्दी बणाणै री तरकीब सोचदै लागै पर ते लोका ना डौरा ती होर तेइबै छोड़िया भैगै।

### केसरा बै कर्ज देणा

13 तैबै तिन्हा किछ फरीसी होर हेरोदी लोका यीशु बै गैला ना फसाणै री तैइयै तेई हागै भेजै।<sup>14</sup> तिन्हा एजिया यीशु बै बोलू, “गुरु, आसै जाणा सी कि तू बड़ा ईमानदार सा होर एसा गैले री किछ बी परवाह नी केरदा कि लोका की सोचा सी। किबैकि तू माहू रै रूतवै पैंधे ध्यान नी देंदा बल्कि प्रभु रै बारे ना सैची शिक्षा देआ सा। आसा बै दस कैसर राजै बै कर देणा सही सा कि नी?”<sup>15</sup> यीशुए तिन्हरी चाल समझी। तेइयै तिन्हा बै बोलू, “तुसै मुँभे किबै परखा सी? चाँदी रा एक सिक्का आणा ताकि हाँऊ तेइबै हेरनु।”<sup>16</sup> तिन्हा एक सिक्का आणु। तैबै यीशुए तिन्हा ना पुछू, “एथा पैंधे कौसरा ना होर फोटू सा?” तिन्हा बोलू, “कैसरा रा।”<sup>17</sup> तैबै यीशुए तिन्हा बै बोलू, “जो कैसरा रा सा, तेई कैसरा बै दैआ होर जो परमेश्वरा रा सा तेई परमेश्वरा बै दैआ।” तैबै ते हैरान हुरै।

### जिन्दा होणा होर ब्याह

18 तैबै किछ सदूकी जो पुनरुत्थाना बै नी मैनदै यीशुए हागै आए होर तिन्हा तेइना पुछू,<sup>19</sup> “हे गुरु, मूसै आसरी तैइयै लिखू सा कि अगर कौसी रा भाई मौरला होर तेइरी लाडी रै कोई बच्चा नी होला ता तेइरा भाई तेसा सैंधे ब्याह केरिया आपणै भाई रै वंशा बै बढाला।”<sup>20</sup> एक बारकी गैल सा कि सौत भाई ती। सैभी ना बडै भाइयै ब्याह केरु होर बगैर औलादै रै मूँआ।<sup>21</sup> तैबै दूजै भाइयै तेसा बेटडी सैंधे ब्याह केरु पर सौ बी बगैर औलादै रै मूँआ। त्रिजे भाइयै बी तैण्डाए केरु।<sup>22</sup> सौतै भाई बगैर औलादै रै मूँए होर सौ बेटडी बी मूँई।<sup>23</sup> जैबै ते लोका भी ज़िलै ता आसा बै दस कि स बेटडी कौसरी लाडी होणी? किबैकि तिन्हा सौतै भाइयै सौ आपणी लाडी रैखी ती।”<sup>24</sup> यीशुए तिन्हा बै बोलू, “तुसै न ता शास्त्रा बै जाणदै होर न परमेश्वरै री शक्ति बै। एसा वजहा न तुसै भटकै सी।<sup>25</sup> किबैकि जैबै ते लोका मूँएदै ना जिन्दै होले ता तिन्हा ब्याह नी होणा, बल्कि तिन्हा स्वर्गदूता साही स्वर्गा ना होणा।<sup>26</sup> मूँएदै रै जिन्दै होणै रै बारे कि तुसै मूसै री कताबा ना जे लिखू सा नी पौदू: तौखे परमेश्वरै मूसा बै बोलू ती, ‘हाँऊ इब्राहीमा रा परमेश्वर सा, इसहाका रा परमेश्वर सा होर याकूबा रा परमेश्वर सा।’<sup>27</sup> सौ मूँएदै रा नी बल्कि जिन्दै रा परमेश्वर सा। तुसै लोका बोहू बडी भूला ना पौडै सी।

### सेभी न बडी आज्ञा

28 तैबै एक यहूदी धर्मशास्त्री आऊ होर तेइयै ते वहस केरदै शुणै। ऐ हेरिया कि यीशुऐ तिन्हा बै केण्डै शोभली रीतियै जवाब धिना, तेइयै यीशु बै बोलू, “सेभी ना जरूरी हुकम कुण सा?” 29 यीशुऐ तिन्हा बै जबाब धिना, सेभी आज्ञा ना मुख्या आज्ञा ऐ सा, हे इस्राएल शुण, प्रभु आसा रा परमेश्वर ऐके सा। 30 होर तु प्रभु आपणै परमेश्वरा सेधै आपणै सारे मना सेधै होर आपणै सारै प्राणा, होर आपणी सारी बुद्धि सेधै होर आपणी सारी शक्ति सेधै झुरी रखा। 31 होर दूजी ऐ सा, कि तू आपणै पड़ोसी सेधे आपू सेई प्रेम रख, ऐता ना बडी कोई आज्ञा नेई आथी। 32 शस्त्रीऐ तेई बै बोलू, ओ गुरु जी, बिलकुल शोभला, तें सच बोलू, कि ऐके सा, होर तेई बै छौड़िया, होर कोई नेई। 33 होर तेई ना आपणै सारे मन होर सारी बुद्धि होर सारे प्राणा होर सारी शक्ति सेधे प्रेम रख, होर आपणै पड़ोसी सेधे आपू बराबर प्रेम रख, ऐ सेभ होमबलि, होर सेभ बलिदाना ना बडे सी। 34 जेबै यीशुऐ हेरु की तेईये सोसोची समझीया जबाब धिना, ता तेई बै बोलू, की तू परमेश्वरा रे राज्य ना दूर नी आथी, होर कोई बै यीशु ना किच्छ पुच्छणै री हिम्मत नेई हुई।

### मसीह कुणी रा बेटा सा?

35 फिरि यीशुऐ मंदरा ना शिक्षा देन्दी घेरे बोलू, की शास्त्री किबे बोला सी, की मसीह दाऊदा रा बेटा सा? 36 दाऊदे आपू ऐ पवित्र आत्मा ना भौरिया बोलू, की प्रभु ऐ मेरे प्रभु बै बोलू, मेरे सीधे हौथे बैश, जैबे तक हाँऊ तेरे दुशमणा बै तेरी जोँघा हेठे नी केरनु। 37 दाऊद ता आपू ऐ तेई बै प्रभु बोला सा, फिरि सो तेई रा बेटा कौखे ना हुआ? होर भिड़ा रे लौका तेईरी गला खुश होईया शुणाती।

### शास्त्री न सावधान रौहा

38 तेईये आपणी शिक्षा ना बोलू, शास्त्री लौका ना सावधान रोहा, जूण लोम्बे झिकड़ै लाईया घुमा सी। 39 होर बजारा ना नमस्ते, होर आराधनालय ना शोभली-शोभली जगह तौपा सी। 40 तै बिधवा रे घौर बै खा सी, होर रिहाणै री तेईये लोमी-लोमी प्रार्थना केरा सी, इन्हा बै जादा सजा मिलणा।

### कंगाल विधवा बै दान

41 होर यीशु मंदरा रे भंडारा सामणै बैशिया हेरदा लागा, की लौक भण्डारा ना ढैबुऐ केँदै पा सी, होर बोहु अमीर लौके बोहु किच्छ पाऊ। 42 तैबै एक कंगाल बिधवे ऐजीया दूई दमड़ीयां भौरी, जूण एक धेले बराबर होआ सी पाई। 43 तैबै यीशुऐ चेले नेडे शाधिया तिन्हा बै बोलू, हाँऊ तुसा बै सच बोला सा, कि मंदरा रे भंडारा ना पाणु आऐ ना ऐसे कंगाल बिधवे सेभी ना जादा धिना। 44 किबैकी सभीये आपणै जादा ढैबुऐ ना धिना, पर ऐसे आपणी घटी ना जै किच्छ ऐसा आगे ती सेभ धिना मतलब आपणी सारी कमाई धीनी।

### मंदिरा रै नाश होणै री भविष्यवाणी

13 जैबै यीशु मन्दिरा ना जाँदा लागा ती, तेइरै एकी चेलै तेइबै बोलू, “गुरु, हेरा ए पाथर होर भवन केतरै नोखै सी।” 2 यीशुऐ तिन्हा बै बोलू, “तुसै इन्हा बडे भवना बै हेरदै लागे सी, ओखै एकी पाथर पैंधे दूजा पाथर नी टिकी रौहणा। एक-एक पाथर ढाइणा।”

### दुःख होर क्लेश

3 जैबै सौ जैतून ढौगा पैंधे मन्दिरा सामनै बेठा ती ता पतरस, याकूब, यूहन्ना होर अन्द्रियासै तेइना केल्है ना पुछू, 4 “आसा बै दस, ऐ सबकिछ कैबै होणा? जैबै ऐ सबकिछ पूरा होणू आला होला ता तेई बौगतै केण्डै चिन्ह होणै?” 5 तैबै यीशु बोलदा लागा, “होशियार! कोई तुसाबै धोखा नी देला। 6 मेरै नाँ ना बोहु सारै लोका एणा होर दावा केरना कि, ‘हाँऊ सौहै सा।’ तिन्हा बोहु बै धोखा देणा। 7 जैबै तुसै लड़ाई री अफवाहै रै बारै ना शुणलै ता घबराँदै हेरीत्। ऐण्डा ता होणा पर आजी अन्त नी आँथी। 8 एकी ज्ञाति दुजी

ज्ञाति रै खिलाफ़ होर एकी राज्य होरी राज्य रै खिलाफ़ खड़े होणा। बोहु सारी जैगा ना जौजरी होणी होर अकाल पौड़नै। स दुःखै री शुरूआत सा। 9 आपणै बारै ना सचेत रौहा। तिन्हा लोका तुसै अदालतै रै हवालै केरनै होर तिन्हा तुसै तिन्हरै सभा घौरा ना पीटणै होर मेरी वजहा ना तुसाबै तिन्हरै शासक होर राजै सामनै खड़े होणा पौड़ना ताकि तिन्हा बै कोई सबूत मिलला। 10 पर ऐ जरूरी सा कि पैहिलै सैभि बै सुसमाचार शुणाइला। 11 जैबै सो तुसा बै तिन्हा आगे खडे केरले ता पहले ना चिंता हेरित करदे, कि आसा की बोलणा, पर जे किछ तुसा बै तेई बोके दसीला, सो ऐ बोलीत, किबैकि बोलणु आए तुसे नी आथि, परन्तु पवित्र आत्मा सा। 12 भाई, भाई धोखै सेंधे ढौकणै द्याइया मारनै द्याणा। बापू, बेटा धोखै सेंधे ढौकणै द्याणा होर बाल-बच्चै आपणै आमा-बापू रै खिलाफ़ खड़े होइया ते मारनै द्याणै। 13 मेरी वजहा ना सैभी लोका तुसा सेंधे घृणा केरनी पर जुण अन्ता तक धरज रखला तेइरा उद्धार होणा।

### बड़े कलेशा रा बौगत

14 जैबै तुसै भयानक विनाशकारी चीजा बै तौखै खड़ी हेरलै जौखै ते नी ती लोड़ी, तैबै जुणा लोका यहूदिया ना सी, ते ढौगा बै भैगलै होर, 15 जुणा लोका आपणै घौरै रै छापरा पैंधे होलै, ते घौरा भीतरा बै नी उतरलै। 16 होर जुणा बाहरै मैदाना ना होलै ते पिछे मुड़िया आपणै झिकड़ै नी नेलै। 17 तिन्हा बेटडी री तैइयै जुणा सुजदी होली होर जुणि रै बच्चै दूधा पिणू आलै सी, तिन्हा ध्याडै बडे भयानक होणा। 18 प्रार्थना केरा कि ऐ सबकिछ सर्दी न नेई लोड़ी हुआ। 19 तिन्हा ध्याडै ना ऐण्ठी विपदा एणी जैण्ठी कि सुष्टि बणनै ना लेइया औजा तक ना आई होर ना कदी एणी। 20 अगर परमेश्वरै ते ध्याडै नी ती घटाऐ ता कोई बी नी ती बचणा। पर तिन्हा चुनुऐदैं माहू री वजहा ना परमेश्वरै स बौगत कम केरु सा। 21 तिन्हा ध्याडै ना अगर कोई तुसाबै बोलला, ‘हेर, ऐ सा मसीह या स सा मसीह, ता तेइरा भरोसा हेरी केरदा। 22 किबैकि झूठे मसीह होर भविष्यवक्ता हेरिदै लागणै होर तिन्हा ऐण्डै चिन्ह चमत्कार रिहाणै होर अद्भुत कोम केरनै होर तिन्हा चुनैदैं माहू बी चकरा ना पाणै। 23 तुसै होशियार रीहीत्। मैं बौगता ना पैहिलै तुसाबै सबकिछ दसू सा।

### माहणु रै बेटे रा दबारा एणा

24 पर तिन्हा दुःखै रै ध्याडै ना, सूरज कालै होणा, जोथा आपणा प्याशा नी देणा। 25 स्वर्गा ना तारै शौढ़नै होर आसमानै री सारी महाशक्ति हिलाइणी। 26 तैबै लोका माहू रा बेटा महाशक्ति होर महिमा सेंधे बादला ना प्रगट होंदा हेरना। 27 तैबै तेई आपणै दूत भेजिया जोहू दिशा ना होर धौरती रै एकी किनारै ना लेइया स्वर्गै रै दूजे किनारै तक सारै ना आपणै चुनैदैं लोका कठा केरनै।

### अंजीरा रै बूटे रा उदाहरण

28 अंजीरा रे बूटे ना ऐ उदाहरण सिखा, जेबे तेई री डाली नरम होआ सा, होर पोचे निकलदे लागा सी, ता तुसै पता ला सी कि गर्मी रा मौसम नेडे सा। 29 अंजीरै रै बूटै ना शिक्षा लेआ। जैबै तेइरी शाह्नी नरम होआ सी होर कौरु फुटदै लागा सी ता तुसै जाणा सी कि गर्मी रा मौसम एणू आला सा। 30 ऐण्डाऐ जैबै तुसै सबकिछ होंदा हेरलै ता समझेइत् कि स बौगत नेड पुजू सा। 31 हाँऊ तुसाबै सच बोला सा कि पका इन्हा लोकै रै जिन्दै जी ए सारी गैला घटणी।

### बिऊँदै जरौहा

32 धौरती होर आसमान नष्ट होणै, पर मेरा वचन कदी नी टलणा। 33 तेई ध्याडै होर तेसा घड़ी रै बारै ना कौसी बै किछ नी पता, न स्वर्गा ना स्वर्गदूता बै होर न ऐबे माहू रै बेटे बै, केवल परमेश्वर बापू जाणा सा। 34 ऐ यात्रा ना नौटै दैं माहू साही सा जुणियै आपणा घौर आपणै सेवकै रै हवालै छौड़ कि ते आपणा-आपणा कोम केरलै होर जोऊकीदारा बै हुकम केरु कि, जागदा रौहा 35 तुसै बी जागदै रौहा किबैकि घौरका मालक पता नी कैबै एला। सोनकी

घेरें, औधी रातियें, मुर्गे री बाँग देणें रें बाँगते या तैबे ध्याडी दपोहरें। 36 अगर सौ अचानक एला ता तुसै ऐण्डा केरा कि स तुसाबै सुतै दै नी पाला। 37 जे हाँऊ तुसाबै बोला सा, सौहै सैभी बै बोला सा, 'जागदै रोहा।'

### यीशु रें बरोधा न साजिश

14 फसह री जाच होर अखमीरी रोटी रें साजै ना दूई रोज पैहलकी गल सा कि प्रधान याजक होर यहूदी धर्मविधि जाणनू आलै कोई ऐण्डी तरकीब तोपदै लागै ती कि ते बडी चलाकी सेंधें यीशु बै बन्दी बणालै होर तेइबै मारलै। 2 ते बोलदै लागै ती, "पर ऐण्डा आसा बै जाचै रें ध्याडै ना नी केरना चाहियै, होई सका सा कि लोका किछ हंगामा खडा केरलै,"

### बैतनिय्याह न यीशु रा निरादर

3 जेबे यीशु बैतनिय्याह ना शमोन कोढी रे घौरा ना रोटी खांदा बैठा ती, तेबे एक बेटडी संगमरमरा रे भांडे ना जटामांसी रा बोहु किमती होर शुद्ध सेंट लेइया आई, होर भांडा चोड़िया सारा सेंट यीशु रे चौहडे पांघे पेरु। 4 तैबै तौखें बेटे दै किछ लोका आपू ना बोलदै लागै, "इत्रै री ऐण्डी बर्बादी किबै केरुई?" 5 किबैकि ऐ सेंट ता त्राई शोऊ दिनारा ना जादा रा बेचिया कंगाल माणहु बे बोडी सका ती, होर ते तेसा बे झिडकदे लागे। 6 यीशुए बोलू, ऐसा बे छोडा, ऐसा बे किबे परेशान केरा सी? ऐसे ता मुं सेंधे भलाई केरी सा। 7 कंगाल ता तुसा सेंधे हमेशा रोहा सी, होर जेबे तुसै चाहले तिन्हा री भलाई केरी सका सी, पर मुं तुसा सेंधे सदा नी रोहणा। 8 एसा बेटडियै सौहै केरु जो ऐ केरी सका ती। एसे ता बाँगता ना पैहिलै मेरें पौथिणें री तेंइयै मेरी देही ना सुगन्ध छिडकिया स त्यार केरी सा। 9 हाँऊ तुसाबै सच बोला सा: सारै सँसारा ना जौखें बी सुसमाचारा रा प्रचार केरिला, तौखें एसरी यादी ना जो एसे केरु सा, एसरी चर्चा होणी।

### यहूदा रा विश्वास घात केरना

10 तैबै यहूदा इसकरयोति जो बारा चेलै ना एक ती, प्रधान याजका हागै यीशु बै धोखे ना पकड़वाणें री तेंइयै नौठा। 11 ते तेइरी गल शुणिया बडै खुश हुऐ तिन्है तेइबै धन देणें रा वचन धिना। तैबै यहूदा यीशु बै धोखे ना पकड़वाणें री ताका ना रौहदा लागे।

### चले सेंधे फसहा रा आखरी भोज

12 अखमीरी रोटी रें साजै ना एक रोज पैहिलै, जैबे फसह रें मेमनै री बाँई देआ ती, यीशु रें चेलै तेइना पुछू, "तू की चाहा सा कि आसै कौखें जाइया तेरी तेंइयै फसह रें भोजै री त्यारी केरलै?" 13 तैबै तेइयै आपणें दूई चेलै भेजिया होर बोलू, "नगरा बै जातू, तौखें तुसाबै पाणी रें घडै पाइया एक माहू मिलणा, तेई पिछे जाईतू।" 14 तैबै जौखें बी सौ भितरें जाला, तेई घोरकै मालका बोलीतू, "गुरुए पुछू सा, मेरे भोजन केरनै रा स कमरा कौखें सा जौखें हाँऊ आपणें चेलै सेंधे फसह री रोटी खाई सकनू।" 15 तैबै तेई तौभे उजै धिरे एक सजाऊ दा होर त्यार केरु दा कमरा रिहाणा, तौखें आसरी तेंइयै त्यारी केरा।" 16 तैबै तेइरें चेलै तौखना नगरा बै चेलै होर तिन्है तौखें हर गल तैण्डी हेरी जैण्डी यीशुए तिन्हा बै बोली ती। तैबै तिन्है फसह रा भोजन त्यार केरु। 17 सोझकी घेरें यीशु आपणें बारा चेलै सेंधे तौखें पुजू। 18 जैबे ते बेशिया खाणा खाँदै लागै ती, तैबै यीशुए बोलू, "हाँऊ सच बोला सा, तुसा ना एकी, जे मुं सेंधे रोटी खाँदा लागे सा, तेई हाँऊ ढौकणें घाणा।" 19 तैबै ते चेलै दुःखी होइया एकी दुजै बै बोलदै लागै, "पक्का हाँऊ स नी आँधी!" 20 यीशुए तिन्हा बै बोलू, "बारा मुंझै ना सौहै एक सा, जो मुं सेंधे एकी थाई ना खा सा। 21 माहू रें बेटे रा ज्ञाणा ता जरूरी सा, जैण्डा कि तेइरें बारें ना लिखू सा, पर लानतू सा तेई माहू पैंधे जौसरी वजहा ना माहू रें बेटे ढौकिणा। तेई माहू री तेंइयै केतरा भला होदा कि सौ पैदा नी ती होदा।"

### प्रभु भोज

22 जैबे ते खाणा खाँदै लागै ती, यीशुए रोटी लेई होर परमेश्वरा रा धन्यवाद केरिया चोड़ी होर तिन्हा बै देंदी घेरें बोलू, "लेआ, ऐ मेरी देह सा।" 23 तैबै तेइयै कटोरा चैकू होर परमेश्वरा रा धन्यवाद केरिया तिन्हा बै धिना होर तिन्हा सैभियें स पीऊ। 24 तैबै यीशुए बोलू, "ऐ मेरा लोहू सा, जो एक नोऊँरे वायदै री शुरुआत सा। ऐ बोहू री तेंइयै बहाणा लाऊ सा। 25 हाँऊ तुसाबै सच बोला सा कि ऐबै मुं तेई ध्याडै तक दाखमधु नी चखणा, जैबे तक परमेश्वरें रें राज्य ना नोऊँआ दाखमधु नी पीनू।" 26 तैबै एक भजन गाइया ते जैतून ढौगा पैंधवै नौठै।

### पतरसा रें ना केरने री भविष्यवणी

27 यीशुए तिन्हा बै बोलू, "तुसा सैभी रा विश्वास डिगणा किबैकि लिखू सा: मुं फुआल मारना होर भेडा तितर-बितर होणी। 28 पर भी जिन्दै होणें ना बाद मुं तुसा न पैहिलै गलीला बै जाणा।" 29 तैबै पतरसै बोलू, "चाहै सैभै आपणा विश्वास खोलै पर मुं नी खोणा।" 30 यीशुए तेइबै बोलू, "हाँऊ तौभै सच बोला सा, औज एसा राती ना त मुर्गे रें दूई बार बाँग देणें ना पैहिलै मेरा नाँह केरना।" 31 पतरसै भी बोलू, "अगर मुंभै त सेंधे मौरना बी पौडला, तैबै बी मुं तेरा नाँह नी केरना!" तैबै बाकी चेलै बी ऐण्डाए बोलू।

### गतसमनी न प्रार्थना

32 तैबे ते गतसमनी जैगा बै आऐ। तौखें यीशुए आपणें चेलै बै बोलू, "मेरें प्रार्थना केरनै तक तुसै ओखें रूका।" 33 पतरस, याकूब होर यहूना यीशुए आपू सेंधे नेऐ। यीशु बोहू दुःखी होर व्याकुल होदा लागे ती। 34 होर तिन्हा बे बोलू, मेरा मन बडा उदास हुआ सा, ओखे तक कि हाँऊ मोरनु आ सा, तुसे ओखे बैशा, होर बिउंदे रोहा। 35 तैबै थोडा आगै जाइया स धोरती पैंधे टुंबडै पौडिया प्रार्थना केरदा लागे कि, हे परमेश्वर अगर होई सका सा ता एसा घडी मुं पैंधे ना हटी लोडी। 36 यीशुए बोलू, "हे परम पिता! तेरी तेंइयै सबकिछ सम्भव सा। एई कटोरें बै मुं ना दूर केर। तैबै बी जेकिछ हाँऊ चाहा सा, स नी बल्कि जे तू चाहा सा सौहै केर।" 37 जैबे यीशु वापस आऊ ता तेइयै आपणें चेलै बै सोदें हेरिया पतरसा बै बोलू, "शमोन कि तू सोदा लागे सा? कि तू एक घडी बी जागी नी सकू? 38 जागदै रोहा होर प्रार्थना केरा कि तुसै परीक्षा ना नी पौडलै। आत्मा ता त्यार सा पर देह कमजोर सा। 39 यीशु भी प्रार्थना केरदा नौठा होर तैण्डे वचन बोलिया प्रार्थना के री। 40 जैबे स दबारा वापस आऊ ता तेइयै भी आपणें चेलै सोदें हेरें। तिन्हरी औछी नीजै लाइया भौरुइदी ती। तिन्हा बै पता निसी चेलै कि आसा यीशु बै की जवाब देणा। 41 सौ त्रिजी बार भी वापस आऊ होर तिन्हा बै बोलू, "तुसै कि अजी बी आरामा सेंधे सोदें लागे सी?" रझ हुआ, स बाँगत आऊ सा, जैबे महू रा बेटा धौखें सेंधे ढौकिणा होर पापी रें हौथा ना देइणा। 42 खडै होआ होर चोला, हेरा, मुंभै धोखें सेंधे ढौकणें घाणू आला माहू एन्दा लागे सा।

### यीशु रा धोखे सेंधे ढौकिणा

43 यीशु बोलदा लागे ती कि तेइरें बारा चेलै मुंझै ना एक चेला यहूदा इस्करयोति तौखें हेरुआ। तेई सेंधे डँडे होर तलवारी लेइया लोकें री एक बडी भीड ती होर सौ भीड याजक, धर्मविधि जाणनू आलै होर बुजुर्ग यहूदी नेतै भेजी ती। 44 यहूदा इस्करयोतिये तिन्हा बै दसू ती कि जुणी बै हाँऊ माँकी देनू सौहै यीशु सा, तेइबै ढौकेइत होर होशियारी सेंधे नेईतू। 45 जैबे यहूदा तौखें आऊ, तेइयै यीशु हागै जाइया बोलू, "गुरु!" होर तेइबै माँकी धिनी। 46 तैबै तुरन्त तिन्है स ढौकू होर आपणी हिरासता ना लेऊ। 47 यीशु रें एकी चेलै जो कि तौखें खडा ती, तेइयै आपणी तलवारिये लाइया महायाजकें रें दासा रा एक कोन काटू। 48 तैबै यीशुयै बोलू, "हाँऊ कि कोई अपराधी सा जो तुसै मुंभै ढौकणें री तेंइयै डँडे होर तलवारी लेइया आऐ सी?" 49 हाँऊ हर रोज मन्दिरा ना तुसा सेंधे उपदेश देआ ती पर तुसे हाँऊ नी ढौकू। ऐबे ऐ एथे री तक हुआ कि शास्त्रा रा वचन पूरा होला। 50 तैबै यीशु रें सारै चेलै तेइबै केल्लै छौडिया भेगै। 51 एक नोऊजुआन आपणी नैगी देही

ना एक चादर लपेटिया तेई पिछे एन्दा लागी ती । तिन्है स ढोकणा चाहू।  
52 पर सौ आपणी चादर छौड़िया नंगा भैगू।

### बड़ी सभा रै सामणै यीशु

53 तिन्है यीशु प्रधान याजका हागै नेऊ। तैबे सारै याजक, बुजुर्ग यहूदी नेता होर धर्मविधि ज्ञाननू आलै कठा हुऐ। 54 पतरस तेइना दूर-दूर चैलदै- चैलदै महायाजकै रै ब्राम्दै रै आन्ध्रै तक नौठा होर तौखै पौहरैदारा सँघे औगी छिपदा लागी। 55 सारी यहूदी महासभा होर याजक यीशु बै मोऊती री सजा देणै री तँइयै कोई सबूत तोपदै लागै ती पर तिन्हा बै कोई सबूत नी मिलू। 56 बोहू सारै लोकै यीशु रै बारै न झूठी गवाही धिनी पर ते गवाही एकी होरी रै खिलाफ ती। 57 तैबै किछ लोका खडै हुऐ होर तेइरै खिलाफ झूठी गवाही देइया बोलदै लागै, 58 “आसै ऐ ऐण्डा बोलदा शुणू, ‘माहू रै हौथे बणू दा ऐ मन्दिर मूँ ध्वस्त केरना होर त्रा रोजा भीतरै मूँ दूजा मन्दिर बणाणा, जो कि हौथे लाइया बैणू दा नी होणा।” 59 पर एथा ना भी तिन्हरी गवाही एक नी ती आँथी। 60 तैबै तिन्हा सामनै महायाजकै खडै होइया यीशु ना पुछू, “ए लोका तेरै खिलाफ की गवाही दँदै लागै सी? कि त इन्हा बै किछ जवाब नी देणा?” 61 पर यीशु चुप रोहू होर किछ जबाब नी धिना, महायाजके सो भी पुछू, तू कि तेई परम्परधाने रा बेटा मसीह सा? 62 यीशुऐ बोलू, “हाँऊ सा, होर तुसा माहू रा बेटा परम परमेश्वरै री दँहिणी धिरै बेटा दा होर बादला ना एन्दा हेरना।” 63 महायाजकै आपणै झिकडे त्रिरिया बोलू, “आसा बै होरी गवाही री की जरूरत सा?” 64 तुसै ऐ बेइजती आली गैला बोलदा शुणू, एबै तुसरा की विचार सा? तिन्है सँभियै बोलू, एइबै मोऊती री सजा मिलणी चाहिए। 65 तैबै किछ लोकै तेई पँधै थुकू, किछ लोका तेइरा मुँह खौटा ती होर मुकै मारा ती। किछ ठठै केरिया बोलदै लागै, “भविष्यवाणी केर!” होर पहरैदारे स ढोकिया मारू।

### पतरसा रा इनकार केरना

66 पतरस हाजी ब्राम्दै ना बेटा ती होर तौखै महायाजकै री एक नौकराणी आई। 67 जैबै तेसै पतरस तौखै औगी छिपदा हेरू ता बडै ध्याना सँघे तेइबै पछियाणिया बोलू, “तू बी ता तेई यीशु नासरी सँघे ती।” 68 पर पतरसै नाँह केरू होर बोलदा लागी, “हाँऊ नी ज्ञानदा कि तू की लागी सा बोलदी।” ऐण्डा बोलिया स डेही तक नौठा, होर मुगँ बाँग धिनी। 69 तेसै नौकराणियै जैबै स दबारा हेरू ता स भी लोका बै बोलदी लागी, “ऐ माहू बी तिन्हा ना एक सा।” 70 पतरसै बी ना केरू। तैबै थोड़ी देरा बाद तौखै खडै हुऐ दै लोकै पतरस हेरू होर बोलू, “पका तू बी तिन्हा ना एक सा किबैकि तू बी गलीला रा सा।” 71 तैबै पतरस कसमा खाँदा लागी, “जौसरै बारै ना तुसै बोलदै लागै सी, हाँऊ तेई माहू बै नी ज्ञानदा।” 72 तेसा घडियै मुगँ दुजी बार बाँग धिनी। पतरसा बै तेई बौगते स गल याद आई जे यीशुऐ तेइबे बोली ती कि: “मुगँ री दूई बार बाँग देणै ना पैहिलै त मेरा त्रा बार नाँह केरना।” तैबै पतरसा रा ज्रीऊ चुटा होर स दुःखी होइया रोँदा लागी।

### पिलातुसा रै सामणै यीशु

15 होर दोत होंदे फट महायाजक, पराणै बजुर्ग, होर शास्त्रीये बल्कि सेभी लोके यीशु बोणणे धियाऊ, होर सौ नेइया राजा पिलातुसा रै हौथा ना धिना। 2 होर राजा पिलातुसे यीशु ना पुछू, तू कि यहूदी लोका रा राजा सा? यीशुऐ जबाब धिना, कि तू आपु ऐ ता बोलदा लागी सा। 3 होर महायाजक तेई पांधे बोहु गल्ला रा दोष लाँदे लागे ती। 4 पिलातुसे सो भी पुछू, तू कि कोई जबाब नी देँदा, हेर ऐ लोका तो पांधे केतरी गल्ला रा दोष ला सी। 5 यीशुऐ फिरी भी कोई जबाब नी धिना, ऐतरे तक कि पिलातुसा बै भी हेरानी हुई।

### मौऊती रा हुक्म

6 होर सो ऐसा जाचा ना कोई भी एक कैदी बै जूणी बै लोक चाहा ती तिन्हा री तेईये छोड़ा ती। 7 होर बरअब्बा नाँ रा एक माँणहु तिन्हा लड़ाई केरनु आये सँघे बंद ती जूणीऐ राजद्रोहा ना लोका मकाए ती। 8 होर सेभी री भीड़

ऊझे जाईया विनती केरदी लागी, कि आसा री तेईये जेण्डा तू केरादा आऊ सा तँडा केर। 9 पिलातुसे तिन्हा बै जबाब धिना, तुसे चाहा सी कि हाँऊ तुसा री तेईये यहूदी रे राजा बै छोडणु? 10 किबैकि सो जाणा ती कि माहायाजके सो जलन केरिया धोकणै धियाऊ सा। 11 पर माहायाजके लोका भडकाए ती, कि बरअब्बा बै आसा री तेईये छोड़। 12 ऐ शूणीया पिलेतुसे लोका भी पूछे, कि जूणी बै तुसे यहूदी रा राजा बोला सी, तेई सँघे हाँऊ कि केरनु? ते लेरा मारिया बोलदै लागे कि तेई बै कूसा पांधे चढ़ा। 13 पिलातुसे तिन्हा बै बोलू, किबे, एईये कि बुरा कौम करू सा? 14 पर ते होर जोरा सँघे लेरा मारदै लागे, कि तेई बै कूसा पांधे चढ़ा। 15 तेबे पिलातुसे भिड़ा बै खुश रखणे री तेईये, बरअब्बा डाकू तिन्हा री तेईये छोड़, होर यीशु बै कोडे लाईया तिन्हा रे हबाले केरू कि कूसा पांधे चढ़ा।

### सपाई द्वारा यीशु री बेजती

16 होर सपाहिये सो किले रे भितले बरांडे बै नेऊ जूण न्याय री जगह ती होर सारे लोका तौखे कठा केरिया शादे। 17 होर तिन्है तेई बै बँगनी रंगा रा झिकड़ा लाऊ, होर कोंडे रा मुकट बणाइया तेई री मुण्डी ना लाऊ। 18 होर ऐ बोलिया तेई बै नमस्ते केरदै लागे, कि हे यहूदी रे राजा, नमस्ते। 19 होर ते तेई रे मुण्डा ना भाले सँघे मारदै, होर तेई पांधे थुकदै, होर घुटने पांधे बैशिया तेई बै नमस्ते केरदै लागे। 20 होर ते जैबै तेईरा मजाक उड़ाइया बैठे, ता तेई पांधे ना सो बँगनी झिकड़े खोलिया तेईरै झिकड़े लाये, होर सौ कूसा पांधे चढ़ाणै री तेईये बाहरे नेऊ।

### यीशु रा कूसा पेन्धे चढ़ाया जणा

21 होर सिकंदर होर रुफुस रा बापू, शमौन नाँ रा एक कुरेनी माँणहु, जूण छेता ना बापिस ऐन्दा लागी ती, तिन्ही सो बिना मतलबे ढोकू कि यीशु रा कूस चकला। 22 होर ते तेई बै गुल्युता नाँ री जगह पांधे जूणी रा मतलब खोपड़ी री जगह सा आणु। 23 होर ते यीशु बै गन्धरस मिलु दा दाखरस पियाँदे लागे, पर तेइए नेई पिऊ। 24 तेबे तिन्हे सो कूसा पांधे चढ़ाऊ, होर तेइरे झिकड़े पांधे चिठी भौरी, कि कुणी बै कि मिलला, होर बोंडे। 25 होर एक पहर धियाड़ा चढ़ू ती, जेबे तिन्हे सो कूसा पांधे चढ़ाऊ। 26 होर तेइरा दोषपत्र तेई पांधे लाऊ कि “यहूदी रा राजा” 27 होर तिन्हे तेई सँघे दुई डाकू, एक सीधे हौथे ता दूजा उल्टे हौथे धीरे कूसा पांधे चढ़ाए। 28 तेबे पवित्र शास्त्रा रा सो वचन पूरा हुआ कि अपराधी सँघे तेई री गिनती हुई। 29 होर बौता ना जाणु आए मुड हिलाई-हिलाईया ऐ बोलिया तेई री बुराई करा ती, कि वाह, मंदरा बै चोड़िया त्रा रोजा ना बनाणु आए, कूसा ना उतरिया आपणै आपा बै बचा। 30 माहायाजक होर शास्त्री भी ऐण्डा बोलदै लागे। 31 आपु ना मजाक केरिया बोला ती, ऐइये लोका ता बचाए, पर आपु बै नी बचाई सकदा। 32 इस्राएला रा राजा मसीह ऐबे कूसा ना उतरला ता आसा हेरिया बशाह केरना होर जूण कूसा पांधे तेई सँघे चढ़ाए ती ते भी तेई री बुराई केरा ती।

### यीशु रा प्राण छोड़ना

33 होर धियाड़ा चढ़ने पांधे पुरे देशा ना निहारा हुआ, होर त्रीजे पहरा तक रोहु। 34 त्रीजे पहरा ना यीशुऐ जोरे री आवाजा ना बोलू, इलोई, इलोई, लमा शबकनी, जूणीरा मतलब सा हे मेरे परमेश्वर हे मेरे परमेश्वर, तँ हाँऊ किबे छोड़ू। 35 जूण लोका सँघे खडे ती तिन्हा मौन्झे केतरे ऐ शूणीया बोलदै लागे, कि हेरा, ऐ एलियाह बै शादा सा। 36 होर एकए ठोर मारिया स्पंज सिरके ना चौकू होर भाले ना रखिया तेई बै चुसाऊ होर बोलू, रुका, हेरणा कि एलियाह एई बै उतारने री तेईये इजा सा कि नेई। 37 तेबे यीशुऐ बड़ी जोरे री आवाज केरिया प्राण छोड़े। 38 होर मंदरा रा पर्दा उझे ना बुने तक चिरुआ होर दुई टुकड़े हुआ। 39 जूण सूबेदारतेई सामणे खडा ती, जेबे सो एण्डा प्राण छोडदा हेरू, ता तेइए बोलू, कि सचे ना ऐ माँणहु, परमेश्वरा रा बेटा सा। 40 कई बेटड़ी बी दूरा न हेरदी लागी ती तिन्हा मौन्झे मरियम मगदलीनी होर होछे याकूब होर योसेसे री आमा मरियम होर सलोमी ती। 41 जेबे यीशु गलीला ना ती, ता यीशु पीछे हाँडा ती होर तेइरी सेवा केरा ती, होर भी बोहु बेटड़ी ती जूण तेई सँघे यरुशेमा बै आई ती।

### यीशु रा दबाया जाणा

42 जेबे सोन्ह हुई, तेबे कि सो त्त्यारी रा रोज ती, जूण अरामा रे धियाडे ना एक रोज पहले एजा सा। 43 अरिमतिया रा रोहणु आ युसूफ आऊ, जूण एक मशहूर मंत्री होर आपु भी परमेश्वरा रे राज्य री गैल्ला केरदे रोहा ती, सो हिम्मत करिया राजा पिलातुसा आगे नौठा होर यीशु री लाश मोंगी। 44 पिलातुस हेरान हुआ कि सो एतरी छेके मुआ, होर सूबेदार शादिया पुछू कि तेई बे मोरिया कि बोहु देर हुई? 45 जेबे सूबेदारा बे पुछिया सारा हाल-चाल पता केरु, ता लाश युसुफा बे धीनी। 46 तेबे तेइए एक पातली चादर लेइया आणी, होर लाश उतारिया तेसा चादरा ना लपेटी, होर एक कब्र ना जूण पाथरा ना कोती ती रखी, होर कब्र रे दुआरा ना एक बडा पाथर रखु। 47 होर मरियम मगदलीनी होर योसेसे री आमा हेरदी लादी ती, कि सो कोखे रखु।

### यीशु रा जिन्दा होणा

16 जेबे अरामा रा धियाडा निभु, तेबे मरियम मगदलीनी होर याकुबे री आम्मा मरियम होर शलोमीए किछ खुशबूदार चीजा लेइया आणी, कि एजिया तेईरे शरीरा पांघे मौळली। 2 ते बोलदै लागै ती, “पर एण्डा आसा बै जाचै रे ध्याडै ना नी केरना चाहियै, होई सका सा कि लोका किछ हंगामा खडा केरलै,” 3 जैबे बैतनिय्याह ना यीशु शमौन कोद्री रे घौरा ना रोटी खाँदा बेठा ती, तैबे एक बेटडी साफ बोतली ना मँहगा इत्र लेइया आई। तेसै स बोतल चोड़ी होर इत्र यीशु री मुण्डी पेंधे पेरु। 4 तैबे तौखे बेठे दै किछ लोका आपु ना बोलदै लागै, “इत्रे री एण्डी बर्बादी किबै केरुई?” 5 एई इत्रा बै त्रा शौऊ दीनारी ना बी मँहगा बेची सका ती होर तेई धना बै कँगाला ना बांडी सका ती। तिन्है तेसरी बड़ी आलोचना के री। 6 तैबे यीशुए बोलू, “तेसाबे किबे तँग केरा सी? तेसाबे छोड़ा। तेसै ता मेरी तैइयै एक मनोहर कोम केरु सा।” 7 किबैकि कँगाल हमेशा तुसा सँघे रोहणा, तुसै जैबे चाहलै तैबे तिन्हरी मजत केरी सका सी, पर मूँ हमेशा तुसा सँघे नी रोहणा। 8 एसा बेटडियै सौहै केरु जो ऐ केरी सका ती। एसै ता बोगता ना पैहिलै मेरे पौथिणै री तैइयै मेरी देही ना सुगन्ध छिडकिया स त्त्यार केरी सा।

### मरियम मगदलीनी बै यीशु हेरुआ

9 हाँऊ तुसाबै सच बोला सा: सारै सँसारा ना जौखे बी सुसमाचारा रा प्रचार केरिला, तौखे एसरी यादी ना जो एसै केरु सा, एसरी चर्चा होणी।

10 तैबे यहूदा इसकरयोति जो बारा चेलै ना एक ती, प्रधान याजका हागै यीशु बै धोखे ना पकड़वाणै री तैइयै नौठा। 11 ते तेइरी गल शुणिया बडै खुश हुए तिन्है तेइबै धन देणै रा वचन धिना। तैबे यहूदा यीशु बै धोखे ना पकड़वाणै री ताका ना रौहदा लागा।

### दुई चले बै यीशु हेरुआ

12 अखमीरी रोटी रे साजै ना एक रोज पैहिलै, जैबे फ्रसह रे मेमने री बोई देआ ती, यीशु रे चेलै तेइना पुछू, “तू की चाहा सा कि आसै कौखे जाइया तेरी तैइयै फ्रसह रे भोजै री त्त्यारी केरलै?” 13 तैबे तेइयै आपणै दुई चेलै भेजिया होर बोलू, “नगरा बै जात, तौखे तुसाबै पाणी रे घडै पाइया एक माळू मिलणा, तेई पिछै जाईत्।”

### ग्यारह चले बै यीशु हेरुआ

14 तैबे जौखे बी स भितरै जाला, तेई घौरके मालका बोलीत्, ‘गुरुए पुछू सा, मेरै भोजन केरनै रा स कमरा कौखे सा जौखे हाँऊ आपणै चेलै सँघे फ्रसह री रोटी खाई सकनू।’ 15 तैबे तेई तौभै उजै धिरै एक सजाऊ दा होर त्त्यार केरु दा कमरा रिहाणा, तौखे आसरी तैइयै त्त्यारी केरा।” 16 तैबे तेइरे चेलै तौखना नगरा बै चेलै होर तिन्है तौखे हर गल तैण्डी हेरी जैण्डी यीशुए तिन्हा बै बोली ती। तैबे तिन्है फ्रसह रा भोजन त्त्यार केरु। 17 साँझकी घेरै यीशु आपणै बारा चेलै सँघे तौखे पुजू। 18 जैबे ते बेशिया खाणा खाँदै लागै ती, तैबे यीशुए बोलू, “हाँऊ सच बोला सा, तुसा ना एकी, जे मूँ सँघे रोटी खाँदा लागा सा, तेई हाँऊ ढौकणै घाणा।”

### यीशु रा स्वर्गा बै जाणा

19 तैबे ते चेलै दुःखी होइया एकी दुजै बै बोलदै लागै, “पक्का हाँऊ सौ नी आँधी!” 20 होर तिन्हें निकलिया हर जगहा प्रचार केरु, होर प्रभु तिन्हा सँघे कौम केरदा रौहु, होर तिन्हा चमत्कारा रे द्वारा जो सँघे -सँघे होआ ती वचना बै, मजबूत केरदा रौहु। आमीन।

# लूका

## एसा कताबै रै बारे न जानकारी

लूके लिखुन्दा सुसमाचार यीशु बै इस्राइली रा उद्धारकर्ता होर संसारा रै पूरे मानवजाति रै उद्धारकर्ता रै रूपा न प्रस्तुत केरा सा । होर लूका लिखा सा कि यीशु गरीबा री तैईये सुसमाचार शणाणै री तैईये प्रभु री आत्मे शाधू ती । ऐइ कारण ये सुसमाचार कई किस्मा रै मुश्कलाता न पौडैदे माहणु री चिंता भौरुंदा सा । लूका रै लिखुंदा सुसमाचारा न खुशी होर आनन्दा री भरपूरी बी लिखिदी सा, खास केरिया शुरु रै अध्याय न, यीशु दुबारा एणै रै बारे न दसु सा, होर आखरी न भी यीशु रै स्वर्ग जाणै रै बारे न वर्णन केरु सा । यीशु रै स्वर्ग जाणै न बाद मसीह बिश्वासा री तरक्की होर प्रेरिता रै कौमा री कताबा न लिखुंदा सा । होर यीशु रा जन्म स्वर्गदूता रा गाणा, पुआला रा यीशु बै हेरणै री तैईये जाणा, यरुश्लेमा रै मंदिरा न बालक यीशु, होर दयालु सामरी, होर उड़ाऊ पुत्रा रा उदाहर्ण लिखुन्दा सा । सेभी सुसमाचारा न प्रार्थना, पवित्रात्मा, यीशु री सेवकाई न बेटडी री भूमिका, होर परमेश्वर दुआरा पापा री माफ़ी री तैईये जादा जोर धिनु सा ।

रूपरेखा

भूमिका 1:-4

यहुन्ना बसिस्मा देणुआळै होर यीशु रा जन्म होर बचपन 1:5-2:52

यहुन्ना बसिस्मा देणु आलैरी लोका री सेवा 3:1-20

यीशु रा बसिस्मा होर परीक्षा 3:21-4:13

गलीला न यीशु दुआरा लोका री सेवा 4:14-9:50

गलीला न यरुशलेम तक यात्रा 9:51-19:27

यरुश्लेमा न आखरी ससाह 19:28-23: 53

प्रभु रा जिन्दे होणा, हेरिणा, होर स्वर्ग जाणा 24:1-53

1 आदरणीय थियुफिलस जे घटना आसा बीचै घटी तिनरै बारै ना बोहू सारै लोकै लिखु सा । 2 जेण्डा कि आसाबै यीशु रै तिन्हा चेलै देसू, ठीक तैण्डाए तिन्है लोकै लिखु सा । तिन्है चेलै ए गैला आपणी ओछियै होंदी हेरी होर लोका बिचै ए शुभ संदेश प्रगट केरु । 3 तिन्हा गैलै री मैं शुरु ना लेइया बड़ै ध्याना सँघै जाँच केरी सा होर तिन्हा गैला बै तेरी तैईयै बौदैं लिखणा मुँबै शोभला भी लागा, 4 ताकि तू जाणला कि जे शिक्षा तौभै धिनी सा सौहै सच सा ।

### यूहन्ना बसिस्मा देणुआळै रै पैदा होणै री भविष्यवाणी

5 जैबै हेरोदेस यहूदिया रा राजा ती तैबै अबियाह रै दला ना जकर्याह नां रा एक यहूदी पुजारी ती, तेइरी लाडी बी हारुन पुजारी रै वंशै री ती होर तेसरा नां एलिसाबेथ ती । 6 ते दुयै परमेश्वरा सामनै धर्मी ती, होर प्रभु री सारी आज्ञा ता विधी पँधै चला ती । 7 तिनरै कोई भी लुआद नी ती ओंथी, किबैकि एलिसाबेथ बांढी ती होर ते दुयै बूढै ती । 8 जकर्याह आपणै दलै री तरफा ना परमेश्वरा सामनै पुजारी रा कोम केरा ती । 9 पुजारी रीती रै मुताबिक जकर्याह रै नां री चिड्डी निकती कि सौ प्रभु रै मन्दिरा ना जाइया धूप पकाला । 10 जैबै जर्कयाह धूप पकांदा लागा दा ती ता लोकै री सारी मण्डली बाहरै प्रार्थना केरदी लागी दी ती, 11 तैबै प्रभु रा एक स्वर्गदूत जकर्याह ना धूप पकेणै री वेदी रै दैहिणी धिरै खड़ा हेरुआ । 12 जकर्याह तेई स्वर्गदूत हेरिया बोहू डौरु होर कोमदा लागा । 13 पर स्वर्गदूतै जकर्याह बै बोलू, "हे जकर्याह डौरदा मत किबैकि तेरी प्रार्थना शुणी दी सा, होर तेरी लाडी एलिसाबेथा सँघै तेरै एक बेटा पैदा होणा तू तेइरा नां यूहन्ना रेखेई ।" 14 तेइरी वज्रह ना तौभै बोहू खुशी होणी होर बोहू सारै लोका भी तेइरै पैदा होणै सँघै खुश होणा । 15 तेई प्रभु सामनै महान् होणा, तेई दाखरस होर मदिरा कदी बी नी पीणी होर तेई आपणी आमै रै पेटा ना पवित्र आत्मै रै वशा ना होणा । 16 तेई बोहू सारै इस्राइली लोका तिन्हरै प्रभु परमेश्वरा धिराबै फेरनै । 17 होर तेई ऐलियाह

साही आत्मा ना बड़ै सामर्थी होणा होर तेई प्रभु रै आगै जाइया बापू तिन्हरै बड़ै सँघै मिलाणै होर परमेश्वरै री गैला नी मैनणु आए बै एण्डी गैला दसला कि ते धर्मी साही वचन रखलै होर परमेश्वराबै मैनलै । एण्डे तैरहै तेई प्रभु री तैईयै लोका त्यार केरनै । 18 जकर्याहै स्वर्गदूता ना पुछू, "हाँऊ कैण्डै जाणी सका सा कि तेई एण्डा होणा? किबैकि हाँऊ 19 स्वर्गदूतै जकर्याह बै बोलू, "मेरा नां गब्रिएल सा होर हाँऊ परमेश्वरा सामनै खड़ा रौहां सा । हाँऊ तौभै इन्हा शोभली गल्ला दसणै री तैईयै भेजू सा ।" 20 शुण, जां ढौई ए गल्ला पूरी नी होली, त नैदैं रौहणा, होर तेरै गल्ला नी केरिनी, किबैकि तँ मेरी गल्ला रा बशाह नी केरु जो ठीक बौक्ता ना पूरी होणी । 21 लोका जकर्याह बै निहालदैं लागै ती, होर ते ऐसा गल्ला ना हैरान ती कि जकर्याह बै मन्दिरा ना एतरी देरी किबै होंदी लागी सा । 22 पर जैबै जकर्याह बाहरै आऊ ता तेइरै तिन्हा सँघै गल्ला निस्सी केरुई होर स हौथै लाईया इशारा केरा ती तैबै तिन्है लोकै जाणू कि जकर्याह बै मन्दिरा ना जरुर कोई दर्शन मिलू । 23 जैबै जकर्याह रै मन्दिरा ना सेवा केरनै रै ध्याडै पूरै हुए ता सौ आपणै घौरा बै नौठा । 24 इन्हा रोजा बाद जकर्याह री लाडी एलिसाबेथ सुजदी रौही होर पोंज म्हीनै तक आपू बै गजिहोंदी रौही, 25 होर बोलदी लागी, "प्रभुए मेरी तैईयै ए केतरा शोभला कोम केरु सा । ई बौगतै तेइयै मूँ पँधै केतरी दया केरी सा मेरै कोई लुआद नी ती ओंथी, एसा बेइजती ना प्रभुए हाँऊ बचाई ।"

### यीशु रै पैदा होणै री भविष्यवाणी

26 जैबै एलिसाबेथा बै छौऊआ म्हीना लागा ती तैबै परमेश्वरै गब्रिएल स्वर्गदूत गलीलै रै नासरत शैहरा बै एक कुंवारी हागै भेजू । 27 तेसरी मंगणी युसुफ नां रै म्हणू सँघै हुई ती जो दाऊद रै वंशा रा ती । तेसा कुंवारी रा नां मरियम ती । 28 स्वर्गदूतै मरियमा हागै भीतरै एजिया बोलू, "आन्नद होर जय तेरी हो, तौ पँधै प्रभु रा अनुग्रह हुआ सा ।" 29 पर एसा गल शुणिया मरियम डौरी होर सोचदी लागी कि स्वर्गदूतै री गल्ला रा की मतलव होई सका सा ।

30 स्वर्गदूत मरियमा बै बोलू, "हे; मरियम डौरदी मत, किबैकि तौ पैधे परमेश्वरा रा अनुग्रह हुआ सा ।" 31 शुण, त सुजदी रौहणा, तेरै एक शोहरू होणा होर तू तेई रा ना यीशू रखेई । 32 तेई महान् होणा, होर लोका तेईबै परम प्रधान परमेश्वरै रै बेटै बोलणा । प्रभु परमेश्वरा तेईबै तेइरै पूर्वज राजा दाऊदा साही राज केरने बै देणा । 33 तेई इस्राइली लोका पैधे सदा राज केरना, होर तेइरा राज्य कदी खत्म नी होणा । 34 मरियमै स्वर्गदूता ना पूछू "ए कैण्डे होई सका सा? हाँऊ ता आजी कुंवारी सा ।" 35 स्वर्गदूत बोलू, "पवित्र आत्मा त पैधे एणा होर परमेश्वरै री शक्ति त पैधे छाँऊ पाणी, तैबै स जे पैदा होणुआ सा स पवित्र होणा होर लोका तेइबै परमेश्वरै रै बेटै बोलणा ।" 36 शुणा, तेरी रिशतेदार इलिशिबै रै भी बुढापै ना बेटा होणुआ सा । लोका तेसाबै बांढी बोला ती, पर ए तेसरा सुजणै रा छौऊआ म्हीना लागा सा । 37 किबैकि परमेश्वरै री तैइयै सब किछ संभव सा । 38 मरियमै बोलू, "शुण, हाँऊ ता प्रभु री दासी (भक्त) सा, जैदा तुसै बोलू तैदा मूं सेंधे हुआ लोडी ।" तेता ना बाद स्वर्गदूत मरियमा हागै ना नौठा ।

39 किछ रोजा बाद मरियम यहूदिया जिल्लै रै एकी पहाडी शहरा बै एलिसाबेथा बै मिलदी नौठी । 40 होर तौखे जाइया मरियमै जकर्याह रै घौरा ना तेई री लाडी इलिशिबा बै नमस्ते केरी । 41 जाँ इलिशिबै मरियमै री नमस्ते शुणी ता बच्चा तेसरै पेटा ना पटीकू होर स पवित्र आत्मा ना भौरुई । 42 होर इलिशिबै जोरा सेंधे बोलू, "तू सभौ बेटडी मुंझे धन्य सा, होर तेरै पेटा रा शोहरू भी धन्य सा ।" 43 मेरी तैइयै ए केतरी इज्जती री गल सा कि मेरै प्रभु री आमा मुबै मिलदी मूं हागै आई सा । 44 हेर, जाँ में तेरी नमस्ते शुणी ता शोहरू मेरै पेटा ना खुशी सेंधे पटीकू । 45 तू धन्य सा किबैकि तैं बशाह केरू कि परमेश्वरा ए गल्ला पूरी केरनी ।

### मरियम परमेश्वरै री जय-जयकार केरा सा

46 तैबै मरियमै बोलू "मेरी आत्मा परमेश्वरै री प्रशंसा केरा सा ।" 47 मेरी आत्मा मेरै उद्धार केरनु आयै ना खुश हुई । 48 किबैकि तेइयै आपणी दीन-हीन दासी पैधे कृपा-दृष्टि केरी, एबै ना लेइया जुगा-जुगा ढौई लोका मुबै धन्य बोलणा । 49 किबैकि सर्वशक्तिमान परमेश्वरै मेरी तैइयै बड़े-बड़े कोम केरै सी । तेई रा नाँ पवित्र सा । 50 जुणा परमेश्वरा ना डौरा सी, तिन्हरी पीढी- पीढी ढौई परमेश्वरै री दया बणी रौहणी । 51 हेरा, जुणा आपणै आपू बै बड़ा होर ताकतवर बुझा ती, प्रभुयै ते कैण्डे तितर-बितर केरै । 52 परमेश्वरै राजै राजगद्दी ना हटायै, होर दीन म्हणू गद्दी पैधे बशायै । 53 परमेश्वरै भूखे म्हणू शोभली चीजा सेंधे तृप्त केरै, होर सेठ म्हणू खाली हाँथ वापस भजे । 54 परमेश्वरै आपणै सेवक इस्राइलै री मज्जत केरी, कि स आपणी तेसा दया बै याद केरला जो . 55 जे अब्राहम होर तेइरै वंशा पैधे सदा रौहणी, जैदा कि प्रभुयै आसरे बुजुर्गा बै बोलू सा । 56 मरियम लगभग त्रा म्हीनै ढौई इलिशिबा सेंधे रौही होर तेता ना बाद आपणै घौरा बै वापस नौठी ।

### यूहन्ना बसिस्मा देणुआळै रा जन्म

57 तैबै इलिशिबै रै सुजणै रै ध्याडे पूरै हुरे होर तेसै एकी बेटै बै जन्म धिना । 58 जैबै तेसरै पड़ोसिये होर रिशतेदारै शुणू कि प्रभुए तेसा पैधे केतरी दया केरी सा तैबै तिन्है तेसा सेंधे खुशी मनाइ । 59 जैबै शोहरू औठ रोजा रा हुआ, तैबै ते तेइरा खतना केरदै आए होर तेइरा नां तेईरै बापू रै नां पैधे जकर्याह रखणा चाहा ती । 60 परन्तु इलिशिबै बोलू, "नैई एइरा नां यूहन्ना रखणा ।" 61 तिन्है लोकै इलिशिबा बै बोलू, तेरै रिशतेदारा मौंझे कौसी रा एण्डा नां नी आँथी । 62 तैबै तिन्है शोहरू रै बापू ना इशारे सेंधे पूछू, "कि तू एई शोहरू रा की नां रखणा चाहा सा?" 63 तेइयै लिखणै री पौटी मगाई होर तेता पैधे लिखू, "एइरा नां यूहन्ना सा ।" तैबै सैभीबै बोहु हैरानी हुई । 64 तैबै एकदम जकर्याह रा मुंह होर जिभ खुली हुआ होर स गल्ला केरदा लागा होर परमेश्वरा रा धन्यवाद केरदा लागा । 65 तेईरै औरै-पौरै रौहणू आयै बै बडी डौरा पौई होर एसा गल्लै री खबर यहूदिया रै सारै पहाडी देशा ना फेली । 66 सब शुणनु आयै आपणै-आपणै मना ना वच्चार केरदै लागै कि एई शोहरू कैण्डे होणा होला । किबैकि प्रभु रा अनुग्रह एई पैधे सा ।

### जकर्याह प्रभु री स्तुति केरा सा

67 तेई शोहरू रा बापू जकर्याह पवित्र आत्मा ना भौरुआ होर भविष्यवाणी केरदा लागा; 68 इस्राइला रा प्रभु परमेश्वर धन्य सा, किबैकि तेइयै आपणै लोका पैधे कृपा दृष्टि केरी होर तिनरा छुटकारा केरु सा । 69 होर आपणै सेवक दाऊदै रै वंशा ना, आसरी तैइयै एक महान् मुक्ति देणू आला भेजु सा । 70 जैण्डा कि परमेश्वरै आपणै पराणै बौकै रै पवित्र, भविष्यवक्तै रै द्वारा बोलू ती । 71 परमेश्वरै आसरे सब शत्रू होर, बेइरी रै हौथा ना आसरा उद्धार केरु सा । 72 परमेश्वरै आपणी प्रतिज्ञा जो आसरे बुजुर्गा सेंधे केरी ती, तेसा याद केरिया आपणै लोका पैधे दया केरी । 73 सौहै शपथ परमेश्वरै आसरे बापू अब्राहमा सेंधे खाई ती । 74 परमेश्वरा आसै शत्रू रै हौथा ना छुणाणै ताकि, आसै नडौरै होइया परमेश्वरै री सेवा केरी सकलै । 75 ताकि आसै पवित्रता होर धार्मिकता सेंधे, जिंदगी भर परमेश्वरै री सेवा केरलै । 76 हे बालक तौ परम प्रधान परमेश्वरै रा भविष्यवक्ता कहलाइणा किबैकि तौ प्रभु ना आगे-आगे चलदै प्रभु री तैइयै बौत तयार केरनी । 77 तौ लोका बै ए दसणा कि, पापै री माफी सेंधे कैण्डे मुक्ति पाई सका सी । 78 परमेश्वरै री अपार कृपा सेंधे, स्वर्गा ना आसा पैधे ज्योति चमकणी । 79 ताकि ए ज्योति न्याहरै होर मोऊती री छाया ना बेटै दै लोका तक पुजली होर, आसा बै शांती री बौतै ओढणे ना बौत रिहाली केरली 80 बालक यूहन्ना बड़ा होदा रौहू होर आत्मिक शक्ति ना बढ़दा रौहू । बड़े होणे ना बाद जाँ तक तेइयै इस्राइली लोका मौंझे आपणी सेवा शुरू नी केरी ताँ तक स सुनसान जैगा ना रौहू ।

### यीशु रा जन्म

2 तिन्हा ध्याडे ना रोमी सम्राट अगैस्तुस राजे रोमी देशे रै सभी लोकै रै नाँ दर्ज केरने रा हुकुम धिना । 2 ए पहिली नाँ लिखाई तेई बौकै हुई जैबै क्विरिनियुस सीरिया देशा रा राज्यपाल ती । 3 सबै लोका राजे रै हुकुमै रै मुताबिक आपणा-आपणा नाँ दर्ज केरने री तैइयै तिन्हा शहरा बै नौठे जोखै तिनरै बजुर्ग रौहा ती । 4 तैबै युसुफ भी जो दाऊदै रै वंशा रा ती, आपणी मंगेतरा सेंधे गलीलै जिल्लै रै नासरत शहरा ना यहूदिया जिल्लै रै बैतलहम शहरा बै नाँ दर्ज केरदा नौठा । 5 सौ आपणी मंगेतर मरियमा सेंधे नौठा जो एबै सुजदी ती । 6 तिनरै तौखे रौहदै-रौहदै मरियमै रै शोहरू जोगणै रै ध्याडे पूरै हुरे । 7 होर तेसै आपणै पैहलै बेटै बै जन्म धिना होर स फालडू न लपेटिया खुरली भीतरै रखू । किबैकि सराय न तिनरी तैइयै जैगा नी ती आँथी ।

### स्वर्गदूत पुआला बै शोभली खबर देआ सा

8 तेई जिल्लै ना किछ फुआल तेसा राती ना छेता ना आपणै भेडै रै खुड़े री पौहरैदारी करदै लागै ती । 9 तैबै एकदम प्रभु रा एक दूत तिन्हा सामनै प्रकट हुआ होर प्रभु री महिमा रा प्याशा तिन्हरै चोहु पासै चमकू होर ते फुआल बोहु डौरै । 10 पर स्वर्गदूतै फुआला बै बोलू, "डौरदै मता शुणा मूं तुसाबै बडी खुशी री गल दसणी जो सभौ लोकै री तैइयै होणी ।" 11 औज दाऊदै रै शैहर बैतलहमा ना तुसरी तैइयै एक मुक्ति देणुआ पैदा हुआ सा होर ए मसीह प्रभु सा । 12 तुसरी तैइयै तुई री ए पछियाण सा कि तुसा एक शोहरू फालडू न लपेटुआदा चरनी भीतरै हेरना । 13 तैबै एकदम तेई स्वर्गदूता सेंधे बोहु सारै स्वर्गदूतै री मन्डली परमेश्वरै री स्तुति केरदी होर ऐण्ठी बालदी हेरुई, 14 "सर्गा ना परमेश्वरै री महिमा होर धौरती पैधे तिन्हा माणू ना शांती लोडी हुई, जौसा ना परमेश्वर खुश होआ सा ।" 15 जैबै स्वर्गदूत तिन्हा हागै ना स्वर्गा बै नौठे ता ते फुआल आपू ना दुणुयै कि "एजा आसा बैतलहम बै जाइया घेटीदी ए गल्ला हेरनी, जे प्रभुए आसबै दैसीदी सा ।" 16 तिन्है फुआलै छेका जाइया मरियम, युसुफ होर खुरली ना रैखूदा स शोहरू हेरु । 17 इन्हा हेरिया फुआलै जो गल्ला तेई शोहरू रै बारै ना स्वर्गदूतै तिन्हाबै दैसी ती स प्रकट केरी । 18 फुआलै री इन्हा गल्ला शुणीया सैभी शुणनु आयै बै बडी हैरानी हुई । 19 पर मरियमै ए सारी गल्ला आपणै मना ना रैखी होर तिन्हरै बारै ना सोचदी रौही । 20 फुआलै जेकिछ शुणू होर हेरु तेतै री तैइयै परमेश्वरै री जय-

जयकार करदें वापस नौठें । किबैक स्वर्गदूतें तिन्हाबै ज़ैण्डा बोलू ती सबकिछ तैण्डाए हुआ ।

### यीशु रा नाँ रखणा

21 जैबै शोहरू औठ रोज़ा रा हुआ तैबै पुजारिए तेइरा खतना केरू होर तेइरा नाँ यीशु रखू । ऐ नाँ स्वर्गदूतें यीशु रें पैदा होणें ना पहलै दैसू ती ।

22 जैबै मूसै री विधि रें मुताबिक मरियम होर युसुफ़ रें चोखै होणें रें ध्याड़ै पूरै हुऐ ता तिन्है यीशु यरुशलेमै रें मन्दिरा बै परमेश्वरा सामनै अर्पित केरनै री तैइयै आणू । 23 जैदा कि विधि री कताबा ना लिखू सा, “हरेक जेठा शोहरू प्रभु री तैइयै चोखै ठहरना ।” तिन्है तैण्डाए केरू । 24 होर प्रभु री विधि ना लिखू सा: “कबूतरै रें दूई बच्चै या तिन्हा साही दूई चिड्डू री बोई चढ़ा ।” एतै रें मुताबिक मरियम होर युसुफ़ भी बोई चढ़ावै नौठें ।

### शमोनै री भविश्यवाणी

25 यरुशलैमा ना शमोन नां रा एक माणहू रौहा ती । सौ धर्मि होर बड़ा भक्त ती । तेई आन्दरै पवित्र आत्मा ती । सौ तेई बौकै री राह हेरदा लागा ती कि जैबै इस्राइलै रें लोका बै तसल्ली देणू आ मसीहा एणा । 26 पवित्र आत्मै तेइवै दसू ती कि जैबै तक स परमेश्वरै भेजै दै मसीहा बै नी हेरला तैबै तक तैई नी मौरना । 27 पवित्र आत्मै रें बोलणै सँघै स मन्दिरा बै आऊ होर तेई ध्याड़ै ना मरियम होर युसुफ़ नियमा ना दैसीदी विधि बै पूरा केरनै री तैइयै यीशु मन्दिरा बै आणू । 28 तैबै शमोनै यीशु आपणै फाड़ै न चैकू, होर परमेश्वरा रा धन्यवाद केरिया बोलू : 29 “हे प्रभु, आपणै वायदें रें मुताबिक, आपणै एई भक्ता बै शांति सँघै मौरनै दैआ ।” 30 किबैकी मेरी इना औछीयै ऐबै तें भेजू दा मुक्तिदाता हेरू सा । 31 जे कि तें सैभी लोकै रें सामनै त्यार केरू सा । 32 सौ एक ज्योति जेही होणी होर जे यहूदी नी आथी तिन्हा पँधै तेरी इच्छा प्रकट केरनी, होर तेरै इस्राइलै रें लोकै री तैइयै महिमा रा कारण होणा । 33 शमोन यीशु रें बारै ना जे किछ बोलदा लागा ती तेई शुणिया मरियम होर युसुफ़ हैरान हुऐ । 34 शमोनै तिन्हा बै आशीर्वाद धिना हो शोहरू री आमा मरियमा बै बोलू, “हेर परमेश्वरै ऐ निश्चय केरू सा कि एई शोहरू री वजहा ना बोहू सारै इस्राइली लोका परमेश्वरा ना दूर होणें होर दुजै लोका परमेश्वरा धिराबै फिरना होर बोहू सारै लोका तेइरा विरोध केरना ।” 35 तैबै बोहू सारै लोकै रें दिला आन्दरै जे विचार सी ते प्रकट होणें । जे व्यवहार लोका तेई सँघै केरना तेतै री वजहा ना तौभै बड़ा भारी दुःख होणा

### हन्ना नाँ री बेटड़ी गवाई देआ सा

36 भविष्यवाणी केरनू आई बेटड़ी हन्ना बी तेई बौकै मन्दिरा ना ती । सौ अशरै रें गोत्रा ना ती । तेसरै बापू रा ना फनुएल ती होर स बूढ़ी ती । स विधवा ती किबैकि ब्याह रें सौत बौर्षा बाद तेसरा लाड़ा मुँआ ती । 37 तेसरी उम्र चरासी बौर्ष ती होर स आज्ञी बी विधवा ती । सौ मन्दिरा बै छौडिया कोइछे नीती जाँदी । स रात ध्याड व्रत रखिया मन्दिरा ना परमेश्वरै री भक्ति केरा ती । 38 जौस बौकै शमोन मरियम होर युसुफ़ा सँघै गल्ला केरदा लागा ती, हन्ना बी तेई बौकै तौखै पुजी होर परमेश्वरै रा धन्यवाद केरदी लागी । तेसै एजिया यीशु रें बारै ना तिन्हा सैभि बै दैसू जो यरुशलेमा बै छड़ाणू आयै राजै रा इंतज़ार करदें लागै ती ।

### नासरता बै बापस एणा

39 धर्म विधि रें सारै कोम-काज निबटाया युसुफ़ होर मरियम आपणै शैहर नासरता बै वापस नौठें । 40 बालक यीशु परमेश्वरै री दया सँघै शरीर होर बुद्धि ना बढ़दा रौहू किबैकि परमेश्वरा रा अनुग्रह तेई सँघै ती ।

### प्रभु यीशु मंदिरा न रुका सी ।

41 यीशु रें आमा-बापू हर साल फसहा री जाच मनाँदें यरुशलेमा बै जा ती । 42 यीशु जैबै बारा बौर्षा रा हुआ ता ते आपणी रीति रें मुताबिक फसह री जाच मनाँगे री तैइयै यरुशलेमा बै नौठें । 43 जाच खत्म होइया जैबै यीशु रें

आमा-बापू वापस नासरता बै आयै ता यीशु यरुशलेमा ना रूकू, पर यीशु रें आमा-बापू एसा गल नी ति जाणदें । 44 यीशु रें आमा-बापुयै ऐ सोचू कि यीशु होरी म्हणू सँघै होला । सोनकै ढौई जैबै यीशु तिन्हा ना नी हेरूआ ता ते आपणै सँघी होर रिशतैदारा जाँदरै यीशु बै तोपदें लागै । 45 जैबै यीशु तिन्हा बै नी मिलू ता ते तेईबै तोपदें-तोपदें यरुशलेमा बै वापस आयै । 46 तिन्हा बै यीशु रा रोज़ा बाद मन्दिरा ना धर्मगुरु री गल्ला शुणदा होर तिन्हा सँघै स्वाल केरदा मिलू । 47 जेतरे बी म्हणुयै यीशु री गल्ला शुणी ते तेइरी री समझदारी होर स्वालै रें जवाब देणै रें तरिके हेरिया हैरान ती कि ऐ एतरी समझदारी री गल्ला कौखेना केरा सा । 48 यीशु रें आमा-बापुयै जैबै सौ हेरू ता ते हैरान हुऐ । तेइरी आमा मरियमै यीशु बै बोलू, “बेटैया, तें आसा सँघै ऐण्डा किबै केरू? तेरा बापू ता हाँऊ तौभै तोपदें-तोपदें केतरै परैशान ती ।” 49 तैबै यीशुऐ तिन्हा बै बोलू, तुसै मुबै किबै तोपा सी, कि तुसै नी जाणदें कि मुबै आपणै बापू रें घौरा ना होणा चाहिए? 50 पर जे गल यीशुऐ तिन्हा बै बोली सौ गल तिन्है नी सोमझी । 51 तैबै ना बाद यीशु आपणै आमा-बापू सँघै नासरता बै वापस नौठा होर आपणै आमा-बापू री गल मनदा रौहू । पर तेइरी आमै ए सारी गल्ला दिला ना डाही । 52 यीशु बुद्धि होर शरीरा ना बढ़दा रौहू । यीशु परमेश्वरा रा प्यारा ती होर लोका रा भी

### यूहन्ना बसिस्मा देणुआलै रा संदेश

3 तिबिरियुस राजै रें राजपाठै रें पँधुऐ बोर्षा ना जैबै पुँतियुस पिलातुस यहूदिया ज़िल्लै रा राज्यपाल ती होर हेरोदेस अनतिपास गलील ज़िल्लै ना राज्य केरदा लागा ती, होर तेइरा भाई फिलिपुस इतुरैया होर त्रखोनितिस जिल्लै पँधै राज्य केरदा लागा ती, होर लिसानियास अबिलेनै जिल्लै ना राज्य केरदा लागा दा ती । 2 जैबै हन्ना होर कैफा यरुशलेमा ना माहापुजारी ती, तेई बौकै परमेश्वर रा वचन बोणा ना जकयह रें बेटै यूहन्ना हागै पुजू । 3 तैबै यूहन्ना यरदन नौइ रें औरलै-पौरलै सारै लाकै ना ज़ाइया ऐण्डा प्रचार केरदा लागा कि पापै री माफी पाणै री तैइयै लोका रा आपणै पाप छौडिया बपतिस्मा लेणा जरूरी सा । 4 ऐ भविष्यवक्तै आपणी कताबा ना यूहन्नै रें बारै ना ऐ लिखू सा : सुनसान जैगा ना एक पुकारनू आलै री अवाज शुणिदी लागी सा, प्रभु री तैइए बौत त्यार केरात, तेइरी सडका सीधी बणात । 5 हरेक घाटी भौरुई लोड़ी, होर सैबै ढौंग ता धारा निशटी केरिनी, होर जे डेंगा सा स सिधा केरिना होर जे उथड़ा-निष्ठा सा सौ बराबर केरूआ लोड़ी । 6 होर परमेश्वरा लोका कैण्डै बचाणै सौ सैभि मल्लू हेरना । 7 जे लोकै री भीड़ यूहन्ना आगै बपतिस्मै लेदी एजा ती, तिन्हा बै सौ बोला ती “ओ जहरीलै किडै साही लोको, परमेश्वरै री एणु आई दण्डा ना बचणै री तैइयै तुसाबै कुणियै चिताउणी धिनी? 8 शोभलै कोम केरिया रिहात कि तुसै पाप केरना छौडू सा, होर आपणै मना ना ऐण्डा मता सोचदें कि आसरा किछ नी होणा, किबैकि आसै अब्राहमै री सन्तान सी । हाँऊ तुसाबै बोला सा, परमेश्वर इना पाथरा ना भी अब्राहमै री तैइए सन्तान पैदा केरी सका सा । 9 कराहडा ऐबै बूटै रें ज़लाडै पँधै रैखू सा । हर एक स बुटा जुणी ना शोभलै फ़ौल नी लागदें सौ काटिया औगी ना पाणा ।” 10 तैबै लोकै यूहन्ना ना पुछू; “परमेश्वरै रें दण्डा बचणै री तैइयै आसा की केरना?” 11 यूहन्नै तिन्हा बै बोलू, “जुणी हागै दुई कुरतै सी ता एक सौ तेई मल्लू बै देला जूणि आगै नी आँधी होर जुणि हागै खाणै बै सा सौ तिन्हा सँघै बाँडला ज़ुणी आगै नी आँधी ।” 12 किछ चुंगी लेणु आलै भी बपतिस्मै लेन्दे आए होर तिन्है यूहन्ना ना पुछू, “हे गुरु जी आसा की केरना?” 13 यूहन्नै तिन्हा बै बोलू, “जेतरी चुंगी सरकारै ठहराई दी सा तेथा न ज़ादा मता लेदें ।” 14 तैबै किछ सपाही भी बोलदें लागै, “आसै की केराऊँ?” यूहन्नै तिन्हा बै बोलू, “तुसै कौसी सँघै ढैबुऐ देणै री तैइयै ज़बरदस्ती मता केरदें होर कौसी पँधै झूठा दोष मता लांदें । आपणी कमाई ना खुश रौहात । 15 जैबै सैभै लोका मसीह री आश लाइया बेटै दै ती होर सैभै आपणै-आपणै मना ना यूहन्नै रें बारै ना वचार केरदें लागै दै ती कि ऐ मसीह ता नी । 16 तैबै यूहन्नै तिन्हा सैभी बै बोलू, “हाँऊ ता तुसा बै पाणियै लाइया बपतिस्मा देआ सा पर स छेकै एणु आला सा जे मूँ ना शक्तिशाली सा । हाँऊ ता एस लायक बी नी आँधी कि तेइरै बूटै रें तस्मै खोलनू । तेई तुसाबै पवित्र आत्मा होर औगी सँघै बपतिस्मा देणा । 17 तेइरा शूप तेइरै हौथा ना सा । तेई आपणा

खौह शोभली तैरहें साफ केरना । तेई गेहूँ भूजा ना आंगी केरिया आपणी कोठडी ना डाहणें होर भूज नैई हिशणु आई आंगी ना फुकणा । 18 युहन्ना एण्डे तैरहें बोहू सारी शिक्षा देईया लोका बै सुसमाचार शुणादा रौह । 19 पर जैबै युहन्ने हेरोदेस राजे बै तेइरै भाई फिलिप्पुसै री लाडी सँघलै बुरे कोमै रै बारै ना झिड़कू, 20 ता हेरोदेसै राजे युहन्ना बै जेला ना पाइया एथा ना बी बुरा कोम केरु ।

### युहन्ना प्रभु यीशु बै बतिस्मा देआ सा

21 पर युहन्ने रै जेल होणें ना पैहलै एक रोज जैबै बोहू लोकें बपतिस्मा लेऊ ता यीशुए बी बपतिस्मा लेऊ । जैबै यीशु प्रार्थना केरदा लागा तैबै सर्ग खुलू । 22 तैबै ना बाद पवित्र आत्मा कबूतरै रै शरीरै रै रूपा ना यीशु पँधै उतरी होर सर्गा ना परमेश्वरै यीशु बै बोलू: “तू मेरा प्यारा बेटा सा । हाँऊ त ना खुश सा ।”

### यीशु री वंशावली

23 जैबै यीशुए लोका मॉँझे आपणी सेवा केरनी शुरू केरी, तैबै ते लगभग तीह बौषे रै ती । लोका यीशु बै युसुफा रा बेटा समझा ती । युसुफ एली रा बेटा ती । 24 एली मताता रा बेटा ती । मतात लेवी रा बेटा ती, लेवी मलकी रा बेटा ती, मलकी यन्ना रा बेटा ती, होर यन्ना युसुफा रा बेटा ती । 25 युसुफ मत्तियाह रा बेटा ती । मत्तियाह आमोसा रा बेटा, आमोस नहूमा रा बेटा ती । नहूम असल्याह रा बेटा होर असल्याह नोगहा रा बेटा ती । 26 नोगहा माता रा बेटा ती, मात मत्तियाह रा बेटा ती, मत्तियाह शिमी रा बेटा, शिमि योसेखा रा बेटा होर योसेख योदाह रा बेटा ती । 27 योदाह योनाना रा बेटा ती, योनान रेसा रा बेटा, रेसा जरूबबाबिला रा बेटा ती । जरूबबाबिल शालतियेला रा बेटा होर शालतियेल नेरी रा बेटा ती । 28 नेरी मलकी रा बेटा ती । मलकी अद्वी रा बेटा ती, अद्वी कोसामा रा बेटा ती । कोसाम इलमोदामा रा बेटा होर इलमोदाम एरा रा बेटा ती । 29 ए यहोशु रा बेटा ती । यहोशु इलाजारा रा बेटा, इलाजारा योरीमा रा बेटा ती । योरीम मताता रा बेटा होर मतात लेवी रा बेटा ती । 30 लेवी शमौना रा बेटा ती । शमौन यहुदाह रा बेटा, यहुदाह युसुफा रा बेटा ती । युसुफ योनाना रा बेटा होर योनान इलियाकीमा रा बेटा ती । 31 इलियाकीम मलेआह रा बेटा ती । मलेआह मिन्नाह रा बेटा, मिन्नाह मतता रा बेटा ती । मतता नाताना रा बेटा होर नातान दाऊदा रा बेटा ती । 32 दाऊद यिशै रा बेटा ती । यिशै ओबेदा रा बेटा, ओबेद बोआजा रा बेटा ती । बोआजा सलमोना रा होर सलमोन नहशोना रा बेटा ती । 33 नहशोन अम्मीनादाबा रा बेटा ती । अम्मीनादाब आदमीना रा बेटा, होर आदमीन अरनी रा, अरनी हिस्नोना रा बेटा ती । हिस्नोन फिरिसा रा बेटा होर फिरिस यहुदाह रा बेटा ती । 34 यहुदाह याकूबा रा बेटा ती । याकूब इसहाका रा बेटा ती, इसहाक अब्राहमा रा बेटा ती । अब्राहम तिरह रा बेटा ती होर तिरह नाहोरा रा बेटा ती । 35 नाहोर सरुगा रा बेटा ती । सरुग रऊ रा बेटा, रऊ फिलिगा रा बेटा ती । फिलिग एबिरा रा बेटा ती होर एबिर शिलह रा बेटा ती । 36 शिलह केनाना रा बेटा ती । केनान अरफक्षदा रा बेटा ती, अरफक्षद शेम रा बेटा ती । शेम नूहा रा बेटा होर नूह लिमिक रा बेटा ती । 37 लिमिक मथूशिलह रा बेटा ती । मथूशिलह हनोका रा बेटा ती, हनोक यिरिदा रा बेटा ती । यिरिद महललेला रा बेटा होर महललेल केनाना रा बेटा ती । 38 केनान एनोशा रा बेटा ती । एनोश शेता रा बेटा ती, शेत आदमा रा बेटा होर आदम परमेश्वरै बणाऊ ती ।

### यीशु री परीक्षा

4 यीशु पवित्र-आत्मा ना भौरुइया, यरदन नौई ना वापस आरे होर पवित्र आत्मै यीशु एकांत जैगहा ना घुमाऊ । 2 तौखै शैतानै चाली रोजा तक यीशु री जांच केरदा रौह । इन्हा रोजा ना यीशुए किछ नी खाऊ । जैबै ए ध्याडै पूरै हुए ता यीशु बै भूख लागी । 3 तैबै शैतानै यीशु बै बोलू, “अगर तू परमेश्वरा रा बेटा सा ता इन्हा पाथरा बै रोटी बैणनै बै बोल ।” 4 पर यीशुए शैताना बै बोलू, “पवित्र शास्त्रा ना ऐ लिखू सा माणहु रोटिए लाइया केलही जिंदै नी रौहणा ।” 5 तैबै शैतानै यीशु उथडी जैगहा बै नेरे होर एकी घडी ना

दुनियै रै सारै देशै रै राज-पाठ रिहाए । 6 तेता ना बाद शैतानै यीशु बै बोलू, “मुं इना राजयै री महिमा रा हक तौभै देणा । किबैकि ऐ सब किछ मेरा सा । हाँऊ जुणी बै देणा चाहा सा तेइबै देई सका सा ।” 7 अगर तू मुबै प्रणाम केरला ता, मु इन्हा सैभी राज पाठा रा हक तौभै देणा । 8 प्रभु यीशुए शैताना बै जवाब धिना, “पवित्र शास्त्रा ना ऐ लिखू सा तू सिर्फ आपणै प्रभु परमेश्वरा बै जे महाराज केर होर तेईरी सेवा केर ।” 9 तैबै शैतानै प्रभु यीशु मन्दिरै री सैभी ना उथडी जैगा पँधै नेरे होर बोलू, “अगर तू परमेश्वरा रा बेटा सा ता आपू बै औखना ढौगै शेट ।” 10 “किबैकि पवित्र शास्त्र बाइबला ना ऐ लिखू सा, परमेश्वरा आपणै स्वर्गदूता बै आज्ञा देणी ताकि ते तौभै बचालै ।” 11 होर तिन्हा तू आपणै हौथा ना चेकणा ताकि तेरी जोंघा ना पाथरै लाइया ठोकर नी लागी लोडी । 12 यीशुए शैताना बै जवाब धिना, “पवित्र शास्त्रा ना ऐ बी बोलुआ सा “तू आपणै प्रभु परमेश्वरै री परख हेरेई केरदा ।” 13 जैबै शैतानै हर तरहा ना यीशु री जांच केरी ता शोभला मौका मिलणै तक शैतान किछ बौकै री तैइयै यीशु आगै ना भैगू ।

### यीशुए सेभी रै कौम शुरू केरै

14 तैबै यीशु आत्मा ना भौरुइया गलिल जिल्लै बै वापस आरे होर जे किछ यीशु केरा ती तेतै री खबर बोणै री आंगी साही सारै जिल्लै ना फैली । 15 यीशु यहूदी धर्म सभा ना उपदेश देआ ती होर सब लोका यीशु री सराहणा केरा ती ।

### लोका नसरता देशा न यीशु रा अनारद केरा सी ।

16 एथा ना बाद यीशु नासरता बै आए जौखै ते ओछे ना बड़े हुए ती होर आपणै रीति-रिवाजै रै मुताबिक रामै रै ध्याडै ना सभा घौरा ना जाइया वचन पौढनै री तैइयै खड़े हुए । 17 तैवै यीशु आगै यशायाह भविष्यवक्तै री कताब पौढनै री तैइयै धिनी, यीशुए कताबै री स जैगा खोली जौखै ऐ लिखू ती, 18 प्रभु रा आत्मा मू पँधै सा किबैकि परमेश्वरै कँगाला बै शोभली खबर देणै री तैइयै हाँऊ चुनू सा । गुलाम अजाद कैरिनै, काणै हेरदै लागणा, दुःखी होर लाचार लोका तिन्हा पँधै जुल्म केरनु आलै ना बचाइणै । 19 होर परमेश्वरा ना आपणै लोका पँधै दया केरनै रा बौक्त आऊ सा । एसा गल्ला प्रगट केरनै री तैइयै परमेश्वरै हाँऊ भेजू सा । 20 एथा ना बाद यीशुए कताब बन्द केरी होर सेवकै रै हौथा ना कताब देइया बेठै । तैबै सभा घौरै रै सब लोका यीशु धिरै भाल्दै लागै । 21 तैबै यीशु तिन्हा बै बोल्दै लागै, “ओज जे पवित्र शास्त्रा ना तुसै शणु स एबै पूरा हुआ ।” 22 तौखै बेठै दै सैभी लोकै यीशु री सराहणा केरी होर तिन्हरै मुँहा ना निकुणु आई ज्ञानै री गल्ला शुणिया सैभै हेरान ती । ते एकी दूजे बै बोलदै लागै, “ऐ केण्डे होई सका सा कि ऐ युसुफा रा बेटा नी आँथी?” 23 यीशुए तिन्हा बै बोलू, “तुसा मू सँघे ऐ क्हावत जरूर बोलणी वेईद जी पहिलै आपणै आपू बै ठीक केर । जे चमत्कार तें कफरनहूमा ना केरै तिन्हा ओखै आपणै शैहरा ना बी केर ।” 24 पर हाँऊ तुसाबै सच बोला सा कि कोई भविष्यवक्ता(गुरु) आपणै शहरा ना आदर नी पाँदा । 25 ऐ सच सा कि जैबै परमेश्वरै रै भविष्यवक्ता एलियाह रै बौक्ता ना साढ़े त्रा वौषा तक गाश नी आऊ होर सारै ईसारइल देशा ना अकाल पौऊ, तैबै इस्राइला ना एतरी बोहू विधवा ती जौस बै मजती री जरूरत ती । 26 पर परमेश्वरै एलियाहा बै तिन्हा ना कौसी बी यहूदी विधवा आगै नी भेजू पर सारपत ग्रां री विधवा आगै भेजू जो यहूदी नी ती आँथी । 27 होर एलीशा भविष्यवक्ता(गुरु) रै बौक्ता ना इस्राइला ना बोहू सारै कोढ़ी ती पर तेईयै तिन्हा ना कोई बी ठीक नी केरु, सिर्फ सीरिया देशा रा नामान कोढ़ी ठीक केरु जुण कि यहूदी नी ती आँथी । 28 सभा घौरै रै लोकै जैबै ए गल्ला शुणी ता ते झिकुरे । 29 तिन्है लोकै उठिया यीशु शैहरा ना बाहरै खोलू होर स एकी ढौगा पँधै बै नेउ । जुणी पँधै स शैहर बैणू ती, एता ना बाद ते यीशु बै ढौगै बुन शेटणा चाह ती । 30 पर यीशु तिन्हा मॉँझे ना निकै होर तौखै ना भैगै ।

### यीशु चेट्ट फेसुदे माहणु बै ठीक केरा सी

31 तैबै प्रभु यीशु गलील जिल्लै रै कफरनहूम शैहरा बै नौठै होर रामै रै ध्याडै ना सभा घौरा ना जाइया उपदेश देदै रौहै । 32 तौखै भी लोका यीशु रै उपदेश

शुणिया हैरान हुरे किबैकि यीशु आपणें वचना बै पूरै हका सेंघे बोला ती ।  
 33 एक रोज जैबै यीशु सभा घौरा ना ती, तौखै चेट्ट फेंसूदा एक माणहु ती होर  
 सौ जोरा सेंघे क्रींजा (चीखा)मारीया बोलदा लागा, 34 "ओ नासरतै रै यीशु  
 मेरा होर तेरा कि संबंध? तू की आसाबै परेशान केरदा आऊ सा? आसा बै  
 नाश केरदा आऊ सा, हाँऊ जाणा सा कि तू कुण सा? तू परमेश्वरै भेजू दा  
 पवित्र माणहु सा ।" 35 यीशुए तेइबै बोलू, "चुप रोह ईई माणहु ना फेटै निकअ  
 ।" तैबै तेई चेट्टे स माणहु धौरती पेंधे छोट्ट होर तेई माणहु ना निकता । सैभै  
 लोका भाल्दै लागै दै ती । 36 तैबै लोका हैरान होइया एकी होरु बै बोलदै  
 लागै, "ईई रै बोलणें ना ऐण्ढी कि शक्ति सा कि चेट्ट बी इइरी शुणा सी होर  
 इइरी मना सी ।" 37 प्रभु यीशुए जे किछ केरु तेतै री खबर आंगी साही सारै  
 ना फैली ।

### यीशु बीमार माणहु बै ठीक केरा सा

38 यीशु सभा घौरा ना एणें ना बाद शमौनै रै घौरा बै नौठै । तौखै शमौनै री  
 शौशू बीमार ती । सैभै लोका यीशु आगै विनती केरदै लागै कि एसा बै ठीक  
 केरा । 39 यीशु तेसरै माँजै हागै खडै होइया जौरा ना डाँटा सी होर सौ ठीक  
 हुई । सौ खडी होइया यीशु ता तिन्हरै सेंघी बै रोटी त्यार केरदी लागी ।  
 40 जैबै धुपा ओऊडीदा लागा तैबै ते तेई ग्रँ रै सैभी बिमार माणहु बै प्रभु यीशु  
 आगै आणदै लागै होर ते प्रभु यीशु रै छुंणणें सेंघे ठीक होआ ती । 41 जेतरे  
 लोका बै चेट्ट फसू ती ता चेट्ट बी तिन्हा ना ऐण्ढा बोलदै-बोलदै निकआ ती,  
 "तू परमेश्वरा रा बेटा सा ।" किबैकि चेट्ट जाणा ती कि प्रभु यीशु परमेश्वरै भेजू  
 दा मसीह सा ।

### यीशु अराधनालय न प्रचार केरा सा

42 दुजै ध्याडी प्रभु यीशु झीशा एकी सुनसान जौगा बै प्रार्थना केरदै जाँदै  
 लागै ता लोके री बोहू बडी भीड तिनहाबै तोपदी तिन्हा आगै पुजी होर प्रभु  
 यीशु बै रोकदी लागी । 43 पर प्रभु यीशुए बोलू, "परमेश्वरै रै राज्य ना लोका  
 केण्ढे एजी सका सी, मूँ एसा गला र प्रचार केरना किबैकि परमेश्वरै हाँऊ ईई  
 कोमै री तेंइयै भेजू सा ।" 44 प्रभु यीशु यहूदी रै सभा घौरा ना जाइया प्रचार  
 केरदै रौहै ।

### यीशु पैहले आपणें चले बै बणा सी

5 एक रोज परमेश्वरा रा वचन शुणनै री तेंइयै जेबे लोके री भीड कडा हुई  
 ता यीशु गन्नेसरतै री झीलै रै बौदा ना खडै हुए ती । 2 यीशुए झीलै रै  
 बौदा ना दूर्ई किस्ती लागी दी हेरी होर मैच्छी दौकणु आए आपणी किशिते  
 छौडिया आपणें जा बै धोंदै लागै दै ती । 3 तिन्हा माँजै एक किस्ती शमौनै री  
 ती होर यीशु तेसा किशिते ना चैदिया लोका बै उपदेश देंदै लागै । 4 उपदेश  
 देरे ना बाद यीशुए शमौना बै बोलू, "आपणी किस्ती दुधै पाणी बै चला होर  
 मैच्छी दौकणै री तेंइयै जा शेट ।" 5 तैबै शमौनै यीशु बै बोलू, "ओ गुरु जी  
 आसै सारी रात मेहनत केरी पर किछ भी नी दौकी पर तुसै बोला सी ता  
 हाँऊ जा शेटणू ।" 6 जैबै तिन्है जा शेट ता तिन्है एतरी बोहू मौछी दौकी कि  
 तिनरै जा चिरिदै लागै । 7 तैबै तिन्है दुजी किस्ती रै सेंघी भी मजती केरनै री  
 तेंइयै शारै केरिया शाधै होर तिन्है दुए किस्ती एतरी भौरी कि ते डूबदी लागी  
 । 8 ईई चमत्कार हेरिया शमौन पतरस यीशु री जौंघा पेंधे पौऊ होर बोलू,  
 "गुरु जी मूँ हागै ना दूर जाआत, किबैकि हाँऊ पापी माणहु सा ।" 9 किबैकि  
 एतरी मौछी दौकणै री वजह ना तेईबै होर तेइरै सेंघी बै बडी हैरानी हुई ।  
 10 जव्दी रै बेटै याकूब होर यूहन्ना भी जो शमौनै रै सेंघी ती तिन्हा बै बी बडी  
 हैरानी हुई । तैबै यीशुए शमौना बै बोलू, "डौरदा मत औजा ना बाद त मूँ हागै  
 माणहु दौकिया आणनै । 11 तैबै तिन्है किशिते बौदा बै आणी होर ते सब किछ  
 छौडिया यीशु पिछै चैलै ।

### यीशु एकी कोढ़ी माणहु बै ठीक केरा सी

12 तैबै तिन्है किशिते बौदा बै आणी होर ते सब किछ छौडिया यीशु पिछै  
 चैलै । 13 तैबै यीशुए कोढ़ी आपणें हाँथा सेंघे छुंणु होर बोलू, "हाँऊ चाहा सा  
 कि तू ठीक हो ।" तुरन्त तेइरा कोढ़ खत्म होर स ठीक हुआ ।" 14 तैबै यीशुए

तेइबै हुकम धिना, "एसा गल तू कौसीबै हेरेई दसदा । पर जाइया यहूदी  
 पुजारी बै रियहा होर कोढ़ा ना ठीक हुएदैं लोका बै मूसै जे चडावा (बली)  
 चढाणें बै बोलू सा तेसाबै चढा ताकि लोक जाणलै कि तू ठीक हुआ सा ।"  
 15 पर यीशु रै बारै ना केरीदी ऐ गल आंगी साही फैलदी रौही होर लोके री  
 भीड यीशु री शिक्षा शुणनै री तेंइयै होर तिनरी बीमारी ना ठीक होंगै री तेंइयै  
 कैड्डी होंदी रौही । 16 पर यीशु तिन्हा ना दूर एकांत जगहा ना जाइया प्रार्थना  
 केरा ती ।

### यीशु ध्रंगै रै मरीजा बै ठीक केरा सी

17 एक रोज जैबै यीशु उपदेश देंदै लागै ती, तैबै तौखै फरीसी पंथे रै किछ  
 लोका होर यहूदी नियम सिखाणु आए किछ लोक बी तौखै बेटै दै ती जो कि  
 गलील होर यहूदिया जिल्लै रै हरेक ग्रँ ना होर यरुशलैमा ना आए ती ।  
 बीमारी ना लोका बै ठीक केरनै तेंइयै प्रभु री शक्ति यीशु सेंघे ती । 18 तेई  
 बौके किछ लोके एक ध्रंग्गा रा मरीज माँजै पेंधे आणु । तिन्है लोके मरीजा बै  
 घौरा भीतरै नेह्ले होर यीशु सामनै रखणें री बडी कोशिश केरी । 19 पर लोके  
 री बडी भीडे री वजह सेंघे ते मरीजा बै भीतरै नी नेई सकै ता तिन्है घौरै रै  
 छपरा पेंधे चैदिया किछ पोट पेचै होर सौ मरीज यीशु सामनै उतारु ।  
 20 यीशुए तिन्हा वशाह हेरिया तेई मरीजा बै बोलू, "ए ई बेटैया तेरै पाप माफ  
 हुए ।" 21 तैबै तौखै बेटै दै नियम सिखाणु आए होर फरीसी लोक आपू ना  
 वहस केरदै लागै, "ऐ कुण सा जो परमेश्वरै री निन्दा केरा सा? परमेश्वरै रै  
 सिवाए कोई बी पापा बै माफ नी केरी सकदा । 22 यीशुए तिन्हरै मनै रै वचार  
 जाणिया तिन्हा बै बोलू, "तुसै आपणें मना ना किबै वहस केरदै लागै सी?"  
 23 सान की सा, "ऐण्ढा बोलणा कि तेरै पाप माफ हुए या ऐण्ढा बोलणा सान  
 सा उठ होर आँढदा लाग ।" 24 पर तुसै जाणि लेआ कि माहू रै बेटै बै  
 यानिकी मुँबे एसा धौरती पेंधे पापा बै माफ केरनै रा भी हक सा ।" तेता ना  
 बाद यीशुए ध्रंगै रै मरीजा बै बोलू, "हाँऊ तौभै बोला सा उठ होर आपणें माँजै  
 चैकिया घौरा बै जा ।" 25 तैबै सौ मरीज एकदम उठू होर जुणी माँजै पेंधे स  
 सुता ती तेइ माँजै चैकिया परमेश्वरै री जय-जयकार केरदै-केरदै आपणें घौरा  
 बै नौठा । 26 तौखै बेटै दै लोका बडै हैरान हुए होर परमेश्वरै री जय-जयकार  
 केरदै लागै होर बोलदै लागै, "ओज आसै नोखी गला हेरी ।" 27 एता ना बाद  
 यीशु शैहरा ना बाहरै नौठै होर एक लेवी नाँ रा माणहु चुँगी लेणै री चोउकी  
 हागै बेटा दा हेरु होर तेइबै बोलू, "मूँ पिछै एज होर मेरा चला बैण ।" 28 तैबै  
 सौ सबकिछ छौडिया उठू होर यीशु पिछै चैलू । 29 बाद ना लेवियै यीशु री  
 तेंइयै एक बडी धाम रखी । सैभै चुँगी लेणू आए होर होरी लोके री एक बोहू  
 बडी भीड यीशु सेंघे रोटी खाँदी बेठी ती । 30 फरीसी होर धर्मगुरु यीशु रै चैलै  
 ना पुछदै लागै, "तुसै चुँगी लेणू आए सेंघे होर पापा लोका सेंघे किबै खा पीया  
 सी?" 31 यीशुए तिन्हा बै जवाब धिना, "ठीक माणहु बै वेयदै री जरूरत नी  
 होंदी पर बीमार माणहु बै वेयदै री जरूरत होआ सा ।" 32 यीशुए बोलू, "  
 तैण्ढाए हाँऊ धर्मी री तेंइयै नी बल्कि पापी री तेंइयै आऊ सा ताकि ते  
 आपणें पापा बै छौडलै ।"

### व्रत रै बारे न प्रश्न

33 तिन्है यहूदी नेतै यीशु बै बोलू, "यूहन्ने रै चले ता बार व्रत रखा सी होर  
 फरीसी लोके होर रै चेलै बी कई बार व्रत रखा सी, पर तेरै चेलै ता खाँदै-पीँदै  
 रौहा सी ।" 34 तैबै यीशुए तिन्हा बै बोलू, "जैबै तक लाडा सेंघे सा कि तुसै  
 बराती ना व्रत कराई सका सी?" 35 पर तिन्हा ध्याडै एणा जैबै लाडा बराती  
 ना लग केरिना तैबै तिन्हा व्रत केरना । 36 यीशुए तिन्हा बै एक होर उदाहरण  
 बी दसू "कोई बी माणहु नोंउए कपडै चिरिया पराणें कपडै ना नी जोडदा ।  
 अगर तैण्ढा केरला ता नोऊँआ कपडा चिरिना होर सौ पराणें कपडै सेंघे मेल  
 नी खाँदा ।" 37 तैण्ढाए ना कोई माणहु नोंउआ दाखरस चोमडै री पराणी थैली  
 ना भौरदा । अगर ऐण्ढा केरलै ता नोंउए दाखरसा पराणी थैली भोनणी होर  
 दाखरस ता थैली दुए नष्ट होणी । 38 पर नोंउआ दाखरस चोमडै री नोऊँई  
 थैली ना भौरना पौडा सा । 39 होर जुणियै पराणा दाखरस पीऊ सा सौ  
 नोंउआ दाखरस नी पीणा च़ाँहदा । किबैकि स ऐण्ढा बोला सा, "पराणा ऐ  
 दाखरस शोभला सा ।"

### यीशु रामें रै ध्याड़े रै बी प्रभु सी

6 एक बार रामें रै ध्याड़े ना यीशु ना जे रै छेतै धीरेबे जाँदे लागे ती । तैबे तिन्हरे चले सीला चोड़िया होर होथे लाइया मोई-मोइया खाँदे लागे ती । 2 तैबे किछ फरीसी लोकें यीशु बै बोलू, “तुसे एई कोमा बै किबै केरा सी जो अरामें रै ध्याड़े ना केरना ठीक नी ओथी ।” 3 यीशुए तिन्हा बै जवाब धिना, “जैबै दाऊद होर तेइरै सँधी भूखें ती ता दाऊद के की केरु?” कि तुसे तेइरै बारें ना पौदू? 4 सौ परमेश्वरें रै घोरा बै नौठा होर परमेश्वरा बै चढाईदी रोटी खाई होर आपणें सँधी बै भी धिनी जुणीबै कि सिर्फ पुजारी केलै खाई सका ती । 5 यीशुए तिन्हाबै ऐ बी बोलू, “माण्डु रा बेटा रामें रै ध्याड़े रा भी प्रभु सा ।”

### यीशु शुके दै होथा आळै बै ठीक केरा सा

6 एक होरी रामें रै ध्याड़े ना यीशु सभा घोरा ना जाइया उपदेश देदें लागे ती । तौखे एक शुके दै होथा आला माण्डु ती । 7 यहूदी पँडत होर पुजारी यीशु पँधे दोष लागे रा मौका तोपदें लागे ती कि यीशु रामें रै ध्याड़े ना शुके दै होथा आए बै ठीक केरा सा कि नी । 8 यीशु तिन्हरे मनै रै वचारा बै जाणा ती । यीशुए शुके दै होथा आए माण्डु बै बोलू, “उठ मुँझे खड़ा हो । सौ उठू होर मुँझे खड़ा हुआ ।” 9 यीशुए तिन्हा लोका बै बोलू, “हाँऊ तुसा ना पुछा सा कि रामें रै ध्याड़े ना भला केरना ठीक सा कि बुरा केरना?” जिदगी बचाणी या नाश केरनी? 10 यीशुए तिन्हा सँधी धिरे भाऊ होर तेई माण्डु बै बोलू, “आपणा होथ आगे केर । तेई माण्डुए आपणा होथ आगे केरु होर सौ भी बिलकुल ठीक हुआ ।” 11 धर्मगुरु होर फरीसी ऐ हेरिया झिकुरे होर आपू ना वहस केरदें लागे कि आसा यीशु रै खिलाफ की केरना ।

### यीशु आपणें बारा चेलै बै चुना सी

12 तिन्हा ध्याड़े ना यीशु ढोंगा पँधे प्रार्थना केरदें नौठे होर पूरी रात परमेश्वरा सँधे प्रार्थना केरने ना बिताई । 13 जैबै दोत हुई ता यीशुए आपणें चेलै आपू आगे शोधे होर तिन्हा ना आपणें बारा चले चुने होर तिन्हरे नाँ ए सी; 14 शमौन जौस रा नाँ यीशुए पतरस रैखू, पतरसा रा भाई अन्द्रियास, याकूब होर यूहन्ना, फिलिप्पुस, बरतुलमै । 15 मती, थोमा हलफई रा बेटा याकूब होर शमौन जुणी बै जलोतेस भी बोला ती । 16 तैबे यीशु ढोंगा पँधे ना आपणें चेलै सँधे भ्याऊँ आरे, होर तैइरै चेलै री एक बड़ी भीड़, सारें यहूदी प्रान्त, यरुशलैम शहर होर सूर होर सैदा शहरें रै समुद्री बौदें रै लोकें री एक बड़ी भीड़ तौखे हाजर ती ।

### यीशु शिक्षा देआ सा होर बीमारा बै ठीक केरा सा

17 ते यीशु री शिक्षा शुणदें होर आपणी बीमारी ना ठीक होणें री तैइरे आए ती । यीशुए चेट्ट फैसेदें लोक बी ठीक केरें । 18 सारें लोक यीशु बै छूणें री कोशिश केरदें लागे ती किबैकि स आपणी शक्ति सँधे सँधी बै ठीक केरा ती । 19 तैबे यीशुए आपणें चेलै धिराबै हेरिया बोलू,

### यीशु लोका बै आशीर्वाद देआ सा

20 धन्य सी तुसे जे गरीब सी, किबैकि परमेश्वर तुसरा राजा सा ।” होर तुसे तेइरी प्रजा सी । 21 धन्य सी तूसे, जे ऐबे भूखें सी । किबैकि तुसा तृप्त होणा, “धन्य सी तूसे जे ऐबे रोआ सी, किबैकि तुसा होसणा ।” 22 “धन्य सी तूसे जैबे माण्डु रै बेटै री वजह ना यानि की मेरी वजह ना लोका तुसा सँधे वैर रखलें, तुसाबे बुरे बोलिया खोललें होर, तुसरी निन्दा केरलें, होर तुसरा बुरा चाहलें ।” 23 जैबे तुसा सँधे ऐण्डा होला ता तुसे खुश होर मग्न होईत, किबैकि तुसरी तैइयै स्वर्गा ना बड़ा इनाम रखू सा । याद रैखा कि तुसा सँधे बैर रैखणू आए रै बजुर्ग बी भविष्यवक्ता सँधे ऐण्डा केरा ती । 24 पर तुसे जे सेठ सी तुसरें दुःखें रै ध्याड़े एण । किबैकि तुसाबे आपणा पूरा सुख चैन मिलदा लागे सा 25 तुसे जे ऐबे रौजे-पुजे दै सी, तुसरें दुःखें रै ध्याड़े एण । किबैकि तुसा भुखिणा । औज जे तुसे होसा सी तुसरें राणें रै ध्याड़े एण । किबैकि तुसा

शोग मनाणा होर रोणा । 26 केतरी दुःखें री गल सा जैबे सारें माण्डु तुसाबे भला बोललें, किबैकि तिन्हरे बुजुर्गें भी झूठें भविष्यवक्ता बै भला बोला ती ।

### बैईरी सँधे भी झुरी रखा

27 पर हाँऊ तुसा शुणनू आए बै बोला सा, “आपणें बैईरी सँधे झुरी रखा जो तुसा सँधे बैर रखा सी तिन्हा भला केरा ।” 28 जुणा तुसाबे श्राप देआ सी तिन्हा बै आशीष देआ होर जुणा तुसरी बेइजती केरा सी तिन्हरी तैइयै प्रार्थना केरा । 29 जुण तेरै एकी गलोटें ना थप्पड़ बाहला ता आपणा दूजा गलोटो बी तेई धिराबे फेर, जुण तेरा कोट छड़ाह्ला ता तेईबै आपणा कुरता भी नेणें दै । 30 कौसी बी मुँगणू आए बै नाँह मता केरदें, अगर तुसा ना कोई तुसरी चीज नेआ सा ता तेसा वापस मता मुँगदें । 31 जैण्डा वर्ताव तुसे होरी ना चाहा सी तुसे भी तिन्हा सँधे तैण्डा ऐ वर्ताव केरा । 32 अगर तुसे आपू सँधे झुरी रखणू आए सँधे झुरी रखा सी ता तुसरी सराहना कुणी केरनी, किबैकि पापी लोका बी आपू सँधे झुरी रखणू आए सँधे झुरी रखा सी । 33 अगर तुसे आपू सँधे भला केरनु आए रा भला केरा सी ता तुसाबे तेतै री कि सराहना मिलणी किबैकि पापी माण्डु बी ऐण्डा केरा सी । 34 अगर तुसे तिना लोका बै उधार देआ सी जुणी ना वापस मिलणें री आशा रखा सी ता तुसाबे तेतै री तैइयै कि प्रशंसा मिलणी? किबैकि पापी माण्डु बी एकी दुजे बै उधार देआ सी ताकी तिनाबे तेतरें देबुए वापस मिललें । 35 बल्कि आपणें बैईरी सँधे झुरी रखा होर तिनरा भला केरा । उद्धार देइया वापस पाणें री इच्छा मता रखदें तैबे तुसाबे बड़ा इनाम मिलणा होर तुसा परम प्रधान परमेश्वरें री सन्तान बणना, किबैकि परमेश्वर पापी होर धर्मी दुही पँधे दया केरा सा । 36 जैण्डा तुसरा बापू(परमेश्वर) दयालू सा, तुसे बी दयालू बैणा ।

### दोष मता लादें

37 कौसी पँधे दोष मता लादें । तैबे तुसा पँधे बी दोष नी लागणा । अगर तुसे होरी बै माफ केरलें ता तुसाबे बी माफी मिलणी । 38 होरी बै देआतू । तैबे तुसाबे भी मिलणा । पूरा नापी-नापिया, दबाई-दबाइया होर हिलाई-हिलाइया तुसाबे देईणा । जौस नापा सँधे तुसे नापलें तेई नापा सँधे तुसाबे बी नापिणा । 39 यीशुए तिन्हाबै एक उदाहरण बी दसू, “काणा काणेंबै बौत नी रिहाई सकदा किबैकि ऐण्डा केरने सँधे तिन्हा दुही खाँचें बै पौड़ना ।” 40 चेला आपणें गुरु ना बड़ा नी होंदा । पर पूरी रीतिरे तालीम लेरे ना बाद सौ चेला गुरु रै समान होआ सा । 41 “तू आपणें भाई री औछी रै आह्ले साही होछी गलती बै किबै हेरा सा जैबे कि तौ ना आपणी औछी रै लकड़ा साही बैड़ी गलती नी हेरिदी ।” 42 जैबे त ना आपणी औछी रै लकड़ा साही बैड़ी गलती नी हेरिदी ता तू आपणें भाई बै कैण्डे बोली सका सा कि भाई रुक, हाँऊ तेरी औछी रै आह्ले बै खोलणू? एई ढोंगिया, पहलें तू आपणी औछी रै लकड़ा बै ता खोल, तैबे तू आपणें भाई री औछी रै आह्ले बै शोभली तरहा हेरिया खोली सका सा । 43 कौसी भी शोभलें बूटें ना माडें फ़ौ नी लागदें होर ना माडें बूटें ना शोभलें फ़ौल लागी सकदें । 44 किबैकि हरेक बूटा आपणें फ़ौला सँधे पछियाणिया सा किबैकि कोई बी माण्डु झोकड़ा ना अँजीर नी चोड़ी सकदें होर ना जिद्वी ना अँगूर चोड़ी सकदें । 45 भला माण्डु आपणें मनै रै भलें भण्डारा ना भली गल्ला खोला सा होर बुरा माण्डु आपणें मनै रै बुरें भण्डारा ना बुरी गल्ला खोला सा । किबैकि जेकिछ मना ना भौरुआदा सा सौहें मुँहा ना निकला सा ।

### एक पक्की मिन्याद बणाणी

46 जैबे तुसे मेरी गल्ला नी मँनदे, ता तुसे मुँबे प्रभु-प्रभु बोला सी तेथा रा की फायदा? 47 जुण मूँ आगे एजा सा होर मेरी गल्ला बै शुणिया तिन्हा बै मँना सा हाँऊ तुसाबे दस सा कि स माण्डु कुणी साही सा; 48 सौ तेई माण्डु साही सा जुणियें दुधें कोतिया मिन्याद पाइया घोर बणाऊ । बाद ना जैबे औद-काठ आऊ ता तेई घौराबे किछ फर्क नी पौऊ किबैकि तेइरी मिन्याद पक्की ती । 49 पर जुण मेरी गल्ला बै शुणिया नी मँनदा स तेई माण्डु साही सा जुणियें आपणा घोर मिन्यादी बौर काची जैगा पँधे बणाऊ । जैबे औद आऊ तैबे सौ घोर ढौऊ होर बुरी तरहा चुटू ।

### सेनै रै मुखिया रा वशाह

7 जैबै यीशुए लोका सँघे ऐ सारी गैला केरी ता ते कफरनहमा शहरा बै आरे । 2 तौखे रोमी सेनै रै मुखिया रा एक प्यारा नोकर बिमार ती होर सौ मौरनु आला ती । 3 जैबै सेनै रै मुखिये यीशु रै बारै ना शुणू ता तेइयै कई यहूदी बुजुर्ग यीशु हागै विनती केरदै भेजै ताकि यीशु एजिया तेइरै नोकरा बै ठीक करलै । 4 जैबै ते यीशु हागै पुजै ता तिन्हे सच्यै मना सँघे यीशु हागै विनती केरी “कि सौ एजिया तेई माणहु री मजत करला । तिन्हे बोलू ऐ मुखिया तुसरी मजती पाणै रै लायक सा । 5 किबैकि स आसरै लोका सँघे झुरी केरा सा होर तेइयै आसरी तँइयै धर्म-सभा घोर बणाणै री तँइए ढ़ेबुए धिने सी । 6 तैबै यीशु तिन्हा सँघे नौठै । यीशु आजी घौरा ना थोडी दूर ती कि सेनै रै मुखिये आपणै सँघी यीशु हागै एण्डे बोलणै री तँइयै भेजै कि, “ओ प्रभु जी, तुसे आपू बै एतरा कष्ट मता देदै किबैकि हाँऊ एस लायक नी आँथी कि तुसे मेरै घौरा बै एलै ।” 7 तँइए हाँऊ तुसा सामनै एणै रै लायक आपू बै नी समझदा, तुसे मेरै नोकरा बै ठीक होणै री तँइयै सिर्फ वचन बोललै ता तेई ठीक होणा । 8 एथा पँधे मुँबे वशाह सा किबैकि हाँबी कौसी अधिकारी रै अधीन कोम केरनुआ माणहु सा होर मेरै अधीन भी किछ सपाही सी, जैबै हाँऊ एकी बै एणै बै बोला सा ता स एजा सा होर दुजै बै जाणै बै बोला सा ता सौ जा सा होर जैबै हाँऊ आपणै नोकरा बै बोला सा एण्डा कोम केर ता सौ तेई कोम केरा सा । 9 तिन्हा यहूदी बजुर्ग रै द्वारा मुखिये री इना गैला शुणिया यीशुए आपू पिछे एन्दी लागी दी लोकै री भीडा धिराबै हेरिया बोलू, “हाँऊ तुसाबै बोला सा कि एण्डा वशाह केरनु आला मैं इस्त्राइला ना भी नी हेरू ।” 10 तैबै भेजै दै तिन्हे लोकै तेई मुखिये रै घौरा जाइया हेरू ता सौ नोकर ठीक हुआ ती ।

### यीशु विधवै रै बेटे बै जिन्दा केरा सा

11 तैबै ना बाद तुरन्त यीशु नाइन नाँ रै ग्रां बै नौठै । तिन्हेरै चेलै होर लोकै री बोहू बडी भीड़ यीशु सँघे ती । 12 जैबै यीशु ग्रां बाहरै पुजै ता लोकै तिसै आघे जुआन माहू रा एक मुर्दा नेणा लाऊ दा ती । सौ एकी विधवा रा केल्हा बेटा ती होर ग्रां रै लोकै री बोहू बडी भीड़ तेसा विधवा सँघे ती । 13 तेसा विधवा हेरिया प्रभु बै तेसा पँधे दया आई होर तेसा विधवा बेटडी बै बोलू, “रोंदी मत ।” 14 तेथा ना बाद यीशु आघे नौठै होर तिन्हे सौ धड़ छुँगू ता ते धड़ चकणू आए रुकै । तैबै यीशुए बोलू, “एई जुआना, हाँऊ तौभै बोला सा खड़ा उठ ।” 15 तैबै स मुँआदा माणहु खड़ा उठू होर बोलदा लाग़ा । तैबै यीशुए स तेईरी आमा हागै धिना । 16 तैबै तौखलै सँभि लोका बै बडी डौर पौई । ते परमेश्वरै री जयकार केरिया बोलदै लागै, “आसरै बिचा ना एक महान भविष्यवक्ता पैदा हुआ सा, होर परमेश्वर आपणै लोकै री मजती री तँइयै आऊ सा ।” 17 यीशु रै बारै ना ऐ गल सारै यहूदिया होर और-पौरलै सँभी एरिये ना फैली ।

### यहूना बसिस्मा देणु आळै रा प्रशान

18 इन्हा सँभी गल्लै रै बारै ना यहून्नै रै चेलै यहूना बै सबकिछ दैसू । 19 तैबै यहून्नै आपणै दूई चेलै शाधे होर प्रभु हागै ऐ पुछणै री तँइयै भेजै, “एणू आए मसीह तुसे सी कि आसै कौसी होरी रा इंतजार केराऊँ?” 20 तिन्हे माहूए यीशु हागै एजिया बोलू, “आसै यहून्नै बपतिस्मै देणू आए ऐ पुछणै री तँइयै भेजै सी कि एणू आए मसीह तुसे सी या आसा कौसी होरी रा इंतजार केरना?” 21 ठीक तेही बौके यीशुए बोहू सारै लोका बीमारी ना, दुःखा ना, होर चेटू ना ठीक केरै होर काणै बै हरनै री शक्ति धिनी; 22 तैबै यीशुए तिन्हा बै बोलू, “जेकिछ तुसे हेरू होर शुणू तेई जाइया यहूना बै दैसा कि काणै हेरा सी, लँगडै ओंढा सी होर कोडी ठीक केरिया सी, टाऊणै शुणा सी होर मुदँ जिंदै केरिया सी होर कँगाला बै परमेश्वरै री शोभली गला दसिया सी । 23 धन्य सी ते जुणा मूँ पँधे वशाह केरना नी छौडदै ।” 24 जबै यहून्नै रै चेलै वापस नौठै ता यीशु यहून्नै रै बारै ना लोका बै बोलदै लागै, “तुसे सुनसान जैगा बै कैण्डे माहू बै हेरदै नौठै ती? कि तुसे बागरियै हिलणु आई झलामा साही पतलै माहू बै हेरदै नौठै ती?” 25 नी ता तुसे होरी कैण्डे माहू बै हेरदै तौखे नौठै दै ती । कि

तुसे मैंहगै झिकडै लाउएदै माणहु हेरदै नौठै दै ती? शुणा, मैंहगै झिकडै लाणू आए होर सुख चैना सँघे रोहणू आए ता महला ना मिला सी सुनसान जैगा ना नेई । 26 ता तुसे फिर कैण्डे माहू बै हेरदै नौठै ती? तुसे कि कौसी भविष्यवक्ता बै हेरदै नौठै ती? हा, पर हाँऊ तुसा बै बोला सा, “स भविष्यवक्ता ना भी बड़ा सा ।” 27 यहूना सौहै भविष्यवक्ता सा जोस रै बारै ना शास्त्रा ना लिखू सा: शुणा, मूँ त ना आगै-आगै आपणा दूत भेजणा होर तेई तेरी तँइयै बौत तयार केरनी । 28 हाँऊ तुसाबै बोला सा जुणु बेटडी ना पैदा हुऐ सी तिन्हा मुँजै यहूना ना बड़ा कोई नी आँथी पर जुणु परमेश्वरै रै राज्य ना सँभी ना ओछा सा स यहूना ना बड़ा सा । 29 आम लोकै होर चुंगी लेणू आए ऐ शुणिया यहूना ना बपतिस्मा लेइया ऐ मैनु कि परमेश्वरा रा रस्ता सच्यै सा । 30 पर फरीसी होर धर्मविधि सिखाणू आए लोकै यहूना ना बपतिस्मा नी लेऊ होर एण्डे तरहै परमेश्वरै री इच्छा रा नाँह केरू । 31 “एसा जुगा रै लोका बै हाँऊ कुणी साही दसनू कि ते कैण्डे सी?” 32 ते बजारा ना बेटे दै तिन्हा शोहरू साही सी जुणा आपणै सँघी सँघे शिकायत केरा सी कि आसै तुसरी तँइयै बैउसरी बजाई पर तुसे नी नौचै, आसै तुसरी तँइयै दुःख मनाऊ लाई पर तुसे नी रुणै । 33 यहूना बपतिस्मै देणू आए कदी बी रोटी नी खाई होर ना दाखरस पीऊ, पर तुसे बोला सी तेई ना चेटू सा । 34 पर जैबै माणहु रा बेटा खाँदा-पिंदा आऊ ता तुसे बोला सी कि हेरा ऐ ता खांची होर पियकड सा । होर ऐ ता चुंगी लेणू आए होर पापी रा सँघी सा । 35 पर जुणा परमेश्वरै रै ज्ञाना पिछे चैला सी तिन्हेरी जिंदगीए लाइया ज्ञान सचा ठहरा सा ।

### यीशु पापण बेटडी बै माफ़ केरा सी

36 एक रोज कौसी फरीसी यीशु हागै विनती केरी कि सौ तेई सँघे रोटी खाला, ता यीशु तेई सँघे तेइरै घौराबै नौठै होर रोटी खाणै री तँइयै बेटै । 37 तेई ग्रां ना एक एण्डी बेटडी ती जो पापै री जिंदगी जिंदी लागी दी ती । जैबै तेसा बै ऐ पता चलू कि यीशु फरीसी रै घौरा ना रोटी खाँदै लागै सी, ता सौ बेटडी संगमरमरै रै भांडे ना इत्र लेइया आई, 38 सौ बेटडी यीशु री जोंघा हागै खडी होइया रोंदी लागी । तेसै आपणै ओछुयै लाइया यीशु री जोंघा सिनी केरी होर आपणै चोढ़ै लाइया टुशदी लागी, तेसै यीशु री जोंघा ना मांकी धिनी होर इत्र पाऊ । 39 एसा बै हेरिया स फरीसी आपणै मना ना सोचदा लाग़ा, “अगर ऐ भविष्यवक्ता होंदा ता जाणदा कि जुणु बेटडी एईबै छुंगदी लागी सा ऐ कण्डी सा होर कैण्डी पापै री जिंदगी जिंदी लागी सा ।” 40 यीशुए तेई फरीसी बै बोलू, “एई शमौना हाँऊ तौभै किछ बोलणा चाहा सा ।” फरीसिए बोलू, गुरु जी बोलात । 41 यीशुए बोलू, “कौसी सेठे रै दूई कर्जदार ती । एक पोज शौऊ चाँदी रै सिक्के रा होर दूजा पजाह चाँदी रै सिक्के रा कर्जदार ती ।” 42 जैबै ते कर्जा नी देई सकै ता तेई सेठे तिन्हा दुही रा कर्जा माफ़ केरू । एबै तिन्हा दुई ना सेठा सँघे कुणी ज़ादा झुरी केरनी? 43 शमौने बोलू, मेरै खयाल ता जुणी रा बोहू कर्जा माफ़ हुआ । यीशुए तेइबै बोलू, “तँ ठीक बोलू ।” 44 तेथा ना बाद यीशुए तेसा बेटडी धिराबै फिरिया शमौना बै बोलू, “एसा बेटडिऐ जे केरू कि तू हेरा सा?” हाँऊ तेरै घौरा आऊ तँ मुँबे जोंघा धोणै री तँइयै पाणी तक नी धिना, पर एसै बेटडिये आपणै ओछू सँघे मेरी जोंघा सिनी केरी होर आपणै चोढ़ै सँघे टुशी । 45 तँ मुँबे माँकी नी धिनी पर जैबै ना लेइया हाँऊ आऊ सा एसै बेटडिये मेरी जोंघा ना मांकी देणी नी छौडी । 46 तँ मेरे चोढ़े ना तेल नी मौऊ, पर एसै बेटडिये मेरी जोंघा पँधे इत्र पाऊ । 47 एबै हाँऊ तौभै बोला सा, “एसा बेटडी रै पाप जे बोहु ती ते माफ़ हुऐ, किबैकि एसै बोहु झुरी केरी, पर जुणी रा थोड़ा माफ़ हुआ तेई झुरी बी थोडी केरनी ।” 48 तेथा ना बाद यीशुए तेसा बेटडी बै बोलू, “तेरै पाप माफ़ हुऐ ।” 49 तैबै ते लोका जुणा यीशु सँघे रोटी खाँदै बेटे दै ती आपणै-आपणै मना ना सोचदै लागै, “ए कुण सा जो पापा बै बी माफ़ केरा सा?” 50 पर यीशुए तेसा बेटडी बै बोलू, “तँ वशाह केरू तैबै तू बची, परमेश्वरै री शांति पाईया घोरा बै जा ।”

### यीशु री सेवा केरणु आळी बेटडी

8 एता ना बाद यीशु शहरा-शहरा ना होर ग्रां-ग्रां ना परमेश्वरै रै राज्य रा प्रचार केरदै लागै, होर ते बारा चेलै बी यीशु सँघे ती । 2 किच्छ बेटडी भी ती जे चेटू ना होर बीमारी ना ठीक केरी दी ती ते यीशु सँघे ती होर ते ए

सी: मगदला ग्रॉं री मरियम जौसा ना यीशुए सोत चेटू खोलै दै ती, 3 राजा हेरोदेसै रै मुन्शी खुजै री लाडी योअन्ना, सुसन्ना होर बोहू सारी बेटडी ती | ते आपणी कमाई ना यीशु होर तिन्नै चले री सेवा केरा ती |

### बेजै बाहणु आळै रा उदाहरण

4 जैबे शहरा-शहरा ना एजिया लोके री बोहु भीड़ यीशु हागै कैठा हुई ता यीशुए तिन्हाबै एक कैथ दैसी | 5 "एक बेजै बाहणु आ बेजै बाहदा लागा | बाहदी घेरै किच्छ बेजा बाँतै रै बाँदा ना पौऊ होर लोके री जोंघा हेठै जैखडुआ होर सौं चिडुए चुगू |" 6 किच्छ बेजा रडखडी जमीना पेंधे पौऊ, सौं बेजा निकता पर पाणी नी मिलणै री बजह सेंधे ते बुटै शुके | 7 किच्छ बेजा कोन्डै रै झोकडा मॉंझै पौऊ होर झोकड बढै होर तिन्हा ते बुटै दवाए | 8 किच्छ बेजा शोभली जमीना ना पौऊ | सौं बेजा निकता होर शौऊ गुणा फौल आणू | तुई न बाद यीशुए जोरा सेंधे बोलू, "जुणी आगै शुणनै रै कोन सी ते, ठीक ढेंधे शुणा होर तेथा रा पालन केरा |"

### कैथा रा मतलब

9 चेलै यीशु ना ऐसा कैथा रा मतलब पुछू | 10 तैबे यीशुए तिन्हा बे जवाब धिना, "तुसाबै परमेश्वरै रै राज्य रै भेद री सोमझ धिनी दी सा पर होरी बै ए कैथा ना दैसीया सा; ताकि ते हेरिया बी नी हेरलै होर शुणिया बी नी सोमझलै |

11 ऐसा कैथा रा मतलब ए सा बेजा परमेश्वरा रा वचन सा | 12 किछ लोका बाँतै रै बाँदा ना पौए दै बेजै साही सी | ए लोका परमेश्वरा रा वचन ता शुणा सी पर शैतान एजीया तिनरै मना ना तेइ वचना बै नेआ सा ताकि तिन्हा वचना पांघे बशाह केरिया मुक्ति नी पाई लोडी | 13 किछ लोका रडखडी जमीना पेंधे पौए दै बेजै साही सी, ते परमेश्वरा रा वचन ता शुणा सी होर वचना बै खुशी सेंधे ग्रहण बी केरा सी पर वचन तिनरै मनै री गहराई तक नी पुजै री वजहा सेंधे ते थोडी देर ता बशाह केरा सी पर जैबे मुश्कला एजा सी ता ते तेइ वचना पेंधे बशाह नी रखदै | 14 किछ लोका तेई झोकडा मॉंझै पौए दे बैजै साही सी, ते लोका वचन ता शुणा सी होर ग्रहण भी केरा सी पर आगै चैलदै-चैलदै ते चिंता ना, धैन-दौलता ना होर जिन्दगी री मौज-मस्ती ना फसा सी, होर तेतै री बजहा सेंधे ते परमेश्वरा बै खुश केरना रा कौम नी केरदै | 15 पर किछ लोका शोभली जमीना साही सी ते सचै होर भलै मनै वचना बै शुणिया ग्रहण(धारण) केरा सी होर ते शौ गुणा फौल आणनू आए बुटै साही परमेश्वरा बै खुश केरना रा कौम केरदै रोहा सी |

### दियै रा उदाहरण

16 कोई भी माणहु दियै पकेईया भाण्डै लाइया नी खौटदा, होर ना ता तेईबै मांजै थालै रखदा, पर दियै बै पकेईया उथडी जैगहा पेंधे रैखा सी ताकि भीतरै एणु आए बै पयाशा होला | 17 किबैकि किच्छ भी छिपु दा नी आँधी जुण पयाशैना नी आंणीना, होर ना कोई गुप्त गला सी जे प्रगट नी हांणी | 18 एबै होशियार रोहात् कि तुसै कौस रीतिये मेरी गैला शुणा सी? किबैकि जुणी हागै सा तेइबै होर भी देणा, होर जुणी हागै नी आँधी तेइना सौं बी वापस मुणिया जुणीबै सौं आपणा बुझा सा |

### यीशु री आमा होर भाई

19 एक रोज यीशु री आमा होर भाई तिन्हा बै मिलदै आए | पर भीडे री वजहा सेंधे तै तिन्हा आगै नई पुजी सकै | 20 तैबै कौसीयै तेइबै बोलू, "तूसरै आमा होर भाई बाहरै खंडै सी: ते तूसा सेंधे मिलणा चाहा सी |" 21 तैबै तेइयै जबाब धिन्हा, "मेरी आमा होर भाई ता ए सी जे परमेश्वरा रा वचन शुणा सी होर तिन्हा पेंधे चैला सी"

### यीशु आंधी बै शान्त केरा सी

22 एक रोज यीशु आपणै चेलै सेंधे एकी किश्ति ना चढै होर यीशुए चेलै बै बोलू, "एजा आसा झीला पारा बै जाणा |" तैबै तिन्हा किश्ति खोली होर ते

जांदै लागै | 23 जैबै ते किश्ति चलांदै लागै ती तैबै यीशु सुतै दै ती | झीला ना औढ-काठ आऊ होर किश्ति पाणी सेंधे भोरीदी लागी होर तिन्हरी जिन्दगी खतरै ना पौई | 24 तैबै तिन्हा भेटी एजीया यीशु बजौयै (जगायै) होर बोलू, "गुरुजी-गुरुजी आसा बै बचात् आसै नाश होद लागै दै सी |" तैबै यीशुए औढ-काठा बै बोलू शाँत हो होर सौं शाँत हुआ 25 तैबै यीशुए तिन्हा बै बोलू, "तूसै बशाह किबै नी केरु?" ते डोरै होर हेरान होइया आपु ना बोलदै लागै, "ए कुण सा जे बागर होर पाणी बै बी आज्ञा(हुकुम) देआ सा होर ते ऐइरी मैना सी |"

### यीशु चेटू फेसुदै माणहु बै ठीक केरा सी

26 तैबै ते गिरासेनियै रै तेइ शैहरा ना पुजै जुण गलील झीलै रै पूर्व दिशा ना ती | 27 जैबै यीशु बाँदा पेंधे किस्ती ना उतरै ता तिन्हा बै तेई शैहरा रा एक माणहु मिलू जुणबै चेटू फेसुदै ती | सौं बाँहू रोजा ना झीकडै(कपडै) नीती लांदा होर ना घौरा ना नीती रेंहदा, सौं शमशान घाटा ना रोहा ती | 28 जैबै तेइयै यीशु हेरू ता स क्रीजा मारदा लागा होर तेइरै सामनै लोमै पौडिया जोरा सेंधे बोलू, "हे परमप्रधान परमेश्वरै रै बेटै यीशु, मेरा होर तेरा की संबंध सा | हांउ तुसा हागै विनती केरा सा मुँवै कष्ट मता दंदै |" 29 किबैकि यीशु तेसा बुरी आत्मा बै तेई माणहु ना फेटै जाणै री आज्ञा दंदै लागै ती किबैकि स बुरी आत्मा तेई माणहु बै घैडी-घडिये आपणै बैशा ना केरा ती | लोका तेइबै शांणीयै होर बेडिये लाइया बोना ती | पर सौं तिन्हा शांणी होर बेडी बै चोडा ती होर सौं चेटू तेइबै एकांत जैगहा ना भगा ती | 30 यीशुए तेइना पुछू, "तेरा नाँ की सा?" तेइयै बोलू "सेना" किबैकि तेइबै बोहु सारी बुरी आत्मा फेसी दी ती | 31 तैबै चेटुए यीशु बै बोलू, "आसाबै नरकै रै कुण्डा बै जाणै री आज्ञा मता दंदै |" 32 तौखे दौगा ना सुअरा रा एक छुण्ड चौरदा लागा दा ती | चेटुए यीशु हागै विनती केरी कि आसाबै इन्हा सुअरा बै फसणै री आज्ञा दैआत् | यीशुए ते चेटू सुअरा बै जाणै धिनै | 33 तैबै स चेटू तेई माणहु ना नीकलीया तिन्हा सुअरा बै फेसू होर सौं पूरा छुण्ड दौगै भयाऊ झीला बै पौउ होर स खत्म हुआ 34 सुअरा चारनू आए ए सब हेरिया भैगै होर ग्रॉं ना होर औरी-पौरियै रै भागा ना जाइया होरी बै बी दैसू | 35 लोका ए सब हेरदै आए होर तिन्हा स माणहु झिकडै लाया यीशु री जोंघा हागै सचते बेठा दा हेरू होर ते डोरै | 36 हेरनू आए सैभी लोकै तिन्हा बै दैसू कि ए माणहु कैण्डै तरहै ठीक हुआ | 37 तैबै गरसेणी रै औरा-पौरलै सैभी लोकै यीशु आगै तौखना फेटै जाणै री तैइयै विनती केरी | किबैकि तिन्हा बै बडी डोर पौई | यीशु झीला ना पार जाणै री तैइयै किश्ति ना बेटै | 38 जुणी माणहु ना यीशुए चेटू खालू ती सौं यीशु हागै विनती केरदा लागा, "मुँबे आपू सेंधे एणै दै |" पर यीशुए तेइबै विदा केरिया बोलू: 39 "तू आपणै घौराबै जा होर लोका बै दैस कि परमेश्वरै तेरी तैइयै कण्डा अदभुत कोम केरुदा सा |" सौं माणहु ग्रॉं ना जाइया सैभी लोका बै दैसदा लागा कि यीशुए मेरी तैइयै काण्डै बडै-बडै कोम केरै |

### यीशु याईरै री मुँईदी बेटी होर एक बीमार बेटडी बै ठीक केरा सा

40 यीशु जैबे वापस आए ता लोकै तिन्हा स्वागत केरू होर खुशी-खुशी तिन्हा सेंधे मिलै, किबैकि ते बडी बेसब्री सेंधे तिन्हा इंतजार केरदै लागै दै ती | 41 तैबै याईर नॉं रा एक माणहु यीशु हागै आऊ जे कि धर्म सभा घौरा रा मुखिया ती स यीशु री जोंघा पेंधे पौऊ होर विनती केरदा लागा कि मेरै घौराबै चोला | 42 किबैकि मेरी ऐकै बेटी सा जो बारा बौषै री सा होर स मौरनू आई सा | जैबै यीशु जांदै लागै दै ती तैबै बाँहू सारै लोका तिन्हा सेंधे ती | 43 तौखे एक बेटडी ती जुणीबै बारा बौषा ना लोहु बँहणै री बीमारी ती, होर तेसै आपणी सारी कमाई लाजी ना खर्च केरी ती | तैबै बी सौं ठीक नी हुई | 44 तेसै पीछे ना एजीया यीशुरा कुरता छुंगू होर तेसरा लोहु बँहणा एकदम बंद हुआ | 45 तैबै यीशुए बोलू, "हाँऊ कुणीयै छुंगू?" जैबै सब लोका शुणिया मुकरदै लागै, तैबै पतरसै होर तेइरै सेंघीयै बोलू, "ओ स्वामी, बोहु भीडै रै कारण लोका तुसावै छुंगदै लागै सी |" 46 पर यीशुए बोलू, "कौसीयै हांउ छुंगू सा, किबैकि मुँबे पता चैलू होर मुं ना सामर्थ निकती |" 47 जैबै तेसै बेटडीए हेरू की हाँऊ छुपी नी सकदी स डोरै होर कोमदै-कोमदै यीशु री जोंघा पेंधे पौई | तैबै तेसै सैभी लोका सामनै दैसू, तेसै कुणी बजहा सेंधे ते छुंगै होर सौं

काण्डे बीमारी ना एकदम ठीक हुई | 48 यीशुए तेसाबै बोलू, "बेटी तेरै बशाहै तू ठीक केरी, शोभली तैरहै घौराबै जा | 49 जैबै यीशु एण्डा बोलदैं लागै ती तैबै कौसीयै सभा घौरा रै मुख्यै रै औखा ना ऐजीया बोलू, "तेरी बेटी मुँईदी सा, ऐबै गुरु बै कष्ट मता देदैं |" 50 पर जैबै यीशुए ऐ शूणू ता तिन्हाबै जबाब धिना, "बिल्कुल मत डौरदा, बशाह रख ता तेसा ठीक होणा |" 51 जैबै ते तेई घौरा बै पुजै ता यीशुए पतरस, यूहन्ना, याकूब होर तेसा शोहरी रै आमा-बापू छौड़िया होर कोई आपु सँघै भीतरै नीं ऐणै धिनै | 52 सैबै लोका तेसरी तैइयै रौंदै लागै ती, पर यीशुए तिन्हा बै बोलू, "रौंदै मता; सौ मूँईदी नी आँथी, पर सोंदी लागी सा |" 53 ते जांणा ती की, ऐ मुँईदी सा यीशु रा मजाक उडांदै लागै | 54 पर यीशुए तेसरा हौथ ढौकिया बोलू, "हे बेटी उठ |" 55 तैबै सौ जिन्दी हुई, होर सौ एकदम खेडी हुई, तैबै यीशुए तिन्हा बै बोलू ऐसा बै किच्छ खाणै बै दैआत | 56 तेसरै आमा-बापू हँरान हुऐ, पर यीशुए तिन्हा बै आदेश धिना जे किच्छ औखै हुआ सा कौसीबै हेरेइत दैसदैं | |

### यीशु आपणै बारा चेलै बै भेजा सी

9 एक रोज यीशुए आपणै बारा चेलै शाधै होर तिन्हा बै सब चेटू होर हर किस्मै री बिमारी बै दूर करनै री शक्ति होर हक धिना | 2 तैबै ना बाद यीशुए ते परमेश्वरै रै बारै ना प्रचार केरदैं होर बीमारा बै ठीक केरदैं भेजै | 3 तिन्हाबै भेजदी घेरै यीशुए तिन्हा बै बोलू, "बौतै री तैइए किछ मतेइत् नेंदैं, ना शोठा, ना रोटी, ना झोआ ना ढेबुऐ होर ना दुई-दुई कुरतै | 4 जुणी बी घौरा बै तुसै जालै, जाँ ढौई तुसै तेई ग्रॉ ना प्रचार केरलै ता तेही घौरा ना रौहीत् | 5 जुणी ग्रॉ ना लोका तुसाबै ग्रहण नी केरलै ता, तेई ग्रॉ न निकल्दी घेरै आपणी जाँघै रै धुड़ै बै दुडकेइत् ताकि सौ धुडा तिन्हाबै चिताऊणी देला कि परमेश्वरा तिन्हाबै सजा देणी | 6 तैबै तिन्हा चेलै ग्रॉ-ग्रॉ ना जाइया परमेश्वरै रै राज्य रै बारै ना दसू होर कई बीमार लोका तिन्हरी बिमारी ना ठीक केरै |

### राजै हेरेदेसै री परेशानी

7 गलील जिन्नै रै राजा हेरोदेसै जैबै यीशु रै इन्हा सैभी कोमै रै बारै ना शूणू ता स डौरू, किबै कि किछ लोकै बोलू कि बपतिस्मै देणू आला यहून्ना मूँईदैं ना जिन्दा हुआ सा | 8 किछ होरी लोकै बोलू, भविष्यवक्ता एलिय्याह हेरुआ सा, किछ होरी लोकै बोलू, कि पराणै भविष्यवक्ता ना कोई जिन्दा हुआ सा | 9 पर हेरोदेस राजै बोलू, यहून्ना री ता मैं मुँडी घाई ती काटणै, ऐबै ऐ कुण सा, जुणी रै बारै ना हाँऊ ऐण्डी गल्ला शुणदा लाग़ा सा | होर हेरोदेस तेई बै हेरना चाहा ती |

### यीशुये पौज हजार माहणु न रोटी ख्याई

10 तैबै ते बारा चेलै वापस आए होर जे किछ तिन्हा केरु ती, सौ यीशु बै दैसू होर ते यीशुए लग केरिया बैतसैदा शहरा बै नेऐ | 11 पर ऐ जाणिया लोकै री भीड़ यीशु पिछै हुई होर यीशु खुशी-खुशी तिन्हा सँघै मिलै, होर तिन्हा बै परमेश्वरै रै राज्य रै बारै ना दसदैं लागै होर जो ठीक होणा चाहा ती ते ठीक केरै | 12 जैबै ध्याडा ओऊड़दा लाग़ा ता ते बारा चेलै आयै होर यीशु बै बोलू, "गुरु जी, लोकै री भीड़ा बै बिदा केरात् ताकि ए औरैलै-पौरैलै ग्रॉ ना जाइया आपणै खाणै होर रौहणै रा इंतज़ाम केरलै, किबैकि आसै औरैलै सुनसान जगा न सी |" 13 तैबै यीशुए तिन्हा बै बोलू, "तुसै इन्हरै खाणै रा इंतज़ाम केरा | चेलै बोलू, "आसा आगै पौज रोटी होर दूई मैचू छी केलही सी |" अगर आसै जाइया इन्हा सैभि बै रोटी लेइया आणलै ता होई सका सा, पर ए लोका ता लगभग पौज हजार मर्द सी | 14 तैबै यीशुए आपणै चेलै बै बोलू, "इन्हा बै पजाह-पजाह री गिद्धी ना बशात् | 15 तिन्हा ते सारै माणहु गिद्धी न बशाए | 16 तैबै यीशुए ते पौज रोटी होर दूई मौँछी मुँगी होर सर्गा धिरावै हेरीया धन्यवाद केरु होर रोटी चोडी-चोड़िया चेलै बै दैदैं लागै होर चेलै लोका बै गिद्धी ना बोंडदैं लागै | 17 तैबै सभै लोका रोटी खाइया रौजै होर चेलै बची दी रोटी री बारा टोकरी भौरिया चैकी |

### पतरस यीशु बै मसीह मना सा

18 जैबै यीशु एकान्त ज़ेगा ना प्रार्थना केरदैं लागै दै ती होर तिन्हरै चेलै भी सँघै ती ता यीशुए तिन्हा ना पुछू, "मुँबै लोका की बोला सी?" 19 तिन्हा जवाब धिना, "यहुन्ना बपतिस्मा देणू आला होर कोई बोला सी 'एलिय्याह, होर किछ बोला सी कोई पराणै भविष्यवक्ता ना जिन्दा हुआ सा |" 20 यीशुए तिन्हा बै बोलू, "पर तुसै मुँबै की बोला सी?" पतरस जवाब धिना, "तुसै परमेश्वरै रै मसीह सी |" 21 तैबै यीशुए तिन्हा बै बोलू, "ध्यान डाहीत् एसा गल्ला कौसी बै हेरेइत दसदैं |"

### यीशु आपणै मौरने होर जिन्दे होणै रै बारै न भविश्यवाणी केरा सा

22 तैबै यीशुए बोलू, "माणहु रै बेटै री तैइयै यानिकी मेरी तैइयै ऐ जरूरी सा कि हाँऊ दुःख चेकनू होर बजुर्ग, महापुजारी, होर धर्मविधि सिखाणू आलै मँबै नीच समझिया मारलै होर हाँऊ त्रीजै ध्याडी जिंदा होनू |"

### यीशु पीछे ओंढणै रा मतलब

23 तैबै यीशुए सैभी बै बोलू, "अगर कोई मेरा चेला बणना चाहा सा सौ आपणा नाँह केरला होर हर रोज आपणा कूस चैकिया आपणै दुःख सोहणै री तैइयै त्यार रौहला |" 24 किबैकि जुण आपणी ज्ञान बचाणा चाहला तेई स गँवाणी, पर जुण मेरी तैइयै आपणी जान गवाला ता तेई स बचाणी | " 25 ऐसा गल्ला रा की फायदा कि माणहु सारी दुनिया बै प्राप्त केरला होर आपणी ज्ञान गँवाला?" 26 जुण माणहु मूँ ना होर मेरी गल्ला ना शर्मिया सा, ता माणहु रा बेटा यानिकी हाँऊ जैबै बी आपणी होर आपणै बापू री होर पवित्र स्वर्गदुतै री महिमा ना एनु ता मूँ बी तेई माणहु ना शर्मिणा | 27 हाँऊ तुसाबै सच बोला सा, जे औखै खडै सी, तिन्हा मौँझै किछ एण्डै सी जो परमेश्वरै रै राज्य हैरनै ना पहले नी मौरना |"

### यीशुरा दिव्य रूप

28 यीशु री इन्हा गल्लै रै ओठ रोज़ा बाद यीशु, पतरस याकूब होर यहून्ना सँघै प्रार्थना केरदैं एकी ढौगा पँधे नौठै | 29 जैबै यीशु प्रार्थना केरदैं लागै ती ता तिनरा रूप बदलुआ होर झिकडै शेतै होइया चमकदैं लागै | 30 होर चानक मूसा होर एलिय्याह दुई माणहु तौखै तिन्हा सँघै गल्ला केरदैं लागै ती | 31 ते दूऐ आपणि पूरी शक्ति सँघै हेरुऐ होर यीशु रै मौरनै रै बारै ना चर्चा केरदैं लागै दै ती, जे यरुशलेम शैहरा ना होणु आई ती | 32 तेई बौकै पतरस होर तेइरै सँघी नीजा ना ती पर जैबै ते पुरी तरहा विउदैं ता तिन्हा यीशु री महिमा तिन्हा दुई माणहु सँघै हेरी जो तेई सँघै खडै ती | 33 जैबै मूसा होर एलिय्याह यीशु हागै न ज़ान्दें लागै ता पतरसै बोलू, "हे स्वामी, आसरा औखै रौहणा केतरा शोभला सा: आसा वै ज़ाजत दैआ कि आसा औखै त्रा वेदी बणाणी, एक तुसरी तैइयै, एक मूसा बै होर एक एलिय्याह री तैइयै |" सौ नी ती ज़ाणदा कि स की बोलदा लाग़ा सा | 34 पतरस आजी बोलदा लाग़ा ती कि ते एकी बादलै घेरै होर ते डौरदैं लागै | 35 तैबै बादला मुँझै ना ऐ आकाशवाणी हुई, "ऐ मेरा प्यारा बेटा सा, तुसै ईररी शुणा, किबै कि ऐ मैं चुनूदा सा |" 36 एसा आवाज़ होणै न बाद यीशु केलहा ती, चेलै चुप रौहै, होर जे किछ तिन्हा हेरु ती सौ तिन्नै तिन्हा धियाडै न कौसी बै नी दैसू |

### यीशु चेटू फैसु दै शोहरु बै ठीक केरा सा

37 दुजै ध्याडी जैबै यीशु ढौगा पँधे ना भ्याऊँ आए ता लोकै री एक बोहु बडी भीड़ तिन्हा सँघै मिली | 38 तब भीड़ा मुँझै न एकी माणहुऐ ज़ोरा सँघै बोलू, ओ गुरु जी, हाँऊ तुसा हागै विनती केरा सा, जी बाँण केरिया मेरै बेटै पँधे दया केरा किबै कि स मेरा, केलहा बेटा सा | 39 तेइबै एक चेटू री आत्मा ढौका सा होर स एकदम क्रीजा मारा सा | स चेटू री आत्मा तेईबै एतरा मरोडा सा कि तेई रै मुँहा न शेफ भौरिया सा होर स बडी मुशकिला सँघै तेईबै छौड़ा सा | 40 मैं तुसरै चेलै आगै विनती केरी ती कि ते तेई चेटू बै खोललै पर ते खौली नी सकै | 41 यीशुए जवाब धिना, "हे बशाह नी केरनू आळै होर

हठी लोको, मूँ कदी तक तुसा सँघे रौहणा होर तुसरी सौहणी? आपणें बेटे वे औखें आण ।" 42 सौ शौहरु एँदा लाग़ा ती कि चेट्टेरे स मरोडू होर छाट्टे पर यीशुए चेट्टे री आत्मा झिडकी होर स शोहरु ठीक केरिया तेईरे बापू रे हवालें केरु । 43 तैबे सैबे लोका परमेश्वरें री महाशक्ति न हैरान हुए ।

### मौऊती रें बारे न यीशु दबारा भविश्यवाणी केरा सा

पर जैबे यीशु रे इन्हा कोमा ना सारें लोका हैरान ती ता यीशुए आपणें चेलें बें बोलु: 44 तुसै इन्हा गल्ला पेंधें ध्यान दैआत्, "किबैकि माणहु रा बेटा यानिकी हाँऊ माणहु रें हाँथे डौकिणू आ सा ।" 45 पर ए गल्ला चेलें नी सोमझी किबैकि परमेश्वरें ए गल्ला तिन्हा ना गुप्त रखी होर चेलें यीशु ना पुछणें बें डौरा ती ।

### सैभी न बडा कुण सा?

46 तैबे चेलें एसा गल्ला पेंधें बहस केरदें लागें कि सैभी ना बडा कुण सा? 47 यीशु तिन्हरी मनै री गल जाणी होर एक शोहरु आपू आगें खडा केरु । 48 तैबे यीशुए आपणें चेलें बें बोलु, जुण एई शौहरु बें मेरें नाँ ना ग्रहण केरा सा सौ मुबें ग्रहण केरा सा होर जुण मुबें ग्रहण केरा सा सौ जुणियें हाँऊ भेजू सा तेईबें ग्रहण केरा सा । तुसा मुझें जुण सैभी ना होछा सा सौ सैभी न बडा सा ।

### जे बरोधा न नेई, सौ पक्षा न सा

49 तैबे युहन्नै यीशु बें बोलु, "स्वामी; आसै एक माणहु तेरें नाँ ना चेट्टे खोलदा हेरु । आसै तेइबें नाँह केरु किबैकि स आसरी मण्डली रा नी ओंथी ।" 50 पर यीशुए बोलु, "तेई बें नाँह मता केरदें, किबैकि जुण तुसरा बरोधी नी ओंथी सौ तुसा सँघे सा ।" 51 जैबे यीशु रे स्वर्ग बें जाणें रा बौक्त नेड आऊ ता तिन्है यरुशलेमा बें जाणें रा पक्का फेसला केरु । 52 यीशुए आपू ना आगें किछ माणहु सामरी रें ग्राँ बें जगहा त्यार केरदें भेजें । 53 पर तेई ग्राँ रें लोकेँ यीशु तौखें रुकणें नी धिनै 54 एसा गल्ला हेरिया यीशु रें चेलें याकूब होर युहन्नै बोलु, "गुरु जी, कि तुसै चाहा सी कि आसै हुकुम देइया सर्गा न आँग शदाइया इन्हा बें फुकलें?" 55 पर यीशुए तिन्हा धिराबें बें फिरिया बोलु, "तुसै नी जाणदें कि तुसै केण्ठी आत्मै रें सी, किबैकि माणहु रा बेटा लोकेँ रें प्राणा बें नाश केरदा नी आऊदा, बल्कि बचाणें री तैइयें आऊ सा ।" 56 तैबे ते कौसी होरी ग्राँ बें नौतें ।

### यीशु रे चले बैणनै री कीमत

57 जबै ते बौतें आघें जाँदें लागें दै ती ता कौसिरे यीशु बें बोलु, "तुसै जौखें-जौखें जालें, मूँ तुसा पिछे-पिछे एणा ।" 58 यीशुए तेइबें बोलु, "गौदड़ होर चिडू-चाकरु री भी रौहणें री जैगा होआ सा, पर माणहु रें बेटे आगें मुण्डी छुपाणें बें भी जगहा नी ओंथी ।" 59 यीशुए दुजें माणहु बें बोलु, "मूँ पिछे एज होर मेरा चेला बेंण । सौ राजी हुआ, होर यीशु बें बोलु, "गुरु जी, मुबें पैहलें जाणें दैआत् कि हाँऊ आपणें बापू बें पौथिया एनू ।" 60 यीशुए तेइबें बोलु, "तिन्हा लोका बें मुरदें पौथणें दै जुणा परमेश्वरें री नजरी ना मँरे सी । पर तू जाइया परमेश्वरें रें राज्य रें बारें ना लोका बें दैस ।" 61 एकी होरी माणहुए यीशु बें बोलु, "प्रभु जी, मूँ तुसा पिछे एणा होर तुसरें चेलें बैणना पर पहलें मुबें आपणें परिवारा ना विदा लेणें दैआ ।" 62 यीशुए तेइबें बोलु, "जुण माणहु हौआ पेंधें हाँथ रखिया पिछे हेरा सा सौ परमेश्वरें रें राज्य रें लायक नी ओंथी ।"

### यीशु आपणें सत्तर चेलें बें भेजा सी

10 एता न बाद यीशुए सत्तर होर माणहु चुनै होर जुणी-जुणी जैगहा बें यीशु आपु जाणु आळें ती तिन्हा जैगहा बें ते दुई-दुई केरिया आपु ना आगें-आगें भेजें । 2 यीशुए तिन्हा बें बोलु, "पौकी दी फसल ता बोहू सा पर काटणु आगें मजदूर थोडें सी, एबें छेतें रें मालका आगें विनती केरा कि सौ आपणी फसल काटणें री तैइयें मजदूर भेजला । 3 एबें जाआत् पर याद रखा, कि हाँऊ तुसाबें भेइयें रें बिचा ना भेडा साही भेजा सा । 4 तुसै जांदी घेरें

आपु सँघें ना ढैबुए, ना झोआ किछ मतेईत पांदें औखें तक कि बूटें री बी दुई जोड़ी मतेईत पांदें । बौता न जांदी घेरें कौसी बें नमस्तें हेरेईत केरदें । 5 जुणी बी घौरा बें तुसै जालें ता सैभीना पहलें बोलेइत, एई घौरें रें लोका पेंधें परमेश्वरें री शान्ति लोडी बेंणी रौही । 6 तेई घौरा ना अगर परमेश्वरें री शान्ति पाणें लायक कोई माणहु होला ता शान्ति तेई पेंधें ठैहरनी नैई ता स शान्ति तुसा आगें वापस एणी । 7 होर तेही घौरा ना रौहीत । जे किछ बी तुसा बें देलें तेई खाईत् । किबैकि मजदूरा बें तेइरी मजदूरी मिलणी जरूरी सा । 8 जुणी भी शैहरा बें तुसै जालें होर तौखलें लोका तुसरा स्वागत केरलें ता जे किछ बी ते तुसा सामनै खाणें री तैइयें रखलें ता तुसै तेई खाईत् । 9 तौखें जे बिमार माणहु होलें तिन्हा बें ठीक केरेइत् होर तिन्हाबें बोलेइत्, परमेश्वरा रा राज्य तुसा आगें पुजू सा । 10 पर जुणी शहरें रें लोका तुसा बें ग्रैहण नी केरलें ता तेई शहरें रें बजारा ना जाइया बोलेइत्, 11 आसरी जोघा ना तुसरें शहरा रा जे धूडा लाग़ा सा आसै तेइबें दुडका सी पर तैबे बी तुसै जाणी लेआ कि परमेश्वरा रा राज्य तुसा सामनै सा । 12 हाँऊ तुसा बें बोला सा कि न्याय रें रोज़ा ना परमेश्वरा सदोम शहरा बें जे सज़ा देणी तेथा ना बी जादा सज़ा परमेश्वरा एई शहरें रें लोका बें देणी ।

### बशाह नी केरणु आळें बें चितारुणी

13 हे, खुराज़ीन होर बैतसैदा न रौहनु आलें लोको तुसाबें भयानक सज़ा मिलणु आई सा किबैकि जे चमत्कार मँ तुसा बिचा ना केरें ते चमत्कार अगर मँ तूर होर सिदोना ना केरें होंदें ता ते लोका कबकें टाटें लाइया खौटुइया होर आपु पेंधें छार मौइया आपणें पापा बें छौड़दें । 14 पर न्याय रें रोज़ा ना परमेश्वर तूर होर सिदोनै रें लोका बें जे सज़ा देणी तेथा ना बी जादा सज़ा परमेश्वरा तुसा बें देणी । 15 हे कफरनहूमा ना रौहणु आगें लोको तुसा कि सर्गा ढौई उथडें केरिना? तुसा ता नरका ढौई निश्टें केरिना । 16 जुण बी तुसरी गल्ला बें शुणा सा, सौ मेरी गल्ला बें शुणा सा होर जुण बी तुसाबें तुच्छ जाणा सा, सौ मुबें तुच्छ जाणा सा, होर जुण मुबें तुच्छ जाणा सा, सौ मेरें भेजणु आगें बें तुच्छ जाणा सा ।"

### यीशु रे सत्तर चले वापस एजा सी

17 ते सत्तर माणहु खुशी मनांदें-मनांदें वापस आगें होर बोलदें लागें, "ओ प्रभु जी, जैबे आसै तुसरा नाँ लेआ ती ता चेट्टे बी आसरी मैनी । 18 तैबे यीशुए तिन्हा बोलु, "मँ ता शैतान स्वर्ग ना ओळदा हेरु ।" 19 शुणा, मँ तुसाबें शैतानै री सारी शक्ति पेंधें हक धिना सा; कि तुसा बिचु होर कीडें आपणी जौघें लाइया दबाणें होर कौसी चीजें लाइया तुसरा किछ नुक्सान नी होणा । 20 बुरी आत्मा तुसरें हुक्मा बें मना सी एसा गल्ला न तुसै खुश मता होंदें, "तुसै एसा गल्ला ना खुश होआ कि तुसरें नाँ स्वर्ग ना लिखुए सी ।"

### यीशु खुश होआ सी

21 तेई बौकें यीशु आत्मा न भौरुईया खुश हुए होर बोलु, "ओ बापू जी स्वर्ग होर धौरती रें प्रभु; हाँऊ तुसरा धन्यवाद केरा सा, कि तुसै ए गैल्ला समझदार होर ज्ञानी माहणू ना छुपाईया रैखी, होर शोहरु पेंधें प्रगट केरी, किबैकि तुसा बें ए शोभला लाग़ा ।" 22 मेरें बापुए इन्हा सारी गैल्ला रा अधिकार मुबें धिना सा । एसा गल्ला बें कोई नी जाणदा कि बापु कुण सा, सिर्फ बेटा जाणा सा होर एसा गैल्ला बें बी कोई नी जाणदा कि बेटा कुण सा सिर्फ बापु जाणा सा । बेटा जुणी पेंधें बापु बें प्रगट केरना चाहला केरी सका सा । 23 जैबे यीशु रें चेलें तेई सँघें ती ता यीशुए चेलें धिराबें फिरिया बोलु, "धन्य सी ते औछी, जे इन्हा गल्ला बें हेरा सी जुणीबें तुसै हेरा सी । 24 किबैकि हाँऊ तुसा बें बोला सा, "बोहू भविष्यवक्त होर राज़ें ए गैल्ला हेरनी चाही, जे तुसै हेरी पर ते हेरी नी सकें, होर शुणानी चाही पर शुणी नी सकें ।

### शोभला पड़ेशी

25 एक रोज़ पवित्र शास्त्रें रें नियम सिखाणू आला एक अनुभवी माणहु यीशु री जाँच केरनै री तैइयें खडा हुआ होर बोलु, "गुरु जी अमर होंगें री तैइयें हाँऊ की केरनु?" 26 यीशुए तेई पँडता बें बोलु, "पवित्र शास्त्रा ना की लिखू दा

सा? तुसै तेइवै काँण्डे पौढा सी?" 27 पँडतै जवाब धिना, "पवित्र शास्त्रा ना ए लिखू सा तुसै आपणै प्रभु परमेश्वरा बै पूरै मैना सँधै, आपणै सारै प्राण, आपणी सारी शक्ति होर आपणी सारी बुद्धी सँधै झुरी केरा होर आपणै पडेशी बै आपु साही झुरी केरा । 28 यीशुए तेई पँडता बै बोलू, "तुसै ठीक बोलू, ऐण्डा केरलै ता तुसा सदा जिँदै रौहणा ।" 29 पर तेई पँडितै आपणै-आपु बै धर्मी सोचिया यीशु ना पुछू, "मेरा पडेशी कुण सा । 30 यीशुए ऐ उदाहरण बोलिया तेईबै जवाब धिना, "एक यहूदी माणहु यरुशलेम शैहरा ना यरिहो शैहरा बै जान्दा लाग़ा ती । बौता ना डाकूरे तेई पँधै हमला केरू । तिन्है तेइरै झीकड़ै खोलै होर सौ मारी कुटिया, नंगा केरिया तेइबै अधमुँए छौड़िया तौखै ना भैगै । 31 तैबै एक यहूदी पुजारी तेसा बौतै आऊ । जैबै तेइए सौ डाकूरे मारूदा माणहु हेरू ता सौ बौता ना दुज्जी धिरिरे मुडिया भैगू । 32 थोड़ी देरी बाद यरुशलेम मन्दिरा ना कौम करनू आ एक लेवी तेसा बौतै आऊ होर सौ बी तेई हेरिया तेसा बौता ना आगै बै भैगू । 33 किछ देरी बाद सामरी जिँलै रा एक माणहु तेसा बौतै आऊ । जैबै तेइयै डाकूरे मारूदा स माणहु हेरू ता तेइबै तेई पँधै दैया आई । 34 तेई सामरी माणहुए तेइ मारूदैं माणहु हागै जाइया दाखरसा सँधै तेइरै जखम धोए होर पट्टी बोनी । तैबै तेई सामरिरे सौ आपणै घोड़ै पँधै बशाईया एकी सराय बै नेऊ होर तेइरी सेवा केरी । 35 दुज्जे रोज़ै तेई सामरियै सराय रै मालका बै दूई चांदी रै सिक्के धिनै होर बोलू, एइरी सेवा-टहल केरेई जे किछ तेरा होर खर्चा होला हाँऊ तौभै वापस एजिया देनू । 36 तुसरी सोमझै रै मुताबिक डाकूरे मारूदैं माणहु सँधै तिन्हा त्राइ ना कुणिए शोभलै पडेशी रा फर्ज निभाऊ? 37 पँडतै बोलू, "जुणियै तेई पँधै दैया केरी ।" यीशुए तेई पँडता बै बोलू, "तुसै बी जाइया ऐण्डा ए केरा ।"

### यीशु मार्था होर मरियमै रै घोराना

38 यीशु होर तिन्हरै चेलै सफर केरदैं-केरदैं यरुशलेमै रै एकी ग्रॉ बै नौठे । तेई ग्रॉ री मार्था नाँ री एकी बेटडिरे आपणै घोराना तिनरा स्वगत केरू । 39 तेसरी एक बँहण बी ती जुणीरा नाँ मरियम ती । सौ यीशु री जोंघा आगै बेशिया तिन्हरै वचन शुणदी लागी । 40 पर मार्था खाणा बणादी लागी रौही । स यीशु हागै एजिया बोलदी लागी, "ओ प्रभु, मेरी बँहणिए सारा कौम मूँ हागै छौड़ु सा, कि तुसाबै मेरी किछ बी फिकर नी आथी?" एसाबै मेरी मजती केरनै री तँइयै बोलात् । 41 यीशुए मार्था बै बोलू, "मार्था ओ मार्था तू बोहू सारी गल्लै री तँइयै फिक्रिया सा होर परेशान होआ सा ।" 42 पर एक गल सच सा मरियमै ता सौ शोभला भाग चुनू सा तेतै री तँइयै तेसाबै जे आर्शोवाद मिलणा तेइबै कोई बी एसा ना नी छिनी सकदा ।"

### यीशु आपणै चेलै बै प्रार्थना केरना सिखा सा

11 एक रोज़ यीशु कौसी जैगहा ना प्रार्थना केरदैं लागै ती । जैबै यीशुए प्रार्थना केरी ता तिन्हरै चेलै ना एकीयै यीशु बै बोलू, "प्रभु जी जेण्डे युहने आपणै चेलै बै प्रार्थना केरनी सिखाई तँडै तुसै बी आसाबै प्रार्थना केरना सिखात् । 2 यीशुए चेलै बै बोलू, "तुसै प्रार्थना ऐण्डे तरहँ केरीत्, "ओ बापू जी, तुसरा नाँ पवित्र मैनुआ लोड़ी, तुसरा राज्य आऊ लोड़ी । 3 आसरी जरूरती री हर रोज़की रोटी आसा बै देदैं रौहात् । 4 होर आसरी पापा बै माफ केरात्, किबैकि आसै बी आसरी खिलाफ पाप केरनू आए बै माफ केरा सी । आसा बै परीक्षा ना मता पाँदैं ।"

### प्रार्थना रै बारे न यीशु री शिक्षा

5 तैबै यीशुए चेलै बै बोलू, "मैना कि तुसरा एक सँधी सा होर तुसै औधी रातिये तेइरै घोराना जाइया बोला सी, ओ सँधी मुंबे त्रा रोटी उधार दै । 6 किबैकि सफर केरदैं-केरदैं मेरा एक होर सँधी मेरै घोरानाबै आऊ दा सा, होर मूँ आगै तेइबै देणै बै किछ बी नी आथी । 7 होर सौ सँधी भीतरा ना बोलला, "मुँबे परेशान मत केरदा, ऐबै दरवाजा बन्द सा होर मेरै शोहरू मूँ सँधै साथरै ना सी । ऐबै हाँऊ उठिया तौभै किछ बी नी देई सकदा । 8 हाँऊ तुसाबै बोला सा, "तेइरा सँधी होणै रै कारण तेई उठिया शायद तुसाबै नीती देणा, पर तुसरै शर्म छौड़िया मुंगणै री वजह ना तेई जरूर उठिया तुसरी जरूरतै रै मुताबिक तुसाबै देणा ।" 9 हाँऊ तुसाबै बोला सा, "परमेश्वरा ना मुँगदैं रौहात्

तेई तुसाबै देणा, आशा लाइया तोपलै ता तुसाबै मिलणा, खटखटालै ता परमेश्वरा तुसरी तँइयै दुआर खोलणा ।" 10 किबैकि परमेश्वरा ना जुण मुँगदा रौहा सा तेइबै मिला सा जुण आशा लाइया तोपदा रौहा सा तेइबै मिला सा जुण खटखटाँदा रौहा सा परमेश्वर तेइरी तँइयै दुआर खोला सा । 11 तुसा मॉझै ऐण्डा कुण बापू सा, कि जैबै तेइरा बेटा रोटी मुँगला ता पाथर देला, मौछी मुँगला ता कीडा देला? 12 होर आण्डै मुँगला ता तेइबै बिच्च देला? 13 जैबै तुसै बुरै होइया बी आपणै शोहरू बै शोभली चीजा देणा जाणा सी ता तुसरा स्वर्गा रा बापू आपणै मुँगणु आए बै पवित्र आत्मा किबै नी देणी?

### यीशु री शिक्षा

14 एक बार यीशुए एकी माणहु ना नँदा चेटू खोलू जुणियै स गुंगा बणाउ ती । जैबै तेई माणहु ना स नँदा चेटू निकता ता सौ माणहु दूणिया लाग़ा होर कई लोका एसा गल्ला ना बड़ै हैरान हुए । 15 पर तिन्हा ना किछ लोकै बोलू, "ऐ ता बालजबूल नाँ रै चेटू रै प्रधानै री मजती सँधै चेटू खोला सा ।" 16 होरियै यीशु री जाँच केरनै री तँइयै तेइना एक चिन्ह मुँगु जुण एसा गल्ला बै साबित केरला कि यीशु स्वर्गा ना अर्थात् परमेश्वरा ना आऊ सा । 17 पर यीशुए तिन्हरै मनै री गल ज़ाणिया तिन्हा लोका बै बोलू, "जुणी राज्य ना फूट पौडा सा स राज्य नष्ट होआ सा होर जुणी घौरा ना फूट पौडा सा सौ घौर बी नष्ट होआ सा ।" 18 तैण्डाए अमार शैतान आपणा विरोध केरला ता तेइरा राज्य केण्डे बैणी रौहणा? किबैकि तुसै मेरै बारे ना बोला सी कि हाँऊ शैतानै री मजती सँधै चेटू खोला सा । 19 अगर हाँऊ शैतानै री मजती सँधै चेटू खोला सा, ता तुसरै चेलै कौसरी मजती सँधै चेटू बै खोला सी? 20 लेकिन हाँऊ ता परमेश्वरै री मजती सँधै चेटू बै खोला सा । एता लाईया हाँऊ रिहा सा कि परमेश्वरा रा राज्य तुसा सामनै आऊ सा । 21 जैबै ताकतवर माणहु पुरी रीतीयै हथियार बोनिया आपणै घौरै रा पौहरा केरा सा ता तेइरी सारी जायजाद बची रौहा सा । 22 पर जैबै तेई माणहु ना ज़ादा ताकतवर माणहु तेई सँधै लडाई केरिया जीता सा तैबै सौ माणहु तिन्हा हथियारा बै चटेरी सका सा जुणी पँधै तेई माणहु बै बोहू बशाह ती होर तेइरी जायजादा बै लूटिया बाँडी सका सा । 23 जुण मूँ सँधै नी आँथी सौ मेरा विरोधी सा होर जुण लोका बै कैड्डा केरनै री तँइयै मेरी मजत नी केरदा स तिनाबै बजुँआ सा ।

### अधूरै सुधारा न मुसीबत

24 "जैबै बुरी आत्मा माणहु ना निकाला सा ता स सुनसान जैगहा ना बशाँ तोपा सा; पर जैबै तेसा बै बशाँ नी मिलदा ता स बोला सा, "मुँ तेई माणहु आगै वापस जाणा जुणी आन्दरै हाँऊ रौहँ केरा ती । 25 ऐण्डे बोलिईया स बुरी आत्मा वापस एजा सा होर तेसा बुरी आत्मा बै सौ माणहु साफ-सुथरा होर सजाऊ दा खाली घौरा साही मिला सा । 26 तैबै स बुरी आत्मा जाइया आपू ना बी बुरी सौत बुरी आत्मा बै आपू सँधै आणा सा, होर ते सब बुरी आत्मा तेई माणहु आन्दरै रौहदी लाग़ा सी । ऐबै तेई माणहु री दशा पहिलै ना बी ज़ादा बुरी होआ सा ।

### धन्य कुण सा

27 बै यीशु इन्हा गल्ला बै केरदा लाग़ा दा ती ता भीडा जौंदरना कौसी बेटडियै ज़ोरा सँधै बोलू, "धन्य सा स बेटडी जुणियै तुसाबै जन्म धिना होर धाचै सी । 28 तैबै यीशुए बोलू, "पर धन्य ता ते सी जुणा परमेश्वरा रा वचन शुणा सी होर तेइरा पालन केरा सी ।"

### लोकै यीशु बै एक चमत्कार केरनै बै बोलू

29 जैबै बड़ी भीड़ केंडी होंदी लागी ती ता यीशु बोलदा लाग़ा, "एई जुगै रै तुसै लोका बुरै सी । तुसै मुँ ना ऐ चाहा सी कि हाँऊ आपणै आपू बै साबित केरनै री तँइयै चमत्कार केरनू । पर हाँऊ जे चमत्कार तुसरी तँइयै केरनू, सौ ता ऐ सा जे भविष्यवक्ता योनै री जिन्दगी ना हुआ ती । 30 जे योनै री जिन्दगी ना हुआ, स महानगर नीनवै रै लोकै री तँइयै ऐसा गल्ला बै साबित केरा सा की योना बै भेजणु आ परमेश्वर सा । 31 दक्षिणै री राणी शेबा बोहू दूर ना सुलैमान राज़े रा ज्ञान शुणनै री तँइयै आई ती । होर हेरा ओखै जो सा,

सुलैमाना ना बी बड़ा सा । ई जूगै रै तुसै लोका मेरी गल्ला शुणनै रा नाँह केरा सी । न्याय रै रोजा ना राणी शेबा तौखलै लोका सँघे खड़े होइया तुसा पँधे दोष लाणा ।<sup>32</sup> नीनवे शहरै रै लोकै योना रा प्रचार शुणिया आपणै पाप छौडै । पर ऐबै जे हाँऊ औखै सा, योना ना बी बड़ा सा । तैबै बी तुसै लोकै मेरी गल्ला शुणिया बी आपणै पाप नी छौडै । न्याय रै रोजा ना नीनवै शहरै रै लोका ई जूगै रै तुसा लोका सँघे खड़े होइया तुसै दोषी ठराणै ।

### शरीरा रा दीआ

<sup>33</sup> कोई बी माणहु दीयै पकाइया गुप्त जैगहा ना नी रखदा होर ना भाँडै लाइया खौटदा । बल्कि तेइबै उथड़ी जैगहा पँधे रखा सी ताकि जुणा भीतरै एलै तिन्हरी तँइयै प्याशा होला ।<sup>34</sup> तेरी औछी तौभे प्याशै देणु आइ दीयै साही सी । अगर तेरी औछी साफ सी ता तेरी सारी देह प्याशी होणी । अगर तेरी औछी बुरी सी ता तेरी सारी देही ना निहारा होणा ।<sup>35</sup> होशियार रौहा जे प्याशा तुसा भीतरै सा स कोईछे निहारा नी लोडी हुआ ।<sup>36</sup> अगर तुसरी देही भीतरै प्याशा भौरुआ सा होर देही रै कौसी भी हिस्सै ना निहारा नी आँथी ता तुसरी पूरी देह प्याशै लाईया ऐण्ठी चमकणी जैण्ठी दीयै लाइया स जैगहा चमका सा जौखै स पकेइया रखू सा ।

### यीशु धर्म गुरु री आलोचना केरा सा

<sup>37</sup> जैबै यीशुए ए गल्ला पूरी बोली, तैबै कौसी फरीसी माणहुए तेई हाम्गै विनती केरी कि यीशु मेरी हाम्गै एजिया रोटी खाला ता यीशु तेइरै घौरा जाइया तेइ सँघे रोटी खाँणै री तँइयै बेठा ।<sup>38</sup> तेइ यहूदी पँडता बै ए हेरिया हैरानी हूई कि सौ फरीसी रिवाजै रै मुताबिक बगैर हाँथ धोइया रोटी खाँदा बेठा ।<sup>39</sup> तैबै प्रभुए तेई बै बोलू, “ओ पँडतो, तुसै कटोरै होर थाई बै बाहरा-बाहरा ना ता माँजा सी, पर तुसरै भीतरै लालच होर बुराई भौरुईदी सा ।”<sup>40</sup> ओ मूर्ख लोको! परमेश्वरा बै बाहरली चीजा पँधे बी चिंता सा ता भीतरली चीजा पँधे बी चिंता सा ।<sup>41</sup> तुसरै मना आँधलै विचारै रै मुताबिक गरीबा बै दान देआ तैबै तुसा बै लागणा कि परमेश्वरा तुसै स्वीकार केरनै ।<sup>42</sup> ओ फरीसी लोको, तुसा बै भयानक शिक्षा मिलणी । तुसै पुदीनै, सुदाब होर सब भांति रै साग पोचा रा, अर्थात आपणी ओछी-ओछी कमाई रा बी दसवाँ हिस्सा देआ सी, पर तुसै न्यायै सँघे व्यवहार केरना होर परमेश्वरै री झुरी रै बारै ना बिसरा सी । दसवाँ हिस्सा देणा सही सा पर जे गल्ला एथा ना बी जरूरी सी तिन्हा बै बी तुसै मता छौडदैं ।<sup>43</sup> ओ फरीसीयो तुसा बै भयानक शिक्षा मिलणी । तुसै सभा घौरा ना जाइया उथड़ी-उथड़ी जैगहा पँधे बेशणै री इच्छा रैखा सी होर ए बी चाहा सी की लोका बजारा ना तुसरा आदर केरलै ।<sup>44</sup> तुसा बै भयानक शिक्षा मिलणी । किबैकि तुसै तिन्हा पोथुइदी कब्रा साही सी जुणी पँधे निशाण नी आथी । लोका तिन्हा पँधे चैला सी पर ते तिन्हा कब्रै रै बारै ना नी ज्ञाणदैं ।<sup>45</sup> तैबै नियम सिखाणु आए एकी माणहुए यीशु बै उतर धिना, “ओ गुरु जी ऐण्ठी गल्ला केरिया तुसै आसरी बी निंदा केरदैं लागै सी ।”<sup>46</sup> यीशुए तिन्हा बै बोलू, “नियम सिखाणु आए लोको, तुसा बै बी भयानक शिक्षा मिलणी । किबैकि तुसरै धर्म री मांग जे मुशकिल सा तैसा बै तुसै लोका पँधे लादा सी, होर तेई बोझै बै हल्का केरनै री तँइयै तुसै थोडी जेई मजत बी नी केरदैं ।<sup>47</sup> तुसाबै भयानक शिक्षा मिलणी । किबैकि तुसै तिन्हा भविष्यवाणी केरनू आए री तँइयै कब्रा बणा सी, जुणा तुसरै बज्रुगै मारै दै ती ।<sup>48</sup> ऐण्ठा केरिया तुसै रिहा सी कि तुसै आपणै दादू-बा रै कोमा ना शामिल सी किबैकि तिन्है ते मारै होर तुसै तिन्हरी तँइयै कब्रा बणा सी ।<sup>49</sup> परमेश्वरै आपणी बुद्धी सँघे तुसरी तँइयै ए बोलू सा, कि मूँ तिन्हा आगै गुरु होर चेलै भेजणै । तिन्हा किछ ते मारनै होर कौसी पँधे जुल्म केरना ।<sup>50</sup> दुनियै रै शुरुआती दौरा ना लेइया जेतरे बी भविष्यवक्तै रै खून हुए सी, तिन्हरी तँइयै ई जूगै रै लोका ना लेखा लेइणा ।<sup>51</sup> हाबिलै रै खूना ना लेइया जकर्याह रै खूना तक जेतरे बी खून वेदी होर मन्दिरै रै बिचा ना हुए सी, इन्हा सैभी री तँइयै ई जूगै रै लोका ना लेखा लेणा सा ।<sup>52</sup> लानत सा तुसा धर्मविधि जाणनू आए पँधे किबैकि तुसै लोका परमेश्वरा बै जाणनै ना रोकै । आपू ता तुसै परमेश्वरै रै बारै ना नी ज्ञाणू होर तिन्हा बै बी रोका सी जे जाणना चाहा सी ।<sup>53</sup> जैबै यीशुए आपणी गल्ला पूरी केरी, ता यहूदी पँडत होर धर्मगुरु तेई

ना झिकुयै । तिन्है तेई बौकै यीशु ना बोहू सारै सवाल पुछै ।<sup>54</sup> ते यीशु रै मुँहै री गल्ला, तिन्हरै खिलाफ इस्तैमाल केरिया यीशु बै फसाणै री कोशिश केरदैं लागै दै ती ।

### पाखण्डै रै खिलाप चिताऊणी

**12** तैबै तौखे लोकै री एतरी भीड़ कइया हूई कि लोका एकी होरी पँधे पौडदैं लागै । यीशुए पहलै आपणै चेलै धिरै हेरु होर बोलू, “यहूदी पँडता साही पाखण्डी मता बेणदैं । तिन्हरा बुरा असर खमीरा साही होरी ना फैला सा ।<sup>2</sup> ऐबै सारी गल्ला बै प्रगट केरनै रा बौक एँदा लागा सा, होर जे गल्ला गुप्त सी ते लोका सामनै दैसिणी ।<sup>3</sup> जे गल्ला तुसै निहारै ना केरी सी ते प्याशै ना दैसिणी, होर जे गल्ला तुसै बन्द दुआरा पिछे केरी सी, ते छापरा पँधे खड़े होइया दैसिणी, ताकि सारै लोका शुणलै ।

### कुणी न डौरना

<sup>4</sup> प्यारै सँघियो, तिन्हा ना मता डौरदैं जो देही बै ज़ख्म देआ सी । ते सिर्फ तुसरी देही बै नष्ट केरी सका सी होर तेथा न बाद किछ नी केरी सकदैं ।<sup>5</sup> पर हाँऊ तुसा बै बोला सा परमेश्वरा ना डौरा, जौस हाम्गै लोका बै मारनै होर तिन्हा बै नरका ना पाणै री शक्ति सा ।<sup>6</sup> कि दुई डबुए ना पौज चिडू नी बिकदैं? तैबै बी परमेश्वर तिन्हा ना एकी बै बी नी बिसरदा ।<sup>7</sup> तुसरै चोडै रै शराल बी गिणुयै दै सी । तुसै मता डौरदैं किबैकि तुसै परमेश्वरै री तँइयै तिन्हा चिडू ना ज़ादा कीमती सी ।

### यीशु बै स्वीकार या अस्वीकार केरना

<sup>8</sup> जुणा मुँबै एसा धौरती पँधे म्हणू रै बिचा ना मना सी हाँऊ तुसा बै बोला सा पेमेश्वरै रै स्वर्गदूता सामनै मुँबी ते मनणै ।<sup>9</sup> पर जो म्हणू रै सामनै एसा धौरती पँधे मेरा नाँह केरा सी परमेश्वरै रै स्वर्गदूता सामनै मुँबी तिनरा नाँह केरना ।<sup>10</sup> अगर कोई म्हणू रै बेटै रै खिलाफ बोलला ता तेइरै अपराध माफ केरिनै पर जुणा पवित्र-आत्मे री निन्दा केरलै ता तिनरै अपराध माफ नी केरिनै ।<sup>11</sup> जैबै तुसाबै लोक सभा घौरा ना शासक होर अधिकारी सामनै तुसा पँधे मुकदमा चलाणै री तँइयै आणलै ता चिन्ता हेरीतू केरदैं कि आसा आपणै बचणै री तँइयै की जवाब देणा ।<sup>12</sup> किबैकि जैबै तुसै तौखे खड़े होलै ता, तेई बौकै पवित्र-आत्मा तुसाबै दसणा कि तुसा की जवाब देणा ।

### मुख्र सेठा रा उदाहरण

<sup>13</sup> भीडै रै बिचा ना एकी म्हणुए यीशु बै बोलू, “ओ गुरुजी मेरै भाई बै बापू री जायजाद मूँ सँघे बॉडणै री तँइयै बोला ।”<sup>14</sup> यीशुए बोलू, “हाँऊ हरेक समझदार होर विश्वासयोग्य नोकरै रै बारै ना बोलदा लागदा सा जुणी बै तिन्हरै मालकै आपणै घोरकी हेर-शुण केरनै री होर आपणै परिवारै री सेवा केरनै री जिम्मेवारी धिनी सा ।”<sup>15</sup> यीशुए भी लोका बै बोलू, “होशियार रौहा तेसा चीजा रा लालच मता केरदैं जो तुसा हाम्गै नी आँथी । हर किस्मै रै लोभ लालचा ना आपू बै बचाइया डाहत् । किबैकि कौसी री जिन्दगी तेई हाम्गै बोहू जायजाद होणै सँघे नी बँणदी ।”<sup>16</sup> यीशुए तिन्हा बै एक उदाहरण दसू, “एकी सेठ म्हणू री जमीना ना बड़ी भारी फसल हूई ।”<sup>17</sup> तैबै सौ सेठ म्हणू वचार केरदा लगा कि ऐबै मूँ की केरना किबैकि मूँ हाम्गै ऐतरी जैगा नी आँथी कि हाँऊ एसा सारी फसला बै रखनू ।<sup>18</sup> तेई सेठ म्हणुए आपणै मना ना बोलू, “मूँ ऐण्ठा केरना, मूँ आपणी सारी कोठडी चोडनी होर एथा ना बड़ी कोठडी बणाणी होर मूँ आपणा सारा नाज होर डबुयै तेथा ना रखणै ।”<sup>19</sup> तैबै मूँ आपणै प्राणा बै बोलणा, “हे प्राण ऐबै तौ हाम्गै सबकिछ सा जो बोहू बौर्षा ढौई होणा । ऐबै चैना सँघे खा पी होर मोऊज केर ।”<sup>20</sup> पर परमेश्वरै तेई सेठा बै बोलू, “ई मूर्खा औज राती मूँ तेरै प्राण लेणै तैबै जेकिछ तँ कइया केरु सा स कौसरा होणा?”<sup>21</sup> सौ म्हणू बी ऐण्ठा सा जो आपणी तँइयै धन-दौलत कइया केरा सा पर परमेश्वरै री नज़री ना सौ सेठ नी आँथी ।

### परमेश्वर पन्धे बशाह रखा

22 तथा ना बाद यीशुए आपणें चेलें धिराबै फिरिया बोलू "हाँऊ तुसाबै बोला सा आपणें प्राणें री तेंइयै फिक्र मता केरदै कि आसा की खाणा, न आपणी देही री तेंइयै कि आसा की लाणा ।" 23 किबैकि प्राण रोटी ना होर देह झिकडै ना जादा कीमती सा । 24 काऊडै पेंधें ध्यान देयात् ते न बाँहदै न काटदै होर न तिन्हा हामें कोई भण्डार घोर होदा किबैकि परमेश्वर तिन्हाबै धाचा सा । तुसै ता परमेश्वरें री तेंइयै इन्हा चिडू ना जादा कीमती सी । 25 कि तुसै फिक्र केरिया आपणी उम्रा रा एक पल बी बढ़ाई सका सी? 26 जैबै तुसै फिक्र केरिया एई ओछा जेई कोम नी केरी सकदै ता होरी गल्लै री तेंइयै किबै फिक्रिया सी? 27 बोणैकै फुला बै हेरा ते केण्डै बढ़ा सी । ते न मेहनत केरदै न आपणी तेंइयै झिकडै बुणदै । पर हाँऊ तुसा बै बोला सा सुलेमान राजें बी आपणी ऐशो आरामें री जिन्दगी ना इन्हा फुला ना कौसी एकी साही शोभलै झिकडै नी लायै । 28 अगर परमेश्वर मैदानें रै गाह बै सजाई सका सा जे औज ता सा पर काल औगी ना फुकिणी ओ कम बशाह केरनू आयै लोको तेई परमेश्वर तुसाबै लागै रै झिकडै किबै नी देणै । 29 शक मता केरदै होर ऐसा गल्लै री फिक्र मता केरदै कि आसा की खाणा होर की पीणा । 30 जुणा परमेश्वर बै नी जाणदै ते लोका इन्हा चीजें रै बरै ना सोचदै रोहा सी पर तुसरा परमेश्वर बापू जाणा सा कि तुसा बै इन्हा चीजें री जरूरत सा । 31 चिन्ता केरनै रै बदलै तुसै परमेश्वर बै आपणी जिन्दगी पूरी रीतिरे चलाणै देआत् । तैबै धार्मिकता सेंधे ए सारी चीजा बी तुसाबै मिलणी

### स्वर्ग री तेंइये धन

32 "हे औछे छुण्डा मत डोरदा किबैकि परमेश्वर बापु जो स्वर्ग ना सा सा तौभे राज्य देणा चाह सा ।" 33 आपणी जायजाद बेचिया गरीबा बै दान केरात् होर आपणी तेंइयै एण्डे बटुए बणात् जे कैदी बी पराणें नी होदै । स्वर्ग ना धन कद्दा केरा ता तुसरा धन तौखे बैची रोहणा । तेइबै ना ता कोई चोर -चोरी सकदा होर ना ता तुँइबै कीडा बगाडी सकदा । 34 जौखे तुसरा धन होला, तौखे तुसरा मन बी लागी रोहणा ।

### जागदै रोहा

35 परमेश्वरें रै कौमै री तेंइयै हमेशा दीये पकेइया त्यार रोहत । 36 तुसै तिन्हा नोकरा साही बणा जो ब्याह ना एणु आलै मालका रा ईतजार केरदै लागै होआ सी, ताकि जैबै स एजिया दरवाजा खटखटाला ता ते उठिया दरवाजा खोललै । 37 जुणी नोकरा बै मालक जागदा हेरा सा स धन्य सा । "हाँऊ तुसाबै सच बोला सा तेई मालका त्यार होइया आपु नोकरें रै झिकडै लागै होर ते नोकर रोटी खाणै री तेंइयै बशाणै ।" 38 सौ मालक औधा राती या दोती हाँणें ना पहलै कैबै बी एला ता तेई तिन्हा नोकरा ना खुश होणा जो जागदै होर त्यार रोहा सी । 39 पर तुसै एसा गला पेंधें ध्यान देआत् अगर घोर का मालक जाणदा कि चोर कुणी बौकै एणा ता सौ जागदा रोहँदा होर आपणें घौरा ना चोरी नी ती होणें देणी । 40 तुसै हर बौकै त्यार रोहा किबैकि माणु रा बेटा यानिकी मूँ तेई बौकै एणा जौस बौकै रै बारै ना तुसै सोचदै बी नी ।

### यीशु रै एणें रै चिन्ह

41 तैबै पतरसै बोलू, "प्रभु जी, ए उदाहरण सिर्फ आसरी तेंइयै सा कि सैभी री तेंइयै सा?" 42 तैबै पतरसै बोलू, "प्रभु जी, ए उदाहरण सिर्फ आसरी तेंइयै सा कि सैभी री तेंइयै सा?" 43 जैबै तिन्हा मालक एजिया ए हेरा सा कि तेइरै नोकरै आपणी जिम्मेवारी शोभली तरह ना निभाई सा ता सौ मालक तिन्हा नोकरा बै ईनाम देआ सा । 44 हाँऊ तुसाबै भरोसा दिला सा कि मालका आपणें तिन्हा नोकरा बै आपणी सारी संपति री निगरानी रा अधिकार देणा 45 अगर सौ नोकर सोचला कि मेरै मालका बोहु रोजा बाद वापस एणा, होर दुजै नोकरा बै कष्ट देआ सा, खाणें होर शराब पीणें ना मस्त रोहा सा, 46 ता तेई नोकरा रा मालक एण्डे बौकै एला जुणी बौका बै सौ नोकर जाणदा बी नी । तैबै तेई मालका झिडका देइया सौ नोकर फेटै खोलणा । 47 किबैकि तेइयै आपणी जिम्मेवारी शोभली ढँगै नी निभाई होर तेइबै कडी सजा देणी ।

48 पर तै लोका जुणा नी जाणदै कि ते गलत केरदै लागै सी तिन्हाबै थोड़ी सजा होणी । किबैकि जुणी बै बोहु जिम्मेवारी धिनी सा तिन्हा बोहु हिसाब पौऊ देणा होर जुणीबै थोड़ी जिम्मेवारी धिनी सा तिन्हा थोडा हिसाब देणा पौऊ ।

### यीशु रै एणें रा चिन्ह

49 हाँऊ धोरती पेंधें औगी लाँदा आऊ सा होर चाहा सा कि ए ऐत्रे लागी लोड़ी । 50 मूँ ता हाजी दुःख सौहणा पौडना जाँ दौई स पूरा नी होला तैबै तक मूँ कैण्टी व्यथा ना रोहणा । 51 तुसै की सोमझा सी हाँऊ धोरती पेंधें मेल करांदा आऊ सा? नैई हाँऊ तुसा बै बोला सा हाँऊ अलग करांदा आऊ सा । 52 किबैकि ऐबे ना बाद एकी घौरा ना पौज जाणा आपु ना वरोध रखणा त्राइ दुइ रै होर दुई त्राइ रै । 53 बापू बेटै ना होर बेटै बापू सेंधे वरोध रखणा, आमा बेटा आपु ना वरोध रखणा, शोशू नूशा आपु ना एकी होरी सेंधे वरोध रखणा ।

### बौकै रै लछण

54 यीशुए लोका बै बोलू, जैबै तुसै पश्चिमा धिरें ना बादला बै एन्दै हेरा सी ता तुसै फट केरदै बोला सी गाश एणा होर तैण्डाए होआ सा । 55 होर जैबै दक्षिणा धिरें ना बागर चैला सा तैबै तुसै बोला सी कि गर्मी होणू आई सा होर तैण्डाए होआ सा । 56 हे कपटियो, तुसै बागर होर बादआ हेरिया सर्दी गर्मी रा भेद ता केरी सका सी पर एई जुगा ना परमेश्वर जे केरदा लागा सा तैथे रै बारै ना भेद केरना किबै नी जाणदै?

### आपणें मुदई सेंधे समझोता

57 तुसै आपुए किबै नी फैसला केरदै कि सही की सा? 58 आपणें मुदई सेंधे बौता ना जाँदी घेरै समझता केरा । कोइछे ऐण्डा नी लोड़ी हुआ कि फैसला केरनुआ तौभे खिचिया नेला होर तौभे सपाही हामें देला होर सपाही तौभे बन्दी घौरा ना पालै । 59 हाँऊ तौभे बोला सा, जाँ दौई तू पाई-पाई नी चुकाला तां दौई तौ तौखेना नी छुटणा ।

### पाप केरनै छोडा

13 तेई बौकै किछ लोका तौखे आरे होर ते यीशु सेंधे तिन्हा गलीली लोकें रै बारै ना चर्चा केरदै लागै जौसरा खून राज्यपाल पिलातुसै यरुशलेम मन्दिरा ना बलि केरदी घेरै केरनै द्यारु ती । 2 इन्हा गैला शुणिया यीशुए बोलू, "तुसै की समझा सी कि ए गलीली होरा सब गलीली लोका ना जादा पापी ती तैबै ते मारै?" 3 ऐण्डा बिल्कुल बी नी आँधी, अगर तुसै आपणें पापा बै नी छोडलै ता तुसा सैभी बी ऐण्डै मौरना । 4 तिन्हा ठारा माणुहू रै बारै ना तुसै की समझा सी जुणी पेंधें शीलोह रा गुम्मत औळू होर ते पौथुइया मुँए; तुसै की सोचा सी कि ते यरुशलेमा ना रोहणू आलै होरी लोका ना जादा पापी ती? 5 हाँऊ तुसाबै बोला सा, ऐण्डा नी आँधी, "अगर तुसै आपणें पापा बै नी छोडलै ता ना तुसा बी ऐण्डै मौरना ।

### अंजीरें रै बुटै रा उदाहरण

6 यीशुए तिन्हा बै एक उदाहरण देसू: "एकी माणुए आपणें अंगूरें रै बगीचें ना एक अंजीरा रा बुटा लाऊ ती । बगीचें रा मालक तेई बुटै आगै फौल तोपदा आऊ । जेबै तेई मालका बै तेई बुटै ना कोई फौल नी मिलू ता स बडा नराश हुआ । 7 तैबै तेई मालकें आपणें बगीचें रै पौहरैदारा बै बोलू, "शुण हाँऊ त्राई साला ना एई बुटै ना फौल तोपदा लागा सा पर एक बी नी मिलदै ।" एई बुटै बगीचें री जैगहा बेकारा ना रोकिया रखी सा ऐबै तू एई बुटै बै काट ताकि ए आगै बै जैगहा नी रोकला । 8 आगै बै एथा ना फौल लागलै ता ठीक सा नैई लागलै ता तुसै एई बुटै बै काटी सका सी । 9 आगै बै एथा ना फौल लागलै ता ठीक सा नैई लागलै ता तुसै एई बुटै बै काटी सका सी ।

### यीशु रामै रै ध्याड़े न कुबड़ी बेटड़ी बै ठीक केरा सा

10 यीशु रामै रै ध्याड़े ना अराधना घोरा ना उपदेश देंदै लागै दै ती ।  
11 तौखे एक ऐण्डी बेटड़ी ती जो ठारा वीर्षा ना चेटू री वजहा ना कुबड़ी हुई ती होर सौ कौसी बी ढैणै खड़ी नी ती होई सकदी । 12 यीशुए सौ बेटड़ी आपू आगै शाधी होर तेसाबै बोलू, “ओ बेटड़िये, हेर तू आपणी सारी बमारी होर कमजोरी ना अजाद हुई ।” 13 तेथा ना बाद यीशुए तेसा बेटड़ी पैंधे हौथ रखै होर सौ बेटड़ी एकदम सीधी हुई होर परमेश्वरै री जय जयकार केरदी लागी । 14 एसा गल्ल हेरिया कि यीशुए ऐ बेटड़ी रामै रै ध्याड़ै ना ठीक केरी, अराधना घोरा रा मुखिया झिकुआ होर लोका बै बोलदा लागी, “आसा आगै कोमा केरने री तैइये छौह ध्याड़ै सी तिन्हा ध्याड़ै ना एजिया ठीक होई सका सी पर रामै रै ध्याड़ै ना नी ।” 15 यीशुए जवाब धिना, “ओ कपटियो; तुसै बी ता रामै रै ध्याड़ै ना कोम केरा सी कि तुसै रामै रै ध्याड़ै ना आपणै बौल्द या गदहै बै छौड़िया पाणी प्याणै बै नी नेंदै” 16 तैबै ऐ सही नी ऑथी कि ऐ बेटड़ी जो अब्राहमै रै खानदानै री सा होर ठारा वीर्षा ना चेटू रै कब्जे ना ती रामै रै ध्याड़ै ना ठीक हुई? 17 एसा गल्ल शुणिया यीशु रै सारै वरोधी शर्मिदा हुऐ होर सारै लोकै री भीड़ यीशु रै नोखै कोम हेरिया खुशी मनांदी लागी ।

### राई रै दाणै रा उदाहरण

18 तेथा ना बाद यीशुए तिन्हा ना पुछू, “परमेश्वरा रा राज्य कुणी साही सा? होर हाँऊ एथे री बराबरी किजी सेंधे केरनू? 19 “परमेश्वरा रा राज्य तेई राई रै दाणै बराबर सा जो कौसी माणहुऐ नेइया आपणै छेता ना बाहू होर स बड़ा होइया बुटा बँणू होर चिडुऐ तेथे री शांणी पैंधे कोल्ह बणाऊ ।”

### मलेडै रा उदाहरण

20 यीशुए भी बोलू, “परमेश्वरा रा राज्य कुणी साही सा? 21 परमेश्वरा रा राज्य तेई मलेडै साही सा जो एकी बेटड़िए त्राई मुठी गेहूँ रै पिठै ना मलाऊ होर सारा पिठा मलेडुआ ।”

### सौंगड़ा दुआर

22 यीशु शहर-शहर होर ग्रॉ-ग्रॉ ना उपदेश देंदै-देन्दै यरुशलेम शैहरा धिरा बै जान्दै लागै दै ती । 23 तैबै एकी माणहुऐ यीशु ना पुछू, “ओ गुरु जी, मुक्ति पाणु आऐ कि थोड़ै सी?” 24 यीशुए तिन्हा बै बोलू, “सौंगड़ा दुआर आधे जाणै री कोशिश केरा । हाँऊ तुसा बै बोला सा बोहू सी, जो एई दुआर आधे जाणा चाहा सी पर नी जाई सकदै । 25 एक रोज परमेश्वर जो घोरकै मालका साही सा तेई उठिया दुआर बन्द केरना होर तुसा बाहरै खैडै होइया दुआर खड़काइया विनता केरनी, “ओ प्रभु जी आसरी तैइये दुआर खोलात तैबै तेई भीतरै ना जवाब देणा तुसै कौखलै सी हाँऊ तुसा बै नी जाणदा?” 26 तैबै तुसा बोलणा, ‘आसै तुसा सेंधे खाऊ-पीऊ होर तुसै आसरे बजारा ना उपदेश धिनै ।’ 27 पर तेई तुसा बै बोलणा, ‘हाँऊ तुसा बै नी जाणदा कि तुसै कौखलै सी ।’ ओ बुरे कोम केरनू आले लोको तुसै मूँ आगै ना दूर होआ । 28 जैबै तुसै अब्राहम, इसहाक, याकूब, होर सैभी भविष्यवक्ता बै परमेश्वरै रै राज्य ना बेटै दै हेरलै होर आपू बै तौखेना बाहरै खोलुऐदैं हेरलै ता तुसा तौखे रोंणा होर तुसा बै बोहू कष्ट होणा । 29 सारी दुनियै रै लोका हर जैगहा ना कड़ा होइया परमेश्वरै रै राज्य री धामा ना शामिल होणा । 30 होर शुणा, जुणी रा लोका आदर नी केरदै सौ परमेश्वरा ऐण्ढा बणाणा कि लोका तेइरा आदर केरलै होर ऐबै जे लोकै री नजरी ना आदरणीय सी तिन्हरा परमेश्वरा निरादर केरना ।

### हेरोदास राजै री दुश्मनी

31 तेई बौकै किछ यहुदी पँडतै एजिया यीशु बै बोलू, “तू औरखेना जा किबै कि हेरोदेस राजा तौभै मारना चाहा सा ।” 32 यीशुए तिन्हा बै बोलू, जाईया तेई बै बोला, औज काल मूँ बिमार माणहू बै ठीक केरदै रौहणा होर तिन्हरै चेटू खोलदै रौहणा पर हाँऊ जुणी कोमै री तेइयें आऊ सा छेकै मूँ सौ कोम पूरा

केरना । 33 पर इन्हा रोजा ना मेरा कोम केरदै रौहणा जरूरी सा किबैकि ऐण्ढा नैई होई सकदा कि कोई भविष्यवक्ता यरुशलेम शैहरा ना बाहरै मारिला ।”

### यीशु रा यरुशलेमा री तैइये दुखी होणा

34 “हे यरुशलेम! हे यरुशलेम! तू ऐण्ढा शहर सा जो भविष्यवक्ता बै मारा सा होर तिन्हा लोका बै पाथरै मारा सा जुणा परमेश्वरै तौ आगै भेजे ।” में कैई बार सोचू जैण्डै मुर्गी आपणै बन्नै बै सम्भाला सा तैण्डै मूँ बी तेरै शोहर कड़ा केरने ती पर तैं हाँऊ ऐण्ढा केरने नी धिना । 35 होर हेरा ऐबै तुसरा घोर तुसरी तैइये खाली छौड़िया सा होर हाँऊ तुसा बै बोला सा, जैबै तक तुसै ऐण्ढा नी बोललै कि धन्य सा स जो प्रभु रै ना पैंधे एजा सा तैबै तक तुसा हाँऊ कैदी बी नी हेरना ।

### यीशु यहुदी पँडतै रै मुख्य रै घोरा

14 यीशु रामै रै ध्याड़ै ना एकी यहुदी पँडतै रै मुखिये रै घोरा बै रोटी खाँदै नौठै होर ते लोका यीशु बै फसाणै री तयारी ना बेटदै ती । | 2 तौखे यीशु रै सामने एक ऐण्ढा माणहू ती जुणीरै हौथ जोंघा म्हाऐ दै ती । 3 तेई हेरिया यीशुए धर्मविधि जाणनू आऐ होर यहुदी पँडता बै बोलू, “रामै रै ध्याड़ै ना भला केरना सही सा कि नैई?” 4 पर ते सारै चुपचाप बेटै । तैबै यीशुए सौ माणहू आपणै हौथा सेंधे छुँगिया ठीक केरु होर जाणै धिना । 5 तैबै यीशुए तिन्हा बै बोलू, “तुसा मौंजै ऐण्ढा कुण सा कि जुणिरा बौल्द या गदहा कुँऐ ना पौडला होर सौ रामै रै ध्याड़ै ना तेई बै छेकै बाहरै नी खोलला?” 6 ते इन्हा गल्ला रा किछ बी जवाब नी देई सकै ।

7 यीशुए जैबै हेरु कि पाहुँणै एजिया बेशणै बै कैण्डी शोभली-शोभली जैगहा भाला सी ता तिन्हा बै एक उदाहरण दैसू । 8 जैबै तुसा बै कोई ब्याह-शादी ना शाधले ता तुसै जाइया शोभली-शोभली जैगहा पैंधे हेरेइत् बेशदै । कोइछे ऐण्ढा नी लोड़ी हुआ कि तेई माणहुऐ तुसा ना बी बडै माणहु बै छोदा धिना दा होला । 9 जुणिए तुसा दुही बै छोदा धिना सा तैबै तेई एजिया तुसा बै बोलणा इनरी तैइये जैगहा छोडा । तैबै तुसा शर्मिदै होइया निशटी जैगहा पैंधे बेशणा पौउ । 10 जैबै तुसा बै कोई शाधलै ता तुसै जाइया निशटी जैगा पैंधे बेशेइत् । तैबै जुणिए तुसै शाधे सी तेई एजिया तुसै शोभली जैगा पैंधे बेशणै । तैबै जे तुसा सेंधे बेशणु आले सी तिन्हा सामने तुसरा आदर होणा । 11 किबैकि जे कोई आपू बै बैडा बुझा सा तेई ओछे गिणिना होर जो आपू बै ओछा बुझा सा तेई बैडै गिणिना । 12 तेथा ना बाद यीशुए आपू बै शाधणु आले बै बोलू, “जैबे तू ध्याड़ी या राती कौसी बी बौकै भोज रखला ता तू आपणै रिशतैदार, आपणै भाई, सेंधी होर सेठ माणहू बै हेरेइ शाधदा कोइछे ऐण्ढा नी लोड़ी हुआ कि ते बी तौभै शाधिया तेरा बदला चुकालै ।” 13 पर जैबै तू भोज रखला ता तू ऐण्डै माणहू बै शाधेई जो गरीब, टुण्डै, लँगडै होर काणै होलै । 14 तैबै तू धन्य होंणा, किबैकि तिन्हा आगै तौभै बदला देणै री तैइये किच्छ नी होंणा, तैबै धर्मी माणहु रै जिन्दा होणै सेंधे परमेश्वरा तौभै एसा गल्ला रा इनाम देणा ।

### बड़ी धामा रा उदाहरण

15 यीशु सेंधे रोटी खाणु आऐ मौंजै ना एकी माणहुऐ इना गल्ला शुणिया यीशु बै बोलू, “धन्य सा सौ माणहू जुण परमेश्वरै रै राज्य ना रोटी खाला ।” 16 यीशुए तेई माणहू बै बोलू, “एकी माणहुऐ एक बड़ी धाम धिनी होर तेइयै बोहू लोका तेसा धामा बै शाधे । 17 जैबै धाम तयार हुई तैबै तेई माणहुऐ आपणा नोकर छोंदै लाउदै लोका बै शाधदा भेजू कि एजा ऐबै धाम तयार हुई सा । 18 पर ते सारै आनाकानी केरदै होर माफी मुँगदै लागै, पहिलै माणहुऐ बोलू मूँ एक छेत लेऊ सा मेरा तेई छेता भाल्दै जाणा जरूरी सा, हाँऊ त आगै विनती केरा सा कि तू मुँबै माफ केर । 19 तैबै दुजै माणहुऐ बोलू मूँ पोज जोड़ी बौल्द लेऐदैं सी होर मूँ तिन्हा बै हेरदै जाणा; हाँऊ त आगै विनती केरा सा कि तू मुँबै माफ केर । 20 एकी होरी माणहुऐ बोलू मूँ ब्याह केरु सा हाँऊ नी एजी सकदा । 21 तैबै तेई नोकरै एजीया आपणै मालका बै ए सारी गल्ला दैसी । तैबै तेई घोरै रै मालकै तेई नोकरा बै झिक्का सेंधे बोलू तू बजारै री गल्ली-गल्ली ना जाइया लँगडै, टुण्डै, काणै हो सैभी कँगाला बै औरखे आण । 22 नोकरै

एजिया भी बोलू, ओ मालका जैण्डा तुसै बोलू दा ती मैं तैण्डाए केरु पर आज्जी बी जैगहा खाली सा। 23 तैबे तेई मालके नोकरा बै बोलू, तू सडका ना होर बाँता ना लोका बै जबरदस्ती कड्डा केरिया आण ताकि मेरा घोर भौरिला। 24 किबैकि हाँऊ तुसा बै बोला सा तिन्हा शाधै दै माणहू मौँझै ना कोई बी माणहू मेरी एसा धामा रा स्वाद नी लेई सकदा।

### चेलै बैणनै री कीमत

25 जैबै यीशु सँधे लोकै री बड़ी भीड ओढदी लागी दी ती तैबे यीशुए पिछे भाइया बोलू, 26 जुण माणहू आपणै आमा-बापू, भाई-बैहण होर लाडी-बाल बच्चै होर आपणी ज्ञानी सँधे जादा झुरी रैखा सी ते माणहू मेरै चेलै नी होई सकदै। 27 जुण माणहू आपणै कूस चेरिया मूँ पिछे नी ओढी सकदा सौ बी मेरा चेला नी होई सकदा। 28 तुसा मुँझै ऐण्डा माणहू कुण सा जो कि घोर बणाणै ना पहलै तेई घौरा रा खर्चा नी जोडला कि हाँऊ एथा बै पूरा केरी सका सा कि नी? 29 कोइछे ऐण्डा नी हुआ लोडी कि तेइरै सारै ढबुए मनियादी बै केल्ही खर्च होलै होर सैभे लोका तेइरा मजाक बणाले, 30 कि ऐ माणहू घोर बणादा ता लगा ती पर नी बणाई सकू। 31 ऐण्डा राजा कुण सा जो कि लड़ाई केरनै ना पहिलै बेशिया वचार नी केरला कि जुण राजा बीह हज़ार फोऊज़ी पाइया मूँ सँधे लडनै री तैइयै एन्दा लागी सा कि हाँऊ दस हज़ार फोऊज़ी लाइया तेइरा मुकाबला केरी सका सा? 32 नैई ता तेई राजे दुरा नाए आपणै दूत भेजणै होर तेई राजे सँधे मेल-मिलाप केरना। 33 जैबै तक तुसै आपणा सब किछ नी छोडलै तैबै तक तुसै मेरै चेलै नी बणी सकदै।

### स्वाद नैहिन्दा लूण

34 स्वादै री तैइयै ता लूण शोभला सा, अगर तेई लूणा रा स्वाद खराब होला ता सौ किज्जी चिज़ा सँधे लूणा केरिना। 35 सौ लूण माटै ना खादी री जैगा ना बी कोम नी एन्दा होर लोका तेइबै बाहरै शेटा सी। जौसरै शुणनै रै कोन सी तिन्है शुणिया सोमझेइत्।

### राहुईदी भेड़ा रा उदाहरण

15 सारै चुँगी लेणु आरे होर पापी माणहू यीशु आगँ तिन्हरी गल्ला शुणदै एजा ती। 2 तैबै किछ यहुदी पंडत होर धर्मविधि जाणनु आरे आपु ना कुडकुड़ाइया बोलदै लागे, ऐ ता पापी माणहू सँधे मिला सा होर तिन्हा सँधे बेशिया खा-पीया सा। 3 तैबे यीशुए तिन्हा बै ऐ उदाहरण दैसु। 4 तुसा मौँझै कुण फुआल एण्डा सा जुणी आगँ शौउ भेड़ा सी होर तिन्हा मौँझै ना एक भेड़ राहइली, ता सौ तिन्हा नदीनुए भेड़ा बै बोणा ना छोडिया तेसा राहुईदी भेड़ा बै तैबै तक नी तोपला जैबै तक सौ तेइबै नी मिलदी। 5 जैबै तेई फुआला बै सौ भेड़ मिला सा ता सौ फुआल बडै खुश होइया तेसा भेड़ा बै आपणै कोन्हा पँधे चेका सा। 6 होर घौरा एजिया आपणै सैभि सँधी होर पडेशी बै कड्डा केरिया बोला सा मूँ सँधे खुशी मनात् किबैकि मेरी एक भेड़ राहुईदी ती होर ऐबै स मुँबै मिली। 7 हाँऊ तुसा बै बोला सा, जैबै एक पापी माणहू आपणै पाप छोडिया परमेश्वरा धिरा बै एजा सा ता स्वर्गा ना तेई पापी माणहू री तैइयै एतरी खुशी मनाइया सा जेतरी कि नदीनुए धर्मी माणहू री तैइयै नी मनाँइदी।

### राहुएदैं सिक्के रा उदाहरण

8 तुसा मौँझै कुण ऐण्डी बेटडी सा जौस आगँ दस सिक्के सी होर तेथा ना एक सिक्का राहिला होर सौ बेटडी लाम्प पकेइया होर घौरा बै झाडी-बुहारिया तेई सिक्के बै ताँ तक नी तोपली जाँ तक कि सौ नी मिलला। 9 हेरा जैबै तेसा बेटडी बै स सिक्का मिला सा ता सौ आपणी सँघणी होर पडेशी बै कड्डा केरिया बोला सा, मूँ सँधे खुशी मनात् किबैकि मेरा एक सिक्का राहुआदा ती होर ऐबै सौ मुँबै मिलू। 10 हाँऊ तुसा बै बोला सा ठीक ऐण्डै तैरहै पाप छोडनु आरे एकी पापी माणहू री तैइयै परमेश्वरै रै स्वर्ग दूता सामनै खुशी मनाँइणी।

### बिगड़े दै बेटे रा उदाहरण

11 तेथा ना बाद यीशुए तिन्हा लोका बै एक होर उदाहरण दैसू, एकी माणहू रै दुई बेटे ती। 12 तिन्हा मौँझै ना ओछे बेटे आपणै बापू बै बोलू, "ओ बापू जी जायजादा ना जे मेरा हिस्सा बेणा सा तेई तुसै मुँबै दैआत्।" तैबै तेइ बापूए आपणै दुही बेटे बै आपणी जायजाद बोडिया धिनी। 13 किछ रोजा बाद ओछे बेटे आपणी सारी जायजाद बेची होर घोर छोडिया सारै ढबुए कड्डा केरिया दूर देशा बै नौठा। तौखै तेइयै आपणै सारै ढबुए मोउज मस्ती होर बुरै-बुरै कोमा ना खर्च केरै। 14 जैबै तेइरै सारै ढबुए खत्म हुए ता तेई देशा ना रूड पौई होर सौ भूखे मौरदा लागी। 15 तैबै सौ शोहरु तेई देशै रै एकी सेठा आगँ कोम मुँगदा नौठा होर तेई सेठै सौ शोहरु आपणै छेता बै सुअर चारदा भेजु। 16 होर सौ चाहा ती कि जुणा फली बै सौ सुअरा बै खाणै बै देआ ती तिन्हा खाईया आपणा पेट भौरला होर तेइबै कोई किच्छ नी ती दँदा। 17 जैबै सौ शोहरु आपणी होशी न आऊ, तैबै सौ सोचदा लागी कि मेरै बापु रै घौरा ना केतरै मजदूर सी जुणी बै कि जरूरती ना जादा खाँणै बै मिला सा होर हाँऊ ओखै भूखे मौरदा लागी सा, 18 ऐबै मूँ उठिया आपणै बापु रै घौरा बै जाणा होर तिन्हा बै बोलणा, बापू जी मैं परमेश्वर होर तुसरै खिलाफ पाप केरु सा। 19 ऐबै हाँऊ तुसरा बेटा बोलणै रै लायक नी रौहू। मुँबै तुसै आपणै घौरा ना नोकरा साही रखा। 20 तैबे सौ उठिया आपणै बापु रै घौरा बै चोली। आज्जी सौ आपणै घौरा ना थोडी दूर ती कि तेइरै बापुए स हेरु होर बापू बै तेई पँधे दैया आई। तैबै सौ बापू ठोर मारिया आपणै बेटे रै गौए मिलू होर तेई बै माँकी धिनी। 21 तैबै तेई बेटे बापू बै बोलू, "ओ बापू जी ऐबै हाँऊ तुसरा बेटा बोलणै रै लायक नी रौहू किबैकि मैं परमेश्वर होर तुसरै खिलाफ पाप केरु सा।" 22 पर तेई बापुए आपणै नोकरा बै बोलू, "शोभलै ना शोभलै झिकडै आणा होर एई रै लाआत। एइरै हौथा ना खानदानी मुँदडी होर जाँघा ना शोभलै बूट लाआत् 23 होर धाचुएदैं मोटै जेही बौकरै बै आणा होर काटा ताकि आसै सब मिलिया खाले होर खुशी मनाले। 24 किबैकि मेरा ऐ बेटा मुँआ ती होर ऐबै जिन्दा हुआ सा। ऐ राहुआ दा ती पर ऐबै मिलू सा। तैबै त सबै खुशी मनाँदै लागे। 25 तेइरा बड़ा बेटा छेता ना ती। जैबै सौ घौरा बै आऊ ता तेइरै घौरा आगँ पुजिया बड़ी गिता-बाता शुणी। 26 तैबै बडै बेटे एकी नोकरा ना पुछू, 'ऐ की हाँदा लागी सा?' 27 नोकरै एजिया बोलू, 'तुसरा भाई सहि-सलामत घौरा बै वापस आऊ सा होर बापु जी ऐ तेइरै एणे री खुशी ना मोटा जेही बौकरा काटणै छाऊ दा सा होर आसै सबै खुशी मनाँदै लागे दै सी। 28 एसा गल शुणिया बड़ा भाई झिकुआ होर सौ भीतरा बै नी नौठा। तैबै तेइरै बापुए सौ बाहरै एजिया समझाऊ 29 तेइयै आपणै बापू बै जवाब धिना, "हेरा हाँऊ एतरी वौर्षा ना तुसरी सेवा केरदा लागी सा होर तुसरी हरेक आज्ञा बै मनदा लागी दा सा पर तैबै बी तुसै मेरी तैइयै एक गौभू तक नी धिना कि हाँऊ आपणै सँधी सँधे खुशी मनाँदा।" 30 पर जैबै तुसरा ऐ ओछा बेटा आपणी सारी धन-दौलता बै बुरै-बुरै कोमा ना खैत्म केरिया आऊ ता तुसै एई री तैइयै सैभि ना बड़ा बौकरा काटू होर लोका ना धाम ख्याई। 31 तैबै बापुए तेइबै बोलू, "ओ मेरै प्यारै बेटेआ तु ता हमेशा मूँ सँधे रौहा सा होर जे किछ मेरा सा सौ सबकिछ तेराए ता सा। 32 पर आसा एई रोजा ना खुशी मनाणी किबै कि तेरा ऐ भाई जे मुँआ दा ती ऐबै जिन्दा हुआ सा। होर जुण कि राहुआदा ती ऐबै मिलू दा सा।

### चलाक मुन्शी

16 यीशु आपणै चेलै बै एक कैथ दसा सी। एकी सेठा आगँ एक मुन्शी ती होर लोकै सेठा सामनै तेई मुन्शी पँधे दोष लाऊ कि तुसरा मुन्शी तुसरै ढबुए बै आपणी मर्जीए खर्च केरदा लागी सा। 2 तैबै तेइ सेठै आपणा मुन्शी शाधु होर तेइबै बोलु, हाँऊ तेरै बारै ना ऐ की लागी सा शुँणदा? तू आपणै मुन्शी हाँणै रा हिसाब दै किबैकि तू आगँ बै मुन्शी नी रौही सकदा। 3 तैबै सौ मुन्शी सोचदा लागी, ऐबै हाँऊ की केरनु? किबैकि मेरै मालका हाँऊ मुन्शी रै कोमा ना खोलणा लाऊ सा होर मूँ ना एतरी ताकत नी आँथी कि हाँऊ गड्डे कोती सकनु। होर भीख मुँणै ना ता मुँबै शर्म लागी सा। 4 मूँ आगँ एक तरकीब सा अगर तेतै रै मुताबिक हाँऊ कोम केरनु ता मेरै बोहू

सारें सेंघी होणें । ओखना खोलणें ना बाद तिन्हा मेरी मजत केरनी । 5 तैबे तेइ मुन्शीऐ आपणें मालकें रै कर्जदार एक-एक केरिया शाधें । मुन्शीऐ पहलें कर्जदारा ना पुछू, तौ पेंधें मेरें मालका रा केतरा कर्जा सा? 6 कर्जदार उतर धिना, शौऊ मँग तेल, तैबे मुन्शीऐ तेइबें बोलू तू बेशिया आपणें खातै ना पजाह लिख । 7 तैबे मुन्शीऐ दुजें कर्जदारा ना पुछू, 'त पेंधें केतरा कर्जा सा?' तेइ कर्जदारें बोलू, मूँ पेंधें शौऊ मँग गेहूँ रा कर्जा सा । तैबे मुन्शीऐ तेइबें बोलू, तू आपणें खातै ना औशी मूँग लिख । 8 तैबे मालकें तेइ लूचें मुन्शी री बडी सराहणा केरी किबैकि तेइयें बडी चलाकी सेंघें कोम केरु । किबैकि एसा दुनियें रै लोका आपणें बौकें रै लोका मोंझें आपणें रीति व्यवहारा ना धर्मी लोका ना ज़ादा चलाक सी । 9 तैबे यीशुऐ बोलू, "हाँऊ तुसा बै बोला सा कि दुनियें री धन दौलता ना आपणी तेंइयें सेंघी बणात् । तैबे तिन्हा अन्नत जीवना ना तुसरा स्वागत केरना" । 10 जुण थोडें जेही ना बशाह रै काबिल सा सौ बोहू ना बी बशाह रै काबिल सा होर जुणी पेंधें थोडें जेही ना बी बशाह नी केरी सकदै तेइ पेंधें बोहू ना बी बशाह केरना मुश्किल सा । 11 अगर तुसै दुनियावी धन-दौलता ना विश्वास योग्य नी आँथी ता तुसा बै सेंघा धन कुणी देणा 12 अगर तुसै दुजें री धन-दौलता ना बशाह केरनै लायक नी रौहदै ता जे धन-दौलत तुसरी आपणी सा सौ तुसा बै कुणी देणी? 13 कोई बी नोकर दुई मालकें री सेवा नी केरी सकदा किबैकि एण्डा करनै सेंघें तेइ एकी सेंघें ता मिलिया रौहणा पर दुजें सेंघें नैई ।

### यीशु रै किच्छ उपदेश

14 यहूदी धर्मी पंडित जो धन-दौलतें रै लालची ती ते यीशु री शिक्षा शुणीया तिन्हा मज़ाक उड़ावै लागें । 15 यीशुऐ तिन्हा बै बोलू, "तुसै ता माण्हू रै सामनै आपणें-आपू बै धर्मी समझा सी पर परमेश्वर तुसरें मना बै ज़ाणा सा । ऐ दुनिया जुणी गल्ला रा आदर केरा सा सौ परमेश्वरें री नज़री ना नफरतें रै लायक सा । 16 जैबे तक बपतिस्मै देणू आऐ युहन्नै प्रभु रा वचन नी दसू ती तैबे तक लोका मूसै री धर्म विधि होर भविष्यावाणी केरनू आऐ बै मना ती, पर एबे परमेश्वरें रै राज्य रै ज्ञाने री गैला रा प्रचार होंदा लागा सा होर सेंबे लोका एई राज्य पाणें री तेंइऐ ऐंदे लागें सी । 17 एथा रा मतलब ऐ नी आँथी कि धर्मविधि रा कोई मतलब नी रौह । धर्मविधि ता स्वर्ग होर धौरती ना बी बोहू पक्की सा । 18 जैण्डा कि, "कोई बी माण्हू अगर आपणी लाडी बै तलाक देआ सा होर कौसी होरी बेटडी सेंघें ब्याह केरा सा ता स पाप केरा सा होर जुण तलाक देउईदी बेटडी सेंघें ब्याह केरा सा स बी पाप केरा सा ।

### सेठ माण्हु होर सेठ लाजर

19 यीशुऐ एक होर उदाहरण दैसू, एक सेठ माण्हू ती । सौं मेंहगें-मेंहगें झिकडै ला ती होर हर रोज सुख चैन होर ठाटा ना रौहा ती । 20 लाजर नाँ रा एक कँगाल माण्हू जो कि ज़ख्मा सेंघें भौरुआदा ती तेइबें कोई माण्हू तेइ सेठ माण्हू री डेही पेंधें छोड़ा ती 21 लाजर तेइ सेठ माण्हू रै दुआरा आगें बेशा ती । तौखें सौ सेठ माण्हूऐ शेटू दै जुटै बै खा ती होर कुतै एज़िया तेइरें ज़ख्मा बै लैमका ती । 22 किछ रोजा बाद सौ कँगाल माण्हू मुआ होर स्वर्गदूतें तेइरी आत्मा नेइया स्वर्गा ना अब्राहमै रै फाडै ना पजाई । तैबे किछ रोजा बाद सौ सेठ माण्हू बी मुआ होर सौ पौथू । तेइरी आत्मा नरका ना पौई । 23 नरका ना तडफदी घेरें तेइ ना बोहू दूर अब्राहमै रै फाडै ना लाजर हेरुआ । 24 तैबे तेइयें हाक पाइय बोलू, "ओ बापू अब्राहम मूँ पेंधें दया केरिया लाजरा बै भेज ताकि ऐ आपणी गुठी पाणी ना शौगिया मेरी जीभा बै ठण्डा केरला किबैकि हाँऊ ओखें ओगी ना तडफदा लागा सा ।" 25 पर अब्राहमै बोलू, "ओ मेरें बेटे याद रख तें आपणी जिन्दगी ना सारी शोभली चीज़ा पाई सी जैबैकि लाजरें बुरी चीज़ा, होर ऐबे ऐ ओखें मजें ना सा होर तू तौखें दुःख झेलदा लागा सा । 26 एतराए नी आँथी, तेरें होर आसरे बिचा ना एक बडी खाई सा । तौखें ना कोई औराबे नी एजी सकदा होर ना कोई ओखें ना पौरें बै जाई सकदा । 27 तैबे तेइ सेठ माण्हूऐ बोलू, ता हे बापू हाँऊ तौ आगें विनती केरा सा कि लाजरा बै मेरें घौरा भेज । 28 किबैकि मेरें पोंज भाई सी हाँऊ चाहा सा कि लाजर तिन्हा आगें ज़ाइया तिन्हा बै ई नरकें रै बारें ना समझाला ताकि मोरनै ना बाद ते ई नरका बै नी लोडी आऐ । 29 पर अब्राहमै बोलू, तिन्हा

हागें मूसा होर गुरु सी तिन्हा बै तिन्हरी शुणनै दै । 30 तैबे सेठें बोलू, नैई बापू अब्राहमा, अगर कोई मूँऐ ना तिन्हा आगें ज़ाला ता तिन्हा परमेश्वरा धिराबें फिरना । 31 अब्राहमै तेइबें बोलू, अगर ते मूसा होर गुरु री नी शुणदै ता कोई मूँऐ माण्हू ना तिन्हा आगें ज़ाला ता तिन्हा तेइरी बी नी शुणनी ।

### यीशु ठोकर होर माफ़ी रै बारे न शिक्षा देआ सा

17 एक रोज यीशुऐ आपणें चेलें बै बोलू, लोका ना पाप करणू आई गल्ला ता बोहू होणी पर तेइ माण्हू बै कडी सजा मिलणी जे होरी ना पाप करा सा । 2 जुण माण्हू मूँ पेंधें बशाह केरनू आऐ ना पाप करा सा तेइरें गौआ ना गरका पाथर बोनिया तेइबें समुंदरा ना शेटलें ता तेइरी तेंइयें ऐ सजा बी कम सा किबैकि परमेश्वरा तेइबें एथा ना बी कडी सजा देणी । 3 खबरदार! अगर तेरा कोई भाई पाप केरा सा होर तेइ पापा बै मना सा ता तू तेइबें माफ केर ।" 4 अगर तेरा भाई सौत बार तेरें खिलाफ पाप केरा सा होर सौत बार एज़िया माफ़ी मुँगा सा ता तू तेइबें माफ केर ।

### बशाह री शिक्षा

5 चेलें यीशु बै बोलू, "प्रभु जी आसरे बशाह बै बढात् । 6 प्रभु यीशुऐ तिन्हा बै बोलू, "अगर तुसा आन्दरें राई रै एकी दाणें बराबर बी बशाह होंदा ता तुसै ऐई तूतें रै बूटें बै बोलदै कि तू जलाडै सेंघें नोई बै जा ता तेइ तुसरी शुणनी ती ।

### एकी नोकरा रा फर्ज

7 तुसा मोंझें ऐन्डा नोकर कुण सा जो कि छेता ना हौल लाइया होर भेडा बै चारिया एला ता तेइरा मालक बोलला कि एज होर रोटी खाँदा बेश? 8 कि तेई मालका ऐन्डा बोलणा कि पहलें मेरी तेंइयें रोटी बणा होर जाँ ढौई हाँऊ खानू पिनु नी ताँ ढौई तू मेरी सेवा केर तैबे ना बाद तू बी खाई पीई । 9 आपणा सारा कोम करणें ना बाद बी तैई मालका आपणें नोकरा ना एहसान नी मनणा । 10 ऐण्डे तैरहें, जैबे तुसै मेरें सारें कोम होर मेरी सारी आज्ञा बै मैनलै ता तुसै एण्डा बोलेइत्, आसै एसा सफारशी लायक नी आँथी, आसै ता नक्कमै सेवक सी होर आपणा फर्ज पूरा केरना लाऊ सा ।

### यीशु दस कोढ़ी माण्हु बै ठीक केरा सी

11 यीशु सामरिया होर गलीलें रै बिचियें आघे यरुशलैमा बै जाँदै लागें दै ती । 12 कौसी ग्रॉ बै जाँदी घेरें यीशु बै दस कोढ़ी मिलें । 13 तिन्हें कोढ़ियें दूर खडै होइया ज़ोरा सेंघें बोलू, "ओ गुरु जी! आसा पेंधें दया केरात् ।" 14 यीशुऐ तिन्हा बै हेरिया बोलू, "जाआत्, होर ज़ाईया आपणें आपा बै यरुशलैम मन्दिरें रै पज़ीयारें बै रिहात्" होर जाँदै-जाँदै ते ठीक हुऐ । 15 तिन्हा मोंझें जैबे एकियें हेरु कि हाँऊ ठीक हुआ ता सौ परमेश्वरें री जय-जयकार केरदै वापस आऊ । 16 सौ एज़िया यीशु री ज़ोधा पेंधें पौडिया यीशु रा धन्यवाद केरदा लागा; होर सौ सामरी ती । 17 तेई हेरिया यीशुऐ बोलू, "कि मैं दसै रै दस कोढ़ी ठीक नी केरें तैबें होरा ते नोऊ कौखें नौठै ।" 18 जे यहूदी नी आँथी एई परदेशी छोड़िया कोई होर नी निकता जो परमेश्वरा रा धन्यवाद केरदा? 19 तेथा ना बाद यीशुऐ तेई माहू बै बोलू, "खड़ा उठ होर जा किबैकि तें परमेश्वरा पेंधें बशाह केरु तैबे तू ठीक हुआ ।"

### परमेशवरें रै राज्य रा एणा

20 एक बार यहूदी पुरोहितें यीशु ना पुछू कि परमेश्वरा रा राज्य कैबे एणा? यीशुऐ तेइबें बोलू, "परमेश्वरा रा राज्य प्रगट रूपा ना नी एँदा कि तुसै तेइबें हेरी सकलें । 21 लोका नी बोलणा हेरा परमेश्वरा रा राज्य ओखें सा कि तौखें सा किबै कि हेरा परमेश्वरा रा राज्य तुसा मोंझें सा । 22 तैबे यीशुऐ आपणें चलें बै बोलू, "तिन्हा ध्याडै एणा जैबे तुसै माण्हू रें बेटें रै ध्याडै ना एकी ध्याडै बै हेरणा चाहलें पर सौ ध्याडा तुसाबे भाणें नी मिलणा । 23 पर लोका तुसा बै बोलणा कि हेरा परमेश्वरा रा राज्य ओखें सा कि तौखें सा पर तुसै तिन्हा पिछें हेरेइत् जाँदै । 24 जैण्डे सर्गा ना बिजली चमका सा तैण्डे माण्हू रें बेटें बी

आपणें रोजा ना प्रगट होणा । 25 पर पहिलें ए जरूरी सा कि माणहु रा बेटा दुःख चेकला, होर एई जुगें रें लोका तेईबै होच्छा बुझलें । 26 माणहु रें बेटें रा ध्याडा बी एण्डा होणा, जेण्डा की नुहै रें ध्याडें ना हुआ ती । 27 जुणी ध्याडें तक नूह आपणें जहाजा ना नी बेटा, तेई ध्याडें तक लोका खा-पीया ती, होर तिन्हा ना ब्याह-शादी होआ ती । तैबै सारी धौरती ना पाणी भोरुआ होर सैभै लोका खैत्म हुए । 28 औजकी दुनिया ना बी एण्डाए होणा, जेण्डा कि लूतें रें बौक्ता ना हुआ ती, लोका खाँदै-पीँदै, लेण-देण कैरदै, बुटै लाँदै होर घौरा बणाँदै लागें ती । 29 पर जुणी रोजें लूत सदोम शैहरा ना निकता तेही ध्याडें ना सर्गा ना आँग होर गन्धका रा गाश पौऊ होर सबकिछ खैत्म हुआ । 30 माणहु रें बेटें रें एणें रें ध्याडें ना बी एण्डाए होणा । 31 तेई ध्याडें ना जुण छापरा पेंधें होला होर तेइरा समान भीतरें होला ता सौ आपणें समान नैदा नी उतरला होर जुण छेता ना सा सौ वापस नी एला । 32 लुतें री लाडी सेंधें जे हुआ तेइबै याद रखा । 33 जुण आपणी ज्ञानी बै बचाणा चाहा सा ता तेई सौ गंवाणी होर जुण आपणी ज्ञानी बै गंवाणा चाहा सा ता तेई सौ बचाणी । 34 हाँऊ तुसा बै बोला सा, “तेसा रातिवै दूई माणहु एकी साथरें ना होणा, तिन्हा मौँझे ना एकी माणहु नेइणा होर दुजा छोडी देणा । 35 अगर दुई बैटडी कैठें चक्की पीशदी होली, ता एक नैईणी होर एक छोडी देणी । 36 दुई माणहु छेता ना कोमा केरदै होणा, तिन्हा मौँझे ना एकी नैईणा होर दुजा छोडी देणा । 37 दुई माहणु छेता ना होलें ता, एक नेहणा होर दुजा छेता ना ए रौहणा 37 तैबै प्रभु यीशु रें चेलें पुछू, “हे प्रभु, ए सैब कौखें होणा? तैबै प्रभु यीशुए तिन्हा बै जवाब धिना, जेण्डे इलणी रें कठा होणें सेंधें पता चला सा कि ओखे कौईछे लाश पौईदी सा तेण्डे इन्हा चिन्ह-चमत्कारा ना ए पता चलणा कि परमेश्वरें रें राज्य रा बौक्त नैड आऊ दा सा ।

### विधवा होर अधर्मी न्यायधीशा रा उदाहरण

18 एक रोज यीशुए आपणें चेलें बै एक उदाहरण दैसू, ताकि ते लगातार प्रार्थना केरदै रोहलें होर नराश नी होलें । 2 यीशुए बोलू, “कौसी शैहरा ना एक फैसला केरनु आला रौहा ती । सौ कौसी माणहु री परवाह नी ती केरदा होर सौ परमेश्वरा ना बी नीती डौरदा ।” 3 तैबै शैहरा ना एक विधवा बी रौहा ती होर सौ तेई फैसलें केरनु आलेआगे -घैडीए एजिया बोला ती, “मेरें फैसलें केरिया मेरें बेईरी ना मुँबे बचातु ।” 4 किछ रोजा दौई स फैसलें केरनु आला हिलै-भाने केरदा रौह, पर एक रोज तेइयें सोचु कि हाँऊ ना ता परमेश्वरा ना डौरदा होर ना लोकें री परवाह केरदा, 5 पर ए विधवा मुँबे घैडी-घैडीए एजिया तंग केरा सा, मूँ एबे पतै लाइया एसरा फैसला केरना ताकी ए आगे बै मुँबे तंग नी केरली । 6 तैबै यीशुए बोलू, “एई अधर्मी ना किछ सीखातु ।” 7 आखिरकार तेइयें बी एक सही फैसला लेऊ । जे रात ध्याड परमेश्वरा आगें विनती केरा सी कि परमेश्वरा तिन्हा सही फैसला नी केरना? कि परमेश्वरा तिन्हरेँ बारें ना देरी केरनी? 8 हाँऊ तुसा बै बोला सा, “परमेश्वरा तुरन्त तिन्हा फैसला केरना । तैबै बी माणहु रा बेटा जैबै एला ता कि तेई धौरती पेंधें बशाह पाणा?”

### यहूदी पंडत होर चुंगी लेणु आळा

9 तैबै यीशुए तिन्हा बै ए उदाहरण दैसू जो आपणें आपा बै बडा धर्मी होर दुजें बै तुच्छ समझा ती । 10 “एक बार मन्दिरा बै दूई माणहु प्रार्थना केरदै नौतै । एक चुंगी लेणु आला होर दुजा यहूदी पंडत ती । 11 सौ यहूदी पंडत दूर खेडें होइया एण्डी प्रार्थना केरदा लागा, “ओ परमेश्वर हाँऊ तेरा धन्यवाद केरा सा कि हाँऊ होरी साही नी आँधी, ना हाँऊ कौसी बै धोखा देंदा, ना हाँऊ व्यभिचारी आँधी होर ना हाँऊ एई चुंगी लेणु आणे साही आँधी । 12 हाँऊ हसै ना दुई बारी व्रत रखा सा होर आपणी सारी कमाई रा दसवाँ हिस्सा दान देआ सा । 13 पर चुंगी लेणु आला सौ माणहु दूर खेडें होइया, टुंबडी मुँडी केरिया होर छाति पिटी-पिटीया होर दुःखी मनै एण्डी प्रार्थना केरदा लागा, “हे प्रभु, हाँऊ ता पापी माणहु सा मुँबे माफ केर ।” 14 तैबै यीशुए बोलू, “हाँऊ तुसा बै बोला सा, सौ चुंगी लेणु आ परमेश्वरें री नजरी ना धर्मी ठैहरु ।” पर सौ यहूदी पंडत परमेश्वरें री नजरी ना पापी ठैहरु, किबैकि सौ आपणें-आपा बै धर्मी समझा ती । किबैकि जुण आपणें-आपा बै बडा बुझा सा तेई होछे

गिणिना होर जुण आपू बै होछा बुझा सा तेई परमेश्वरें री नजरी ना बडें गिणिना ।

### शोहरु बै आशीर्वाद

15 एक रोज किछ आमा-बापू आपणें शोहरु पाइया यीशु आगें आणे ताकि यीशु शोहरु पेंधें हौथ रखिया तिन्हा बै आशीर्वाद देलें पर चेलें तिन्हा बै झिडका ती । 16 पर यीशुए शोहरु आपू आगें शाधें होर बोलू, “शोहरु बै मूँ आगें एणें दैआ इन्हा बै मता रोकदै किबैकि परमेश्वरा रा राज्य इन्हारे सा ।” 17 यीशुए बोलू, हाँऊ तुसा बै सच बोला सा जैबै तैबै तुसै परमेश्वरें रें राज्य बै शोहरु साही ग्रहण नी केरलें ता तुसै स्वर्गा बै नेई जाइ सकदै ।

### सेठ माहणु

18 कौसी धर्मी नेतै यीशु ना पुछू, “ओ उतम गुरु जी ! हाँऊ अमर होणें री तैइयें की केरनु?” 19 यीशुए तेईबै बोलू, “तू मुँबे उतम किबै बोला सा किबै कि परमेश्वर छोडिया होर कोई बी उतम नी आँधी ।” 20 यीशुए तेइबै भी बोलू, “तू परमेश्वरें धिनी दी विधि रें विधाना बै ता जाणा सा: व्यभिचार नी केरना, कौसी रा खून नी केरना, चोरी नी केरनी, कौसी रें खिलाफ झूठी गुआही नी देणी, होर आपणें आमा-बापू रा आदर केरना । 21 यहूदी पंडतें बोलू, इन्हा गला बै ता हाँऊ होछे ना फेटे मैनदा आऊ सा । 22 यीशुए बोलू, “हाजी बी तो ना एकी गल्ले री कमी सा । तू आपणी सारी जायजादा बै बेच होर गरीबा बै बंड तैबै तौभै स्वर्गा ना धन मिलणा होर तू मूँ पिछे एज । 23 सौ धर्मी नेता इन्हा गला शुणियाँ दुःखी हुआ किबैकि तेई आगें बडी भारी जायजादा ती होर सो बडा सेठ ती । 24 तेइ सेठा बै दुःखी हेरिया प्रभु यीशुए बोलू, “जुणी माणहु हागें बोहू धन-दौलत सा तेइरा परमेश्वरें रें राज्य ना प्रवेश केरना केतरा मुश्किल सा ।” 25 आपणी धन-दौलता पेंधें भरोसा केरनु आलें माणहु रा स्वर्ग राज्य ना प्रवेश केरना केतरा मुश्किल सा जैबै कि ऊँटा रा सिऊणी रें छेदै फेटे निकलणा असान सा । 26 लोकें जैबै ए गला शूणी ता बोलदै लागें, तैबे कुण मुक्ति पाई सका सा? 27 यीशुए बोलू, “जुणा कोम माणहु री तैईए मुश्किल सी ते कोम परमेश्वरें री तैईए सान सी ।” 28 तैबै यीशु रें चेलें पतरसै बोलू, “हेरात प्रभु जी आसै ता आपणा घोर-बार होर सैब किछ छोडिया तुसा पिछे चैलदै लागें दै सी ।” 29 यीशुए तिन्हा बै बोलू, “तें सही बोलू पर हाँऊ तुसा बै सच बोला सा एण्डा कोई नी आँधी जुणिए आपणें घोर-बार, लाडी, बाल-बचै, भाई-बन्धु होर आमा-बापु परमेश्वरें रें राज्य री तैइयें छोडें दै होलें । 30 अगर कोई एण्डा केरा सा ता स एसा जिन्दगी ना कई गुणा जादा आशीष पाआ सा होर एणु आणे जुगा ना तिन्हा बै अनंत जिंदगी बी मिला सा ।

### यीशु त्रीजी बार आपणी मौऊती रें बारे न भविश्यवाणी केर सा

31 यीशुए आपणें बारा चेलें आपू सेंधें नेरे होर तिन्हा बै बोलू, “हेरा आसै यरुशलेमा बै चौलें सी होर जेतरी गला माणहु रें बेटें रें बारें ना भविष्यवक्त लिखी सी ते सब तौखें पुरी होणी ।” 32 तौखें सौ अधर्मी लोकें रें होथा ना देईणा । तौखें तिन्हा तेइरा मजाक उडाणा, तेइरी बेइजती केरनी होर तेई पेंधें थूकणा । 33 तिन्हा सौ कोडें लाइया मारना होर सौ मकाणा, पर तेई त्रीजें ध्याडी भी जिन्दे होणा । 34 पर यीशु जे गला तिन्हा बै दैसदै लागें ती तिन्हें चेलें ते नी समझी होर ए सारी गला तिन्हा ना छुपी रौही ।

### यीशु एकी काणें माहणु बै ठीक केरा सी

35 जैबै यीशु होर तिन्हरेँ चेलें यरीहो नाँ री जैगा ना पुजें, ता तौखें एक काणा भिखारी बेटा ती होर सौ भीख मुँगदा लागा दा ती । 36 लोकें रें हल्ले शुणिया तेई भिखारियें लोका ना पुछू, “ओखें ए की लागा सा होंदा?” 37 तिन्हें लोकें तेई भिखारी बै दैसू कि इसे थिरेयीशु नासरी जाँदै लागें सी । 38 तैबै सौ भिखारी जोरा सेंधें हाका पाईया बोलदा लागा, “ओ यीशु, दाऊदै रें बेटेया मूँ पेंधें दया केर !” 39 जुणा लोका आगे-आगे ओढदै लागें ती ते तेई भिखारी बै झिडका देंदै लागें पर सौ होर बी जोरा सेंधें बोलदा लागा, “ओ यीशु दाऊदै रें बेटेया मूँ पेंधें दया केर । 40 जैबै यीशुए तैई भिखारी री हाक शूणी ता ते रुकें होर आपणें चेलें बै बोलू एई माणहु बै मु सामनै आणा । जैबै तिन्हें चेलें सौ

भिखारी यीशु सामनै नेऊ ता यीशुए सौं भिखारी पुछू, 41 तू की चाहा सा कि हाँऊ तेरी तैईयै की केरनु? तैबै तैई भिखारीयै बोलू, "हे प्रभु, हाँऊ हेरना चाहा सा। 42 तैबै यीशुए तेई भिखारी बै बोलू, "ठीक सा, तू हेरी सका सा किबैकि तेरे बशाहै तू ठीक केरु।" 43 तैबै सौं भिखारी एकदम ठीक हुआ होर सौं हेरदा लागा, होर परमेश्वरै री जय जयकार केरदै-केरदै यीशु पिछै चैलदा लागा। जेतरे बी लोकै ऐ चमत्कार हेरु ते सब परमेश्वरै री जय-जयकार केरदै लागै।

### यीशु होर जकई

19 यीशु यरीहो ग्राँ आघै जान्दै लागै ती। 2 तौखै जकई नाँ रा एक माणहु ती। सौं चुँगी लेणु आए रा मुखिया ती होर सौं बोहु सेठ ती। 3 सौं यीशु बै हेरना चाहा ती पर बोहु भीड होणै री वजह ना सौं यीशु बै नी ती हेरी सकदा, किबैकि स कदा ना होच्छा ती। 4 तैबै सौं ठोर मारिया आगे-आगे नौठा होर बौतै रै कनारै गूलरै रै बुटै ना चैदू किबैकि यीशु बी तेसा बौतै आघै जाणु आए ती। 5 जैबै यीशु तेसा जैगा ना पुजै, ता झाँऊ भाईया बोलू, ओ जकई छेके उतरिया भ्याँऊ एज किबैकि औज मेरा तेरै घौरा ना रौहणा जरूरी सा। 6 जकई झट-पट भ्याँऊ आऊ होर खुशी सँघे तेईए प्रभु यीशु आपणै घौरा बै नेए। 7 लोका बै ए गल्ल शोभली नी लागी होर ते आपु ना कुड़कुड़दै लागै कि यीशु ता एक पापी माणहु रे घौरा ना पाहूणै बैणीया नौठै। 8 पर जकई खड़ा हुआ होर यीशु बै बोलू मूँ आपणी सारी ज्ञायजादा रा औधा हिस्सा गरीबा बै देणा, अगर मैं कोई तैगूदा होला ता तेईबै मूँ चार गुणा वापस देणा। 9 यीशुए तैईबै बोलू, औज ऐई घौरा ना उद्धार आऊ सा किबैकि ऐ माणहु बी अब्राहमा रा बेटा सा। 10 माणहु रा बेटा राहुएदै माणहु बै तोपदा होर तिन्हा उद्धार केरने री तैईए आऊ दा सा।

### दस नोकरा रा उदहरण

11 लोकै री भीड यीशु री इन्हा गल्ला बै शुणदी लागी ती। तैबै यीशुए तिन्हा बै एक उदाहरण दैसू किबैकि ते यरुशलेम पुजणु आए ती होर ऐण्डा बुझा ती कि परमेश्वरा रा राज्य ऐणु आला सा। 12 यीशुए बोलू, एक सेठ माणहु दूर दैशा बै राजा बैणदा नौठा। ताकि सौं राज-पाठ पाईया वापस एला। 13 जाणै ना पहिलै तेई सेठै आपणै दस नोकर शाधै होर तिन्हा बै एक-एक सुनै रै सिक्के धिनै होर तिन्हा बै बोलू, "जाँ तक हाँऊ नी एनु ताँ तक तुसै एथे लाइया लेण-देण केरदै रोहीत्। 14 तेई शैहरै रै लोका तेई सँघे बैर केरा ती होर तेई पिछै किछ चुनुएँदै लोका एसा खबर लेइया भेजै कि आसै नी चाँहदै कि ऐ सेठ माणहु आसा पँधे राज केरला 15 जैबै सौं सेठ माणहु राज-पाठ लेइया वापस आऊ तैबै तेइयै आपणै ते दस नोकर शाधै जुणीबै तेइयै सुनै रै दस सिक्के धिनै दै ती किबैकि सौं जाणना चाहा ती कि तिन्हा सुनै रै सिक्के सँघे तिन्हा होर केतरै कमौए। 16 पहिलै नोकरै एजिया बोलू, "ओ स्वामी मैं तेई सिक्के लाइया दस होर सिक्के कमौए सी।" 17 तेई सेठ माणहुए तेई नोकरा बै बोलू, "ओ उत्तम दास तू भरोसै केरनै लायक सा किबैकि तू थोड़ै जेही ना बशाह लायक बणी रोहू। हाँऊ तौभै दस ग्राँ रा प्रधान बणा सा।" 18 तैबै दुजे नोकरै एजिया बोलू, "ओ स्वामी मैं तिन्हा सिक्के ना पोंज होर सिक्के कमौए सी।" 19 तेई सेठै तेई नोकरा बै बी बोलू, "शाबाश! हाँऊ तौभै पोंज ग्राँ रा प्रधान बणा सा।" 20 पर त्रीजे नोकरै एजिया बोलू, "ओ स्वामी हेर मैं तुसरा सौ सुनै रा सिक्का रमाला ना बोनिया सभाईया रैखू सा। 21 किबैकि हाँऊ तुसा ना डौरा ती। तुसै बडै कडक माणहु सी। जौखै नी बाँहदै तौखै ना तुसै काटा सी होर जौखै तुसै नी रखदै तौखना तुसै चैका सी। 22 तैबै तेई सेठ माणहुए तेई नोकरा बै बोलू, "एई दुष्ट नोकरा, जैबै तौभै पता ती की हाँऊ कडक माणहु सा, जौखै हाँऊ नी बाँहदा तौखना काटा सा," 23 तैबै तँ मेरा सुनै रा सिक्का ब्याजा पँधे किबै नी धिना? तकि मुँभे वापस एजिया ब्याज ता मिलदा। 24 तैबै तेई सेठ माणहुए होरा तिन्हा नोकरा बै बोलू, "एई नोकरा ना तेई सुनै रै सिक्के बै वापस मुँगा होर जुणि आगै सैभी ना जादा सी तेईबै दैआत्," 25 होरा तिन्हा नोकरै बोलू, "ओ स्वामी तेई आगै ता दस सुनै रै सिक्के सी। 26 तेई सेठै बोलू, "हाँऊ तुसा बै बोला सा जुणी आगै सा तेई बै होर मिलणा होर जुणी हागै नी आँथी जे किछ तेई आगै सा तेइना सौं बी वापस मुँगिणा।"

27 मेरै तिन्हा बेइरी बै जुणा नी चाँहदै ती कि हाँऊ राजा बैणदा तिन्हा बै मूँ सामनै आणिया मारात्।

### यीशु रा यरुश्लेमा न प्रवेश

28 इन्हा गल्ला केरिया यीशु यरुश्लेमा धिराबै नौठै होर ते आपणै चेलै ना आगे-आगे ओढदै लागै ती। 29 जैबै ते जेतून नाँ रै ढोंगा पँधे बैतफगै होर बैतनिय्याह ग्राँ ना पुजै, ता यीशुए आपणै दुई चेलै भेजै, 30 यीशुए तिन्हा चेलै बै बोलू, पारलै ऐई ग्राँ बै जाआत् तौखै तुसा बै एक गधी रा बच्चा बोनुआ दा मिलणा, जुणी पँधे आज्जी तक कोई बी नी बेटा दा, तुसै तेइबै खोलिया ओखै आणा। 31 अगर तुसा ना कोई पुछला कि तुसै ऐ किबै लाऊ सा खौलणा ता एण्डा बोलेईत् कि प्रभु बै ऐई री जरूरत सा। 32 जैबै तँ चेलै तौखै नौठै ता तिन्हा बै सौं गधी रा बच्चा जैन्दा यीशुए बोलू ती तैण्डा ऐ बोनुंदा मिलू। 33 जैबै तँ चेलै तेई गधी रै बच्चे बै खोलदै लागै ती ता तैसा गधी रै मालकै तिन्हा बै बोलू, तुसै ऐई बच्चे बै किबै खोलदै लागै सी? 34 तैबै तिन्हा चेलै जवाब धिना कि प्रभु बै ऐईरी जरूरत सा। 35 तिन्हा चेलै सौं गधी रा बच्चा खोलिया प्रभु यीशु आगै आणु। तिन्हा आपणै झिकडै खोलिया गधी रै बच्चे पँधे रखे होर प्रभु यीशु तेथा पँधे बशाए। 36 जैबै यीशु जादँ लागै ती ता ते लोका आपणै झिकडै बोता ना बछाँदै जा ती। 37 जैबै यीशु जेतून ढोंगै भ्याऊँ पुजै ता चेलै री सारी मण्डली जुणियै यीशु रै चमत्कार भाए ती जोरा सँघे परमेश्वरै री जय-जयकार केरदी लागी, 38 "धन्य सा सौं राजा जो प्रभु रै नाँ ना एजा सा, "स्वर्गा ना शान्ति होर स्वर्गा ना रोहणू आरे परमेश्वरै री महिमा हो।" 39 भिडा ना खडै किछ फरीसियै यीशु बै बोलू, गुरु जी आपणै चेलै बै चुप बेशणै बै बोला। 40 यीशुए बोलू, अगर ए चुप बेशलै ता बौतै रै इन्हा पात्थरा जोरा सँघे बोलणा।

### यीशु यरुश्लेमा री तैईयै रोआ सा

41 जैबै यीशुए नेड पुजिया यरुश्लेमा धिरावै हेरु ता ते रोदँ लागै होर बोलदै लागै, 42 "मेरी बडी इच्छा ती कि तू औज जाणदा कि तौभै शान्ति कौस ना मिलणी पर तँ ऐ गल नी समझी।" एबै देर हुई सा होर शान्ति री ए गल्ला तौ ना छुपी सी। 43 ते ध्याडै एणु आरे सी जैबै तेरै बैईरी तेरी तैईयै हर तरफा ना मुसीबता खडी केरनी। तिन्हा तू घेरना होर हर पासै ना तौ पँधे दबाव पाणा। 44 तिन्हा तू होर तौआन्दरै रोहणु आए तेरै बच्चे सब खैत्म केरनै। तिन्हा तेरी भिती रै एकि पाथरा पँधे दुजा पथर नी रोहणै देणा किबैकि परमेश्वरै जे मुक्ति पाणै रा मौका तौभै धिना ती तँ तैता रा नाँह केरु।

### यीशु मन्दिरा रै दुकानदारा बै हटा सी

45 तैबै यीशु मन्दिरा बै नौठै होर जुणा लोका तौखै दुकानदारी केरदै लागै ती तिन्हा बै मन्दिरा ना बाहरै खोलदै लागै। 46 यीशुए तिन्हा बै बोलू, "पवित्र शास्त्रा ना ऐ लिखु सा मेरा घौर प्रार्थना रा घौर होणा पर तुसै ता ऐ डाकू रा अड्डा बणाऊ सा। 47 यीशु हर रोज मन्दिरा ना उपदेश देदै लागै। मुखिया पुजारी, धर्म गुरु, होर कई नेते तिन्हा बै खैत्म केरनै री स्कीम बणादँ लागै। 48 पर तिन्हा बै ऐण्डा केरनै रा मौका नी मिलू किबैकि यीशु जे बोला ती लोका तिन्हरी हर गल्ला बै बडे ध्यान सँघे शुणा ती।

### यीशु रै हका पेन्धे प्रशन

20 यीशु एक रोज मन्दिरा ना परमेश्वरै रै बारै ना दसदै लागै ती ता मुखिय पुजारी यहूदी, धर्म-गुरु होर बुजुर्ग यहूदी नेते तिन्हा आगै आरे। 2 ते यीशु ना पुछदै लागै। "तू आसा बै एसा गल दैस कि तू इन्हा कोम कुणी हका सँघे केरा सा, ऐ सब किछ केरनै रा हक तौभै कुणियै धिना?" 3 यीशुए तिन्हा बै जबाव धिना, "हाँऊ बी तुसा ना एक स्वाल पुछा सा पहलै मुभै तेई स्वाला रा जबाव दसा, 4 यहून्ना बै बपतिस्मा देणै रा हक स्वर्गा ना मिलू ती कि माणहु ना? 5 यीशु री ऐ गल्ल शुणिया ते आपु ना सोच-विचार केरदै लागै, "अगर आसै स्वर्गा ना बोललै ता एई आसा बै बोलणा, तैबै तुसै यहून्ना पँधे बशाह किबै नी केरु? 6 होर अगर आसै बोलू कि माणहु री तरफा ना ता लोका आसा पँधे पाथरै बाहणी किबैकि ते यहून्ना बै भविष्यवक्ता मना ती।

7 तैबै तिन्है बोलू, “आसे नी ज्ञाणदैं कि यहुन्ना बै बपतिस्मै देणै रा हक कौखना मिलू।” 8 यीशुऐ बी तिन्हा बै बोलू, “जाआत् हाँऊ बी तुसा बै नी दसदा कि हाँऊ इन्हा कोमा कुणी हका सँघे केरा सा।”

### दुष्ट किसाना रा उदहरण

9 तैबै यीशु लोका बै एक कैथ दैसदैं लागे: एकी माण्डुऐ अँगूरा रा बगीचा लाऊ होर सौ ठेकै पँधे धिना होर आपु खासी साला बै दूरा देशा बै नौठा। 10 जैबै अँगूरा बै कट्टा केरनै रा बौक्त आऊ ता तेई माण्डुऐ आपणा एक नोकर तिन्हा अँगूरा रा हिस्सा मुँगणै री तेंड्यै भेजू पर तिन्है ठेकेदारै सौ नोकर मारी पिटिया खाली हौथ वापस भेजू। 11 तैबै तेई माण्डुऐ आपणा दुजा नोकर भेजू पर तिन्है सौ बी मारी पिटिया खाली हौथ वापस भेजू। 12 किछ रोजा बाद तेई माण्डुऐ आपणा एक होर नोकर भेजू कि सौ जाइया मालका रा हिस्सा आपणा पर तिन्है सौ बी घायल केरिया वापस भेजू। 13 तैबै सौ बगीचै रा मालक सोचदा लागा कि एबै हाँऊ की केरनू? मूँ एबै आपणा प्यारा बेटा भेजणा शायद ते एइरी कद्र केरलै। 14 पर ते ठेकेदार तेईरै बेटै बै हेरिया ऐण्डा बोलदैं लागे, हेरा ऐ ता एई बगीचै रा वारिस सा एजा आसा ऐ मिलिया मकाणा होर ऐ बगीचा म्हारा होणा। 15 तैबै तिन्है सौ मालका रा शोहरू शगीटिया तैई बगीचै ना बाहरै नेऊ होर मकाऊ। यीशुऐ बोलू, तुसै की सोचा सी, एबै तेई बगीचै रै मालका तिन्हा सँघे की केरना? 16 एबै तेई मालका एणा होर ते ठेकेदार मकाणै होर ठेका छुड़ाइया होरी बै देणा। तैबै शुणनु आ ऐ लोकै बोलू, “ओ परमेश्वरा” ऐण्डा कैदी नी लोड़ी हुआ। 17 यीशुऐ तिन्हा धराबै भाइया बोलू, “पवित्र शास्त्रा ना ऐ की लिखू सा कि जुणी पाथरा बै राज मिस्त्रिऐ नक्कमा बोलू ती सौहै पाथर एबै कुणै रा पाथर बैणू। 18 जुण एई पाथरा सँघे भीड़िला तेईरै बुरै हाल होणै होर जुणी पँधे ऐ पाथर ओळला तेई पितै साही पिशिणा।

### रोमी सरकारा बै कर देणा

19 महापुजारी होर धर्मविधि ज्ञाणनु आलै जैबै ऐ उदाहरण शुणू ता ते यीशु बै ढौकणा चाहा ती, किबैकि तिन्हा बै पता लागा कि जे गल्ला प्रभु यीशु केरदैं लागे सी ते तिन्हैरै बारै ना सी पर ते लोका ना डौरा ती। 20 तैबै ते यीशु बै ढौकणै रा मौका तोपदैं लागे, होर तिन्है आपणै जासूस यीशु आगै भेजे, ताकि ते यीशु बै तेई री गल्ला ना फ़सालै होर तेइरी शिकायत रोमी सरकारै रै राज्यपाला आगै केरलै ताकि सौ प्रभु यीशु बै ढौकिया जेला ना पाला। 21 तिन्है यीशु बै बोलू, “आसै जाणा सी कि तुसै ठीक-ठीक बोला सी होर सिखा सी होर कौसी री तरफ़दारी नी केरदैं। तुसै सच्चाई सँघे परमेश्वरै री गल्ला सीखाआ सी। 22 आसा बै दैसा कि रोमी सरकारा बै कर देणा ठीक सा कि नी किबै कि आसै ता यहूदी सी?” 23 यीशुऐ तिन्हरी चलाकी ज्ञाणी होर तिन्हा ना एक सिक्का मुँगू, 24 तेई राजै बै दैआत् होर जे परमेश्वरा रा सा तेई परमेश्वरा बै दैआत्। 25 यीशुऐ तिन्हा बै बोलू, “तैबै ठीक सा, जे राजै रा सा जासूस यीशु बै नी फ़साई सके बल्कि प्रभु यीशु रै जवाब शुणिया हैरान हुऐ। 26 ते होर बोलू, “एई सिक्के पँधे कौसरा फोटू होर नाँ सा?” तिन्है बोलू, “एई सिक्के ना राजा रा फोटू होर नाँ सा।”

### पुनरुत्थान होर ब्याह

27 तैबै किछ सदूकी जे बोला सी कि मुँगैदैं रा जिंदा होणा नी आँधी, तौखे ऐजिया पुछदैं लागे। 28 ओ गुरु जी, “मूसै आसा बै ऐ विधि दैसी सा कि अगर कोई माण्डू मौरला होर तेइरी लाड़ी जिंदा सा पर तेइरी कोई लुआद नी होली ता तेइरा भाई तेसा विधवा सँघे ब्याह केरिया तेसा सँघे लुआद पैदा केरला होर पहला बच्चा तेइरै भाई रा वारिस होणा। 29 ऐण्डे सौत भाई ती। सैभी ना बैडै भाई रा ब्याह हुआ होर बगैर लुआदी रै मुँआ। 30 तैबै तेइरै होछे भाइयै तेसा विधवा सँघे ब्याह केरु होर सौ बी बगैर लुआदी रै मुँआ। 31 एकी ना बाद एक, एकी ना बाद एक ऐण्डे तैरहै तिन्है सौत भाइयै तेसा विधवा सँघे ब्याह केरु पर ते सैभै बगैर लुआदी रै मुँगै। 32 किछ बौक्ता बाद सौ विधवा बी मुँई। 33 एबै आसा बै एसा गल दैसा कि जैबै ते सारै भी जिन्दै होलै ता सौ कौसरी लाड़ी होली? किबैकि तिन्है सौत भाइयै तेसा सघे ब्याह केरु ती।

34 तैबै यीशुऐ तिन्हा बै बोलू, “ब्याह शादी ता ऐसा धौरती पँधले माण्डु री तेंद्रे सा।” 35 पर तेई बौक्ते जे मुँगैदैं ना जिन्दै होलै तिन्हा ना कोई शादी-ब्याह नी होणा होर ना कोई तौखे ब्याह ना देईणा। 36 ना तिन्हा मौरना किबैकि तिन्हा स्वर्गदूता साही होणा। दोबारा जिन्दै होणै सँघे ते परमेश्वरै रै बेटे सी। 37 मुँगैदैं जिन्दै होणै री गल्ला मुसै भविष्यवक्ते रीहाई होर तेईऐ बोलू, “प्रभु इब्राहीमै रा, इसहाकै रा होर याकूबा रा परमेश्वर सा। 38 परमेश्वर मुँगैदैं रा नी पर जिंदै माण्डु रा परमेश्वर सा। परमेश्वरा भेटी सब माण्डू जिंदै सी। 39 किछ यहूदी धर्म-गुरुऐ बोलू, “गुरु जी तुसै सही बोलू।” 40 तैथा ना बाद कोई बी माण्डुऐ प्रभु यीशु ना स्वाल पुछणै री हिम्मत नी केरी।

### मसीह कौसरा बेटा सा

41 यीशुऐ तिन्हा ना पुछू, “मसीह बै दाऊदा रा बेटा किबै बोला सी?” 42 किबैकि भजन संहिता री कताबा ना दाऊद ऐ आपु बोलू, “प्रभुऐ मेरै प्रभु बै बोलू मेरी दैहिणी धिरै बेश” 43 जैबै तैई हाँऊ तेरै दुश्मना बै तेरी जाँघा हेठै नी केरनु। 44 अगर दाऊद मसीहा बै प्रभु बोला सा ता मसीह दाऊदै री सन्तान केन्डै होई सका सा? 45 जैबै लोका इन्हा गल्ला बै शुणदैं लागे ती तैबै यीशुऐ आपणै चेलै बै बोलू, 46 इन्हा यहूदी धर्म-गुरु ना बचिया रौहित्। किबैकि इन्हा बै लोमे-लोमे झिकडे लाईया बजारा ना घुमणा शोभला लागा सा ताकि लोका इन्हा बै म्हाराज केरलै। ते प्रार्थना सभा ना सैभि ना शोभली जगह पँधे बैशणै री इच्छा रखा सी। 47 ते बड़ी बैशर्मी सँघे विधवै रै घोरा बै लूटा सी होर रिहाणै री तैईयै बड़ी लोमी-लोमी अर्जा केरा सी। एसा वजह ना तिन्हा बै जादा सजा मिलणी।

### गरीब विधवा रा दान

21 यीशु सेठ माण्डू बै मन्दिरा ना दान देंदैं हेरदैं लागे दै ती। 2 तेई बौक्ते तौखे एक विधवा बेटड़ी आई होर तेसै तौबै रै दूई ढेबुऐ दान धिनै। 3 तैबै यीशुऐ बोलू, “हाँऊ तुसा बै सच बोला सा कि एसै गरीब विधवै सैभी ना जादा दान धिना।” 4 किबैकि इन्है सैभियै आपणी बोहू कमाई ना दान धिना पर एसै विधवै आपणी गरीबी ना बी आपणी सारी कमाई धिनी। 5

### मन्दिरा रै बारे न भविष्यवाणी

जैबै किच्छ लोका मन्दिरै रै बारे ना गल्ला केरदैं लागे दै ती कि ऐ मन्दिर केण्डे शोभलै-शोभलै पाथर होर दान केरुईदी चिजा सँघे सजाऊदा सा तैबै यीशुऐ बोलू, 6 “सौ बौक्त एँदा लागा सा जैबै सब चीजा खैत्म होणी होर एई मन्दिरा रा एक बी पाथर दूजे पाथरा पँधे नी रौहणा।”

### मुसीबत होर दुःख तकलीफ

7 चेलै यीशु ना पुछू, “ओ प्रभु जी इन्हा सैभी गल्ला कैबे होणा? होर तेई बौक्ते री कि निशाणी होणी?” 8 यीशुऐ तिन्हा बै बोलू, “होशियार रौहात् किबैकि बोहू लोका मेरै नाँ ना एणा होर बोलणा कि हाँऊ मसीह सा, सँघे ऐ बी बोलणा कि बौक्त आऊ सा। पर तुसै तिन्हरी गल्ला पँधे बशाह हेरीत् केरदैं। 9 तुसै लड़ाई-झगड़ै री गल्ला शुणिया घबरौदैं हेरीत् किबैकि इन्हा गल्ला रा होणा जरूरी सा पर तेई बौक्ते एकदम दुनिया खैत्म नी होणी। 10 यीशुऐ बोलू, “देशा-देशा ना होर जाति-जाति ना लड़ाई होणी। 11 जैगा-जैगा जौजरी होणी, होर रूड पौडनी होर कैई किस्मै री बिमारी फैलणी, सर्गा ना डराणु आऐ चिन्ह चमत्कार होणै। 12 पर इन्हा सैभी गल्ला न पहलै तिन्हा मेरै नाँ री वजह सँघे तुसा पँधे जुल्म केरनै होर तुसै ढौकिया जेला ना पाणै होर बड़ै-बड़ै साहबै रै हौथा ना देणै। 13 तैबै तुसा बै मेरै बारै ना गवाही देणै रा मौका मिलणा। 14 जे दोष ते तुसा पँधे लालै तिन्हा दोषा ना बचणै री तैईयै तुसै फिक्र मता केरदैं। 15 किबैकि मूँ तुसा बै ऐण्डे बुद्धि होर समझ देणी कि कोई बी वरोधी तुसरी गल्ला बै नी काटी सकदा। 16 तुसरै आमा-बापू, भाई—बँहण, रिश्तेदार होर तुसरै सँघी तुसै ढौकणै घाणै होर तुसा मोंझै ना किछ मकाणै। 17 मेरी वजहा ना लोका तुसा सँघे बैर रखणा। 18 पर ते तुसरा किछ नी

बिगाड़ी सकदै । 19 इन्हा सैभी गल्ला बै सहन केरिया तुसै आपणी ज्ञानी बै बचाई सका सी ।

### यरुशलेमा रै नाश हाँगे री भविष्यवाणी

20 जैबै तुसै यरुशलेम शहरा बै फोऊजियै लाइया धरु दा हेरलै ता समझेईत कि एइरा नाश नेड सा । 21 तेई बौकै जे तुसै यहुदिया जिलै ना सी दौगा बै जाईत् होर जे तुसै यरुशलेमा ना सी तौखना भैगेईत् होर जे तुसै ग्रॉ ना बाहरै सी ग्रॉ आन्ध्रै हेरीत् एँदै । 22 किबैकि ते बदला लेणे रै एण्डै ध्याडै सी, जुणि बौकै धर्मशास्त्रा ना लिखुईदी सारी गल्ला पूरी होणी । 23 सुजदी होर दुध प्याणू आई बेटडी पेंधै तिन्हा ध्याडै ना बडी भारी दुःख मुसीबत एणू आई सा किबैकि ते दौगा बै नी भैगी सकदी । एसा धौरती पेंधै होर यहूदी लोका पेंधै बडी मुसीबत एणू आई सा होर इन्हा लोका पेंधै परमेश्वरै री झिक होणी । 24 ते बडी बेरहमी सँधै तलवारियै लाइया मारिनै होर यरुशलेमा ना दुजै देशै रै लोका जीतणा होर स ताँ तक गुलामी ना रखणा जाँ तक होरी जाति रा बौक पूरा नी होला ।

### माणहु रै बेटे रा दबारा एणा

25 सर्गा ना नोखै-नोखै चिन्ह चमत्कार होणै । जोथ, सूरज होर तारै ना कइ किस्मै रै चिन्ह चमत्कार हेरिनै होर धौरती पेंधलै सैभी देशै रै लोका पेंधै मुसीबता एणी होर तिन्हा समुद्रै री छेडी ना डौरना । 26 दुनिया ना एणू आई सैभी विपता हेरिया लोका आपणी हिम्मत हारनी किबैकि तेई बौकै सर्गै री सारी शक्ति हिलाइणी । 27 तैबै लोका ना माणहु रा बेटा बडी सामर्थ होर महिमा सँधै बादाआ ना एँदै हेरिना । 28 जैबै ए सारी गल्ला हाँदी लागली ता तुसै सिधै खडै होईया सर्गा धिरा बै हेरीत्, किबैकि तेई बौकै तुसरा उद्धार नेड सा ।

### अँजीरै रै बूटै रा उदाहरण

29 यीशुए तिन्हा बै एक उदाहरण दसू, अँजीरै रै बूटै बै होर दुजै इन्हा बूटै बै हेरा । 30 जैबै तिन्हरै नोँऊँरै पौचा निकला सी तैबै ता तुसा बै पता चला सा कि गर्मी नेड सा । 31 ठीक एण्ठी तैरहै जे गल्ला में तुसा बै दसी दी सी तिन्हा बै होन्दै हेरलै ता तुसै बुझीत् कि परमेश्वर रा राज्य नेड सा । 32 हाँऊ तुसा बै सच बोला सा जैबै तक ए सारी गल्ला पुरी नी होली तैबै तक ऐई जुगा रा अंत नी होणा । 33 धौरती आपणी जगह ना हिली सका सा, सर्ग भी आपणी जगह ना हिली सका सा पर जे गल्ला में दुणी सी ते सदा कायम रौहणी ।

### जागदे रौहा

34 आपणा ध्यान रखा, तुसरा ध्यान दुनियै रै खाणै पिणै होर जिन्दगी री मौज मस्ति ना नी लोडी भटकू, होर सौ ध्याडा तुसा पेंधै चानक फांसी रै फन्दै साही ऐला । 35 जेतरे भी एसा धौरती पेंधै सी तिन्हा पेंधै तेई ध्याडै जरूरी एणा । 36 हमेशा जागदै होर प्रार्थना केरदै रौहा । अगर होई सका सा ता आपणै आपु बै एतरा मजबूत बणात् कि तुसै इन्हा डराणु आई गल्ला ना बची सकलै होर माणहु रै बेटे सामनै खडै होणै लायक बणी सकलै । 37 यीशु ध्याडी ता मन्दिरा न उपदेश देआ ती पर सोन्हा जैतून दौगा पेंधै प्रार्थना केरदै जा ती । 38 हर रोज दोती-दोती बोहु सारै लोका प्रभु यीशु री गल्ला शुणनै री तैइयै मन्दिरा ना कडा होआ ती ।

### यीशु बै दौकणै री स्कीम

22 यहूदी रा अखमीरी रोटी रा साजा जुणीबै फसह बोला सी स नेड ती । 2 तेई बौकै मुख्य पुजारी होर धर्मगुरु यीशु बै दौकणै होर मारनै री सलाह केरदै लागै दै ती पर ते लोका ना डौरा ती ।

### यहुदा रा विश्वासघात

3 तैबै यहूदा इस्करियोति जो कि यीशु रा एक चेला ती तेई आन्ध्रै ना शैतानी विचार जागै । 4 यहूदा इस्करियोति मुख्य पुजारी होर पौहरेदारै रै

प्रधाना सँधै मिलु होर बोलू हाँऊ तुसा बै दसा सा कि तुसै यीशु बै कैण्डै दौकी सका सी । 5 यहूदै री मजती पाइया ते बोहु खुश हुए होर तेइबै इनाम देणै रा वायदा केरु । 6 यहूदै तिन्हरी गल मैनी होर स मोकै तोपदा लागा कि कैबै भीडै रै लोका कम हालै होर प्रभु यीशु बै दौकणै घाला ।

### यीशु रा चले सँधै आखरि भोज

7 तैबै अखमीरी रोटी री साजै रा ध्याडा आऊ, होर तेई ध्याडै ना एकि छेलू री बौई जरूरी देणी पौडा ती । 8 यीशुए पतरस होर यहूदा बै बोलू, “आगै जाईया आसरी तैईए भोज तयार केरा कि आसै सँधै बेशिया भोज खालै ।” 9 चेलै यीशु ना पुछू, “तुसै आसा बै तेसा जैगा दैसात् जौखै आसै भोज तयार केरी सका सी ।” 10 यीशुए चेलै बै बोलू, “जैबै तुसै यरुशलेमा ना पुजलै, ता तौखै तुसा बै पाणी रै भाण्डै लेइया एक माणहु मिलणा । जुणी घौरा बै स जाला तुसै बी तेई पिछै तेही घौरा बै जाईत् ।” 11 होर तौखै तेई घौरा रै मालका ना पुछीत्, गुरु जी ए तुसाबै बोलू सा, कि पाहुणै रा कमरा कुण सा, जौखै हाँऊ आपणै चले सँधै फसह रै साजै रा भोज केरनू? 12 तेई माणहु तुसै शिडीयै झाँऊ चाऊडी पेंधै बै नेणै तौखै तेई तुसा बै सजा-सजाऊदा कमरा रिहाणा । तौखै तुसै फसह रा भोज तयार केरेईत् । 13 तैबै चेलै तेई शैहरा धिराबै नौटै, होर जैण्डा प्रभु यीशुए बोलू ती, तिन्हा बै सब किछ तैण्डा मिलू, तैबै तिन्है फसह रा भोज तयार केरु । 14 जैबै ठीक बौक आऊ तैबै प्रभु यीशु आपणै बारा चले सँधै एकी मेजा पेंधै फसह रा भोज केरदै बेटै । 15 होर यीशुए तिन्हाबै बोलू कि मेरी बडी इच्छा ती कि दुःख चैकणै न पहलै हाँऊ तुसा सँधै फसह रा ए भोज केरनू । 16 किबैकि हाँऊ तुसाबै बोला सा कि जाँ तक परमेश्वरै रै राज्य न फसह रै साजै रा मकसद पूरा नी होला, ताँ तक मूँ ए भोज कदी नी खाणा । 17 तैबै यीशुए अँगूरै रै रस्सा रा कटोरा चैकू होर धन्यावाद देईया चेलै बै धिना होर बोलू, ई कटोरै बै आपु ना बाण्डा । 18 किबैकि औजा ना बाद, जाँ तक परमेश्वर रा राज्य नी ऐला ताँ तक मूँ कदी बी ए अँगूरै रा रस्स नी पीणा । 19 तैबै यीशुए रोटी चैकी होर परमेश्वर रा धन्यावाद देईया रोटी चोडी होर चले बै दँदी घेरै बोलू, ए मेरी देह सा जो तुसरी तैईयै देणी लाई सा, मेरी यादी ना एण्डा केरदै रोईत् । 20 तैबै यीशुए अँगूरै रै रसा रा कटोरा हाँथा ना चैकू होर बोलू, ए कटोरा मेरै खून बहाणै रै वायदै री निशाणी सा, जुण तुसरी तैईए बहाईणा । 21 पर हेरा, मुबै धोखा दैणु आ बी मूँ सँधै फसह रा भोज केरदा लागा सा । 22 माणहु रै बेटे रा मौरना ता परमेश्वरै री योजना ना पक्का सा, पर जुण माणहु मुबै धोखा दँदा लागा दा सा तेई पेंधै भारी क्रेश एणा । 23 एसा गल्ला बै शुणीया चेलै आपु ना स्वाल पुछदै लागै, आसा मौँझे एण्डा कुण होई सका सा?

### बड़ा कुण सा

24 चेलै आपु ना ऐसा गल्ला पिछै बैहस केरदै लागै कि आसा मुँझे बड़ा कुण सा । 25 पर यीशुए चेलै बै बोलू, एसा दुनियै रै राजा होर बडै-बडै नेता लोका पेंधै आपणा अधिकार रखा सी होर बोला सी कि आसै तुसरै सँघी होर तुसाबै बचाणु आरे सी । 26 पर तुसै एण्डै नी आँधी तुसा मौँझे जुण सैभी ना बड़ा सा सौसैभी ना होछा बणला होर जुण प्रधान सा स सेवका साही बणला । 27 किबैकि बड़ा कुण सा, सौ जुण खाँदा लागा सा या जुण बाण्डदा लागा दा सा? बड़ा सौ सा जुण खाँदा लागा दा सा पर हाँऊ तुसा मौँझे सेवका साही सा । 28 तुसै मेरी हर दुःख तकलीपा ना मेरा सँघ धिना । 29 हाँऊ बी तुसा बै एक राज्य देआ सा जैण्डा कि मेरै पिता परमेश्वरै मुँबै धिना सा । 30 कि तुसै मुँ सँधै तेई राज्य न मेरी मेजा पेंदै खा-पिया होर तुसा सिंहासना पेंधै बेशिया इस्त्राइलै री बारा जाति रा न्याय केरना ।

### पतरसै रै नाँह केरने री भविष्यवाणी

31 यीशुए शमौन-पतरसा बै बोलू, शमौन, हे शमौन, हेर शैतानै तुसै सब परखणै री तैईए छाँटे दै सी, कि जैण्डा गेहूँ ना भूज अलग केरा सी तैण्डै शैताना तूसै अलग केरनै । 32 यीशुए बोलू, हे पतरस, मैं तेरी तैईए प्रार्थना केरी सा कि तेरा बशाह खत्म नी लोडी हुआ होर जबै तु वापस एला ता आपणै सँघी भाई बै मजबूत केरी । 33 पर पतरसै बोलू, “ओ प्रभु जी, हाँऊ

तुसा सैंधे ज़ेल ज़ाणे होर तुसा सैंधे मौरने री तैइये त्यार सा ।<sup>34</sup> यीशुए तेइबे बोलू, “पतरस, हाँऊ तौभे बोला सा, कि जैबे तक तू त्रा बार मेरा नाँह नी केरला की हाँउ तौभे नी ज़ाणदा, तैबे तक मुगँ बांग नी देंगी ।”<sup>35</sup> तैबे यीशुए चेलै ना पुछू, “जैबे मैं तुसै बगैर बटुए, बैगा बगैर होर बगैर ज़ूते भेजे कि तैबे तुसा बै कौसी चीज़े री कमी हुई?” तिन्है बोलू, आसाबै कौसी चीज़े री कमी नी हुई ।<sup>36</sup> तैबे यीशुए बोलू पर ऐबे आपु सैंधे झोआ होर बटुए रैखात । होर अगर कोई हागँ तलवार नी आथी ता सौ आपणै झीकड़ै बेचिया आपणी तैइये तलवार लेला ।<sup>37</sup> हाँऊ तुसाबै बोला सा, जे लिखू सा कि सौ अपराधी सैंधे गिणुआ तेइरा मूँ ना पूरा होणा जरूरी सा । भविष्यवक्तै मेरै बारै ना जे लिखू दा सा ते सब गल्ला पूरी होणु आई सी ।<sup>38</sup> चेलै बोलू, “ओ प्रभु जी, हेरा औखै दुई तलवारी सी ।” प्रभु यीशुए तिन्हा बै बोलू, काफी सी ।

### यीशु जैतून नां रै ढौगा पान्धै प्रार्थना केरा सी

<sup>39</sup> यीशु तेइ कमरै ना बाहरै निकतै होर पहलै साही जैतून नाँ रै ढौगा पाँधे नौठे । तिन्है चेलै बी तिन्हा पिछै नौठे ।<sup>40</sup> तौखे पुजिया यीशुए तिन्हाबै बोलू, प्रार्थना केरदें रौहा, कि तुसै परीक्षा ना नी पोए लोड़ी ।<sup>41</sup> ते चेलै ना थोड़ी दूर नौठे, होर घुटनै टेकिया प्रार्थना केरदें लागे ।<sup>42</sup> “हे स्वर्ग रै बापु, अगर तुसै चाहा सी ता ऐइ प्यालै बै मूँ ना दूर केरात, तैबे बी मेरी नी पर तुसरी इच्छा पुरी लोड़ी हुई ।”<sup>43</sup> तैबे स्वर्गा ना परमेश्वरा रा एक दूत प्रगट हुआ, होर तेइयै यीशु बै शक्ति धिनी ।<sup>44</sup> यीशु बड़ै व्याकुल होइया प्रार्थना केरदें लागे । तिन्हरी आत्मै री बेदना एतरी बैढी की तिन्हरा पसीना धौरती पैंधे लोहु बँगिया चुडदा लाग़ा ।<sup>45</sup> तैबे ते प्रार्थना ना उठै होर आपणै चेलै हागँ आए तिन्है आपणै चेलै सुतै दै हेरै किबैकि ते थकें दै होर उदास ती ।<sup>46</sup> यीशुए तिन्हा बै बोलू, “तुसै किबै सोदें लागे दै सी? उठा होर प्रार्थना केरा, कोइछे ऐण्डा नी लोड़ी हुआ कि तुसै परीक्षा ना पौडलै ।”<sup>47</sup> जैबे बौलदें लागे ती, तैबे लोकै री एक बड़ी भीड तौखे पुज़ी । तिन्हा बारा चेलै ना एक जुणी रा ना यहूदा ती, स भीडा ना आगै-आगै ओढदा लाग़ा ती । यहूदा प्रभु बै माँकी देंगे री तैइये तिन्हा भेटी आऊ ।<sup>48</sup> तैबे यीशुए तेइबे बोलू, “ओ यहूदा तू कि एक माँकी लेइया मुँबे ढौकणें द्या सा?”<sup>49</sup> जैबे तेइरै सैंधिये हेरु कि किच्छ होंदा लाग़ा सा ता तिन्है बोलू, “हे प्रभु जी कि आसा इना सैंधे लडाई केरनी? आसै आपणी तलवारी सैंधे आणी सी ।”<sup>50</sup> तैबे तिन्हा मोंझे ना एकियै आपणी तलवार मुखया पुजारी रै नोकरा पैंधे चलाई होर तेइरा देंहीणा कोन काटू ।<sup>51</sup> पर प्रभुए बोलू, “बस ऐबे काफी हुआ ।” तैबे प्रभुए तेई माणहु रा कोन छुँग होर तेइरा कोन ठीक हुआ ।<sup>52</sup> तैबे यीशुए मन्दिरे रै पुजारी, धर्मगुरु होर बुजर्ग नेता जुण प्रभु यीशु बै ढौकदें आये ती बोलू, तुसा बै हाँऊ कि कोई डाकू लाग़ा सा, जो तुसै मुँबे तलवारी होर शौठे पाईया ढौकदें आए सी? <sup>53</sup> तुसै हाँऊ मन्दिरा ना किबै नी ढौकू, तौखे ता हाँऊ रोज़ ऐजा ती होर तुसै बी तौखे होआ ती! पर ए बौक तुसरा सा, बल्कि निहारै रै राज्य रा बौक सा ।<sup>54</sup> तैबे तिन्है यीशु ढौकिये मुखया पुजारी हागँ बै नेरे । पतरस दूर-दूर तिन्हा पिछै ओढदा लाग़ा ती ।<sup>55</sup> होर ते पौहरैदार खौआ ना औग पकेईया चारै पासै बेटै होर पतरस बी तिन्हा मोंझे बेटा ।<sup>56</sup> ऐकि दासीए औगी रै पयाशे ना पतरसा बै हेरिया बोलू, ऐ माणहु बी ता यीशु सैंधे ती ।<sup>57</sup> पतरसै तेसा बैटडी बै बोलू, हाँऊ ता प्रभु यीशु बै पछियाणदा बी नी आथी ।<sup>58</sup> थौड़ी देरी ना एकि हारि माणहुए पतरसा बै हेरिया बोलू, तु बी ता प्रभु यीशु सैंधे ती!<sup>59</sup> थोड़ी देर बाद हारि माणहुए बोलू, तु बी पक्का यीशु सैंधे ती किबैकि तू बी गलीला रा रौहणु आ सा ।<sup>60</sup> पर पतरसै बोलू, “भलै माणहुआ, हाँऊ नी ज़ाणदा कि तू कुणी रै बारै ना बोलदा लाग़ा सा । पतरसै ऐण्डा बोलूए ती कि मुगँ बाँग धिनी ।<sup>61</sup> तैबे यिशुए मुडिया पतरसा धिरै भाऊ, होर पतरसा बै याद आई कि यीशुए बोलू ती, कि औज़ दोती मुगँ रै बाँग देणे ना पहलै, तौ त्रा घेरै मेरा नाँह केरना कि तू मुँबे नी ज़ाणदा ।<sup>62</sup> तैबे पतरस बाहरै नोठा होर जोरै-जोरै रोदा लाग़ा ।<sup>63</sup> जुणी माणहुए यीशु ढौके ती ते तिन्हरा ठड्डा केरदें लागे होर तिन्हा बै मारदें लागे ।<sup>64</sup> तिन्है यीशु री औछी पाँधे पट्टी बोनी होर ते मारदें लागे होर तिन्हा ना पुछू, “हे भविष्यवाणी केरनू आलै ऐबे दस कि तेरै कुणियै बाही ।”<sup>65</sup> तिन्है बोहु सारी होर भी निंदै री गल्ला तिन्है बारै ना बोली ।

### महासभै रै सामनै यीशु

<sup>66</sup> जैबे ध्याडा आऊ तैबे यहूदी लोकै रै सभै मुख्य पुजारी होर धर्म गुरु कड्डा हुए होर यीशु सभा रै सामनै आणै ।<sup>67</sup> ते यीशु बै बोलदें लागे, “अगर तू मसीह सा, ता आसाबै बोल पर तिन्है उतर धिना, “अगर हाँऊ तुसाबै दैसनू ता तुसा बशाह नी केरना ।<sup>68</sup> होर अगर हाँऊ तुसा न पुछनू, ता तुसरै जवाब नी देईणा ।<sup>69</sup> पर ऐबे ना बाद माणहु रै बेटै परमेश्वर बापू री देहिणी धिरै बेशिया रौहणा ।<sup>70</sup> एसा गल्ला पैंधे तिन्है बोलू, तू की आपणै आपा बै परमेश्वरा रा बेटा बोला सा? यीशुए बोलू, हाँ हाँऊ सा ।<sup>71</sup> तैबे तिन्है बोलू, “ऐबे आसा बै गवाही देंणु आए री की जरूरत सा, किबैकि आसै आपु ऐईरै मुँहा ना शुणू ।

### पिलातुसा रै सामणै यीशु

**23** तैबे सैंधे रै सारे लोका खैडै हुए होर यीशु पिलातुस राजे आगँ नेऊ ।<sup>2</sup> ते लोक यीशु पैंधे दोष लादें लागे, कि ऐ माणहु आसरै लोका बै बेहकाँदा लाग़ा सा होर रोमी सरकारा बै कर नी देणै री गल्ला केरा सा होर आपणै आपा बै मसीह होर राज़ा बोला सा ।<sup>3</sup> तैबे पिलातुस राजे यीशु ना पुछू, तू की आपणै आपा बै यहूदी रा राज़ा बोला सा? यीशुए बोलू, “तुसै आपे ता बोलदें लागे सी ।”<sup>4</sup> एसा गल्ला पैंधे पिलातुस राजे भीडा ना खडै लोका बै बोलू, “हाँऊ ऐ माणहु ना कोई भी दोष नी हेरदा ।”<sup>5</sup> राजे री गल्ल शुणीया लोका बोलदें लागे, कि गलीला ना लेईया सारै यहूदीया तक जौखे बी ऐ माणहु ज़ा सा तौखे ऐ लोका बै भडकाणे री शिक्षा देआ सा ।<sup>6</sup> लोकै री गल्ला शुणीया पिलातुस राजे पुछू, “कि ऐ माणहु गलीली सा?”<sup>7</sup> जैबे लोकै ओ बोलू, ऐण्डा शुणीए पिलातुस राजे यीशु हेरोदेस राजे हागँ भेजु किबैकि ऐ लाका हेरोदेस राजे हागँ ती जुण तदीकाल यरुशलैमा ना रौहा ती ।

### हेरोदेसा रै सामणै यीशु

<sup>8</sup> यीशु बै हेरिया हेरोदेस राज़ा बोहु खुश हुआ किबैकि हेरोदेस बड़ै रोज़ा ना यीशु होर तेइरै चमत्कारा बै हेरना चाहा ती ।<sup>9</sup> हेरोदेस राज़ा यीशु ना बोहु सारी गल्ला पुछदा रौहू पर यीशुए राजे बै कोई जवाब नी धिना ।<sup>10</sup> तैबे तेई बौकै धर्म गुरु होर पुजारी खडै होइया यीशु पैंधे दोष लादें लागे ।<sup>11</sup> तैबे हेरोदेस राज़ा आपणै सपाही सैंधे मिलिया यीशु रा मजाक उडाँदा लाग़ा होर यीशु बडै चोगे लाइया वापस पिलातुस राजे आगँ भेजे ।<sup>12</sup> हेरोदेस राज़ा होर पिलातुस आपु ना एकी दुजे रै दुश्मन ती तिन्हा ध्याडै ना ते एकी-दुजे रै सैंधी बेणै ।

### पिलातुस यीशु बै मौऊती री सजा शणा सा

<sup>13</sup> तैबे पिलातुसै, धर्म गुरु, यहूदी नेता होर सारै लोका शाधे ।<sup>14</sup> पिलातुस राजे तिन्हा सैंधी बै बोलू, तुसै ऐई माणहु बै लोका बै भडकाणु आ बोला सी, पर मैं तुसा सामनै एइरी शोभली तरहँ जाँच केरी, होर मैं ऐई ना ऐण्डा कोई दोष नी हेरू ।<sup>15</sup> हेरोदेसै राजे भी ऐई माणहु ना कोई दोष नी हेरू तैबे ता तेईए ऐ माणहु आसा आगँ भेजु, किबैकि ऐई माणहुए ऐण्डा किछ बी नी केरु कि ऐई बै मौऊती री सजा मिलली ।<sup>16</sup> मुँ ऐ कोडै लाइया मारिया छौड़ी देणा ।<sup>17</sup> हर साल जाचै रै ध्याडै ना पिलातुस राजे बै एक कैदी छौडना पौडा ती ।<sup>18</sup> तैबे सैंधी लोकै मिलिया ज़ोरा सैंधे बोलू, ऐइ माणहु बै मार होर आसरी तेईए बरअब्बा बै छौड ।<sup>19</sup> बरअब्बा लडाई-झगडै होर खून केरनै रै इल्जामा ना कैद ती ।<sup>20</sup> पिलातुस राज़ा यीशु बै छौडणना चाहा ती, होर तेईए लोका भी समझाए ।<sup>21</sup> पर तै जोरै-जोरै बोलदें लागे कि ऐई माणहु बै क्रूसा पैंधे चढा ।<sup>22</sup> तैबे पिलातुस राजे त्रिजी घेरै तिन्हा बै बोलू, ऐई माणहुए की जुल्म केरु सा, कि ऐईबै मौऊती री सजा मिलली, मुँ ऐ कोडै मारिया छौड़ी देणा ।<sup>23</sup> पर लोका होर भी जोरा सैंधे बोलदें लागे कि ऐइ माणहु बै क्रूसा देआ, ऐईबै क्रूसा पैंधे चढा ।<sup>24</sup> पिलातुस राजे आदेश धिना कि जैण्डा ऐ लोक बोला सी, तैण्डायै ऐई माणहु सैंधे केरा ।<sup>25</sup> पिलातुस राजे तिन्हरी इच्छे रै मुताबिक बरअब्बा नाँ रा स डाकू छौडु, होर यीशु तिन्है हवाले केरे ।

### यीशु बै क्रुसा पेन्धे चढा सी

26 जैबे ते यीशु बे नेंदे लागे ती, ता तिन्है शमौन नाँ रा एक कुरेनी माणहु जुण ग्राँ ना एँदा लागी ती डौकु होर तैई पेंधे क्रूस लादिया यीशु पिछे ओँढणे बै बोलू । 27 लोकें री बडी भीड़ तिन्हा पिछे ओँढदी लागी ती, जुणी ना बोहु सारी बेटडी यीशु री तैँईरे रौंदी लागी ती होर दुःख केरदी लागी ती । 28 यीशुए तिन्हा धिराबे बै हेरिया बोलू, ओ यरुशलेमै री बेटियो, मेरी तैँईरे मता रौंदी । 29 किबैकि एण्डे ध्याडै एँदे लागे सी, जैबे लोका बोलणा, धन्य सी ते जुणा बांढे सी, होर ते कोख जुणीए बचै नी जौणे, होर ते माँई जुणीए दुध नी प्याऊ । 30 तैँई बौके लोका दौगा बै बोलणा, आसा पेंधे ओळ होर धारा बै बोलणा कि आसा बै खौट । 31 जैबे लोका होरे बूटै सेंधे एण्डा केरा सी ता सोचा तिन्हा शूके बूटै सेंधे की नी केरना । 32 यीशु सेंधे दुई होर माणहु नेणे लापेदे ती किबैकि ते डाकू ती होर तिन्हा बै बी मोऊती री सजा हुई ती । 33 जैबे तै खोपडी नाँ री जगहा पेंधे पुजे ता तिन्है ते दुए डाकू यीशु सेंधे एक दैहिणी धिरे होर दुजा बाउई धिरे क्रुसा पेंधे चढाए । 34 तैबे यीशुए बोलू, ओ बापु जी, इन्हा लोका बै माफ केर किबैकि ऐ नी जाणदें कि ए की केरदें लागे दै सी? होर तिन्है पर्ची पाईया प्रभु यीशु रै झिकडै बोण्डे । 35 लोका खडै-खडै हेरदें लागे ती होर तौखे खडै यहूदी अगुवै यीशु रा मजाक उडादें लागे होर बोलदें लागे, “एइये होरा ता बचाए अगर ऐ परमेश्वर भेजुदा मसीह सा होर परमेश्वरा रा चनुँआ दा सा ता आपणे आपा बै बी बचाला ।” 36 सिपाहिये बी तिन्हरा ठड्डा केरु होर पीणे री तैँईये कड़वा दाख रस धिनाँ । 37 अगर तू यहूदी रा राजा सा ता आपणे आपा बै बचा । 38 तिन्है यीशु रै क्रुसा पेंधे एक पौटी टाँगी, जुणी पेंधे ऐ लिखु ती, “ऐ यहूदी रा राजा सा ।”

39 जे डाकू यीशु सेंधे क्रुसा पेंधे लटकाए दै ती तिन्हा ना एकीए यीशु री निंदा केरिया बोलू, “कि तू मसीह नी आथी? तू आपणे आपु बै होर आसाबै बचा ।” 40 एता पेंधे दुजे तैँई डाकुरे पहलै तैँई डाकू बै बोलू, कि तू परमेश्वरा ना नी डौरदा? तू बी ता एसा सजा पाँदा लागी सा । 41 आसा बै ता आपणे अपराधे री सही सजा मिलदी लागी सा पर एई माणहुए ता कोई बी अपराध नी केरु दा आँथी । 42 तैबे तैँई डाकुरे बोलू, “हे यीशु जैबे तूसै आपणे राज्य ना एले ता तैबे मुबै बी याद केरेईत ।” 43 यीशुए तेइबे बोलू, “हाँऊ तौभै सच बोला सा त औज मुं सेंधे स्वर्ग लोका ना हौणा ।”

### यीशु मौरा सा

44 तैँई ध्याडै ना बारा बाजै ना लेइया त्रा बाजै तक सारै देशा ना न्याहरा हुआ । 45 सूरज्जा रा चमकणा बन्द हुआ होर मन्दिरै रै परदें रै बीचा ना चिरुइया दुई टुकडै हुए । 46 यीशुए ज़ोरा सेंधे बोलू, “ओ बापु जी, हाँऊ आपणी आत्मा तुसरै हौथा ना देआ सा ।” होर ऐ बोलिया आपणे प्राण छोडै । 47 सबेदारे ऐ सब किच्छ हेरिया परमेश्वरै री प्रशंसा केरी होर बोलू, “सचै ऐ माणहु धर्मी ती ।” 48 जे लोका क्रुसे री सजा हेरने री तैँईये कैड्डा हुए ती ते ऐ हेरिया छाती पीटदें-पीटदें आपणे घौरा बै वापस नौठे । 49 ते सब जे यीशु बै जाणा ती, होर जे बेटडी गलीला ना तेई सेंधे आइ ती दूर खडै होइया ऐ सब हेरदी लागी ती ।

### यीशु बै कब्रान न रैखी सी

50 तौखे यूसुफ नाँ रा एक मर्द ती सौ यहूदी महासभा रा एक सदस्य ती । सौ एक शोभला होर धर्मी मर्द ती । 51 सौ धर्मगुरु होर राजै रै ई फेसलै ना खुश नी ती आँथी । स यहूदिया रै एकी शहर अरमतियाह रा रौहणु आ ती । सौ परमेश्वरै रै राज्य री गल्ला केरदा रोहा ती । 52 तेइये पिलातुसा राजै हाम्गे जाइया यीशु री लाश मुँगी । 53 तेइये लाश क्रुसा पेंधे ना उतारी होर चादरी ना सौ लपेटी । होर सौ कब्रान न रैखी, जे चाहडा ना कोती दी ती । तेसा कब्रान ना पहलै कोई निती रैखु दा ती । 54 सौ शुक्रवारा रा ध्याडा ती होर बशाँ रा ध्याडा शुरु हौणु आळा ती । 55 जैबे यीशु री लाश नेणी लाई ती, तैबे तिनहै बेटडिये जे गलीला ना आई ती पीछे-पीछे जाइया स कब्र हेरी होर ऐ बी हेरु कि लाश केण्डे तरहै रैखी सा । 56 ते आपणे घौरा बै नौठी होर यीशु री लाश

पेंधे लागे री तेइये शोभली बासा आई चीजा त्यार केरी होर विधि रै मुताबिक तिन्है बशाँ रै रोजा ना कोई कोम नी केरु ।

### यीशु मुँपेदे न जिन्दे होआ सी

24 तुआरा बै दोती-दोतीये ते बेटडी जुणीए शोभली बासा आइ चीजा त्यार केरी ती ते तिन्हा चीजा लेइया कब्र आगै आई । 2 तिन्है हेरु की जुणी पाथरा सेंधे कब्रान रा द्वार बन्द केरु ती स एकी धिरा बै धूरु दा ती । 3 तैबे ते भीतरै नौठि, पर तिन्हा बै यीशु री लाश नी मिली । 4 ते सोचदी लागी कि यीशु री लाशा बै कि हुआ होला? तैबे तौखे एकदम चमकदें झीकडै आलै दुइ मर्द खडै हुए । 5 ते बेटडी डौरी होर टुँबडी मुण्डी केरिया खैडी रोही । तिन्है तिन्हा बेटडी बै बोलू, “तुसै जिन्दे बै मुँपेदे ना किबे तोपदी लागी दी सी?” 6 ते ओखे नी आथी ते जिन्दे हुए दै सी । याद केरा जैबे ते गलीला ना ती, तिन्है तुसाबै कि बोलू ती । 7 ऐ जरूरी सा कि माणहु रा बेटा पापी रै हौथे डौकीणा, होर तिन्हा सौ क्रुसा पेंधे चढाणा, पर तेई त्रिजे ध्याडी मुँपेदे ना जिन्दे होंगा । 8 तैबे तिन्हा बै ते सारी गल्ला याद आई, 9 तैबे ते कब्रान आगै ना वापस आई होर तिन्है ए सब गल्ला ग्यारा चेलै बै होर सैभी बै दैसी । 10 जुणी बेटडीए चेलै बै ए गल्ला दैसी, ते मरियम मगदलीनी, योअन्ना, याकूबै री आमा मरियम होर तिन्हा सेंधे होरा बेटडी बी ती । 11 पर चेलै बै तिन्हरी गल्ला बेकार केथा साही लागी । तिन्है तिन्हरी गल्ला रा बशाह नी केरु । 12 पर ए गल्ला शुणिया पतरस खैडा हुआ होर तोर देइया कब्रान हाम्गे पूजु होर तौखे झीकडै केल्ली हेरै होर जे हुआ ती हैरान होइया आपणे घौरा बै नौठा ।

### इम्माऊसै री बौता न यीशु रा प्रगट होणा

13 एक रोज यीशु रै दुई चले इम्माऊस नाँ रै ग्राँ बै जाँदें लागे ती, जे यरुशलेमा ना सौत मीलै री दुरी पेंधे ती । 14 ते इन्ना सब गल्ला बै जे हुई दी ती गल्ल बात केरदें-केरदें जाँदें लागे ती । 15 जैबे ते आपु ना गल्ल बात होर पुछ-ताछ केरदें लागे ती तैबे यीशु तौखे प्रगट हुए होर तिन्हा सेंधे ओँढदें लागे । 16 पर परमेश्वरै जे यीशु बै मैना ती तिन्हरी ओछी एण्डी बँद केरी कि ते यीशु बै नी पछियाणी सके । 17 यीशुए तिन्हा बै बोलू, “मुँबे लागी सा की तुसै कोई गूडी गप्पा रा वचार केरदें लागे दै सी, ते उदास होइया चुपचाप खेडै रोहै । 18 तिन्हा ना क्रियुपास नाँ रै माणहुए बोलू, “शायद तुसै पहलै माणहु सी जुणी बै यरुशलेमा री एसा घटने रै बारै ना पता नी आँथी ।” 19 यीशुए तिन्हा बै बोलू, “कुणा गल्ला?” तैबे तिन्है बोलू, “ऐ गल्ला यीशु नासरी रै बारै ना सी । सौ एक भविष्यवक्ता ती होर बाँहु चमत्कार केरा ती । सौ परमेश्वर होर सब माणहु री नजरी ना एक महान गुरु ती । 20 होर म्हायाजकों होर आसरे सरदारै यीशु पकड़वाऊ, कि तेई पेन्धे मोऊती रा हुक्म धिनु लोड़ी, हो सौ क्रुसा पेन्धे चडाऊ । 21 आसै बुझु ती कि ते मसीहा सी होर इस्त्राइला बै आजाद करादें आपे सी । इन्हा गल्ला बै बितिया औज त्रा ध्याडै हुए । 22 औज दोती आसरी मण्डली री किछ बेटडी जैबे कब्रान हाम्गे पुजी ता तिन्है एक नोखी गल्ल हेरी, जुण तिन्है एजीया आसा बै दैसी । 23 तिन्है बेटडीए बोलू कि यीशु री लाश कब्रान ना नी आँथी, होर तिन्है स्वर्गदुत भाए, तिन्है स्वर्गदुतै बेटडी बै बोलू यीशु जिन्दे हुए दै सी । 24 तैबे आसरे कई सेंघी तोर देइया कब्रान हाम्गे नौठे होर जैण्डा तिन्है बेटडीए बोलू ती तैण्डाए तिनहै हेरु । 25 तैबे यीशुए तिन्हा दुई लोका बै बोलू, तुसै केतरै मूर्ख माणहु सी, जुणा गल्ला भविष्यवक्तै लिखी सी तिन्हा पेंधे बशाह केरना तुसा बै केतरा मुशकल हुआ । 26 तुसै नी पौडू कि मसीहा रा दुःख चेकणा होर आपणी महीमा ना स्वर्गा बै जाणा जरूरी ती । 27 तैबे यीशुए मूसा ना लेइया सारै भविष्यवक्ता रै बारै ना जे धर्म शास्त्रा ना लिखु ती समझाऊ । 28 जैबे ते तेई ग्राँ ना पुजे जौखे तिन्हा जाणा ती, पर यीशुए तिन्हा सेंधे एण्डा व्यबाहर केरु जैण्डे कि तिन्हा आगै जाणा ती । 29 पर तिन्है यीशु बै बोलू कि औज ओखे रोहा किबैकि ध्याडा ओउडु सा होर सोन्ह हुई सा । तैबे यीशु तिन्हा सेंधे भितरै नौठे । 30 जैबे ते रोटी खादें बेटे ता यीशुए रोटी हौथा ना लेइया परमेश्वर रा धन्यावाद केरु होर रोटी चोड़िया तिन्हा बै धिनी । 31 तैबे चानक तिन्हरी ओछी खुली होर तिन्है यीशु पछियाणे, पर ते तिन्हरी नजरी ना राहुए । 32 तैबे ते आपु ना बोलदें लागे, “जैबे यीशु आसा बै बौता ना धर्म शास्त्रा री गल्ला समझादें लागे ती, तैबे

आसरें मना ना उतेजना पैदा किबै नी हुई? 33 तैबै ते उठिया वापस यरुशलेमा बै चौरै होर तौखै तिन्हा बै ग्यारा चेलै होर तिन्हरै सेंघी कैट्टै मिलै । 34 ते बोलदै लागै, “यीशु सचीयै जिन्दै हुएदें सी होर शैमौना बै हेरुए ।” 35 तैबै तिन्है दुहीयै बोता ना जै किछ तिन्हा सेंघे हुआ ती ते सारी गल्ला चेलै बै दैसी, होर बोलू कि जैबै तिन्है रोटी चोड़ी ता काण्डै तिन्है यीशु पछियाणै ।

### यीशु चेलै न हेरिया सी

36 ते इन्हा गल्ला बै केरदै लागै ती कि यीशु तिन्हा मोंझै ऐजिया खड्डै हुए । होर तिन्हा बै बोलू, तुसा बै शान्ति मिलै । 37 ते घबराए होर डोरै तिन्है बुझू ऐ ता कोई भूत सा । 38 तैबै यीशुए तिन्हा बै बोलू, “तुसै किबै घबरा सी होर तुसरें मना ना बशाह किबै नी आथी ।” 39 मेरें हौथा-जोंघा बै हेरा हाँऊ कोई भूत नी आथी, मुँबै छुँगीया हेरा किबैकि भूतै रै हाड-मास नी होदा, जैण्डा तुसै मू ना हेरा सी । 40 ऐ बोलिया यीशुए आपणै हौथ-जोंघा रिहारे । 41 चेलै बोहू जादा खुश ती होर हैरान ती तिन्हा बै बशाह नी ती होंदा लाग़ा कि प्रभु यीशु जिन्दै हुए सी, तैबै प्रभु यीशुए तिन्हा बै बोलू, तुसा हाग़ै खाणै बै किछ सा? 42 तिन्है प्रभु यीशु बै भुनूईदी मौछी रा एक टुकड़ा धिना । 43 यीशुए स मैच्छी रा टुकड़ा चेलै सामनै खाऊ 44 यीशुए बोलू, “जैबै हाँऊ तुसा सेंघे ती तैबै में

तुसा बै बोलू ती, कि मूसा होर भविष्यबक्ता री कताबा ना ता भजन संहिता ना जे किछ मेरें बारें ना लिखू सा ते सारी गल्ला पूरी होंगी 45 तैबै प्रभु यीशुए पवित्र शास्त्र सोमझणै री तैइयै तिन्हरी समझ खोली । 46 ए गल्ला बोहु पहलै लिखी दी सा कि मसीह दुःख च़ेकणा, होर त्रिजै ध्याडी मुँएदें ना जिन्दै होणा । 47 यरुशलेमा ना शुरु करिया सारै देशा ना मन फेरने होर पापै री माफी रा सुसमाचार प्रचार, तेही रै नाँ ना केरिना । 48 तुसै इन्हा सैभी गल्ला रै गवाह सी । 49 ऐबै जुण वाईदा परमेश्वरै मुबै धिना सा सौँ मुँ तुसा सेंघे पूरा केरना कि जैबै तक पवित्र आत्मा तुसा पैधै नी उतरला ताँ तक तुसै यरुशलेमा छौड़िया बाहरै मतैइत जादै ।

### प्रभु यीशु स्वर्गा बै जा सी

50 तैबै प्रभु यीशुए आपणै चेलै होर बशाह केरनु आए बैतनिय्याह ग्रॉ ना बाहरै नेए । होर आपणै हौथ च़ेकिया तिन्हा सैभी बै आशीबाद धिना । 51 तिन्हा बै आशीबाद देंदें-देंदें प्रभु यीशु तिन्हा ना अलग हुए, होर स्वर्गा बै नौटै । 52 चले प्रभु यीशु री आराधना करिया यरुशलैम बै बापस आए । 53 इन्हा सैभी गल्ला ना बाद ते लगातार परमेश्वरै री जय-जयकार केरदै रौहै होर आपणा सारा बौक्त मन्दिरा ना गुजारदै लागै ।

# यूहन्ना

## परिचय

यहुन्ने यीशु परमेशवरै रै हमेशा रै वचना रै रूपान प्रगट करु, जुणीये "रूपधारण केरिया आसरै बिचा न डेरा करु । "एसा कताबा न ऐऐस्पष्ट लिखूदा सा, कि ये सुसमाचार एथा री तैईये लिखू सा कि एथा बै पौडणु आळै वशाह केरले कि यीशु री यीशु ही वायदा करु हुन्दा मुक्तिदाता मतलब परमेशवरा बेटा सा, होर ते यीशु पेन्धे बशाह केरने रे दुआरा जिन्दगी पाई सकलै । (20:31) ।

परिचय न यीशु बै परमेशवरै रै वचना रै रूपान प्रगट करु सा । तेथा न बाद सुस्माचारा रै पैहले भागा न सौत चमत्कार होर नशाणी रै बारे न लिखू सा तेथा न ये प्रगट होआ सा कि यीशु वायदे रा उधारकर्ता होर मुक्तिदाता सा । दूजा भाग उपदेश वचना रा सा तेथा न ऐ भी दसुदां सा कि कैडी तैरह किच्छ लोकै यीशु पेन्धे बशाह केरु होर तिन्हरै चले बणै, जैबै किहोरी लौके तिन्हरा बरोध केरु । 13-17 अध्याय न यीशु बै ढौकणै धियाणै री राती, यीशु बै तिन्हरे चले संघे प्यार -भाव होर कुसा पेन्धे चढाणै न पैहली राती, चले बै' तियार केरने होर तिन्हा बै उत्साहित केरणु आळै यीशु रै वचन पूरी तैरह लिखेंदे सी । आखरी रै अध्याय न यीशु रै ढौकणै होर मुकदमे, तेईरै कुसा पेन्धे चढाणै, होर पौथणै होर जिन्दे होणै, होर बादा न चले संघे प्रगट होणै रै बारे न ।

यूहन्ना मसीह रै दुआरा हमेशा री जिन्दगी रै दाना पेन्धे जोर देआ सा । ये एक ऐंदा दान सा जे ऐबै शुरु होआ सा होर तिन्हा बै मिला सा, जो यीशु बै बौत, सच्चाई होर जिन्दगी रै रूपान ग्रहण केरा सी । आत्मिक गैला बै दसणै री तैईये होर आपणी रोजा री जिन्दगी न साधारण चीजा री नशाणी रै रूपान इस्तेमाल केरले ।

यूहन्ना री एक खास विशेषता सा, जैडै किपाणी, रोटी, पियाशा, पुआल होर तेईरी भेड़ा, डाल होर तेईरै फौळ ।

रूप -रेखा

परिचय 1:1-8

यूहना बसिस्मा देणु आला होर यीशु रै पैहले चले 1:19-51

यीशु री जनसेवा 2:1-12:50

यरुशलेमा न आखरी किच्छ रोज 13:1-19-42

यीशु रा जिन्दा होणा होर तिन्हरा हेरिणा 20:1-31

उपसंहार : गलीला न दूजी बार बी यीशु रा हेरीणा 21:1-25

## वचन शरीरान न बदलू

1 सेभी न पहलै वचन ती, होर वचनपरमेश्वर रै सेंघें ती, होर वचन परमेश्वर ती, 2 ऐ पराणै बौक्ता न परमेश्वरा रै सेंघें ती । 3 सैभ किच्छ तेईरै जरिये पैदा हुआ होर जे किच्छ पैदा हुआ सा, तिन्हा न कोई भी चीज तेईरै बगैर पैदा नेई हुई । 4 तैई न जीवन ती होर जीवन माहणु रा पियाशा ती । 5 प्याशा निहारै न चमका सा, होर निहारै सौ ग्रहण नी केरु ओथी (नेई अपनाऊ) । 6 एक माहणु परमेश्वरै री धीरै न एजीया खैडा हुआ जुणी रा नाँ यहुन्ना ती । 7 सौ मैनु गवाई देणै री तैईरे आऊ ती कि पियाशै री गवाई दे, किबैकि सारै तैईरै जरिये बशाह आणलै । 8 सौ आपू ता पियाशा नी ओथी, तैबै भी तेई पियाशै री गवाई देणै री तैईये आऊ ती । 9 सच्चा पियाशा जो हर एक माहणु बै पियाशा केरा सा, दुनिया न ऐणु आला सा । 10 सौ दुनिया न ती होर, दुनिया तैईरै दवारा (जरिये) पैदा हुई, होर दुनिया सौ नेई पछिच्याणु । 11 सौ आपणै घौरा बै आऊ होर तिन्हे आपणै सौ नेई अपनाऊ । 12 पर जेतरे सौ अपनाऊ, तेईरे तिन्हा बै परमेशवरै रै बेटे होणे रा अधिकार धिन्ना, मतलब तिन्हा बै जूण तेईरै नाँ पांधे बशाह डाहा सी । 13 तै न ता लोहू संघे, ना माहणु री इच्छा संघे, पर परमेशवरै न पैदा हुए सी । 14 होर बचनै माहणु (शरीर) रा रूप लेऊ होर दया होर सच्चाई ना पुरे होइया आसा रै बिचा न रोहे, होर आसै तिन्हारी एंडी महिमा हेरी, जेडी बापू रै एकलौते री महिमा । 15 यहुन्ने प्रभु यीशु रै बारे न गवाई धिन्नी, होर जोरै संघे बोलु, ऐ सौ ऐ सा जुणीरै बारै न मै दसु ती जो मुं न बाद ऐंदा लागा सा, सौ मुं न बडा सा किबैकि सौ मुं न पहलै ती । 16 किबैकि तिन्हरा जो अनुग्रह सा आसै सेभीरे

पाऊ सा मतलब दया पांधे दया । 17 किबैकि कनून ता मुसै रै जरिए धिन्ना सा, पर दया होर सच्चाई प्रभु यीशु रै जरिए पूजी । 18 परमेश्वर कोईरे कदी भी नेई हेरु, ऐकलौता बेटा बापू रै फाडे न सा तैईये सौ आणु ।

## यूहन्ना बसिस्मा देणे आळै री गवाही

19 यहुन्ना री गवाई ऐ सा कि जैबै यहूदीये यरुश्लेमा न पुजारी होर लेबी तिन्हा न ऐ पुच्छणे री तक भेजे, "तू कुण सा?" 20 ता तिन्हें ऐ मनु कि होर नाँ नेई केरु, पर मनु कि, "हाँऊ मसीह नी आथी ।" 21 तैबै तिन्हें यहुन्ना न पुच्छु, "तैबै तू कुण सा? कि तू एलिय्याह सा? तेईये बोलु हाँऊ नी आथी ।" " ता कि तू सौ भविष्यवाणी केनु आळा सा? तेईये जवाब धिन्ना, "नेई" । 22 तैबै तिन्हें यहुन्ना न पुच्छु, तैबै तू कुण सा? तैबै आसे आपणे भेजणु आळै जवाब देई सकलै, कि तू आपणे बारै न कि बोला सा?" 23 यहुन्ने बोलु, "जेडा यशायाह भविष्यवाणी केरनु आळै बोलु ती, हाँऊ बौणा न एक शाधणु आळैरी छेडु सा तूसै प्रभु री बौत सीधी केरा 24 तै फरिसीये रै धीरै न भेजेंदे ती । 25 तिन्हें यहुन्ना न ऐ प्रश्न पुच्छु, "तू न ता मसीह आथी, होर न सौ भविष्यवाणी केनु आळा, ता तैबै बपतिस्मा किबै देआ सा?" 26 यहुन्ने तिन्हा बै जवाब धिन्ना, "हाँऊ ता पाणी संघे बपतिस्मा देआ सा पर तुसरै बीचा न एक माहणु खडा सा, जुणी बै तूसै नेई जाणदै । 27 मतलब मुं न बाद ऐणु आळा सा, जोसरै बूटे रै तस्मे हाँऊ खोलणे रै लाईक नेई आथी ।" 28 ये गला यरदन ना पारै बैन्वियाह न हुई, जोखे यूहन्ना बपतिस्मा देआ ती ।

### परमेश्वरा रा मेम्णु

29 दूजै रोज यूहन्ने प्रभु यीशु आपू धिरै एंदा हेरिया बोलु, " हेरा ये परमेश्वरा रा गौभू (मेम्णु) सा जो दुनिया रा पाप चकिया नेया सा । 30 ऐ सौ ऐ सा जुणीरै बारै न मै बोलु ती; एक माहणु मुं न पीछे ऐणा सा, जो मुं न भी बडा सा, किबैकि सौ मुं न पेहलै ती, । 31 हाँऊ ता तिन्हा बै नई ती पच्छीयाणदा, पर तैबै हाँऊ पाणी न बपतिस्मा देदेआ आऊ कि सौ इस्राइला पांधे जाहिर होला" । 32 होर युहन्ने ऐ गवाई धिन्नी, "मै आत्मा कबूतरै रै रूपा सरगा ना उतरदे ( ओसदे) हेरु सा, होर सौ तेई पांधे बेठा । 33 हाँऊ ता तिन्हा बै पच्छियाणदा नी ती, पर जुणीऐ हाँऊ पाणी संघे बपतिस्मा देणे री तक भेजू सा, तिन्हे मुम्बै बोलु, जुणी पांधे तू आत्मा बै उतरदा होर बेशदा हेरला, तेईये पवित्र आत्मा लाईया बपतिस्मा देणा सा । 34 होर मै एक होर गवाई धिन्नी सा, कि ऐ ही परमेश्वरा रा बेटा (शौहरु) सा ।

### यीशु रै पैहले चले

35 दूजै रोज भिरी यूहन्ना होर तिन्हरै चले न दुई माहणु खडे हुए ती, 36 युहन्ने प्रभु यीशु पांधे जो जांदे लागे ती, हेरु होर बोलु, "हेरा ऐ परमेश्वरा रा गौभू सा । 37 तैबै ते दूऐ चले युहन्ने री ऐ शूणीऐ प्रभु रै पिच्छे ओंडदै लागे । 38 प्रभु यीशु पिच्छे मुडिया ते पिच्छे ऐन्दे हेरे होर तिन्हा बै बोलु, "तूसै कुणी बै बोलवै लागन्दे सी? तिन्हे प्रभु यीशु बै बोलु, हे गुरु जी तूसै कोखे रोहा सी? 39 प्रभु यीशु ऐ तिन्हा बै बोलु, चोला ता हेरा । तैबै तिन्हे जाईया प्रभु री रौहणे री जगह हेरी, होर तेई रोज प्रभु यीशु संघे रौहे । ऐ सेभ किच्छ दसवें घंटे रै मौंझे हुआ ती । 40 तिन्हा दुई न, पिच्छे यूहन्ना री गल्ला शूणीया प्रभु यीशु रै पिच्छे चौले ती । एक शमोन पतरसा रा भाई अन्द्रियास ती । 41 तेईये पहलै आपणै संघे भाई शमोन बै मिलिया बोलु, आसा बै प्रभु मतलब मसीही मिलु । 42 तेईये सौ प्रभु यीशु आगे बै आणु । प्रभु यीशु ऐ तेई पांधे हेरिया बोलु, "तू यूहन्ना रा बेटा शमोन सा, कैफा मतलब पतरस बौलीणा सा ।

### फिलिपुस होर नतनएल रा शाधणा

43 दूजै रोज प्रभु यीशु होर ऐ गलीला बै जाणा सोचु, प्रभु यीशु फिलिपुस संघे मिलु होर बोलु, " मु पिच्छे न ऐजा । 44 फिलिपुस, अन्द्रियास होर पतरस रै शहरा बैतसैदा रै रौहणु आळे ती । 45 फिलिपुस नतनएल संघे मिलु होर तेईबै जूणी री चर्चा मुसै री कनुना न होर भविष्यवाणी करणु आए केरी ती, सौ आसा बै मिलु सा, सौ यूसूफा रा बेटा यीशु नासरी सा । 46 नतनएले तेईबै बोलु, कि कोई शोभली चीज नसरता न मिली सका सा? फिलिपुसे तेईबै बोलु, चौलिया हेरा । 47 प्रभु यीशु ऐ नतनएल आपू धिरै बै एंदा हेरु तैईरै बारै न बोलु, "हेरा ऐ पक्का इस्राइली सा, एइना कोई भी बैर नी आथी । 48 नतनएल प्रभु यीशु बै बोलु, तूसै मुम्बै कैदें जाणा सी? प्रभु यीशुऐ तैईबै बोलु, ऊँई न पेहले कि फिलिपुस तौबै शाधदा जैबे तू फेगडे रे बूटे हेठे बैठा ती, तैबै मै तू हेरु ती । 49 नतनएले प्रभु यीशु बै बोलु, "हे गुरु तूसै परमेश्वरा रै बेटे सी । 50 प्रभु यीशुऐ तेईबै जवाब धिना मै तौबै बोलु ती कि मै तू फेगडे रे बूटे हेठे हेरु ती तू की तैबै बशाह केरा सा? तो ता ऊँई न भी बडे-बडे कौम हेरणे" । 51 तैबै प्रभु यीशु ऐ तेईबै बोलु, हाँऊ तुसाबै सच- सच बोला सा तुसा सर्गा बै खुला होर परमेश्वरा रै स्वर्ग दूता बै माहणु रै बेटे (शौहरु) संघे ओसदे होर ऊजे जांदे हेरणा ।

### गलीला रै काना न पैहला चमत्कार

2 फिरी त्रिजे रोज गलीले रै काना न कोई रा ब्याह ती, होर प्रभु यीशु री आम्मा भी तौखे ती ! 2 प्रभु यीशु होर तिन्हरै चले भी तेई ब्याह न शधाए ती ! 3 जैबे दाखा रा रस घटु ता प्रभु यीशु री आम्मे तिन्हा वै बोलु, तिन्हा आगे दाखा रा रस नई रौहु" औथी (निभु) 4 प्रभु यीशु ऐ तेस्सा बै बोलु" ओ बेटडीए मुम्बे तौ संघे कि कौम सैन्घे कि कौम? हाजी मेरा बौक नई आऊ ! 5 तिन्हरी आम्मे नोकरा बै बोलु, जे किच्छ सौ तुसा बै बोलला सौए केरीत ! 6 तौखे यहुदिये रै चौखे केरने रै रिवाजा रै दुआरा पात्थर रे छौ 7 मटके डाये ती, जुणी न दुई-दुई त्रा-त्रा मौण औपडा ती! 8 प्रभु यीशु ऐ तिन्हा

वे बोलु, "मटके न पाणी भौरा"! तिन्हे सौ पूरे-पूरे भौरै! तैवै प्रभु यीशु ऐ तिन्हा वे बोलु, "ऐवै एई पाणी वे खोलिया भोजे रे भण्डारी आगे वे नेया!" होर तिन्हे सौ नैऊ! 9 जैबै भौजे रै भण्डारीऐ सौ पाणी स्वादु, जुण दाखा रा रस बणुदा ती होर तैइवै पता नी ती औथी कि सौ कौखे न आऊ (पर जुणा पाणी खोलणु आए माणहु ती तिन्हा वै पता ती कि सौ कौखे न आऊ), तैवै भोजा रे भण्डारीऐ लाडा शदाईया चले न तैईवै बोलु, 10 सैब माणहु पहले शोभला दाखा रा रस देआ सी होर जैवै लोका पिया मताए होआ सी तैवै ते माडा दाखा रा रस देआ सी; पर तें ता शोभला दाखा रा रस ऐबै तैई रखु ती! 11 प्रभु यीशु ऐ गलीले रै काना न आपणा ऐ पहैला चमत्कार केरु होर आपणी महिमा प्रकट केरी होर तेईरै चले तेई पांधे बशाह केरु ! 12 तुईन न बाद प्रभु यीशु होर तेईरी आम्मा, भाई होर तेइरे चले कफरनहूमा बै नौठे होर किछ रोज तौखे रौहे!

### मंदिरा न व्यापारी बाहरै खोलै

13 यहूदी रै फसला री जाचा रा बौक नेडे ती, होर प्रभु यीशु यरुश्लेमा बै नौठे! 14 प्रभु यीशु ऐ मंदरा न बौल्द, भेडा होर कबूतरा रै बेचणु आए होर लेन-देन केरनु आए बैशु होन्दे हेरे! 15 तैवै प्रभु यीशु ऐ रौशी रा कोडा बणाईया, सैभ भेडा होर बौल्द मंदरा न खोले, होर लेन-देन केरनु आए रे देबुए खलारिया शेते ! 16 होर कबूतर बेचणु आए बै बोलु, "इन्हा बै औखे न नेआ! मेरे बापू रै घौरा बै लेन-देन केरनु आए रा घौर मता बणा" 17 तैवै प्रभु यीशु रै चले बै याद आऊ कि लिखुंदा सा, " तेरे घौरा री धुन्ना हाँऊ खाणा सा ।" 18 ऐसा गल्ला पांधे यहूदी लोके प्रभु यीशु बै बोलु, "तूसै जुण ऐ कोम केरा सी ता आसा बै कुण जैई नशाण रिहा सी । 19 प्रभु यीशु ऐ तिन्हा बै जवाब धिन्ना "ऐई मंदरा बै ढाआत, होर मुँ ऐ मंदर त्रा ध्याडे न खेडा केरना!" 20 यहूदी लोके बोलु, "ऐई मंदरा रै बनाणे न छेताली बौष लागंदे सी, होर तुसा की ऐ त्रा रोजा न खेडा केरना?" 21 पर प्रभु यीशु ऐ आपणे शरीरा रे मंदरा रे बारै न बोलु ती! 22 पर जेबे प्रभु यीशु मुँऐदे न जिन्दे हुए तेवे तिन्हा रे चले वे याद आई कि प्रभु यीशु ऐ एण्डा बोलु ती; होर तिन्हे धर्मशास्त्र ता तेई वचना पांधे जुण प्रभु यीशु ऐ बोले ती बशाह केरु!

### यीशु माहणु रै दिला बै जाणा सा ।

23 जेबे प्रभु यीशु फसह री जाचा न यरुशलेमा न ती ता बौऊ लोके तिन्हरे चमत्कार हेरिया तिन्हा रै नाँ पांधे बशाह केरु! 24 पर प्रभु यीशु ऐ आपणे आपा बै तिन्हा रै बशाह न नई रखु, किबैकि ते तिन्हा सेभी बै जाणा ती! 25 होर प्रभु यीशु बै जरुरत नई ती कि माणहु रै बारै न कोई गवाई दे, किबैकि सौ आपूए जाणा ती कि माणहु रै मनां न की सा?

### यीशु होर निकुदेमुस

3 फरीसीये न निकुदेमुस नाँ रा एक माहु ती, जो यहुदिये रा सरदार ती । 2 तेइए राती बै प्रभु यीशु आगे एजीया प्रभु यीशु बै बोलु, "ओ गुरु, आसे जाणा सी कि तूसै परमेश्वरै री धिरै न गुरु होईया आए सी, किबैकि कोई इन्हा चमत्कारा बै जो तूसै रिहा सी, अगर परमेश्वर तेई संघे नी होला ता नी रिहाई सकदा ।" 3 प्रभु यीशुऐ तेइबै बोलु, हाँऊ तौबे सच-सच बोला सा, जो कोई नाँऊई धीरै न नी जन्मला ता परमेश्वरा रा राज्य नई हेरी सकदा । 4 निकुदेमुसे तेइबै बोलु, "माहु जैबे खापरा होआ सा, ता कैन्डे जन्म लेई सका सा? कि सौ आपणी आम्मा रै कोखा (फाडे) न जाइया जन्म लेई सका सा?" कि सौ आपणी आमा रे पेटा न जाईया दूजी घेरे जन्म लेई सका सा? 5 प्रभु यीशुऐ जवाब धिना, "हाँऊ तौ आगे सच-सच बोला सा जेबै तक कोई माहु पाणी होर आत्मा न नी जन्मला ता सौ परमेश्वर रै राज्या न नई पूजी नी सकदा । 6 किबैकि जे शरीरा न जन्मा सा, सौ शरीर सा; होर जो आत्मा न जन्मा सा, सौ आत्मा सा । 7 हैरान मत हो, कि मै तौबे बोलु, तेरा, "नाँऊई धीरै न जन्म लेणा जरुरी सा ।" 8 बागर जौखे चाहा सा तौखे जा सा होर तू तेसरी छेड शुणा सा, पर नी जाणदा कि सौ कौखे ऐजा सा? जो कोई आत्मा न जन्मा सा सौ ऐन्डा सा । 9 निकुदेमुसऐ प्रभु यीशु बै जवाब धिन्ना, ऐ गला केंडे होई सका सा? 10 ऐ शूणीया प्रभु यीशुऐ तेइबै बोलु, तू इस्राइलीऐ रा

गुरु होईया भी कि इना गला बै नी जाणदा? 11 हाँऊ तुसा बै सच-सच बोला सा कि आसे जो जाणा सी सौ बोला सी, होर जो आसे हेरु सा तेथा री गवाई देआ सी, । होर तुसै आसरी गवाई बै नेई मन्दै? 12 जेबै मैं तुसा संघे धौरती री गला केरी, होर तुसै बशाह नी केरदे, अगर हाँऊ तुसा संघे स्वर्गे री गला केरनु ता फिरी कैडा बशाह केरना? 13 कोई स्वर्गा पांधे नेई चडू, केवल सौए जूण स्वर्गान न उतरु अर्थात माळु रा बेटा (शौहरु) जूण स्वर्गा न सा । 14 होर जूणी रीति न मुसे बाँणा न कीडे बै उथडे पान्दे चडाऊ, तेंडी रीति संघे जरूरी सा कि माळु रा बेटा (शौहरु) भी उथडे पांधे चडाई जाणा । 15 किबैकी जूण कोई तेई पांधे बशाह केरला तेई हमेशा रा जीवन पाणा । 16 किबैकी परमेश्वरे माळु संघे ऐन्डा प्यार रखु कि तेइए आपणा इकलौता बेटा धिन्ना ताकि जो कोई तेई पांधे बशाह केरला तेई नाश नेई होणा पर हमेशा रा जीवन पाणा । 17 परमेश्वरे आपणा बेटा दुनियां न तेबै नेई भेजू, कि दुनियां पांधे सजै रा हुक्म देला पर तैबै कि दुनिया तेईरै जरिये उद्धार पाए । 18 जुण कोई तेई पांधे बशाह केरा सा, तेई पांधे सजा रा हुक्म नेई होन्दा, पर जो कोई तेई पांधे बशाह नेई केरदा, सौ दोषी बणा सा, तेबैकि तेइए परमेश्वरे रै इकलौते बेटे रे नां पांधे बशाह नेई केरु । 19 होर सजा री हुक्मे रा मतलव ऐ सा कि प्याशा दुनिया न आऊ सा, होर माणुह ऐ निहयारे बै प्याशे न जादा खरा बुझू किबैकि तिन्हा रै कौम बुरे सी । 20 किबैकि जो कोई बुरा केरा सा सौ प्याशे संघे वैर डहा सा, होर प्याशे रे नेडे नेई ऐन्दा, ऐन्डा नी हुआ लोडी कि तेईरै कौमा पांधे दोष लागला । 21 पर जुण सच्चा पांधे चला सा, सौ प्याशे रे नेडे ऐजा सा, किबैकि तेईरै कौम सामणै होले कि ऐ परमेश्वरा रे धीरेन हुएदें सी ।

### यीशु रै बारे न यूहन्ना री गवही

22 तैवे इन्हा गैला न बाद प्रभु यीशु होर तिन्हा रै चले यहूदिया देश न आए; होर प्रभु यीशु तौखे तिन्हा संघे रौहिया बपतिस्मा देवे लागे । 23 यहून्ना भी शालेम रे नेडे ऐनोन न बपतिस्मा देआ ती, किबैकि तौखे बोहु पाणी ती, होर लोका तौखे ऐजिया बपतिस्मा लेआ ती 24 किबैकी यहून्ना तेई बोक्ते जेला न बंद नेई केरु ती । 25 तौखे यहून्ना रे चले री यहूदी लोका संघे शुद्ध केरने रे बारे न बैहस हुई । 26 होर तिन्हे यहून्ना आगै ऐजिया बोलु, "ओ गुरु, जुण माणहु यरदन रे पारे तौ संघे ती, होर जुणी री तुसै गवाही धिन्नी सा; हेर सौ बपतिस्मा देआ सा, सेभ तेई आगै ऐजा सा । 27 यूहन्ने जवाब धिन्ना, "जाँ तक माणहु बै स्वर्गा न नी धिन्ना ताँ तक तेई बै किच्छ नेई मीलणा । 28 तुसै ता आपू मेरे गवाह सी कि मैं बोलु, "हाँऊ मसीह नेई, पर तेई न पहले भेजुन्दा सा । 29 जुणीरी लाडी सा, सौए लाडा सा, पर लाडे रा संघी जुण खडा होईआ तेईरी शुणा सा, लाडे री गला शुणीए बोहु खुश होआ सी: ऐबे मेरी ऐ खुशी पूरी हुई सा । 30 जरूरी ऐ सा कि सौ बढला होर हाँऊ घटनु । 31 जुण उझे न (स्वर्गा न) ऐजा सा सौ सेभी न बडा सा, जो दुनियाँ न ऐजा सा सौ दुनियाँ रा सा, होर जो स्वर्गा न ऐजा सा, सौ सेभी ना ऊजै सा । 32 जे किछ तेईरे हेरु होर शुणू सा, तेसा गला री गवाही देआ सा, होर कोई भी तेई री गला नेई मन्दा । 33 जुणीए तेई री गला मनी तेईरे ऐसा गला पांधे मोहर लाई कि परमेश्वर सच्चा सा । 34 किबैकि जे परमेश्वरे भेजुन्दा ती, सौ परमेश्वरे री गला बोला सा, किबैकि आत्मा बै नापी नापिया नी देदा । 35 बापू बेटे (शौहरु) संघे प्यार डहा सा, होर तेइए सेभ चीजा तेइरे होथा न धिन्नी सा । 36 जे बेटे (शौहरु) पांधे बशाह केरा सा, हमेशा रा जीवन तेईरा सा, पर जो बेटे (शौहरु) री नी मनदा, तेइए जीवन भी नेई हेरणा, पर परमेश्वरा री मीश तेई पांधे रौहा सा ।"

### यीशु होर सामरी बेटडी

4 फिरी जैबे प्रभु बै पता लागा, कि फरिसिये शुणु सा कि यीशुए यूहन्ना न बाँऊ चले बणा सा होर तिन्हा बै बपतिस्मा देआ सा । 2 मगर प्रभु यीशु आपू नेई पर प्रभु यीशु रै चले बपतिस्मा देआ ती । 3 तैबे प्रभु यीशु यहूदिया बै छोडिया भिरी गलिला बै चौले,, 4 होर प्रभु बै सामरिया ना होइया जाणा जरूरी ती । 5 तैबे प्रभु यीशु सुखार नाँ सामरिया रै एक नगर तक आऊ, जे तेसा जमीने रै नेड ती, जुण याकुबे आपणे बेटे (शौहरु) युसुफा बै धिन्नी ती । 6 होर यकुबा रा कुआँ भी तौखे ती; प्रभु यीशु रस्ते रा थकु होन्दा तेई कुए

आगै एडे बेटा, ऐ गल छौ घंटे रै लगभग हुई । 7 एतरे न एक सामरी बेटडी पाणी भौरदी आई । प्रभु यीशु ऐ तेसा बै बोलु, "मुम्बै पाणी पियाह ।" 8 किबैकि प्रभु यीशु रै चले ता नगरा बै रोटी लेंदे नौटे ती । 9 तेसे सामरी बेटडीए प्रभु यीशु बै बोलु, "तुसै यहूदी होइया मुं सामरी बेटडी न पाणी किबै माँगा सी?" ( किबैकी यहूदी सामरी संघे केंडे भी तरह रा मेलजोल नेई डांहेदे ।) 10 प्रभु यिशुए जवाब धिन्ना, "अगर तू परमेश्वरे रै वरदाना बै जाणा सा, होर ऐ भी जाणा सा कि सौ कुण सा जुण तौबे बोलदा लागा सा, मुम्बै पाणी पीया, ऐ तू तेईन मौन्ना होर सौ तौभै जीवन रा पाणी देला।" 11 बेटडी ऐ प्रभु बै बोलु, "ओ प्रभु तुसा आगै पाणी भौरने री तक किच्छ भी नी आथी, होर कुंआ डूग्घा सा; तैबे भी सौ जीवना रा पाणी तुसा आगै कौखै न आऊ? 12 कि तुसै आसरै बापू याकुबा न बडे सी, जुणीए आसा बै ऐ कुंआ धिन्ना स; होर आपू आपणे बाल बच्चे, होर आपणे गोरू संघे एता न पिऊ? 13 प्रभु यीशु ऐ तेसा बै जवाब धिन्ना, "जे कोई ई पाणी बै पिला तेई होरी घेरे शोखिणा सा । 14 पर जे कोई तेई पाणी पिला जो मुं तिन्हा बै देणा, तेई फिरि होरी घेरे हमेशे रै जीवन तक नी शोखिणा सा, बल्कि जे पाणी मुं तेईबै देणा, तेईए तौईन एक जाईरू बनाणा सा, होर तेई हमेशा रै जीवन तक निकलदै रोहणा सा । 15 बेटडीए प्रभु यीशु बै बोलु, "ओ प्रभु, तेई पाणी मुम्बै दे ताकि हाँऊ शोखि नी बणनु होर ना पाणी भौरने री तक ऐतरी दूर ऐनु । 16 प्रभु यीशु ऐ तेसा बै बोलु, "जा आपणे लाडे बै औरे शधा ।" 17 बेटडीए जवाब धिन्ना, "हाँऊ बिना लाडे री सा ।" प्रभु यीशुऐ तेसा बै बोलु, "तू ठीक बोला सा, हाँऊ बिना लाडे री सा । 18 किबैकि तें पाँज लाडे पूरे केरे सी, होर जुणी आगै तू ऐबे सा सौ भी तेरा लाडा नि आथी; ऐ तें सच्चे बोलु ।" 19 बेटडीए प्रभु यीशु बै बोलु, "ओ गुरु, मुम्बै लागा सा कि तुसै भविष्यवाणी केरनु आळै सी । 20 आसरै बुजुगै ऐड ढोंगा पेंधे प्रभु री महिमा केरनी, होर तुसै बोला सी कि ऐ जगह जौखे महिमा केनी जरूरी सा बोला सी सौ जगह यरुशलेम न सा ।" 21 प्रभु यीशुऐ तेसा बै बोलु, "ऐ बेटडीए, मेरी गला रा बशाह केर कि तेई बोक्त ऐणा सा कि तुसा ना ता ऐई ढोंगा पाँधे बापू री महिमा केरनी ना ता यरुशेमा न । 22 तुसै जूणी बै नी जाणदे, तेईरी महिमा केरा सी; होर आसे जूणी बै जाणा सी, तेईरी महिमा केरा सी, किबैकि उद्धार यहूदी मौझे न सा । 23 पर तेई बोक्त ऐणा सा, जूण ऐवे भी सा, जूणी न सच्चे भगत बापू री महिमा आत्मा होर सच्चाई संघे केरनी, किबैकि बापू आपणी तैईए ऐन्डे सच्चे भगता बै तोपा सा । 24 परमेश्वर आत्मा सा, होर जरूरी सा कि तेईरी महिमा केरनु आले आत्मा होर सच्चाई संघे तेईरी महिमा केरले । 25 बेटडीए प्रभु यीशु बै बोलु, "हाँऊ जाणा सा कि मसीह जूण प्रभु जाणीया सा, ऐणू आळा सा, जेबे सौ ऐला, ता आरस्सा बै सारी गला दसणी ।" 26 प्रभु यीशु ऐ तेसा बै बोलु, "हाँऊ तौबे बोलदा लागादा सा, हाँऊ सौए सा ।

### चले री वापसी

27 ऐतरै न प्रभु यीशु रै चले आए, होर बडे हेरान होन्दे लागे कि प्रभु यीशु बेटडी संघे गला केरदे लागेदें सी; तैबे भी कोईए नी पुच्छु, "कि तुसै की चाहा सी?" होर किजी री तक तेसा संघे ढूणीदें लागे सी?" 28 तैबे सौ बेटडी आपणा गडोलू छोडीया ग्रां बै नोठी, होर लोका बै बोलदी लागी, 29 एजा एकी माँणहू बै हेरा, जुणीए सेभ किछ जो मैं केरु मुम्बै दसु सा: कौइन्चे ऐ ता मसीह नी आथी?" 30 तैबे ते ग्रां न निकलिया प्रभु यीशु आगै बै एदे लागे । 31 ऐसा माँझे तेइरे चले प्रभु यीशु बै ऐ अर्जा केरी, ओ गुरु, किछ ता खा ।" 32 पर प्रभु यीशुए तिन्हा बै बोलु, "मुं आगै खाणे री तक एंडा खाणा सा, जुणी बै तुसै नी जाणदे । 33 तैबे चले आपू न बोलु, "कि कोईये इनरी तक किछ खाणे बै आणु सा? 34 प्रभु यीशुए तिन्हा बै बोलु, "मेरा खाणा ऐ सा कि आपणै भेजणुआये री इच्छा रे दवारा चलनु होर तेइरा कौम पूरा केरनु । 35 कि तुसै नी बोलदे, "लुणने री तैईरे हाजी चार मीहने सी? हेरा हाँऊ तुसा बै बोला सा, "आपणी औच्छी फेरिया छेता पांधे हेरा कि तेआ काटणे री तक पोकेदे सी । 36 काटणु आळा धियाडी पा सा होर हमेशा रा जीवने री तैईरे फौल कडा केरा सा; किबैकि वाहणु आळा होर काटणु आळा दुहे मिलिया खुशी मणाले । 37 किबैकी ओखे ऐ पडाउण खरी बेशा सा: "वाहणु आळा होर सा होर काटणु आळा कोई होर सा । 38 मैं तुसा बै सौ छेत काटणे री तक

भेजे, जुणी न तुसै खेऊ नी केरु: होरिऐ खेऊ केरु होर तुसै तिन्हरै खेऊ रै फौळा न भागी हुए।

### सामरी रा बशाह केरना

39 तेई ग्रां रे बोहुऐ सामरिये तेसा बेटडी रै बोलणे पांधे प्रभु यीशु पांधे बशाह केरु; किबैकी तेसे ऐ गवाई धिन्नी ती: प्रभु यीशुए सेभ किच्छ जो मैं केरु ती, मुम्बे दसु। 40 तेबै जैबै ऐ सामरी प्रभु यीशु आगै बै आये, ता प्रभु यीशु आगै अर्जा केरदै लागे, कि आसारै ओखे रौहा। तैबै प्रभु यीशु दुई रोज तौखे रौहै। 41 तेईरै बचना री बजहा संघे बोहु लोके बशाह केरु ॥ 42 होर तेसा बेटडी बै बोलु, “एबे आसे सिर्फ तेरै बोलणे पंधे बशाह नेई केरदै; किबैकि आसे आपुए शूणु, होर जाणा सी कि ऐ माहणु सचिए दुनिया रा मुक्तिदाता सा। 43 तिन्हा दुई रोजा न बाद प्रभु यीशु तौखे न गलिला बै नौठे। 44 किबैकि प्रभु यीशुए आपु ऐ गवाई धिन्नी कि भविष्यवाणी केरणु आळे री आपणे देशा न इज्जत नी होन्दी। 45 जैबे प्रभु यीशु गलिला न आऊ, ता गलीला रै लोका खुशी संघे प्रभु न मिले; किबैकि जेतरे कौम प्रभु यीशुए जाचा धियाडी यरुश्लेमा मौन्जे केरै ती, तिन्हें सौ सारै भाले ती, किबैकि ते आपुए भी जाचा बै नौठे दे ती।

### राजा हाम्गे कौम केरनु आळे रै शोहरु बै ठीक केरना

46 तैबै प्रभु यीशु भी गलीला रै काना न आऊ, जोखै तिन्हें पाणी रा दाखे रा रस बणाऊ ती। तौखे एक राजा रा नोकर ती जुणी रा शोहरु कफरनहूमा न बमार ती। 47 तेईऐ ऐ शुणीया कि प्रभु यीशु यहूदिया रै गलिला न आऊंदा सा, प्रभु यीशु आगै नौठा होर तिन्हा आगै अरजा केरदा लागा कि मुं संघे एजिया मेरा शोहरु बै ठीक केरा: किबैकि सौ मौरनु आळा ती। 48 प्रभु यीशुए तेई बै बोलु, “जाँ तक तुसै कोई निशाणी होर नौखे कौम नी हेरले ताँ तक तुसा कदी भी बशाह नी केरना। 49 राजा रे नौकरे प्रभु यीशु बै बोलु, “ओ प्रभु मेरे शोहरु रै मौरने न पहले चौला। 50 प्रभु यीशुए तेईबै बोलु, “जा, तेरा शोहरु जिन्दा सा: तेई माहणु ऐ प्रभु यीशु री गला पांधे बशाह केरु, होर नौठा। 51 सौ हाजी बोता न ती, कि तेईरै सेवक (नौकर) तेई आगै आये होर बोलदे लागे, “तेरा शोहरु जिन्दा सा। 52 तेईऐ तिन्हा न पुछु, “कुणी बौकता न सौ ठीक होन्दा लागा ती तिन्हें तेई बै बोलु, “इज सौतवे घंटे न तेईरा जौर उतरु। 53 तैबै बापुए जाणु कि ऐ तेई बोक्ता न हुआ, जुणी बौकता न प्रभु यीशुए तेईबै बोलु, “तेरा शोहरु जिन्दा सा,” तैबै तेईऐ होर तेइरे सारे घौरा आळे बशाह केरु। 54 ऐ दूजा नोखा कौम ती जो प्रभु यीशुये यहूदिय न गलीला न एजिया रिहाऊ ती।

### अडताली बौषा रे बमारी बै ठीक केरना

5 इन्हा गल्ला न बाद यहूदिया री एक जाच हुई, होर प्रभु यीशु यरुश्लेमा बै नौठे। 2 यरुश्लेमा न भेडा रै दवारा आगै एक पाणी रा कुंड ती जो इब्रानी भाषा न बैतहसदा बोलिया सा, तेईरै पौंज (बरामदे) कूणे ती। यरुश्लेमा न भेडा रै दवारा आगै एक पाणी रा कुंड ती जो इब्रानी भाषा न बैतहसदा बोलिया सा, तेईरै पौंज (बरामदे) कूणे ती। 3 तिन्हा न बौहु बमार, कांणे, लैंगडे होर शुके आँगा आळे [पाणी हिलणे री आशा न] पौंडीया रोहा ती 4 (पर सैही बौगता न परमेशवरा रै स्वर्गदूत कुंडा बै औसा ती होर पाणी बै हिला ती, पाणी बै हिलांदा जे कोई पैहले औसा सौ ठीक होआ तीचाहे तेईरी कोई भी बीमारी होली।) 5 तौखे एक माहू ती, जो अडताली बौषा न बमारी न ती। 6 प्रभु यीशुए सौ पौंडु होन्दा हेरु होर ऐ जाणीया कि सौ बौऊ रोजा न ऐसा दशा न पौंडु सा, प्रभुए पुछु, “कि तू ठीक होणा चाह सा?” 7 तेई बमारै प्रभु बै बोलु, “ओ प्रभु, मुं आगै कोई माहू नी आथी कि जैबै पाणी बै तलाआ सी, ता मुम्बे कुंडा न उतारलै, पर मेरे पुजदै - पुजदै दूजा मुं न पहले उतरा सा।” 8 प्रभु येशुए तेईबै बोलु, “उठ आपणा मांजा चक होर ओड फिर।” 9 सौ माहू तैबै ठीक हुआ होर आपणा मांजा चकिया औन्डदा लागा। 10 सौ राम केरने रा धियाडा ती तेबै यहूदी, प्रभु यीशु न जो ठीक हुआ ती, बोलदे लागे, “ओज ता राम केरने रा धियाडा सा, तेरा मांजा चकणा ठीक नी आथी।” 11 तेइए तिन्हा बै जवाब धिन्ना, “जुणीऐ हाऊँ ठीक केरु, तेइए मुम्बे बोलु, “आपणा मांजा चक, होर हाँड- फिर।” 12 तिन्हे तेई बै पुछु, “सौ कुण

माहणु सा जुणीऐ तौबै बोलु, “आपणा मांजा चक, होर हाँड-फिर।” 13 पर जुण माणहु ठीक हुआ ती सौ भी नी ती जाणदा कि सौ कुणीऐ ठीक केरु, किबैकि तेसा जगह न बौऊ लोका री बजह संघे प्रभु यीशु तौखे न नौठे। 14 इन्हा गल्ला न बाद सौ प्रभु यीशु बै मंदरा न मिलु। प्रभु यीशु ऐ तेइबै बोलु, “हेर तू ठीक हुआ सा: दुजिए पाप मत केरदा, एण्डा नी हुआ लोडी कि तौ पांधे कोई महा-क्लेश पोडला।” 15 तेई माहणु ऐ यहूदी लोका बै दसु कि जुणीऐ हाँऊ ठीक केरु सौ प्रभु यीशु सा। 16 ऐसा बजह संघे यहूदी लोका प्रभु यीशु बै तंग केरदे लागे, किबैकि प्रभु यीशु एण्डे कौम रामा रे धियाडे न केरा ती। 17 पर यीशुए तिन्हा बै उतर धिन्ना मेरा बापू हाजी तककौम केरा सा, होर हाँऊ आपुए भी कौम केरा सा। 18 ऐसा बजह संघे यहूदी लोका प्रभु यीशु बै मकाणे री होर कोशिश केरदे लागे, किबैकि सौ न सिर्फ रामा रा धियाडे रा रुआज चौडा ती, पर परमेश्वरा बै आपणा बापू बोलीऐ आपु बै परमेश्वरा रे समान बोला ती।

### बेटे रा अधिकार

19 तैबै यीशुए तिन्हा बै बोलु, हाँऊ तूसा बै सच-सच बोला सा, बेटा आपुए किच्छ नेई केरी सकदा, केवल सौए जे बापू बै केरदेआ हेरा सा किबैकि जे-जे कौम सौ केरा सा तिन्हा बै बेटा भी केरा सा। 20 किबैकि बापू शोहरु न लगन रखा सा होर जे -जे कौम सौ आपु केरा सा, सौ सेभ तेईबै रिहा सा; होर तेई ऊँई न भी बडे कौम तेइवे रिहाणे, ताकि तुसै हैरान हुए लोडी। 21 किबैकि जेडा बापू मुँऐदे बै चकिया जिंदा केरा सा, तैडे शोहरु भी जुणी बै चाहा सा जिंदा केरा सा। 22 बापू कोई रा न्याय नी केरदा, पर न्याय केरने रा सारा कौम शोहरु बै धिना दा सा। 23 कि सेभ लोका जेडे बापू रा आदर केरा सी तेडे शोहरु रा भी आदर केरले। जुण शोहरु रा आदर नी केरदा, सौ बापू रा भी जुणीऐ सौ भेजूदा सा आदर नेई केरदा। 24 हाँऊ तूसा बै सच-सच बोला सा, जुण मेरी गल्ला शूणीऐ मेरे भेजणु आए पांधे बशाह केरा सा, हमेशा रा जीवन तेईरा सा, तेई पांधे सज्जा रा हुकम नेई होंदा\* पर सौ मौऊती न पार होईआ हमेशा रे जीवना बै (पा सा) प्राप्त केरा सा। 25 हाँऊ तूसा बै सच-सच बोला सा तेई बोक्त ऐणा, होर ऐबै सा, जुणी न मुँऐदे भी परमेश्वरा रा वचन शूणीऐ जिन्दे होणा। 26 किबैकि जेण्डा बापू आपणे आपा न जीवन रखा सा तेडे शोहरु बै भी परमेश्वरे ऐ अधिकार धिना दा सा कि आपु न जीवन डारे। 27 बल्कि तेई बै न्याय केरने रा भी अधिकार धिना दा सा किबैकि सौ माणहु रा शोहरु सा। 28 ऐसा गल्ला न हैरान मता होन्दे, किबैकि सौ बोक्त ऐजा सा, जेतरे कब्रान न सी, तिन्हा तेई रा वचन शूणीऐ बाहरे निकलणा। 29 जुणीऐ भले कौम केरदे सी तिन्हा जिणे री तेईऐ भी जिंदा होणा होर जुणीऐ बुरे कौम केरे सी तिन्हा सजा पाणे री तेईऐ जिन्दा होणा

### यीशु रै बारे न गवाई

30 हाँऊ आपणे आपा न किच्छ नी केरी सकदा; जेण्डा शूणा सा, तेंडा न्याय केरा सा, होर मेरा न्याय सच्चा सा; किबैकि हाँऊ आपणी इच्छा नेई बल्कि आपणे भेजणु आळे री इच्छा चाहा सा। 31 अगर हाँऊ आपु आपणी गवाही देनु; ता मेरी गवाही सच्ची नेई होणा। 32 एक होर सा जुण मेरी गवाही देआ सा सौ सच्ची सा होर हाँऊ जाणा सा मेरी जूण गवाई देआ सा कि सौ सच्ची सा। 33 तुसै यूहन्ना न पुच्छणे धियाऊ होर तेईऐ सच्चाई री गवाही धीनी सा। 34 पर हाँऊ आपणे बारे न माणहु री गवाही नई चाहंदा; तैबै भी हाँऊ ऐ गल्ला केरा सा कि तुसा बै मोक्ष (उद्धार) प्राप्त हुआ लोडी। 35 जुण भौकदा होर चमकणु आ दिऊआ ती; होर तुसा बै थोडी देरा री तेईऐ प्याशे न मस्त होणा बांका लागा। 36 पर मुं आगै जुण गवाही सा सौ यूहन्ना री गवाही न बडी सा; किबैकि जुण कौम मुम्बे बापूए पूरा केरने वे धिनादा सा मतलब जुण कौम हाँऊ केरा सा, सौए मेरे गवाह सी, कि बापू ऐ हाँऊ भेजू दा सा। 37 होर बापू जुणीऐ हाँऊ भेजूदा सा, तेई ऐ मेरी गवाही धीनी; तुसै न कधी तेई री आवाज शूणी, ना तेई रा रूप भाळु दा सा। 38 होर तेईरै वचना बै मना ना पक्के डाहा, किबै कि जूणीए सौ भेजुन्दा सा तूसै तेईरा बशाह नेई केरदै। 39 तुसै धर्म शास्त्रा न तोपा सी किबैकि बुझा सी कि हमेशा रा जीवन तुंई न मिला सा, होर ऐ सौए सा जूण मेरी गवाही देआ सा। 40 तैबै भी तुसै जिणे री तेईऐ मुं

आगै ऐणा नई चाहन्दे । 41 हाँऊ माणहु न आदर नई चाहन्दा 42 पर हाँऊ तुसा बै जाणा सा, कि तुसा आंदरे परमेश्वर रा प्रेम नी आथी । 43 हाँऊ आपणे बापू रे नाँ पांधे आऊसा, होर तुसै मुम्बै नई मन्दे; पर अगर कोई होर आपणे नाँ पांधे एजा सा ता सौ तुसा मनणा । 44 तुसै जुण ऐकि-दुजे न आदर चाहा सी होर सौ आदर जुण परमेश्वरा धीरे न सा,तेई नई चाहन्दे, ता कुणी तरीके न बशाह केरी सका सी? 45 ऐन्डा मता सोचदे, कि मुँ आपणे बापू सामणे तुसा पांधे दोष लाणा; तुसा पांधे दोष लागु आळा ता मुसा सा जुणी पांधे तुसै बशाह केरुदा सा । 46 किबैकि अगर तुसै मूसा पांधे बशाह केरदे,ता तुसा मुँ पांधे भी बशाह केरना ती, किबैकि मूसै मेरे बारे न लिखुन्दा ती । 47 पर अगर तुसै मूसै री लिखी दी गला पांधे बशाह नी केरदे ता मेरी गला पांधे बशाह केन्डे होणा ।

### पौज हजार मर्दा बै रोटी खियाणी

6 इना गला न बाद प्रभु यीशु गलीलै री आळी मतलब तिबिरियास री आळी रै पारै नौठे । 2 होर बाँऊ लोका प्रभु यीशु रै पिछे ती,किबैकि जो नौखे कौम प्रभु यीशु बमारा पांधे रिहा ती,ते तिन्हा बै हेरा ती । 3 तेबै प्रभु यीशु ढौगा पांधे चढीया आपणे चेलै संघे तौखे बेटै । 4 यहूदिये री फसह री जाच (साजा) नेड ती । 5 जैबै प्रभु यीशु ऐ आपणी आँछी फेरिया बाँऊ महाणु आपू नेड ऐन्दे हेरै,फिलिप्पुसा बै बोलु, " आसे इनरै खाणे री तक कौखे न रोटी आणनी? 6 तेईऐ सौ तेईबै परखणे री तक बोलु किबैकि सौ आपू जाणा ती कि सौ कि केरला? 7 फिलिप्पुसे प्रभु यीशु बै उतर धिन्ना कि दुई सौ दिनार री रोटी भी तिन्हा बै पूरी नई होणी कि सेभी बै थोड़ी-थोड़ी मिलली 8 तेइरै चले मौँझे शमौन पतरसा रै भाई अन्द्रियासे प्रभु यीशु बै बोलु, 9 "औखे एक शौहरु सा जुणी आगै जौऊ री पौज रोटी होर दुई मौँछी सा मगर ऐतरै माहणु बै सौ कि सा? 10 प्रभु यीशु ऐ बोलु, "लोका बै बशात ।" तौखे बाँऊ घाह ती तैबै लोका जिन्हा मौँझे मर्दे री गीणती पौज झार ती खाणे री तक बेटै । 11 तैबै प्रभु यीशु ऐ रोटी ढौकी होर धन्यवाद केरिया बेशणु आळे बै बाँण्डी होर तेंडी मौँछी भी, जेत्री तिन्हें लोड़ी ती बाँण्डी । 12 जैबै लोका रोटी खायिया रौजे ता प्रभु यीशु ऐ आपणै चले संघे बोलु, "बचंदे टुकडे कड़े केरा होर किच्छ शौटू नई लोड़ी 13 तैबै तिन्हें सौ टुकडे कड़े केरै होर जौऊ री पौज रोटी रै टुकडे संघे जुण खाणै आळे न बचुन्दा ती बारा टोकरी भाँरी 14 जैबै जुण नौखे कौम प्रभु यीशु ऐ रिहाऐ तैबै तिन्हा हेरिया लोका बोलदे लागे, "सौ भविष्यवाणी केनू आळा जुण दुनिया न ऐणु आळा ती पक्का ऐ सा ।" 15 प्रभु यीशु ऐ जाणीया कि ते मुम्बै राजा बनावे री तक ढौकणा चाहा सी तैबै जौता पांदे केलाह नौठा ।

### यीशु रा पाणी पेन्धे चैलणा

16 जैबै सौन्झ हुई ता प्रभु यीशु रै चले नौई पारे नौठे, । 17 होर किशती पांदे चढीया नौई पारै कफरनहूम बै जांदे लागे । तेई वोक्तै निहारा हुआ ती, होर प्रभु यीशु हाजी तक तिन्हा आगै नई आए ती । 18 बागर बियाने री बजह संघे नौई हिलदी लागी । 19 जैबै ते हिल्दे हिल्देआ त्राई चार मील आगै निकते, ता तिन्हें प्रभु यीशु पाणी पान्दे होन्डदा होर किशती रै नेड ऐन्दा हेरु होर ते डौरै । 20 पर प्रभु यीशु ऐ तिन्हा वै बोलु, "हाँऊ सा डौरै मौँता ।" 21 तैबै ते प्रभु यीशु बै किशती पांधे चढाईया लेणै री तक तियार हुए होर छेके सौ किशती तेसा जगह पान्दे पूजी जौखे ते जांदे लागे ती ।

### लोका रा यीशु बै तोपणा

22 दूजै रोज तिन्हें माहणु, जो नौई रै परै खडी ती,ऐ हेरु कई औखे एकी छोडिया होर कोई किशती नी आथी,होर प्रभु यीशु आपणे चले संघे तेसा किशती पान्धे नई ती चडे, पर प्रभु यीशु रै चले केलै नौठे ती । 23 तैबै बाकी किशती तिबिरियासे रै तेसा जगहा रै नेड आई, जौखे तिन्हें प्रभु रै धन्यावाद केरनै न बाद रोटी खाई ती । 24 तैबै जैबै तिन्हें माहणु हेरु कई औखे ना ता प्रभु यीशु सा होर ना तिनैरै चेलै, तेबै ते बी किशती पांधे चढीया प्रभु यीशु बै तोपदे कफरनहूमा बै नौठे ।

### यीशु जीवन री रोटी सा

25 नौई रै परै जेबे ते प्रभु यीशु संघे मिले ता बोलु, ओ गुरु,तुसे औखे कैबै? 26 प्रभु यीशुऐ तिन्हा बै बोलु, " हाँऊ तुसा बै सच-सच बोला सा, तूसै मुम्बै तैबै नी तौपदे कि तूसै नौखे कौम हेरे पर तैबे कि तूसै रोटी खाईया रोजले । 27 नाश होणे रै खाणे री तक खेऊ मता केरदे पर तेई खाणे री तक जो हमेशा रा जीवन ठीहराईरा सा, जूणीये माहणु रै बेटे तुसा बै देणा, किबैकि बापू मतलब परमेश्वर तैबै पांधे मोहर लाई सा ।" 28 तिन्हें प्रभु यीशु बै बोलु, " परमेश्वरा रा कौम केरने री तक आसा कि केरना?" 29 प्रभु यीशुऐ तिन्हा बै जवाब धिन्ना, " परमेश्वरा रा कौम ऐ सा कि तुसै तेई पांधे जो तिन्हें भेजू सा बशाह केरा ।" 30 तैबै तिन्हे प्रभु यीशु बै बोलु, " फिरि तैबै तुसै कुण जेई नशाण रिहा सी कि तिन्हा हेरिया आसे तेरा बशाह केरना? तुसै कुण जेई कौम रिहा सी? 31 आसारै खपरै बोणा न मन्ना खाऊ,जैडा लिखू सा, " परमेश्वरै तिन्हा बै खाणे री तक स्वर्गा न रोटी धिन्नी ।" 32 प्रभु यीशुऐ तिन्हा बै बोलु, " हाँऊ तुसा बै सच-सच बोला सा । कि मूसा ऐ तुसा बै सौ रोटी नई धिन्नी, पर मेरा बापू तुसा बै सच्ची रोटी स्वर्गा न देआ सा । 33 किबैकि परमेश्वरै री रोटी सोऐ सा जो स्वर्गा ना उतरिया दुनिया बै जीवन देआ सा ।" 34 तैबै तिन्हें प्रभु यीशु बै बोलु, " ओ प्रभु, ऐ रोटी आसा बै रोजे देआ केरा ।" 35 प्रभु यीशुऐ तिन्हा बै बोलु जीवने री रोटी हाँऊ सा जो मुँ आगै बै एजा सा सौ कदी भी भूखा नी रोहन्दा, होर जो मुँ पांधे बशाह केरा सा सौ कदी भी शोखा नी रोहन्दा । 36 पर मैं तुसा बै बोलु ती कि तुसै हाँऊ हेरु तैबै भी बशाह नई केरदे । 37 जो किच्छ बापू मुम्बै देआ सा, सौ सेभ किछ मुँ आगै ऐणा सा, होर जो कोई मुँ आगै एला सौ मुँ कदी भी नी खोलणा । 38 किबैकि हाँऊ आपणी मर्जी नई पर आपणै भेजणु आळे री इच्छा पूरी केनेरी तक स्वर्गा न उतरु सा । 39 होर मुँ भेजणु आए री,मरजी ऐसा कि जो किच्छ तिन्हें मुम्बै धिन्नु सा,तेता न हाँऊ किच्छ भी नई खोनू, पर तेईबै हाँऊ अंतिम रोजा न होरि घेरे जियानु (जिऊदा केनू) । 40 किबैकि मेरे बापूरी ऐ इच्छा सा कि जे कोई बेटे (शौहरु) बै हेरला होर तेई पांधे बशाह केरला, तेई हमेशा रा जीवन पाणा सा, मुँ सौ अंतिम रोजा न होरि घेरे जियाणा (जिन्दा केरना ) सा ।" 41 तेबै यहूदी प्रभु यीशु बै चुगली केरदे लागै, किबैकि प्रभु यीशु ऐ बोलु ती कि " जे रोटी स्वर्गा न आईदी सौ हाँऊ सा ।" 42 होर तिन्हें बोलु, " कि ऐ यूसुफ रा बेटा यीशु नी जूणी रै आमा बापू बै आसे जाणा सी?तैबै सौ कंडे बोला सा कि हाँऊ स्वर्गा न ऊतरु सा? 43 प्रभु यीशु ऐ तिन्हा बै जवाब धिन्ना, आपू न चुगली मता केरदे । 44 कोई मुँ आगै बै नी एजी सकदा जैबै तक बापू, जूणीऐ हाँऊ भेजू सा, तेईबै खींची नी लेन्दा, होर मुँ सौ अंतिम रोज होरि घेरे जियाणा (जिन्दा केरना )सा । 45 भविष्यवाणी केरनू आले शास्त्रा न लिखू सा, " तिन्हा सारे परमेश्वरै री धिरे ना सिखाऊंदे होणा" जूणीऐ बापू न शुणु होर सिखु सा, सौ मुँ आगै ऐजा सा । 46 ऐ नी आथी कि कोइए बापू हेरु सा पर जो परमेश्वरै री धीरै न सा सिर्फ तिन्हें बापू हेरु सा । 47 हाँऊ तुसा बै सच - सच बोला सा कि जो कोई बशाह केरा सा, हमेशा रा जीवन तेईरा सा । 48 जीवने री रोटी हाँऊ सा 49 तुसरै बजुर्गे बाँणा न मन्ना खाऊ होर मुँऐ । 50 ऐ सौ रोटी सा जो स्वर्गा न ओसा सा फिरी माहणु तूई न खाले होर नी मोरदै । 51 जीवने री रोटी जो स्वर्गा न उतरा सा, सौ हाँऊ सा अगर कोई ऐसा रोटी न खाला ता तेई सदै री तक जिन्दे रोहणा सा, होर जो रोटी मुँ दुनिया रै जीवने री तक देणी सा सौ मेरा मांस सा ।" 52 ऐसा गला पांधे यहूदी ऐ बोलिया आपू न झौटीदे लागै, " ऐ माहणु कंडे आसा बै आपणा मांस खाणे बै देई सका सा?" 53 प्रभु यीशु ऐ तिन्हा बै बोलु, " हाँऊ तुसा बै सच -सच बोला सा कि जैबे तक तुसै माहणु रै बेटे रा मांस नी खाले होर तेईरा लोहू नी पीलै, तुसा न जीवन नी होणा । 54 जूण मेरा मांस खाआ होर मेरा लोहू पीया सा हमेशा रा जीवन तेईरा सा, होर मुँ सौ अंतिम रौजा न होरि घेरे जियाणा( जिऊदा केरना) सा । 55 किबैकि मेरा मांस सच्ची न खाणे री चीज सा, होर मेरा लोहू सच्ची न पीणे री चीज सा । 56 जे मेरा मांस खा सा होर मेरा लोहू पीया सा सौ मुँ न सदा बणिया रौहा सा, होर हाँऊ तेईन । 57 जैडा जिन्दे बापुए हाँऊ भेजू सा, होर हाँऊ बापू री बजह संघे जिन्दा सा, तेंडा ऐ भी जो मुम्बै खाला तेई मेरे कारण जिन्दे रोहणा सा । 58 जे रोटी स्वर्गा न उतरी सा, तेसा रोटी रै

बराबर नी आथी जे बजुर्गे खाई होर मुंरे, जून कोई ऐ रोटी खाला तेई मेरे कारण जिन्दे रौणा सा। 59 ऐ गल्ला प्रभु यीशु ऐ कफरनुह्वा रै एकी आराधनालय (मंदरा) न उपदेश देंदी घेरे बोली ती।

### हमेशा री जिन्दगी रे वचन

60 प्रभु यीशु रै चले न बौऊरे ऐ शुणीया बोलु, " ऐ बड़ी पक्की गल सा, ऐसा गल्ला बै कुण शुणी सका सा?" 61 प्रभु यीशु, ऐ आपणे मन्ना न ऐ जाणीया कि मेरे चले आपू न ऐसा गल्ला पांढे चुगली केरा सी, प्रभु यीशु ऐ पुच्छु, " कि ऐसा गल्ला न तुसा बै बुरा लाग़ा सा? 62 अगर तूसै माहणु रै बेटे बै जोखे ऐ पहले ती, तौखे ऊजे जांढे हेरणा, तैबे कि होणा 63 आत्मा ता जीवन देणु आई सा, शरीरा न किच्छ लाभ नी आथी, जो गल्ला में तुसा बै बोली सी सौ आत्मा सा, होर जीवन भी सा। 64 पर तुसा न किच्छ ऐंडे भी सा। जो बशाह नी केरदे।" किबैकि प्रभु यीशु पहलै जाणा ती कि जो बशाह नेई केरदे, ते कुण सी होर कुणी हाँऊ ढोकणा सा। 65 प्रभु यीशु ऐ बोलु, " तैबे मै तुसा बै बोलु ती कि जाँ तक कोई बै बापू री धीरै न ऐ बरदान नी देईला ताँ तक सौ मु आगै बै नी एजी सकदा।

### पतरसा रा बशाह

66 एता पांढे प्रभु यीशु रै चले न बौऊ वापिस( पीछे) फिरे होर तेता न बाद तिन्हा संघे नी आन्दे। 67 तैबे प्रभु यीशु ऐ तिन्हा बारा चले बै बोलु, " कि तूसै भी जाणा चाहा सी?" 68 शमौन पतरसै जवाब धिन्ना, " ओ गुरु आसा कुणी आगे बै जाणा? हमेशे री जीवने री गल्ला ता तौ आगै सी; 69 होर आसे बशाह केरु जाणु सा कि परमेश्वरा रै माहणु तूसै सी।" 70 प्रभु यीशु ऐ तिन्हा बै जवाब धिन्ना, " कि मैं तूसै बारा नी चुनी रै? तैबे भी तुसा न एक माहणु शैतान सा।" 71 ऐ प्रभु यीशु ऐ शमौन इस्करियोती रै बेटे यहुदा रै बारै न बोली ती, किबैकि सौऐ जो बारा न एक ती, जो प्रभु यीशु बै ढोकणु आळा ती।

### यीशु होर तेईर भाई

7 इन्हा गल्ला न बाद प्रभु यीशु गलीला न फिरदें रौहे; किबैकि यहूदी प्रभु यीशु बै मारने रा तरीका केरदें लागे ती, तैबे प्रभु यीशु यहूदिया न फिरणा नी ती चाहन्दे। 2 यहूदिये रै घौरा रा साजा नेडे ती। 3 तैबे प्रभु यीशु रै भाईये तिन्हा बै बोलु, " ओखे न यहूदिया बै जा, कि जो कौम तू केरा सा तिन्हा बै तेरे चले भी तोखे हेरले। 4 किबैकि ऐंडा कोई नी आथी जे मशहूर होणा चाहा सा, होर गोजुईया कौम केरला। अगर तू ऐ कौम केरा सा, ता आपणै आपा बै दुनिया न रिहा।" 5. किबैकि प्रभु यीशु रै भाई भी तिन्हा पांढे बशाह नी ती केरदें। 6 तैबे प्रभु यीशु ऐ तिन्हा बै बोलु, " मेरा बौक्त हाजी तक नेई आऊ, पर तुसरी तक सारा बौक्त सा। 7 दुनिया तुसा संघे झीक(बैर) नेई केरी सकदी, पर सौ मुं संघे बैर डाआ सा किबैकि हाँऊ तिन्हे विरोधा न ऐ गवाई देआ सा कि तिन्हे कौम बुरै सी। 8 तूसै जाचा न जाआत; मुं ऐबै जाचा न नी जाणा, किबैकि हाजी तक मेरा बौक्त पूरा नी हुआ।" 9 प्रभु यीशु ऐ तिन्हा बै ऐ गल्ला बोलिया गलीला न रौहे।

### झोपड़ी रै मेले न यीशु

10 पर जैबै प्रभु रै भाई जाचा न नौठे ता प्रभु यीशु भी, सामने नेई पर गोजुईया नौठे। 11 यहूदी जाचा न प्रभु यीशु बै ऐ बोलिया तोपदें लागे, " सौ कौ सा?" 12 होर माहणु मोंझे प्रभु यीशु रै बारै न चुपचाप(शुङ्क)बोऊ गल्ला हुई, किच्छ बोलदें लागे, " सौ खरा माहणु सा।" होर किच्छ बोलदें लागे, " नेई सौ ता माहणु बै भरमा सा।" 13 तैबे भी यहूदी री डौरे रै मारै कोई माहणु प्रभु यीशु रै बारै न खुलिया नेई ती बोलदें।

### मेले न यीशु रा उपदेश

14 जैबै जाचा रा औधा धियाडा नौठा; ता प्रभु यीशु मन्दरा न जाईया वचन शूणान्दे लागे। 15 तैबे यहूदिये हैरान होईया बोलु, " ऐईबै बिना पौढीया ऐ ज्ञान बिधा कौखै न आई?" 16 तैबे प्रभु यीशु ऐ यहूदिये बै जवाब धिन्ना, "मेरा

वचन मेरा नेई, पर मेरे भेजणु आळे रा सा। 17 अगर कोई तेईरी इच्छा पांढे चलणा चाहला, ता तेई ऐई वचने रै बारै न जाणला कि ऐ परमेश्वरा री तरफा न सा या हाँऊ आपू धीरै न बोला सा। 18 जो आपू धीरै न किच्छ बोला सा, सौ आपणी सराऊती केरा सा; पर जो आपणे भेजणु आए री सराऊती केरा सा सौ सच्चा सा, होर तेइना कोई पाप नी आथी। 19 कि मूसै तुसा बै (व्यवस्था) कनून नी धिन्नु? तैबै तुसा न कोई भी कनून पांढे नेई चलदें। तूसै मुम्बै किबै मारणा चाहा सी?" 20 लोकै जवाब धिन्ना, "तौन ना कोई बुरी आत्मा सा! कुण तुसा बै मारणा चाहा सी?" 21 प्रभु यीशु ऐ तिन्हा बै बोलु, " मैं एक कोम केरु, होर तुसा सारे हैरान होआ सी। 22 तैबै मूसै बै खतना केने री आज्ञा धिन्नी सा ( ऐ न कि सौ मूसा री धीरै न सा, पर ऐ आज्ञा पीछे न आई सा), होर तूसै रामै रै धियाडे माहणु रा खतना केरा सी। 23 जैबै रामै रै धियाडे ना माहणु रा खतना केरा सी, तैबै मूसा री आज्ञा (व्यवस्था) कनूने री खतम नी होली, ता तूसै मुं पांढे किबै तैबै मिश केरा सी कि मैं रामै रै धियाडे एक माहणु खरी तरह ठीक केरु। 24 मुंह हेरी न्याय मता केरा, पर ठीक-ठीक न्याय केरा।"

### कि यीशु ही मसीह सा?

25 तैबै किच्छ यरुशलेमबासी बोलदें लागे, "कि ऐ सौऐ नी आथी जूणीबै मारणे री कोशिश केरनी लाई सा? 26 पर हेरा सौ ता सेभी रै सामने गल्ला केरदा लाग़ा सा होर कोई तेईबै किच्छ निसी रै बोली। कि सरदारै सच-सच जाणु सा कि ऐहे मसीह सा? 27 ऐईबै ता जाणा सी कि सौ कौखला सा, पर मसीह जैबै एला ता कोई नी जाणना कि सौ कौखला सा।" 28 २८. तैबै प्रभु यीशु मंदरा न दसदी घेरै जोरै संघे बोलु, "तूसै मुम्बै जाणा सी कि हाँऊ कौखला सा? हाँऊ आपु ऐ नेई आऊ, पर मेरा भेजणु आळा सच्चा सा, तेईबै तूसै नी जाणदें। 29 हाँऊ तेईबै जाणा सा किबैकि हाँऊ तेईरी धीरै न सा होर तेईरे हाँऊ भेजु सा।" 30 ऐसा गल्ला पांढे तिन्हें प्रभु यीशु ढोकणा चाहु, पर कोईऐ प्रभु यीशु बै हौथ नी लाऊ किबैकि प्रभु रा बौक्त ऐबै नी ती आथी 31 तैबै भी भिडा न बौऊ माहणुऐ प्रभु यीशु पांढे बशाह केरु, होर बोन्दे लागे, मसीह जैबै एला, ता कि ऐई न भी नौखै कोम रिहाणै जो ऐईए रिहाए?

### यीशु बै ढोकणै री कोशिश

32 फरीसिये लोका प्रभु यीशु रै बारै न ये गल्ला चुपचाप केरदें शुणै, होर प्रधान याजके होर फरीसिये प्रभु यीशु बै ढोकणे री तक सपाई भेजै। 33 तैबै प्रभु यीशु ऐ बोलु, " हाँऊ थोड़ी देरे री तक तुसा संघे सा फिरी आपणै भेजणु आळे आगे बै जाणा। 34 तुसा हाँऊ तोपणा, पर नी पाणा, होर जौखै हाँऊ सा, तौखे तूसै नी एजी सकदें।" 35 यहूदि आपू न दूणदे लागे, " ऐई कौखै जाणा कि आसा वै नेई मिलणा? कि सौ तिन्हा आगे बै जाला जो यूनानी ना लग-लग होईया रौहा सी. होर यूनानी बै उपदेश देला? 36 ऐ कि गल सा जो तेईये बोली, कि तुसा हाँऊ तोपणा पर नी पाणा, होर जौखे हाँऊ सा, तौखे तूसै नी एजी सकदें?"

### जिन्दगी रै पाणी री नौई

37 जाचा रा अंतिम रोज जे खास रोज सा, प्रभु यीशु खड़ा हुआ होर जौरे संघे बोलु, "अगर कोई शौखा सा ता मुं आगे ऐजीया पिया। 38 जो मुं पांढे बशाह केरला, जैन्डा पवित्र शास्त्रा ना लिखुंदा सा, तेईरै दिला न जीवने रे पाणी री नौई बौहन्दी रोहणा। 39 प्रभु यीशुऐ ऐ वचन पवित्र आत्मा रै बारै न बोलु ती, जे तेई पांढे बशाह केरनु आळे पाणु आळे ती, किबैकि आत्मा हाजी तक कोई पांढे नी उतरी ती, किबैकि प्रभु यीशु हाजी तक आपणी महिमा तक नी पूजे ती। 40 तैबै भिडा न कोई-कोईये ऐ गल्ला शुणीया बोलु, " ऐ ता सचिए ना भविष्यद्वक्ता सा। 41 होरि लोकै बोलु, "ऐ ता मसीह सा।" पर कोइयै बोलु, "किबै? मसीह कि गलीला न ऐणा? 42 कि पबित्र शास्त्र न ऐ नी लिखुन्दा सा, कि मसीह दाउद री वंशा न होर बैतलेह्मा ग्रं न ऐणा, जौखै दाउद रोहा ती? 43 इना गल्ला री वजह संघे लोका मोंझे लड़ाई पौई। 44 तिन्हा न किच्छ प्रभु यीशु बै ढोकणा चाहा ती, पर कोइए तिन्हा बै हौथ नी लाऊ।

### यहूदी मुख्य रा विश्वास नेई केरना

45 तैबै सपाई प्रधान होर फरीसी आगै बै बापस आए तिन्हें सपाई बै बोलु "तुसै सौ किबै नी आपणु?" 46 सपाईए जवाब धिन्ना, कोई माहणुए कदी एंडी गला नी केरी । 47 फरीसीए तिन्हा बै जवाब धिन्ना, कि तुसै भी भरमाउन्दै सी । 48 सरदार या फरीसीए मौझे न कोई ए तेई पांधे बशाह केरु सा? 49 पर ए लोका जो कनून नी जाणदैं, शापित सी । 50 निकुदेमुसे, जे पैहले तेई आगै आऊ ती होर तिन्हा मौझे एक ती, तेईये बोलु, 51 कि आसरी कनून कोई माहू बै, जाँ तक पैहलै तेईरी शुणीयां जाणी नी लेंदें कि सौ कि केरा सा, दोषी ठहरा सा?" 52 तिन्हें तेईबै जवाब धिन्नु, कि तू भी गलिला रा सा? तोप होर हेर गलील न कोई भविष्य वाणी केनू आ प्रकट नेई होणे रा सा । 53 तैबै सेभ कोई आपणे-आपणे घौरा बै नौठे ।

### गलत कौम केरणु आळी बेटडी बै माफी

8 पर प्रभु यीशु जेतुने रै दौगा पांधे नौठे । 2 दोथी बै प्रभु यीशु फिरिया मंदरा न आए, सारे माहणु प्रभु यीशु आगै आए होर प्रभु यीशु बेशिया तिन्हा बै वचन शूणादैं लागै । 3 तैबै शास्त्री होर फरीसीए एक बेटडी आणी जो बुरै कौमा न दौकी ती, होर तैसा बै बिचान न खडी केरिया प्रभु यीशु बै बोलु, 4 प्रभु यीशु बै बोलु, ओ गुरु, ए बेटडी बुरै कौम केरदी ढोकी सा । 5 कनूना न मुसै आसा बै आज्ञा धिन्नी सा कि ऐन्डी बेटडी बै पात्थरै लाईया भाहणी । तैबै तूसै ऐसा बेटडी रै बारे न कि बोला सी?" 6 (तिन्हें प्रभु यीशु बै परखणे री तक ये गल बोली ती ताकि तेसा पांधे दोष लगणे री तक कोई गल पालै । ) पर प्रभु यीशु टुम्बलै होईया गुठी लाईया धौरती पांधे लिखदैं लागै । 7 जैबे ते तिन्हा न पुच्छदे रोहे, ता प्रभु यीशुए सीधा होईया ए जबाब धिन्ना, तुसा मौन्झा न जुण पापी नी होला, सौए पहलै पात्थर मारला । 8 होर फिरि टुम्बलै होईया धौरती पांधे गुठी लाईया लिखदैं लागै । 9 पर तैआ ए शुणीया बडे न लेईया ओच्छे तक एक -एक केरिया निकते होर प्रभु यीशु केलै रोहे, होर बेटडी बिचान न खडी रोही । 10 प्रभु यीशुए खडै होईया तेसा बै बोलु, " ओ बेटडीए, सेभ कोखे बै नौठे? कि कोईये तौ पांधे दण्डे री आज्ञा नी धिन्नी ।" 11 तैसै बेटडी बोलु, ओ गुरु कोई ए नेई धिन्नी, प्रभु यीशुए बोलु हाँऊ भी तौ पांधे दण्डे री आज्ञा नी देदा, जा होर दुजिये पाप हेरी केरदी । ]

### यीशु दुनिया रा पियाशा सा

12. प्रभु यीशुए लोका बै बोलु, " दुनिया रा प्याशा हाँऊ सा, जूण मुं पिच्छे होंडा सा सौ निहारे न नी होन्दा, पर तेई दुनिया रा प्याशा पाणा ।" 13 फरीसीये प्रभु यीशु बै बोलु, " तू आपणी गवाई आपू देआ सा, तेरी गवाई ठीक नेई आथी ।" 14 प्रभु यीशुये तिन्हा बै जवाब धिन्ना, चाए हाँऊ आपणी गवाई आपू देआ सा, तैबै भी मेरी गवाई बड़ीया सा, किबैकि हाँऊ जाणा सा कि हाँऊ कौखे न आऊ सा होर कौखे बै जा सा? पर तूसै नी जाणदैं कि हाँऊ कौखे न एजा सा होर कौखे बै जा सा? 15 तूसै शरीरै रै दवारा न्याय केरा सी, हाँऊ कौसी रा न्याय नी केरदा । 16 और अगर आऊं न्याय केरनू भी, ता मेरा न्याय सौचा किबैकि हाँऊ केला नेई होर जुणीए हाँऊ भेजुन्दा सा 17 तुसा रै कनूना न भी लिखू सा कि दुई माहणु री गवाई मिलिया ठीक होआ सा; 18 एक ता हाँऊ आपुए आपणी गवाई देआ सा, होर दूजा बापू मेरी गवाई देआ सा जूणीए हाँऊ भेजू सा ।" 19 तिन्हें प्रभु यीशु न पुच्छु, " तेरा बापू कौखे सा?" प्रभु यीशुए उतर धिन्ना, ना तूसै मुम्बै जाणदैं ता ना मेरै बापू बै अगर तूसै जाणदैं ता मेरै बापू बै भी जाणदैं ।" 20 ए गल्ला प्रभु यीशुए मंदरा न उपदेश देदी घेरै भण्डार घौरा न बोली, होर कोइये प्रभु यीशु नेई ढौकू, किबैकि तिन्हरा बौक हाजी तक नी आऊ आथी ।

### आपणै बारे यीशु रा बोलणा

21 प्रभु यीशु ए तिन्हा बै भी बोलु, " हाँऊ जा, सा, होर तुसा हाँऊ तोपणा होर आपणे पापा न मौरणा ; जौखे हाँऊ जा सा, तौखे तूसै नी एजी सकदैं" 22 तुई पेन्धे यहूदिये बोलु, " कोईचे सौ आपू बै ता नेई मरला, जौखे हाँऊ जा सा तौखे तूसै नी एजी सकदैं " 23 प्रभु यीशुए तिन्हा बै बोलु, तूसै बुनलै सी,

हाँऊ ऊजला सा, तूसै दुनिया रै सी, हाँऊ दुनियारा नी आथी 24 तैबै मैं तुसा बै बोलु ती कि तूसै आपणे पापा न मौरणा, किबैकि अगर तूसै बशाह नी केरदैं कि हाँऊ सौए सा ता आपणे पापा न मौरणा ।" 25 तिन्हें प्रभु यीशु बै बोलु, " तू कुण सा?" प्रभु यीशुए तिन्हा बै बोलु, " सौ ए जो शुरु न तुसा बै बोलदा लागा सा । 26 तूसरै बारै न मुम्बै बौऊ किच्छ बोलणा सा पर मेरा भेजणुआ सच्चा सा, होर जो मैं तिन्हा न शुणु सा सौए दुनिया बै बोला सा ।" 27 (तिन्हें ए नी बुझू कि आसा संघे बापू रै बारे न बोला सा ।) 28 तैबै प्रभु यीशु ए बोलु, " जैबै तूसै माहणु रै बेटे बै ऊथडे पांधे चढालै, ता तुसा जाणना सा कि हाँऊ सौ ए सा, हाँऊ आपणै आपा न किच्छ नी केरदा पर जैन्डे मेरै बापुए मुम्बै सिखाऊ दा सा, तैन्डे हाँऊ ए गल्ला बोला सा । 29 मुम्बै भेजणु आला मु संघे सा, तिन्हें हाँऊ केलै नी छौडु, किबैकि हाँऊ हमेशा सौ ए केरा सा जुणी न मेरा भेजणु आ खुश होआ सा ।" 30 प्रभु यीशु ए गल्ला बोलदैं लागै ती कि बौऊ माहणुए प्रभु यीशु पांधे बशाह केरु ।

### सच्चाई तूसै आजाद केरने

31 तैबै प्रभु यीशुए जुणीए प्रभु पांधे बशाह केरु ती, तिन्हा यहूदी बै बोलु, " अगर तूसै मेरै बचना न बणीया रोहा सी, ता सच्चीए मेरै चले बणना । 32 तुसा सच्च जाणना, होर सच्चा तुसा बै अजादी देणी ।" 33 तिन्हें प्रभु यीशु बै बोलु, " आसै ता अब्राहमे रै वंशा रै सी, होर कदी भी कोई रै दास नी हुए तैवै तू केन्डे बोला सा कि तूसै अजाद होणा सा?" 34 प्रभु यीशु ए तिन्हा बै बोलु, " हाँऊ तुसा बै सच्च- सच्च बोला सा कि जो कोई पाप केरा सा सौए पापा रा दास सा । 35 नोकर हमेशा घौरा नि रौहदैं ; बेटा हमेशा रोहा सा । 36 तैबै अगर बेटा तुसा बै अजाद केरला, ता सच्चा न तुसा अजाद होणा सा । 37 हाँऊ जाणा सा कि तूसै अब्राहमे री पीढी रै सी, तैबै भी मेरा वचन तूसरै मना न जगह नी पान्धा, तैबै तूसै मुम्बै मारणा चाहा सी । 38 हाँऊ सौए बोला सा, जो आपणै बापू रै तौखे हेरु ती, होर तूसै भी सौ ए केरा सी जो तूसै आपणै बापू न शुणु सा । 39 तिन्हें प्रभु यीशु बै जवाब धिन्ना, " आसरा बापू ता अब्राहम सा ।" प्रभु यीशुए तिन्हा बै बोलु, अगर तूसै अब्राहमे रै शौहरु होंदे, तैबै अब्राहमे रै बरबरा रै बराबर कौम केरदैं । 40 पर एबै तूसै मुं जैही माहणु बै मारणा चाहा सी, जुणीए तुसा बै सच्चा रा वचन दसु जो परमेश्वरा न शुणु, एण्डा ता अब्राहमे नी केरु ती । 41 तूसै आपणे बापू रै बराबर कौम केरा सी ।" तिन्हें प्रभु यीशु बै बोलु आसै व्यभिचारा न पैदा नेई हुए सी, आसरा ऐके बापू सा मतलब परमेश्वर । 42 प्रभु यीशुए तिन्हा बै बोलु, " अगर परमेश्वर तुसरा बापू होन्दा ता तुसा मुं संघे झूरी डाहणी ती; किबैकि हाँऊ परमेशवरै री धीरै न आऊ सा । हाँऊ आपूए नी आऊ सा, पर तिन्हें हाँऊ भेजू सा । 43 तूसै मेरी गल्ला किबै नेई बूझदैं? किबैकि तूसै मेरे वचन शुणी नेई सकदैं । 44 तूसै आपणै बापू शैताना री धीरै न सी, होर आपणै बापू री लालसा बै पूरा केरणा चाहा सी, सौ ता पहलै न औरै मारणु आळा सा होर सच्चा पांधे नी टिकू, किबैकि सच्च तेईन नेई आथी । जैबै सौ झूठ बोला सा, ता आपणै बिचारा संघे बोला सा, किबैकि सौ झूठा सा, मतलब झूठा रा बापू सा । 45 पर हाँऊ जे सच्च बोला सा, तैबै तूसै मेरा बशाह नी केरदैं । 46 तुसा मोन्झे कुण मुम्बै पापी ठहरा सा? अगर हाँऊ सच्च बोला सा, ता तूसै मेरा बशाह किबै नी केरदैं? 47 . जे परमेश्वरा न होआ सा, सौ परमेशवरै री गल्ला शुणा सा; होर तूसै तैबै नी शुणदैं कि परमेशवरै री धीरै न नेई आथी ।"

### यीशु होर अब्राहम

48 ए शुणीया यहूदीये प्रभु यीशु बै बोलु, " कि आसे ठीक नेई बोल्दैं लागै सी कि तू सामरी सा, होर तौ न बुरी आत्मा सा? होर ता होर तौ न बुरी आत्मा भी सा । 49 प्रभु यीशुए जवाब धिन्ना, " मुं ना बुरी आत्मा नेई आथी, पर हाँऊ आपणै बापू रा आदर केरा सा । 50 पर हाँऊ आपणी महिमा नेई चाँहदा, हाँ पर एक सा जो चाहा सा होर न्याय केरा सा । 51 हाँऊ तुसा बै सच्च- सच्च बोला सा अगर कोई माहणु मेरे वचना पांधे चला सा, ता तेई बै हमेशे री तक मौऊत भी नेई हेरणी । 52 यहूदिये प्रभु यीशु बै बोलु, " एबै आसै जाणु कि तौ न बुरी आत्मा सा, अब्राहम मौरुदा सा, होर भविष्यवाणी केनू आळे भी मौरै सी, होर तू बोला सा, जूण मेरे वचना पांधे चलला ता तेई हमेशा तक मौऊत

रा स्वाद नी परेखणा । 53 आसरा बापू अब्राहम ता मौरु सा कि तू तेईन भी बडा सा? होर भविष्यवाणी केरनू आळी भी मौरै सी तू आपणै आपा बै कि बुझा सा? 54 प्रभु यीशुए जबाब धिन्ना, अगर हाउं आपणी सराउती (प्रशंसा) आपुए केरनू ता, मेरी किच्छ सराउती (प्रशंसा)नी आथी, पर जो मेरी सराउती (प्रशंसा) केरनू आले मेरा बापू सा जोसा बै तुसै बोला सी कि सो तुसरा परमेश्वर सा । 55 तुसै ता सो जाणु नी, पर हाऊं तेईबै जाणा सा । अगर हाऊं बोलनू की हाऊं तेईबै नी जाणदा ता मुँ भी तुसा सैई झूठै बणना, हाऊं तेईबै जाणा सा होर तेईरै बचना पांधै चला सा । 56 तुसरा बापू अब्राहम मेरा धियाडा होणै री आशा न भोऊ खुश ती, तेइए हेरु होर खुशी मणाई । 57 यहूदिये प्रभु यीशु बै बोलु, हाजी तक तू पझा बौर्षा रा नेई तैबै भी तें अब्राहम हेरु सा? 58 प्रभु यीशुए तिन्हा बै बोलु, हाऊं तुसा बै सच-सच बोला सा, की पेहलै एतै रै की अब्राहम पैदा हुआ हाऊं ती । 59 तैबै तिन्हें प्रभु यीशु बै मारणै री तक पाथर चके, पर प्रभु यीशु घोजूईया मंदरा न निकतै ।

### जन्मा रै काणै बै होछी दान

9 जांदा घेरे प्रभु यीशु ए एक माहणु हेरु जो जन्मा न काणा ती । 2 प्रभु यीशु रै चेलै प्रभु यीशु न पुच्छु, “ओ गुरु जी कुणीए पाप केरु ती कि ए काणा पैदा हुआ, ऐई माहणुए या ऐईरै आमा बापूए? 3 प्रभु यीशु ए जबाब धिन्ना, “ना ता ऐईये पाप केरु सा, ना ता ऐईरै आमा बापुए, पर ए तैबै हुआ सा कि परमेश्वरा रा कौम ऐई पांधे प्रकट होणा ती । 4 जूणीए हाँऊ भेजू सा, आसा बै तेईरै कौम धियाडी -धियाडी न केरणे जरूरी सी, सौ रात ऐणु आई सा, जूणी न कोई कौम नी केरी सकदा । 5 जैबै तक हाँऊ दुनिया न सा, तैबै तक दुनिया रा प्यशा सा । 6 ए बोलिया प्रभु यीशु ए धौरती पांधे थुकू, होर सौ माटा थुका लाईया शौगु होर सौ माटा तेई काणै री ओच्छी पांधे लाईया । 7 तेईबै बोलु, “जा शिलोह रे कुंडा न धो” (शिलोह रा मतलब सा भेजू होन्दा सा ) । तेईये जाईया धोऊ होर हेरदा हुआ बापस आऊ । 8 तैबै पडोसी होर जूणीए पैहले भीख माँगा हेरु ती, बोलदै लागे कि ए ता सौ नी आथी “ जो बेशिया भीख माँगा केरा ती?” 9 किच्छ लोके बोलु, “सौए सा,” दूजे बोलु, ‘नेई, पर तैइरै बराबर सा ।’ तैइए ए बोलु “ हाँऊ सौए सा ।” 10 तैबै ते तेई न पुच्छे लागै, “ तेरी ओच्छी कैंडी तेरै खुली?” 11 तेईए जबाब धिन्ना, “ यीशु नाँ रा एक माहणु ए माटा सिन्हा केरिया लेऊ होर मेरी ओच्छी पांधे लाईया मुन्बे बोलु, शिलोहा ना जाईया धो, तैबै हाँऊ नौटा होर धोऊ होर हेरदा लागे ।” 12 तिन्हें तेईना पुच्छु, “ सौ कोखे सा?” तेईये बोलु हाँऊ नेई जाणदा ।”

### फरीसी द्वारा चंगाई री जाँच-पड़ताल

13 माहणु तैईबै जो पेहलै काणा ती फरिसिए आगे बै नेऊ । 14 जूणी धियाडे प्रभु यीशु ए माटे शोगिया तेईरी ओच्छी खोली ती, सौ रामा रा धियाडा खोलू ती । 15 तैबै फरिसी भी तेईन पुच्छे लागै कि तेईरी ओच्छी कैंडी तेरै खुली । तेईये तिन्हा बै बोलु, “ तेईये मेरी ओच्छी पांधे माटा लाऊ, फिरि मैं ओच्छी धोई होर ऐबै हाँऊ हेरदा लागे सा । 16 ऐसा गल्ला पांधे किच्छ फरीसी बोलदै लागै । ए माहणु परमेश्वरा री धीरे न नेई, किबैकि ए रामा रा धियाडा नेई मन्दा ।” दूजे बोलु, “ पापी माहणु ऐन्डे चमत्कार केडे रीहाई सका सा?” तैबै तिन्हा न दरार पौडी । 17 तिन्हें तैई काणै बै भी बोलु, “ तेईये तेरी ओच्छी खोली सा । तू तेईरै बारै न कि बोला सा? तेईये बोलु, “ सौ भविष्यवाणी केरनू आळा सा?” 18 पर यहूदी बै बशाह नी हुआ की सो काणा ती, होर ऐबै हेरा सा, जाँ तक तेई रै आमा बापु, जूणी री ओच्छी खुली ती, शधाए । 19 तिन्हा न पुच्छु, “ कि ए तूसारा बेटा सा, जूणी बै तूसै बोला सी कि ए जन्मा न काणा ती? फिरि ऐबे ए कैंडा हेरा सा? 20 तेईरै आमा बापु बोलु, “ आसे ता जाणा सी कि ए आसरा बेटा सा, होर जन्मा न काणा ती? ऐबे ए कैंडा हेरा सा? 21 पर आसे ए नेई जाणदै कि कुणीए ऐईरी ओच्छी खोली । सौ सियाणा सा, तेईन पूच्छा, सौ आपणे बारै न आपुए दसला । 22 ए गल्ला तेईरै आमा बापुए तैबै बोली, किबै कि ते यहूदिये न डौरा ती, किबैकि यहूदि एक मने रै हुए ती कि अगर कोई बोलला कि सौ मसीह सा ता आराधनालया न खोलीणा सा । 23 ऐई कारणे तेईरै आमा बापुए बोलु, सौ सियाणा सा, तेई न पूच्छा ।” 24 तैबै तिन्हें

सौ माहू दूजी घेरे शधाईया तेईबै बोलु, “परमेश्वरै री महिमा केर । आसे ता जाणा सी कि सौ माहणु पापी सा ।” 25 तेईये बोलु, “ हाँऊ नी जाणदा कि सौ पापी सा कि नेई ; हाँऊ ता एक गल जाणा सा, कि हाँऊ काणा ती होर ऐबे हेरा सा ।” 26 तिन्हें तेईबै बोलु, तेईए तौ संघे कि केरु? होर कैंडी धीरै तेरी ओच्छी खोली?” 27 तेईए तिन्हा बै बोलु, मैं ता तुसा बै दसु ती, होर तूसै नेई शूणु, ऐबे दूजी घेरे किबे शूणना चाहा सी? कि तूसै भी तेईरै चले बणना चाहा सी?” 28 तैबै ते तेईबै बुरा भला बोलदै लागै, “ तू तेईरा चेला सा, आसे ता मूसा रै चले सी । 29 आसे जाणा सी कि परमेश्वरै मूसा संघे गल्ला केरी पर एई बै नेई जाणदै कि ए कौखला सा ।” 30 तेईए तिन्हा बै जवाब धिन्ना, ए ता नोखी गल्ला सा कि तूसै नेई जाणदै कि सौ कौखला सा, तैबै भी तेईए मेरी ओच्छी खोली धिन्नी । 31 आसे जाणा सी कि परमेश्वर पापी री नेई शुणदा पर अगर कोई परमेश्वरा रा भक्त सा होर तेईरी इच्छा पांधे चला सा, ता सौ तेईरी शुणा सा । 32 आसे जाणा सी कि परमेश्वरै मूसा संघे गल्ला केरी पर एई बै नेई जाणदै कि ए कौखला सा ।” 33 अगर ए माहणु परमेश्वरै री धीरै न नेई होन्दा ता किच्छ भी नेई केरी सका ती ।” 34 तिन्हें तेईबै बोलु, तू ता पूरा पापा न जन्मुदा सा, तू आसा बै किबै सिखा सा? होर तिन्हें सौ बाहरै खोलु ।

### आत्मिक अंधापन

35 प्रभु यीशुए शुणु कि, तिन्हें सौ बाहरै खोलु सा, होर जेबै तेई संघे प्रभु यीशु मिलै ता बोलु, कि तू परमेश्वरै रै बेटे पांधे बशाह केरा सा? 36 तेईए उतर धिन्ना, ओ गुरु सौ कुण सा कि हाँऊ तेई पांधे बशाह केरनू? 37 प्रभु यीशुए तेईबै बोलु, तैं सौ हेरु सा होर जूण तौ संघे दूणीदा लागे सौ सौए सा । 38 तेईए बोलु, “ ओ गुरु जी, हाँऊ बशाह केरा सा” होर तेईए नमस्कार केरु । 39 तैबै प्रभु यीशु ए बोलु, “ हाँऊ येसा दुनिया रा न्याय केने री तक आऊ सा, ताकि जो नेई हेरदै ते हेरले, होर जो हेरा सी ते काणे होलै । 40 जो फरिसि तेई संघे ती, तिन्हें ए गल्ला शुणीया तेईबै बोलु, “ कि आसे भी काणे सी?” 41 यीशुए तिन्हा बै बोलु, “अगर तूसै काणे होदै ता पापी नेई होदै, पर ऐबै बोला सी कि आसे हेरा सी तैबै तुसरा पाप बणीया रौहा सा ।

### पुआल होर भेड़ा रा उदाहरण

10 हाँऊ तुसा बै सच-सच बोला सा कि जो कोई दरुआजे न भेड़े रै खुडा बै नी जान्दा, पर कोई होरि रस्तै जा सा, सौ चोर होर डाकू सा । 2 पर जो कोई दरुआजे न आन्दरै बै जा सा सौ भेड़ा रा पुआल सा । 3 तेईरी तक दरुआजे रै पौहरी दरुआजा खोला सी, होर भेड़ा तेईरी छेड़ शुणा सी, होर सो आपणी भेड़ा बै नाँ लेईया शधा सा, होर बाहरै बै नेआ सा । 4 जैबै सो आपणी सारी भेड़ा बै बाहरै खोला सा, ता भेड़े रै आगे-आगे होंडा सा, होर भेड़ा तेईरै पिछै-पिछै होंडा सी, किबैकि ते तेईरी छेड़ा बै पच्छियाणा सी । 5 पर तै पाखलै रै पीछे नेई जान्दी पर तेईन दूर भगा सी, किबैकी ते पाखलै री छेड़ नी पच्छियाणदी ।” 6 प्रभु यीशुए तिन्हा बै ए उदाहरण दसु, पर तिन्हें नी बुझू कि ए कि गल्ला सी जे सो आसा बै बोलदा लागे सा ।

### यीशु शोभला पुआल सा

7 तैबै प्रभु यीशुए तिन्हा बै बोलु, “हाँऊ तुसा बै सच-सच बोला सा, भेड़ा रा दरुआजा (दवार) हाँऊ सा ।” 8 जेतैरै मुं न पैहलै आए ती ते सारै चोर होर डाकू ती, पर भेड़े तिनरी नेई शुणी । 9 दरुआजा हाँऊ सा, अगर कोई मुं न होईया, आन्दरै बै जाला ता तेई उद्धार पाणा, होर जो आन्दरै बाहरै औन्डदा-फिरदा रोहला होर तेई चारा पाणा । 10 चोर कोई होर कौमे री तक नी ऐन्दा पर चोरी केरने री तक होर मारणै री तक ऐजा सा, हाँऊ तैबै आऊ कि ते जीवन पालै होर बाँऊ न बाँऊ पालै । 11 शोभला पुआल हाँऊ सा, शोभला पुआल आपणी भेड़े री तक आपणी जान भी देआ सा । 12 नोकर जो ना ता पुआल आथी होर ना भेड़ा रा मालक आथी, सौ भेड़िए बै ऐन्दा हेरा सा होर भेड़ा बै छोड़ीया भगा सा होर भेड़ीया तिन्हा भेड़ा बै ढौका सा होर लग-लग केरा सा । 13 सौ तैबै भगा सा किबैकी सौ नोकर सा, होर तेइबै भेड़े री फिक्र नेई आथी । 14 शोभला पुआल हाँऊ सा, जेण्डा बापू मुन्बै जाणा सा, तेंण्डा हाँऊ भी बापू बै जाणा सा । 15 ऐन्डी तरहे हाँऊ आपणी भेड़ा बै जाणा सा,

होर मेरी भेड़ा मुम्बे जाणा सी, होर हाँऊ भेड़ा री तक आपणी जान देआ सा । 16 मेरी होर भी भेड़ा सीजो ऐई भेड़शाला नेई आथी मुम्बे तिन्हा बै भी शाधणा जरूरी सा । तिन्हें मेरी हाक्का शुणनी, तैबै एके झुण्ड होर एके पुआल होणा । 17 बापु मुं संघे तैबै झूरी डाहा सी, किबेकी हाँऊ आपणी जान देआ सा कि सौ मुं भी बापस लेणी । 18 कोई तेई बै मुं ना नेई छुड़ांदा, पर हाँऊ तेई बै आपुए देआ सा । मुम्बे जान देणे रा भी हक्क सा होर लेणे रा भी हक्क सा ऐ आझा मुम्बे मेरे बापु न मिली सा । 19 ईना गल्ला री बजह न यहूदिये न भी दरार पौड़ी । 20 तिन्हा न बौऊरे बोलदे लागे “ तेईन बुरी आत्मा सा, होर सौ पागल सा तेईरी किबै शूणा सा? ” 21 होरि माणुए बोलु, “ ऐ गल्ला ऐन्डे माहणु री नेई जूणी न बुरी आत्मा सा । कि बुरी आत्मा काणे री ओच्छी खोली सका सा? ”

### यहूदी रा वशाह नेई केरना

22 यरुश्लेमा न स्थापना केरने री जाच मणान्दे लागै ती, होर ठंडे (शेळे) रा मौसम ती, 23 प्रभु यीशु मंदरा न सूलेमाने री चाऊड़ी (कमर) ना फिरदै लागै ती 24 तैबै यहूदीये प्रभु यीशु घेरू होर पुच्छु, “ तू आसारै मना बै कैबै तक दुविधा न डाहला? अगर तू मसीह सा ता आसा बै सिधे – सिधे दस । 25 प्रभु यीशुए तिन्हा बै उतर धिन्ना, “ में तुसा बै दसु सा पर तूसै बशाह केरदै नी । जूणा कौम हाँऊ आपणे बापु रै नाँ न केरा सा, सौऐ मेरे गवाह सी, 26 पर तूसै तैबै बशाह नी केरदै किबैकि मेरी भेड़ा मोंझे न नेई आथी 27 मेरी भेड़ा मेरी छेड़ शूणा सी, हाँऊ तिन्हा बै जाणा सा, होर ते मेरे पिच्छे- पिच्छे हाँडा सी । 28 होर हाँऊ तिन्हा बै हमेशा रा जीवन देआ सा । तिन्हा कदी भी नाश नेई होणा, होर कोई तिन्हा बै मेरे हौथान् न छड़ाई नी सकदा । 29 मेरा बापु जुणीए ते मुम्बे धिन्नी सी, सेभी न बडा सा होर कोई तिन्हा बै बापु रै हौथा न छड़ाई नी सकदा । 30 हाँऊ होर बापु ऐके सी । 31 ३ १. यहूदियै प्रभु यीशु पांधे पात्थरै लाईया बाहणे री तक भी पात्थर चक्के । 32 एता पंधे पभु यिशुए तिन्हा बै बोलु, “ में तुसा बै आपणे आपु री धीरै न बौऊ शौभलै कौम रिहाए सी, तिन्हा न कुणी जेही कौमें री तक तूसै मुं पांधे पात्थरै लाईया बाहा सी? ” 33 यहूदियै प्रभु यीशु बै बोलु शौभलै कौमें री तक आसै तौभै नी मारदै, पर परमेश्वर री निन्दा रै कारण, होर तैबै की तू माहणु होईया आपणे आपा बै परमेश्वर बोला सा । 34 प्रभु यिशुए तिन्हा बै जबाब धिन्ना, “ किबै तुसारे कनुना न नेई लिखू सा, मैं बोलु तू ईश्वर सा? 35 अगर तेईये तिन्हा बै ईश्वर बोलु, “ जुणी आगै परमेश्वर रा वचन पुजू सा (होर पवित्र शास्त्र री गल्ला गलत नेई होई सकदी) 36 ता जो बापुए पवित्र बणाईया दुनिया न भेजू सा तूसै तेईबै बोला सी कि, तू निन्दा केरा सा, किबैकि मैं बोलु, “ हाँऊ परमेश्वर रा बेटा सा? 37 अगर हाँऊ आपणे बापु रा कौम नेई केरणु ता मेरा बशाह मता केरदै । 38 पर अगर हाँऊ केरा सा, ता चाहे मेरा बशाह मता केरा पर तिन्हा कौमा रा ता बशाह केरा, तैबै तूसै जाणलै होर समझलै कि बापु मुं न सा, होर हाँऊ बापु न सा? 39 तैबै तिन्हें फिरि प्रभु यीशु बै ढोकणे री कोशिश केरी पर सौ तिन्हा रै होथा न नेई आऊ । 40 तैबै प्रभु यरदनै रै पारै तेसा जगहा पांधे नौठे जौखे यूहन्ना पहलै बपतिस्मा देआ केरा ती, होर तौखे रोहे । 41 बौऊ माहणु प्रभु यीशु आगै बै एजीया बोलदै लागे, “ युहन्ने ता कोई भी नशाण नेई रिहाऊ, पर जो किच्छ युहन्ने इन्हा रै बारै न बोलु ती, सौ सेभ किच्छ सच ती । 42 होर तौखे बौऊ माहणुए प्रभु यीशु पांधे बशाह केरु । ”

### लाजरा री मौऊत

11 मरियम होर तेसरी बेहण मार्था रै ग्राँ न बैतनिय्याह रा लाजर नाँ रा एक माहणु बमार ती । 2 ऐ सौ ऐ मरियम ती जुणीए प्रभु पांधे शोभली बास आळी चीज पेरिया, प्रभु यीशु रै जौघा न आपणे चौडे लाईया टुशु ती, तेसा रा भाई लाजर बमार ती । 3 तैबै तेसरी बेहणे तिन्हा बै समद भेजू, “ओ प्रभु हेर, जुणी संघे तू झूरी डाहा सा, सौ बमार सा । ” 4 ऐ शूणीया प्रभु यीशुए बोलु, “ ऐ बमारी री मौऊत नेई पर परमेश्वर रै बेटे महिमा री तक सा, ता तेईरै जरि ए परमेश्वर रै बेटे शौहरू री महिमा होली । 5 प्रभु यीशु, मार्था होर तेसरी बेहण होर लाजरा संघे झूरी डाहा ती । 6. तैबै भी जैबै प्रभु यिशुए शूणु कि बमार सा, ता जुणी जगहा पांधे सौ ती, तौखे दुई रोज होर रुके 7 तेता (तूई) न बाद प्रभु यिशुए चले बै बोलु, “ एजा आसा होरी घेरे यहूदिया बै

जाणा । 8 चले प्रभु यीशु बै बोलु, ओ गुरु ऐबे ता यहूदी तुसा पांधे पत्थरै लाईया बाहणा चाहा ती, होर कि तूसै फिरि तौखे बै जाणा सा? 9 प्रभु यीशुए(जवाब )उतर धिन्ना, “ कि धियाडी रै बाराह घंटे नी होदै? अगर कोई धयाडी चौला सा ता ठोकर नेई खांदा, किबैकि दुनिया रा पियाशा हेरा सा । 10 पर अगर कोई निव्यारै न चला सा ठोकर खा सा, किबैकी तेईन पिव्याशा नेई अथी । 11 प्रभु यीशुए ऐ गल्ला बोली होर तुई न बाद तिन्हा बै बोलदै लागै, आसरा संघी लाजर सुता सा, होऊँ तेईबै जगाणै री तक चौलु सा । 12 तैबै चले प्रभु यीशु बै बोलु, “ओ गुरु अगर सौ सुता सा, ता ठीक होणा । ” 13 प्रभु यीशुए ता तेईरी मौउती रै बारै न बोलु ती, पर तिन्हा समझू की तिन्हे निंजा न सोणे रै बारै न बोलु 14 तैबै प्रभु यीशुए तिन्हा बै साफ-साफ बोलु, “लाजर मुँआ सा; 15 होर हाँऊ तुसरी वजह न खुश सा की हाँऊ तौखे नी ती आथी जूणीन तुसै बशाह केरलै । पर ऐबै एजा आसा तेई आगै बै जाणा । 16 तैबै थोमा जो दिदमुस बोलिया ती, आपणे संघी चले बै बोलु, “एजा, आसा भी इन्हा संघे मोरणै री तक जाणा । ”

### यीशु रा जिन्दा होणा होर जिन्दगी

17 तौखे पुजिया प्रभु यीशु बै पता लागा की लाजरा बै कब्र न डाईया चार रोज हुए सी । 18 बैतनिय्याह यरुशलेमा रे नेड़ कोई दुई मीले री दुरी पांधे ती । 19 बौऊरे यहूदी मार्था होर मरियम रे नेड़ तेसरै भाई री मौऊती पांधे शान्ति देणै री तक आए ती । 20 जेबे मार्थे प्रभु यीशु रै ऐणे री खबर शूणी ता तिन्हा संघे मिलणे री तक नौठी, पर मरियम घौरा बेशिया रौही । 21 मार्थे प्रभु यीशु बै बोलु, ओ प्रभु अगर तूसै ओखे होन्दे ता, मेरे भाई कदी नी ती मोरणा । 22. होर ऐबै हाँऊ भी जाणा सा कि जो किच्छ तूसै परमेश्वर न मोंगलै, परमेश्वर तुसा बै देणा । 23 प्रभु यीशु ऐ तेसा बै बोलु, “ तेरा भाई जी उठणा सा । ” 24 मार्थे प्रभु बै बोलु, हाँऊ जाणा सा कि अंतिम रोजा न होरि घेरे जीणे री तक रै बौक्ता ना जी ऊठणा । 25 प्रभु यीशु ऐ तिन्हा बै बोलु, होरि घेरे जीणा होर जीवन हाँऊ सा, जो कोई मुं पांधे बशाह केरा सा अगर सौ मोरला भी ता तैबै भी तेई जीणा, 26 होर जो कोई जिन्दा सा मुं पांधे बशाह केरा सा तेई हमेशा री तक नेई मोरणा कि तू ऐई गल्ला पांधे बशाह केरा सा? ” 27 तेसै प्रभु बै बोलु, “ हाँ, हे प्रभु, हाँऊ बशाह केरा सा कि परमेश्वर रा बेटा मसीह जो दुनिया न ऐणु आळा ती, सौ तूसै सी । ”

### यीशु रुणु

28 ऐ बोलिया सौ नौठी, होर आपणी बेहण मरियम शधाई होर चुपचाप बोलु, “ गुरु ओखे सी होर तुसा बै शधान्दा लागु सा । ” 29. ऐ शुणदै सौ फट उठी होर प्रभु यीशु आगै बै नौठी । 30 यीशु हाजी ग्राँ न भी नेई पुजू ती पर सौए जैगहा ती जौखे आत्मा तेई संघे मिली ती । 31 तैबै जो यहूदी तेसा संघे घौरा न ती होर तेसा बै बशाह देन्दे लागै ती ऐ हेरिया कि मरियम फट ऊठीया बाहरै बै नौठी सा ऐ समझू कि सौ कब्र आगै बै रोणे री तक चौली सा, ता तेसरै पिच्छे न नौठे । 32 जेबे मरियम तौखे पूजी जौखे प्रभु ती ता तिन्हा बै हेरिया प्रभु यीशु रै जौघा पांधे पौडी, होर बोलु, “ ओ गुरु अगर तूसै ओखे होदै ता मेरा भाई नि ती मोरणा । ” 33 जेबै प्रभु यीशु होर तिन्हा संघे यहूदीये जो तिन्हा संघे आए ती रोदै हेरे ता प्रभु यीशु आत्मा न होर भी बौऊ दुखी हुए, होर( उताबलै )उदास हुए, 34 होर बोलु, “ तूसै सौ कौखे डाऊ सा? तिन्हें प्रभु यीशु बै बोलु, “ ओ गुरु चौलिया हेरी लेआ । ” 35 प्रभु यीशु रुणै । 36 तैबै यहूदी बोलदै लागै, “ हेरा सौ तेई संघे केतरी झूरी डाआ सा । ” 37 पर तिन्हा मोंझे किच्छ बोलदै लागै, “ कि ऐ सौए सा जुणीए काणे री ओच्छी खोली, एंडा भी नी केरी सकू कि ये माहणु नी मोरदा? ”

### लाजरा रा जिन्दा होणा

38 प्रभु यीशु मना न भी बौऊ दुखी होईया कब्र पांधे आऊ, सौ एक गुफा ती होर एक पात्थर तुई पांधे रखु ती । 39. प्रभु यीशुए बोलु, “ पात्थरा बै फेटे केरा । ” तेई मोरै होन्दे री बेहण मार्था प्रभु यीशु बै बोलदी लागी, “ ओ गुरु ऐता न ता ऐबे गंदी बास ऐजा सा, किबैकि तेईबै मोरिया चार रोज हुए सी । ” 40 प्रभु यीशु ऐ तेसा बै बोलु, “ कि मैं तुसा बै नी ती बोलु कि अगर तू बशाह केरली,

ता परमेश्वरै री महिमा हेरणी ।" 41 तैबै तिन्हें सौ पात्थर फेटे केरु । प्रभु यीशुए झाऊ हेरिया बोलु, " ओ बापू हाँऊ तेरा धन्याबाद केरा सा कि तूसै मेरी शुणी सी । 42 हाँऊ जाणा सा कि तूसै हमंशा मेरी शुणा सी पर जो भीड़ ओरै -पारै खड़ी सी तिन्हरी बजहा संघे में ऐ बोलु, जुणी संघे की बशाह केरलै कि तूसै हाँऊ भेजू सा ।" 43 ऐ बोलिया प्रभु यीशु ऐ, बडी जोरा संघे बोलु, " ओ लाजर, बाहरै ऐज ।" 44 जे मुआ ती, सौ टौले संघे हौथ जौघा बौनु हौन्दा बाहरै निकतु, होर तेईरा मुँ अन्नाच्छे संघे पलेटू होन्दा ती, प्रभु यीशु तिन्हा बै बोलु, " ऐइबै खोला होर जाणे देआ ।"

### यीशु बै मकाणै री योजना

45 तैबै जो यहूदी मरियम आगै बै आए ती, होर प्रभु यीशु रा कौम हेरु ती, तिन्हा न बौऊए बशाह केरु । 46 पर तिन्हा न कोइए फरीसी आगै जाइया प्रभु यीशु रै कौमा रा समाचार धिन्ना । 47 इना गल्ला न प्रधान, याजक (बड़े-बड़े लोका)फरीसीये बडी सभा शधाई होर बोलु, " आसे कि केरा सी? ऐ माहणु ता बौऊ नशाण रिहा सा । 48 अगर आसै तेईबै ऐन्डे छोड़ी देले, ता सेभी तेई पांधे बशाह आणना सा, होर रोमी ऐजिया आसरी जगहा होर जाति, दुई पांधे आपणा अधिकार केरणा सा ।" 49 तैबै तिन्हा न काइफा नाँ रै एकी माहणुए जो तेई बौषा रा महायाजक ती तिन्हा बै बोलु तुसे किच्छ भी नी जाणदै, 50 होर ऐ नेई समझदै कि तुसरी तक ऐ खरा सा कि आसरे माहणु री तक एक माहणु मोरला, होर सारी जाति खत्म( नाश) नेई होली । 51 ऐ गल्ला तेईये आपू धीरै न नेई बोली, पर तेसा बौषा रा बड़ा याजक होइया भविष्यवाणी केरी, कि प्रभु यीशु तेसा जाति री तक मौरणा ; 52 होर न तेसा जाति री तक, पर तैबै भी कि परमेश्वरै रै आंगी-आंगी हुएंदे (तितर-बितर सन्तान) सेभ बेटे एक केरी देला । 53 तैबै तेसा रोजा न ते तेईबै मारणे री योजना (स्कीम) बणान्दे लागै 54 तैबै प्रभु यीशु तेई बौक्ता न होर यहूदी रै सामने नेई फिरु ; पर तौखे न बौणा रै नेड देशा न इफ्राइम नाँ रै एक नगरा बै नौठे, होर आपणे चले संघे तौखे रौहदै लागै । 55 यहूदीये री फसलै री जाच (साजा) नेड ती, होर बौऊ लोका फसह रै पेहले रोजा न यरुशेमा बै नौठे कि आपणे आपा बै साफ केरलै । 56 तैबै ते प्रभु यीशु बै तोपदै लागै, होर मंदरा न खडे होईया आपू न बोलदै लागे, " तूसै कि सोचा सी? कि तेई जाचा(साजा) न नेई ऐणा । 57 प्रधान होर यजकै होर फरीसीये ये आज्ञा धिन्नी ती कि अगर कोई ऐ जाणलै कि यीशु कौखे सा ता दसलै, फिरि तेईबै ढोकै ।

### यीशु री जौघा न इत्र पाणा

12 यीशु फसलै री जाचा रै छौ रोज पहलै बैतनिय्याह आऊ जौखे लाजर ती, जो प्रभु यीशुए मौरु होन्दे न जिन्दा केरु ती । 2 तौखे तिन्हें प्रभु यीशु री तक रोटी तियार केरी ति, होर मार्था सेवा केरदी लागी ती होर लाजर तिन्हा न एक ती जो प्रभु यीशु संघे रोटी खाणे री तक बेटा ती । 3 तैबै मरियम जटा मांसी रा औधा सर बौऊ मंहगी शोभली बासी आळी चीज आणिया प्रभु यीशु रै जौघा पांधे पेरी होर चौड़े लाइया जौघ साफ केरी होर तेसा शोभली बासी संघे पूरा घौरा शोभली बासी संघे भौरुआ । 4 पर प्रभु रै चले न यहूदा इस्करियोती नाँ रा एक चेला जो प्रभु यीशु जूणीए ढौकणे धियाऊ ती, बोलदा लागा 5 ऐ शोभली बासी आळी चीज त्राई शौऊ दिनारै न बचिया गरीबा बै किबै नेई धिन्नी?" 6 तेईए ऐ गल तैबै नेई बोली कि तेईबै गरीबै(कंगालै ) री फिकर ती, पर तैबै कई सौ चोर ती, होर तेई आगै तिन्हरी थैइली रोहा ती होर तेता न जो किच्छ भौरा ती, सौ तेसा थैइली न खोला ती । 7 प्रभु यीशुए बोलु, " ऐईबै रौहणे देआ ऐईबै मेरे पौथणे रै रोजा री तक रौहणे देआ 8 किबैकि कंगाल जो तुसा संघे सदा रौहणा सा, पर मुँ तुसा संघे सदा नेई रौहणा ।"

### लाजरा बै मकाणै री योजना

9 जैबै यहूदीये री बडी भिडे जाणु कि सौ तौखे सा, ता ते ना तैबै कि प्रभु यीशु री बजह संघे आए पर तैबै भी कि लाजरा बै हेरलै, जूण प्रभु यीशुए मौरु होन्दे न जिन्दा केरु ती । 10 तैबै प्रधान याजकै ; लजरा बै मारणे री तक

स्कीम बणाई । 11 किबैकि तेईरी बजह न बौऊ यहूदी नौठे होर प्रभु यीशु पांधे बशाह केरु ।

### यरुशलेमा न जीत

12 दूजे रोज बौऊ माहणुए जो जाचा न आए ए शूणीया कि प्रभु यीशु यरुशेमा न ऐन्डे लागै सी । 13 तैबै तिन्हें खजूरै री शाणी आणी होर प्रभु यीशु संघे मिलणे री तक निकतै, होर जौरै संघे बोल्दै लागै, " होशाना ! धन्य इस्राएला रा राजा, जो प्रभु रै नाँ न एजा सा ।" 14 जैबै प्रभु यीशु बै गधे रा बच्चा मिलु ता तेई पांधे बेटू, जैडा लिखुन्दा ती, 15 ओ सिख्योना री बेटा मत डौर ; होर, तेरा राजा गधे रै बच्चे (शौहरु ) पांधे चढीया ऐन्दा लागा सा ।" 16 प्रभु यीशु रै चले ऐ गल्ला पेहलै नेई समझी(बुझी) ती, पर जैबै प्रभु यीशु री महिमा सामणे हेरी ता तिन्हा बै याद आई कि ऐ गल्ला प्रभु यीशु रै बारै न लिखी होंदी ती, होर माहणुए तेई संघे तेन्डी रीति रा बरताव केरु ती । 17 तैबै माहणु री भिडा न तिन्हें माहणुए गवाई धिन्नी, जो तेई बौक्ता न तौखे ती जैबै प्रभु यीशुए लाजरा बै कब्र न शधाइया मौरु होन्दे न जिन्दा केरु ती । 18 ऐई बजह न लोका प्रभु यीशु संघे मिलणे बै आए ती, किबैकि तिन्हें शुणु ती कि प्रभु यीशुए नौखे कौम रीहाए सी, 19 तैबै फरीसीये आपू न बोलु, " सोचा ऐ कि तूसा रै बोलै किच्छ नि होंदा । हेरा, दुनिया तेईरै पीछे होन्दी लागी सा ।"

### यूनानी रा यीशु बै तोपणा

20 जो लोका तेस जाचा न आराधना केरने री तक आए ती तिन्हा न किच्छ यूनानी ती । 21 तिन्हें गलीलै रै बैतसेदा रै रोहणु आळे फिलिप्पुसा आगै एजीया अर्जा केरी, " गुरु जी आसे प्रभु यीशु संघे मीलणा चाहा सी ।" 22 फिलिप्पुसे एजिया आंद्रियासा बै बोलु, तैबै आंद्रियास होर फिलिप्पुस ऐ जाइया प्रभुबै बोलु । 23 तैबै प्रभु यीशु तिन्हा बै बोलु, " सौ बौक्त आऊ सा, कि माहणु रै बेटे री महिमा होली । 24 हाँऊ तुसा बै सच-सच बोला सा कि जाँ तक गहूरा दाणा धोरती न पौडीया मौरदा नेई सौ केलाए रौहा सा, पर जैबै मौरा सा ता बौऊ फौल आणा सा । 25 जो आपणी जानी संघे झूरी डाहा सा, सौ तेसा बै खोआ सा, होर जो ऐई दुनिया न आपणे प्राणा संघे झूरी नेई डाहन्दा, तेई हमेशा रै जीवनै री तक तेसरी(फाजत) रक्षा केरनी सा । 26 अगर कोई मेरी सेवा केरला, ता मेरे पिच्छे एजा, होर जौखे हाँऊ सा, तौखे मेरे नौकर भी होणा, अगर कोई मेरी सेवा केरला, ता बापू तेईरा आदर केरणा ।

### यीशु री मौऊती धीरे इशारा

27 ऐबे मेरा जीऊ परेशान सा, तैबै ऐबे मुँ कि बोलणा? ओ बापू, मुम्बे एस घड़ी बचा?" पर हाँऊ एसा बजहा संघे ऐसा घड़ी न पुजू । 28 "ओ बापू ओ बापू आपणे नाँ री महिमा केर ।" तैबै आकाशवाणी हुई, "मैं तेईरी महिमा केरीदी सा, होर भी केरनी ।" 29 तैबै जो लोका खडे होईया शुणदै लागै ती तिन्हें बोलु कि बादल गरजू । होरिये बोलु, " कोई स्वर्गदूते तेईबै बोलु, ।" 30 इन्हा गल्ला न प्रभु यीशुए बोलु, " ऐ छेड (हाक्का) मेरी तक नेई, पर तुसरी तक आई सा । 31 ऐबै ऐसा दुनिया रा न्याय होणा सा, ऐबै येई दुनिया रा सरदार खोली जाणा सा; 32 होर मुँ अगर दुनिया पांधे न ऊथडे पांधे चढाई जाणा, ता सारै आपू आगै बै खीचणे ।" 33 ऐ बोलीया प्रभु यीशुए(प्रगट) सामने केरु कि तिन्हा केंडी मौऊती मौरणा । 34 इन्हा गल्ला पांधे लोकै तिन्हा बै बोलु, " आसे कनुने री ऐ गल्ला शूणी सा, कि मसीह सदा री तक रौहणा, ऐबै तू कि बोला सा कि माहणु रा बेटा ऊथडे पांधे चढाई जाणा जरूरी सा? ऐ माहणु रा बेटा कुण सा?" 35 प्रभु यीशुए तिन्हा बै बोलु, " पियाशा ऐबे थोड़ी देरे री तक तुसरै बीचा न सा । जैबै तक पियाशा तुसा संघे सा तैबै तक औन्डदै रौहा, ऐन्डे नि लोड़ी हुआ कि निहारा तुसा बै घेरला, जो निहारै न चला सा, कि सौ नेई जाणदा कि कौखे बै जा सा । 36 जाँ तक पियाशा तुसा संघे सा, पियाशा पांधे बशाह केरा ताकि तूसै पियाशा रै सन्तान बणलै ।"

### यहूदी रा बिना बशाह रै रौहणा

ऐ गल्ला बोलिया प्रभु यीशु नौठे होर तिन्हा न घौजुइया रौहु । 37 प्रभु यीशुए तिन्हें सामने नशाण रिहाए, तैबै भी तिन्हें बशाह नेई केरु । 38 फिरि

यशयाह भविष्यद्वक्ता रा वचन पूरा होला जो बोलुदा ती, " ओ प्रभु आसरी गल्ला रा कुणीए बशाह केरु सा? होर प्रभु री शक्ति कुणी पेंधे सामणै हुई आंग बाँह कैन्डी धीरै सामन हुई । 39 तेई बजह न बशाह भी केरी स्कद, किबैकि यशयाह ऐ भी बोलु सा । 40 तेईये तिन्हरी ओच्छी काणी, होर तिन्हरा मन पक्का केरु सा कोइन्चे ऐन्डा नेई लोडी कि तै ओच्छी न हेरलै मना लाइया समझलै, होर फिरलै, होर मूँ तै ठीक करणे । " 41 यशयाह ऐ गल्ला तैबै बोली कि तेईये तिन्हरी महिमा हेरी, होर तेईऐ तिन्हरै बारै न गल्ला केरी । 42 तैबै भी अधिकारिये न बाँऊ प्रभु यीशु पांधे बशाह केरु, पर फरीसीये री बजह न सामने नी ती मनदै, कही ऐन्डा नेई लोडी हुआ कि तै तिन्हा बै आराधनालाय न खोली जालै । 43 किबैकि माहणु री धीरै न महिमा तिन्हा बै परमेशवरै री धीरै न महिमा जादा (बाँऊ) खरी लागा ती ।

### यीशु रै जरिये न्याय

44 प्रभु यीशुये जोरै संघे बोलु, जो मूँ पांधे बशाह केरा सा, सौँ मूँ पांधे नेई पर मेरे भेजणु आळे पांधे बशाह केरा सा । 45 होर जो मुम्बै हेरा सी मेरे भेजणुआए बै हेरा सा । 46 हाँऊ दुनिया न पियाशा होइया आऊ सा किबैकि जो कोई मूँ पांधे बशाह केरलै तेई नियाहरै न नेई रौहणा । 47 अगर कोई मेरी गल्ला बै नेई शूणदै, ता हाँऊ तेईबै पापी नेई बणादा किबैकि हाँऊ दुनिया बै पापी बणाणे री तक नेई पर दुनिया रा खरा केने री तक आऊ सा । 48 जो मुम्बै तुच्छ (घटिया) जाणा सा होर मेरी गल्ला बै ग्रहण नेई केरदा तेईबै पापी बणाणु आळा ता ऐके सा, पर जो वचना न मैं बोलु ती, तेईये सौँ पिछले धियाडे न सौँ पापी ठराणा । 49 किबैकी मैं आपू धीरै न गल्ला नेई केरी; पर बापू जूणीऐ हाँऊ भेजू सा तिन्हें मुम्बै आज्ञा धिन्नी सा कि, की-की दसणा होर की-की बोलणा? 50 होर हाँऊ जाणा सा की तिनरी आज्ञा न हमेशा रा जीवन सा । तैबै हाँऊ जो किच्छ बोला सा, सौँ जेन्डा बापूऐ मूँ आगै बोलु सा तैन्डाए बोला सा ।"

### यीशु रा चले री जोंघा धोणा

13 फसलै री जाचा न पहलै, जैबै प्रभु यीशु ऐ जाणु की मेरा वौक्त आऊ सा की दुनियां बै छौड़ीया बापू आगै बै जाणा, ता आपणै माहु जो दुनियां न सी जेन्डी झूरी सौँ डाआ ती अन्तै रै रोजा न तेन्डी झूरी डाहा सा । 2 जैबै शैतान शमौन रै बेटै यहूदा इस्करियोती रै मना न ऐ भौरु ती की प्रभु यीशु बै दौकणै धियाला ता रोटी रै बौकता न । 3 प्रभु यीशुऐ ऐ जाणिया कि बापूऐ सेभ किच्छ मेरै हौथा न केरु सा होर हाँऊ परमेश्वर आगै न आऊ सा, होर परमेश्वरा आगै बै जाणा सा, . 4 रोटी खाणै न उठिया आपणै उजलै टौलै खौलै, होर अंगोछा लाईया आपणा चेक्का भौनु । 5 तैबै भांडे न पाणी भौरिया चलै री झौन्घा धोणै री तक होर जो अंगोछा (गाची) चेक्के न बाँनु होन्दा ती तेई लाईया तिनरी झौन्घा टूशदा लागा । 6 जैबै प्रभु यीशु शमौन पतरसा आगै पुजू, ता पतरसै प्रभु यीशु बै बोलु, "ओ प्रभु, कि तुसै मेरी झौघाँ धोआ सी?" 7 प्रभु यीशुऐ तेईबै जवाब धिन्ना, जो हाँऊ केरा सा, तू तेईबै एबे नी जाणदा, पर एता न बाद समझणा सा ।" 8 पतरसै प्रभु यीशु बै बोलु, तुसा मेरी झौन्घा कदी भी नी धोणी सा ।" ऐ शुणीया प्रभु यीशुऐ तेईबै बोलु, अगर हाँऊ तौभे नेई धोनू ता तेरा मेरा कोई रिश्ता नेई ।" 9 शमौन पतरसै प्रभु यीशु बै बोलु, "ओ प्रभु, ता मेरी झौन्घा केली नेई, पर हौथ होर मुंडी भी धोइया दे ।" 10 प्रभु यीशुऐ तेईबै बोलु, " जुण नहाँऊदा सा तेईबै झौंघे रै सिवाए होर किच्छ धोणै री जरूरी नेई आथी, पर सौँ बिलकुल साफ सा, पर सेबी रै सेभ नेई ।" 11 प्रभु यीशु ता आपणै दौकणै धियाणु आळै बै जाणा ती तैबै तेईबै बोलु, तुसै सारै रै सारै साफ नेई आथी ।" 12 जैबै प्रभु यीशुऐ तिनरी झौन्घा धोई, होर आपणै टौलै लाईया फिरी बेशु, ता तिन्हा बै बोलुदा लागा, कि तुसै की समझू की मैं तुसा संघे की केरु? 13 तुसै मुम्बै गुरु होर प्रभु बोला सी, होर ठीक बोला सी, किबैकी हाँऊ सोए सा । 14 अगर मैं प्रभु होइया तुसरी झौन्घा धोई, ता तुसा बै भी एकी होरि री झौन्घा धोणी जरूरी सा । 15 किबैकि मैं तुसा बै नमूना रिहाऊ सा जँडा मैं तुसा संघे केरु सा . तूसै भी तँडा केरा । 16 किबैकी हाँऊ तुसा बै सच-सच बोला सा दास आपणै स्वामी न बडा नेई आथी, होर ना भेजू होन्दा आपणै भेजणु आळै न । 17 तुसै ऐ गल्ला जाणा सी

होर अगर तिन्हा पांधे चलै ता धन्य सी । 18 हाँऊ तुसा सेभी रै बारै न नेई बोली सकदा, जूणा मैं चुनै सी, तिन्हा बै हाँऊ जाणा सा, पर ऐ तैबै सा, की पवित्र काबा रा ऐ बचन पूरा होला, जो मेरी रोटी खा सा, तेइए मुँ पांधे आपणी झौंघ चकी । 19 ऐबै हाँऊ तेईरै होणे न पहलै जताईया देआ सा जैबै ऐ होला ता तैबै तुसा बशाह केरना सा कि हाँऊ सौँ ऐ सा । 20 हाँऊ तुसा बै सच- सच दसा सा, सौँ मुम्बै ग्रहण केरा सा, होर जो मुम्बै ग्रहण केरा सा, सौँ मेरे भेजणु आळै बै ग्रहण केरा सा ।"

### बशाह चोड़ने रा इशारा

21 ऐ गल्ला बोलिया प्रभु यीशु आत्मा न उताबलै होईया होर ऐ गवाई धिन्नी, हाँऊ तुसा बै सच-सच बोला सा कि तुसा मॉंझे न एकी हाँऊ दौकणे धियाणा सा ।" 22 चले शक्का न, कि प्रभु यीशु कुणी रै बारै न बोलुदा लागा सा, तै एकी होरि बै हेरदै लागै । 23 प्रभु यीशु रै चले न एकीय जूणी संघे प्रभु यीशु झूरी डाहा ती, प्रभु यीशु री छाती धिरै बै झुकू होन्दा ती । 24 शमौन पतरसै तेई धिरै भाळीया पुच्छु, " दसा ता सौँ कुणी रै बारै न बोलदा लागा सा? 25 तैबै तेईये तेन्डे प्रभु यीशु री छाती धिरै झुकिया प्रभु यीशु न पुच्छु, " ओ प्रभु सौँ कुण सा?" 26 प्रभु यीशुए जवाब धिन्ना जूणी बै ऐ रोटी रा टुकड़ा डबेई देला सौँए सा ।" होर प्रभु यीशुए टुकड़ा डबेईया शमौन इस्करियोती रै बेटे यहूदा बै धिन्ना । 27 रोटी रा टुकड़ा लेन्देआ शैतान तेईरै आन्दरै तुरु । तैबै प्रभु यीशुए तेईबै बोलु, " जो तू केरा सा, छेकै केर ।" 28 पर बेशू होन्दे न कोइए नी जाणु कि प्रभु यीशुए ऐ गल किबै बोली । 29 यहूदा आगै थैइली रौहा ती, तैबै कोई कोईये बुझू कि यीशु तिन्हा बै बोलुदा लागा सा कि जो किच्छ आसै जाचा बै लोडी तेई लेईया आण नेई ता ऐ कि-किच्छ कंगाला बै दे । 30 तैबै सौँ टुकड़ा लेईया छेकै बाहरै बै नौठा, होर ऐ राती रा बाँकू ती ।

### नऊँई आज्ञा

31 जैबै सौँ बाहरै नौठा ता प्रभु यीशुए बोलु, " ऐबे माहणु रै बेटे री महिमा हुई सा, होर परमेशवरै री महिमा तेता न हुई । 32 अगर तेता न परमेशवरै री महिमा हुई सा, ता परमेशवर भी आपू न तेईरी महिमा करनी होर, छेक्के केरणी । 33 ओ शौहरुओ हाँऊ होर थोड़ी देर तुसा संघे सा, फिरि तुसा हाँऊ तोपणा सा, होर जँडा मैं यहुदिये बै बोलूती, जौखे हाँऊ जा सा, तौखे तूसै नेई एजी सकदै, तैन्डाए हाँऊ ऐबै तुसा आगै भी बोला सा 34 हाँऊ तुसा बै एक नौऊई आज्ञा देआ सा कि एकी दूजै न झूरी डाहा, जैन्डी मैं तुसा संघे झूरी डाई सा तँडीऐ तूसै भी एकी होरी संघे झूरी डाहा ।" 35 अगर आपू न झूरी डाहलै ता, ऐता न सेभी जाणना सा कि तूसै मेरे चले सी ।"

### पतरसा रा इनकार केरने रा इशारा

36 शमौन पतरसै पत्रसै प्रभु यीशु बै बोलू ओ प्रभु तूसै कोखे बै चौले सी?" प्रभु यीशुए जवाब धिन्ना " जौखे हाँऊ जा सा तौखे तूसै ऐबे मेरे पिच्छे नेई एजी सकदै, पर ऐता न बाद मेरे पीछे ऐणा ।" 37 पतरसै प्रभु यीशु बै बोलु, "ओ गुरु ऐबै हाँऊ तेरे पीछे किबै नेई एजी सकदा? मुँ ता तेरी तक आपणी जान भी देणी ।" 38 प्रभु यीशुए जवाब धिन्ना, " कि तौ मेरी तक आपणी जान देणी? हाँऊ तौबै सच- सच बोलदा लागा सा कि जाँ तक मुगाँ नेई बाशणा जाँ तक तू त्राई घेरे मेरा नां केरना ।।

### परमेशवरा तक पूजणै री बौत

14 तुसरा मन परेशान (व्याकुल) नी होला, परमेश्वरा पांधे बशाह रखा होर मुँ पांधे भी बशाह रखा । 2 मेरे बापू रै घौरा न बाँऊ जगहा रौहणे री तक सा, अगर नी होंदी ता मुँ तुसा बै बोलणा ती, किबैकि मुँ तुसरी तक जगहा तियार करणे री तक जाणा सा । 3 होर अगर हाँऊ जाईया तुसरी तक जगहा तियार केरनु ता तैबै ऐजीया तुसा आपणै तौखे बै नेणै कि जौखे मुँ रौहणा तौखे तुसा भी रौहणा । 4 जौखे हाँऊ जा सा तूसै तौखेहला रस्ता जाणा सी ।" 5 थौमै प्रभु यीशु बै बोलु, " ओ प्रभु आसै नेई जाणदे कि तू कौखे बै जा सा, ता रस्ता कैन्डे जाणना?" 6 प्रभु यीशु ऐ तेईबै बोलु, " रस्ता होर सच होर जीवन हाँऊ सा, " बिना मेरे जरिये कोई बापू आगै बै नेई जाई

स्कदा ॥ 7 अगर तूसे हाँऊ जाणु होन्दा ता मेरे बापू भी जाणना ती, होर ऐबे जाणा सी होर हेरू भी सा । 8 फिलिप्पुसै प्रभु यीशु बै बोलु, " ओ प्रभु बापू बै आसा न रिहा सौ ऐ आसरी तक रज सा । 9 प्रभु यीशुऐ तिन्हा बै बोलु, " ओ फिलिप्पुस, हाँऊ ऐतरे रोजा न तुसा संघे रौहू सा होर कि तू मुम्बै नी जाणदा? जुणीऐ हाँऊ हेरू सा तेईये बापू भी हेरू सा? 10 कि तू बशाह नी केरदा कि हाँऊ बापू न सा होर बापू मुँ न सा? ऐ गल्ला जो हाँऊ तुसा बै बोला सा आपणी धीरै न नेई बोलदा लागा, पर बापू मुँ न रौहीया आपणै कौम केरा सा । 11 मेरा बशाह केरा कि हाँऊ बापू न सा होर बापू मुँ ना सा, नेई ता कौमें री बजह न मेरा बशाह केरा । 12 हाँऊ तौबै सच-सच बोला सा जो मुँ पांधे बशाह रखा सा ऐ कौम जो हाँऊ केरा सा तेई भी केना, पर ऐता न भी बडे कौम केने किबैकि हाँऊ बापू आगै बै जा सा । 13 जो किच्छ तूसे मेरे नाँ न माँगलै, सौ ऐ मुँ केरने कि बेटे ( शौहरू )री बजह न बापू री महिमा होली । 14 अगर तूसे मुँ न मेरे नाँ न किच्छ माँगलै, ता मुँ सौ केरना ।

### पवित्र आत्मा री प्रतिज्ञा

15 अगर तूसे मुँ संघे झूरी डाहलै ता, मेरी आज्ञा भी मनणी । 16 मुँ बापू आगै अरजा केरणी, होर तेई तुसाबै एक साथी भेजणा कि सौ तुसा संघे सदा री तक रौहला । 17 मतलब सचै री आत्मा, जुणी बै दुनियां ग्रहण नेई केरदी, किबैकि सौ तेईबै नेई हेरदे, होर ना तेईबै जाणदै, तूसे तेईबै जाणा सी, किबैकि सौ तूसा संघे रौहा सा, होर तेई तुसा न होणा सा । 18 "मुँ तुसे अनाथ नी छोडणै, मुँ तुसा आगै बै ऐणा सा । 19 होर थोड़ीऐ देर रौही सा कि फिरि दुनियां हाउँ नी हेरणा, पर तुसा हाउँ हेरणा किबैकी हाउँ जिन्दा सा, तुसा भी जिन्दै रौहणा । 20 तेई रोज तुसा जाणणा कि हाउँ आपणै बापू न सा, होर तुसे मुँ न होर हाउँ तुसा न । 21 जूणी आगे मेरी आज्ञा सी होर सो तिन्हा बै मना सा सौ मुँ संघे झूरी डाहणी सा होर आपणै आपा बै मुँ तेई पांधे हेरिणा सा । 22 सौ यहूदा जो इस्करियोती नी ती आथी, तेइयै बोलू, ओ प्रभु कि हुआ तुसे आपणै आपा बै आसा पांधे रिहाणा चाहा सी होर दुनियां पांधे नेई? 23 प्रभु यीशुऐ तेईबै जवाब धिन्ना, अगर कोई मुँ संघे झूरी डाहला ता तेई मेरे वचन मनणै, होर मेरे बापू तेई संघे झूरी डाहणी, होर आसा तेई आगै बै ऐणा होर तेई संघे रौहे केरना सा । 24 जो मुँ संघे झूरी नी डाहन्दा, सौ मेरे बचना बै नी मन्दा, होर जो बचन तूसे शुणा सी सौ मेरा नेई पर मेरे बापू रा सा, जुणीए हाउँ भेजू सा । 25 "ऐ गल्ला में तुसा संघे रोहन्दी घेरे तुसा बै बोली । 26 पर मदद केरनू आळा मतलब पवित्र आत्मा जो बापू मेरे नाँ न भेजणा, तेई तुसा बै साडी गल्ला सिखाणी, होर जो किच्छ हाउँ तुसा बै बोला सा, तेई तुसा बै याद केरणा सा । 27 तूसे शूणु सा कि में तुसा बै बोलु सा मुँ जाणा सा, होर तुसरी तक वापस ऐणा । अगर तूसे मुँ संघे झूरी डाहन्दै, ता ऐसा गल्ला न खुश होणा ती कि मुँ बापू आगे बै जाणा सा, किबैकी बापू मुँ न बडा सा । 28 तूसे शूणु सा, कि में तुसा बै बोलू सा, हाँऊ जा सा, होर तुसा आगै फिरि एणा 'अगर तूसे मुँ संघे प्यार रखा सी, ता ऐसा गल्ला न खुश होआ सी, कि हाँऊ बापू आगै जा सा किबैकि बापू मुँ न बडा सा । 29 होर मैं ऐबै एते रै होणे न पैहलै तुसा बै बोलु सा कि जैबै सौ होला ता, तैबै तुसा बशाह केरना सा । 30 मुँ ऐबे तुसा संघे होर बाँऊ गैला नेई केरणी, किबैकि दुनियां रा सरदार एणु आला सा । मुँ पंधे तेईरा कोई हक नेई । 31 पर ऐ तैबै होआ सा कि दुनियां जाणली कि हाउँ बापू संघे झूरी डाहा सा होर बापूए मुम्बै आज्ञा धिन्नी सा हाउँ तैन्डाऐ केरा सा । उठा, औखै न जाणा ।

### यीशु सच्ची दाखलता

15 सच्ची दाखै री लूड हाउँ सा, मेरा बापू किसान सा । 2 जो डाळी मुँ न सा होर नेई फौल्दी, तेसा बै सो काटा सा होर जो फौळा सा, तेइबे सो छांटा सा तैबै होर फौअली । 3 तुसे ता तेई बचने री वजह न जो में तुसा बै बोलु सा, शुद्ध सी । 4 तुसे मुँ न बणीया रोआ, होर मुँ तुसा न जैन्डै डाई मतलब दाखै री लूडी न बणीया नेई रौहली ता आपणै आपा न नेई फ़ोळी सकदी, तैन्डै तुसे भी अगर मुँ न बणीया नी रौह्लै ता नेई फ़ोळी सकलै । 5 हाउँ दाखै री लूडी सा तुसे डाई सी जो मुँ न बणीया रोआ सा हाउँ तेई न सो बाँऊ फ़ोळा सा, किबैकी मुँ न अलग होईया तूसे किच्छ भी नी केरी सकदै ।

6 अगर कोई मुँ न बणीया नी रौहन्दा ता सो डाळी सैहीं शेटणा सा, होर शुका सा होर माळु तिन्हा बै कडा केरिया औगी न शेता सी, होर ते फुकिया सी । 7 अगर तुसे मुँ न बणीया रौहलै होर मेरा बचन तुसा न बणीया रौहला ता जो चाहे मौन्ना, होर तेई तुसरी तक होणा सा । 8 मेरे बापू री महिमा ऊँई लाइया होआ सा कि तुसे बाँऊ फौळ आणा, तैबै तूसे मेरे चले ठहरणा सा । 9 जैन्डी बापूए मुँ संघे झूरी डाई, तेंडीऐ में तुसा संघे झूरी डाई मेरी झूरी न बणीया रोआ । 10 अगर तुसे मेरी आज्ञा बै मनलै, ता मेरी झूरी न बणीया रौहलै, जैन्डी कि में आपणै बापू री आज्ञा मनी सा, होर तेईरी झूरी न बणीया रौहा सा । 11 मैं ऐ गल्ला तुसा बै तैबै बोली, कि मेरी खुशी तुसा न बणीया रौहली, होर तुसारी खुशी पूरी होली । 12 मेरी आज्ञा ऐ सा कि, जैन्डी झूरी में तुसा संघे डाई तेन्डीऐ तूसे भी एकी दूजे संघे झूरी डाआ । 13 ऊँई न बडी झूरी कोई री नी आथी कि आपणै संघी री तक आपणी जान देला । 14 जे आज्ञा हाउँ तुसा बै देआ सा, अगर तेसा बै मनलै ता तुसे मेरे संघी सी । 15 ऐबै न बाद मुँ तुसा बै आपणा दास नी बोलणा, किबैकी दास नी जाणदा कि तेईरा मालक कि केरा सा, पर में तुसा बै आपणा संघी बोलु सा, किबैकी में जो गल्ला आपणै बापू न शूणी ते सारी तुसा बै दसी सी । 16 तूसे हाउँ नी चुनु सा, पर में तुसे चुने सी होर तुसे ठहराएन्दे सी कि तूसे जाइया फौळ आणलै होर तुसरा फौळ बणीया रौहला, कि तूसे मेरे नाँ न जो किच्छ माँगलै, सो तुसा बै देला । 17 इन्हा गल्ला री आज्ञा हाउँ तुसा बै तैबै देआ सा कि तूसे एकी दूजे संघे झूरी डाआ ।

### दुनिया रा दुश्मन

18 अगर दुनिया तुसा संघे मीश डाहा सा, ता तूसे जाणा सी कि तेईऐ तुसा न पेहलै मुँ संघे भी मीश डाई । 19 अगर तूसे दुनिया रै होन्दे, ता दुनिया आपणै संघे झूरी डाहा सा, पर ऐई वजह न तूसे दुनिया रै नेई पर में तूसे दुनिया न चुने सी, तैबै ता दुनिया तूसा संघे मीश डाहा सा 20 जो गल्ला में तुसा बै दसी ती, " दास आपणै स्वामी न बडा नेई होन्दा, तुई बै याद डाआ । अगर तिन्हें हाँऊ सताऊ, ता तूसे भी सताणे, अगर तिन्हें मेरी गल्ला मनी ता तुसरी भी मनणी । 21 पर ऐ सेभ किच्छ ते मेरी नाँ री बजह न तुसा संघे केरणा, किबैकि ते मेरे भेजणु आळे बै नेई जाणदै । 22 अगर हाँऊ नेई एंदा होर तिन्हा संघे गल्ला नेई केरदा, ता ते पापी नेई बणदै पर ऐबै तिन्हा बै तिन्हा रै पापा री तक कोई बहाना नेई आथी । 23 जो मुँ संघे मीश डाहा सा, सौ मेरे बापू संघे भी मीश डाहा सा । 24 अगर हाँऊ तिन्हा न तेन्डा कौम नेई केरदा, जो होर कोईऐ नेई केरै ता तिन्हा पापी नेई बणना ती पर ऐबै ता तिन्हें हाँऊ होर मेरा बापू दुऐ हेरे सी होर दुई संघे मीश डाहा सी । 25 ऐ तैबै हुआ कि सौ वचन पूरा हुआ जो तिन्हे रै कनुना ना लिखू सा, " तिन्हें मुँ संघे बिना मतलबै री मीश डाई । 26 पर जैबै ऐ मदद केनू आळा ऐला, जो मुँ तुसा आगै बै बापूरी धीरै ना भेजणा, मतलब सच्चे री आत्मा जो बापू री धीरै ना निकला सा, ता सौ मेरी गवाई देला । 27 होर तूसे भी मेरे गवाह सी किबैकि तूसे शुरु न मुँ संघे रोहा सी ।

16 ऐ गल्ला में तुस्सा बै तैबै बोली कि तूसे ठोकर नी खालै । 2 तिन्हा तूसे आराधना रै घौरा न खोलणै सी, पर ऐ बाँक ऐजा सा, कि जो कोई तुसा बै मारलै तेई समझणा कि हाउँ परमेश्वर री सेवा केरदा लागा सा । 3 तिन्हा एंदा तैबै केरना कि तिन्हें ना बापू जाणु सा होर ना ते मुम्बै जाणदै । 4 पर ऐ गल्ला में तैबै तुसा बै बोली, कि जैबै इन्ना बाँक एला ता तुस्सा बै याद ऐणा कि में तुसा बै पहलै बोलीया डाऊ ती ।

### पवित्र आत्मा रै कौम

में शुरु न और तुस्सा बै ऐ गल्ला नेई दसी किबैकी हाउँ तुसा संघे ती । 5 पर ऐबै हाउँ आपणै भेजणुआए आगै बै जाआ सा होर तुस्सा न कोई मुम्बै नी पुछदै, तू कौखे बै जा सा?" 6 पर में जो ऐ गल्ला तुसा बै बोली सा, तैबै तुसा रै दुखा संघे भौरुआ सा । 7 तैबै भी हाउँ तुस्सा बै सच बोला सा कि मेरा जाणा तुसरी तक खरा सा, किबैकी हाउँ नी जाला ता तेई मदद केरनू आए तुसा आगै बै नी ऐणा । पर अगर हाउँ जाला ता, सौ मदद केरनू आले तुसा आगे बै भेजणु ॥ 8 तेई एजीया दुनियां न पाप होर धर्म होर न्याय रै बारे न जवाब धीरै

न खाली केरने 9 पापै रै बारै न कि ते मुं पांधे बशाह नी केरदै। 10 होर धर्मै रै बारै न तैबै कि हाउँ बापू आगै बै जा सा होर तूसै मुम्बै फिरि नेई हेरणा। 11 न्याय रै बारै न तैबै कि दुनियां रा सरदार पापी बनाणा सा। 12 मुं तुसा बै होर भी बौऊ गल्ला बोलणी सी पर ऐबै तूसै तिन्हा बै नी सहन केरी सकदै। 13 पर ज़ेबै सौ मतलब सचाई री आत्मा एली, ता तूसा बै सारी सचाई री बौत दसणी, किबैकि तेईये आपू धिरै न नेई बोलणा होर जे किच्छ शुणा सा सौए बोलणा होर एणु आळी गैला तुसा बै दसणी। 14 तेई मेरी महिमा केरनी, किबैकी तेई मेरी गल्ला शूण्यां तुसा बै दसणी। 15 जो किच्छ बापू रा सा, सौ सेभ मेरा सा, तैबै मैं बोलु कि मेरी गल्ला न शूणीया तुसाबै दसला।

### दुःख सुखा न बदलणा

16 थोड़ी देरा न तुसा हाउँ नी हेरणा; होर फिरि थोड़ी देरा न हाउँ हेरणा। 17 तैबै प्रभु यीशु रै चले आपू न बोलदै लागै, ऐ कि सा जो सौ आसा बै बोल्दा लाग़ा सा, थोड़ी देरा न तुसा हाउँ नेई हेरणा, होर फिरि थोड़ी देरा न हाउँ हेरणा? होर ऐ तैबै कि हाउँ बापू आगै बै जा सा? 18 तैबै तिन्हें बोलू, “ ऐ, थोड़ी देर जो सौ बोला सा कि गल सा? आसै नेई जाणदै कि ऐ कि बोल्दा लाग़ा सा। 19 प्रभु यीशु ऐ जाणीया कि ऐ मुं न पुच्छणा चाहा सी, तिन्हा बै बोलू, “ कि तूसै आपू न मेरी इन्हा गल्ला रै बारै न पुच्छताछ केरदै लागे सी, थोड़ी देरा न तुसा हाउँ नेई हेरणा, होर भिरी थोड़ी देरा न हाउँ हेरणा? 20 हाउँ तूसा बै सच- सच बोला सा कि तुसा रोणा होर लेरा मारे केरनी सा, पर दुनिया खुशी मनाणी, तुसा बै दुःख होणा सा, पर तुसरा दुःख सुखा न बदलीणा सा। 21 . सूजणै रै बौक्ता न बेटडी बै दुःख हुआ सा, किबैकि तेसरा दुखा रा बौक पुजिया आऊ सा, पर जैबै सौ शौहरु बै जन्म देआ सा ता आपणी ऐसा खुशी संघेकि दुनिया न एक माहणु ऐ जन्म लेऊ, तेई दुखा बै होरि घेरे याद नेई केरदी। 22 तैडी धिरै तुसा बै ऐबै दुःख होणा, पर मुं तुसा संघे होरी घेरै मीलणा होर तूसरा मन खुशी संघे भौरीणा सा, होर तुसरी खुशी कोई भी तुसा नेई छीनणी सा 23 तेई रोज तुसा मुं न किच्छ नेई पुच्छणा। हाउँ तूसाबै सच- सच बोला सा अगर बापू न किच्छ माँगलै, ता तेई तुसा बै मेरे नाँ न देणा। 24 ऐबे तक तूसै मेरे नाँ न किच्छ भी नेई माँगू, माँगलै ता पाणा, तैबै तुसरी खुशी पूरी होणा सा।

### दुनिया पेन्धे जीत

25 मैं ऐ गल्ला तुसाबै उदाहरण न दसी सी, पर तेई बौक ऐणा सा कि मुं तुसा बै होरी घेरे उदाहरण न नेई बोलणा, पर खुलिया तुसा बै बापू रै बारै न दसणा। 26 तेई रोजा न तुसा मेरे नाँ न माँगणा, होर हाउँ तुसाबै ऐ नेई बोल्दा कि मुं तुसरी तक बापू आगै अरजा केरनी सा। 27 किबैकि बापूता आपुए तुसा संघे झूरी डाहा सा, किबैकि, तूसै मुं संघे झूरी डाई सा ऐ कि भी कि बशाह केरु सा कि बापू री धिरै न सा। 28 हाउँ बापू रै धिरै न दुनिया न आऊ सा, मुं भी दुनिया बै छोडीया जाणा सा। 29 प्रभु यीशु रै चले बोलू, “ हेर, ऐबै ता तूसै खोलिए बोला सी, होर कोई उदाहरण नेई बोल्दा। 30 . ऐबै आसै जाणा सी कि तूसै सेभ किच्छ जाणा सी होर ऐ जरूरी भी नेई आथी कि कोई तुसा न किच्छ पुच्छलै, ऐता न आसे बशाह केरा सी कि तूसै परमेश्वरै री धिरै न आए सी। 31 ये शुणीया प्रभु यीशुये तिन्हा बै बोलू, “कि तूसै ऐबै बशाह केरा सी? 32 हेरा, सौ बौक ऐजा सा, पर ऐ सा कि तुसा सेभ अलग होईया आपणा- आपणा रस्ता लेणा, होर हाउँ केलाए छोड़णा सा, तैबै भी हाउँ केलाए नेई किबैकि बापू मुं संघे सा। 33 मैं ऐ गल्ला तुसा बै तैबै बोली कि तुसा बै मुं न शान्ति मिलली। दुनिया न तुसा बै दुःख होआ सा पर पक्के बणीया रोहा, मैं ता दुनिया जीती सा।

### यीशुये आपणी तैईये प्रार्थना केरी

17 प्रभु यीशु ऐ गल्ला बोली होर सरगा धिरै भालिया बोलू, “ ओ बापू, सौ बौक पूजी आऊ सा आपणै बेटे(शौहरु) री महिमा केर, कि बापू भी तेरी महिमा केरला। 2 किबैकि तूसै तिन्हा सेभ प्राणी पांधे हक धिन्ना, कि जूणा तै तेईबै धिन्ने सी तिन्हा सेभी बै सौ हमेशा रा जीवन देला। 3 होर हमेशा रा जीवन ऐ सा कि तै तौबै एके सच्चे परमेश्वर बै होर, प्रभु यीशु मसीह बै, जो

तूसै भेजू सा, जाणलै। 4 जो कौम तूसै मुम्बे केरने बै धिन्ने ती तेईबै पूरा केरिया मैं धौरती पांधे तुसरी महिमा केरी सा। 5 ऐबै ओ बापू, तूसै आपू संघे मेरी महिमा केरा, तेसा महिमा न केर जो दुनिया बनाणे न पेहलै, मेरी तुसा संघे ती।

### आपणै चले री तैईये

6 मैं तुसा रा नाँ तिन्हा माहणु पांधे रिहाऊ सा, जूणा तूसै दुनिया न मुम्बे धिन्ने सी, होर तिन्हें मेरे वचन मन्ने ती। 7 किबैकि जो वचन तूसै मुम्बे धिन्ने सी, मैं तै वचन तिन्हा आगै पजाए सी, होर तिन्हें तै ग्रहण (अपनाए) केरै, होर सच-सच जाणु सा कि हाउँ तूसरी धिरै न आऊ सा, होर बशाह केरु सा कि तूसै हाउँ भेजू सा। 8 किबैकि जे वचन तुसे मुम्बे दैसू सा, मैं सौ तिन्हा आगै पजेरु होर तिन्हे सौ ग्रहण केरु होर सच-सच जाणु सा कि हाउँ तौ धिरै न आऊ सा होर ऐ बशाह केरु कि तूसै हाउँ भेजू सा। 9 हाउँ संसारा री तक अरजा नेई केरदा पर तिन्हरी तक जूणा तूसै मुम्बे धिन्ने सी, किबैकि तै तेरे सी, 10 होर जो किच्छ मेरा सा सौ सेभ तेरा सा, होर जो तेरा सा सौ मेरा सा, होर इन्हा न मेरी महिमा सामने आई सा। 11 मुं आगै न, दुनिया न नेई रौहणा पर इन्हा दुनिया न रोहणा होर हाउँ तौ आगै एजा सा; ओ पवित्र पिता आपणै तेई नाँ न जे तूसै मुम्बे धिनु सा, तिन्हरी रक्षा केर कि ते आसरी साई एक हो 12 जेबै हाउँ तिन्हा संघे ती, ता मैं तेरे तेई नाँ न, जो तुस्सै मुम्बे धिन्ना सा, तिन्हा बै बचाआ सा। मैं तिन्हरी पौहरी केरी, होर विनाशै रै बेटे बै छोड़िया तिन्हा न कोई नाश नेई हुआ, तैबै कि जो पवित्र कतबा न बोलु सा सौ, पूरा होला। 13 ऐबै मुं तुस्सा आगै बै ऐणा सा, होर ऐ गल्ला दुनियां बै बोलणी सी, की ते मेरी खुशी आपू न पूरी पालै। 14 मैं तुसरा बचन तिन्हा तक प्जाऊ सा, होर दुनियां संघे मीश डाई किबैकी जेन्डा हाउँ दुनियां रा नी आथी, तैन्डै ते भी दुनियां रै नी आथी। 15 हाउँ ऐ अरजा नी केरा सा की तू तिन्हा बै दुनियां न चक पर ऐ की तू तिन्हा बै तेई दुखा न बचाईया डाह। 16 जैन्डै हाउँ दुनियां रा नी आथी, तैन्डै तै भी दुनियां रै नी आथी। 17 सचाई रै जरिये तिन्हा बै पवित्र केर तेरा वचन सच सा 18 जैन्डै तूसै हाउँ दुनियां न भेजू सा, तैन्डै मैं भी ते दुनियां न भेजै सी, 19 होर तिनरी तक हाउँ आपणै आपा बै शुद्ध केरा सा, तैबै ते भी सचे रै द्वारा शुद्ध होलै।

### सेभ विश्वासी री तैईये

20 हाउँ इनरी तक केली अरजा नी केरदा, पर तिनरी तक भी जो इनरै बचनै रै जरिए मुं पांधे बशाह केरलै 21 कि ते सारै एक होलै, जैन्डै तूसै ओ बापू मुं न सी होर हाउँ तुसा न, तैन्डै ते भी आसा न होलै, जूणी न दुनियां बशाह केरलै की तूसै हाउँ भेजू सा। 22 . सौ महिमा जो तूसै मुम्बे धिन्ने सी सा मैं तिन्हा बै धिन्ने सी, तैन्डै ते भी एक होलै जैन्डै कि आसै एक सी, 23 हाउँ तिन्हा न होर तूसै मुं न कि ते सिद्ध होइया एक होलै होर दुनियां जाणली कि तूसै हाउँ भेजू सा, जैन्डी तूसै मुं संघे झूरी डाई सा तैन्डीए झूरी तिन्हा संघे डाई। 24 . ओ बापू, हाउँ चाहा सी कि जूणा तुस्सै मुम्बे धिन्ने सी जौखे हाउँ सा तौखे ते भी मेरे संघे होलै कि ते मेरी तेस महिमा बै हेरलै कि जो तुस्सै मुम्बे धिन्ने सी, किबैकी तूसै दुनियां बणाणै न पेहलै मुं संघे झूरी डाई ती। 25 ओ धर्मै रै बापू दुनिये हाउँ नी जाणु, पर मैं तूसै जाणै, होर इन्हें भी जाणु कि तूसै हाउँ भेजू सा। 26 मैं तेरा नाँ तिन्हा बै दसु होर दसदै रौहणा कि जे झूरी तुसा बै मुं संघे ती सौ तिन्हा ना रौहली, होर हाउँ तिन्हा न रौहु।

### यीशु रा ढोकणै धियाणा

18 प्रभु यीशु ऐ गल्ला बोलिया आपणै चले संघे किद्दोन नालै रै पारै नौठे। तौखे एक बगीचा ती जुणी न प्रभु यीशु होर तिन्हेरै चले नौठे। 2 प्रभु यीशु रा ढोकणै धियाणु आळा यहूदा भी तेसा जगहा बै जाणा ती, किबैकि प्रभु यीशु आपणै चले संघे तौखे बै जाया केरा ती। 3 तैबै यहूदा, सपाई रा एक दला बै होर प्रधान याजक होर फरीसीए री धिरै न सपाई आणीया, दिरे होर मशाल होर थियार आणीया तौखे पुजै। 4 तैबै प्रभु यीशु, तिन्हा सेभी गल्ला बै जे प्रभु पांधे ऐणु आई ती जाणीया निकता होर तिन्हा बै बोलू, “ कुणी बै तौपदे लागे सी?” 5 तिन्हें प्रभु यीशु बै बोलू, “ यीशु नासरी बै

11 प्रभु यीशुए तिन्हा बै बोलु, "हाऊँ सा" प्रभु यीशु रा ढौकणै धियाणु आळा भी तिन्हा संघे खडा ती। 6 तेईरै ऐ बोलणे पांधे, "हाऊँ सा" तै पिच्छे हटिया धोरती पांधे झौडे। 7 तैबै प्रभु यीशुए भी तिन्हा न पुछू, "तूसै कुणी बै तौपदै लागै सी?" 11 तिन्हें बोलु, "यीशु नासरी बै।" 8 प्रभु यीशुए तिन्हा बै बोलु, मैं ता तुसा बै बोलु ती कि हाऊँ सा, अगर मुम्बै तोपा सी ता इन्हा बै जाणै देआ। 9 ऐ तैबै हूआ कि सौ वचन पूरा होला जो प्रभु यीशुए बोलु ती, जो तूसै मुम्बै धिन्ने ती, तिन्हा न मैं एक भी नी खोऊ। 10 तैबै शमोन पतरस तलवार जो तेई आगै ती, खिंची होर बड़े याजका रै दासा पांधे चलाईया तेईरा देहणा कौन कटिया शेदू। तेई दासा रा नाऊँ मलखुस ती। 11 तैबै प्रभु यीशु ए पतरसा बै बोलु, "आपणी तलवार म्याना ना डाहा। जो कटोरा बापूए मुम्बै धिन्ना सा, कि मुं सौ नी पाणी।

### हन्ना रे सामणै यीशु

12 तैबै सैनिक होर सूबैदार होर यहूदियै रै सैनिके प्रभु यीशु ढौकिया बौनु, 13 होर पहलै प्रभु यीशु हन्ना आगै बै नेऊ किबैकि तेस बोर्षा रा महायाजक काईफा रा शौकरा ती। 14 ऐ सौए काईफा ती जुणीए यहूदिये बै सलाह धिन्नी ती कि आसरी तक एक माहणु रा मौरणा खरा सा।

### पतरसा रा इन्कार

15 शमोन पतरस होर एक होर चेला भी प्रभु यीशु रै पिच्छे न हुए। ऐ चेला महायाजका रा जाणु पछियाणु ती, तैबै सौ प्रभु यीशु संघे महायाजकै रै आंद्रे बै नौठा, 16 पर पतरस दरुआजे पांधे खडा रौहू। तैबै सौ दूजा चेला जो महायाजक रा पछियाणु होन्दा ती बाहरै निकता होर दरवाजे री पौहरी बै बोलिया पतरस आंदरै बै आणु। 17 सौ दासी जो पौहरी ती, पतरसा बै बोलु, कौहिचे तू भी ऐई माहणु रै चले न आथी? तेयै बोलु, "हाऊँ नी आथी।" 18 दास होर सपाई ठंडे री बजह न कौयलै भकेईया खडे आग छिपदै लागै ती, होर पतरस भी तिन्हा संघे खडा आगी छिपदा लागी ती।

### बड़े मुखिया द्वारा यीशु री पूछताछ

19 तैबै महायाजकै प्रभु यीशु न तिन्हरै चेलै रै बारै न होर उपदेशै रै बारै न पुच्छदै लागै। 20 प्रभु यीशुए तिन्हा बै जवाब धिन्ना, "मैं दुनिया संघे खुलिया गला केरी, मैं आराधनालय न होर मदिरा न, जोखे सेभ यहूदी कट्टे हुए ती सदा उपदेश देआ ती होर घोजुईया किच्छ भी नी बोलु। 21 तू मुं न किबै पुच्छदा लागी सा? शूणनू आळे न पुच्छ कि मैं तिन्हा बै कि बोलु, हेर ते जाणा सी कि मैं तिन्हा बै कि-कि बोलु" 22 जैबै प्रभु यीशुए बोलु, "ता प्यादे न एकीए जो प्रभु यीशु आगै खडा ती, प्रभु यीशु बै चंडा मरिया बोलु, "कि तू महायाजका बै ऐन्डी तरह जवाब देआ सा?" 23 प्रभु यीशुए जवाब धिन्ना, "अगर मैं बुरा बोलु, "ता तेस बुराई री गवाई दे, पर अगर खरा बोलु ता मुम्बै किबै मारदा लागी सा? 24 हन्ने प्रभु यीशु बौनु हौन्दा काईफा महायाजक आगै बै भेजु।

### पतरसा रा दबारा इन्कार केरना

25 शमोन पतरस खडा हूआ आगी छिपदा लागी ती। तैबै तिन्हें तेईबै बोलु, "कहीं तू भी ता तेईरै चले न ता नेई आथी? तेईए नाँ केरिया, "बोलु हाऊँ नेई आथी।" 26 महायाजकै रै दासै न एकीए जो तेईरै झुंडा न ती जुणीरा कौन पतरसै काटू ती बोलु, "कि मैं तू तेई संघे बगीचे नू नेई ती हेरुदा ती? 27 पतरसै भी नाँ केरु, होर तैभै मुर्गा बाशु।

### पिलातुसा रे सामणै यीशु

28 तैबै तिन्हें प्रभु यीशु कईफा रै सामने गडा बै नेये, होर दोती रा बौक ती, पर तै आपू गडा आन्दरै बै नेई नौठे किबै कि ते अशुद्(गंदे) नेई लोडी हुए पर फसहै री जाच खाई सकलै। 29 तैबै पिलातुस तिन्हा आगै बै बाहरै निकतु होर बोलु, "तूसै ऐई माहणु पांधे कुणी गला रा दोष लागै सी लांदे? 30 तिन्हें तेईबै बोलु, "अगर ऐ बूरे कौम केरनू आळा नेई होन्दा ता आसा ऐ तेरै होथा

न नेई ती देणा" 31 पिलातुसै तिन्हा बै बोलु, "तूसै ऐईबै नेईया आपणी कनूनै रै दवारा ऐरा न्याय केरा" यहूदिये तेई राजै बै बोलु, आसा बै अधिकार नेई आथी कि कोई री जानू लेई सकलै। 32 ऐ तैबै हूआ कि प्रभु यीशु री सौ जे प्रभु ए इशारा केरदी घेरे बोलु ती कि प्रभु यीशु री मौऊत कैन्डी होणा। 33 तैबै पिलातुस भी गडा आन्दरै बै नौठा, होर प्रभु यीशु शधाईया तेईन पुच्छू, "कि यहूदिये रा राजा सा?" 34 प्रभु यीशुए बोलु, "कि तू ऐ गल आपू धिरै न बोल्दा लागी सा कि होरिए मेरै बारै न तुसा बै ऐ बोलु?" 35 पिलातुसै जवाब धिन्ना, "कि हाऊँ यहूदि सा? तेरी जाति होर प्रधान याजकै तू मेरै हौथा न धिन्ना सा। तै कि केरु सा?" 36 प्रभु यीशुए बोलु, "मेरा राज्य ऐसा दुनिया रा नेई अगर मेरा राज्य ऐस दुनिया रा होन्दा ता, मेरै चले झौटीदै कि मुं यहूदिये रै होथा न नी ती जाणा, पर मेरा राज्य आँखला नेई आथी 37 पिलातुसै तेईबै बोलु, "ता कि तू राजा सा?" प्रभु यीशुए तेईबै बोलु, "तूसै बोलु कि हाऊँ राजा सा। मैं तैबै जन्म लेऊ सा होर तैबै दुनिया न आऊ सा कि सचे री गवाई देनु। जो कोई सचे रा सा, सौ मेरी (हाक) शूणा सा।" 38 पिलातुसै प्रभु यीशु बै बोलु, "सच कि सा?"

### मौऊती री सजा देणै रा हुक्म

ऐ बोलिया सौ भी यहूदिये आगै बै नौठा होर तिन्हा बै बोलु, हाऊँ ता तेईन किच्छ भी बुरी गल नेई पांदा। 39 पर तुसरी ऐ रीति सा कि मूँ फसह (फसला री जाचा न) तुसरी तक एक माहणु छोड़णा सा? 40 तैबै तिन्हें जोरै संघे बोलु, "ऐईबै नी पर आसरी तक बरअव्वा बै छोड़ा।" होर बरअव्वा डाकू ती 19 ऊँई पांधै पिलातुसै प्रभु यीशु बै कौडे लागै धियाए। 2 सिपाईये कौन्डे रा मुकट गुन्धिया प्रभु यीशु री मुंडी पांधे डाऊ, होर प्रभु बै बँजनी टौला लाऊ, 3 होर प्रभु यीशु आगै ऐजी ऐजिया बोल्दै लागै, "ओ यहूदिये रै राजा, नमस्ते! होर प्रभु बै थपुड (चंडे) भी मारै। 4 तैबै पिलातुसै भी बाहरै निकलिया लोका बै बोलु. होर हाऊँ तेईबै तुसा आगै फिरि आणा सा, कि तूसै जाणलै कि हाऊँ ऐईन किच्छ भी दोष नेई पान्दा।" 5 तैबै प्रभु यीशु कौडे रा मुकट होर बँजनी टौला लाऊ होन्दा बाहरै निकता, होर पिलातुसै तेईबै बोलु, "हेरा ऐ मर्द (पुरुष)!" 6 जैबै प्रधान याजक होर सैनिकै सौ हेरु ता लेरा पाईया बोलु, "ऐईबै क्रुसा पांधे चढा क्रुसा पांधे!" पिलातुसै तिन्हा बै बोलु, तुसै ऐइबै नेईया क्रुसा पांधे चडा, किबैकि हाऊँ ऐईन किच्छ भी दोष नेई पांदा।" 7 यहूदिये तेईबै बोलु, "आसरी भी कनून सा होर तेस कनूनै रै मुताबिक ऐ मारणे रै बराबर सा, किबैकि ऐईये आपू बै परमेश्वरा रा बेटा बोलू सा 8 जैबै पिलातुसै ऐ गला शूणी ता सौ होर भी डौरु। 9 होर भी गडा आन्दरै बै नौठु, होर प्रभु यीशु बै बोलु, तू कौखला सा? प्रभु यीशुए तेईबै किच्छ भी जवाब नेई धिन्ना। 10 तैबै पिलातुसै प्रभु बै बोलु, "मुम्बै किबै नेई दसदा? कि तू नेई जाणदा, कि तौबै छोड़ने रा अधिकार मुम्बै सा, होर तौबै क्रुसा पांधे चडाणे रा अधिकार भी मुम्बै सा।" 11 प्रभु यीशुए बोलु, "अगर तौबै ऊजै न नेई धिन्नु होन्दा, ता तेरा मुं पांधे किच्छ भी अधिकार नेई ती होणा, तैबै जूणीए हाऊँ तेरे हौथा न धिन्ना सा तेईरा पाप जादा सा। 12 तैबै पिलातुसै प्रभु यीशु छोडी देणा चाहू, पर यहूदिये जोरै-जोरै संघे बोलु, अगर तू ऐईबै छोडी देला, ता तेरी भक्ति कैसरै री ओर न नी होणा, जो कोई आपणै आपा बै राजा बणा सा सो केसरा रा सामना केरा सा।" 13 ऐ गला शूणीया पिलातुसै प्रभु यीशु बाहरै आणु होर तेस जगह न एक चबूतरा ती जो इब्रानी न गबता बोलिया ती होर तौखे न्याय री जगह पांधे बेटा। 14 ऐ फसह री तियारी रा रोज ती, होर छौ घंटे रै लगभग ती। तैबै तेईयै यहूदियै बै बोलु, "हेरा तुसरा राजा।" 15 पर ते लेरा पाईया नेया! नेया! ऐईबै क्रुसा पांधे चडा; पिलातुसै तिन्हा बै बोलु, "कि मुं तुसरा राजा क्रुसा पांधे चडाणा?" प्रधान याजकै बोलु, कैसरा बै छोड़िया आसरा होर कोई राजा नी आथी। 16 तैबै तेईयै प्रभु यीशु तिनरै हौथा न धिन्ना कि सौ क्रुसा पांधे चडाई जाला।

### क्रुसा पेन्धे चढाणा

17 तैबै तिन्हें प्रभु यीशु नेयै, होर प्रभु यीशु आपणा क्रुस चकिया तेस जगह तक बाहरै नौठे जो खोपडी री जगह बोलिया ती होर इब्रानी न गुलगुता। 18 तौखे तिन्हें प्रभु यीशु संघे होर दुई माहु भी क्रुसा पांधे चडाए, एक एकी

धीरै होर दूजी धीरै, होर बिचा न प्रभु यीशु । 19 पिलातुसै एक दोषा रा पत्र लिखिया क्रुसा पांधे लाऊ, होर तेता न ऐ लिखू होन्दा ती, यीशु नासरी यहूदियै रा राजा । 20 ऐ दोष पत्र बाँऊ यहूदिये पौडु किबैकी सौ जगह जाँखे प्रभु यीशु चढाऊती प्रां रै नेड ती, होर चिड्डी इब्रानी होर लतीनी होर यूनानी न लिखू होन्दा ती । 21 तैबै यहूदिये रै प्रधान याजकै पिलातुसा बै बोलु, "यहूदिये रा राजा मत लिख पर ऐ लिख कि" तेइये बोलु "हाउँ यहूदिये रा राजा सा ।" 22 पिलातुसै उतर धिन्ना, में जो लिखू सा सौ लिखू सा । 23 जैबै सैनिके(सपाईये) प्रभु यीशु क्रुसा पांधे चढाऊ ती प्रभु यीशु रै टौलै लेईया चार भाग करै, सेभी सैनिके(सपाई) री तक इक भाग, होर कुरता भी नेऊ, पर कुरता बिना सिउं होन्दा ती उजे न पोर हेते तक बूणु होन्दा ती । 24 तैबै तिन्हें आपू न बोलु, आसा ऐ नी चिरणा पर एता पांधे चिड्डी भौरनी कि एई कुणी रा होणा।" ऐ तैबै हुआ कि पबित्र काबा न जो बोलु ती सौ पूरा होला, "तिन्हें मेरै टौलै आपू न बाँडै होर मेरै टौलै पांधे चिड्डी भौरी । 25 तैबै सपाईये तैन्डाए केरु प्रभु यीशु रै क्रुसा आगै तिनरी आमा, होर तिनरी आमै री बैहण क्लोपासे री लाडी मरियम होर मरियम मगदलीनी खडी ती । 26 जैबै प्रभु यीशुए आपणी आमा होर सो चेला जो जूणी संघे प्रभु यीशु झूरी डाहा ती नेड खडा हेरु ता आपणी आमा बै बोलु, ओ बेटडी हेर ऐ तेरा बेटा सा ।" 27 तैबै प्रभुए चलै बै बोलु, "ऐ तेरी आमा सा।" होर तेई बाँके तेये सौ आपणै घौरा बै नेई ।

### यीशु री मौऊत

28 तेता न बाद प्रभु यीशुए ऐ जाणीयाँ कि ऐबे सेब किच्छ पूरा हुआ सा, तैबै कि पबित्र काबा न जो बोलु ती सो पूरा होला, बोलु, "हाउँ शौखा सा ।" 29 तौखे सिरकै संघे भोरु होन्दा एक भांडा डाऊ ती तैबै तिन्हें सिरकै न शोरु होन्दा स्पंज लकडा पांधे डाईया प्रभु यीशु रै मुँहा न लाऊ । 30 जैबै प्रभु यीशुए सौ सिरका लेऊ ता बोलु, पूरा हुआ, " होर मुंडी टून्ली केरिया प्राण छौडे ।

### भाले संघे बिनणा

31 तैबै कि सौ तियारी रा रोज ती, यहूदिये पीलातुस आगै अरजा केरी कि तिनरी टांगा चोडा होर हेते खोला, किबैकी रामै रै धियाडै न ते क्रुसा पांधे नी डाहणै किबैकी सौ रामा रा धियाडा बडा धियाडा ती । 32 तैबै सैनिके(सपाईये एजीया तिन्हा माहू न पैहलै री टांगा चोडी, तैबै दुजै री भी, जो प्रभु यीशु संघे क्रुसा पांधे चडाई ती, 33 पर जैबै प्रभु यीशु आगै एजीया हेरु कि सौ मुँआन्दा सा, प्रभु री टांगा नी चोडी । 34 पर सैनिका न एकिए बरछै लाइया प्रभु यीशु रा पेट भिन्नु, होर तेता न तैबै लोहू होर पाणी निकतु । 35 जूणीए ऐ हेरु तेईये गवाई धिन्नी, होर तेइरी गवाई सच्ची ती, होर सो जाणा ती कि सो सच बोला सा तुसा भी बशाह केरा । 36 ऐ गल्ला तैबै हुई कि पबित्र काबा न जो बोलु ती कि सौ पूरा होला, तेइरा कोई भी हाडका नी सा चोडणा ।" 37 फिरि एकी होरि जगह पांधे लिखू ती, "जूण तिन्हें बाँत्रु सा, तेई पांधे तिन्हा हेरणा सा ।"

### यीशु रा पौथिणा

38 इन्हा गल्ला न बाद अरिमतिया रै युसुफे जो प्रभु यीशु रा चेला ती, पर यहूदियै रै डौरा न सौ ऐसा गल्ला बै घजेइया रखा ती, पिलातुस आगै अरजा केरी कि-कि सौ प्रभु यीशु री लाशा बै नेई सका सा । पिलातुस तेइरी अरजा शूणी होर तेइयै एजीया प्रभु री लाश नेई । 39 निकुदेमुस भी, जो पैहलै प्रभु यीशु आगै राती बै नौठा ती, पजाह सेरे रै बराबर, मिलाऊ होन्दा शोभली बासी आळा तेल होर एलवा आणु । 40 तैबै तिन्हें प्रभु यीशु री लाश आणी, होर यहूदिये रै पौथणै री कनुने रै अनुसार प्रभु शोभली बासी आळा तेल लाइया कफना न प्लेटू । 41 तेसा जगह पांधे जाँखे प्रभु यीशु क्रुसा पांधे चडाऊ ती, एक बगीचा ती, होर तेई बगीचे न एक नौउई कब्र ती, जूणी न कदी भी कोई नी थी डाऊन्दा । 42 तैबै यहूदिये री तियारी रै रोजै रै वजह न तिन्हें प्रभु यीशु तुईन डाऊ, किबैकी सो कब्र नेड ती ।

### खली कब्र

20 हमे रै पैहलै रोज मरियम मगदलीनी दोती नियारे न कब्रा न आई होर पाथर कब्रा न हटु होन्दा हेरु । 2 तैबै सौ दौउडी होर शमोन पतरस होर तेई दुजे चलै आगै बै जूणी संघे प्रभु यीशु झूरी डाहा ती, एजीया बोलु, "तिन्हें प्रभु कब्र न खोलिया नेऊ सा, होर आसे नी जाणदी कि सौ कौखे डाऊ सा ।" 3 तैबै पतरस होर दूजा चेला निकलिया कब्र धीरै बै नौठे । 4 ते दुए संघे-संघे दौऊडदै लागै ती, पर दूजा चेला पतरसा न आगै बढीया कब्रा पांधे पैहलै पुजू, 5 होर टून्लै होइया टौलै पौडै होन्दे हेरै, तैबै भी सौ आन्द्रे नी हेरु । 6 तैबै शमोन पतरसै तेइरै पीछे-पीछे आऊ, होर कब्र आन्दरै नौठा होर टौलै पौडु होन्दे हेरै । 7 होर सौ टौला प्रभु री मुंडी न बाँनु होन्दा ती, होरी तिन्हा टौले संघे नेई ती आथी, पर दूजी जगहा पांधे पलेटू होन्दा हेरु । 8 तैबै दूजा चेला भी जो कब्रा पांधे पैहलै पुजू ती, आन्दरै नौठा होर हेरिया बशाह केरु । 9 ते ता ऐबै तक पबित्र कताबै री सौ गल्ला नेई समझे कि तेई मौरु होन्दे न जीणा सा । 10 तैबै तै चले आपणे घौरा बै बापस आए ।

### यीशु रा मरियम मगदलीनी न हेरिणा

11 पर मरियम मगदलीनी रौन्दीए कब्रा आगै बाहरै खडी रौही, होर रौन्दे रौन्दे कब्रा धीरै बै झुकीया, 12 दुई स्वर्गदूत पियाशे टौले लाईया एक शरैइणा आगै होर दूजा टांगा आगै बेठेंदे हेरै, जाँखे प्रभु यीशु री लाश डाई ती । 13 तिन्हें तेसा बै बोलु, " ओ बेटडी, तू किबै रोआ सा? तेसै तिन्हा बै बोलु, " तिन्हें मेरा प्रभु चकिया नेऊ सा होर हाँऊ नेई जाणदी कौखे सा ।" 14 ऐ बोलिया सौ पिच्छे मुडी होर प्रभु यीशु खडा हेरु, पर नेई पच्छियाणु की ऐ प्रभु यीशु सा । 15 प्रभु योशुए तेसा बै बोलु, " ओ बेटडी, तू किबै रोआ सा? कुणी बै तोपा सा?" तेसै बगीचै रा पौहरी समझीया तिन्हा बै बोलु, ओ महाराज, अगर तूसै सौ चकु सा ता, मुन्बै दस कि सौ कौखे डाऊ सा, होर मुं सौ नेणा ।" 16 प्रभु यिथुए तेसा बै बोलु, " मरियम" तेसै पिच्छे मुडिया प्रभु बै इब्रानी न बोलु " रब्बुनी," मतलब 'ओ गुरु' । 17 प्रभु यिथुए तेसा बै बोलु, " मुन्बै मत छुगे, किबै कि हाँऊ हाजी तक बापू आगै बै ऊजे नेई नौठा, पर मेरे भाई आगै बै जाईया तिन्हा बै बोल, कि हाँऊ आपणे बापू आगै बै होर तुसरै, बापू, होर आपणै परमेश्वरा आगै बै ऊजे जा सा ।" 18 मरियम मगदलीनीए जाईया चले बै दसु, में प्रभु हेरु, होर तिन्हें मुं संघे ऐ गल्ला बोली ।"

### चले पेन्धे प्रगत होणा

19 तेई धियाडे न जो हपतै रा पैहला धियाडा ती, सौनकी जैड घेरै जैबे तौखे रै दरुआजे जाँखे चले ती यहूदीये रै डोरै रै मारे बन्द ती तैबै प्रभु यीशु आऊ होर तिनरै बिचा न खडे होईया तिन्हा बै बोलु, " तुसा बै शान्ति लोडी मिली ।" 20 ऐ बोलिया प्रभु यिथुए आपणा होथ आपणी जाँघा तिन्हा बै रिहाए । तैबै चले प्रभु यीशु बै हेरिया खुश हुए । 21 प्रभु यीशुए ऐ भी बोलु, " तूसा बै शान्ति लोडी मिली, जैडा बापूए हाँऊ भेजू सा तेंडे हाँऊ भी तुसा बै भेजा सा । 22 ऐ बोलिया प्रभु यीशुए तिन्हा पांधे फुकरु और तिन्हा बै बोलु, " पवित्र आत्मा लैआ । 23 जुपीरै पाप तूसै माफ़ करलै, तै तिन्हरी तक माफ़ होणै सी जूणी रै तूसै डाहलै, तै डाहणे सी ।

### थोमा पेन्धे प्रगत होणा

24 पर बाराह न एक मतलब थोमा जो दिदुमुस कलाईया ती, जैबै प्रभु यीशु आऊ ती, तिन्हा संघे नी ती आथी 25 जैबै हारा चले तेईबै बोन्दे लागै " आसे प्रभु हेरु सा" तैबै तेईये तिन्हा बै बोलु जाँ तक हाँऊ तिन्हेरै हौथा न कीलै रा छेद नेई हेरनु होर किलै रै छेदा न आपणी गुठी नी भौरनु, होर तिन्हेरै टांगा न आपणा हौथ न भौरनु ताँ तक मुं बशाह नेई केरणा । 26 औठ रोजा बाद प्रभु रै चले भी घौरै रै आन्दरै ती, होर थोमा भी तिन्हा संघे ती, होर दरुवाजा बन्द ती तैबै प्रभु यीशु आऊ होर तिन्हेरै बिचा न खडे होईया बोलु, " तूसा बै शान्ति लोडी मिली । 27 तैबै प्रभु यीशु ऐ थोमा बै बोलु, ' आपणी गुठी आपणीया मेरे हौथा बै हेर, होर आपणा हौथ आपणीया मेरे जौन्दा न भौर होर अविश्वासी नेई पर विश्वासी बण । 28 ऐ शूणीया थोमे जवाब धिन्ना, ओ मेरे

प्रभु, ओ मेरे परमेश्वर ।" 29 . प्रभु यीशुए बोलु, " तैं हाँऊ हेरु सा कि तैंबै बशाह केरु सा? धन्य सी तैं जूणीए बिना हेरिया बशाह केरु सा ।"

### एसा कताबा रा उदेश्य

30 प्रभु यीशुए होर भी बाँऊ नशाण चले रैं सामने रिहाए, जौ एसा कतबा न नेई लिखेदे सी । 31 पर ए तैंबै लिखे सी कि तूसै बशाह केरा कि प्रभु यीशु परमेश्वरा रा बेटा मसीह सा, होर बशाह केरिया तेईरै नाँ न जीवन पाआ ।

### तिबिरियास झीला रैं बाँड़ा चले पेन्धे प्रगट होणा

21 इन्ना गल्ला न बाद प्रभु यीशु तिबिरियास झीलै रैं बाँड़ा चेलै रैं सामने आऊ, होर एंडी धीरै सामने आऊ । 2 शमौन पतरस, होर जो दिदमुस बोलिया सा, गल्लिलै रैं काना ग्रां न नतनएल, होर जब्दी रा बेटा होर तेइरै चेलै न दुई होर माहु कड़े हुए ती । 3 शमौन पतरस तिनहा बै बोलु, हाँऊ मैच्छी डौकदा चौलु सा ।" तिनहँ तेईबै बोलु आसा भी तौ संघे ऐणा, तैंबै ते निक्किया किशती पांधे चडै पर तेसा राती किच्छ भी नि डौकु । 4 दोत होन्देया प्रभु यीशु बाँड़ा पांधे खडे हुए तैंबै भी चेलै प्रभु नी प्छियाणु कि ऐ प्रभु यीशु सा । 5 तैंबै प्रभु यीशुए तिनहा बै बोलु, "ओ शोहरुओ कि तुसा हागे किच्छ खाणे बै सा?" तिनहँ जबाब धिन्ना, "नेई ।" 6 प्रभु यीशुए तिनहा बै बोलु "किशती री दैईणी धीरै बै जाल शेता ता मिलणा ।" तैंबै तिनहँ जाल शेद, होर ऐबै मौन्छी होणै री वजह संघे तीनरै जाल निसा खिचुई । 7 तैंबै तेई चेलै जूणी संघे प्रभु यीशु झूरी डाहा ती पतरसा बै बोलु, "ऐ ता प्रभु सा शमौन पतरसै ऐ शूणीया कि सो प्रभु सा चेकै न अँगरखा भौनु, किबैकी सो नांगा ती, होर नौई बै छलाँग धिन्नी । 8 पर दुजै चेलै किशती न मौन्छी रा भौरु अन्दा जाल खिचन्दै लागै, किबैकी ते नौई रैं बाँड़ा न जादा दुर नी ती आथी, पर दुई शौऊ होथे री दुरी पांधे ती । 9 जैंबै ते बाँड़ा पांधे उतरै ता तिनहँ कोयले री ओगी पांधे मौन्छी डाई ती, होर रोटी हेरी । 10 प्रभु यीशुए तिनहँ बै बोलु, "जो मौन्छी तुसे एबै डौकी सी तिनहा न किच्छ आणा ।" 11 ता शमौन पतरसै डौन्नी पांधे चडीया एक शौऊ त्रिऊजां बडी मौन्छी, न भोरु होन्दा जाल बाँड़ा पांधे बै खींचू होर ऐतरी मैच्छी होंदेया भी जाल नेई चिरुआ । 12 प्रभु यीशुए तिनहा बै बोलु, "ऐजा रोटी खा ।" चेलै न कोई बै हिम्मत नि हुई कि प्रभु न पुछले कि तू कुण सा?" किबैकी ते जाणा ती कि हो ना हो ऐ प्रभु यीशु सा । 13 प्रभु यीशु आऊ होर रोटी आणिया तिनहा बै धिन्नी, होर तेंडै मैच्छी भी । 14 ऐ त्रीजी घेरै ती कि प्रभु यीशु मौरु होंदे न जी उठणै न बाद चेलै न हेरुआ ।

### यीशु होर पतरस

15 रोटी खाणै न बाद प्रभु यीशुए शमौन पतरसा बै बोलु, "ओ शमौन यहुन्ना रैं बेटै, कि तू इन्हा न जादा झूरी मुं संघे डाहा सा?" तेयै प्रभु यीशु बै बोलु, जी प्रभु तुसै ता जाणा सी कि हाँऊ तुसा संघे झूरी डाहा सा । प्रभु यीशुए तेबै बोलु, मेरै मँग्णु बै चार ।" 16 प्रभु यीशुए दूजी बार भी बोलु, "ओ शमौन, यहुन्ना रैं बेटै, कि तू मुं संघे झूरी डाहा सा?" तेयै प्रभु बै बोलु, जी प्रभु जी तुसे जाणा सी कि हाँऊ तुसा संघे झूरी डाहा सा ।" प्रभुए तेईबै बोलु, "मेरी भेड़े री पौहरी केर ।" 17 प्रभु यीशुए त्रीजी बार भी बोलु, "ओ शमौन, यहुन्ना रैं बेटै, कि तू मुं संघे झूरी डाहा सा?" पतरस दुखी हुआ, कि प्रभुए त्रीजी बार ऐन्डा बोलु, "कि तू मुं संघे झूरी डाहा सा ।" होर प्रभु बै बोलु, ओ प्रभु जी, तुसै ता सेभ किच्छ जाणा सी कि हाँऊ तुसा संघे झूरी डाहा सा ।" प्रभु यीशुए तेईबै बोलु, "मेरी भेड़ा बै चार । 18 हाँऊ तौभे सच बोला सा जैंबै तू जुआन ती ता आपणा चेका बौनियाँ जौखे चाहा ती तौखे फिरा ती, पर जैंबै तू खापरा होल्ला ता आपणै हौथ फैलाणै, होर दूजा तेरा चेका बौनियाँ जौखे तू नेई चाहन्दा तौखे तू नेणा सा ।" 19 प्रभु यीशुए इन्हा गल्ला लाईया इशारा केरु कि पतरस कैन्डी मौउती न परमेश्वरै री महिमा केरनी, होर तैंबै प्रभु यीशुए तेईबै बोलु, मुं पीछै एज ।

### यीशु होर तेईरा प्यारा चेला

20 पतरसै पीछै हेरिया सो चेला पीछे ऐन्दा हेरु जुणी संघे प्रभु यीशु झूरी डाहा ती, "होर जुणीए रोटी खांदी घेरै प्रभु यीशु री छाती धीरै टूम्बलै हाईया पुच्छु ती, ओ प्रभु तुसा बै डौकणै धियाणु आळा कुण सा।" 21 तेई हेरिया पतरसै प्रभु यीशु बै बोलु, "ओ प्रभु, एईरा कि हाल होणा सा?" 22 प्रभु यीशुए तेईबै बोलु, "अगर हाँऊ चाहनु कि सो मेरै ऐणै तक रुकिया रोहला, ता तौभे एइन कि? तू मुं पिच्छे ओन्दा।" 23 तैंबै ऐ गल्ल सेभी न फैली कि तेई चेलै नी मौरणा, तैंबै भी प्रभु यीशुए तेइबै ऐ नी बोलु कि एई नी मौरणा, पर एभी कि, "अगर हाँऊ नी चाहनु कि एई मेरै ऐणै तक रुकिया रोहणा, ता तौभे एइन कि?"

### उपसंहार

24 ऐ सोए चेला ती जो इन्हा गल्ला री गवाई देआ सा, होर जूणीए ऐ गल्ला लिखी सी, होर आसै जाणा सी कि तेईरी गवाई सच्ची सा । 25 होर भी बाँऊ कौम सी, जो प्रभु यीशुए कैरै सी, अगर ते एक-एक केरिया लिखदे, ता हाँऊ समझा सा कि कताबा जो लिखीणी ती तिनहा दुनियां न भी नेई थी औपडना ।

# प्रेरिता रे कौम

## भूमिका

प्रेरिता रे कौमाँ रा वर्णन लूका रे सुसमाचारा रे आगे रा वर्णन सा। एथा रा खास उदेश्य ये दसणा ती कि यीशु रे पहले चले पवित्र आत्मा री अगुवाई न, यीशु रे बारे न सुसमाचारा बै "यरुशलेम होर सारे यहूदी होर सामरिया न, होर धौरती रे आखरी तक "(1: 8) फैलु सा। ये मसीह अन्दोलना रा विवरण सा जो यहूदी लोका मौझे शुरु हुआ, होर पूरी दुनिया रे लोका रा बशाह बैणु। लेखक एसा गैला रा भी ध्यान रखा सा कि तिन्हा बै ये बिश्वास होला कि मसीह लोकरोमी सम्राज्य री तेईये एक विद्रोही राजनैतिक शक्ति नेई ती, होर मसीही विश्वास यहूदी धर्मा री तेईये ती। प्रेरिता रे कौमा री कताबा बै तराई हिस्से न बाँडी सका सी। जुणी यीशु मसीह रा सुसमाचार केरु ती, होर कलीसिया बणाई ती प्रेरिता रे कौमाँ री एक जरूरी विशेषता ये सा पवित्रआत्मा री पवित्र आत्मा री क्रियाशीलता। प्रेरिता रे कौमा न एक खास विशेष मसीह रा संदेश प्रस्तुत के रु सा।

रूपरेखा

गवाई री तेईये तैयारी 1:1-26  
 यीशु री आखरी आज्ञा होर प्रतिज्ञा 1:1- 14  
 यहूदा रा अधिकारी 1:15 - 15 -26  
 यरुश्लेमा न गवाई 2;1 --- - 8:3  
 यहूदिया होर सामरिया री गवाई 8:4-12:25  
 पौलुसा री सेवारा कौम 13:1 -28:31  
 पैहली प्रचार यात्रा 13:1- 14;28  
 यरुशलेला न सम्मेलन 15:1- -35  
 दूजी प्रचार यात्रा 15:36- - 18; 22  
 त्रीजी प्रचार यात्रा 18:23 - 21:16  
 यरुशलेम, कैसरिया और रोमा रे जेला न पौलुस 21:17- 28:31

## परिचय

1 हे थियुफिलुस, में पैहली कताब तिन्हा सैभी गले रे बारै ना लिखी जे यीशु शुरु ना लेइया केरदा होर सिखाँदा रौहू। 2 तेई बौगता तक जैबै तक कि सौ तेइरे चले बै जो तेईये चुने ती पवित्र आत्मा द्वारा हुकम देईया झाँऊ नेई चैकु। 3 तेईये बडे दुःख सेहन केरने न बाद बौऊ पक्के प्रमाण सेंघे आपणै आपा बै जिन्दा रिहाऊ, होर चाली रोजा तक सौ तिन्हा न हेरुआ, होर परमेश्वरा रे राज्य री गैला केरदा रौहू। 4 होर तेईये तिन्हा सेंघे मिलिया आज्ञा धिनी, यरुश्लेमा बै मता छौड़ा, पर बापू री तेई प्रतिज्ञा रे पूरे होणै री बौत हेरा, जुणी री चर्चा तूसै मुं न शुणी सा। 5 किबैकि यहूजे ता पाणी न बसिस्मा धिनु ती, पर थोड़े रोजा बाद तूसै पवित्र आत्मा दुआरा बसिस्मा पाणा।

## यीशु रा स्वर्ग जाणा

6 तिन्हें चेलै कठे होइया यीशु ना पुछू, हे प्रभु, कि त एही बौगतै इस्राइला रा राज्य फेरना? 7 तेइये तिन्हा बै बोलू, तेई बौगतै रे बारै ना जाणना परमेश्वरै रे हका ना सा तूसरै नी। 8 पर जैबै पवित्र आत्मा तुसा पैंधै एला तैबै तुसाबै शक्ति मिलणी होर यरुशलेम, सारै यहूदिया, सामरिया होर धौरती रे आखरी किनारै तक तूसै मेरै गवाह होणै। 9 ऐण्डा बोलै ना बाद यीशु तिन्हरै हेरदै-हेरदै स्वर्गा बै चैकुआ होर बादलै सौ तिन्हरी औछी ना गजिहाऊ। 10 चेलै जेबै तेइबै आसमाना धिरै हेरदै लागै ती ता शुणा, दूई मर्द चमकणू आलै शेतै झिकडै लाइया तिन्हा सामनै एजिया खडै हुए। 11 होर बोलदै लागै, हे गलीली मर्दो, तूसै किबै खडै होइया स्वर्गा धिरै भावदै लागै सी? ऐ यीशु जे तुसा हाम्मै

ना स्वर्गा बै चैकुआ जौस रीतिये तूसै ऐ जाँदा हेरु तेसा रीतिये एई भी एणा।

## मतियाह बै यहूदा रा अधिकार मिलणा

12 तैबे ते जैतून नाँ रे ढौगा ना जो यरुशलेमा ना सौत रोजै री दूरी पैंधे ती यरुशलेमा बै आरे। 13 जैबै ते तोखै पुजे ता ते तेसा कोठी पैंधे नौठे जौखे पतरस, यहूना, याकूब, अन्द्रियास, फिलिप्पुस, थोमा, बरतुलमई, मती, हलफई रा बेटा याकूब होर शमोन जिलौती होर याकूबा रा बेटा यहूदा रौहा ती। 14 ए सारै कई बेटडी होर यीशु री आमा मरियम होर यीशु रे भाई सेंघे एक मन होइया प्रार्थना ना लागी रौहै। 15 तिन्हा ध्याडै ना पतरस भाई बिचै जो कि लगभग एक शौऊ बीह माहू ती खडै होइया बोलदा लागी, 16 हे भाइयो, पवित्र शास्त्रा ना लिखू दा पूरा होणा जरूरी ती। जो पवित्र आत्मै दाऊदै रे मुँहै लाइया यहूदै रे बारै ना जो यीशु बै ढौकणू आलै रा अगुआ ती पैहिलै ना बोलू ती। 17 किबैकि सौ आसा बिचै गिणुआ होर सेवै रे कौमा ना आसा सेंघे शामिल ती। 18 तेइयै अधमै री कमाई ना एक छेत लेऊ होर उल्टा पौडू होर तेइरा पेट फुटू होर तेइरी सारी आँजा निकती। 19 एसा गला बै यरुशलेमा ना रौहणू आलै सारै लोका जाणा सी। तिन्है तेई छेता नाँ बी तिन्हरी भाषा ना "हकलदमा" अर्थात् लोहू रा छेत रखू। 20 किबैकि भजन सँहितै री कताबा ना लिखू सा, तेइरा घोर उजडू लोडी होर तोखै कोई नी रौहला होर तेइरा औहदा कोई होर लेला। 21 यहूजे रे बपतिस्मै ना लेइया स्वर्गा बै चैकिणै तक जेतरे बी रोजा तक यीशु आसा सेंघे एँदा-जाँदा रौहू होर जे लोका आसा सेंघे रौहै, 22 ऐ जरूरी सा कि तिन्हा ना एक माहू आसा सेंघे यीशु रे जिन्दै होणै रा गवाह बणला। 23 तैबै तिन्है दूई माहू खडै करै। एक युसुफ जुणीबै बरसबा बोला सी होर तेइरा पणनाँ युसतुस सा होर दुजा मत्तियाह खडा केरु। 24 तैबै तिन्है प्रार्थना केरी; हे प्रभु, तू जे सैभी रे मना

बै जाणा सा ए प्रगट केर कि तें इन्हा दूई ना कुण चुनू? 25 कि सेवै रै कोमा ना प्रेरिताई रै तेई औहदै बै लेला ज़ुणीबै छौड़िया यहूदा आपणी ज़ेगहा बै नौठा । 26 तैबै तिन्है तेइरै बारै ना चिठी पाई होर चिठी मत्तिय्याह रै नाँ री निकती होर स तिन्हा गयारा प्रेरित चेलै सेंधे गिणुआ ।

### पवित्र आत्मा रा एणा

2 जैबै पिन्तेकुसा रा ध्याडा आऊ ता ते सब एकी ज़ेगहा कठै ती । 2 होर एकदम आसमाना ना एक बड़े ब्यानै री छेड़ हुई होर तेथे लाइया जौखै ते बेठै ती स सारा घौर भौरुआ । 3 होर तिन्हा ना ओगी री जीभा फुटदी हेरुई होर तिन्हा हर एकी पेंधे ठहरी । 4 ते सारै पवित्र आत्मै लाइया भौरुए होर ते अन्य भाषा बोलदै लागै । 5 हरेक जाति रै यहूदी भक्त यरुशलमेना ना रोहा ती । 6 जैबै स छेड़ हुई ता लोकै री भीड लागी होर सैभै लोका डौरै किबैकि हरेकी ना ए शुणिया ती कि ए ते मेरी भाषा बोदा लागी सा । 7 ते सारै बड़े हैरान होइया बोलदै लागै, ए ज़ुणा बोलदै लागै सी कि ए गलीली नी आँथी । 8 तैबै किबै आसा ना आपणी-आपणी भाषा लागी सा शुणिदी? 9 आसै ता पारथी, मेदी, अलामी, मैसोपोटामिया, यहूदिया होर पुन्तुस होर आसिया, 10 फ़ुगिया, पमफ़ुलिया मिश्र होर लिबूआ जो कि कुरेन जैगै रै औरै-पौरै सा इन्हा सैभी जैगै रै रोहणु आलै सी होर रोमी, यहूदी, क्रेती होर अरबी भी सी । 11 पर आसै आपणी-आपणी भाषा ना तिन्हा ना परमेश्वरै रै बड़े-बड़े कोमै री चर्चा शुणा सी । 12 ते सारै हैरान हुए होर डौरदै-डौरदै एकी होरी बै बोलदै लागै कि ए की हौंदा लागी सा? 13 पर होरै ठह्रा केरिआ बोलू, “ए ता नशै ना सी ।”

### पतरसा रा भाषण

14 पतरस तिन्हा मुँझै खड़ा हुआ होर जोरा सेंधे बोलदा लागी, “ओ यहूदिओ होर यरुशलमेना ना रोहणु आलै ओ एसा गैला बै ज़ाणी लेआ होर मेरी गैला बै ध्याना सेंधे शुणा । 15 ज़ेण्डा तुसै समझदै लागै सी ए नशै ना नी आँथी किबैकि हाज़ी ता एकै पहर धशयाडा चढ़ू सा । 16 पर ए स गल सा जो परमेश्वरै योएल नाँ रै भविष्यवाणी केरनू आलै रै ज़रिरे बोली ती । 17 परमेश्वर बोला सा कि अन्तै रै ध्याडै ना एण्डा होणा कि मूँ आपणी आत्मा सेंधे सैभै माहू भौरनै होर तुसरै बेठै होर बेटी भविष्यवाणी केरनी । तुसरै ज़ुआन लोका दर्शन हेरनै होर बज़ुर्गा सुपनै हेरनै । 18 बल्कि मूँ आपणै दास दासी बी तिन्हा ध्याडै ना आपणी आत्मै लाइया भौरनै होर तिन्हा भविष्यवाणी केरनी । 19 मूँ आसमाना ना अदभुत् कोम होर घौरती पेंधे चिन्ह चमत्कार यानिकी लोहू, औग होर धुँए रा बादल रिहाणा । 20 प्रभु रै महान रोज़े रै एणै ना पैहिलै सूरज निहारा होणा होर ज़ोथ लाल होणी । 21 ज़ुण प्रभु रा नाँ लेला सिर्फ तेइरा उद्धार होणा । 22 ओ इस्राइलियो इन्हा गैला बै शुणा: कि यीशु नासरी एक माहू ती ज़ौसरा परमेश्वरा धिरै ना होणै रा सबूत तेइरै नोखै कोम होर चिन्ह चमत्कारा ना प्रगट सा जो परमेश्वरै तेइरै ज़रिरे तुसा मुँझै केरिआ रिहाए ज़ुणिबै तुसै आपू जाणा सी । 23 सौहै जैबै परमेश्वरै आपणी मर्जी होर होनहार ज्ञानै रै मुतआबिक दौकणै द्याऊ ता तुसा अधर्मी रै होथै स क्रूसा पेंधे चढ़ाइया मारनै द्याऊ । 24 पर सौह परमेश्वरै मोऊती रै बन्धना ना छुड़ाइया ज़िन्दा केरु किबैकि तेइरा मोऊती रै वशा ना रोहणा अनहोना ती । 25 दाऊद राजा तेइरै बारै ना बोला सा, “हाँऊ प्रभु बै हमेशा आपणै सामनै हेरदा रौहू किबैकि स मेरी दैहिणी धिरै सा ताकि हाँऊ कमजोर नी पौड़नू । 26 एसा वजहा ना मेरा मन खुश हुआ होर मेरी जिभ मगन हुई होर मेरै शरीरा ना एक आशा बैणी दी सा । 27 किबैकि तौ मेरै प्राण नरका ना नी छौड़नै होर न त आपणै पवित्र लोक चौकणै देणै । 28 तें मुँबै जीणै रा रस्ता रिहाऊ सा । त हाँऊ आपणै दर्शनै लाइया खुशी सेंधे भौरना । 29 हे भाइयो, हाँऊ तेई दाऊद राजै रै बारै ना बड़े हौंसलै सेंधे तुसाबै बोला सा कि स ता मूँआ होर पौथू बी होर तेइरी कन्न औजा तक आसरै औखै सा । 30 भविष्यवक्ता होइया होर ए जाणिया कि परमेश्वरै मूँ सेंधे कसम खाई सा कि मूँ तेरै वंशा ना एक माहू तेरी राजगद्दी पेंधे बशाणा । 31 तेइयै होणु आली गल पैहिलै हेरिया भविष्यवाणी केरी कि तेइरै प्राण नरका ना नी छौड़ुए होर न तेइरी देह चौकणै धिनी । 32 सौहै यीशु परमेश्वरै ज़िन्दा केरु जोसरै आसै सब गवाह सी । 33 एण्डै तरहै परमेश्वरै रै दैहिणै होथे लाइया सैभी ना उथड़े औहदै पाइया होर जोस पवित्र

आत्मा रा परमेश्वरै वचन धिना ती स तेइयै आसा पेंधे भेजी सा जे तुसै हेरा होर शुणा सी । 34 किबैकि दाऊद ता स्वर्गा बै नी चैदू; पर स आपू बोला सा, प्रभुए मेरै प्रभु बै बोलू, 35 मेरी दैहिणी धिरै बेश, जैबै तक कि हाँऊ तेरै बेइरी बै सजा नी देनू । 36 एबै सारा इस्राइली घराना पक्की तरहा जाणला कि परमेश्वरै सौहै यीशु ज़ुण कि तुसै क्रूसा पेंधे चढ़ाऊ, प्रभु बी ठहराऊ होर मसीह बी । 37 तैबै ए गल तिन्हा शुणनू आलै रै दिला ना लागी होर ते पतरस होर दूजै तिन्हा चेलै ना पुछदै लागै कि हे भाइयो आसा की केरना? 38 पतरसै तिन्हा बै बोलू, आपणै पापा ना मन फेरा होर तुसा ना हरेक माणू आपणै-आपणै पापै री माफी री तैइयै यीशु मसीह रै नाँ ना बपतिस्मा लेला, तैबै तुसा पवित्र आत्मा रा दान पाणा । 39 किबैकि ए वायदा तुसाबै होर तुसरी सन्ताना बै होर तिन्हा सैभी दूर-दूरै रै लोकै री तैइयै सा ज़ुणिबै आसरा प्रभु परमेश्वर आपू हागै शाधला । 40 तेइयै बोहू सारी गैलै री गुआही देइया समझाए कि तुसै आपू बै एसा टेडी ज़ाति ना बचात् । 41 जेतरे लोकै तेइरा वचन ग्रहण केरु तिन्है बपतिस्मा लेऊ होर तेई ध्याडै ना लगभग त्रा हजार माहूए बपतिस्मा लेऊ होर तिन्हा सेंधे मिलै । 42 ते तिन्हा चेलै ना शिक्षा पाणै, संगति केरनै, प्रभु भोज केरनै होर प्रार्थना केरनै ना मगन रौहै ।

### विश्वासी री संगती

43 सैभी लोका बै डौर पोई किबैकि तिन्हा चेलै ना बोहू सारै अदभुत् कोम होर चिन्ह चमत्कार प्रगट होआ ती । 44 जेतरे बी लोका परमेश्वरा पेंधे बशाह केरा ती ते सारै कैठै रौहा ती होर तिन्हरी सारी ज़ीजा साँझै री ती । 45 ते आपणी ज़रूरती रै मुताबिक आपणी सम्पति होर समाना बै बेचिआ आपू ना बोंडा ती । 46 ते हर रोज़ एक मन होइया मन्दिरा ना कैठा होआ ती होर घोरा-घौरा रोटी चोड़िया बड़ी खुशी सेंधे होर सीधै मना सेंधे रोटी खा ती, 47 होर परमेश्वरै रा भजन केरा ती । सारै लोका तिन्हा ना खुश ती होर जेतरे लोका उद्धार पा ती तिन्हा बै प्रभु हर रोज़ तिन्हा ना मिला ती ।

### लंगड़े भिखारी रा ठीक होणा

3 पतरस होर यहून्ना त्रीजै पौहरै प्रार्थना केरनै री तैइयै मन्दिरा बै जाँदै लागै ती, 2 होर लोकै एक एण्डा माहू आपणा लाऊ ती जो लँगड़ा पैदा हुआ ती । ते तेईबै मन्दिरै रै दुआरा आगै बशाह ती ताकि सौ मन्दिरा बै एणू आलै न भीख मुंगला होर तेसा जैगा रा नाँ सुन्दर ती । 3 जैबै तेइयै पतरस होर यहून्ना मन्दिरा बै जाँदै हेरै ता तिन्हा न भीख माँगी । 4 पतरसै यहून्ना सेंधे तेई धिरै ध्याना सेंधे हेरिया तेइबै बोलू, आसा धिरै हेर । 5 सौ किछ मिलणै री आशा सेंधे तिन्हा धिरै हेरदा लागी । 6 तैबै पतरसै बोलू, चाँदी होर सुना ता मूँ हागै नी आँथी पर जे मूँ आगै सा तेई हाँऊ तौभै देआ सा: यीशु मसीह नासरी रै नाँ ना चैल । 7 पतरसै सौ तेइरै दैहिणै होथे दौकिया चैकू होर तुरन्त तेइरी ज़ोंघा ना जान आई । 8 सौ उछलिया खैड़ा हुआ होर आँढदा लागी होर परमेश्वरा रा भजन केरदै-केरदै तिन्हा सेंधे मन्दिरा बै नौठा । 9 सैभी लोकै सौ चैलदा फिरदा होर परमेश्वरा रा भजन केरदै हेरिया, 10 सौ पछयाणू कि ए सौहै लँगड़ा सा जो मन्दिरै रै दुआरा आगै बेशिआ भीख मुँगा ती । तेईबै चैलदै-फिरदै हेरिआ ते हैरान होर परेशान ती ।

### मंदिरा न पतरसा रा उपदेश

11 जैबै सौ पतरस होर यहून्ना ना दौकुआ ती ता सैभै लोका हैरानी सेंधे सुलैमान नाँ री जैगा बै तिन्हा आगै आए । 12 ए हेरिआ पतरसै लोका बै बोलू, हे इस्राइलियो, तुसै एई माणू हेरिआ किबै हेरान होआ सी होर आसा धिरै किबै एण्डै हेरदै लागै सी कि मैना आसै ए आपणी शक्ति होर भक्ति सेंधे ए चैलदा फिरदा केरु सा । 13 इब्राहीम, इसहाक होर याकूबा रा परमेश्वर, आसरै बापदादै रै परमेश्वरै आपणै सेवक यीशु री महिमा केरी ज़ुण तुसै दौकणै द्याऊ ती होर जैबै पिलातुस राजै तेइबै छौड़नै रा वचार केरु ता तुसै तेई सामनै तेइरा नाँह केरु । 14 तुसै तेई पवित्र होर धर्मी रा नाँह केरु होर तेइरै बदलै एकी खूनी बै छौड़नै री विनती केरी । 15 तुसै सौ ज़िन्दगी देणू आला मारु पर परमेश्वरै स मूँएदै ना ज़िन्दा केरु होर एसा गैलै रै आसै गुआह सी । 16 तेही रै नाँ न होर जो आसरा बशाह तेइरै नाँ पेंधे सा तेइयै एई माहू बै शक्ति धिनी

होर तुसा सामनै भला चंगा केरु । 17 हे भाइयो हाँऊ जाणा सा कि तुसै होर तुसरै नेतै ऐ कोम अनजानै ना केरु । 18 पर जे गैला परमेश्वरै आपणै भविष्यवक्तै रै मुँहै लाइया पैहिलै दैसी ती कि तेइरै मसीह दुःख चकणा ते गैला परमेश्वरै एसा रीतिरे पूरी करी। 19 ऐबै आपणै-आपणै पापा ना मन फेरा ताकि तुसरै पाप खत्म होलै होर तुसै प्रभु सामनै शान्ति पालै, 20 होर सौ तेई मसीह यीशु बै भेजला जो पैहिला न तुसरी तैइयै ठहराऊ सा। 21 ऐ जरूरी सा कि स स्वर्गा ना तेई बाँगता ढौई रोहला जैबै तक कि स सैभी गैला रा सुधार नी केरला जौसरै बारै ना परमेश्वरै आपणै पवित्र भविष्यवक्तै रै मुँहै लाइया केरी सा जो सँसार बैणनै ना लेइया होंदै आरे सी । 22 जैण्डा कि भविष्यवाणी केरनू आलै मूसै बोलू, प्रभु परमेश्वरा तुसरै भाई मुँझै ना तुसरी तैइयै एक भविष्यवक्ता चकणा जेकिछ स तुसाबै बोलला तेइरी शुणीत्। 23 पर हर एक सौ माहू जुण तेई भविष्यवक्तै री नी शुणला ता तेई तिन्हा लोका मुँझै ना नाश केरला। 24 भविष्यवाणी केरनू आलै शमुएला ना लेइया तेइना बाद जेतरे बी भविष्यवक्ता आरे तिन्है सैभियै इन्हा ध्याडे रै बारै ना सँदेश धिना सा। 25 तुसै भविष्यवक्तै री सन्तान होर तेई वायदै रै भागीदार सी जो परमेश्वरै तुसरै बापदादा सँघै केरु सा। तेइयै इब्राहीमा बै बोलू, तेरै वँशै लाइया धौरती रै सैभी घरानै रै लोका आशीष पाणी। 26 परमेश्वरै आपणा सेवक तुसा आगै भेजू कि तुसा ना हर एकी बै पापा फेरिआ तुसाबै आशीष देला।

### बड़ी सभा रै सामणै पतरस होर यूहन्ना

4 जैबै ते लोका बै बोलदै लागै ती ता महापुजारी, मन्दिरै रे मुख्य होर सदकी लोका तौखै आरे। 2 ते झिकुऐ ती किबैकि यीशु रै चेलै लोका बै सिखा ती होर उदाहरण देइया यीशु रै मूँरैदे ना जिन्दै होणै रा प्रचार केरा ती । 3 तिन्है ते ढौकिआ दूई रोजा ढौई हवालाता ना रखै किबैकि सोझ हुई ती । 4 पर जेतरे लोकै प्रभु रा वचन शुण तिन्है बोहू सारै लोकै विश्वास केरु । तिन्हरी गिनती पाँज हजार मर्दै रै लगभग हुई। 5 दुजै ध्याडी तिन्हा ढौकणु आलै मुख्य, पराणियै, धर्मविधि ज्ञाणनू आलै, 6 महापुजारी हन्ना होर कैफा होर यूहन्ना, सिकन्दर जेतरे पुजारी री खानदानी रै ती ते सारै यरूशलेमा ना कठा हुऐ। 7 ते तिन्हा बै बिचा ना खडै केरिआ पुछदै लागै, “तुसै ऐ कोम कुणी शक्ति सँघै होर कौस रै नाँ ना केरु? 8 तैबै पतरसै पवित्र आत्मा ना भौरुइआ तिन्हा बै बोलू, 9 हे मुख्य होर पराणियो! ईई कमजोर माहू सँघै जे भलाई केरुई सा अगर औज आसा ना तेई रै बारै ना पुछिआ सा कि सौ कैण्डे ठीक हुआ। 10 तुसै सारै होर सारै इस्त्राइली लोका ज्ञाणा कि जो यीशु नासरी तुसै कूसा पँधे चढ़ाऊ होर परमेश्वरै स मूँरैदे ना जिन्दा केरु, ऐ माहू तेही यीशु मसीह नासरी रै नाँ ना भला चंगा हुआ। 11 ऐ सौहै पाथर सा जो कि तुसै राजमिस्त्रिरे निक्कमा बुझू होर स कुणै रा पाथर बैण। 12 होर कौसी दुजै रै नाँ ना मुक्ति नी आँधी किबैकि स्वर्गा हेठै माहू बै कोई होर नाँ नी धिना जौसरै नाँ ना आसै मुक्ति पाई सका सी । 13 जैबै तिन्है पतरस होर यूहन्ना रा उत्साह हेरु होर ज्ञाण कि ए ता नपौढ होर सीधै माणू सी ता ते हेरान हुऐ। तैबै तिन्है ते पछियाणै कि ए यीशु सँघै रोहै सी । 14 जो माहू ठीक होइया तिन्हा सँघै खडा ती तेई हेरिआ ते तिन्हैरै खिलाफ किछ नी बोली सकै। 15 पर तिन्है तिन्हा बै सभा ना बाहरै जाणै रा हुकम केरु होर आपू ना वचार केरदै लागै, 16 कि आसा इन्हा माहू सँघै की केरना? किबैकि इन्है जे चमत्कार केरु स यरूशलेमा ना रोहणू आलै सैभी लोका सामनै प्रगट सा होर आसै तथा रा नाँह नी केरी सकदै। 17 पर ऐ गल लोका ना बोहू नी लोडी फैली, आसा ते धमकाणै कि ते ईई नाँ ना दुजी घेरै कौसी माहू सँघै गल नी केरलै। 18 तैबै ते तिन्है शाधै होर तिन्हा बै कडे हुकम देइआ ऐ बोलू, कि तुसै यीशु रै नाँ ना किछ मतेइत् बोलदै होर सिखादै बी मतेइत्। 19 पर पतरस होर यूहन्ने तिन्हा बै जवाब धिना, कि तुसै फसला केरा कि ऐ परमेश्वरा सामनै भला सा कि आसै परमेश्वरै री गैला ना जादा तुसरी गैला बै मैनलै। 20 किबैकि ऐ ता आसरै होई नी सकदा कि जे आसै हेरु होर शुणू तेई बै नी बोललै। 21 तैबै तिन्है ते होर बी जादा धमकाइआ छौडै किबैकि लोकै री वजहा ना तिन्हा बै सजा देणै री कोई वजहा नी मिली किबैकि जे घटना हुई ती तेसरी वजहा ना सैभै लोका परमेश्वरै री महिमा केरा ती । 22 किबैकि स माहू जुणी पँधे ऐ चमत्कार हुआ ती सौ चाही बौर्षा ना बी जादा उम्रा रा ती ।

### विश्वासी री प्रार्थना

23 ते छुटिआ आपणै सँघी हागै आरे होर जेकिछ महापुजारी होर पराणिए बोलू ती तिन्हा बै दैसू। 24 ऐ शुणिआ तिन्है एक मन होइआ ज़ोरा सँघै परमेश्वरा बै बोलू, हे स्वामी! स्वर्ग, धौरती, समुद्र होर जेकिछ इन्हा ना सा तथा बै बणाणू आला तूहै सा। 25 तँ पवित्र आत्मै रै ज़रिऐ आपणै सेवक आसरै बापू दाऊदै रै मुँहै लाइआ बोलू, होरी ज़ातिऐ हुल्लड किबै मचाऊ होर देशै रै लोकै बेकारै री गैला किबै सोची? 26 प्रभु होर तेइरै मसीहै रै खिलाफ धौरती रै राजै खडै हुऐ होर हाकिम कठा हुऐ। 27 किबैकि सँघिऐ तेरे सेवक यीशु रै खिलाफ जौसरा अभिषेक तँ केरु, हेरोदेस, पुन्तियुस पिलातुस बी होरी ज़ाति होर इस्त्राइली सँघै ईई नगरा ना कठा हुऐ। 28 ताकि जेकिछ तेरी शक्ति होर बुद्धिमानी सँघै पैहिलै ना ठहराऊ सा ते तेइबै केरलै। 29 ऐबै हे प्रभु तिन्हरी धमकी बै हेर; होर आपणै भक्ता बै दान दै कि ते तेरा वचन बडै हॉसलै सँघै शुणालै, 30 होर लोका बै ठीक केरनै री तैइरे आपणै हौथ आगै केर कि चिन्ह चमत्कार होर अदभुत् कोम तेरे सेवक यीशु रै नाँ ना केरिलै। 31 जैबै तिन्है प्रार्थना केरी ता जौखै ते बेटै ती स ज़ेगा हिली होर ते पवित्र आत्मा ना भौरुऐ होर ते परमेश्वरा रा वचन बडै हॉसलै सँघै शुणादै लागै।

### विश्वासी रा आपू न मेल मिलापा रा जीवन

32 विश्वास केरनू आलै री मण्डली एक मन होर एक आत्मा ना ती । तिन्ह ना कोई बी आपणी सम्पति बै आपणी नी ती बोलदा बल्कि तिन्हारा सबकिछ साँझै रा ती । 33 ते प्रेरित लोका प्रभु यीशु रै जिन्दै होणै री गुआही दँदै रोहै होर तिन्हा सैभी पँधे प्रभु रा बड़ा अनुग्रह ती । 34 तिन्हा ना कोई बी दरिद्र नी ती आँधी किबैकि जुणि हागै ज़मीन या घौर ती ते तिन्हा बेचिआ तेथै री कीमत तिन्हा चेलै हागै आणिआ रखा ती । 35 जुणि री ज़ेण्डी जरूरत होआ ती ते आपू ना बोडा ती । 36 युसुफ नाँ रा एक माहू कुपुसा रा एक लेवी ती जौसरा नाँ तिन्हे चेलै बर-नबा यानिकी (शान्ति रा बेटा) रखू ती । 37 तेइरी किछ ज़मीन ती जो तेइयै बेची होर तेथै रै ढैबुऐ आणिआ तिन्हा प्रेरित चेलै हागै रखी।

### हनन्याह होर सफीरा

5 हनन्याह नाँ रै माहू होर तेइरी लाडी सफीरे किछ ज़मीन बेची, 2 होर तेथै री कीमती रै किछ ढैबुऐ आपू आगै रखै। एसा गैला बै तेइरी लाडी ज़ाणा ती होर तथा रा एक हिस्सा नेइआ तिन्हा चेलै री ज़ौघा हागै रखू। 3 पर पतरसै बोलू, हे हनन्याह! शैतानै तेरे मैना ना ऐ गैल किबै पाई कि तू पवित्र आत्मा सँघै झूठ बोलला होर ज़मीनै री कीमती रै किछ ढैबुऐ आपू आगै रखला? 4 जैबै तक स ज़मीन त हागै ती कि तेरी नी ती आँधी? होर जैबै बिकी ता कि तेरे वशा ना नी ती आँधी? तँ ऐ गैल आपणै मना ना किबै वचारी? तँ माहू सँघै नी बल्कि परमेश्वरा सँघै झूठ बोलू। 5 इन्हा गैला शुणिआ हनन्याह लोमा पौडू होर स मूँआ। जेतरे बी लोकै ऐ गैला शुणी तिन्हा बै बड़ी डौर पौई। 6 तैबै ज़ुआन लोकै तेइरी अर्थी बणाई होर बाहरै नेइआ सौ पौथू। 7 लगभग त्रा घँटै बाद तेइरी लाडी बी एसा घटना शुणिआ भीतरै आई। 8 तैबै पतरसै तेसा बै बोलू, मुँभै दैस कि तुसै ऐ ज़मीन एतरै बै बेची?तेसै बोलू, हाँ आसै ऐ एतरै बै बेची। 9 पतरसै तेसा बै बोलू कि तुसै प्रभु री आत्मा परखणै री तैइयै एकता केरी सा? हेर तेरे लाडे बै पौथणू आलै दुआरा आगै खडै सी होर तिन्हा तू बी बाहरै नेणी। 10 तैबै सौ तुरन्त तेइरी ज़ौघा पँधे पौई होर मुँई। तिन्है ज़ुआन लोकै स भीतरै एज़िआ मूँईदी हेरी होर बाहरै नेइआ सौ तेसरै लाडे सँघै पौथी, 11 होर सारी मण्डली होर एसा घटना बै शुणनू आलै सैभी लोका बै बड़ी डौर पौई।

### चमत्कार होर नौखे कौम

12 ते चेलै आपणै हौथे लोका मुँझै बोहू सारै चिन्ह चमत्कार होर अदभुत् कोम केरिआ रिहा ती होर ते एक मन होइआ मन्दिरा ना कठा होआ ती । 13 पर होरी बै हिम्मत नी ती पौडवी कि ज़ाइआ तिन्हा ना मिलदै पर तैबै बी लोका तिन्हरी बडाई केरा ती । 14 प्रभु पँधे विश्वास केरनू आलै बोहू सारै मर्द

होर बेटड़ी होर बी ज़ादा प्रभु री मण्डली एज़िआ मिलदैं रौहैं। 15 लोका बीमार माणू बै आणिया सड़का ना माँजै पैंधैं लिटा ती कि जैबै पतरस एला ता तेइरी परछाई तिन्हा पैंधैं पौडली, 16 होर यरुशलैमै रैं औरलै-पौरलै ग्रॉ ना बी बोहू लोका बीमार होर चेट्टू फ़ैसूदैं लोका बै आणिया कठा होआ ती होर सैंभै लोका ठीक केरिआ ती ।

### चेले री गिरफ्तारी

17 तैबै महापुजारी होर तेइरै सैंघी जे सदकी पैंधैं रैं ती ते झिका सैंघे भोरुए, 18 तिन्है ते चेलै ढौकिआ बन्दी घौरा ना बन्द केरै । 19 पर राती प्रभु रैं एकी स्वर्गदूतै बन्दी घौरा रा दुआर खोलू होर तिन्हा बै बाहरै आणिया बोलू, 20 ज़ाआतू, मन्दिरा ना खड्डे होइआ एसा जिन्दगी री गैला सैंभी लोका बै शुणातू । 21 ते एसा गल शुणिआ दोती झिशा मन्दिरा ना ज़ाइआ उपदेश देन्दै लागै; पर महापुजारी होर तिन्है सैंघिरे महासभा रखी होर इस्त्राइली रैं सब पराणिए कठा केरै होर बन्दी घौरा बै सँदेश भेजू कि ते तिन्हा बै आणलै । 22 पर सिपाही बै ते बन्दी घौरा ना नी मिलै होर एज़िआ बोलू, 23 कि आसै बड्डे ध्याना सैंघे हेरु कि बन्दी घौर बन्द ती होर पौहरैदार बी दुआरा हागै खड्डे ती पर जैबै दुआर खोलिआ भीतर नौठै ता कोई नी मिलू । 24 जैबै मन्दिरै रैं मुख्य होर महापुजारियै ए गैला शुणी ता ते बडी चिन्ता ना पोए कि ऐ की होदा लगा सा । 25 एतरै ना कौसिए एज़िआ तिन्हा बै दैसू कि हेरा बन्दी घौर ता बन्द सा पर ते लोका मन्दिरा ना खड्डे होइआ लोका बै उपदेश देन्दै लागै सी । 26 तैबै तिन्है ते सिपाही सैंघे ज़ाइआ आणै पर ज़बरदस्ती नी किबैकि ते लोका ना पाथरै मारनै बै डौरा ती । 27 तिन्है ते आणिया महासभा ना खड्डे केरै होर महापुजारिये तिन्हा ना पुछू, 28 कि आसै तुसाबै कडा हुकम नी ती केरु कि तुसै ई नौ ना उपदेश हेरीत् केरदें? तैबै बी हेरा, तुसै सारा यरुशलैम आपणै उपदेश लाइआ भोरु सा होर तेई माहू लोहू आसैरै गौआ पैंधे आणना चाहा सी । 29 तैबै पतरस होर चेलै जवाब धिना कि माहू री आज्ञा ना ज़ादा जरूरी परमेश्वरै री आज्ञा रा पूरा केरना सा । 30 आसैरै बापदादैं रैं परमेश्वरै यीशु जिन्दा केरु ज़ुण कि तुसै क्रूसा पैंधे लटकाइआ मारु ती । 31 परमेश्वरै सौहै प्रभु होर उद्धार देणू आला ठहराऊ होर आपणै दैहिये हौथ सैंभी ना उथडा केरु कि स इस्त्राइली लोका बै पापा ना मन फेरनै री शक्ति होर पापै री माफी देला । 32 आसै इन्हा गैलै रैं गुआही सी होर पवित्र आत्मा बी जे परमेश्वरै तिन्हा बै धिनी सा जो तेइरी आज्ञा बै मैना सी । 33 ए शुणिआ तिन्हा बै जलन हुई होर ते मारनै चाहै । 34 पर गमलीएल नॉ रैं फरीसिए जो सैंभी लोका मुझे मोहतबीर ती तेइरे सभा ना खड्डे होइआ तिन्हा चेलै बै थोड़ी देर बाहरै खोलणै रा हुकम केरु । 35 तैबै तेइयै बोलू, हे इस्त्राइलियो जेकिछ तुसै इन्हा माहू सैंघे केरना चाहा सी सोचि-समझिआ केरीत् । 36 किबैकि इन्हा ध्याडै ना पैहिलै यियूदास एण्डा बोलदैं ऊठू कि हाँऊ बी किछ सा होर कोई चार शौऊ माणू तैई सैंघे मिलै होर जेतरे लोका तेइबै मैना ती ते सारै तितर-बितर हुए होर नष्ट हुए । 37 तेथा ना बाद नॉ लिखाई रैं रोज़ा ना यहूदा गलीली उठू होर तेइयै बी किछ लोका आपू धिरा बै केरै होर स बी नष्ट हुआ होर जेतरे लोका तेइबै मैना ती ते सारै तितर-बितर हुए । 38 एबै हाँऊ तुसाबै बोला सा कि इन्हा माहू ना दूर रौहात् होर तिन्हा सैंघे किछ कोम मता रैखदैं किबै कि अगर ऐ धर्म या कोम माहू री तरफा ना सा ता एई मिटणा । 39 पर अगर परमेश्वरै री तरफा ना सा ता तुसै ई बै कदी नी मिटाई सकदैं । कोइछे एण्डा नी लोडी हुआ कि तुसै परमेश्वरा सैंघे लडनू आलै ठहरलै । 40 तैबै तिन्है तेइरी गैल मैनी होर ते चेलै शादिआ मारनै घाए होर ऐ हुकम केरु कि तुसै यीशु रैं नॉ ना दुजी घेरै गैला हेरीत् केरदैं । 41 ते एसा गैला ना खुश होइआ महासभा सारनै ना नौठै कि आसै यीशु रैं नॉ ना तेइरी तैइरे बेइजत होणै रैं लायक ठहरै, 42 होर हर रोज़ मन्दिरा ना होर घौर-घौर ज़ाइआ सुसमाचार होर यीशु रैं नॉ ना उपदेश देणै ना नी रुकै कि यीशु मसीह सा ।

### सौत सेवका रा छांटणा

6 तिन्हा ध्याडै ना जैबै चेलै बोहू होंदैं लागै ता युनानी भाषा बोलणू आलै इब्रानी लोका पैंधे कुडकुणादैं लागै कि हर रोज़े री सेविकाई ना आसरी

विधवै री कोई सुधि नी लेंदा । 2 तैबै तिन्है बारा प्रेरित चेलै री मण्डली आपू हागै शाधी होर बोलू, ऐ ठीक नी आँधी कि आसै परमेश्वरा रा वचन छौड़िआ ख्याणै-प्याणै री सेवा ना रौहलै । 3 एबै हे भाइयो, आपू ना सौत एण्डे मर्दा बै चुना जो पवित्र आत्मा होर बुद्धि ना सिद्ध होलै ताकि आसै तिन्हा बै ई कोमा पैंधे रखलै कि ते विधवा रा ख्याल रखलै । 4 पर आसा ता प्रार्थना होर वचनै री सेवा ना लागी रौहणा । 5 ऐ गैल सारी मण्डली बै शोभली लागी होर तिन्है स्तिफनुस नॉ रा एक मर्द जो कि विश्वास होर पवित्र आत्मा ना सिद्ध ती, फिलिप्पुस, प्रखुरुस, नीकानोर, तीमोन, परमिनास होर अन्ताकीवाला नीकुलाउस जे यहूदी बैणू ती चुनै, 6 होर तिन्हा प्रेरित चेलै सामनै खड्डे केरै होर तिन्हा पैंधे हौथ रखिआ तिन्हरी तैइयै प्रार्थना केरी । 7 परमेश्वरा रा वचन फेलदा रौहू होर यरुशलैमा ना चेलै री गिनती बढदी रौही होर पुजारी रा एक बडा समाज एसा विचार-धारै रैं अधीन हुआ ।

### स्तिफनुस री गिरफ्तारी

8 स्तिफनुस परमेश्वरै रैं अनुग्रह होर शक्ति सैंघे लोकै रैं बिचा ना बड्डे अदभुत् कोम होर चिन्ह चमत्कार रिहा ती । 9 तैबै तेसा लिबरतिनै रैं अराधना घौरा ना कुरेनी, सिकन्दरिआ, किलकिआ होर एशियै रैं कई लोका उठिआ स्तिफनुसा सैंघे वहस केरदैं लागै । 10 पर तेई ज्ञान होर आत्मा रा ते लोका सामना नी केरी सके । 11 पर तिन्है कई लोका खड्डे केरै होर ते बोलदैं लागै, कि आसै ऐ मूसा होर परमेश्वरै रैं खिलाफ गैला केरदा शुणू सा । 12 होर तिन्है लोका, तिन्है पराणिए होर धर्मविधि सिखाणू आलै भडकाइआ स ढौकिआ महासभा बै आणू । 13 तिन्है झूठै गवाह खड्डे केरै होर तिन्है बोलू कि ऐ माहू एसा पवित्र जैगै रैं बारै ना होर धार्मिक विधि रैं खिलाफ बोलणा नी छौड़दा । 14 किबैकि आसै एण्डा बोलदा शुणू कि यीशु नासरी ऐ जैगा ढाणी होर ते रीति बदलणी जे मूसै आसा बा धिनी सी । 15 तैबै सभा ना बेठेदैं सैंभी लोकै तेइरा मुँह स्वर्गदूता साही चमकदा हेरु ।

### स्तिफनुस रा भाषण

7 तैबै महापुजारिये बोलू, कि ए गैला एण्डे सी? 2 तेइयै बोलू, हे भाइयो, होर पितरो शुणा, आसरा बापू इब्राहीम हाराना ना रौहणै ना पैहिलै जैबै मैसोपोटामिआ ना ती ता शक्तिशाली परमेश्वरै तेइबै दर्शन धिना, 3 होर तेइबै बोलू कि तू आपणै देश होर परिवारा ना निकलिआ तेई देश बै ज़ा जो मूँ तौभै रिहाणा । 4 तैबै सौ कसदी रैं देशा ना निकलिआ हारान देशा ना रौहू होर तेइरै बापू री मोऊती ना बाद परमेश्वरै सौ तौखै ना आणिया ई देशा ना बसाऊ जौखै तुसै रौहा सी, 5 होर तेइबै जोंघा रखणै बै बी जैगा नी धिनी पर वायदा केरु कि मूँ ऐ देश त होर त ना बाद तेरै वँशै रैं हौथा ना देणा जैबैकि इब्राहीमै रैं तेई बौगतै कोई औलाद नी ती आँधी । 6 परमेश्वरै ऐ बोलू, तेरी सन्तानै रैं लोका पराए देशा ना परदेशी होणै होर तिन्हा ते गुलाम बणाणै होर चार शौऊ बौषा ढौई दुःख देणा । 7 तैबै परमेश्वरै बोलू, ज़ुणी ज़ाति रैं तिन्हा गुलाम होणा मूँ तेसा ज़ाति बै सज़ा देणी होर एथा ना बाद तिन्हा एसा जैगा ना मेरी सेवा केरनी । 8 तेइरे परमेश्वरा सैंघे खतना केरनै रा वचन बोनु होर एसा दशा ना तेइरै इसहाक पैदा हुआ । होर औठुए रोज़े तेइरा खतना केरु, होर इसहाका ना याकूब होर याकूबा ना बारा कुलपति पैदा हुए । 9 तिन्है कुलपतियै युसुफा सैंघे जलन केरिआ स मिस्र देशा बै ज़ाणू आलै लोका बै बँचू पर परमेश्वर तेई सैंघे ती । 10 परमेश्वरै सैंभी दुःखा ना छुड़ाइआ तेइबै मिस्रै रैं राज़े फिरौना सामनै अनुग्रह होर बुद्धि धिनी होर तेइयै स मिस्र होर आपणै पूरै घरानै रा हाकिम ठहराऊ । 11 तैबै मिस्र होर सारै कनान देशा ना अकाल पौऊ होर बडा भारी दुःख हुआ होर आसैरै बापदादैं बै अनाज नी ती मिलदा । 12 पर याकूबै ऐ शुणिआ कि मिस्र देशा ना अनाज सा आसैरै बापदादैं पहली बार भेजै, 13 होर दुजी बार युसुफ आपणै भाई सामनै जाहर हुआ होर युसुफै री ज़ाति फिरौन राज़े बै पैता चेली । 14 तैबै युसुफै आपणा बापू याकूब होर पूरा परिवार जो कि पझतर माहू ती ते थाथै । 15 तैबै याकूब मिस्रा बै नौठा होर तौखै आसैरै ते बापदादैं मूँ, 16 होर ते शिकिम नॉ री जैगा ना पज़ाइआ तेसा कब्र ना रैखे जो इब्राहीम चाँदी देइआ हमोरै री सन्ताना ना लेई ती । 17 पर जैबै तेई वायदैं रैं पूरै होणै रा बौगत नेड आऊ जो परमेश्वरै इब्राहीमा

सँघे केरु ती तैबे तक मिस्रा ना ते लोका बढदै रोहै होर बोहू हुऐ, 18 जैबे तक कि मिस्रा ना दूजा राजा नी हुआ जे युसुफा बै नी ती ज्ञाणदा। 19 तेइयै आसरी जाति सँघे चतुराई केरिआ आसरे बापदादा सँघे एतरा बुरा व्यवहार केरु कि तिन्हा आपणे शोहरु शेटणे पौऐ कि ते जिन्दे नी लोडी रोहै। 20 तेई बौगतै मूसा पैदा हुआ। स बोहू शोभला ती होर त्रा म्हीनै तक आपणे बापू रै घौरा ना धाचुआ। 21 पर जैबे स पाणी ना शेटुआ ता फिरौन राजे री बेटिऐ स चेकू होर आपणे बेटै बणाइआ धाचू, 22 होर मूसा बै मिस्री री सारी विद्या पढाई। मूसा सैभी गैला होर कोमा ना सामथी ती। 23 जैबे स चाही बौषा रा हुआ ता तेइरै मना आपणे इस्राइली भाई सँघे मिलणे रा विचार आऊ, 24 होर तेइयै एकी माहू पँधे जुर्म होंदै हेरिआ स बचाऊ होर तेई मिस्री मारिआ तथा रा बदला लेऊ। 25 तेइयै सोचू कि मेरै भाई समझणा कि परमेश्वरा मेरै हौथे तिन्हरा उद्धार केरना पर तिन्हे नी समझू। 26 दूजे ध्याडी जैबे ते आपू ना लडदै लागै ती ता स तौखे आऊ होर समझाए कि तुसै ता भाई-भाई सी तुसै एकी होरी सँघे किबै लडा सी? 27 पर जे आपणे पदेशी सँघे अन्याय केरदा लागा ती तेइयै स एण्डे बोलिआ हटाऊ कि तू कुणिए आसा पँधे हाकिम होर फैसलै केरनू आला ठहराऊ? 28 जुणि रीतिऐ तँ काल मिस्री मारू तू कि तेसा रीतिऐ मुँभे बी मारना चाहा सा? 29 एसा गल शुणिआ मूसा तौखे ना भेगू होर मिद्वान देशा ना परदेशी होइआ रोहदा लागा होर तौखे तेइरै दूई बेटै पैदा हुऐ। 30 जैबे चाली बौषा बीती ता एकी स्वर्गदूतै सीनै नाँ रै दौगे रै बोणा ना भौकदै झौकडै रै जरिऐ दर्शन धिना। 31 मूसा ऐ हेरिआ हैरान हुआ होर जैबे सौ हेरनै री तँइरे भेटी नौठा ता प्रभुऐ तेइबै ऐ बोलू, 32 “हाँऊ तेरै बापदादा, इब्राहीम, इसहाक होर याकूबा रा परमेश्वर सा।” तैबे मूसा कोमदा लागा होर तेइबै हेरनै री हिम्मत नी रोहै। 33 तैबे प्रभुऐ तेइबै बोलू, “आपणी जोंघा ना बूट खोल किबैकि जौस जैगा ना तू खडा सा स चोखी जैगा सा।” 34 में सत्रिऐ आपणे लोक जो मिस्र देशा ना सी तिन्हरी बुरी दशा हेरी सा। में तिन्हरा चोंगना होर रोणा शुणू सा। मूँ ते ऐबै छुड़ाणे। ऐबै एज मूँ तू मिस्र देशा बै भेजणा। 35 जुणी मूसा बै तिन्हे नकारा बोलू ती सौहै परमेश्वर भौकदै झौकडा ना दर्शन देइआ स्वर्गदूतै रै जरिऐ तिन्हा पँधे हाकिम होर फैसलै केरनू आला ठहराऊ होर मिस्र देशा बै भेजू। 36 एई माहूऐ ते मिस्र, लाल समुद्र होर बोणा ना चाली बौषा तक अदभुत कोम होर चिन्ह चमत्कार रिहाई-रिहाइआ कौडिआ आणे। 37 ऐ सौहै मूसा सा जुणिए इस्राइली बै बोलू कि परमेश्वरा तुसरै भाई मुँभे ना मूँ साही एक भविष्यवक्ता चेकणा। 38 ऐ सौहै सा जुणिए बोणा ना कलीसिऐ रै बीचा ना तेई स्वर्गदूता सँघे सीनै नाँ रै दौगा पँधे तेई सँघे गैला केरी होर आसरे बापदादा सँघे ती। तेइबै परमेश्वरै रै जिन्दे वचन मिलै कि सौ आसा तक पजाला। 39 पर आसरे बापदादै तेइरी नी मैनी बल्कि तेइबै हटाइआ आपणे मन मिस्रा धिरा बै फेरै, 40 होर हारुना बै बोलू, आसरे तँइरे एण्डा देऊ बणा जो आसा आगे-आगे चैलला किबैकि जुणी मूसै आसै मिस्रा ना कौडै सी आसै नी ज्ञाणदै कि तेइबै की हुआ? 41 तिन्हा ध्याडै ना तिन्हे बौछू री एक मूरत बणाई होर तेसा मूरती हागे बौई धिनी होर ते आपणे हौथे रै कोमा ना मगन होंदै लागै। 42 तैबे परमेश्वरै तिन्हा ना मुँह मोडू होर ते छौडी धिनै कि ते आसमानै री चीजा बै पुजलै। जैण्डा कि भविष्यवाणी केरनू आलै री कताबा ना लिखू सा, हे इस्राइलै घरानै कि तू बोणा ना चाही बौषा तक पशु री बोई होर नाजे री बोई मुँभे चढाँदा रोहू? 43 होर तुसै मोलेके रै तोम्बू होर रिफान देऊऐ रै तारे बै लेइआ फिरदै रोहा ती यानिकी तिन्हा चीजा बै जे तुसै मोथे टेकणै री तँइरे बणाई ती। ऐबै मूँ तुसै बेबीलोना ना पौरै नेइआ बसाणे। 44 साँझै रा तोम्बू बोणा ना आसरे बापदादै रै बिचा ना ती। जैण्डा कि परमेश्वरै मूसा बै बोलू ती कि जे आकार तँ हेरु सा तेथे रै मुताबक तू एइबै बणा। 45 सौहै तोम्बू आसरे बापदादै पैहिलैकाला ना लेइआ यहोशू सँघे आँखे आणू। जौस बौगतै तिन्हे होरी जाति रै लोका पँधे हक पाऊ, जे परमेश्वरै आसरे बापदादै सामनै ना कौडै ती होर स दाऊद राजे तक रोहू। 46 परमेश्वरै तेई पँधे अनुग्रह केरु। तेइयै विनती केरी कि मूँ याकूबै रै परमेश्वरै री तँइयै रोहणे री जैगा बणाणी। 47 पर सुलैमान राजे तेइरी तँइयै घौर बणाऊ। 48 पर परम प्रधान परमेश्वर हौथे लाइआ बणैदै घौरा ना नी रोहदा। जैण्डा कि भविष्यवक्ते बोलू कि, 49 “प्रभु बोला सा, स्वर्ग मेरा सिंहासन होर धौरती मेरै जोंघे री पौटडी सा, मेरी तँइयै तुसा कौस किस्सा रा घौर बणाणा होर मेरै बशाँ री कुण जेही जैगा होणी?” 50 कि ए सारी चीजा मेरै हौथे री बैणी दी नी

ऑथी? हे हठी, मन होर कोनै रै खतनै नी केरुऐदै लोको, तुसै हमेशा पवित्र आत्मा रा सामना केरा सी। 51 जैण्डा तुसरै बापदादा केरा ती तुसै बी तैण्डा केरा सी। 52 तुसरै बापदादै कुणा जेही भविष्यवाणी केरनू आलै नी सताऐ, होर तिन्हे पैहिलैकाला ना तेई धर्मी रै बारै ना खबर देणू आलै मारै होर तुसै बी तेइबे ढौकणू आलै होर मारनू आलै हुऐ। 53 तुसाबै स्वर्गदूतै ठहराईदी धर्मविधि ता मिली पर तिन्हरा पालन नी केरु।

54 इन्हा गैला शुणिआ ते झिकिदै लागै। 55 पर तेइयै पवित्र आत्मा ना भौरुइआ स्वर्गा धिरा बै हेरु होर परमेश्वरै री महिमा होर परमेश्वरै री दैहिणी धिरै यीशु बै खडै हेरिआ बोलू, 56 “हेरा, हाँऊ स्वर्गा बै खुलू दा होर माहू रै बेटे बै परमेश्वरै री दैहिणी धिरै खडा हुआ दा हेरा सा।” 57 तैबे तिन्हे जोरा सँघे हल्ले पाइआ कोन बन्द केरै होर एक होइआ तेई पँधे झपटै, 58 होर तेइबे नगरा ना बाहरे कौडिआ पाथरै मारदै लागै होर जे गवाह ती तिन्हे आपणे झिकडै कौडिआ रखे। 59 ते स्तिफनुसा बै पाथरै मारदै रोहै होर स एण्डी प्रार्थना केरदा रोहू, हे प्रभु यीशु मेरी आत्मा बै ग्रहण केर। 60 तैबे घुटनै टेकिआ जोरा सँघे पुकारु, हे प्रभु ई पाप तिन्हा पँधे मत लान्दा होर एण्डा बोलिआ मूँआ होर शाऊल बी तेइरी हत्या ना सहमत ती।

### मण्डली पेन्धे अत्याचार

8 तेई ध्याडै ना यरुशलेमै री कलीसिआ ना बडा सताव होंदा लागा होर प्रेरिता बै छौडिआ सँभे यहूदिआ होर सामरिआ ना तितर-बितर हुऐ। 2 भगत लोकै स्तिफनुस कब्रा ना रखू होर तेइरी तँइयै बडा शोग केरु। 3 शाऊल कलीसिआ बै उजाड़दा लागा ती; होर घौर-घौर घुसिआ मर्द होर बेटडी बै कशीटी-कशीटीआ बन्दी घौरा ना बन्द केरा ती।

### सामरिया न फिलिप्पुसा रा प्रचार

4 जे लोका तितर-बितर हुऐ ती, ते लोका बै सुसमाचार दैसदै रोहै। 5 फिलिप्पुस सामरिआ शैहरा ना जाइआ लोका बै मसीह रा प्रचार केरदा लागा। 6 जे गैला होर चमत्कार फिलिप्पुस केरा ती तिन्हा हेरिआ लोकै एक मन केरु। 7 किबैकि बोहू सारै लोका ना बुरी आत्मा निकती होर बोहू सारै बीमार होर लँगडै माणू ठीक केरिआ ती 8 तेई होर शैहरा ना बडी खुशी हुई।

### जादूगर शमौन

9 एथा ना पैहिलै एई शैहरा ना शमौन नाँ रा एक माहू रोहा ती, सौ जादू-टोणे केरिआ सामरी लोका बै हैरान केरा ती होर आपणे-आपू बै बडा मर्द मैना ती। 10 होर सब होछे बडै तेइबै मैनिआ ऐ बोला ती ऐ माहू परमेश्वरै री महान् शक्ति सा। 11 तेइरे बोहू रोजा ना ते लोका आपणे जादू टोणे रै कोमा सँघे हैरान केरिआ रखे ती, एसा वजहा ना ते तेइबै मैना ती। 12 पर जैबे तिन्हे फिलिप्पुसा ना परमेश्वरै रै राज्य होर यीशु रै बारै ना शुणू ता, कि मर्द की बेटडी सब बपतिस्मा लेन्दै लागै। 13 तैबे शमौनै बी विश्वास केरु होर बपतिस्मै लेइआ फिलिप्पुसा सँघे रोहदा लागा होर परमेश्वरै री शक्ति सँघे बडै-बडै कोम हेरिआ हैरान हाआ ती।

### सामरिया न पतरस होर यूहन्ना

14 जे प्रेरित यरुशलेमा ना ती जैबे तिन्हे ऐ शुणू कि सामरी लोकै परमेश्वरै रै वचना बै मैना सी ता तिन्हे पतरस होर यूहन्ना तिन्हा आगै भेजे। 15 होर तिन्हे जाइआ तिन्हरी तँइरे प्रार्थना केरी कि ते पवित्र आत्मा पाले। 16 किबैकि तिन्हा पँधे हाजी तक पवित्र आत्मा नी ती उतरी, तिन्हे ता सिर्फ प्रभु यीशु रै नाँ ना बपतिस्मा लेऊ ती। 17 तैबे तिन्हे तिन्हा पँधे हौथ रखिआ प्रार्थना केरी होर तिन्हा पँधे पवित्र आत्मा उतरी। 18 जैबे शमौनै ऐ हेरु कि इन्हरै हौथ रखणे सँघे पवित्र आत्मा मिला सा ता तिन्हा आगै ढैबुऐ आणिआ बोलू। 19 कि मुँबे बी एई अधिकारा बै दैआतू कि जुणी पँधे बी हाँऊ हौथ रखनू तिन्हा बै पवित्र आत्मा मिलली। 20 पतरसै तेइबे बोलू, तेरै ढैबुऐ तौ सँघे लोडी नाश हुऐ किबैकि तँ परमेश्वरै रै दाना बै ढैबुऐ लाइआ लेणे रा वचार केरु। 21 एसा गैला ना तेरा हिंसा ऑथी नी बाँडा किबैकि तेरा मन परमेश्वरा सामनै सीधा नी ऑथी 22 ऐबै आपणी एसा बुराई ना मन फेरिआ प्रभु आगे

प्रार्थना केर, होई सका सा तेरै मना रा वचन माफ केरिला। 23 किबैकि हाँऊ हेरा सा, कि तू पिता साही कड़वै होर अधमें रै कोमा ना पौऊ सा। 24 शमौनै जवाब धिना, कि तुसै मेरी तैइयै प्रभु आगै प्रार्थना केरा कि जे गैला तुसै केरी तिन्हा ना कोई बी मूँ पैंधे नी लोड़ी पोई।

### फिलिप्पुस होर कुश देशा रा मुख्य

25 ते गुआही देइआ होर प्रभु रा वचन शुणाइआ यरुशलेमा बै वापस नौठै होर सामरी रै बोहू सारै ग्राँ ना खुशी री खबर शुणादै रौहै। 26 तैबै प्रभु रै एकी स्वर्गदूतै फिलिप्पुसा बै बोलू, उठिआ दक्षिणा धिरली बौता पैंधे ज़ा, जे यरुशलेमा ना अज़ाह बै ज़ा सा होर ज़ंगला ना सा। 27 सौ उठिआ चैलू होर शुणा कुश देशा रा एक माहू एंदा लागा ती जे खोजा होर कुश देशै री राणी कन्दाके रा मन्त्री होर खजांची ती होर भजन केरदा यरुशलेमा बै आऊ ती। 28 सौ आपणै रौथा पैंधे बेठा ती होर यशायाह भविष्यवक्तै री कताबा बै पौढदै-पौढदै वापस जाँदा लागा ती। 29 तैबै आत्मै फिलिप्पुसा बै बोलू, एई रौथा भेटी ज़ा। 30 फिलिप्पुस होर मारिआ नौठा होर सौ यशायाह भविष्यवक्तै री कताब पौढदा शुणू होर तेइना पुछू, जे तू पौढदा लागा सा तू तेइबै समझा बी सा कि नी? 31 तेइयै बोलू, ज़ा तक कोई मुँभै समझाला नी मूँ केण्डै समझणा। तेइयै फिलिप्पुसा आगै विनती केरी कि तू रौथा पैंधे चढ़िआ मूँ आगै बेश। 32 पवित्र शास्त्रा रा जे पाठ सौ पौढदा लागा ती सौ ऐ सा, “सौ भेड़ा साही बलि होणै री तैइयै पजाउआ होर ज़ेण्डा मेमना ऊन काटणू आलै सामने चुप रौहा रा तैण्डाए तेइयै बी आपणा मुँह नी खोलू। 33 तेइरी दीनता ना तेइरा न्याय नी हुआ होर तेइरै बौगतै रै लोका रा वर्णन कुणी केरना किबैकि धौरती ना तेइरा प्राण चैकिआ सा 34 तैबै खोजै फिलिप्पुसा ना पुछू, हाँऊ त आगै विनती केरा सा कि तू मुँभै एसा गैल दैस कि भविष्यवक्ता ऐ किज़ी रै बारै ना बोला सा, आपणै या कौसी होरी रै बारै ना। 35 तैबै फिलिप्पुसै आपणा मुँह खोलू होर पवित्र शास्त्रा ना शुरू केरिआ तेइबै यीशु रै बारै ना सुसमाचार शुणाऊ। 36 बौतै औँढदै-औँढदै ते पाणी आली ज़ैगा ना पुजै, तैबै तेई खोजै बोलू, हेर औखै पाणी सा, एबै मुँभै बपतिस्मै लेणै ना की रोक सा। 37 फिलिप्पुसै बोलू, अगर तू सारै मना संघे बशाह केरा सा ता होई सका सा, खोजे जवाब धिना हाँऊ बशाह केरा सा कि यीशु मसीह परमश्वर रा बेटा सा। 38 तैबै तेइयै रौथा बै रोकणै रा हुकम केरू, तैबै खोजा होर फिलिप्पुस दुए पाणी ना उतरै, होर फिलिप्पुसै खोजै बै बपतिस्मा धिना। 39 ज़ैबै ते पाणी ना बाहरै निकतै, ता प्रभु री आत्मै फिलिप्पुस चैकू होर खोजै सौ दबारा नी हेरू होर सौ खुशी मनाँदै-मनाँदै आपणी बौतै नौठा। 40 फिलिप्पुस अशदोद देशा ना पुजू। ज़ैबै तक सौ कैसरिया ना नी पुजू तैबै तक सौ ग्राँ-ग्राँ ना यीशु रै बारै ना सुसमाचार शुणादा रौहू।

### शाऊला रा दिल बदलूआ

9 शाऊल हाज़ी तक यीशु रै चेलै बै धमकाणै होर तिन्हा बै मारनै री धुना ना ती सौ महापुजारी आगै नौठा। 2 महापुजारिऐ तेई ना दमिशकै रै सभाघोरै रै नाँ ना चिठी मुंगी कि जे बी मर्द, बेटड़ी यीशु बै मैना सी सौ तिन्हा बै बोनिआ यरुशलेमा बै आणला। 3 पर चैलदै-चैलदै ज़ैबै सौ दमिशकै रै नेड पुजू, ता चानक आसमाना ना एक प्याशा तेइरै चौहू पासै चमकु। 4 होर सौ धौरती पैंधे पौडू होर ऐ आवाज़ शुणी, “हे शाऊल, हे शाऊल तू मुभै तँग किबै केरा सा? 5 तेइयै पुछू, “हे प्रभु, तू कुण सा?” तेइयै बोलू, “हाँऊ यीशु सा जुणी बै तू तँग केरा सा। 6 पर एबै उठिआ ग्राँ बै ज़ा, होर जे तौभै बोलिला, तू तेइबै केरी। 7 ज़ो माहू तेई सैंधे ती, ते चुपचाप रौहै; किबैकि तिन्हा ना आवाज़ ता शुणिआ ती पर तिन्हा ना किछ नी ती हेरिदा। 8 तैबै शाऊल धौरती ना खैडा उठू, पर ज़ैबै तेइयै आपणी औछी खोली ता तेइना किछ नी हेरूआ होर तिन्है सौ हौथा ना ढौकिआ दमिशका बै नेऊ। 9 सौ त्रा रोज़ा ढौई काणा रौहू होर तेइयै ना खाऊ-पीऊ। 10 दमिशका ना हनन्याह नाँ रा एक चेला ती, प्रभुऐ तेइबै दर्शन देइआ बोलू, “हे हनन्याह! तेइयै बोलू, ज़ी प्रभु!” 11 तैबै प्रभुऐ तेइबै बोलू, तू तेसा सीधी गली बै ज़ा होर यहूदै रै घौरा ना ज़ाइआ शाऊल नाँ रै तारसी बै पुछ किबैकि शुण सौ प्रार्थना केरदा लागा सा। 12 तेइयै हनन्याह नाँ रा मर्द भीतरै एन्दा होर आपू पैंधे एन्दा हेरू सा

ताकि सौ दबारा हेरला। 13 हनन्याहै जवाब धिना, हे प्रभु मैं एई माहू रै बारै ना बोहू लोका ना शुणू सा कि एई माहूऐ यरुशलेमा ना तेरै पवित्र लोका सैंधे बड़ै-बड़ै बुरै कोम केरै सी। 14 होर औखै बी एइबै महापुजारी धिरै ना हक मिलू सा, कि ज़ो तेरा नाँ लेलै तिन्हा बै बोनला। 15 पर प्रभुऐ तेइबै बोलू, कि तू ज़ा किबैकि ऐ होरी ज़ाति रै लोका सामने, राज़ै होर इस्राइली लोका सामने मेरा नाँ प्रगट केरने री तैइयै मैं चुनू सा, 16 होर मूँ तेइबै दैसणा कि मेरे नाँ री तैइयै तौभै केतरा दुःख चैकणा पौऊ। 17 तैबै हनन्याह उठिआ तेई घौरा बै नौठा होर तेई पैंधे हौथ रैखिआ बोलू, हे भाई शाऊल जुण प्रभु यीशु तौभै बौता ना मिलू हाँऊ तेइयै भेजू सा, कि तू दबारा हेरी सकला होर तू पवित्र आत्मा रा दान पाला। 18 होर तेइरी औछी ना एकदम छिलके औलै होर सौ हेरदा लागा तैबै तेइयै बपतिस्मा लेऊ होर रोटी खाइआ तेइबै ताकत मिली। 19 सौ कई रोज़ा तक दमिशका ना तिन्हा चेलै सैंधे रौहू।

### दमिशका न शाऊला द्वारा प्रचार

20 सौ तुरन्त सभा-घौरा ना यीशु रा प्रचार केरदा लागा कि यीशु परमेश्वर रा बेटा सा। 21 सैंभै शुणनू आलै हैरान होइआ बोलदै लागै कि ऐ सौहै माहू नी औथी जो यीशु मैनणू आलै बै मारा ती होर नाश केरा ती। औखै बी एही कोमे री तैइयै आऊ ती कि तिन्हा बै बोनिआ महापुजारी आगै बै आणला? 22 पर शाऊल होर बी ज़ादा शक्तिशाली बणदा रौहू होर सौ यीशु रै मसीह होणै रा सबूत दैइआ दमिशका ना रौहणू आलै यहूदी रा मुँह बन्द केरा ती। 23 ज़ैबै बोहू ध्याड़े बीतै ता यहूदिऐ मिलिआ तेइबै मारनै री योजना बणाई। 24 पर तिन्हरी योजना शाऊला बै पैता चैली। ते शाऊला बै मारनै री तैइयै रात ध्याड़ मौका हेरदै रौहा ती। 25 पर तेइरै चेलै सौ राती टोकरै ना बशाइआ मैहलै री भीतिऐ भ्याँऊ लटकाइआ उतारू।

### यरुश्लेमा न शाऊल

26 यरुशलेम पुजिआ तेइयै चेलै सैंधे मिलणै रा उपाय केरू पर ते सब तेइना डौरा ती किबैकि तिन्हा बै पैता नी औथी कि ऐ बी चेला सा। 27 पर बरनबासै सौ आपू सैंधे तिन्हा चेलै आगै नेऊ होर तिन्हा बै दैसू कि एइयै कौस रीतयै बौता ना प्रभु हेरू होर एई सैंधे गैला केरी। तैबै दमिशका ना एइयै केण्डै नडौरै होइआ यीशु रा प्रचार केरू। 28 सौ तिन्हा सैंधे यरुशलेमा ना एन्दा जान्दा रौहू, 29 होर निधडक होइआ प्रभु रै नाँ रा प्रचार केरा ती होर युनानी भाषा बोलणू आलै यहूदी सैंधे वहस केरा ती पर ते शाऊला बै मारनै री कोशिश केरदै लागै। 30 ऐ ज़ाणिआ तिन्है चेलै स कैसरिआ बै आणू होर तरसुसा बै भेजू। 31 सारै यहूदिआ, गलील होर सामरिऐ री कलीसिआ बै बड़ी शान्ति मिली होर तिन्हरी उन्नति होन्दी रौही। कलीसिआ प्रभु री डौरा ना होर पवित्र आत्मै री शान्ति ना बढदी ज़ा ती।

### लुद्धा होर याफा न पतरस

32 ऐण्डा हुआ कि पतरस हर ज़ैगा ना फिरदा तिन्हा पवित्र लोका आगै पुजू जे लुद्धा ना रौहा ती। 33 तौखै तेइबै ऐनियास नाँ रा एक एन्डा माहू मिलू जुणी रै पूरे शरीरा ना दुखणै हुऐ सौ औठ बौर्षा नौरै बिस्तरै ना ती। 34 पतरसै तेइबै बोलू, हे ऐनियास! यीशु मसीह तौभै ठीक केरा सा, उठ आपणा बिस्तरा चैक तैबै सौ उठिआ एकदम खैडा हुआ। 35 तैबै लुद्धा होर शारोन देशा ना रौहणू आलै लोका तेई हेरिआ प्रभु धिरै बै फिरै। 36 याफा नाँ री ज़ैगा ना तबीता नाँ री एक विश्वासिनी रौहा ती। स बोहू सारै भलै-भलै कोम होर दान केरा ती। 37 तिन्हा ध्याड़े ना सौ बिमार होइआ मूँई होर तिन्है सौ नहाइआ अटारी पैंधे रैखी। 38 लुद्धा याफे रै नेड ती। ज़ैबै तिन्है ऐ शुणू कि पतरस तौखै सा ता तिन्है दूई माहू भेजिआ तेई आगै विनती केरी कि तू आसा हागै एणै ना देरी मत केरदा। 39 तैबै पतरस उठिआ तिन्हा सैंधे नौठा। तैबै तिन्है सौ अटारी पैंधे नेऊ होर सारी विधवा बेटड़ी रौंदै-रौंदै एजिआ तेई आगै खैडी हुई होर जे झिकड़ै दोरकासै तिन्हा सैंधे रौहदै बणाए ती रिहाँदी लागी। 40 तैबै पतरसै सारै लोका बाहरै कौडै होर घुटनै टैकिआ प्रार्थना केरी होर लाशा धिरै हेरिआ बोलू, हे तबीता उठ, तैबै तेसै आपणी औछी खोली होर पतरसा बै हेरिआ उठी। 41 तेइरै सौ हौथा ना ढौकिआ चैकी होर पवित्र लोका होर

विधवा बै शाधिआ सौ जिन्दी रहाई। 42 ऐ गैल सारै याफा ना फैली होर बोहू सारै लोकै प्रभु पैंधे विश्वास केरु। 43 पतरस याफा ना चोबडै रै धन्धै केरनू आलै शमौनै रै घौरा ना काफी रोजा ढौई रोहू।

### कुरनेलियुस रा पतरसा बै शाधणा

10 कैसरिआ ना कुरनेलियुस नाँ रा एक माहू ती, जो इतालियानी पलटना रा सुबेदार ती। 2 सौ भक्त ती, होर आपणै सारै घरानै समेत परमेश्वरा ना डौरा ती, सौ यहूदी लोका बै बोहू दान देआ ती होर परमेश्वरा आगै प्रार्थना केरा ती। 3 तेइयै ध्याडी त्रीजै पौहरै एक दर्शन हेरु, कि परमेश्वरा रा एक स्वर्गदूत तेई आगै भीतरै एजिआ बोला सा, हे कुरनेलियुस। 4 तेइयै सौ ध्याना सैंधे हेरु होर डौरदै-डौरदै बोलू, हे प्रभु की सा? तेइयै बोलू, तेरी प्रार्थना होर दान यादगारी री तेंइयै परमेश्वरा सामनै पुजै सी। 5 होर ऐबै याफा ना माहू भेजिआ शमौन जुणी बै पतरस बोला सी, तेईबै शाध। 6 सौ चोबडै रै धंधा केरनू आलै शमौनै रै घौरा ना पाहुणा सा, होर तेइरा घोर समुद्रै रै किनारै सा। 7 जैबै सौ स्वर्गदूत तेई आगै ना भेगू ता तेइयै आपणै दूई सेवक होर जे तेई सैंधे रोहा ती तिन्हा ना एक भक्त सिपाही शाधू। 8 होर तिन्हा बै सारी गैला दैसा ते याफा बै भेजे।

### पतरसा रा दर्शन

9 दुजै ध्याडी, जैबै ते चैलदै-चैलदै नगरा ना पुजै, ता दुजै पौहरै पतरस प्रार्थना केरदा कोठे पैंधे चैदू। 10 तेइबै भूख लागी होर स किछ खाणा चाहा ती पर जैबै ते रोटी त्यार केरदै लागै ती ता पतरस बेहोश हुआ। 11 होर तेइयै हेरु, कि आसमान खुलू होर एक बर्तन बडी चादरा साही लटकदा, धौरती बै उतरदा लाग़ा सा। 12 जुणी ना धौरती रै हर किस्मै रै पशु होर चीडू-चाकरु ती। 13 तेइना एक ऐण्ठी आवाज शुणुई कि हे पतरस उठ, हिर इन्हा बै मारिआ खा। 14 पर पतरसै बोलू, नैई प्रभु बिल्कुल नी, किबैकि मैं औजा तक अशुद्ध चिजा नी खाई। 15 तैबै दुजी बार तेई ना भी शुणुआ, कि जेकिछ परमेश्वरै शुद्ध ठहराऊ सा तू तेइबै अशुद्ध मत बोलदा। 16 त्रा बार ऐण्ठाए हुआ; तैबै सौ बर्तन तुरन्त आसमाना बै चैकुआ। 17 जैबै पतरस आपणै मैना ना दूई विचार केरदा लाग़ा ती, कि जो दर्शन मैं हेरु ऐ की सा, ता हेरा जे महु कुरनेलियुसै भेजे ती ते शमौनै रै घौरा रा पैता लाइआ तेई री डेही आगै एजिआ खडै हुऐ, 18 होर पुछदै लागै, कि शमौन जुणीबै पतरस बोला सी सौ ओखै पाहुणा सा? 19 पतरस तेई दर्शनै रै बारे ना सोचदा लाग़ा ती, कि प्रभु री आत्मै तेइबै बोलू, हेर त्रा माहू तौभै तोपदै लागै सी। 20 तू उठिआ बुनै धिरै बै जा, होर बिना डौरै तू तिन्हा सैंधे जा किबैकि ते मैं भेजे सी। 21 तैबै पतरसै उतरिआ तिन्हा माहू बै बोलू, हेरा तुसै जुणी तोपदै लागै सी सौ हाँऊ सा। तुसरै एणै रै रा की कारण सा। 22 तिन्है बोलू, आसै कुरनेलियुस सुबेदारै भेजे सी जो धर्मी होर परमेश्वरा ना डौरनू आला सा होर सारी यहूदी जाति ना खरा माहू सा किबैकि तेइयै एकी स्वर्गदूता ना चेतावनी पाई कि तौभै आपणै घौरा शाधिआ त ना वचन शुणला।

### कुरनेलियुस रै घौरा न पतरस

23 तैबै तेइयै ते भीतरै शाधे होर तिन्हरी पाहुणचारी केरी, होर दुजै रोजै सौ तिन्हा सैंधे नौठा होर याफे रै भाई मुँझै ना कई तेई सैंधे नौठे। 24 दुजै रोजै ते कैसरिआ ना पुजै, होर कुरनेलियुस आपणै टबर होर सैंधी-साथी बै कठा केरिआ तिन्हरी गैला केरदा लाग़ा ती। 25 जैबै पतरस भीतरै एन्दा लाग़ा ती, ता कुरनेलियुस तेई सैंधे मिलू, होर तेइरी जोंघा पैंधे पौडिआ प्रणाम केरु। 26 पर पतरसै तेइबै खडै चैकिआ बोलू, खडा हो हाँऊ बी ता माहू सा। 27 होर तेई सैंधे गल-बात केरदै-केरदै भीतरा बै नौठा, बोहू सारै लोक बै कैठे हेरिआ तेइए तिन्हा बोलू, 28 तुसै जाणा सी, कि होरी जाती री संगति केरना होर तिन्हा कौछै जाणा यहूदी री तेंइयै अधर्म सा पर परमेश्वरै मुँभै दैसू सा, कि हाँऊ कौसी माहू बै अपवित्र या अशुद्ध नी बोलणू। 29 एसा वजहा ना हाँऊ बगैर बोलै आऊ। ऐबै हाँऊ पुछा सा कि हाँऊ कौस कोमै री तेंइयै शाधू सा। 30 कुरनेलियुसै बोलू, एसा घडी चार रोज हुऐ कि हाँऊ आपणै घौरा ना त्रीजै पौहरै प्रार्थना केरदा लाग़ा ती कि चमकीलै झिकडै लाऊआ दा एक मर्द

मूँ सामनै एजिआ खडा हुआ, 31 होर बोलदा लाग़ा, हे कुरनेलियुस तेरी प्रार्थना शुणुई सा होर तेरै दान परमेश्वरा सामनै याद केरुए सी। 32 ऐबै कौसी बै याफा बै भेजिआ शमौन जुणीबै पतरस बोला सी शाध। सौ समुद्रै रै किनारै चोबडै रै धन्धै केरनू आलै शमौनै रै घौरा ना पाहुणा सा। 33 तैबै मैं तुरन्त त आगै माहू भेजे होर तैं भला केरु कि तू आऊ। ऐबै आसै सैंधे ओखै परमेश्वरा सामनै सी ताकि जेकिछ परमेश्वरै तौभै बोलू सा तेइबै शुणलै।

### पतरसा रा उपदेश

34 तैबै पतरसै आपणै मुँह खोलिआ बोलू, 35 ऐबै मुँभै पक्का विश्वास हुआ कि परमेश्वर कौसी रा पक्षपात नी केरदा बल्कि हर एक जाति ना जो तेइना डौरा सा होर धर्मै रै कोम केरा सा स परमेश्वरा बै शोभला लाग़ा सा। 36 जे वचन तेइयै इस्राइली आगै भेजू, जैबै कि तेइयै यीशु मसीह रै द्वारा जो सैंभी रा प्रभु सा शान्ति रा सुसमाचार शुणाऊ। 37 तेसा गैला बै तुसै जाणा सी जो युहन्नै रै बपतिस्मै रै प्रचार ना बाद गलीला ना शुरु केरिआ सारै यहूदिआ देशा ना फैली। 38 कि परमेश्वरै कौस रीतियै पवित्र आत्मा होर शक्ति सैंधे यीशु नासरी रा अभिषेक केरु। सौ हमेशा भलाई रै कोम केरदा रोहू होर जुणिबै दुष्ट आत्मा ती तिन्हा बै ठीक केरदा रोहू किबैकि परमेश्वर तेई सैंधे ती, 39 होर आसै तिन्हा सैंभी कोमै रै गुआही सी जे तेइयै सारै यहूदिआ देशा ना केरै होर यरुशलेमा ना बी केरै होर तिन्है सौ लकडा पैंधे लटकाइआ मारु। 40 सौ परमेश्वरै त्रीजै रोजे जिन्दा केरु होर प्रगट बी केरु सा। 41 सैंभी लोका बै नी पर तिन्हा गुआही बै जे परमेश्वरै पैहिले ना चुनै ती, अर्थात् आसा बै जुणियै कि आसै मौरै ना बाद जिन्दै होणे ना बाद तेई सैंधे खाऊ-पीऊ। 42 तेइयै आसा बै हुकम धिना कि लोका बै प्रचार केरा; होर गुआही दैआत् कि ऐ सौहै सा जो परमेश्वरै जिन्दै होर मूर्एदै रा न्यायी ठहराऊ सा। 43 तेइरै बारे ना सैंभै भविष्यवक्ता गवाही देआ सी, कि जो कोई तेई पैंधे विश्वास केरला तेइबै यीशु रै नाँ ना पापै री माफी मिलणी।

### होरी जाति पेन्धे पवित्र आत्मा रा उतरना

44 जैबै पतरस इन्हा गैला केरदा लाग़ा ती, ता पवित्र आत्मा वचन शुणनू आलै सैंभी लोका पैंधे उतरु। 45 जेतरे खतना केरुएदै विश्वासी पतरसा सैंधे आऐ ती, ते सारै हैरान हुऐ कि होरी जाति रै लोका पैंधे जो यहूदी नी आँधी तिन्हा बै बी पवित्र आत्मा रा दान मिलू। 46 किबैकि तिन्है ते भाँति-भाँति री भाषा बोलदै होर परमेश्वरै री बड़ाई केरदै शुणै। 47 तैबै पतरसै बोलू, कि कोई पाणी बै रोकी सका सा कि ए बपतिस्मा नी पालै जुणियै कि आसा साही पवित्र आत्मा पाऊ सा। 48 होर पतरसै इन्हा बै यीशु मसीह रै नाँ ना बपतिस्मा देणै रा हुकम धिना, तैबै तिन्है पतरसा आगै विनती केरी कि सौ किछ रोज तिन्हा सैंधे रोहला।

### पतरसा री आपणै कौमा रै बारे न जानकारी

11 प्रेरित होर यहूदी भाइयै जैबै ऐ शुणू कि, होरी जाती रै लोकै जे यहूदी नी आँधी तिन्है बी परमेश्वरा रा वचन मैनु सा। 2 जैबै पतरस यरुशलेमा बै आऊ, ता खतना केरुएदै लोका तेई सैंधे वहस केरदै लागै। 3 कि तैं खतना नी केरुएदै लोका सैंधे जाइआ खाऊ-पीऊ। 4 तैबै पतरसै शुरु ना लेइआ तिन्हा बै बौदैं ऐ दैसू; 5 हाँऊ याफा नगरा ना प्रार्थना केरदा लाग़ा ती, होर बेहोश होइआ एक दर्शन हेरु, कि एक बर्तन बडी चादरी साही चोहू कुणै ना लटकाउआ दा मूँ आगै आऊ। 6 जैबै मैं तेई पैंधे ध्यान केरु ता धौरती रै सारै पशु होर आसमानै रै चीडू हेरै। 7 होर ऐ आवाज बी हुई कि हे पतरस उठ होर इन्ह बै मारिआ खा। 8 मैं बोलू, नैई प्रभू नैई, किबैकि कोई अशुद्ध चीज मेरै मुँहा ना नी नौठी। 9 तैबै आसमाना दुजी बार आवाज हुई कि जो परमेश्वरै शुद्ध ठहराऊ सा, तेईबै अशुद्ध मत बोलदा। 10 ऐण्ठा त्रा बार हुआ; तैबै सैंभ किछ आसमाना बै खींचुआ। 11 होर हेरा, त्रा माहू जे कैसरिआ ना मूँ आगै बै भेजे ती ते तुरन्त एजिआ जौस घौरा ना हाँऊ ती, खडै हुऐ। 12 तैबै पवित्र आत्मै मुँभै तिन्हा सैंधे होणै बै बोलू होर ए छौह भाई बी मूँ सैंधे आऐ होर आसै तेई माहू रै घौरा बै नौठे। 13 तेइयै दैसू कि मैं एक स्वर्गदूत आपणै घौरा ना खडा हेरु जुणियै मुँभै बोलू कि याफा नगरा बै माहू भेजिआ शमौना

बै जुणिबै कि पतरस बोला सी, शाध। 14 तेई तौभै ऐण्डी गैला बोलणी, जुणि रे द्वारा तौ होर तेरै सारै घरानै उद्धार पाणा। 15 जैबै हाँऊ गैला केरदा लागा ता पवित्र आत्मा तिन्हा पैधै एसा रीतियै उतरु, जौस रीतियै शुरु ना आसा पैधै उतरु ती। 16 तैबै मुँभे प्रभु रा सौ वचन याद आऊ कि यहून्ने ता पाणियै लाइआ बपतिस्मा धिना पर तुसा पवित्र आत्मा रा बपतिस्मा पाणा। 17 जैबै परमेश्वरै तिन्हा बै सौहै दान धिना जो आसा बै प्रभु यीशु मसीह पैधै विश्वास केरिआ मिलू ती ता हाँऊ कुण ती जो परमेश्वरा बै रोकी सकदा। 18 ऐ शुणिआ ते चुप रौहै होर परमेश्वरै री बड़ाई केरिआ बोलदै लागै तैबै ता परमेश्वरै होरी जाति बै बी जिन्दगी री तैइयै पापा ना मन फेरनै रा दान धिना सा।

### अन्ताकिया री मण्डली

19 स्तफनुसै रे सतावा ना बाद जे लोका तितर-बितर हुऐ ती, ते फिरदै-फिरदै फीनीके, कुप्रुस होर अन्ताकिया ना पुजै पर ते यहूदी लोका बै केल्ही प्रभु रा वचन शुणा ती। 20 पर तिन्हा ना केतरै ता कुप्रुसी होर कुरेनी ती, जे अन्ताकिया ना एजिआ यूनानी लोका बै प्रभु यीशु रा सुसमाचारै री गैला शुणादै लागै। 21 प्रभु रा हाँथ तिन्हा पैधै ती, होर बोहू लोका विश्वास केरिआ प्रभु धिरा बै फिरै। 22 तैबै तिन्हरी चर्चा यरुशलेमै री कलीसिआ ना शुणनै ना आई, होर तिन्है बरनबास अन्ताकिया बै भेजू 23 सौ तौखै पुजिआ, होर परमेश्वरै रे अनुग्रह हेरिआ बड़ा खुश हुआ होर सैभी बै उपदेश धिना कि तन-मन लाइआ प्रभु सँघे लिपटी रौहा। 24 किबैकि सौ एक भला माहू ती होर आत्मा ना सिद्ध ती होर बोहू सारै लोका प्रभु धिरा बै फिरै। 25 तैबै सौ शाऊला बै तोपणै री तैइयै तरसुसा बै नौठा। 26 जैबै सौ तिन्हा बै मिलू ता सौ अन्ताकिया बै आणू होर ते एकी बोर्षा तक कलीसिआ सँघे मिलदै रौहै होर उपदेश दैदै रौहै होर चेलै सैभी ना पैहिलै अन्ताकिया ना मसीही कहलाऐ। 27 तिन्हा रोजा ना कई भविष्यवक्ता यरुशलेमा न अन्ताकिया बै आए। 28 तिन्हा ना अगबुस नाँ रे एकिए खडै होइया आत्मै री प्रेरणा सँघे ऐ दैसू कि सारै संसारा ना अकाल पौडना होर अकाल क्वौदियुसै रे बौगता ना पौडू। 29 तैबै चेलै ठहराऊ कि हर एक आपणी-आपणी कमाई रे अनुसार यहूदिआ ना रौहणू आलै भाई री सेवा री तैइयै किच्छ भेजलै। 30 तिन्है एण्डाए केरु होर बरनबास होर शाऊलै रे हाँथे अगुवै हागै किछ भेजू।

### पतरसा रा जेला न छुटकारा

12 तेई बौगतै हेरोदेस राजै कलीसिए रे कई माहू बै दुःख देणै री तैइयै कोशिश केरी। 2 जैबै बोहू ध्याडै बीतै ता यहूदिऐ मिलिआ तेइबै मारनै री योजना बणाई। 3 होर जैबै तेइयै हेरु कि यहूदी लोका एथा ना खुश होआ सी ता तेइयै पतरस बी ढौकू; ते ध्याडै अखमीरी रोटी रे ध्याडै ती। 4 तेइयै सौ ढौकिआ बन्दी घौरा ना पाऊ होर चार सिपाही पैहरैदारी केरदै रैखै। तेइयै ऐण्डा सोचू कि फसह ना बाद ते तेइबै लोका सामनै आणलै। 5 बन्दी घौरा ना पतरसै री रखवाली हाँदी रौही पर कलीसिआ तेइरी तैइयै लगातार परमेश्वरा हागै प्रार्थना केरदी लागी ती। 6 जैबै हेरोदेस पतरसा बै लोका सामनै आणनू आला ती ता तेसा रातियै पतरस दूई शाँगलिये लाईया बोनुआ दा दूई सिपाही बिचा ना सोदा लागा ती होर पैहरैदार बन्दी घौरै रे दवारा पैधै पैहरैदारी केरदै लागै ती। 7 ता हेरा प्रभु रा एक स्वर्गदूत एजिआ खैडा हुआ होर तेसा कोठरी ना प्याशा चमकू। तेई स्वर्गदूतै पतरसै री पसली पैधै हाँथ मारिआ सौ बझेऊ होर बोलू, उठ फुरती केर होर तेइरै हाँथे री शाँगल चुटिआ शौदी। 8 तैबै स्वर्गदूतै तेइबै बोलू, चेका बोन होर आपणै बूट ला। तेइयै तैण्डाए केरु। तैबै स्वर्गदूतै तेइबै बोलू, आपणै झिकडै लाइआ मू पिछै एज। 9 पतरस निकलिआ तेई पिछै चैलू पर ऐ नी ती जाणदा कि जेकिछ स्वर्गदूत केरदा लागा ती सौ सच सा। पतरस ऐ सोचदा लागा ती कि हाँऊ दर्शन हेरदा लागा सा। 10 तैबै ते पैहिलै होर दूजै पैहरै न निकलिआ तेई लोहै रे बड़ै गेटा आगै पुजै जे नगरा धिरा बै ती। सौ तिन्हरी तैइयै आपणै-आप खुलू होर ते निकलिआ एकी गलिये नौठै। एतरै ना स्वर्गदूत तेइबै छौडिआ नौठा। 11 तैबै पतरसै सचेत होइआ बोलू, ऐबै मैं सचिऐ जाणू कि प्रभुऐ आपणा स्वर्गदूत भेजिआ हाँऊ हेरोदेसै रे हाँथा ना छुड़ाऊ होर यहूदी री सारी आशा चोड़ी। 12 ऐण्डा सोचिआ सौ यहून्ने री आमा मरियमै रे घौरा बै

आऊ जुणी बै मरकुस बोला सी। तौखे बोहू लोका कैठा होइआ प्रार्थना केरदै लागै ती। 13 जैबै तेइयै गेटै री ताकी खठखटाई ता रूदै नाँ री एक प्रभु री दासी शुणदी आई। 14 तेसै आवाज शुणिआ पतरस पछियाणू पर तेसै खुशी रे मारै गेट नी खोलू होर ठोर मारिआ भीतरै नौठी होर दैसू कि पतरस द्वारा पैधै खेडा सा। 15 तिन्है तेसा बै बोलू, तू पागल सा पर तेसै बोलू कि पक्का सौहै सा। तैबै तिन्है बोलू, तेइरा स्वर्गदूत होला। 16 तैपर पतरस खठखटाँदा रौहू होर तिन्है खिडकी खोली। ते तेइबै हेरिआ हैरान हुऐ। 17 तैबै तेइरे तिन्हा बै चुप रौहणै री तैइयै हाँथे लाइआ इशारा केरु होर तिन्हा बै दैसू कि प्रभुऐ कौस रीतिऐ हाँऊ बन्दी घौरा ना कौडिआ आणू। तैबै पतरसै भी बोलू, कि एसा गैला बै याकूब होर भाई बै बी दैसीतू होर ऐण्डा बोलिआ स दूजी जैगहा बै नौठा। 18 दाती सिपाही ना बड़ी हलचल हाँदी लागी कि पतरसा बै की हुआ। 19 जैबै हेरोदेस राजै खोजबीन केरी होर किछ नी मिलू ता पैहरैदारै री जाँच केरिआ तिन्हा बै मारनै रा हुकम धिना होर पतरस यहूदिआ देश छौडिआ कैसरिआ ना जाइआ रौहू।

### हेरोदेसा री मौऊत

20 हेरोदेस सूर होर सैदै रे लोका ना खुश नी ती आँथी। ते एक मन केरिआ तेई हागै आए होर बलास्तुस जोकि राजै रा कर्मचारी ती तेइबै मनाइआ मेल केरना चाहू। किबैकि राजै रे देशे लाइआ तिन्हरा पालण-पोषण होआ ती। 21 होर राजा हेरोदेस ठहराऊऐ दै रोजा ना राजशाही झिकडै लाइआ राजगद्दी पैधै बेठा होर तिन्हा बै व्याख्यान देदा लागा। 22 होर लोका पुकारदै लागै कि ऐ ता माहू रा नी परमेश्वरा रा शब्द सा। 23 तेसा घडिऐ प्रभु रे एकी स्वर्गदूतै स मारु किबैकि तेइयै परमेश्वरै री महिमा नी केरी होर स कीडै पौडिआ मूँआ। 24 पर परमेश्वरा रा वचन बढदा रौहू होर फैलदा रौहू। 25 जैबै बरनबास होर शाऊलै आपणी सेवा पूरी केरी ता याकूब जुणी बै मरकुस बोला सी सँघे लेइआ यरुशलेमा बै वापस आए।

### बरनबास होर शाऊला रा भेजणा

13 अन्ताकियै री कलीसिआ ना केतरै भविष्यवक्ता होर उपदेशक ती अर्थात् बरनबास, शमौन जुणिबै कि नीगर बोला सी, लुकियुस कुरेनी होर चौथाई देशे रे राजै हेरोदेसा रा दूध-भाई मनाहेम होर शाऊल। 2 जैबै ते उपवास केरिआ प्रभु री भक्ति केरदै लागै दै ती, ता पवित्र आत्मै बोलू, मेरी तैइयै बरनबास होर शाऊला बै तेई कोमै री तैइयै अलग केरा जूणि री तैइयै में ते शाधै सी। 3 तैबै तिन्है उपवास होर प्रार्थना केरिआ तिन्हा पैधै हाँथ रैखिआ ते विदा केरै।

### पौलुसा री पैहली प्रचार केरने री यात्रा

4 तैबै ते पवित्र आत्मै रे द्वारा सिलूकिआ बै नौठै होर तौखे ना जहाजा ना चैडिआ कुप्रुसा बै चोलै। 5 होर सलमीसा ना पुजिआ परमेश्वरा रा वचन यहूदिऐ रे आराधना घौरा ना शुणाऊ होर यहून्ना तिन्हरा सेवक ती। 6 होर तेइ सारै टापु ना होइआ पाफुस पुजै। तौखे तिन्हा बै यीशु नाँ रा एक जादू-टोणै केरनू आला झूठा यहूदी भविष्यवक्ता मिलू। 7 सौ सिरिग्युस पौलुस सुबैदारा ना सँघे ती जो कि बुद्धिमान मर्द ती। सौ बरनबास होर शाऊला बै आपू आगै शाधिआ तिन्हा ना परमेश्वरा रा वचन शुणना चाहा ती। 8 पर इलीमास जादू-टोणै केरनू आलै तिन्हरा सामना केरिआ सौ विश्वास केरनै ना रोकणा चाहू। 9 तैबै शाऊलै जौसरा नाँ पौलुस बी सा, तेइयै पवित्र आत्मा ना भौरुइआ तेई धिरै हेरिआ बोलू, 10 हे सारै कपट होर हर प्रकारै री चतुराई सँघे भौरुइदी शैतानै री सनतान, धर्म रे बेइरी कि त प्रभु री सीधी बोता बै टेडा केरना नी छौडना? 11 ऐबै हेर प्रभु रा हाँथ तौ पैधै लागा सा होर तौ किछ बौगता ढौई काणै रौहणा होर त सूरज नी हेरना। तैबै लुरन्त तेई सामनै धुँधला होर निहारा हुआ होर सौ औरै-पौरै तोपिदा लागा कि कोई तइरै हाँथा बै ढौकला। 12 तैबै सुबैदारै जेकिछ हुआ ती, हेरिआ होर प्रभु रे उपदेशा ना हैरान होइआ विश्वास केरु।

## पिसिदिया रे अन्ताकिया न

13 पौलुस होर तेइरै सेंधी जहाज खोलिआ पँफुलिऐ रे पिरगा बे आऐ होर यूहन्ना तिन्हा बै छौडिआ यरुशलैमा बै वापस आऊ। 14 होर पिरगा ना आगै बढिआ ते पिसिदिआ रे अन्ताकिया ना पुजै होर सब्तै रे ध्याडै ना अराधनालय ना जाइआ बेठै। 15 व्यवस्था होर भविष्यवक्तै री कताबा पौढै ना बाद सभै रे अगुवै तिन्हा बै खबर भेजी, कि हे भाइयो अगर लोका बै उपदेश देणै री तँइयै तुसरै मैना ना कोई गल सा ता बोला। 16 तँइयै पौलुसै खडै होइआ होर हाँथे लाइआ इशारा केरिआ बोलू, हे इस्राइलियो होर परमेश्वरा ना डौरनू आलै, लोको शुणा। 17 इन्हा इस्राइली लोकै रे परमेश्वरै आसरै बापदादै चुनै, होर जँबै मिस्र देशा ना परदेशी होइआ रोहा ती ता तिन्हरी तरक्की केरी होर आपणी शक्ति सँधे ते तौखे ना कौडै। 18 होर सौ कोई चाली बौर्षा दौई बोणा ना तिन्हरी सौहदा रोहू। 19 कनान देशा ना सौत जाति रा नाश केरिआ तिन्हरा देश साडै चार बौर्षा ना तिन्हरा केरू। 20 एथा ना बाद तेइयै शमुएल भविष्यवक्ता तक तिन्हा ना न्यायी ठहराऐ। 21 तेथा ना बाद तिन्है एक राजा मुँगू। तँबै परमेश्वरै चाही बौर्षे री तँइयै बिन्ध्यामीनै रे गोत्रा ना कीशा रा बेटा शाऊल तिन्हा पँधे राजा ठहराऊ। 22 तँबै तेइबै लग केरिआ दाऊद तिन्हरा राजा बणाऊ, जौसरै बारै ना तेइयै गवाही धिनी, कि मुँभे यिश् री बेटा दाऊद मेरै मनै रे मुताबक मिलू सा। तेई मेरी सारी इच्छा पूरी केरनी। 23 एइरै वँशा ना परमेश्वरै आपणै वचनै रे मुताबिक इस्राइला आगै एक उद्धारकर्ता, मतलब यीशु भेजू। 24 जौसरै एणै ना पैहिलै युहन्नै सँभै इस्राइली बै पापा ना मन फेरनै रे बपतिस्मै रा प्रचार केरू। 25 जँबै युहन्ना आपणा दौरा पूरा केरनू आला ती, ता तेइयै बोलू, तुसै मुँभे की समझा सी? हाँऊ सौ नी आँधी। हेरा मुँ ना बाद एक एणू आला सा जौसरी जोंघे रे बूट खोलणै रे लायक बी हाँऊ नी आँधी। 26 हे भाइयो, तुसै जे इब्राहीमै री सन्तान सी; होर जे तुसै परमेश्वरा ना डौरा सी तुसा हागै एई उद्धारा रा वचन भेजुआ सा। 27 किबैकि यरुशलैमेरै रे लोकै होर तिन्हरै अगुवै सौ नी पछियाणू, होर न भविष्यवक्तै री गैला समझी जो कि हर सब्तै रे ध्याडै ना पौढिआ ती होर तेइबै दोषी ठहराइआ तिन्है ते गैला पूरी केरी। 28 तिन्हा बै तेइबै मारनै लायक तेइना कोई दोष नी मिलू, तँबै बी तिन्है पिलातुसा आगै तेइबै मारनै री तँइयै बिनती केरी। 29 जँबै तिन्है तेइरै बारै ना लिखी दी सारी गैला पूरी केरी, ता सौ क्रूसा पँधे ना उतारिआ कब्रा ना रेखू। 30 पर परमेश्वरै सौ मूरेदै ना जिनदा केरू। 31 होर जे लोका तेई सँधे गलीला ना यरुशलैमा बै आऐ ती, तिन्हा ना बोहू रोजा दौई हेरिदा रोहू, लोका सामनै एबै ते तेइरै गवाह सी। 32 होर आसै तुसाबै तेई वचनै रे बारै ना, जो परमेश्वरै आसरै बाबदादै सँधे केरू ती, ऐ खुशी री खबर शुणा सी। 33 कि परमेश्वरै यीशु बै जिनदै केरिआ, सौ वचन आसरी सन्तानै री तँइयै पूरा केरू, जँण्डा कि दुजै भजना ना लिखू सा, कि तू मेरा बेटा सा में औज तू पैदा केरू सा। 34 तेइरै मूरेदै ना जिनदै होणै रे बारै ना बी, कि तेई कदी नी चौकणा, परमेश्वरै ऐ बी बोलू सा; मुँ दाऊदा पँधली पवित्र होर अटल कृपा तुसा पँधे केरनी। 35 तेइयै एकी होरी भजना ना बी बोलू सा कि; तौ आपणै पवित्र लोका चौकणै नी देणै। 36 किबैकि दाऊद ता परमेश्वरै री इच्छे रे मुताबिक सेवा केरिआ मुँआ होर आपणै दादू- सँधे मिलू होर चौकू बी। 37 पर सौ परमेश्वरै चौकणै नी धिना होर सौ जिनदा केरू। 38 हे भाइयो तुसै जाणि लेआ कि एही रे द्वारा तुसा बै पापै री माफी रा समाचार देइया सा। 39 जौस गैला ना तुसै मूसै री विधि रे मुताबिक निर्दोष नी ती ठहरी सकदै हर एक सौ माहू जो तेई पँधे विश्वास केरा सा निर्दोष ठहरा सा। 40 एबै होशियार रोहा, एण्डा नी लोडी हुआ कि जे भविष्यवक्तै रे कताबा ना आऊ सा, 41 तुसा पँधे बी एला। हे निन्दा केरनू आलै लोको, हेरा हैरान होआ होर खत्म होआ, किबै कि मुँ तुसरै ध्याडै ना एक एण्डा कोम केरना कि अगर तुसा ना कोई तेथे री चर्चा केरला, ता तुसा तेथे री प्रतीति नी केरनी। 42 जँबै ते बाहरै निकलदै लागै ता लोका तिन्हा आगै बिनती केरदै लागै, कि आगलै सब्तै रे ध्याडै ना आसा बै ए गैला भी शुणाइतू। 43 बै सभा पूरी हुई होर लोका उठै ता यहूदी होर यहूदी मता ना आऐ दै भक्त ना बोहू सारै पौलुस होर बरनबासा पिछै हुऐ होर तिन्है ते गैला केरिआ समझाऐ कि परमेश्वरै रे अनुग्रहा ना बैणी रोहात्।

## पौलुस द्वारा होरी जाति मॉन्डे प्रचारा री शुरुआत

44 आगलै सब्तै रे ध्याडै ना नगरै रे सारै लोका परमेश्वरा रा वचन शुणनै री तँइयै कैठा हुऐ। 45 पर यहूदी बै लोकै री भीड हेरिआ जलन हुई, होर निन्दा केरिआ पौलुसै री गैलै रे खिलाफ बोलदै लागै। 46 तँबै पौलुस होर बरनबासै निडर होइआ बोलू, ऐ जरूरी ती कि परमेश्वरा रा वचन पैहिलै तुसाबै शुणाइदा, पर जँबै कि तुसै तेइबै दूर केरा सी होर आपू बै अन्नत जिनदगी रे लायक नी ठहराँदै, ता हेरा आसै होरी जाति धिरा बै फिरा सी। 47 किबैकि प्रभुऐ आसा बै ऐ हुकम केरू सा कि मैं तू होरी जाति री तँइयै प्याशै साही ठहराऊ सा ताकि तू धौरती रे अन्तिम किनारै दौई उद्धारा रा दुआर होला। 48 ऐ शुणिया होरी जाति रे लोका खुश हुऐ होर परमेश्वरै रे वचनै री बडाई केरदै लागै होर जेतरे अन्नत जिनदगी री तँइयै ठहराऐ ती तिन्है विश्वास केरू। 49 तँबै प्रभु रा वचन तेई सारै देशा ना फैलू। 50 पर यहूदिऐ भक्त होर बेटडी होर नगरै रे बडै लोका बै उकसाइया, पौलुस होर बरनबास आपणै इलाके ना खोलै। 51 तँबै ते तिन्हा सामनै आपणी जोंघे रे धूडै तुडकिआ इकुनियुमा बै नौठै। 52 चेलै खुशी सँधे पवित्र आत्मा ना सिद्ध होदै रोहै।

## इकुनियुमा न पौलुस होर बरनबास

14 इकुनियुमा ते यहूदी रे अराधनालय बै सँधे-सँधे नौठै, होर ऐण्डी गैला केरी कि यहूदी होर युनानी दूही मुँझै ना बोहू सारै लोकै प्रभु पँधे विश्वास केरू। 2 पर जुणि यहूदी लोकै तिन्हरी गैला नी मैनी तिन्है होरी जाति रे लोकै रे मन तिन्हरै विरोधा ना उकसाऐ, होर तिन्हरै खिलाफ केरै। 3 ते बोहू रोजा तक तौखे रोहै होर प्रभु रे भरोसे हिमती सँधे गैला केरा ती: होर प्रभु तिन्हरै हाँथे लाइया चिन्ह चमत्कार केरिआ आपणै वचनै पँधे गवाही देआ ती। 4 पर नगरै रे लोका ना फूट पौडी ती; ऐण्डे तरहै तिन्हा ना केतरे ता यहूदी धिरे बै फिरै, होर केतरे तिन्हा चेलै धिरा बै फिरै। 5 पर जँबै होरी जाति रे लोका होर यहूदी तिन्हा बै बेइजत केरिआ आपणै अगुवै समेत तिन्हा बै पाथरै मारदै दौडै। 6 ता तिन्है ऐ गल जाणी होर लुकाउनिऐ रे लुस्त्रा होर दिरबै रे नगरा बै, होर औरलै-पौरलै देशा बै नौठै। 7 होर तिन्हा लोकै ना प्रभु रे बारै ना सुसमाचार शुणादै लागै।

## लुस्त्रा होर दिरबे न

8 लुस्त्रा ना एक माहू बेटा ती होर तेइरी जोंघा कमजोर ती, सौ पैदा होणे ना लेइया लँगड़ा ती होर कदी चेलू ना ती। 9 सौ पौलुसा बै गैला केरदै शुणदा लागा ती होर ऐ माहू तेई धिरा बै लगातार भाल्दा रोहू कि एइबै ठीक होणे रा विश्वास सा। 10 होर जोरा सँधे बोलू, आपणी जोंघे रे सहारै सीधा खडा हो: तँबै सौ उछलिआ चलदा-फिरदा लागा। 11 लोकै पौलुसै रे एई कोम हेरिआ लुकाउनी भाषा ना जोरा सँधे बोलू देऊ आसा आगै उतरिया आऐ सी। 12 तिन्है बरनबासा बै ज्यूस, होर पौलुसा बै हिरमेस बोलू, किबैकि सौ गैला केरनै ना खास ती। 13 ज्यूसै रे तेई मन्दिरा रा पुजारी जो तेई बौगतै नगरै रे सामनै ती, सौ बौल्द होर फूलै री हार बणाइया लोका सँधे बलि केरना चाहा ती। 14 पर जँबै बरनबास होर प्रेरित पौलुसै ऐ शुणू ता आपणै झिकडै चिरै, होर भीडा बिचै जाइया जोरा सँधे बोलदै लागै, हे लोको तुसै की केरा सी? 15 आसै बी ता तुसा साही दुःख-सुख भोगणू आलै माहू सी होर तुसाबै खुशी री खबर शुणा सी कि तुसै बेकारै री चिजा ना अलग होइआ जिनदै परमेश्वरा धिरा बै फिरा जुणिऐ स्वर्ग, धौरती होर सारी चिजा बणाई। 16 तेइयै बीतै दै बौगता ना सब जाति रे लोका आपणी-आपणी बौतै चैलणै धिनै। 17 तँबै बी सौ आपू बे-गवाह नी रोहू बल्कि भलाई केरदा रोहू होर आसमाना ना गाश-पाणी होर फ़ौल देणू आली ऋतू देइया तुसा बै रोटी दैदा रोहू होर तुसरै मना बै खुशी सँधे भोरदा रोहू। 18 ऐण्डे बोलिया बी तिन्है लोका बडी मुश्किला सँधे रोके कि ते इन्हा चिजै री तँइयै बलिदान नी केरलै। 19 पर केतरे यहूदी लोकै अन्ताकिया होर इकुनियुमा ना एजिया लोका आपू धिरा बै केरै, होर पौलुस पाथरै लाइया मारू होर मुँआदा सोचिया स घसीटिआ नगरा बाहरै नेऊ। 20 पर जँबै चेलै तेइरै चोहू पासै एजिया खडै हुऐ, ता सौ उठिया नगरा बै नौठा होर दूजै रोजै बरनबासा सँधे दिरबै बै नौठा।

21 ते तेई नगरै रै लोका बै सुसमाचार शुणाइया होर बोहू सारै चेलै बणाइया, लुस्त्रा, इकुनियुम होर अन्ताकिया बै वापस आए। 22 ते चेलै रै मना बै स्थिर केरदै रौहै होर ऐ उपदेश देआ ती, कि आसा परमेश्वरै रै राज्य ना बड़ै दुःख क्लेश सहन केरना पौडु। 23 तिन्है हर एक कलीसिया ना तिन्हरी तैइयै अगुवै नियुक्त केरै, होर व्रता सँघे प्रार्थना केरिया ते प्रभु रै हौथा ना धिने, 24 होर ते पिसिदिया होइया पँफूलिया पुजै : 25 होर पिरगा ना प्रभु रा वचन शुणाइया अत्तालिया बै आए। 26 तौखना ते जहाजा ना अन्ताकिया बै आए, जौखना ते तेई कोमै री तैइयै जो तिन्है पूरा केरु ती परमेश्वरै रै अनुग्रह ना समर्पित केरै ती। 27 तौखै तिन्है कलीसिया कैठी केरी होर दैसू कि परमेश्वरै आसा सँघे होइया कैण्डे बड़ै-बड़ै कोम केरै ! होर होरी ज्ञाती रै लोकै री तैइयै विश्वासा रा दुआर खोलु। 28 होर ते चेलै सँघे बोहू रोजा तक रौहै।

### यरुश्लेमा री सभा

15 तैबै केतरै लोका यहूदिया ना एजिया लोका बै सिखाँदै लागै कि अगर मूसै री विधि रै मुताबिक तुसरा खतना नी होला ता तुसै उद्धार नी पाई सकदै। 2 जैबै पौलुस होर बरनबासा रा तिन्हा सँघे बोहू झगड़ा होर वहस हुई ता ऐ फैसला लेऊ पौलुस, बरनबास, होर आसा ना होर केतरै माहणू एसा गैलै रै बारै ना यरुशलैमा बै प्रेरित होर अगुवै हागै बै जाणा। 3 तैबै मण्डली रै लोकै ते किछ दूरा तक पजाए; होर ते फीनीके होर सामरिया होइया होरी ज्ञाति रै लोकै रै मन फेरने रा सुसमाचार शुणादै रौहै, होर सँभै भाई बड़े खुश केरै। 4 जैबै यरुशलैम पुजै, ता कलीसिया रै लोका, प्रेरित होर अगुवै खुशी-खुशी तिन्हा सँघे मिलै, होर तिन्है दैसू कि परमेश्वरै तिन्हा सँघे होइया कैण्डे-कैण्डे कोम केरै। 5 पर फरीसी पँथे रै जेतारै लोकै विश्वास केरु ती, तिन्हा ना केतरै लोक उठिया बोलू, कि तिन्हरा खतना करणा होर मूसै री विधि बै मनगै रा हुकम देणा चाहिऐ। 6 तैबै प्रेरित होर अगुवै एसा गैला रा विचार केरने री तैइयै कैठा हुऐ। 7 तैबै पतरसै बोहू वहस हाणै ना बाद खड़े होइया बोलू, हे भाइयो, तुसै जाणा सी, कि बोहू रोज हुऐ कि परमेश्वरै हाँऊ होरी ज्ञाति बै सुसमाचार शुणाणै री तैइयै चुनू सा कि ते विश्वास केरलै। 8 होर मना बै जाँचणू आलै परमेश्वरै तिन्हा बै बी आसा साही पवित्र आत्मा देइया तिन्हरी गवाही धिनी। 9 होर विश्वासै रै द्वारा तिन्हरै मन शुद्ध केरिया आसरे होर तिन्हरै बीचा ना किछ भेद नी रैखू। 10 ऐबै तुसै किबै परमेश्वरै री परीक्षा केरा सी होर चेलै रै गौआ पँधे ऐण्डा जूआ रैखा सी, जो कि आसरे बाबदादै नी चेकी सके होर ना आसै चैकी सकदै। 11 हाँ आसरा ता ऐ पक्का सा, कि जौस रीतियै तिन्हा प्रभु यीशु रै अनुग्रह ना उद्धार पाणा तेसा रीतियै आसा बी पाणा। 12 तैबै सारी सभा चुप-चाप पौलुस होर बरनबासै री शुणदी लागी, कि परमेश्वरै तिन्हरै जरिऐ होरी ज्ञाति रै बिचा ना चिन्ह होर अदभुत कोम केरै। 13 जैबै ते चुप हुऐ, ता याकूब बोलदा लागी कि, 14 हे भाइयो मेरी शुणा : शमोनै दैसू कि परमेश्वरै पैहिलै होरी ज्ञाति रै लोका पँधे कृपा दृष्टि केरी कि तिन्हा ना आपणी तैइयै एक लोका बणाला, 15 होर एथा सँघे भविष्यवक्तै री गैला मिला सी जैण्डा कि लिखू सा कि। 16 मूँ भी एजिया दाऊदा रा ढौऊ दा डेरा चैकणा होर दुजी घेरै बणाइया खँडै केरना। 17 ऐबै हर एक माहू, होर सँभै होरी ज्ञाति रै लोका जो मेरै सी प्रभु बै तोपलै। 18 एसा गैला बै सौहै प्रभु बोला सा जो संसार बणने ना लेइया इन्हा गैला रा समाचार देंदा आऊ सा। 19 ऐबै मेरा विचार ऐ सा कि होरी ज्ञाति मुँझै ना लेइया जे लोका परमेश्वरा धिरै बै फिरा सी आसा तिन्हा बै दुःख नी देणा। 20 पर तिन्हा बै लिखिया भेजणा, कि ते मूरतै री अशुद्धता ना, व्यभिचारा ना होर बलि केरुऐ दै पशु रै माँस होर लोहू ना दूर रोहलै। 21 किबैकि पराणै बौगता ना नगरा-नगरा ना मुसै री विधि पौढनू आलै होआ ती, होर हे सबतै रै ध्याडै ना अराधनालय ना पौढिया ती।

### दूजै विश्वासी बै चिड़ी

22 तैबै सारी कलीसिया समेत, प्रेरित होर अगुवै बै शोभला लागी, कि आपू बिचै ना कई माहू बै चुनलै। यहूदा जुणिये कि बरसब्बा बोला सी, होर सीलास जे कि भाई मुँझै मुख्य ती तिन्है ते पौलुस होर बरनबासा सँघे अन्ताकिया बै भेजै। 23 होर तिन्हा आगै ऐ लिखिया भेजू कि अन्ताकिया, सुरिया होर

किलिकिया ना रोहणू आलै भाई जो कि होरी ज्ञाति रै सी, प्रेरित होर अगुवै रा नमस्कार। 24 आसै शुणू सा, कि आसा बिचै ना केतरै लोकै तुसै तौखै जाइया आपणी गैला सँघे डराए होर तिन्हरै मन उल्टै फेरै, पर आसै तिन्हा बै ऐ हुकम नी ती धिना। 25 ऐबै आसै एक मन होइया ठीक समझू कि चुनुऐदँ माहू बै आपणै प्यारै बरनबास होर पौलुसा सँघे तुसा हागै बै भेजलै। 26 ऐण्डै माहू सी, जुणिये कि आपणै प्राण प्रभु यीशु रै नाँ ना आसा सँघे मुश्किला ना पाए सी। 27 आसै यहूदा होर सीलास भेजै सी, तिन्हा बी आपणै मुँहै लाइया ऐ गला बोलणी। 28 पवित्र आत्मा होर, आसा बै ऐ ठीक लागी कि इन्हा जरूरी गैला बै छौडिया तुसा पँधे होर बोझ नी पालै, 29 कि तुसै बलि केरुऐ दै जानवरै रै लोहू होर माँसा ना, होर व्यभिचारा ना, दूर रोहलै। इन्हा ना दूर रोहलै ता तुसरा भला होणा। 30 तैबै ते विदा होइया अन्ताकिया पुजै, होर सभा कैठी केरया सौ पत्री तिन्हा बै धिनी। 31 होर ते पत्री रै उपदेश पौढिया बड़ै खुश हुऐ। 32 यहूदा होर सीलास जे कि आपू बी भविष्यवक्ता ती, तिन्है बोहू सारै भाई उपदेश देइया स्थिर केरै। 33 ते किछ रोज तौखै रोहिया तिनहा भाई ना शान्ति सँघे विदा हुऐ, कि जुणिये ते भेजै सी ते तिन्हा आगै वापस जालै। 34 पौलुस होर बरनबास अन्ताकिया ना रौहै होर बोहू लोका सँघे प्रभु रै वचना रा उपदेश होर सुसमाचार शुणादै रौहै। 35 किछ रोजा बाद पौलुसै बरनबासा बै बोलू, जुणि-जुणि नगरा ना आसै प्रभु रा वचन शुणाऊ सा, आसा भी तौखै जाइया आपणै भाई हेरने, कि ते कैण्डै सी।

### पौलुसा री दूजी प्रचार यात्रा पौलुस होर बरनबास न भेद भाव

36 तैबै बरनबासै यहूदा बै जुणिये कि मरकुस बी बोला सी, सँघे नेणै रा विचार केरु। 37 तैबै बरनबासै यहूदा बै जुणिये कि मरकुस बी बोला सी, सँघे नेणै रा विचार केरु। 38 पर पौलुसै पँफूलिया ना तेइरै अलग हाणै री वजहा ना होर कोमा ना तिन्हा सँघे नी जाणै री वजहा न सौ सँघे नेणा अच्छा नी समझू। 39 तैबै ते एकी होरी ना अलग हुऐ होर बरनबास मरकुसा बै सँघे नेइया जहाजा ना कुप्रसा बै नौठा। 40 पर पौलुसै सीलास चुनू होर, भाई ना परमेश्वरा रा अनुग्रह पाइया तौखै ना नौठा। 41 होर कलीसिया बै स्थिर केरदै हुऐ, सूरिया होर किलिकिया होंदै निकता।

### पौलुसा रा तिमथियुसा बै सँघे नेहणा

16 तैबै सौ दिरबै होर लुस्त्रा बै बी नौठा होर हेरा, तौखै तिमथियुस नाँ रा एक चेला ती, जो कि एक विश्वासी यहूदिनी रा बेटा ती पर तेइरा बापू यूनानी ती। 2 होर तेइरा नाँ लुस्त्रा होर इकुनियुमै रै भाई मॉन्झे खरा ती। 3 पौलुस चाहा ती, कि सौ तेई सँघे चैलला; होर जो यहूदी लोका तिन्हा जैगा ना ती तिन्हरी वजहा ना तेइरा खतना केरु; किबैकि ते सँभै जाणा ती, कि तेइरा बापू यूनानी ती। 4 होर ते नगरा-नगरा ना जाइया तिन्हा विधि बै पजा ती, जो यरुशलैमै रै प्रेरित होर अगुवै मैनणै री तैइयै ठहराई ती। 5 ऐण्डै तरहै कलीसिया विश्वासा ना स्थिर होंदी रौही होर गिनती ना बढ़दी रौही। 6 ते फ्रुगिया होर गलातिया देशा ना होइया नौठै, होर पवित्र आत्मै तिन्हा बै एशिया ना वचन शुणाणै री तैइयै नाँह केरु। 7 तिन्है मूसियै रै नेड पुजिया, बितूनिया बै जाणा चाहू पर यीशु री आत्मै ते जाणै नी धिने। 8 तैबै ते मूसिया ना होइया त्रोआसा बै नौठै। 9 पौलुसै राती एक दर्शन हेरु कि एक मकिदूनिया मर्द खडै होइया, तेई आगै बिनती केरा सा कि पौरै बै उतरिया मकिदूनिया बै एज होर आसरी मजत केर। 10 तेइरै दर्शन हेरै ना बाद आसै तुरन्त ऐ सोत्रिया मकिदूनिया बै जाणा चाहू, कि परमेश्वरै आसै तिन्हा बै सुसमाचार शुणाणै री तैइयै शाधै सी।

### फिलिप्पी न लुदिया रा मन बदलुआ

11 तैबै त्रोआसा ना जहाज खोलिया आसै सीधै सुमानाकै होर दूजै रोजै नियापुलिसा बै आए। 12 तौखै ना आसै फिलिप्पी पुजै, जै मकिदूनिया रा मुख्य राज्य ती, होर रोमी लोकै री बस्ती सा; आसै तेई नगरा ना किछ रोजा तक रौहै। 13 सबतै रै ध्याडै ना आसै नगरा बाहरै ऐ सोत्रिया नौठै, कि तौखै प्रार्थना केरने री तैइयै कोई जैगा होली होर तिन्हा बेटडी सँघे गैला केरदै लागै जो तौखै कठा हुई ती। 14 होर लुदिया नाँ री थुआथीरा नगरै री बँजनी कपडै

बेचणू आली एक भक्त बेटडी शुणा ती, होर प्रभुए तेसरा मन खोलू ताकि सौ पौलुसै री गैला पैंधे ध्यान लाली। 15 जैबै तेसै आपणै घराने समेत बपतिस्मा लेऊ,ता बिनती केरी,कि अगर तुसै मुँभे प्रभु री विश्वासिनी समझा सी, ता मेरै घौरा ना रोहा होर तेसै आसै मनाइया नेऐ,

### पौलुस होर सीलासा रा जेला छूटना

16 जैबै आसै प्रार्थना केरने री जैगा बै जाँदे लागै ती, ता आसा बै एक दासी मिली जुणि ना भविष्य दैसणू आली आत्मा ती, सौ भविष्य दैसिया आपणै स्वामी री तैइयै बोहू किछ कमौआ ती। 17 सौ पौलुस होर आसा पिछै एजिया चिलाँदी लागी कि ए माहू परमप्रधान परमेश्वरै रै दास सी,जे आसा बै उद्धार पाणै री बौतै री कैथा दैसा सी। 18 सौ बोहू रोजा तक ऐण्डा केरदी रोही, पर पौलुस दुःखी हुआ होर मुँह फेरिया तेसा आत्मा बै बोलू, हाँऊ तौभै यीशु मसीह रै नाँ ना हुकम केरा सा कि एसा बेटडी ना फेटै निकळ होर सौ आत्मा तेसा बेटडी ना तेसा घड़ियै निकती। 19 जैबै तेसरै स्वामियै हेरू,कि आसरी कमाई री आशा नौठी ता तिन्है पौलुस होर सीलास ढौकिया आपणै प्रधाना आगै नेऐ। 20 होर फौजदारी रै हाकिमा हागै नेइया बोलू, ए लोका यहूदी सी, होर आसरै नगरा ना ए बडी हलचल मचाँदे लागै सी। 21 होर ऐण्डै व्यवहार दैसदै लागै सी,जौसरा ग्रहण केरना होर मैनणा आसा रोमी री तैइयै ठीक नी आँधी। 22 तैबै भीड़े लोका तिन्हरै खिलाफ कठा हुऐ होर हाकिमै तिन्हरै झिकड़े चिरिया उतारै,होर तिन्हा बै बँइतै लाइया मारनै रा हुकम केरू। 23 तैबै तिन्है ते बँइतै लाइया मारिया बन्दी घौरा ना बन्द केरै होर सिपाही बै हुकम केरू, कि तिन्हरा ध्यान रखला। 24 सिपाहियै ते आन्धरली कोठरी ना रैखै होर तिन्हरी जोंघा ना बेड़ी लाई।

25 औंधा रातियै पौलुस होर सीलास प्रार्थना केरदै होर भजन गाँदे लागै ती,होर कैदी शुणदै लागै ती। 26 एतरै ना एकदम बडी जौजरी हुई औँखै तक कि बन्दी घौरै री मनियाद तक हिली, तैबै तुरन्त सैभै दुआर खुलै होर सैभी रै बन्धन खुलै। 27 जैबै सिपाही उतू ता तेइयै खुलै दुआर हेरिया सोचू कि सैभै कैदी भैगै, होर तलवार कौढिया आपू बै मारना चाहू। 28 पर पौलुसै जोरा सँधे बोलू, आपू बै किछ नुकसान मत केरदा,किबैकि आसै सैभै औँखै सी। 29 तैबै सौ दीऐ मंगाइया आन्धर बै नौठा होर कोमदै-कोमदै पौलुस होर सीलासा आगै धिरै पौडू। 30 होर तिन्हा बै बाहरै आणिया बोलू, हे साहबो उद्धार पाणै री तैइयै मूँ की केरना? 31 तिन्है बोलू, प्रभु यीशु मसीह पैंधे विश्वास केर, ता त होर तेरै घराने उद्धार पाणा, 32 होर तिन्है तेइरै घौरै रै सैभी लोका बै प्रभु रा वचन शुणाऊ। 33 तैबै रातियै तेसा घड़ियै तेइयै नेइया तिन्हरै घाव धोऐ,होर तुरन्त आपणै घौरै रै सैभी लोका समेत बपतिस्मा लेऊ। 34 तेइयै आपणै घौरा नेइया तिन्हा आगै भोजन रैखू होर सारै घराने समेत प्रभु पैंधे विश्वास केरिया खुशी मनाई। 35 जैबै ध्याड़ हुई तैबै हाकिमै आपणै सपाही आगै खबर भेजी कि तिन्हा माहू बै छौँडि दैआ। 36 सिपाहियै ए गैला पौलुसा बै दैसी कि हाकिमै तुसा बै छौँडने रा हुकम केरू सा, ऐबै तुसै ठीकठाक जात। 37 पर पौलुसै जोरा सँधे बोलू, तिन्है रोमी माहूऐ दोष साबित केरै बगैर आसै लोका सामने मारै होर बन्दी घौरा पाऐ होर ऐबै आसा बै चुप-चाप कौढा सी? पर ऐण्डा नी आँधी पर ते आपू एजिया आसा बै बाहरै नेलै। 38 सिपाहियै ए गैला हाकिमा बै दैसी होर ते ए शुणिया डौरै कि ते रोमी सी, ते डोरे। 39 ते बन्दी घौरा ना निकलिया लुदियै री हागै नौठै होर भाई सँधे मिलिया तिन्हा बै शान्ति मिली। 40 ते बन्दी घौरा ना निकलिया लुदियै री हागै नौठै होर भाई सँधे मिलिया तिन्हा बै शान्ति मिली।

### थिस्सलुनिके नगरा न

17 तैबै ते अम्फिपुलिस होर अपुल्लोनिया होइया थिस्सलुनीका बै आऐ जौखै यहूदी रा एक अराधना घौर ती। 2 होर पौलुस आपणी रीति रै मुताबिक तिन्हा हागै नौठा होर त्रा सब्ता तक शास्त्रा ना तिन्हा सँधे वहस केरी। 3 होर तिन्हरा अर्थ खोलिया समझा ती कि मसीह रा दुःख च़ेकणा होर मूँऐदे ना जिन्दा होणा ज़रूरी ती होर ऐ यीशु जुणी री कैथा हाँऊ तुसा बै शुणा सा मसीह सा। 4 तिन्हा ना भक्त यूनानी मौँझे ना बोहू सारै लोकै होर बेटड़ियै मैनू कि यशु मसीह सा होर ते पौलुस होर सीलासा सँधे मिलै। 5 पर यहूदी बै

जलन हुई होर ते बजारा ना कई दुष्ट लोका बै आपू सँधे भीड़ कठा केरिया,ओर हुलड़ मचाँदे लागै होर यासोनै रै घौरा ज़ाइया ते लोका सामने आणनै चाहै। 6 पर जैबै तिन्हा बै ते नी मिलै ता तिन्है यासोना समेत होरा कई भाई हाकिमा हागबै खिंचिया आणै कि इन्है लोकै संसार उल्टा-पुल्टा केरिया रखू सा होर ऐबै औँखै बी आऐ सी। 7 होर यासोनै ते आपणै घौरा ना उतारै सी,ऐबै ए सैभै ऐण्डा बोला सी कि यीशु राजा सा, होर कैसरै रै हुकमा रा विरोध केरा सी। 8 तिन्है लोका होर नगरै रै हाकिम ऐ बोलिया डराए। 9 होर तिन्है यासोन होर बाकी भाई जुमानै लेइया छौँडे।

### बिरिया नगरा न

10 भाई लोकै तुरन्त पौलुस होर सीलास बीरिया देशा बै भेजे : होर तौखै पुजिया यहूदी रै अराधना घौरा बै नौठै। 11 ए लोका ता थिस्सलुनीकै रै लोका ना भलै ती होर तिन्है बडी लगना सँधे प्रभु रा वचन ग्रहण केरू। ते हर रोज पवित्र शास्त्रा ना तोपदै रौहै कि ए गैला ठीक सी कि नी। 12 तैबै तिन्हा ना बोहू सारी यूनानी बेटड़ियै होर बोहू सारै मर्दे प्रभु पैंधे विश्वास केरू। 13 पर जैबै थिस्सलुनीकै रै यहूदियै ऐ ज़ाणू कि पौलुस बीरिया ना बी परमेश्वरा रा वचन शुणा सा ता तौखै एजिया बी लोका बै उकसाइया हलचल मचाँदे लागै। 14 तैबै तौखलै तिन्है भाइयै पौलुस तुरन्त विदा केरू कि सौ समुदरै रै किनारै ज़ाला पर सीलास होर तिमुथियुस तौखै रौहै। 15 पौलुसा बै पजाणु आलै सौ अथेनै तक नेइया ते सीलास होर तिमुथियुसै री तैइयै ऐ हुकम लेइया विदा हुऐ कि मूँ हागै छेकै एजा।

### एथेंस नगरा न

16 जैबै पौलुस अथेना ना तिन्हरी याद केरदा लागा ती ता सारा नगर मूरती सँधे भोरुऐदे हेरिया तेइरा ज़ीऊ फुकुआ। 17 तैबै सौ अराधना घौरा ना यहूदी, भक्त होर जे लोका तेइबै चौका ना मिला ती तिन्हा सँधे हर रोज वहस केरा ती। 18 तैबै इपिकूरी, स्तोइकी पन्डता मुँझे ना केतरै तेई सँधे तर्क केरदै लागै होर केतरै लोकै ता ऐ बोलू कि ऐ बकवास केरनू आला की बोलणा चाहा सा पर होरियै बोलू, ऐ ता कोई होरौ देऊआ रा प्रचारक लागा सा किबैकि पौलुस यीशु रा होर पुनर्ज्थाना रा सुसमाचार शुणा ती। 19 तैबै तिन्है सौ आपू सँधे अरियुपगुसा बै नेऊ होर पुछू, कि आसै ज़ाणी सका सी, कि जे तू इन्हा गैला बै शुणा सा ए की सी? 20 किबैकि तू आसा बै नोखी गैला शुणा सा, तैबै आसै ज़ाणना चाहा सी कि इन्हरा अर्थ की सा? 21 जे अथेनवी होर परदेशी तौखै रौहा ती नोऊँई-नोऊँई गैला बोलणै होर शुणनै रै अलावा तिन्हा आगै कोई होर कोम नी ती हाँदा।

### अरियुपगुस री सभा न पौलुसा रा भाषण

22 तैबै पौलुसै अरियुपगुसै रै बीचा ना खड़ै होइया बोलू, हे अथेनै रै लोको हाँऊ हेरा सा कि तुसै हर एकी गैला ना देऊआ बै मैनणू आलै सी। 23 किबैकि हाँऊ फिरदी घेरै तुसरी मुरता बै हेरदा लागा ती, ता एक ऐण्डी वेदी मिली जौस पैंधे लिखू ती, पराई ईश्वरै री तैइयै। जौसबै तुसै बगैर ज़ाणै पूजा सी हाँऊ तुसाबै तेई रा सुसमाचार शुणा सा। 24 जुणी परमेश्वरै धौरती होर तैथै री सारी चीजा बणाई सौ स्वर्ग होर धौरती रा स्वामी होइया हौथै रै बणाऐदे मन्दिरा ना नी रौहदा। 25 न कौसी इच्छा रखै बगैर माहू रै हौथै री सेवा लेंदा किबैकि सौ आपू सैभी बै जिन्दगी, शाह होर सेभ किछ देआ सा। 26 तेइयै एकी ज़दना ना माहू सारी ज़ाति धौरती ना रोहणै री तैइयै बणाई सी होर तिन्हरा धौरती पैंधे रोहणै रा होर ज़ीणै रा बौगत आपणै हौथा ना रखू सा। 27 कि ते तेई परमेश्वरा बै तोपलै पर तैबै बी सौ आसा सैभी ना दूर नी आँधी। 28 किबैकि आसै तेही ना जिन्दै रोहा सी, चला-फिरा सी होर स्थिर रोहा सी; ज़ेण्डा कि तुसरै केतरै कवियै बोलू सा कि आसै ता तेही परमेश्वरै रै वंश सी। 29 परमेश्वरै रै वंश होइया आसरा ऐ समझणा ठीक नी आँधी कि ईश्वर सुनै-रुपे या पाथरै रै समान सा जे कि माहू री एक कल्पना सँधे घडूऐदे सी। 30 ऐबै परमेश्वर अज्ञानतै रै बौगता केरी दी आनाकानी रै बदलै हर ज़ेगा ना सैभी माहणू बै पापा ना मन फेरनै रा हुकम देआ सा। 31 किबैकि तेइयै एक रोज ठहराऊ सा तेई बौगतै तेई, तेई माहू रै द्वारा धर्मा सँधे संसारा रा

न्याय केरना जो तेइयै ठहराऊ सा होर मूँदे ना जिन्दै केरिया ऐ गल सैभी पैंधे साबित केरी सा । 32 मूँदे रे पुनर्जन्म री गैल शुणिया केतरै लोका ता टटा केरदै लागै होर केतरै लोकै बोलू, ऐ गल आसा त ना दबारा कदी नी शुणनी । 33 तैबे पौलुस तिन्हा बिचै ना निकता । 34 पर कई माहू तेई सैंधे मिलै होर विश्वास केरू जुणि ना कि, दियुनुसियुस, अरियुपगी होर तिन्ह सैंधे एक बेटड़ी बी ती होर तिन्हा सैंधे होरा बी बोहू लोका ती ।

### कुरिन्थस नगरा न

18 एथा ना बाद पौलुस अथेन जैगा बै छौडिया कुरिन्थुसा बै आऊ । 2 होर तौखे अक्विला नाँ रा एक यहूदी मिलू, जौसरा जन्म पुन्तुसा रा ती होर आपणी लाडी प्रिस्किला समेत इतालिया ना नोऊआ-नोऊआ आऊ ती किबैकि क्लौदियुसे सैभी यहूदी बै रोमा ना निकअणे रा हुकम केरू तैबे स तिन्हा सैंधे आँखे आऊ । 3 तेई रा होर तिन्हरा एक उदेश्य ती तैबे सौ तिन्हा सैंधे रोहू होर ते कोम केरदै लागै । ते तोम्बू बणाणे रा कोम केरा ती । 4 सौ हर एक सब्तै रे ध्याडै ना अराधना घौरा ना वहस केरिया यहूदी होर यूनानी बै समझा ती । 5 जैबे सीलास होर तिमुथियुस मकिदूनिया ना आपे, ता पौलुस बड़ी लगना सैंधे वचन शुणाइया गवाही देआ ती कि यीशु मसीह सा । 6 पर जैबे ते विरोध होर निन्दा केरदै लागै ता तेइयै आपणे झिकडे टुडकिया बोलू, तुसरा लोहू तुसरै गौआ पैंधे रोहला । हाँऊ निर्दोष सा, ऐबे मूँ होरी जाति रे बिद्या ना ज्ञाणा । 7 होर तौखे ना स तीतुस युस्तुस नाँ रे परमेश्वरै रे भगतै रे घौरा बै नौठा, जौसरा घौर अराधना घौरा सैंधे ती । 8 तैबे अराधना घौरै रे मुख्य आपणे सारै घरानै समेत परभु पैंधे विश्वास केरू; होर बोहू सारै कुरन्थी लोकै बी विश्वास केरिया बपतिस्मा लेऊ । 9 प्रभुऐ राती दर्शन देइया पौलुसा बै बोलू, मत डौरदा, बल्कि बोलदा जा होर चुप मत रौहदा । 10 किबैकि हाँऊ तौ सैंधे सा कोई तेरा किछ बी नुकसान नी केरना ; किबैकि एई नगरा ना मेरै बोहू लोका सी । 11 तैबे पौलुस डेढ बौषा तक तिन्हा बै वचन सिखाँदा रोहू । 12 जैबे गल्लियो अखाया देशा रा हाकिम ती ता यहूदी लोकै एकता केरिया पौलुस राजगद्दी सामनै आणू होर बोलदै लागै । 13 कि ऐ लोका बै समझा सा, कि परमेश्वरै री उपासना एसा रीतियै केरा जे कि व्यवस्थे रे खिलाफ सा । 14 जैबे पौलुस बोलदा लागता ती ता, हाकिमै यहूदी बै बोलू, हे यहूदियो, अगर ऐ गल अन्याय या दुष्टता होंदी ता हाँऊ तुसरी शुणदा । 15 पर अगर ऐ वाद-विवाद सा, नाँ होर तुसरी व्यवस्थे रे बारै ना सा ता तुसै ज्ञाणा किबैकि हाँऊ एसा गैला रा न्यायी नी बणना चाँहदा । 16 तैबे हाकिमै ते राजगद्दी सामनै ना कौढणे धारे । 17 तैबे सैभी लोकै अराधना घौरा रा मुख्य सोस्थिनेस ढौकिया राजगद्दी सामनै मारु पर गल्लियो हाकिमै इन्हा गले री कोई परवाह नी केरी ।

### अन्ताकिया बै बापस एणा

18 पौलुस बोहू रोजा तक तौखे रोहू तैबे भाई लोका ना विदा लेइया किखिया ना सिर मुँडाऊ किबैकि तेइयै मन्नत मैनी ती होर जहाजा ना सुरिया बै चेलू । तेई सैंधे प्रिस्किला होर अक्विला बी ती । 19 तेइयै ते इफिसुस पुजिया तौखे छौडै, होर आपू अराधना घौरा ना जाइया यहूदी सैंधे वहस केरदा लागता । 20 जैबे तिन्है तेई आगे बिनती केरी, आसा सैंधे किछ रोज होर रोह ता तेइयै नी मैनी । 21 पर ऐ बोलिया तिन्हा ना विदा हुआ कि अगर परमेश्वरै चाह ता मूँ बी तुसा आगै एणा । 22 तैबे इफिसुसा ना जहाज खोलिया नौठा, होर केसरिया ना उतरिया यरुशलेमा बै नौठा होर कलीसिया बै नमस्कार केरिया अन्ताकिया बै आऊ ।

### पौलुसा री त्रीजी प्रचार यात्रा

23 किछ रोज तौखे रोहै ना बाद सौ तौखना नौठा होर गलातिया होर फ्रुगिया ना सैभी चेलै बै स्थिर केरदा रोहू ।

### इफिसुस नगरा न अपुल्लोस

24 अपुल्लोस नाँ रा एक यहूदी जे सिकन्दरिया ना पैदा हुआ ती, शास्त्रा बै बड़ी शोभली तैरहा ज्ञाणा ती सौ इफिसुसा बै आऊ । 25 तेइयै प्रभु री शिक्षा

पाई ती होर मन लाइया यीशु रे बारै ना ठक-ठीक दैसा ती होर सिखा ती, पर सौ सिर्फ यहूदियै बै बपतिस्मै री गल ज्ञाणा ती । 26 सौ अराधना घौरा ना निडर होइया बोलदा लागता, प्रिस्किलै होर अक्विलै स गला शणिया आपू सैंधे नेऊ होर परमेश्वरै रे बारै ना तेई बै ठीक-ठीक दैसू । 27 जैबे तेइयै पौरै बै उतरिया अखाया बै ज्ञाणे रा फैसला लेऊ भाई लोकै तेइबै हौसलै देइया चेलै बै लिखू, कि ते तेई सैंधे शोभली तैरहा मिललै होर तेइयै तौखे पुजिया तिन्हा लोकै री बड़ी मजत केरी जुणियै प्रभु पैंधे विश्वास केरू ती । 28 किबैकि स शास्त्रा ना साबित केरिया कि यीशु मसीह सा यहूदी बै सैभी सामनै जवाब देणे लायक नी ती रखदा ।

### इफिसुस नगरा न पौलुस

19 जैबे अपुल्लोस कुरिन्थुसा ना ती ता पौलुस सारै देशा ना होइया इफिसुसा बै आऊ । 2 होर कई चेलै बै हेरिया तिन्हा बै बोलू, कि तुसै विश्वास केरदी घेरै पवित्र आत्मा पाऊ? तिन्है तेइबे बोलू, आसै ता पवित्र आत्मै री चर्चा बी नी शुणी । 3 तेइयै तिन्हा बै बोलू, तैबे तुसै कौसरा बपतिस्मा लेऊ? तिन्है बोलू यहून्ना रा बपतिस्मा । 4 पौलुसै बोलू, यहून्ना ता ऐण्डा बोलिया पापा ना मन फेरनै रा बपतिस्मा धिना कि जुण मू ना बाद एणू आला सा तेई पैंधे यानिकी यीशु पैंधे विश्वास केरीत् । 5 ऐ शुणिया तिन्है प्रभु यीशु रे नाँ रा बपतिस्मा लेऊ । 6 जैबे पौलुसै तिन्हा पैंधे होथ रखे ता तिन्हा पैंधे पवित्र आत्मा उतरु होर ते अलग-अलग भाषा बोलदै लागै होर भविष्यवाणी केरदै लागै । 7 ऐ सारै लगभग बारा मर्द ती । 8 सौ अराधना घौरा ना जाइया त्रा महीनै तक निडर होइया बोलदा रोहू होर परमेश्वरै रे राज्य रे बारै ना वहस केरदा होर समझाँदा रोहू । 9 पर जैबे केतरै लोक कठोर होइया तेइरी नी मैनिया एसा बौता बै बुरा बोलदै लागै ता तेइयै तिन्हा छौडिया चेलै अलग केरै होर हर रोज तुरनुसै रे स्कूला ना वहस केरा ती । 10 दस बौषा तक ऐ होंदा रोहू आँखे तक कि आसिया ना रोहणू आले यहूदी होर यूनानी सैभियै प्रभु रा वचन शुणू । 11 होर परमेश्वर पौलुसै रे होथे शक्ति सैंधे नोखे कोम रिहा ती । 12 आँखे तक कि ते रूमाला बै पौलुसै री देही सैंधे छुंगिया बीमारा पैंधे पा ती होर ते ठीक होआ ती होर दुष्ट आत्मा बी तिन्हा ना निकला ती । 13 पर झाड़-फूँक केरनु आले केतरै यहूदी ऐ बोलदै लागै कि जुणि ना दुष्ट आत्मा होली तिन्हा पैंधे यीशु रे नाँ ना झाड़-फूँक केरीत् कि जौस यीशु रा पौलुस प्रचार केरा सा हाँऊ तुसा बै तेइरी कसम देआ सा, 14 होर स्किक्वा नाँ रे यहूदी महाराजै रे सौत बेटे ती जो कि ऐण्डा केरा ती । 15 पर दुष्ट आत्मै जवाब धिना, कि यीशु बै हाँऊ ज्ञाणा सा होर पौलुसा बै बी पछियाणा सा पर तुसै कुणा सी । 16 जुणी माहू बै दुष्ट आत्मा ती तिन्हा पैंधे झपटू होर तिन्हा बै आपणे वशा ना केरिया बड़ा हुलड मचाऊ कि ते नौगे होर घायल होइया तेई घौरा ना भैगै । 17 ऐ गल इफिसुसै रे लोकै होर सैभी यूनानियै ज्ञाणी होर तिन्हा बै बड़ी डौर पौई होर प्रभु यीशु रे नाँ री बड़ी जय-जयकार हुई । 18 जुणियै विश्वास केरू ती तिन्हा ना बोहू सारै लोकै एजिया आपणे-आपणे कोम मैने होर प्रगट बी केरू । 19 जादू केरनु आले बोहू सारै लोकै आपणी-आपणी पोथी कठी केरिया सैभी सामनै फुकी । जैबे तिन्हरी कीमत जोड़ी ता ते पजाह हजारे री निकती । 20 ऐण्डे तैरहै प्रभु रा वचन जोरा शोरा ना फैलदा रोहू । 21 जैबे ए गैला हुई ता पौलुसै आत्मा ना मकिदूनिया होर अखाया होइया यरुशलेमा बै ज्ञाणे री ठानी कि तौखे ज्ञाणे ना बाद मेरा रोम हेरना बी जरूरी सा । 22 तैबे आपणी सेवा केरनु आले ना तिमुथियुस होर इरास्तुसा बै मकिदूनिया भेजिया आपू किछ रोज आसिया ना रोहू ।

### इफीसुसा न गडबडी

23 तेई बोगतै तेई पन्थे रे बारै ना बड़ा हुलड मचू । 24 किबकि देमेत्रियुस नाँ रा एक सनियार अरिमतिस नाँ री देवौ रे चान्दी रे मन्दिर बणाणे धाइया कारीगरै री तैइयै बड़ा कोम दिला ती । 25 तेइयै तिन्हा बै इन्हा चीजै रे होर कारीगर कठा केरिया बोलू, ओ माहूओ तुसै ज्ञाणा सी कि आसा बै एई कोमा ना केतरा धन मिला सा? 26 तुसै हेरा होर शुणा सी कि सिर्फ इफिसुसा ना नी बल्कि सारै आसिया ना पौलुसै लोका समझाए होर भडकाए सी कि जे होथे री कारीगर सा ते ईश्वर नी आँथी । 27 ऐबे सिर्फ एसा गले री डौर नी आँथी

कि आसरा धन्धा ठप्प होणा बल्कि आसरी महान देवी अरितमिसा रा मन्दिर तुच्छ समझिणा जुणिबै कि सारा संसार होर आसिया पूजा सा तेसरा महत्व बी खत्म होणा। 28 ते एसा गल शुणिया झिका सेंधें भौरुए होर जोरा सेंधें बोलदें लागें, इफिसियो री देवी अरितमिस महान सा, 29 होर सारें नगरा ना बडी हलचल मची होर लोकें गयुस होर अरिस्तरखुस जे कि पोलुस सेंधी ती ते दौकें होर एक होइया रंगशाला बै दौडें। 30 जैबै पोलुस लोका आगें भीतरें जाणा चाहू चेलें स जाणें नी धिना। 31 आसियें रै हाकिमा ना बी तेइरें कई सेंगियें तेई हागें संदेशा भेजू होर बिनती केरी कि रंगशाला बै जाइया कोई जोखिम नी च़ेकणा। 32 तैबै कोई किच्छ चिलांदा लाग़ा होर कोई किच्छ किबैकि सभा ना बडी गडबडी होंदी लागी ती होर बोहु सारें लोका ऐ बी नी ती जाणदें ती कि आसैं किज़ी बै कठा हुऐ सी। 33 तैबै तिन्है सिकन्दरा बै जे कि यहुदियें खड़ा केरु ती भीडा ना आगें केरु होर सिकन्दर हौथै लाइया इशारा केरिया लोका सामनै जवाब देणा चाहा ती। 34 पर जैबै तिन्है जाणु कि स यहूदी सा ता ते सेंधें कोई दूर्ई घंटे तक चलौदें रौहै कि इफिसियें री देवी अरितमिस महान सा। 35 तैबै नगरें रै मन्त्रियें लोका बै शान्त केरिया बोलू हे इफिसियो कुण नी जाणदा कि इफिसी नगर बडी देवी अरितमिसा रा मन्दिर निरी मूरता रा टहलुआ सा। 36 जैबै कि इन्ह गला रा खण्डन नी होई सकदा ता ठीक ऐ सा कि तुसैं चुप रौहलें होर सोच विचार केरें बगैर किछ मता केरदें। 37 किबैकि तुसैं ए माहू आणें सी जे कि मन्दिरा बै लूटणू आलें नी ऑथी होर न आसरी देवी री निन्दा केरदें। 38 अगर देमेत्रियुस होर तेइरें सेंधी कारीगरा बै कौसी सेंधें वहस सा ता कचहरी खुली सा होर हाकिम बी सी। 39 अगर तुसैं कोई होरी गलें रै बारें ना पुछणा चाहा सी ता सभा ना फैसला लेणा। 40 किबैकि औज़कें बलवें रै री वजहा ना आसा पेंधें दोष लागणें री डोर सा किबैकि एथें री कोई वजहा नी ऑथी। आसैं एसा भीडें रै कठा होणें रा कोई जवाब नी देई सकदें। 41 ऐण्डा बोलिया तेइयें सभा विदा केरी।

### म्किदुनिया, यूनान होर त्रोआसा न पौलुस

20 जैबै हुलड थमू ता पौलुस आपणें चेलें शाधिया समझाए होर तिन्हा ना विदा होइया मकिदूनिया बै नौठा। 2 होर सारें देशा ना होइया तिन्हा बै समझाइया यूनाना बै आऊ। 3 जैबै त्रा महीनै रौहिया जहाजा ना सूरिया बै जाणू आला ती ता यहूदी तेइबै घात लाइया बेठें ती। तैबै तेइयें मकिदूनिया होइया वापस एणें री सलाह केरी। 4 बीरियें रै पुरुसा रा बेटा सोपत्रुस होर थिस्सलुनीकी ना अरिस्तरखुस होर सिकुन्दुस, दिरबै रा गयुस, तिमुथियुस होर आसिया रा तुखिकुस होर त्रुफिमस आसिया तक पौलुसा सेंधें ती। 5 ते आगें जाइया आसरी याद केरदें रौहै। 6 आसैं अखमीरी रोटी रै रोज़ा बाद फिलिप्पी ना जहाजा पेंधें चढ़िया पौज़ रोज़ा ना त्रोआसा ना तिन्हा हागें पुजें होर सौत रोज़ा तक तौखें रौहै।

### इफिसुसा रै पराणें मुख्या बै उपदेश

7 समाह रै पैहिले रोज़े जैबै आसैं रोटी चोड़नै री तैइयें कठा हुऐ ता पौलुस जे कि दुजें रोज़े जाणू आला ती तिन्हा सेंधें गला केरी होर स औधा राती तक तिन्हा सेंधें गला केरदा रौहै। 8 जुणी अटारी पेंधें आसैं कठा ती तौखें बोहु दीए भौकदें लागें ती। 9 तौखें युतुरखुस नाँ रा एक नोऊज़वान खिडकी पेंधें बेठा ती होर तेइबै नीज लागी ती। जैबै पौलुस राती देरी तक गला केरदा रौहै ता स नोऊज़ुआन त्रीजी अटारी ना शौदू होर स मूआदा च़ेकू। 10 पर पौलुस उतरिया तेई सेंधें लिपटू होर गौआ सेंधें लाइया बोलू, डरिदें मता, किबैकि एइरें हाजी प्राण सी, 11 होर उझें जाइया रोटी चोड़ी होर खाइया एतरी देर तिन्हा सेंधें गला केरदा रौहै कि दोत हुई तैबै स नौठा। 12 तिन्है सौ शोहरु ज़िन्दा आणू होर बडी शान्ति हुई।

13 आसैं पैहिले जहाजा ना चढ़िया अस्सुसा बै ई विचार केरिया नौठें कि तौकना आसैं पौलुसा बै बी चढ़ालें किबैकि स पैदल जाणू आला ती। 14 जैबै सौ अस्सुसा ना आसा बै मिलू ता आसैं तेइबै चढ़िया मितुलेनै बै आऐ। 15 होर तौखना जहाज खोलिया दुजें रोज़े खियुस नाँ री जैगा सामनै पुजें होर आगलें रोज़े सामुसा ना लगान केरु। तैबै दूजें रोज़े मिलैतुसा बै आऐ। 16 किबैकि पौलुस इफिसुस होइया जाणें री ठानी ती, ऐण्डा नी लोडी हुआ

कि तेइबै आसिया ना देर लागली ताकि स छेकें जाइया पिन्तेकुसै रा ध्याइें यरुशलेमा ना काटला,

17 होर तेइयें मिलतुसा ना इफिसुसा बा संदेश भेजिया कलीसियें रै अगुवें शाधें। 18 जैबै ते तेई हागें आऐ ता तिन्हा बै बोलू, तुसैं जाणा सी कि पैहिले रोज़ा ना लेइया जैबै हाँऊ आसिया ना पुजू ता हाँऊ तुसा सेंधें कौस रीतियें रौहै, 19 यानिकी हाँऊ बडी दीनता सेंधें औछू शेटिया तिन्हा सारी परीक्षा ना जे यहूदी रै कारण मूँ पेंधें आई हाँऊ प्रभु री सेवा केरदा रौहै। 20 होर जे-जे गला तुसरें फायदें री ती तिन्हा बै दैसणें री होर घोर-घोर जाइया सिखाणें ना नी झिझकू। 21 बल्कि यहूदी होर यूनानी सामनै गुआही देंदा रौहै कि परमेश्वरा धिरा बै मन फेरिया आसरे प्रभु यीशु पेंधें विश्वास केरा, 22 होर ऐबै हेरा, हाँऊ आत्मा ना बोनुआदा यरुशलेमा बै ज़ा सा होर नी जाणदा कि तौखें मूँ पेंधें की- की बीतणा। 23 किबैकि पवित्र आत्मा हर नगरा ना गवाही देई देइया मूँभै बोला सा कि बन्धन होर क्लेश तेरी तैइयें तयार सी। 24 पर हाँऊ आपणें प्राणा बै प्रिय नी समझदा बल्कि ऐ समझा सा कि हाँऊ आपणी दौड होर सेविकाई बै पूरी केरनू जे मँ परमेश्वरें रै अनुग्रह ना सुसमाचारें री गवाही देणें री तैइयें प्रभु यीशु ना पाई सा, 25 होर हेरा, हाँऊ जाणा सा कि तुसैं सेंधें जुणिबै मँ परमेश्वरें रै राज्य रा प्रचार केरु मेरा मुँह दबारा नी हेरना। 26 ऐबै हाँऊ औज़कें रोज़े तुसाबै गवाही देइया बोला सा कि हाँऊ सैभी रै लोहू ना निर्दोष सा, 27 किबैकि हाँऊ परमेश्वरें री सारी मनसा तुसाबै पूरी रीतियें दैसणें ना नी झिझकू। 28 ऐबै आपणी होर आपणें छुण्डा रा ध्यान रखा जौसरें पवित्र आत्मै तुसैं अध्यक्ष ठहराए सी कि 29 हाँऊ जाणा सा कि मेरें जाणें ना बाद खाणू आलें भेड़ियें तुसा बिचें एणें जुणि कि तुसरा छुण्ड नी छौडना। 30 तुसा बिचा ना बी ऐण्डे माहू उठणा होर चेलें बै आपू पिछें खिंचणें री तैइयें टेढ़ी- मेढी गला केरनी। 31 ऐबै जागदें रौहा होर याद केरा कि मँ रोई- रोइया त्रा बोर्षा तक तुसाबै हर एक गला ना चिताउणी देणा नी छौडू, 32 होर ऐबै हाँऊ तुसाबै परमेश्वरें रै अनुग्रह रै वचन सौपा सा जे तुसरी उन्नति केरी सका सा होर सैभी पवित्र लोका ना तुसाबै आपणी मीरास देई सका सा। 33 मँ कौसी रै चान्दी, सुनै या कपडें रा लालच नी केरु। 34 तुसैं आपू जाणा सी कि मँ आपणें हौथे आपणी जरूरता पूरी केरी। 35 मँ तुसाबै सबकिछ केरिया रिहाऊ कि एसा रीतियें मेहनत केरिया कमजोरा रा ध्यान रखा होर प्रभु यीशु री गला याद रखणा जरूरी सा किबैकि प्रभु यीशुए आपू बोलू सा, "लेणें ना देणा धन्य सा।" 36 ऐण्डे बोलिया तेइयें सैभी सेंधें घुटनै टेकिया प्रार्थना केरी। 37 तैबै ते सारें बोहु रूपें होर पौलुसा बै गौए लाइया तेइबै माँकी देंदें लागै। 38 ते खास केरिया एसा गला रा शोग केरा ती, जे तेइयें बोलू ती कि तुसा मेरा मुँह दबारा नी हेरना, होर तिन्है स जहाजा तक पजाऊ।

### पौलुसा रा यरुशेमा बै जाणा

21 जैबै आसैं तिन्हा ना अलग होइया जहाज खोलू ता सीधें कोस नाँ री जैगा बै आऐ होर दुजें रोज़े रूदुसा ना होर तौखना पतरा बै आऐ, 2 होर एक जहाज फीनीकें बै जाँदा मिलू होर तेई ना चढ़िया स खोलू। 3 जैबै क्रुपुस हेरुआ जे आसैं बाँऊई धिरें छौडू होर सूरिया बै चैलिया सूरा ना उतरें किबैकि तौखें जहाजा रा बोझा उतारना ती। 4 चेलें बै मिलिया आसैं तौखें सौत रोज़ा तक रौहै। तिन्है आत्मा ना होइया पौलुसा बै बोलू कि यरुशलेमा ना जोंघा हेरी रखदा। 5 जैबै ते रोज़ पूरें हुऐ ता आसैं तौखना चेलें होर तिन्है सैभी बेटडियें होर शोहरुए आसैं बाहरें तक छौडें होर आसैं किनारें पेंधें घुटनै टेकिया प्रार्थना केरी। 6 तैबै एकी होरी ना विदा होइया आसैं जहाजा ना चढ़ें होर आपणें-आपणें घौरा बै नौठें। 7 तैबै आसैं पाणी री यात्रा पूरी केरिया पतुलिमियस जैगा ना पुजें होर विश्वासी भाई बै नमस्कार केरिया तौखें एक रोज़ रौहै। 8 दूजें रोज़े आसैं तौखना चैलिया केंसरिया बै आऐ होर फिलिप्पुस नाँ रै माहू रै घौरा ना तेई सेंधें रौहै। स एक सुसमाचार प्रचारक ती। 9 तेइरी चार कुंवारी बेटी ती जे कि भविष्यवाणी केरा ती। 10 जैबै आसैं तौखें बोहु रोज़ा तक रौहै ता अगबुस नाँ रा एक भविष्यवक्ता यहूदिया ना आऊ। 11 तेइयें आसा हागें एजिया पौलुसा रा पटा लेऊ होर आपणें हौथ जोंघा बोनिया बोलू, पवित्र आत्मा ऐ बोला सा कि जुणी माहू रा ऐ पटा सा स यरुशलेमा ना यहूदी एसा रीतियें बोनणा होर होरी जाति रै हौथा ना देणा।

12 जैबे ए गला शुणी ता आसै होर तौखले लोकें पौलुसा हागै यरुशलेमा बै नी जाणै री तैइयै बिनती केरी। 13 13 पर पौलुसै जवाब धिना, कि तुसै की केरा सी कि तुसै रोइया मेरा मन चोड़ा सी। हाँऊ प्रभु यीशु रै नाँ ना यरुशलेमा ना बोनिणै री तैइयै नी बल्कि मौरनै बै बी त्यार सा। 14 जैबे तेइयै नी मैनी ता आसै चुप हुऐ कि प्रभु री इच्छा पूरी होली। 15 तिन्हा रोजा बाद आसै त्यार होइया यरुशलेमा बै चैलै। 16 कैसरियै रै बी केतरै चैलै आसा सेंघे चैलै होर मनासोन नाँ रा क्रुपुसा रा पराणा चेला बी सेंघे नेऊ कि आसै तेइरी हागै रुकलै।

### पौलुसा रा याकुबा सेंघे मिलाप

17 जैबे आसै यरुशलेम पुजै ता भाई आसा सेंघे बड़ी खुशी सेंघे मिलै। 18 दुजै रोजै पौलुसै आसै याकुबा आगै नेऐ जौखे सारै अगुवे कठा ती। 19 तैबे तेइयै तिन्हा बै नमस्कार केरिया जे-जे कोम परमेश्वरै तेइरी सेविकाई ना होरी जाति रै लोका बिचै केरै ती एक-एक केरिया दैसै। 20 तिन्है ऐ शुणिया परमेश्वरै री महिमा केरी होर तेइबे बोलू, हे भाई तू हेरा सा कि कई हज़ार यहूदियै विश्वास केरू होर सैभे व्यवस्थे री धुना ना सी। 21 होर तेरै बारै ना ऐ सिखाऊ सा कि तू होरी जाति ना रोहणू आलै यहूदी बै मूसै री विधि ना फिरनै बै सीखा सा होर बोला सा कि तुसै आपणै बच्चै रा खतना मता केरदैन रीति-रिवाजै रै मुताबिक मता चैलदै, ऐबे की केरना? 22 लोका ऐ जरूरी शुणना कि तू आऊ सा। 23 ऐबे जे आसै तौभे बोला सी तेई केर। आसरै औखे चार माहू सी जुणियै मन्नत मैनी सा। 24 तिन्हा लेइया आपू बै शुद्ध केर होर तिन्हरी तैइयै खर्चा दै कि ते सिर मुण्डालै। तैबे सैभी जाणना कि तेरै बारै ना जे गला तिन्हा बै सिखाई सी तिन्हरी कोई जड़ नी ओंथी पर तू आपू बी व्यवस्थे रै मुताबिक चैला सा। 25 पर तिन्हा होरी जाति रै विश्वासी लोका बै आसै ऐ लिखिया भेजू सा कि ते मूरती सामनै बलि केरैदें माँस होर लोहू ना, गला घोट्टेदें रै माँसा ना होर व्यभिचारा ना बचिया रौहलै। 26 तैबे पौलुस तिन्हा माहू लेइया दुजै रोजै शुद्ध होइया मन्दिरा बै नौठा होर दैसू कि शुद्ध होणै रै ध्याइँ यानिकी तिन्हा हर एकी री तैइयै चढ़ावा चढ़ाइणै तके रै रोज कदी पूरै होणै।

### मन्दिरा न पौलुसा बै ढौकणा

27 जैबे ते सौत रोज पूरै होणू आलै ती ता आसियै रै यहूदियै पौलुसा बै मन्दिरा ना हेरिया सैभे लोका उकसाऐ होर चिलाइया सौ ढौकू। 28 होर बोलू, हे इस्राइलियो मजत केरा, ऐ सौहै माहू सा जो कि लोकें रै, व्यवस्थे रै होर एसा जैगै रै खिलाफ सैभी लोका बै सिखा सा औखे तक कि यूनानी बै बी मन्दिरा ना आणिया ऐ पवित्र जैगा अपवित्र केरी सा। 29 तिन्है ता एथा ना पैहिलै त्रुफिमस इफिसी बी एई सेंघे हेरू ती होर समझा ती कि पौलुसै ऐ मन्दिरा बै आणू सा। 30 तैबे सारै नगरा ना हला मचू होर लोका ठोर मारिया कठा हुऐ होर पौलुस ढौकिया मन्दिरा बाहरै घसीटू होर तुरन्त दुआर बन्द केरू। 31 जैबे ते पौलुसा बै मारना चाहा ती ता पलटनै रै सरदार बै संदेश मिलू कि यरुशलेमा ना बड़ा हला मचदा लाग़ा सा। 32 तैबे स तुरन्त सिपाही होर सूबेदारा बै सेंघे नेइया बूने बै दौड़ू होर तिन्है सरदार होर सिपाही हेरिया पौलुसा बै मारनै ना आपणै हौथ रोके। 33 तैबे पलटनै रै सरदारै भेटी एजिया पौलुस ढौकू होर दूई शाँगी सेंघे बोनणै रा हुकम देइया पुछदा लाग़ा, ऐ कुण सा होर एइयै की केरू सा? 34 पर भीड़ा ना कोई किछ होर कोई किछ चलादें रौहै पर जैबे हुलडै री वजहा ठीक तरहा सच्चाई नी जाणी सकू ता तेइबे किलै बै नेणै रा हुकम धिना। 35 जैबे सौ शीढी पेंधे पुजू ता ऐण्डा हुआ कि भीड़ा रा दवाब बोहू होणै री वजहा ना सपाही बै सौ चैकिया नेणा पौऊ। 36 किबैकि लोकें री भीड़ चिलादें-चिलादें तेई पिछै पौई कि एई रा अन्त केरा। 37 जैबे ते पौलुसा बै किलै बै नेणू आलै ती ता तेइयै पलटनै रै सरदार बै बोलू, कि मुँभे हुकम सा कि हाँऊ तौभे किछ बोलणू, तेइयै बोलू कि तू यूनानी जाणा सा, 38 कि तू सौ मिस्री नी, जुणियै कि आज्ञा ना पैहिलै चार हज़ार कटारबन्द लोका बन्दी बणाइया बोणा बै नेऐ? 39 पौलुसै बोलू, हाँऊ ता तरसुसा रा यहूदी माहू सा, किलिकियै रै प्रसिद्ध नगरा रा रोहणू आला सा होर हाँऊ त हागै बिनती केरा सा कि मुँभे लोका सेंघे गला केरनै दै। 40 जैबे तेइयै हुकम

धिना ता पौलुसै शीढी पेंधे खडै होइया लोका बै हौथा सेंघे इशारा केरू। जैबे ते चुप हुऐ ता सौ इब्रानी भाषा ना बोलदा लाग़ा कि,

### भीड़ा रै सामणै पौलुसा रा भाषण

22 हे पिता, होर भाइयो मेरा जवाब शुणा, जे हाँऊ ऐबे तुसा सामनै बोला सा। 2 ऐ शुणिया कि ऐ ता इब्रानी भाषा बोला सा, ते होर बी चुप रौहै। तैबे पौलुसै बोलू; 3 हाँऊ ता यहूदी माहू सा, मेरा जन्म किलिकियै री तरसुस जैगा ना हुआ पर एई नगरा ना गमलीएलै री जोंघा आगै बेशिया हाँऊ पढ़ाऊ होर दादू-बा री व्यवस्थे री ठीक रीति पेंधे सिखाऊ होर परमेश्वरै री तैइयै ऐण्डी धुन लाइया ती जैण्डी तुसै सैभियै औज लाई सा। 4 मँ एई पेंधे रै मर्द होर बेटडी बोनी-बोनिया, बन्दी घौरा ना पाऐ होर सताऐ होर कई ता जानियै बी मकारे। 5 एसा गलै री तैइयै महापुजारी होर पराणियै गवाह सी। तिन्हा ना विश्वासी भाई री चिठी लेइया हाँऊ दमिशका बै जाँदा लाग़ा ती, कि जे तौखे होलै तिन्हा बै बी सजा देणै री तैइयै हाँऊ बोनिया यरुशलेमा बै आणनू।

### आपणै मन बदलणै रै बारे न

6 जैबे हाँऊ चैलदै-चैलदै दमिशकै रै नेड़ पुजू, ता ऐण्डा हुआ कि ध्याडी दपौहरै एकदम आसमाना ना एक बड़ा प्याशा मेरै चोहू पासै चमकू। 7 होर हाँऊ धौरती पेंधे लोमा पौऊ : होर ऐ शब्द शुणू, हे शाऊल, हे शाऊल, तू मुँभे किबै सता सा? मँ जवाब धिना, कि हे प्रभु तू कुण सा? 8 तेइयै मुँभे बोलू, हाँऊ यीशु नासरी सा जुणि बै तू सता सा। 9 होर मेरै सेंघियै सौ प्याशा हेरू, पर जे मँ सेंघे दूणिया लाग़ा ती तेइरा शब्द नी शुणू। 10 तैबे मँ बोलू, हे प्रभु हाँऊ की केरनू? प्रभुऐ मुँभे बोलू, उठिया दमिशका बै जा, होर जेकिछ तेरै केरने री तैइयै ठहराऊ सा सौ तौभे तौखे दैसिणा। 11 जैबे तेई प्याशे री वजहा ना मँ ना किछ नी हेरूआ ता हाँऊ आपणै सेंघी रा हौथ ढौकिया दमिशका बै आऊ। 12 होर हनन्याह नाँ रा एक व्यवस्थे रै मुताबिक एक भक्त जौसरा तौखे रोहणू आलै मुँझै खरा नाँ ती सौ मँ हागै आऊ। 13 होर खडै होइया मुँभे बोलू, हे भाई शाऊल दबारा हेरदा लाग़ा, तेसा घडियै मेरी औछी खुली होर मँ सौ हेरू। 14 तैबे तेइयै बोलू, आसरै दादू-बा रै परमेश्वरै तू एथे री तक ठहराऊ सा कि तू तेइरी इच्छा बै जाणला होर धर्मि बै हेरला होर तिन्हरी शुणला। 15 किबै तू परमेश्वरा धिरे ना सैभी लोका सामनै तिन्हा गला रा गवाह होणा जे तें हेरी सी होर शुणी सी 16 ऐबे किबै देर केरा सा? उठ बपतिस्मा ले, होर तेइरा नाँ लेइया आपणै पापा बै धो।

### होरी जाति मौँझे प्रचारा री कोशिश

17 जैबे हाँऊ यरुशलेमा ना एजिया प्रार्थना केरदा लाग़ा ती, ता हाँऊ बेहोश हुआ। 18 होर तेइयै हेरू कि मुँभे बोला सा, फट केरिया यरुशलेमा निकल किबैकि तिन्हा मेरै बारै ना तेरी गवाही नी मैनणी। 19 मँ बोलू, हे प्रभु तू ता आपू जाणा सा कि हाँऊ तौ पेंधे विश्वास केरनू आलै लोका बै बन्दी घौरा ना पा सा होर जैगा-जैगा अराधना घौरा ना मारनै द्या ती। 20 होर जैबे तेरै गवाह स्तिफनुसा रा लोहू लाऊ ती बहाणा हाँऊ बी तौखे खड़ा ती होर एसा गला ना सहमत ती, होर तेइबे मारनू आलै रै झिकडै री रखवाली केरा ती। 21 तेइयै मुँभे बोलू, फेटै जा, किबैकि मँ तू होरी जाति रै बिचा ना दूरा-दूरा तक भेजणा। 22 ते एसा गला तक तेइरी शुणदै रौहै। तैबे ज़ोरा सेंघे चिलादें लाग़े, कि ऐण्डे माहू रा अन्त केरा तेइरा ज़िन्दा रौहणा ठीक नी ओंथी। 23 जैबे ते चिलादें रौहै, झिकडै शेटदै रौहै होर आसमाना ना धूडा उडा ती; 24 ता पलटनै रै सूबेदारै बोलू, कि एइबे किलै बै नेआ होर कोडै मारिया जाँवा, ताकि हाँऊ जाणनू कि लोका कौस वजहा ना तेइरै खिलाफ ऐण्डा चिलादें लाग़े सी। 25 जैबे तिन्है स रौशिये बोनू ता पौलुसै सूबेदारा बै बोलू जो सेंघे खड़ा ती, कि ऐ सही सा कि तुसै एक रोमी माहणू बै दोषी ठहराऐ बगैर कोडै मारलै? 26 सूबेदारै ऐ शुणिया पलटनै रै सरदार आगै जाइया बोलू, तू ऐ कि केरा सा? ऐ ता रोमी सा। 27 तैबे पलटनै रै सरदारै तेई आगै एजिया बोलू, मुँभे दैस कि तू रोमी सा? तेइयै बोलू, हाँ। 28 ऐ शुणिया पलटनै रै सरदारै बोलू, कि मँ रोमी होणै रा हक बोहू डैबुऐ देइया पाऊ सा पर पौलुसै बोलू,

हाँऊ ता पैदा होणें ना रोमी सा। 29 तैबे जे लोका तेइबे जाँचणू आलें ती, ते तुरन्त तेई आगें ना हट्टे होर पलटना रा सरदार बी ऐ जाणिया कि ऐ रोमी सा होर मैं ऐ बोनु सा डौरु।

### बड़ी सभा रें सामणें पौलुस

30 दुजे रोजे ठीक-ठीक जाणनै री इच्छा ना कि यहूदी तेई पेंधे किबे दोष ला सी तेइरें बन्धन खोलें होर महापुजारी होर सारी सभा बै कठा होणें रा हुकम धिना, होर पौलुस बुनै धिरें नेइया तिन्हा सामनै खडा केरु।

23 पौलुस महासभा धिरें लगातार हेरिया बोलू, हे भाइयो मैं औजा तक परमेश्वरें री तैइयें बिलकुल सेंघें मैने जिन्दगी बिताई। 2 हनन्याह महापुजारियें जे तेई सेंघें खडें ती, तेइरें मुँहा पेंधें थपड मारनै रा हुकम धिना। 3 तैबे पौलुस तेइबे बोलू, हे चूनं लेसुईदी भिती, परमेश्वरा तू मारना। तू व्यवस्थें रें मुताबिक मेरा न्याय केरनै री तैइयें बेठा सा तैबे किबे व्यवस्थें रें खिलाफ मुँभे मारनै रा हुकम केरा सा? 4 जे सेंघें खडें ती तिन्हें बोलू, कि तू परमेश्वरें रें महापुजारी बै बुरा बोला सा? 5 पौलुस बोलू, हे भाइयो हाँऊ नी जाणदा कि ऐ महापुजारी सा किबैकि शास्त्रा ना लिखू सा, कि आपणें लोके रें प्रधाना बै बुरा मत बोलदा। 6 तैबे पौलुस ऐ जाणिया कि केतरे सदूकी होर केतरे फरीसी सी, सभा ना जोरा सेंघें बोलू, हे भाइयो, हाँऊ फरीसी होर फरीसी रें वंशा रा सा। मुँऐदें री आशा होर पुनरुत्थाने रें बारें ना मेरा मुकदमा होदा लाग़ा सा। 7 जैबे तेइयें ऐ गल बोली ता फरीसी होर सदूकी ना झगडा होदा लाग़ा हो सभा ना फूट पौई। 8 किबैकि सदूकी ऐण्डा बोला सी कि न ता पनरुत्थान आँथी न स्वर्गदूत न आत्मा आँथी पर फरीसी दुही बै मैना सी। 9 तैबे बडा उलड मचू ओर जेतरे शास्त्री फरीसी दलें रें ती ते ऐण्डा बोलिया झगडदें लाग़े कि आसै ऐ माहू नाआ कोई बुराई नी हेरदें अगर कोई स्वर्गदूत या आत्मा ऐ ना बोला सा ता तैबे की हुआ। 10 जैबे बोहू झगडा हुआ ता पलटनै रें सरदारें डौरें लाइया कि इन्हें पौलुस रें टुकडें-टुकडें नी लोडी केरें पलटना बै हुकम धिना, कि उतरिया तेइबे तिन्हें बिचा ना जबरदस्ती खोला होर किलें बै नेआ। 11 तेसा राती प्रभुऐ पौलुसा हागें एजिया बोलू, हे पौलुस हिमत रख, किबैकि जैण्डी तें यरुशलमा ना मेरें बारें ना गवाही धिनी तैण्डी त रोम देशा ना बी मेरें बारें ना गवाही देणी पौई।

### पौलुसा बै मारने री योजना

12 जैबे ध्याड हुई ता यहूदियें एकता केरी ओर कसम खाई कि जैबे तक आसै पौलुसा बै मारलें नी आसा किछ बी नी खाणा-पीणा। 13 जुणियें आपू ना ऐ कसम खाई ती ते चाही ना जादा माहू ती। 14 तिन्हें महापुजारी होर पराणियें आगें एजिया बोलू, आसै ऐ ठानी सा कि जैबे तक आसै पौलुसा बै मारलें नी, अगर तैबे तक आसै किछ बी चखू ता लानतू सा आसा पेंधे। 15 ऐबे महासभा समेत पलटनै रें सरदारा बै बी समझात कि ते पौलुसा बै तुसा हागें ऐण्डे सोचिया आणलें कि तुसै तेइरी ठीक जाँच केरना चाहा सी होर आसै तेइरें पुजणें ना पैहिलें तेइबे मारनै री तैइयें तयार रोहणा। 16 जैबे पौलुस रें भाणजे ऐ शुणू कि ते पौलुसा बै मारनू आलें सी ता तेइयें किलें ना जाइया पौलुसा बै खबर धिनी। 17 पौलुसै एक सुबेदार आपू हागें शाधिया तेई बै बोलू, ऐ ज़ुआना बै पलटनै रें सरदारा हागें नेआ किबैकि ऐ तेइबे किछ बोलणा चाहा सा। 18 तैबे तेई सुबेदारें स पलटनै रें सरदारा हागें नेइया बोलू, पौलुस बन्धुऐ मुँभे शाधिया बिनती केरी कि ऐ ज़ुआन सरदारा बै किछ बोलणा चाहा सा एइबे तेई हागें नेआ। 19 पलटनै रें सरदारें स हौथा ना ढौकिया अलग नेऊ ओर तेई ना पुछू, तू मुँभे की बोलणा चाहा सा? 20 तेइयें बोलू, यहूदियें एकता केरी सा कि त हागें बिनती केरनू कि तू काल पौलुसा बै महासभा बै आणला कि तू तेइरी ठीक जाँच केरना चाहा सा। 21 पर तिन्हरी हेरी मैनादा किबैकि तिन्हा ना चाही ना जादा माहू तेइबे मारनै री तैइयें तयार सी जुणियें ऐ ठानी सा कि जैबे तक आसै पौलुसा बै मारलें नी आसा किछ नी खाणा-पीणा होर ते सारें तयार होइया तेरें वचनै री आश लाइया बेठे सी। 22 तैबे पलटनै रें सरदारें स ज़ुआन ऐ हुकम देइया विदा केरु कि कौसी बै हेरी दैसदा कि तें ए गला मुँभे दैसी सी,

### पौलुसा बै फेलिक्सा हागे भेजणा

23 होर दूई सुबेदार शाधिया तिन्हा बै बोलू, दूई शौऊ सिपाही, सतर सवार होर दूई शौऊ भालें चलाणू आलें रातके पोहरे कैसरिया जाणें री तैइयें तयार रखा, 24 होर पौलुसै री सवारी री तैइयें घोडें तयार रखा कि तेइबे फेलिक्स हाकिमा हागें सही-सलामत पजालें। 25 तेइयें ऐण्डी एक चिठी बी लिखी: 26 महाप्रतापी फेलिक्स हाकिमा बै क्लौडियुस लूसियासा रा नमस्कार; 27 यहूदियें ऐ माहू ढौकिया मारना चाहू, पर जैबे ऐ जाणू कि ऐ रोमी सा ता पलटन लेइया छुडाइया आणू। 28 होर हाँऊ जाणना चाहा ती कि ते ऐई पेंधे कौस वजहा ना दोष ला सी तैबे मैं स तिन्हरी महासभा बै नेऊ, 29 होर मैं जाणू कि तें आपणी व्यवस्थें रें बारें ना ऐई पेंधे दोष ला सी पर मारनै होर बोणें लायक तेई ना कोई दोष नी आँथी। 30 होर जैबे मुँभे एसा गला रा पैता च़लू कि ते ऐई माहू बै मारना चाहा सी ता मैं स त हागें भेजू होर मुदई बै बी हुकम धिना कि ते त सामनै तेइरें मुकदमै री पैरवी केरलें। 31 जैण्डा सिपाही बै हुकम मिलू ती तिन्हें पौलुस रातों-रात अन्तिपत्रिसा बै आणू। 32 दुजे रोजे ते सवारा बै पौलुसा सेंघें जाणें री तैइयें छौडिया आपू किलें बै वापस आए। 33 तिन्हें कैसरिया पुजिया हाकिमा बै स चिठी धिनी हर पौलुस बी तेई सामनै खडा केरु। 34 तेइयें चिठी पौडिया पुछू कि ऐ कुणी देशा रा सा? 35 होर सब जाणू कि ऐ किलकिया रा सा ता तेइबे बोलू, जैबे तेरे मुदई बी एलें ता मुँ तेरा मुकदमा केरना होर तेइयें तेइबे हेरोदेसै रें किलें ना रखिया पौहरा केरनै रा हुकम धिना।

### हक्म फेलिक्सा रें सामणें पौलुस

24 पोज़ रोज़ा बाद हनन्याह महापुजारी कई पराणियें होर तिरतुल्लुस नाँ रें वकीला बै सेंघें आणू होर तिन्हें पौलुसै रें मुकदमै री पैरवी केरी। 2 जैबे पौलुस शाधू ता तिरतुल्लुस तेई पेंधे दोष लाइया बोलदा लाग़ा कि, हे महाप्रतापी फेलिक्स त ना आसा बै बड़ी शान्ति मिला सा होर तेरें द्वारा एसा जाति री तैइयें केतरी बुराई सुधारिया सी। 3 एसा गैला बै आसै हर जैगा ना धन्यवादा सेंघें मैना सी। 4 पर ऐबे तौभे ओर दुःख नी देणा चाँहदा, हाँऊ त हागें बिनती केरा सा कि कृपा केरिया आसरी एक-दूई गैला शुण, 5 किबैकि आसै ए माहू हुलड मचाणू आलें रा होर सारें यहूदिया ना बलवा करणू आला होर नासरी रें कुपन्था रा मुखिया पाऊ सा। 6 तेइयें मन्दिर अशुद्ध केरना चाहू ओर आसै सौ ढौकू। 7 पर पलटनै रें सरदार लूसियासै सौ जबरदस्ती आसरे हौथा ना छुडाऊ, 8 होर मुदई बै तेरें सामनै एणें रा हुकम धिना। इन्हा सैभी गैलें रें बारें ना जे आसै तेई पेंधे दोष ला सी त जाँच केरिया आपू जाणनी। 9 यहूदियें बी तेई वकीला रा सँघ देइया बोलू कि ए गैला ठीक सी।

### पौलुसा रा उतर

10 जैबे हाकिमै पौलुसा बै बोलणें रा इशारा केरु ता तेइयें जवाब धिना, हाँऊ ऐ जाणिया कि तू बोहू बौर्षा ना एसा जाति री तैइयें न्याय केरा सा ता हाँऊ खुशी सेंघें आपणा जवाब देआ सा। 11 तू आपू जाणा सा कि जैबे हाँऊ यरुशलमा बै भजन केरदा आऊ ता मुँभे बारा रोज़ा ना जादा नी हुऐ, 12 होर तिन्हें हाँऊ न मन्दिरा ना, न सभाघौरा ना, न नगरा ना कौसी सेंघें वहस केरदा होर भीड लाँदा हेरु। 13 होर न ते तिन्हा गैला बै, जुणि रा ते ऐबे मुँ पेंधे दोष ला सी, तेरें सामनै सच ठहराई सकदें। 14 पर ऐ हाँऊ त सामनै मैना सा कि, ज़ौस पन्था बै ते कुपन्थ बोला सी तेथे री रीति पेंधे हाँऊ आपणें दादु-बा रें परमेश्वरें री सेवा केरा सा होर जे गैला व्यवस्था होर भविष्यवक्तें री कताबा ना लिखी सी तिन्हरी हाँऊ प्रतीति केरा सा, 15 होर परमेश्वरा ना आशा रखा सा ज़ो कि ते आपू बी रखा सी कि धर्मो होर अधर्मो रा पनरुत्थान होणा। 16 हाँऊ आपू बी जतन केरा सा कि परमेश्वरें री होर माहू री धिरें ना मेरा विवेक सदा निर्दोष रोहला। 17 बोहू बौर्षा बाद आपणें लोका बै दान पजौदा होर भेंट चढ़ाँदा आऊ सा। 18 तिन्हें हाँऊ मन्दरा ना शुद्ध दशा ना बगैर भीडें रें होर दंगा केरें बगैर ऐई कोमा ना हेरु, हाँ आसियें रें कई यहूदी ती तिन्हा बै सही ती, 19 कि अगर मेरें खिलाफ तिन्हरी कोई गल होंदी ता औखे त सामनै एजिया मुँ पेंधे दोष लाँदें, 20 या ए आपू बोललें कि, जैबे हाँऊ महासभै रें

सामने खड़ा ती ता तिन्हा बै मूँ ना कुण अपराध मिलू? 21 एसा एकी गैला छौड़िया जे मैं तिन्हा सामने खड़े होइया जोरा सँघे बोली ती कि, मूँएदें ना जिन्दै होणें रै बारें ना औज तुसा सामने मेरा मुकदमा होदा लगा सा। 22 फेलिक्स जो कि एई पन्थे री गैला बै ठीक-ठीक ज़ाणा ती, ते एण्डे बोलिया टालें कि जैबै पलटना रा सरदार लूसियास एला तैबै मूँ तुसरी गैला रा फैसला केरना, 23 होर सूबैदारा बै हुकम धिना कि पौलुसा बै सुरखा सँघे रखिया तेइरी रखवाली केरा होर तेइरै सँघी बै तेइरी सेवा केरने ना हेरीत् रोकदैं।

### फेलिक्स होर दृसिल्ला रै सामणै पौलुस

24 केतरै रोज़ा बाद फेलिक्स आपणी लाडी दृसिल्ला बै जे यहूदिनी ती सँघे लेइया आऊ होर पौलुसा बै शाधिया यीशु मसीह पँधे विश्वास केरने रै बारें ना शुणू, 25 होर जैबै सौ धर्म, समय होर एणू आलै न्याय री चर्चा केरा ती ता फेलिक्स डौरु होर जवाब धिना, एबै ता जा पर मौकै मिलिया मूँ तू भी शाधणा। 26 तेइबै पौलुसा ना किछ डैबुरे मिलने री बी आश ती होर सौ तेइबै बार-बार शाधिया गैला केरा ती। 27 पर जैबै दूई साला बीती ता पुरिकयुस फेस्तुस फेलिक्स री ज़ैगा ना आऊ होर फेलिक्ससै यहूदी बै खुश केरने री तैइयै बन्धुआ पौलुस छौड़।

### पौलुसा रा राजे री दोहाई देणी

25 फेस्तुस तेई राज्य ना पुजिया त्रा रोज़ा बाद कैसरिया ना यरुशलेमा बै नौटा। 2 तैबै महापुजारी होर यहूदी रै बड़े लोकें तेई सामने पौलुस री नालिश केरी, 3 होर तेई हागै पौलुस रै खिलाफ बिनती केरी कि स तेइबै यरुशलेमा बै शाधला किबैकि ते पौलुसा बै बौता मारने री तयारी ना ती। 4 फेस्तुस जवाब धिना कि, पौलुस कैसरिया ना पौहरै ना सा होर मूँ आपू तौखे झेके एणा। 5 फेस्तुस भी बोलू, तुसा मुँझे जुणी हागै हक सा तिन्है मूँ सँघे चौला होर अगर एई माहुरे कोई बुरा कोम केरु सा ता तेई पँधे दोष ला। 6 होर तिन्हा बिचै कोई औठ-दस रोज़ रोहिया स कैसरिया बै वापस नौटा होर दूजै रोज़े राजगद्दी पँधे बेशिया पौलुसा बै आणने रा हुकम धिना। 7 जैबै सौ आऊ ता यरुशलेमा ना आएदें यहूदिये खड़े होइया तेई पँधे बड़ै-भारी दोष लाए जुणि रा सबूत ते देई नी ती सकदैं। 8 पर पौलुस जवाब धिना कि, मैं न ता यहूदी री व्यवस्था रा, न मन्दिरा रा, न कैसरा रा कोई अपराध केरु। 9 तैबै फेस्तुस यहूदी बै खुश केरने री तैइयै पौलुसा बै जवाब धिना, कि तू यरुशलेमा बै ज़ाणा चाहा सा होर तौखे मूँ सामने तेरा ऐ मुकदमा केरिला? 10 पौलुस बोलू, हाँऊ कैसरै री राजगद्दी सामने खड़ा सा मेरै मुकदमै रा फैसला औखे होणा चाहिये। ज़ैण्डा कि तू ज़ाणा सा कि मैं यहूदी रा किछ अपराध नी केरु। 11 अगर अपराधी सा होर मारने लायक कोई कोम केरु सा ता हाँऊ मौरने ना नी मुकरदा पर जुणि गैला रा ए दोष मूँ पँधे ला सी अगर ते सच नी हुई ता कोई मुँभे तिन्हरे होथा ना नी देई सकदा हाँऊ कैसरै री कसम देआ सा। 12 तैबै फेस्तुस मन्त्री री सभा सँघे गैला केरिया जवाब धिना, तँ कैसरै री कसम धिनी सा, त कैसरा हागै ज़ाणा।

### राजा अग्रिप्पा रै सामणै पौलुस

13 होर किछ रोज़ा बाद अग्रिप्पा राजे होर बिरनीके कैसरिया एज़िया फेस्तुसा सँघे भेंट केरी। 14 होर तिन्हरे बोहू रोज़ रौहणे ना बाद फेस्तुस पौलुस री कैथा शुणाई, एक माहू सा जो फेलिक्ससै बन्दी बणाऊ सा। 15 जैबै हाँऊ यरुशलेमा ना ती ता महापुजारी होर यहूदी रै पराणिये ऐ चाहू कि तेइबै सज़ा मिलली। 16 पर मैं तिन्हा बै जवाब धिना, रोमी री ऐ रीत नी आँथी कि कौसी माहू बै सज़े री तैइयै सौंपलें, जैबै तक कि मुक्किला बै आपणे मुद्दई सामने खड़े होइया जवाब देणे रा मौका नी मिलदा। 17 जैबै ते औखे कठा हुऐ ता किछ देर नी केरी बल्कि दूजै रोज़े मैं आपणी राजगद्दी पँधे बेशिया तेई माहू बै आणने रा हुकम धिना। 18 जैबै तेइरै मुद्दई खड़े हुऐ ता तिन्है ऐण्डी बुरी गैला रा दोष नी लाऊ ज़ैण्डा हाँऊ समझा ती। 19 पर आपणे मते रै होर यीशु नाँ रै कौसी माहू रै बारें ना जो कि मूँआ ती, पौलुस तेइबै जिन्दा दैसा ती, इन्हा गैलें रै बारें ना वहस केरा ती। 20 होर हाँऊ उलझना ना ती कि इन्हा गैला रा पैता हाँऊ कैण्डे लानू। तैबै मैं तेइना पुछू, कि त यरुशलेमा बै

ज़ाणा कि तौखे तेरा फैसला होला? 21 पर जैबै पौलुस कसम धिनी कि मेरे मुकदमै रा फैसला महाराजें रै औखे हुआ लोडी, ता मैं हुकम धिना कि जैबै तक हाँऊ तेइबै कैसर नी भेजनु तेइबै पौहरा। 22 तैबै अग्रिप्पे फेस्तुसा बै बोलू, हाँऊ बी तेई माहू री शुणना चाहा सा। तेइयै बोलू त काल शुणना। 23 दूजै रोज़े जैबै अग्रिप्पा होर बिरनीके बडी धूमधामा सँघे पलटने रै सरदार होर नगरें रै बड़ै लोका सँघे दरबारा ना पुजे ता फेस्तुस पौलुसा बै आणने रा हुकम धिना। 24 फेस्तुस बोलू, हे महाराज अग्रिप्पा, हे आसा सँघलें सैभी माहूओ, तुसै एई माहू बै हेरा सी जौसरें बारें ना सारें यहूदिये यरुशलेमा ना होर एबै औखे बी चिलाई-चिलाइया बिनती केरी कि एइरा जिन्दा रौहणा ठीक नी आँथी। 25 पर मैं ज़ाणू कि एइयै मारने लायक ऐण्डा किछ नी केरु होर जैबै एइयै महाराजें री कसम धिनी ता मैं एई भेजणे रा उपाय कौदू। 26 र मैं एइरै बारें ना कोई ठीक गल नी पाई कि हाँऊ आपणे स्वामी बै लिखनु। एबै मैं ऐ तुसा सामने खासकेरिया महाराजा अग्रिप्पा सामने आणू कि जाँचणें ना बाद मुँभे किछ लिखणें बै मिलला। 27 किबैकि बन्धुऐ बै भेजणा होर जे दोष तेई पँधे लाए सी तिन्हा बै नी दैसणा, मेरी समझा ना स व्यर्थ सा।

### अग्रिप्पा रै सामणै पौलुसा रा सेभ किच्छ बोलणा

26 अग्रिप्पे पौलुसा बै बोलू, तौभे आपणे बारें न बोलणे री इज़ाज़त सा। तैबै पौलुस होथ बढ़ाइया जवाब देदा लागा कि, 2 हे राजा अग्रिप्पा जेतरी गैला रा यहूदी मूँ पँधे दोष ला सी, औज तेरै सामने तिन्हरा जवाब देणे बै हाँऊ आपू बै धन्य समझा सा। 3 खास केरिया कि तू यहूदी रै सैभी व्यवहार होर बकवासा बै ज़ाणा सा, एबै हाँऊ बिनती केरा सा कि मेरी ध्याना सँघे शुणलें। 4 जै चाल-चलन मेरा शुरु ना लेइया आपणी जाति रै बिचाना होर यरुशलेमा ना ती ऐ सब यहूदी ज़ाणा सी। 5 ते अगर गवाही देणा चाहा सी ता शुरु ना लेइया मुँभे पछियाणा सी कि, हाँऊ फरीसी होइया आपणे धर्म रै सैभी ना खरै पन्थे रै मुताबिक चैलू। 6 होर एबै तेई वायदे रै पूरै होणे री आशे री वजहा ना जे परमेश्वर आसरे दादू-बा सँघे केरु ती तेथे री वजहा ना ऐ मुकदमा मूँ पँधे चैलू सा। 7 तेई वायदे रै पूरै होणे री आशा लाइया आसरे बारा गोत्र आपणे सारें मने रात-ध्याड़ परमेश्वर री सेवा केरदें आए। एसा आशे रै बारें ना यहूदी मूँ पँधे दोष ला सी। 8 जैबै कि परमेश्वर मूँएदें बै जिन्दा केरा सा ता तुसरै औखे एसा गैला बै भरोसे लायक किबै नी समझदैं। 9 मैं बी समझू ती कि यीशु नासरी रै खिलाफ मुँभे बोहू किछ केरना चाहिए। 10 होर मैं यरुशलेमा ऐण्डा केरु, होर महापुजारी ना अधिकार पाइया बोहू सारें पवित्र लोका बै बन्दी घोरा ना पाइया ती होर मारिया ती, होर हाँऊ बी तिन्हरे खिलाफ आपणी सहमति देआ ती। 11 होर हर अराधना घोरा ना तिन्हा बै ताड़ना दिलाई-दिलाइया यीशु री निन्दा करा ती होर झिके लाइया एतरा पागल हुआ कि नगरा बाहरें ज़ाइया बी तिन्हा बै सता ती।

### आपणे मन बदलने रै बारे न

12 एसा धुना ना जैबै हाँऊ महापुजारी ना अधिकार पाइया दमिका बै ज़ाँदा लागा ती, 13 ता हे राजा, बौता ना ध्याडी दपौहरें मैं आसमाना ना सूरजा ना बी तेज प्याशा आपणे होर आपू सँघे चलणू आलें रै चोहू पासें चमकदा हेरु। 14 होर जैबै आसै सैभे धोरती लोमै पौऐ ता मैंइब्रानी भाषा ना ऐण्डा बोलदें ऐ शब्द शुणू, हेशाऊल, हे शाऊल तू मुँभे किबै सता सा? तिछे पँधे लौतै बाहणा तेरी तैइयै मुश्किल सा। 15 मैं बोलू, हे प्रभु तू कुण सा? प्रभुऐ बोलू, हाँऊ यीशु सा जुणि बै तू तंग केरा सा, 16 पर तू उठ, आपणी जोंघा पँधे खड़ा हो, किबैकि मैं तौभे एथे री तक दर्शन धिना सा कि तौभे तिन्हा गैला रा बी सेवक होर गवाह ठहरानू जे तँ हेरी सी होर तिन्हरा बी जुणि री तैइयै मूँ तौभे दर्शन देणा। 17 होर मूँ तौभे तेरे लोका ना होर होरी जाति रै लोका ना बचाँदें रौहणा जुणि हागै एबै मूँ तू भेजणा। 18 कि तू तिन्हरी औछी खोलला कि ते निहारें ना प्याशे धिरे बै होर शैतानें रै अधिकारा ना परमेश्वरा धिरा बै फिरलें ताकि तिन्हा बै पापे री माफी मिलली होर जे लोका मूँ पँधे वशाह केरिया पवित्र केरुऐ सी तिन्हा सँघे मीरास पालें।

### आपणें कौमा रै बारे न

19 ऐबे हे राजा अग्रिप्पा में तेई स्वर्गीय दर्शन री गैल नी छोड़ी। 20 पर पैहिले दमिश्कै रै, तेथा ना बाद यरुशलैमा ना रोहणू आलै होर तैबे सारै यहुदिये रै सारै देशा ना होर होरी जाति रै लोका बै समझाँदा रौहू कि पापा ना मन फेरा होर परमेशवरा धिरा बै फिरनै लायक कोई भलै कोम केरा। 21 इन्हा गैलै री वजहा ना यहूदी मुँभे मन्दिरा ना ढौकिया मारनै री कोशिश केरा ती। 22 परमेश्वरै री मजती सँधे हाँऊ औजा तक बणी रौहू होर होछे बडै सैभी सामनै गवाही देआ सा होर तिन्हा गैला बै बोला सा जे भविष्यवक्तै होर मूसै बोली सी कि ए पूरी होणू आली सी, 23 कि मसीहा बै दुःख चेकणा पौऊ होर तेही सैभी ना पैहिले मूँदे ना जिनँदे होइया आसरै लोका ना होर होरी जाति रै लोका ना परमेश्वरै रै राज्य रा प्रचार केरना। 24 जैबै पौलुस एसा रीतिरे जवाब देदा लागी ती, ता फेस्तुसै ज़ोरा सँधे बोलू, हे पौलुस तू पागल सा, बोहू जानै तू पागल केरु सा। 25 पर पौलुसै बोलू, हे महाप्रतापी फेस्तुस, हाँऊ पागल नी आँधी पर सच्चाई होर बुद्धि री गैला बोला सा। 26 राजा भीजुणी सामनै हाँऊ बेधड़क बोलदा लागी सा इन्हा गैला बै जाणा सा होर मुँभे याद सा कि इन्हा गेला न कोई बी गल तेई ना छुपी दी नी आँधी किबैकि ए घटना कुणै ना नी हुई। 27 हे राजा अग्रिप्पा, कि तू भविष्यवक्ता बै याद केरा सा? हाँ हाँऊ जाणा सा कि तू याद केरा सा। 28 अग्रिप्पे पौलुसा बै बोलू, तू थोड़ै जेही समझाइया मुँभे मसीही बणाणा चाहा सा? 29 पौलुसै बोलू, परमेश्वरा आगै मेरी प्रार्थना सा, की थोड़ै, की बोहू सिर्फ तू नी बल्कि जेतरे लोका औज मेरी शुणा सी ते इन्हा बन्धन छोड़िया मूँ साही होलै। 30 तैबै राजा, हाकिम होर बिरनीकै होर तिन्हा सँधे बेशणू आलै उठिया खडै हुऐ, 31 होर अलग ज़ाइया बोलदें लागै, ए माहू ता मोऊती होर बन्धना लायक ऐण्डा किछ नी केरदा। 32 अग्रिप्पे फेस्तुसा बै बोलू, अगर ई माहूए कैसरै री कसम नी ती धिनी ता छुटी सका ती।

### पौलुसा री रोम यात्रा क्रेते तक

17 जैबै तिन्है ए ठहराऊ कि आसा जहाजा पँधे इतालिया बै जाणा, ता तिन्है पौलुस होर केतरै बन्धक बी यूलियुस नाँ रै ओगुस्तुसै री पलटनै रै एकी सूबेदारै रै हाँथा ना सौंपू, 2 होर अद्रमुत्तियुमै रै जहाजा ना जे कि आसियै रै किनारै री ज़ैगा ना जाणू आला ती आसै चढ़िया स खोलू होर अरिस्तर्खुस नाँ रा थिस्सलुनीकै रा एक मकिदूनी आसा सँधे ती। 3 दुजै रोजे आसै सैदा ना रूकै होर यूलियुसै पौलुसा पँधे कृपा केरिया स तेइरै सँधे री हाँगे जाणै धिना कि ते तेइरा आदर केरलै। 4 तौखना आसै उल्टी बागर होणै री वजहा ना कुप्रुसै रै होइया चलै, 5 होर किलिकिया होर पँफूलियै रै नेड समुदर होइया लूसियै री मूरा ज़ैगा ना उतरै। 6 तौखे सूबेदारा बै सिकन्दरिया रा एक जहाज इतालिया बै जाँदा मिलू होर तेइयै आसै तेथा ना चढ़ाए, 7 होरजैबै आसै बोहू रोजा बाद बडी मुश्किला ना कनिदुसा सामनै पुजै। बागर आसा बै आगै नी ती बडनै देदी तैबै आसै सलमोन ज़ैगै रै सामनै ना होइया क्रेतै रै ओल्है ना चलै, 8 होर तेइरै किनारै-किनारै मुश्किला सँधे चलिया शुभ लँगरबारी नाँ री ज़ैगा ना पुजै ज़ौकना लसिया नगर नेड ती। 9 जैबै बोहू रोज बीतै होर पाणी री यात्रा ना मुश्किल एसा वजहा ना होआ ती किबैकि ब्रतै रै ध्याडै खत्म हुऐ ती। पौलुसै ते ए बोलिया समझाए, 10 कि हे सज्जानो मुँभे ऐण्डा महसूस होआ सा कि एसा यात्रै री मुसीबता ना मालै री केलही नी बल्कि जहाजा समेत आसरै प्राणा रा बी नुकसान होणु आला सा। 11 पर सूबेदारै पौलुसै री गैला ना जादा जहाज चलानू आलै माँझी री मैनी, 12 होर सौ बन्दर ज़ैगा सर्दी काटणै री तैइयै शोभला नी ती आँधी। तैबै तिन्है फीनिक्स पुजिया सर्दी काटणै रा विचार केरु। ए क्रेतै नाँ री ज़ैगा रा एक बन्दरगाह ती जो कि दक्षिण-पश्चिम होर उत्तर-पश्चिमा धिराबै खुला सा।

### समुद्र न तूफान

13 जैबै किछ-किछ दक्षिणी बागर होन्दी लागी ता तिन्है ऐन्डा सोचिया कि आसरा मतलब पुरा हुआ तौखना डेरा चेकू होर किनारै ढौकिया क्रेतै होइया जान्दें लागै। 14 पर थोड़ी देरा बाद तौखना एक बडी आँधी उठी जुणिवै

युरकुलीन बोला सी। 15 जैबै ए जहाजा ना लागी ता स जहाज तेसा सामनै नी ठहरी सकू होर आसै स बैहणै धिना होर चलदें रौहै। 16 तैबै कौदा नाँ रै टापू रै ओल्है ना बैहदें-बैहदें आसै बडी मुश्किला ना डोंगी बै आपणें वशा ना केरी सकै। 17 मल्लाह उठिया कई यपाय केरिया जहाज हेठै ना बोनू होर सुरितसै रै चोरबालू ना टेकणै री डौरै समान उतारिया बैहदें रौहै, 18 होर जैबै आसै आँधी ना बडै हिचकोलै होर धाकै खाए ता दुजै रोजे ते जहाजा रा समान शेटदें लागै, 19 होर त्रीजै ध्याडी तिन्है आपणें हाँथे जहाजा रा समान शेट, 20 होर जैबै बोहू रोजा तक सूरज नी हेरुआ न तारै हेरुए होर बडी आँधी चलदी रौही ता अन्ता न आसरै बचणै री सारी आशा जाँन्दी रौही। 21 जैबै तिन्है बोहू ब्रत केरै ता पौलुसै तिन्है बिचा ना खडै होइया बोलू, हे लोको, अगर तुसै मेरी गल मैनी ती होर क्रेतै ना जहाज नी ती खोलू ता न ता आसा पँधे ए मुसीबत एन्दी न आसरा नुकसान होँदा। 22 पर ऐबै हाँऊ तुसाबै समजा सा कि हाँसला रखा किबैकि तुसा ना कौसी रै प्राणा रा नुकसान नी होणा सिर्फ जहाजा रा नुकसान होणा, 23 किबैकि जौस परमेश्वरा रा हाँऊ सा होर जौसरी हाँऊ सेवा केरा सा, तेइरै स्वर्गदूतै औज राती मूँ हाँगे एजिया बोलू, 24 हे पौलुस मत डौरदा, तेरा कैसरा सामनै खडा होणा ज़रूरु सा, होर हेर, परमेश्वरै ते सँधे जे त सँधे यात्रा केरदें लागै सी तौभे धिनै सी। 25 ऐबै हे सज्जानो, हाँसला रखा। हाँऊ परमेश्वरै री प्रतीति केरा सा, जैण्डा परमेश्वरै मुँभे बोलू सा तैण्डा होणा। 26 पर आसा बै कौसी टापू पँधे ज़ाइया टेकणा पौऊ।

### जहाजा रा चुटणा

27 जैबै चौदवी राती ना आसै अद्रिया समुदरा ना फिरदें लागै ती ता आँधी रातियै जहाजा चलानू आलै ठोकरा सँधे जाणू कि आसै कौसी देश रै नेड पुजदें लागै सी। 28 होर पैतै लाइया तिन्है बीह फुट डूधा पाऊ होर थोडा आगै जाइया पैता लाऊ ता पन्द्रा फुट डूधा पाऊ। 29 तैबै पाथरा आली ज़ैगा ना पौडनै री डौरै तिन्है जहाजा पिछे चार लँगर पाए होर दोत होणै रा इतज़ार केरदें लागै। 30 पर जैबै मल्लाह जहाजा पँधना भेगणा चाहा ती होर गलही ना लँगर लागे रै बहानै डोंगी ना उतारी, 31 ता पौलुसै सुबेदार होर सिपाही बै बोलू, अगर ए जहाजा पँधे नी रौहलै ता तुसै बी नी बची सकदें, 32 तैबै सिपाहियै रौशी काटिया डोंगी शढ़ाई। 33 जैबै दोत होणू आली ती, ता पौलुसै लोका ऐण्डे बोलिया समझाए कि, औज चौदहा रोज हुऐ कि तुसै आश हेरदें-हेरदें भूखे रौहै होर किछ नी केरु। 34 ऐबै हाँऊ तुसाबै समझा सा कि किछ खाई लेआ कि तुसरा बचाव होला किबैकि तुसरी मुँडी रा एक शराल बी नी शौढना। 35 ऐण्डे बोलिया पौलुसै सैभी सामनै रोटी लेइया परमेश्वरा रा धन्यवाद केरु होर चोड़िया खाँदा लागी। 36 तैबै ते सारै बी हाँसलै रखिया रोटी खाँदें लागै। 37 आसै सँधे मिलिया जहाजा ना दुई शौऊ छियतर माहू ती। 38 जैबै ते रोटी खाइया रोजे ता गेहूँ बै समुदरा ना शेटिया जहाजा बै हल्का करदें लागै। 39 जैबै दोत हुई ता तिन्है स देश नी पछियाणू पर एक खाडी हेरी जे चकोणी ती होर तेथा पँधे जहाज टिकाणै रा विचार केरु। 40 तैबै तिन्है लँगर खोलिया समुदरा ना छोड़ै होर तेही बौगतै पतवारै रै बन्धन खोलै होर बागरी सामनै आगलै पाल चढ़ाइया किनारै धिरा बै चोलै। 41 पर दुई समुदरै रै सँगमै री ज़ैगा ना पौड़िया तिन्है जहाज टकाऊ होर गलही ता धाकै खाइया टेकी रौही पर पिछाडी पाणी रै छलाकै लाइया चुटदी लागी। 42 तैबै सिपाहियै विचार केरु कि आसा ए बन्धुए मारनै कि ए तारी देइया भैगै नी लोडी। 43 पर सूबेदारै पौलुसा बै बचाणै री इच्छा ना ते तिन्हा मारनै ना रोकै होर ए बोलू, जे तारी देई सका सी तिन्है छलाँग मारिया किनारै बै निकला। 44 होर बाकी पौटडे पँधे होर जहाजै री चिजै रै सहारै निकला। एसा रीतियै सँधे धौरती पँधे बचिया निकतै।

### माल्टा द्वीप न पौलुस

28 जैबै आसै बचिया निकतै ता जाणू कि ई टापू बै मिलिते बोला सी, 2 होर तिन्है जंगली लोकै आसा पँधे नोखी कृपा केरी किबैकि तिन्है गाश होणै री होर ठँड होणै री वजहा ना आसा बै आँग सुलगाइया धिनी। 3 जैबै पौलुसै लकडी रा गटा खोलिया आँग पँधे रखू ता आँग रै सेक

लागिया एक कीड़ा निकता होर पौलुसै रै हौथा ना लपेटुआ। 4 जैबे तिन्है जंगलियै तेइरै हौथा ना कीड़ा हेरु ता आपू ना ऐ बोलू कि पक्का ऐ माहू खूनी सा। समुदरा ना ता ऐ बचू पर एइरै कर्मै ऐ जिन्दा नी रौहणै धिना। 5 तैबे पौलुसै स कीड़ा झटकै देइया औगी बै शेट्ट होर तेइरा किछ नुकसान नी हुआ। 6 पर ते गैला केरा ती कि एई बै सोजिस एणी होर एकदम मौरना पर जैबे ते बोहू देरी तक हेरदै रौहै पर तेइरा किछ बी नी बिगडू ता होर विचार केरिया बोलू, ऐ ता कोई देऊ सा। 7 तेसा जैगै रै औरै-पौरै पुबलियुस नाँ रै माहू री जमीन ती जो कि तेई टापू रा प्रधान ती, तेइयै आसै आपणै घौरा बै नेऐ होर त्रा रोजा तक आसरी पाहुणचारी केरी। 8 पुबलियुसा रा बापू बीमार ती होर तेइबै लोहू-पाग लागा ती। पौलस तेई हागै नौठा होर हौथ रखिया प्रार्थना केरिया सौ ठीक केरु। 9 जैबै ऐणढा हुआ ता तेई टापू रै होरा बीमार माहू बी आए होर पौलसै ते ठीक केरै। 10 तिन्है आसरा बोहू आदर केरु। जैबै आसै चैलदै लागै ता तिन्है आसरी ज़रूरती री चिजा जहाजा ना रेखी।

### माल्टा द्वीपा न रोमा धीरै

11 त्रा म्हीनै बाद आसै सिकन्दरियै रै एकी जहाजा ना चैलै जो तेई टापू ना सर्दी काटवा लागा ती होर तेइरा निशाण दियुसकूरी ती। 12 सुरकूसा ना लँगर लाइया आसै त्रा रोजा तक रौहै। 13 तौखना आसै घूमिया रेगियुमा बै आए होर एक रोजा बाद दक्षिणी बागर चैली तैबे आसै दुजे रोजे पुतियुली बै आए। 14 तौखै आसा बै भाई मिलै होर तिन्हरै बोलणै सँघे आसै तिन्हरी हागै सौत रोजा तक रौहै होर एसा रीतियै रोमा बै चैलै। 15 तौखना भाई आसरा संदेश शुणिया अप्पियुसै रै चौका ना त्रा सराए तक आसा सँघे मिलदै आए। तिन्हा हेरिया पौलुसै परमेश्वरा रा धन्यवाद केरु होर हौंसला रखु। 16 जैबै आसै रोम पुजै ता पौलुसा बै तेइरै पौहरै केरनु आलै सिपाही सँघे केलहै रौहणै रा हुकम हुआ।

### रोमा न पौलुस

17 त्रा रोजा बाद पौलुसै यहूदी रै बडै लोका कठा केरै। जैबै ते कठा हुऐ ता पौलुसै तिन्हा बै बोलू, हे भाइयो, में आपणै लोका होर दादू-बा रै रीति-

व्यवहारै रै खिलाफ किछ बी नी केरु, तैबे बी बन्धुआ होइया यरुशलैमा ना रोमी रै हौथा ना देउआ। 18 तिन्है हाँऊ जाँच केरिया छौड़ना चाहू किबैकि मूँ ना मोऊती रै लायक कोई दोष नी ती आँथी। 19 पर जैबै यहूदी एथे रै खिलाफ बोलदै लागै ता मुँभे कैसरै री कसम देणी पौई न कि मूँ आपणै लोका पेंधे कोई दोष लाणा ती। 20 ऐबै में तुसै शाधै सी कि तुसाबै मिलनू होर गलबात केरनु किबैकि इस्त्राइलै री आशै री तैइयै हाँऊ शाँगीयै बोनूआ सा। 21 तिन्है तेइबे बोलू, आसै तेरै बारै ना यहूदी ना कोई चिठी नी मिली होर न कौसियै तेरै बारै ना एजिया बुरा बोलू। 22 पर तेरा विचार की सा, स आसै त ना शुणना चाहा सी किबैकि आसै ज़ाणा सी कि हर ज०एगा लोका एई मतै रै खिलाफ गैला बोला सी। 23 तैबे तिन्है तेइरी तैइयै एक ध्याड़ा रखू होर बोहू लोका तेई कौछे कठा हुऐ होर स परमेश्वरै रै राज्य री गवाही देइया, मूसै री व्यवस्था होर भविष्यवक्तै री कताबा ना यीशु रै बारै ना समझाई-समझाइया लोका बै दैसदा रौहू। 24 पर केतरै लोकै ता ते गैला मैनी पर केतरै लोकै नी मैनी। 25 बै ते लोका आपू ना एक मत नी हुऐ ता पौलुसै री एसा गैला बोलणै सँघे तौखना भैगै कि, पवित्र आत्मै यशयाह भविष्यवक्तै रै ज़रियै तुसरै दादू-बा बै शोभला बोलू कि ज़ाइया इन्हा लोका बै बोल, 26 कि तुसा शुणदै ता रौहणा पर समझणा नी, तुसा हेरदै ता रौहणा पर बुझणा नी, 27 किबैकि इन्हा लोका रा मन मोटा होर कोन भारी हुऐ सी। तिन्है आपणी औछी बन्द केरी सी ऐणढा नी लोड़ी हुआ कि ते औछियै हेरलै होर कोनै शुणलै होर मैना सँगै समझिया पापा ना फिरलै होर हाँऊ तिन्हा बै ठीक केरनु। 28 ऐबै तुसै जाणा कि परमेश्वरै रै उद्धारै री कैथा होरी जाति रै लोका हागै भजिया सा होर तिन्हा शुणनी। 29 जैबै पौलुसै ऐ बोलू ता यहूदी आपू ना वहस केरद लागै होर तौखना भैगै, 30 होर सौ पूरी दूई बौषा तक आपणै किरायै रै घौरा ना रौहू। 31 जे तेई आगै एजा ती स तिन्हा सँघे मिलदा रौहू होर बडै निडर होइया परमेश्वरै रै राज्य रा प्रचार केरदा होर प्रभु यीशु री गैला सिखाँदा रौहू।

# रोमियो

## परिचय

रोमियो रे नाँ न पौलुसा री चिट्ठी रा मतलब ती कि रोमा न बीणु हुन्दी कलीसिया री यात्रा री तेंईये बौत तयार केरनी । जुणी री योजना पौलुसे बणाई ती । तेईरी योजना ती कि किच्छ बौता तक सौ तौखले मसीह लोका संघे रोहिया कौम केरला, तेथा न बाद तिन्हरी मजती संघे स्पेन नाँ री जैगहा तक जालै, होर मसीह विश्वासी रै ज्ञान होर मसीह जिन्दगी रै चाल चालना रै बारे न समझलै होर शिक्षा देणै री तेंईये पौलुसा री ये चिट्ठी लिखी सा । एसा कताबा न आसा बै पौलुसा रै संदेशा री सेभी न जरूरी व्याख्या मिला सा । रोमा री जैगहा री कलीसिया रै लोका रा स्वागत केरने री तेंईये होर तिन्हरी तेंईये आपणी प्रार्थना रै बारे न दसणै न बाद पौलुस एसा कताबा रै खास विषय रै बारे न खुलासा केरा सा: " किबैकि तेथा न परमेश्वरे री धार्मिकता विश्वास संघे होआ सा होर विश्वास द्वारा प्रगट होआ सा " (1:17) । पौलुसा हागै एसा खास विषय रै बारे न शुरू न लेयिया आखरी तक समझा सा । जरूरी मानव जाति, यहूदी जाति होर होरी जाति दुई बै, परमेश्वरा संघे मेल मिलाप केरने री जरूरत सा, किबै संभ एक समान पापा रै वशा न सी, यीशु मसीह पेन्धे विश्वास केरने रै दुआरा लोका रा परमेश्वरा संघे रिश्ता होआ सा । तैबै न बाद पौलुस मसीह संघे नऊँई जिन्दगी रै बारे न वर्णन केरा सा, जै परमेश्वरा संघे एसा नऊँए रिश्ते रा नतीजा होआ सा । विश्वासी रा परमेश्वरा संघे रिश्ता होआ सा । परमेश्वरा री आत्मा तेईबै पाप होर मौऊती रै वशा न आजाद केरा सा । अध्याय 5-8 न पौलुस विश्वासी री जिन्दगी न परमेश्वरा री व्यवस्था रा कि उदेश्य सा होर परमेश्वरा री शक्ति पेन्धे बशाह केरा सी । तैबै न बाद चले एसा प्रश्ना पेन्धे सोच विचार केरा सी कि सारी मवजाति रै तेंईये परमेश्वरै री योजना न यहूदी होर जाति केँडै ठीक बेशा सी । सौ एसा फैसले न पूजा सा कि यहूदी लोका रै दुआरा यीशु रा अस्वीकार केरना भी परमेश्वरै री एक योजना रा हिस्सा ती, जै पूरी मानव जाति बै यीशु मसीह न परमेश्वरै रै अनुग्रह री सीमा न आणनै री तेंईये बणाईरी ती, होर तेई रा 4 बशाह सा कि यहूदी लोका हमेशा इन्कार केरदे नेई रोहणा । आखरी न पौलुस लिखा सा कि मसीह जिन्दगी केँडै तैरह जीणी सा, खास केरिया होरी संघे प्यारा रा रिश्ता रखिया । सौ इन्हा चीजा बै, परमेश्वरा री सेवा, राज्य होर एकी दूजै री तेंईये मसीह लोका रा फर्ज होर सोच बिचार रै प्रश्ना रै रूपा न लेआ सा । सौ चिट्ठी बै खत्म केरदी घेरे व्यक्तिगत संदेश होर परमेश्वरा री आराधना संघे खत्म केरा सा ।

रुपरखा

भूमिका होर खास विषय 1:17

माहणु री तेंईये मुक्ति री जरूरत 1:8-3:20

मुक्ति री तेंईये परमेश्वरा रा रस्ता 3:21-4:25

मसीह री नऊँई जिन्दगी 5:1- 8:39

परमेश्वरा री योजना न इस्त्राइल 9:-1-11:36

मसीह सैँई चालचलन 12:1 - 15:13

उपसंहार होर होरी री तारीफ 15:14 - 16:27

## अभिवादन

1 पौलुसे री तरफा ना जूण यीशु मसीह रा दास सा, होर प्रेरित होणे री तेंईये शादू सा, होर परमेश्वरा रे सुसमाचारा री तेंईये अलग केरू सा । 2 जूणी री तेइए पहले ना ओरु आपणे भविष्यद्वक्ते रे जरिये पवित्र शास्त्रा ना । 3 आपणे बेटे आसारे प्रभु यीशु मसीह रे बारे ना प्रतिज्ञा केरी ती, जूण शरीरा ना होइया ता दाऊदे रे वंशा ना पैदा हुआ । 4 होर पवित्र आत्मा रे भाव ना मुंरे दे ना जिन्दे होणेरी बजह ना सामर्था संघे परमेश्वरा रा बेटा हुआ । 5 जूणी री बजह ना आसा बे अनुग्रह होर प्रेरिताई मिली, कि तेइरे नाँ री बजह ना सेभी जाती रे लोका बशाह केरिया तेइरी मने । 6 तिन्हा मौन्झे तुसे भी यीशु मसीह रे होणे री तेंईये शादेंदे सी । 7 तिन्हा सेभी रे नाँ जूण रोम राज्य ना परमेश्वरा रे प्यारे सी होर पवित्र होणेरी तेंईये शादेंदे सी, आसा रे परमेश्वर होर प्रभु यीशु मसीह री तरफा ना तुसा बे अनुग्रह होर शान्ति मिलदी रोहे ।

## धन्यवाद री प्रार्थना

8 पहले हाँऊ तुसा सेभी री तेंईये यीशु मसीह रे जरिये आपणे परमेश्वरा रा धन्याबाद देआ सा, कि तुसा रे बशाहे री चर्चा सरे संसारा ना होंदी लागी सा ।

9 परमेश्वर जूणीरी सेवा हाँऊ आपणी आत्मा ना तेई रे बेटे रे सुसमाचारा रे बारे ना केरा सा, सो ऐ मेरा गवाह सा, कि हाँऊ केन्डी तरहे लगातार तुसा बे याद केरदा रोहू 10 होर रोज आपणी प्रार्थना ना विनती केरा सा, कि कोई तरीके ना तुसा आगे ऐणे रा मेरा सफर परमेश्वरा री इच्छा ना पूरा हो । 11 हाँऊ तुसा संघे मिलणे री इच्छा रखा सा, कि हाँऊ तुस्सा बे कोई आत्मिक वरदान देनु जूणी बे पाइया तुसे स्थिर रोहा । 12 मतलब ऐ कि, मुं तुसा मौन्झे रोहिया तुसा संघे तेई बशाह रे बजह ना जूण मुं आंधरे सा, होर तुसा आंधरे सा, शान्ति पानू । 13 होर हे भाइयो हाँऊ नी चाहन्दा, कि तुसे ऐसा गल्ला ना अनजान रोहले, कि हाँऊ घड़ी-घड़ी तुसा आगे ऐणा चाहा ती, कि जेंडा मुम्बे होर अन्यजाती ना फोळ मिलु, तेंडा ऐ तुसा ना भी मिलला, ऐबे तक रुकिया रोहू ती । 14 हाँऊ यूनानी होर अन्यभाषा बोलणु आये रा, होर बुधिमाना होर निर्बुधि सेभी रा कर्जदार सा । 15 होर हाँऊ तुसा बे जूण रोम देशा ना रोहा सी, तुसा बे सुसमाचार शणाणे बे हमेशा तयार सा ।

## सुसमाचार री प्रार्थना

16 किबैकि हाँऊ सुसमाचार शणाणे री शर्म नेंई केरदा, किबैकि सो हरेक बशाह केरनु आए री तेंईये, पहले यहूदी फिरी यूनानी री तेंईये मुक्ति देणे बे परमेश्वरे री सामर्थ सा । 17 किबैकि एता ना परमेश्वरे री धार्मिकता बशाह ना,

होर बशाह री तेंईये प्रगट होआ सा, जेण्डा लिखू सा, कि बशाह केरने री बजह ना धर्मी माणहु जिंदे रोहणा ।

### माँणहु जाति रा पाप

18 परमेश्वरे री झिक ता तिन्हा लोका री अभक्ति होर अधर्म पांधे सर्गा ना प्रगट होआ सा, जूण सच्चाई बे अधर्मा सेंघे दबाईया रखा सी । 19 एता तकर परमेश्वरा रे बारे रा ज्ञान तिन्हा रे मना ना प्रगट सा, केबैकी परमेश्वरे तिन्हा पांधे प्रगट केरु सा । 20 २० किबैकि तेईरे गोजुएंदे गुण, मतलब तेईरी हमेशा री सामर्थ होर परमेश्वरा रे कौम एई संसार रे शुरुआता ना हेरने बे मिलीसी, औखे तेंई कि तिन्हा आगे कोई जबाब नी आथी । 21 कारण ऐ ती कि परमेश्वरा बे जाणने पांधे भी तिन्हे परमेश्वरा रे योग्य तारीफ होर धन्याबाद नी धिना, पर बेकारा रे सोच-विचार केरदे लागे, औखे तक कि तिन्हा रे निर्बुधि मना ना निहयारा हुआ । 22 ते आपणे आपा बे बुद्धिमान बोलिया मुख बणे । 23 होर कधी भी खत्म नी होणु आप परमेश्वरे री महिमा बे, नाश होणु आप माणहु ना, होर चिडु ना, होर चार टांगा आप बे, होर धौरती पांधे चलणु आप री मूर्ति बराबर बनाइय रखु । 24 ऐसा बजह ना परमेश्वरे ते तिन्हा री इच्छा अनुसार सो छोडी धिने, कि ते आपु ना आपणें शरीरा रा अनादर केरले 25 किबैकि तिन्हे परमेश्वरे री सच्चाई झूठा ना बदली, होर सृष्टि री पूजा केरदे लागे, ना कि तेई री जूणीए सेभ किछ बणाऊ होर सदा धन्य सा, आमीन । 26 तेबेता परमेश्वरे सो नीच कौम केरने तेंईये छोडे, औखे तकर कि तिन्हे री बेटडीये भी जूण शोभले कौम ती छोडीया, शोभले कौम बुरे ना बदले । 27 होर मर्द भी बेटडी तरह शोभली गला छोडिया आपु ना मिलिया गंदे कौम केरदे लागे, होर मर्द-मर्दा सेंघे गंदे कौम केरिया ठीक सजा पाई । 28 होर जेबे तिन्हे परमेश्वरा बे पछियाणने ना इन्कार केरु, ता परमेश्वरे भी सो तिन्हा रे बुरे मना पांधे छोडे, कि बुरे कौम केरदे रोहा । 29 तेबे ते सेभ तरह रे अधर्म, दुष्टता, लालच, होर बैरभाव ना भोरुये, डाह होर हत्या, होर झगडे, होर ठगी, होर जलन, होर चुगली लाणु आप, 30 बदनाम केरनु आप, परमेश्वरे री नजरी ना बुरे, होरी रा अनादर केरनु आप, अभिमानी, डिगा मारणु आप, बुरी-बुरी गल्ला रे मनणु आप, आमा बापू री गल्ला नी शूणनु आप, 31 निर्बुधि, बशाह चोडनु आप, दुःख-दाह नी केरनु आप, होर निर्दयी हुए । 32 ते ता परमेश्वरे रा ऐ नियम जाणा सी, कि एन्डे कौम केरनु आप बे मृत्यु दण्ड सा, तेबे भी आपु केले एण्डे कौम नी केरदे, पर केरने आप बे हेरिया खुश होआ सी ।

### परमेश्वरा रा फैसला

2 ऐबे ओ दोष लाणु आप, तू चाहे कोई भी होला, तो आगे कोई जबाब नी आथि, किबैकि जूणी गला ना तू दूजे पांधे दोष ला सा, तेसा गला ना आपणे आपा पांधे भी दोष ला सा, एता बजह ना जूण तू दोष ला सा आपु भी सो ऐ कौम केरा सा । 2 होर आसा बे पता सा, कि एन्डे-एन्डे कौम केरणु आप पांधे परमेश्वरा री धीरे ना ठीक-ठीक दण्डे री आज्ञा होआ सा । 3 होर ओ माँणहुआ, तू जे एन्डे कौम केरणु आप पांधे दोष ला सा, होर आपु सो ऐ कौम करा सा, कि बुझा सा, कि तो परमेश्वरे रे दण्डे री आज्ञा ना बचणा? 4 तू कि तेईरी कृपा, होर सहनशीलता, होर धीरजरूपी धना बे बेकार बुझा सा? होर कि ऐ नी फयाडदा, कि परमेश्वरारी कृपा तौभे मन फेरने बे सिखा सा । 5 ५ पर आपणी कठोरता होर हठी मना री बजह ना तेई रे झीका रे धियाडे री तेंईये, जूणी ना परमेश्वरा रा सच्चा न्याय प्रगट होला आपणे तकर झिक कर्मोदा लागे सा । 6 तेई हरेका रा तिन्हा रे कौमा रे अनुसार न्याय केरना । 7 जूण शोभले कौमा ना पक्के रोहिया महिमा, होर आदर, होर अमरता री खाजा ना सी, तिन्हा बे तेई हमेशा रा जीवन देणा । 8 पर जूण वाद-विवाद केरा सी, होर बुरे कौमा ना रोहा सी, तिन्हा पांधे झिक होर कोप पोडना । 9 हर बुरा कौम केरणु आप रे प्राणा पांधे दुःख होर क्लेश ऐणा, पहले यहूदी पांधे फिरी यूनानी पांधे । 10 पर महिमा होर आदर होर कल्याण सेभी बे मिलणा, जूणीए हले कौम केरला, पहले यहूदी बे फिरी यूनानी बे । 11 किबैकि परमेश्वर कोई रा पक्ष नी केरदा । 12 किबैकि जूणीये बिना व्यवस्था रे पाप केरु, तिन्हा बिना व्यवस्था रे नाश भी होणा, होर जूणीये व्यवस्था पाइया पाप केरु, तिन्हा रा न्याय व्यवस्था मताबिक होणा 13 ( किबैकि परमेश्वरा री

नजरा ना व्यवस्था रे शूणनु आप धर्मी नेई होंदे, पर जूण व्यवस्था ना चला सी सो धर्मी ठहराईणे । 14 फिरी जेबे अन्यजाती लोका जूणी आगे व्यवस्था नी आथि, आपणे चाल-चलना ना व्यवस्था री गला ना चला सी, पर तिन्हा आगे व्यवस्था नी होणे पांधे भी ते आपणे तेंईये आपु ना व्यवस्था सी । 15 ते व्यवस्था री गला आपणे-आपणे दिला ना लिखुईन्दी रिहा सी होर तिन्हे री बूधि भी ऐ गवाही डा सा, होर तिन्हे री चिंता ऐ तिन्हा बे निर्दोष या दोषी ठहरा सी । 16 जूणी धियाडे परमेश्वर मेरे सुस्माचारा रे मताबिक यीशु मसीह रे द्वारा माँणहु री गुप्त गल्ला रा न्याय केरला ।

### यहूदी होर व्यवस्था

17 अगर तू आपु बे यहूदी बोला सा, होर व्यवस्था पांधे बशाह रखा सा, होर परमेश्वरा रे बारे ना घमण्ड केरा सा । 18 होर तेईरी इच्छा जाणा सा, होर व्यवस्था री शिक्षा पाइया शोभली-शोभली गल्ला बे मना सा । 19 होर आपु पांधे बशाह रखा सा, कि हाँऊ काणे रा सहारा, होर निहारे ना पोडेंदे लोका रा प्रियाशा । 20 होर निर्बुधि लोका बे सिखाणु आ, होर शौरू रा मास्टर सा, होर ज्ञान होर सच्चाई रा उदाहरण, जूण व्यवस्था ना सा, होर मुंभे मिलु सा । 21 तेबे तू जूण होरी बे सिखा सा, आपणे आपु बे नी सिखांदा? तू जूण चोरी नी केरने री शिक्षा देआ सा, होर आपु तू चोरी करा सा? 22 तू बोला सा कि व्यभिचार मता केरदे, होर आपु ऐ व्यभिचार केरा सा? तू जूणमूर्ति ना नफरत केरा सा, होर आपु ऐ मंदरा बे लुटदा भ्यासु सा? 23 तू जूण व्यवस्था रे बारे ना घमण्ड केरा सा, व्यवस्था नी मनिया, परमेश्वरा रा अनादर केरा सा? 24 किबैकि तुसा री बजह ना अन्यजाती ना परमेश्वरे रे नॉ री निंदा होआ सा जेण्डा लिखू दा भी सा । 25 अगर तू व्यवस्था ना चला सा, तेबे खतना केरने रा फायदा ता सा, पर अगर तू व्यवस्था बे नी मनला, ता तेरा खतना केरना खतना नी केरुएंदे बराबर सा । 26 अगर कोई खतना केरुआदा माँणहु व्यवस्था रे नियमा बे मना सा, तेबे कि तेई री बिना खतना री दशा खतना केरुएंदे बराबर नी होणा? 27 होर जूण मानव जाती री बजह ना बिना खतना रोहू, अगर सो व्यवस्था बे पूरा केरा सा, तेबे तौभे जूणी बे व्यवस्था पाणे ना होर खतना होणे पांधे भी व्यवस्था बे नी मन्दा, दोषी नी ठराला । 28 किबैकि सो यहूदी नेई, जूण सामणे यहूदी सा, होर ना ता सो खतना सा, जो सामणे सा होर जूण शरीरा ना सा 29 पर यहूदी सो ऐ सा जूण मना ना सा, होर खतना सो सा जूण दिला रा होर आत्मा रा सा, ना कि लिखुआदा, एन्डे माँणहु री प्रशंसा माँणहु धीरे ना नी बल्कि परमेश्वरा धीरे ना होआ सा ।

### यहूदी होर व्यवस्था

3 ऐबे यहूदी री कि प्रशंसा, होर खतने रा कि फायदा? 2 हर तरह ना सेभ किच्छ, पहले ता ऐ कि परमेश्वरे रे वचन तिन्हा वे धिने । 3 अगर बोहु लोका बशाह चोडनु आप भी निकते ता कि हुआ? तिन्हा रे बशाह चोडने ना परमेश्वरे री सच्चाई बेकार थोडा नी हुई । 4 कदी भी नेई, पर परमेश्वर सदा सच्चा होर हर माँणहु झूठा ठहरे, होर जेण्डा लिखू सा कि जूणी ना तू आपणी गल्ला ना धर्मी ठहरे होर न्याय केरदी घेरे जय पाला । 5 तेबे अगर आसा रा अधर्म परमेश्वरा री धार्मिकता बे रोका सा, ता आसा कि केरना? तेबे कि परमेश्वर जो झिक करा सा अन्यायी सा? ऐ ता हाँऊ माँणहु री सोचा पांधे बोला सा । 6 कदी भी नेई, नेई ता परमेश्वरा एई संसारा रा न्याय कदी केरना ती? 7 अगर मेरे झूठा री बजह ना परमेश्वरे री सच्चाई तेईरी महिमा री तेंईये बोहु प्रगट हुई, तेबे हाँऊ पापी बराबर किबे दण्डा रे योग्य ठहराऊ? 8 होर आसा बुराई किबे नी केरनी, कि भलाई पैदा हो? जेबे आसा पांधे ऐ दोष ला सी, होर केतरे ऐ बोला सी, कि इन्हा रा ऐ बोलणा सा, पर एण्डे रा दोषी होणा ठीक सा ।

### कोई धर्मी नेई

9 फिरी ऐबे कि हुआ? कि आसे तिन्हा ना शोभले सी? कदी भी नेई, किबैकि आसे यहूदी होर यूनानी दुई पांधे ऐ दोष लाऊ कि ऐ सेभ पापा रे वषा ना सी । 10 जेण्डा लिखू सा कि कोई भी धर्मी नेई, एक भी नेई । 11 कोई भी समझदार नेई, कोई भी परमेश्वरा बे तोपणु आ नेई । 12 सेभ भटके सी, सेभ

बेकार हुए सी, कोई भलाई करणु आ नेई, एक भी नेई।<sup>13</sup> तिन्हा रा गोळ खुली कब्रा सेंई सा, तिन्ही आपणी जीभा ना छल केरु सा, तिन्हा रे होंटा ना झर भौरुआ सा।<sup>14</sup> होर तिन्हा रा मुहं श्राप होर बुरी-बुरी गल्ला ना भौरुआ सा।<sup>15</sup> तोर तिन्हे ती जोंघा खून केरने बे त्यार रोहा सा।<sup>16</sup> तिन्हे री बौता ना नाश होर क्लेश सी।<sup>17</sup> तिन्हे शोभली बौत नी पछियाणी।<sup>18</sup> तिन्हा री होच्छी आगे परमेश्वर रा जौर नी आथि।<sup>19</sup> आसा बे पता सा कि व्यवस्था जे किच्छ बोला सा, तिन्हा बे बोला सा, जूण व्यवस्था रे मनणु आए सी, तेबे ता हर मुहं बंद केरीणा, होर सारा संसार परमेश्वरे रे दण्ड री तेंईये उहरणा।<sup>20</sup> किबैकि व्यवस्था रे कौमा ना कोई भी प्राणी तेई सामणे धर्मी नी उहरणा, किबैकि व्यवस्था सेंघे पापे रो पछियाण होआ सा।

### बशाह होर धार्मिकता

<sup>21</sup> पर ऐबे बिना व्यवस्था परमेश्वरे री सो धार्मिकता प्रगट हुई सा, जूणीरी गवाही व्यवस्था होर भविष्यद्वक्ता देआ सी।<sup>22</sup> मतलब परमेश्वर री सो धार्मिकता जूण यीशु मसीह पांधे बशाह केरने ना सेभ बशाह करणु आए री तेंईये सा, किबैकि कोई भेद-भाव नी आथि।<sup>23</sup> किबैकि सेभीये पाप केरु, होर परमेश्वर री महिमा ना दूर सी।<sup>24</sup> पर तेई रे अनुग्रह ना तेइरे छुटकारे री बजह ना जूण यीशु मसीह ना सा, पुरे-पुरे धर्मी ठहराईया सी।<sup>25</sup> सो परमेश्वरे तेई रे कहना री बजह ना एक एण्डा उद्धार ठहराऊ, जूण बशाह करने ना कौमा रा होआ सा, कि जूण पाप पहले केरे ती, होर जूणी री परमेश्वरे आपणी सहन शक्ति ना आनाकानी केरी, तिन्हा रे बारे ना अपनी धार्मिकता प्रगट केरे।<sup>26</sup> पर एई बौकते तेइरी धार्मिकता प्रगट हो, जूणीना आपु ऐ धर्मी ठहरे, होर जो यीशु पांधे बशाह केरा सा, तेइरा भी धर्मी ठहराणु आ होला।<sup>27</sup> तेबे घमंड केरना कौखे रोहू, तेइरी ता जगह नी रोही, कुणी व्यवस्था री बजह ना? कि कर्मा री व्यवस्था ना? नेई, पर बशाह री व्यवस्था री बजह ना।<sup>28</sup> तेबे आसे ऐई परिणामा ना पूजा सी, कि माँणहु व्यवस्था रे कौमा बगेर बशाह री बजह ना धर्मी ठहराईया सा।<sup>29</sup> परमेश्वर कि सिर्फ यहूदी रा सा? कि अन्यजाती रा नी आथि? हां, अन्यजाती रा भी सा।<sup>30</sup> किबैकि एके परमेश्वर सा जूण खतना केरुएदे होर बिना खतना रे लोका बे भी बशाह री बजह ना धर्मी ठहरा सा।<sup>31</sup> तेबे कि आसे व्यवस्था बे बशाह री बजह ना व्यर्थ ठहरा सी? कदी नेई, पर व्यवस्था बे मजबूत केरा सी।

### अब्राहमा रा उदाहरण

<sup>4</sup> ऐबे आसा कि बोलणा, कि आसा रे शारीरिक बापू इब्राहीमा बे कि मिलू? <sup>2</sup> किबैकि अगर इब्राहीम कौमा ना धर्मी ठहराऊ होंदा, ता तेई बे घमंड करने री जगह होणा ती, पर परमेश्वर रे नेडे नेई।<sup>3</sup> पवित्र शास्त्र कि बोला सा? ऐ कि इब्राहिमे परमेश्वर पांधे बशाह केरु, होर ऐ तेइरे तेंईये धार्मिकता हुआ(गिणु)।<sup>4</sup> कौम करणु आए बे तेई री मजदूरी देणा दान नी होंदा, पर तेईरा हक्क समझिया सा।<sup>5</sup> पर जूण कौम नी केरदा, होर जूण पूजा पाठ नी केरदा तेइरे धर्मी होणे पांधे बशाह केरा सा, तेइरा बशाह तेइरी तेंईये धार्मिकता गिणीया सा।<sup>6</sup> जूणी बे परमेश्वर बिना कर्म केरिया धर्मी ठहरा सा, तेइबे दाऊद भी धन्या बोला सा।<sup>7</sup> कि धन्य ते सी, जूणी रे अधर्म माफ हुए, होर जूणीरे पाप गझियाए।<sup>8</sup> धन्य सा सो माँणहु जूणी बे परमेश्वर पापी ना ठहराला।<sup>9</sup> तेबे ऐ धन्य बोलणा, कि सिर्फ खतना केरुएदे रे तेंईये सा, कि बिना खतना करणु आए बे भी सा? आसे ता ऐ बोला सी कि इब्राहीमा रे तेंईये तेइरा रा बशाह धार्मिकता गीणुआ।<sup>10</sup> ता तेबे सो किबे गिणुआ? खतने री दशा ना कि बिना खतने री दशा ना? खतने री दशा ना नी बल्कि बिना खतने री दशा ना <sup>11</sup> होर तेइबे खतने रा चिन्ह मिलू, कि तेई बशाह री धार्मिकता पांधे छाप होली, जो तेइए बिना खतने री दशा ना रखु ती, जूणीबजह ना सो सेभी रा बापू लोडी हुआ, जूण बिना खतने री दशा ना बशाह केरा सी, होर ऐ कि सो भी धर्मी लोडी ठहराए।<sup>12</sup> होर तिन्हा खतना केरुएदे रा बापू लोडी हुआ, जूण ना सिर्फ खतना केरुएदे रा, बल्कि तिन्हा रा भी जूण आसा रे बापू इब्राहीमा रे रस्ते ना चला सी, जूणतेइए बिना खतना री दशा ना केरु ती।

### बशाह रै द्वारा कसमा रा मिलणा

<sup>13</sup> किबैकि ऐ कसम केरी कि तेई संसारा रे वारिस होणा, ना इब्राहीमा बे, ना तेइरे वंशा बे व्यवस्था री बजह ना धीनी ती, पर बशाह रे धार्मिकता री बजह ना मिली।<sup>14</sup> किबैकि अगर व्यवस्था आए वारिस सी, ता बशाह बेकार होर प्रतिज्ञा भी निष्फल हुई।<sup>15</sup> व्यवस्था ता झिक पैदा केरा सा, होर जौखे व्यवस्था नी आथि, तौखे व्यवस्था रा टालणा भी नी।<sup>16</sup> एता बजह ना सो बशाह री बजह ना मिला सा, कि अनुग्रह री रीती ना हो, कि प्रतिज्ञा सेभी वंशा री तेंईये पक्की रोहली, ना कि तेइरी तेंईये जूण व्यवस्था बे मना सा, बल्कि तिन्हा री तेंईये जूण इब्राहीमा रे बराबर बशाह आए सी, सो ऐ ता आसा सेभी रा बापू सा।<sup>17</sup> ( जेण्डा कि लिखू सा, कि मैं तू सेभ जाती रा बापू ठहराऊ सा ), तेई परमेश्वर रे सामणे जूणी पांधे तेइए बशाह केरु होर जूण मुंएदे बे जिंदा केरा सा, होर जूण गल्ला आथि ऐ नेई, तिन्हा रा नाँ लेआ सा, होर एण्डा लागा सा कि मना ते सी।<sup>18</sup> तेइए निराशा ना भी आशा रखीया बशाह केरु, सो तेबे कि तेइरे वचने रे मताबक कि तेरा वंश एण्डा होणा कि सो बोहु जाती रा बापू लोडी हुआ।<sup>19</sup> होर सो जूण शोऊ बोर्षा रा ती, आपणे मुंएदे जे शरीर होर सारा री मुंईदी जै कोख जाणीया भी बशाह केरने ना कमजोर नी हुआ।<sup>20</sup> होर ना अविश्वासी बणीया परमेश्वर री प्रतिज्ञा पांधे शक केरु, पर बशाह ना पक्के होइया परमेश्वरे री महिमा केरी।<sup>21</sup> होर पक्का पता लाऊ, कि जूणीगला री परमेश्वरे प्रतिज्ञा केरी सा, सो टेसा बे पूरी केरने री भी सामर्थ रख्वा सा।<sup>22</sup> ऐसा बजह ना सो तेई री तेंईये धार्मिकता गिणुआ।<sup>23</sup> होर ऐ वचन कि बशाहा तेई री तेंईये धार्मिकता गिणुआ, सो सिर्फ तेई री तेंईये नी लिखू।<sup>24</sup> पर आसा री तेंईये भी जूणीरी तेंईये बशाह धार्मिकता गिणीना, मतलब आसा री तेंईये जूण तेई पांधे बशाह केरा सी, जूणीए आसा रे प्रभु यीशु बे मुंएदे ना जिंदा केरु <sup>25</sup> सो आसा रे बुरे कौमा री बजह ना ढोकुआ, होर आसा रे धर्मी होणे री तेंईये जिंदा भी केरुआ।

### परमेश्वर सेंघे मेल

<sup>5</sup> ऐबे जेबे आसे बशाह केरिया धर्मी हुए, ता आपणे प्रभु यीशु मसीह री बजह ना परमेश्वर सेंघे मेल-मिलाप डाहणा <sup>2</sup> णी री बजह ना बशाह रे कारण अनुग्रह तकर, जूणीना आसे बणदे सी, होर आसे पुजेदे भी सी, होर परमेश्वरे री महिमा री आशा पांधे घमण्ड केरा।<sup>3</sup> सिर्फ ऐतरा ऐ नी, बल्कि आसे दुखा ना भी घमण्ड केरना, ऐ सोचिया कि दुखा ना धीरज, <sup>4</sup> होर धीरजा ना शोभले बणना, होर शोभले बणने ना, आस पैदा होआ सा।<sup>5</sup> होर आस होणे ना शर्म नी होंदी, किबैकि जूण पवित्र आत्मा आसा बे मिली सा, तेसा री बजह ना परमेश्वर रा प्यार आसा रे मना ना भौरुआ सा।<sup>6</sup> किबैकि जेबे आसे कमजोर ऐ ती, ता सही बोक्ता ना मसीह परमेश्वर बे नी मनणु आए री तेंईये मुंआ।<sup>7</sup> धर्मी माँणहु री तेंईये शायद कोई आपणी जान देला, पर होई सका सा कि कोई भले माँणहु री तेंईये आपणी जान देला।<sup>8</sup> पर परमेश्वर आसा पांधे आपणा प्यार एंडी तरहे प्रगट केरा सा, कि जेबे आसे पापी ऐ ती तेबे तेई बोक्ते मसीह आसा री तेंईये मुंआ।<sup>9</sup> ऐबे जेबे कि आसे, तेई रे खूने री बजह ना धर्मी ठहरे सी, ता तेई री बजह ना झिका ना किबे नी बचणा?<sup>10</sup> किबैकि दुश्मनी होणे री दशा ना तेइरे बेटे री जान देणे री बजह ना आसा रा मेल परमेश्वर सेंघे हुआ तेबे मेल होणे पांधे तेईरी जिन्दगी री बजह ना आसा मुक्ति किबे नी पाणा?

### आदम सेंघे मौऊत होर मसीह सेंघे जिन्दगी

<sup>11</sup> होर सिर्फ ऐतरा ऐ नी, पर आसे प्रभु यीशु री बजह ना जूणी री बजह ना आसा रा मेल हुआ सा, परमेश्वर रे बारे ना घमण्ड भी केरा सी।<sup>12</sup> तेबेता जेण्डा एक माँणहु री बजह ना पाप संसारा ना आऊ, होर पापा री बजह ना मौत आई, होर एंडी तरहे मौत सेभी माँणहु मौन्जे आई, किबैकि सेभिए पाप केरु।<sup>13</sup> किबैकि व्यवस्था रे देणे तकर पाप ता एई संसारा ना ती, पर जौखे व्यवस्था नेई होंदी, तौखे पापा री गिणती नेई होंदी।<sup>14</sup> तेबे भी आदमा ना लेइया मुसा तक मौतिये तिन्हा लोका पांधे भी राज केरु, जूणीए तेई आदमे रे अपराधे री तरह, जूण ऐणु आए रा नशाण ती, पा नी केरु।<sup>15</sup> पर जेण्डे

अपराधे री दशा सा, तेंडी अनुग्रह रे वरदाने री नेई, किबैकि जेबे एकी माँणहुरे अपराध केरने री बजह ना बोहु लोका मुंरे, तेबे परमेश्वरा रा दान होर अनुग्रह एक माँणहु रे, मतलब यीशु मसीह रे अनुग्रह ना हुआ होर बोहु लोका पांधे बहुतायता ना हुआ। 16 होर जेण्डा एकी माँणहु रे पाप केरने री बजह रा ऐ फ़ोळ मिलु, तेंडी दाने री दशा नी आथि, किबैकि एकी री बजह ना दण्डे री आज्ञा रा फ़ैसला हुआ, पर बोहु अपराध ना एण्डा वरदान भी हुआ, कि लोका धर्मी हुए। 17 किबैकि जेबे एकी माँणहु रे अपराधा री बजह ना, मौतिये तेई एकी री बजह ना राज्य केरु, तेबे जूण लोका अनुग्रह होर धर्मरूपी वरदान पा सी ते एक माँणहु रे, मतलब यीशु मसीह री बजह ना तिन्हा पका हमेशा रे जीवना ना राज्य केरना। 18 ऐबे जेण्डे एकी अपराधे री बजह ना सेभी माँणहु पांधे दण्डे री आज्ञा हुई, तेंडे एक धर्मा रा कौम भी सेभी माँणहु री जिन्दगी री तेंईये धर्मी ठहरने रा कारण हुआ। 19 किबैकि जेण्डे एकी माँणहु रे आज्ञा नी मनणे री बजह ना बोहु लोका पापी ठहरे, तेंडे एकी माँणहु रे आज्ञा मनणे री बजह ना बोहु लोका धर्मी ठहरना। 20 होर व्यवस्था मौन्झे आई, पर जौखे पाप बोहु हुआ, तौखे अनुग्रह पाप ना भी जादा हुआ। 21 कि जेण्डे पापे मौत फ़ेलान्दे-फ़ेलान्दे राज्य केरु, तेंडे आसा रे प्रभु यीशु मसीह रा अनुग्रह भी हमेशा रे जीवन री तेंईये धर्मी ठहरे होर राज्य केरे।

### पापा संघे मोरणा मसीह न जिन्दे

6 ऐबे आसा कि बोलणा? कि आसा पाप केरदे रोहणा, कि अनुग्रह बोहु होला? 2 कदी भी नेई, जेबे आसे पापा रे तेंईये मुंये ता भी तेई पापा ना रोहिया जिन्दगी किबे बिताणी? 3 तुसे नी जाणदे, कि जेतरे आसे यीशु मसीह रा बपतिस्मा लेऊ, ता तेई री मौती रा बपतिस्मा लेऊ? 4 ऐबे तेसा मौती रा बपतिस्मा पाणे री बजह ना आसे भी तेई संघे पोथुये, तेबे जेण्डा मसीह बापू री महिमा री बजह ना मुंएदे ना ज़िंदा केरु, तेंडे आसा भी नंउये जीवन जीणे री सोच डाहले 5 किबैकि अगर आसे तेइरे मौरने ना तेइरे संघी हुए, ता ऐबे तेइरे जिन्दे होणे ना भी पक्का तेइरे संघी होणा। 6 किबैकि आसा बे पता सा कि आसा रा पराणा मनुष्यत्व तेई संघे क़ूसा पांधे खत्म हुआ, ताकि आसा रा पापा आ शरीर खत्म होला, होर आगे बे आसे पापा रे गुलाम नै रोहले। 7 किबैकि जूण मुंआ, सो माँणहु पापा ना छुटिया धर्मी हुआ। 8 ऐबे जेबे आसे मसीह संघे मुंए, ता आसा रा बशाह ऐ सा कि तेई संघे जिन्दे भी होणा। 9 किबैकि आसा बे पता सा कि मसीह मुंएदे ना जिन्दे होणे ना बाद ऐबे भी मौरनु आ नेई, किबैकि तेई पांधे मौत भी राज नेई केरी सकदी। 10 किबैकि जेबे सो मुंआ ता पापा री तेंईये एकी ऐ बारी मुंआ, पर जूण ज़िंदा सा, ता परमेश्वरा री तेंईये जिन्दा सा। 11 एण्डा ऐ तुसे भी आपणे आपा बे पापा री तेंईये ता मुंएदे, पर परमेश्वरा री तेंईये यीशु मसीह ना आपणे आपा बे जिन्दे सोचा। 12 ऐबे पाप तुसा रे मुंएदे शरीरा ना राज नी केरला, कि तुसे पापा रे अधीन रोहा। 13 होर ना आपणे अंगा बे अधर्मा रे हथियार होणे री तकर पापा रे अधीन केरा, पर आपणे आपा बे मुंएदे ना जिन्दे हुऐदे सोचिया परमेश्वरा बे देआ, होर आपणे आपा बे धर्मा रा हथियार होणे री तेंईये परमेश्वरा वे देआ। 14 होर तुसा पांधे पापा रा राज नेई होणा, किबैकि तुसे ऐबे व्यवस्था रे अधीन नेई आथि, बल्कि अनुग्रह रे अधीन सी।

### धर्मा रै होर पापा रै नोकर

15 ता ऐबे कि हुआ? कि आसा तेबे पाप केरना कि ऐबे आसे व्यवस्था रे अधीन नेई बल्कि अनुग्रह रे अधीन सी? कदी भी नेई। 16 १६ तुसे नी जाणदे कि जूणी आज्ञा बे मनणे री तेंईये तुसे आपणे आप बे नौकरे री तरह देआ सी, तेई रे दास बणा, चाहे ता पापा रे जूणी रा अंत मौत सा, चाहे आज्ञा मनणु आए रे जूणीरा अंत धर्मिकता सा। 17 पर परमेश्वरा रा धन्याबाद हो, कि तुसे जूण पापा रे दास ती, तेबे भी मना ना तेई उपदेश रे मनणु आए हुए, जूणी रे सांचे ना तुसे ढाए ती। 18 होर पापा ना छड़ाईया धर्मा रे दास हुए। 19 हाँऊ तुसा री शरीरे री कमजोरी री बजह ना तुसा बे बोला सा, कि जेण्डे तुसे आपणे अंगा बे कुकर्मा री तेंईये अशुधता ना होर कुकर्मा रे दास होणे बे धिना ती, तेंडे तुसे आपणे अंगा बे पवित्रता री तेंईये धर्मा रे दास होणे री तकर देआ। 20 जेबे तुसे पापा रे दास ती तेबे धर्मा री तरफा ना आजाद सी। 21 ऐबे जूणी

गल्ला ना तुसे शर्म केरा सी, तिन्हा ना तेई बोकते तुसे कि फ़ोळ प् ती? 22 किबैकि तिन्हा रा अंत ता मौत सा पर ऐबे पापा ना आजाद होईया होर परमेश्वरा रे दास होईया तुसा बे फ़ोळ मिलु जूणी ना पवित्रता मिला सा, होर तेसा रा अंत अनंत जीवन सा। 23 किबैकि पापा रो मजदूरी ता मौत सा, पर परमेश्वरा रा वरदान आसारे प्रभु यीशु ना अनंत जीवन सा।

### व्याह केरु हुँदे रे जिन्दगी री कहाणी

7 हे भाइयो, तुसा बे कि पता नी आथि ( हाँऊ व्यवस्था रे मनणु आए ना बोला सा ) कि जदी तक माँणहु ज़िंदा सा, तेबे तकर तेई पांधे व्यवस्था रा राज्य सा? 2 किबैकि व्याहूईदी बेटडी व्यवस्था रे मुताबक लाडे रे जिन्दे होंदे सो तेई संघे पक्की बोनुईदी सा, पर जेबे टेसा रा लाडा मौरा सा, ता सो आपणे लाडे रे बंधना ना आजाद होआ सा। 3 पर अगर लाडे रे जिन्दे होंदे सो कोई होरी माणहु री बणा सा, तेबे तेसा व्यभिचारिणी बोलिणा, प् अगर लादा मौरा, सा ता सो तेसा व्यवस्था ना आजाद होआ सा, औखे तकर भी सा, कि अगर सो कोई होरी माँणहु संघे व्याह भी केरली ता तेसा व्यभिचारिणी नी बोलिणा। 4 ऐबे हे मेरे भाइयो, तुसे भी मसीह रे शरीरा रे बजह ना व्यवस्था री तेंईये मुंएदे बणे, कि तेई दूजे रे होआ, जूण मुंएदे ना जिन्दा हुआ, ताकि आसे परमेश्वरा री तेंईये फ़ोळ आणनु आए बणले। 5 किबैकि जेबे आसे शरीरा ना ती, ता पाप केरने री इच्छा जूण व्यवस्था री बजह ना धीनी ती, मौती रा फ़ोळ पैदा केरने री तेंईये आसा रे अंगा ना कौम केरा ती। 6 पर जूणी रे बंधना ना आसे ती, तेई री तेंईये मौरिया, ऐबे व्यवस्था ना एण्डे छूटे सी, कि शास्त्रा रे पराणे नियमा ना नी, पर आत्मा री नऊई रीता पांधे सेवा केरा सी।

### व्यवस्था होर पाप

7 ऐबे आसा कि बोलणा? व्यवस्था कि पाप सा? कदी भी नेई, पर बिना व्यवस्था ना हाँऊ पापा बे नी पछियाणदा, अगर व्यवस्था नी बोलदी, कि लालच मता केरदे ता लालच कि होआ सा मुंबे पता नी थी होणा। 8 परन्तु पापे मौका पाईया आज्ञा री बजह ना सेभ तरह रा लालच पैदा केरु, किबैकि बिना व्यवस्था पाप मुंआदा सा। 9 हाँऊ ता पहले बिना व्यवस्था रे ज़िंदा ती, पर जेबे आज्ञा आई, तेबे पाप ज़िंदा हुआ होर हाँऊ मुंआ। 10 होर सो ऐ आज्ञा जूण जिन्दगी री तेंईये ती, मेरे तेंईये मौती री बजह हुई। 11 किबैकि पापे मौका पाईया आज्ञा री बजह ना हाँऊ बहकाऊ, होर एता री बजह ना हाँऊ मकाऊ। 12 एता री बजह ना व्यवस्था पवित्र सा, होर आज्ञा भी शोभली होर ठीक सा। 13 ऐबे जूण शोभली ती, सो कि मेरे तेंईये मौत ठहरी, कदी नेई, पर पाप टेसा शोभली चीजा री बजह ना, मेरे तेंईये मौत पैदा केरणु आ हुआ कि तेइरा पाप होणा प्रगट होला, होर आज्ञा री बजह ना पाप होर भी पापमय ठहरु लोडी।

### माँणहु रा अन्तर्द्वन्द

14 किबैकि आसा बे पता सा कि व्यवस्था ता आत्मिक सा, पर हाँऊ शरीरा रे होर पापा रे होथा ना बिकु दा सा। 15 होर जे हाँऊ केरा सा, सो हाँऊ नी जाणदा, किबैकि जे हाँऊ चाहा सा, सो नी केरदा, पर जूणी गल्ला ना मुम्बे नफरत होआ सा, हाँऊ तिन्हा गल्ला बे केरा सा। 16 होर अगर, जूण हाँऊ नी चाहन्दा सो ऐ केरा सा, ता हाँऊ मना सा कि व्यवस्था शोभली सा। 17 तेबे एन्डे बौक्ता ना सो कौम केरणु आ हाँऊ नेई बल्कि पाप सा, जूण मुं आंधरे रोहा सा। 18 किबैकि मुम्बे पता सा कि मेरे शरीरा ना कोई भी शोभली चीज नेई रोहन्दी, इच्छा ता मुं आंधरे बडी होआ सा, पर कोई भी शोभले कौम मुं ना नेई होंदे। 19 किबैकि जूणी शोभले कौमे री हाँऊ इच्छा केरा सा, सो ता नेई केरदा, पर जूणी बुराई री इच्छा नेई केरदा, सो ऐ केरा सा। 20 पर अगर हाँऊ सो ऐ केरा सा, जूणीरी इच्छा नी केरदा, ता सो केरणु आ हाँऊ नेई हुआ, बल्कि सो पाप सा जूण मुं आंधरे सा। 21 तेबे मुम्बे ऐ व्यवस्था मिला सा, कि जेबे हाँऊ शोभला केरने री इच्छा केरा सा, ता बुराई मुं आगे ऐजा सा। 22 बैकि हाँऊ आंधरे ना ता परमेश्वरा री वयवस्था ना बोहु जादा खुश होआ सा 23 पर मुम्बे आपणे अंगा ना होरी तरह री वयवस्था हेरिया सा, जूण मेरी

बुधी री वयवस्था ना लड़दी रोहा सा, होर मुम्बे पापा री व्यवस्था रे बंधना ना पा सा जूण मेरे अंगा ना सा । 24 हाँऊ केन्डा अभागा माँणहु सा, मुम्बे ऐई मौती रे शरीरा ना कुण आजाद केरला? 25 हाँऊ आपणे प्रभु यीशु मसीह रे जरिये परमेश्वरा रा धन्याबाद केरा सा, निदान हाँऊ आपणी बुधि ना ता परमेश्वरे री व्यवस्था रा, पर शरीरा ना पापा री व्यवस्था ना चला सा ।

### पवित्र आत्मा रै जरिये जीणा

8 ऐबे जूण मसीह यीशु ना सी, तिन्हा पांधे दण्डे री आज्ञा नेई आथी, किबैकि ते शरीरा रे अनुसार नेई बल्कि आत्मा रे अनुसार चला सी । 2 किबैकि जिन्दगी री आत्मा री व्यवस्थे मसीह यीशु ना मुम्बे पापे री, होर मौती री व्यवस्था ना आजादी धीनी सा 3 किबैकि जूण कौम व्यवस्था शरीरे री कमजोरी री बजह ना नेई केरी सकी, मतलब आपणे ही बेटे बे पापमय शरीरा रे बराबर, होर पापा री तैईये बली होणे तकर, शरीरा ना पापा रे दण्डे री आज्ञा धीनी । 4 8 ऐ तेबे कि जूण व्यवस्था री विधि आसा ना जूण शरीरा रे अनुसार नेई बल्कि आत्मा रे अनुसार चला सी, पूरी हो । 5 किबैकि शरीरा आए माँणहु शरीरा री गल्ला पांधे मन ला सी, पर अध्यात्मिक आत्मा री गल्ला ना मन ला सी 6 शरीरा पांधे मन लाणा ता मौत सा, पर आत्मा पांधे मन लाणा जिन्दगी होर शान्ति सा । 7 किबैकि शरीरा पांधे मन लाणा ता परमेश्वरा ना दुश्मनी केरना सा, किबैकि ना ता परमेश्वरा री व्यवस्था रे अधीन सा, ना कदी एण्डा होई सका सा । 8 होर जूण शरीरा री दशा ना सी, ते परमेश्वरा बे कदी खुश नी रखी सकदे । 9 पर जेबे परमेश्वरा रा आत्मा तुसा आंधरे सा, तेबे तुसे शरीरा री दशा ना नेई, पर आत्मिक दशा ना सी । अगर कोई ना मसीह री आत्मा नेई आथी ता सो परमेश्वरा रा माँणहु नेई आथी । 10 होर अगर मसीह तुसा ना सा, ता शरीर पापा रे बजह ना मुंआ दा सा, पर आत्मा धर्मा रे बजह ना जिन्दी सा । 11 अगर तेई री आत्मा जूणीऐ यीशु मुंऐ दे ना जिंदा केरु तुसा आंधरे सा, ता जूणीऐ मसीह मुंऐदे ना जिंदा केरु, तेई तुसा रे मुंऐदे शरीरा वे भी आपणी आत्मा री बजह ना जूण तुसा आंधरे सा जिंदा केरना । 12 ऐबे हे भाइयो, आसे शरीरा रे कर्जदार नेई आथी, कि शरीरा रे अनुसार धियाडे काटे । 13 किबैकि अगर तुसे शरीरा रे अनुसार धियाडे काटले, ता मौरना, होर अगर आत्मा ना शरीरा री इच्छा बे खत्म केरले ता जिन्दे रोहणा । 14 किबैकि जेतरे परमेश्वरा री आत्मा रे द्वारा चला सी, सिर्फ सो ऐ परमेश्वरा रे बेटे सी । 15 किबैकि तुसा बे गुलामे री आत्मा नी मिली, कि भी डौरा, पर बेटे होणे री आत्मा मिली सा जूणी ना तुसे ओ बापू, ओ पिटा जी बोलिया हाक्का पाई सका सी । 16 आत्मा आपु ऐ आसा री आत्मा संघे मिलिया ऐ गवाही देआ सा, कि आसे परमेश्वरा रे बेटे सी । 17 होर अगर बेटे सी, ता वारिस भी सी, होर परमेश्वरा रे वारिस होर मसीह रे संघी वारिस सी, कि आसे तेई संघे दुःख चकले कि तेई संघे आसे भी महिमा पाले ।

### भविष्य न प्रगट होणु आळी महिमा

18 किबैकि हाँऊ सोच सा कि ऐई बौक्ता रे दुःख कष्ट तेसा महिमा रे सामणे जूण आसा पांधे प्रगट होणु आई सा, किच्छ भी नेई आथी । 19 किबैकि सृष्टि बडी आशा भौरुईदी नजरा ना परमेश्वरा रे बेटे प्रगट होणे बे हेरदी लागी सा । 20 किबैकि सृष्टि आपणी धीरे ना नेई, पर आपणे अधीन केरणु आए री व्यर्थता रे अधीन ऐसा आशी ना केरी सा । 21 कि सृष्टि आपु भी नाश होणे री गुलामी ना आजाद होइया, परमेश्वरा रे सन्ताना री महिमा री आजादी प्राप्त केरे । 22 किबैकि आसा बे पता सा, कि सारी सृष्टि मिलिया ऐबे तक दुःख होर कष्ट ना पोडीया तडफदी रोहा सा । 23 होर ऐतरा ऐ नेई बल्कि आसे भी जूणीआगे आत्मा रा पहला फल सा, आपु ऐ आपणे-आपा ना तडफा सी, बेटे होणे री मतलब आपणे शरीरा रे छुटकारे री तैईये लागे सी 24 आस रखिया ता आसा रा उद्धार होआ सा, पर जूणी चीजा री आस केरिया सा, जेबे सो हेरने वे मिला सा, ता आस कीजी री रोही? किबैकि जूणी चीजा बे जेबे कोई हेरदा लागी सा, ता टेसा चीजा री कि आस केरनी । 25 पर जूणी चीजा बे आसे नेई हेरदे, अगर तेसा चीजा री आस रखा सी, ता मजे-मजे तेई रे ऐणे री इच्छा ना लगातार इन्तजार केरा सी । 26 एण्डी तरहे आत्मा भी आसा री कमजोरी ना मजद केरा सा, किबैकि आसा बे पता नेई आथी, कि प्रार्थना

केन्डी तरहे केरनी चाहिए, पर आत्मा आपु ऐ शाह भौरी-भौरिया जूण आसा रे बयान केरने ना बाहरे सा आसा री तैईये प्रार्थना केरा सा । 27 2७ होर मना बे परखणु आ जाणा सा, कि आत्मा री कि इच्छा सा किबैकि सो पवित्र लोका री तैईये परमेश्वरा री इच्छा रे मताबक प्रार्थना केरा सा । 28 होर आसा बे पता सा, कि जूण लोका परमेश्वरा संघे प्यार केरा सी, तिन्हा री तैईये सारी गल्ला भलाई बे पैदा केरा सी, मतलब तिन्हा री तैईये जूण तेइरी इच्छा ना शादेंदे सी । 29 किबैकि जूण तेईये पहले ना पछियाणे सी, ते पहले ना ठहरायेंदे भी सी कि तेइरे बेटे समान हो ताकि सो बोहु भाई ना पहला ठहरला । 30 फिरी जूणा तेइए पहले ना ठहराए सी, ते शादे भी, होर जूणा तेइए शादे, ते धर्मा भी ठहराए सी, होर जूणा धर्मा ठहराए सी, तिन्हा बे महिमा भी धीनी सा ।

### परमेश्वरा संघे प्यार

31 ऐबे आसा इन्हा गल्ला रे बारे ना कि बोलणा? अगर परमेश्वर आसा धीरे सा ता आसा रा दुशमण कुण होई सका सा? 32 जूणीये आपणा एकलौता बेटा भी आपु हागे नी रखु, पर सो आसा सेभी री तैईये धिना, ता तेई संघे आसा बे सेभ किच्छ किबे नी देणा? 33 परमेश्वरा रे छांटेदे लोका पांधे कुण दोष लाइ सका सा? परमेश्वर ता सो सा जूणीये सो धर्मा ठहराए । 34 होर कुण सा जो दण्डे री आज्ञा देई सका सा? मसीह ता सो सा जूण मुंआ मतलब मुंऐदे ना जिंदा भी हुआ, होर परमेश्वरा रे सीधे हौथे बैठा सा, होर आसा री तैईये प्रार्थना भी केरदा रोहा सा । 35 कुण आसा बे मसीह रे प्यारा ना अंगी केरी सका सा? कि क्लेश, कि संकट, कि उपद्रव, कि अकाल, कि नंगापन, कि जोखिम, कि तलवार? 36 जेण्डा लिखूदा भी सा, कि तेरे तैईये आसे पूरी दयाड नशाणे पांधे होआ सी, आसे कांटणु आई भेडा बराबर गिणीया सी । 37 पर इन्हा सेभी गल्ला ना आसे तेइरी बजह ना जूण आसा ना प्यार केरा सा, जयवंत होणे ना भी बडे सी । 38 किबैकि हाँऊ पक्का जाणा सा, कि ना मौत, ना जिन्दगी, ना स्वर्गदूत, ना प्रधानताएं, ना वर्तमान, ना भविष्य, ना सामर्थ, ना ऊंचाई, 39 ना गहराई, होर ना कोई होर सृष्टि, आसा बे परमेश्वरा रे प्यारा ना, जूण आसा रे प्रभु यीशु मसीह ना सा अंगी केरी सकादी ।

### परमेशवर होर तेईरे चुने माँणहु

9 हाँऊ मसीह ना सच्च बोला सा, झूठ नी बोलदा, होर मेरी बुधि भी पवित्र आत्मा ना होइया गवाही देआ सा । 2 कि मुम्बे बड़ा दुःख सा, होर मेरा मन हमेशा नराज रोहा सा । 3 किबैकि हाँऊ चाह ती, कि आपणे भाईया री तैईये जूण शरीरा ना मेरे रिश्तेदार सी, आपु ऐ मसीह ना शापित होंदा । 4 ते इस्राइली सी, होर बेटे होणे रा हक्क, होर महिमा, होर आज्ञाएं, होर व्यवस्था होर उपासना, होर प्रतिज्ञाएं तिन्हे री सा । 5 बुजुर्ग भी तिन्हा रे सी, होर मसीह भी शरीरा रे मताबक तिन्हा मौन्झे ना हुआ जूण सेभी पांधे परम परमेश्वर हुआ । आमीन । 6 पर ऐ नेई, कि परमेश्वरा रा वचन टळु, ऐ ता तेबे कि जूण इस्राइली रे वंशा ना सी, ते सेभ इस्राइली नेई । 7 होर ना इब्राहिमे रे वंशा रे होणे री बजह ना सारे तेई री सन्तान ठहरे, पर (लिखू सा ) इसहका ना ऐ तेरा वंश होणा । 8 मतलब शरीरे रे बेटे परमेश्वरे रे बेटे नेई, पर प्रतिज्ञा रे बेटे वंश गिणीया सी । 9 किबैकि प्रतिज्ञा रा वचन ऐ सा, कि मुं ऐई बौक्ते रे मताबक ऐणा, होर सारा रा बेटा होणा । 10 होर सिर्फ ऐ नेई, पर जेबे रिबका भी एकी ना मतलब आसा रे बापू इसहका ना गर्भवती हुई । 11 होर ऐबे तैई ना ता कोई शौहरू पैदा हुए ती, होर ना तिन्हे कोई भला या बुरा केरु ती, होर तेइए बोलू, बडे होछे रे गुलाम होणा । 12 ऐबे ऐ कि परमेश्वरा री इच्छा जो तेई रे छांटणे रे मताबक सा, कर्मा री बजह ना नी, पर शादणु आए पांधे बणीया रोहे । 13 ऐबे आसा कि केरना? परमेश्वरा आगे कि अन्याय सा? कदी भी नेई । 14 ऐबे आसा कि केरना? परमेश्वरा आगे कि अन्याय सा? कदी भी नेई । 15 किबैकि सो मुसा बे बोला सा, कि हाँऊ जूणी पांधे दया केरना चाहनु, ती पांधे दया केरनी, हपर जूणी कोई पांधे कृपा केरना चाहनु, तेई पांधे कृपा केरनी । 16 ऐबे ऐ ना ता चाहु आए री, ना ता ठौरा मारणु आए री पर दया केरणु आए परमेश्वरा री गल सा । 17 किबैकि पवित्र शास्त्रा ना हारुना संघे बोलू, कि मैं तू तेबे खडा केरु सा, कि तो ना आपणी सामर्थ रिहानु, होर मेरे

नाँ रा प्रचार सारी धौरती पांधे हुआ लोड़ी। 18 होर सो जूणी पांधे चाह सा, तेई पांधे दया केरा सा, होर जूणी बे चाह सा तेई रा मन कठोर केरा सा।

### परमेशवरा री झिक होर तेईरी झूरी

19 एबे तो मुं संघे बोलणा, सो भी किबे दोष ला सा? कुण तेई री इच्छा रा सामणा केरा सा? 20 ओ माँणहुआ, तू कुण सा जूण परमेश्वरा रा सामणा केरा सा? कि एण्डा होआ सा कि जे चीज कोइये बणाई सो ऐ चीज कदी बनाणु आए बे पूछा सा कि तें हांऊ एंडी किबे बणाई? 21 कुम्हारा बे कि मिट्टी पांधे अधिकार नी आथी, कि एकी ऐ देरा ना सो एक शोभला भांडा होर तेई देरा ना एक खराब भांडा नी बणाई सकदा? 22 ता ऊंई ना हेरान होणे री कि गल सा? कि परमेश्वरे आपणी झिक रिहाणे री तेंइये होर आपणी सामर्थ प्रगट के केरने री इच्छा ना झिका रे भांडे, जो विनाशा री तेंइये त्यार केरे ती बडे प्यारा ना सहन केरे। 23 होर दया रे भांडे पांधे जूण तेइये महिमा री तेंइये पहले ना त्यार केरे, आपणी महिमा रे धना बे प्रगट केरने री इच्छा केरी। 24 मतलब आसा पांधे जूण ना सिर्फ यहूदी बल्कि अन्यजाती ना भी शादे। 25 जेंडा सो होशे री कताबा ना भी बोला सा, जूण मेरे लोका नेई ती, सो मुं आपणे लोका बनाणे, 26 होर एण्डा होणा कि जूणी जगह तिन्हा बे बोलू ती, तेसा जगह ना तिन्हा जीविते परमेश्वरा रे सन्तान होणा। 27 होर यशायाह इस्राइला रे बारे ना लेरा मारी-मारिया बोला सा, चाहे इस्राइला रे शौहरू री गिनती समुन्दरा रे रेता बराबर होली तेबे भी तिन्हा मौन्झे थोड़े बचणा। 28 केबैकी प्रभु आपणा वचन धौरती पांधे पूरा केरिया, धार्मिकता संघे बडी छेके परा केरना 29 जेंडा यशायाह पहले भी लिखू दा सा, कि अगर सेना रा परमेश्वर आसा री तेंइये किच्छ भी वंश नी छौड़दा, ता आसा सदोमा सेई होणा ती, होर अमोरा बराबर ठहरना ती

### इस्राइली रा बशाह नेई केरना

30 एबे आसा कि बोलणा? ऐ कि अन्यजाती जूण धार्मिकता री खोज नेई केरदे ती, तिन्हे धर्मिकता प्राप्त केरी मतलब सो धर्मिकता जूण बशाह ना होआ सा। 31 पर इस्राइली, जूण धर्मा रे व्यवस्था री खोज केरदे- केरदे व्यवस्था तक नेई पूजे। 32 किबे, ऐ तेबे कि सो बशाह ना नेई, पर मना कर्मा ना तेई री खोज केरा ती, तिन्हे तेई ठोकर खाणु आए पात्थरा ना ठोकर खाई। 33 जेण्डा लिखू दा सा, हेरा मुं सिय्योना ना ठोकर लाणु आ पात्थर होर ठोकर लागणु आई टोहल रखणी, जूण तेई पांधे बशाह रखला, तिन्हा कदी भी लज्जित नी होणा।

10 ओ भाइयो, मेरे मने री ऐ इच्छा होर इन्हा री तेंइये मेरी परमेश्वरा ना ऐ प्रार्थना सा, कि ते उद्धार पाले। 2 किबैकी हाँऊ तिन्हे री गवाही देआ सा, कि ते परमेश्वरा री धुना ना रोहा सी, पर बुद्धिमान होइया नेई। 3 किबैकि ते परमेश्वरा री धार्मिकता ना अन्जान होइया, होर आपणी धर्मिकता पक्की केरने री कोशिश केरिया, परमेश्वरा री धार्मिकता रे अधीन नेई हुए। 4 किबैकि हर एक बशाह केरणु आए री तेंइये, धार्मिकता री बजह ना मसीह व्यवस्था रा अंत सा।

### मुक्ति सेभी री तेंइये

5 किबैकि मुसे ऐ लिखू सा, कि जूण माँणहु तेसा धार्मिकता पांधे जूण व्यवस्था ना सा, चला सा, तेई ऐसा बजह ना जिन्दे रोहणा। 6 पर जूण धार्मिकता बशाह ना सा, सो एण्डा बोला सा, कि तू आपणे मना ना एण्डा हेरी बोलदा कि स्वर्गा पांधे कुणी चढ़ना? ( मतलब कि मसीह बे भ्याँऊ आणने री तेंइये। ) 7 या अधोलोका ना कुणी जाणा? ( मतलब मसीह बे मुंऐदे ना जिंदा केरिया झाँऊ आणने री तेंइये। ) 8 पर सो कि बोला सा? ऐ कि वचन तेरे नेड़े सा, तेरे मुंहा ना होर तेरे शरीरा ना सा, ऐ सो ऐ बशाह रा वचन सा, जूण आसे प्रचार केरा सी। 9 कि अगर तू आपणे मुंहा ना यीशु बे प्रभु स्वीकार केरा सा, होर आपणे मना ना बशाह केरला, कि परमेश्वरे सो मुंऐदे ना जिंदा केरु सा, ता तो पक्का उद्धार पाणा। 10 किबैकि धार्मिकता री तेंइये मना ना बशाह केरना होआ सा, होर उद्धार पाणे री तेंइये मुंहा ना अंगीकार केरिया सा। 11 किबैकि पवित्र शास्त्र ऐ बोला सा, कि जो कोई तेई पांधे बशाह केरला तेई

लज्जित नी होणा। 12 यहूदी होर यूनानी ना कोई फर्क नेई आथी, सो तेबे कि सो सेभी रा प्रभु सा, होर आपणे सेभी नाँ लेणु आए री तेंइये उद्धार सा। 13 किबैकी जो कोई प्रभु रा नाँ लेला, तेई उद्धार पाणा। 14 फिरी जूणी पांधे तिन्ही बशाह केरु, तिन्हा तेई रा नाँ किबे लेणा? होर जूणी री नेई शुणी तेई पांधे बशाह किबे केरना? 15 होर जेबे शनाणु आ नेई आथी ता किबे शुणनी? होर अगर नी भेजले, ता प्रचार किबे केरना? जेण्डा लिखू सा, कि तिन्हा री जाँघा केन्डी बांकी सा, जूण शोभली गल्ला रा शोभला समाचार देआ सी। 16 पर सेभिये तेई सुसमाचारा पांधे कौन नी लाए, यशायाह बोला सा, कि ओ प्रभु, कुणीऐ आसा रे समाचारा पांधे बशाह केरु सा? 17 होर बशाह शुणने ना, होर शुणना मसीह रे वचना पा होआ सा। 18 पर हाँऊ बोला सा, कि तिन्हे नेई शुणु? शुणु ता ठीक किबैकि लिखुदा सा, तिन्हे री आवाज सारी धौरती पांधे, होर तिन्हे रे वचन संसारे रे कुणे तक पूजे सी। 19 हाँऊ भी बोला सा, इस्राइली बे कि पता नी ती आथी? पहले ता मुसा बोला सा, मुं इन्हा री बजह ना जूण जाती नेई आथी, तुसा रे मना ना जलन पैदा केरनी, होर एकी बुरी जाती री बजह ना तुसा बे झिक दिलाणी। 20 फिरी यशायाह बडी हिम्मता संघे बोला सा, जूण मुम्बे नी तोपदे, तिन्हा बे हाँऊ मिलु, जूण मुम्बे पुछदे तक नी ती, हाँऊ तिन्हा पांधे प्रगट हुआ। 21 पर इस्राइला रे बारे ना सो ऐ बोला सा, कि हाँऊ पूरी दयाड आज्ञा नी मनणु होर आपु ना वाद विबाद केरणु आए लोका आगे हाँथ फेलाईया खडा रोहू।

### इस्राइली पेन्धे परमेशवरा री झूरी

11 तेबेता हाँऊ बोला सा, परमेश्वरे कि आपणे लौका छोड़े सी? कदी भी नेई, हाँऊ भी ता इस्राइली सा इब्राहिमे रे वंशे रा होर विन्यामिने रे गोत्रा ना सा। 2 परमेश्वर आपणे ते लौका नेई छोड़े सी, जूण तेइए पहले ना पछियाणे सी, तुसा बे कि पता नी आथी, कि सो इस्राइला रे बरखलाप परमेश्वरा ना प्रार्थना केरा ती। 3 कि ओ प्रभु, तिन्हे तेरे भविष्यद्वक्ता मकाये सी, होर तेरी वेदी ढाई सा, होर हाँऊ केहला बचिया रोहू सा, होर ते मेरे प्राणा रे खोजी सी। 4 पर परमेश्वरा ना तेई बे कि जबाब मिलु कि मैं आपणे तेंइये सौत हजार मर्द रखे सी जूणीऐ बाअला ऐ सामणे घुटने नेई टेके सी। 5 होर एण्डी तरह ऐई बोके भी, अनुग्रह ना छाँटुपदे भी कैतर लोका सी। 6 अगर ऐ अनुग्रह ना हुआ दा सा, तेबे कर्मा ना नेई, नेई ता तेबे अनुग्रह फिरी अनुग्रह नेई रोहू। 7 तेबे कि निचोड़ निकता? ऐ कि इस्राइली जूणीबे तोपदे लागे सी, सो तिन्हा बे नेई मिलु, पर छाँटुपदे बे मिलु, होर बाकी लौका पक्के केरे होले। 8 जेण्डा लिखू सा, कि ओज के रोजा तक सो बडी गहरी निंजा ना पाए ती, होर एंडी हौछी धीनी कि किच्छ नी लोड़ी हेरुआ होर एन्डे कौन कि किच्छ नी लोड़ी शुणुआ। 9 होर दाउद बोला सा, तिन्हा री रोटी तिन्हा री तेंइये जाल, होर फंदा, होर ठोकर, होर दण्डा रा कारण होणा 10 होर तिन्हे री हौछी निहयारी लोड़ी हुई किच्छ नी लोड़ी हेरुआ, होर तू हमेशा तिन्हा रे चैके बे झुकाईया रखा। 11 एबे हाँऊ कि बोला सा, कि तिन्हे तेबे ठोकार खाई, कि झोड़ीया पौडले? कदी भी नेई, पर तिन्हा रे झोडिया पोडने री बजह ना अन्यजाती बे उद्धार मिलु, कि तिन्हा बे जलन लोड़ी हुई।

### होरी जाति री मुक्ति कलम लागै रा उदाहरण

12 होर अगर तिन्हा रा झोडना संसारा री तेंइये धन होर तिन्हे री कमी अन्यजाती रे तेंइये फायदे री बजह हुई, ता अगर सो होले ता केतरा फायदा होणा।

13 हाँऊ तुसा होरी जाति बे बोला सा, जेबे कि हाँऊ होरी जाति री तेंइये प्रेरित सा, ता हाँऊ आपणी तारीफ केरा सा। 14 ताकि कोई भी तरह ना मुं आपणे रिश्तेदार ना रिश पैदा केरिया तिन्हे मौन्झे कई अकी रा मुक्ति करणु। 15 किबैकि जेबे कि तिन्हा छोडना संसारा रे मिलणे री बजह हुआ, तेबे कि तिन्हा रा ग्रहण केरना मुंऐदे ना जिन्दा होणे रे बराबर नी होणा? 16 जेबे भंटा रा पेहला डेला पवित्र ठहरु, तेबे पूरा मुछुआंदा पीठा भी पवित्र सा, होर जेबे जड पवित्र ठहरी, ता डाळी भी तेंडी होणा। 17 होर अगर कई एक डाली चोड़ी, होर तू जंगली जलपाई होइया तिन्हे मौन्झे लाऊ, होर जलपाई री जडहा रा संघी हुआ। 18 तेबे डाळी पांधे घमण्ड नी केरना, होर अगर तू घमण्ड केरला,

तेबे पता लाई, कि तू जडाह बे नेई पर जडह तौभे सम्भाला सा । 19 फिरी तो बोलणा डाळी किजिबे चोडी, होर हांऊ डाळी री जगह पांधे किबे लाऊ? 20 शोभला, सो ता तिन्हा रे अविश्वासा री बजह ना चोडी, पर तू ता बशाह रखा सा, तेबे घमण्ड मत केरदा, पर परमेश्वरा ना डोर, 21 किबैकि जेबे परमेश्वरे शोभली डाळी भी नेई छोडी, ता तू भी नेई छोडणा । 22 तेबे ता परमेश्वरे री कृपा होर झिका बे हेर, जूण झौडिया पोए, तिन्हा पांधे झिक होर तो पांधे कृपा, अगर तू तेई ना बणीया रोहू ता ठीक, नेई ता तू भी काटिया शेटणा । 23 होर सो भी अगर बशाह ना पक्के होले, ता तिन्हे री भी कलम लाणी, किबैकि परमेश्वर तिन्हे री भी कलम लाई सका सा । 24 किबैकि अगर तू तेई जैतुना ना, जूण पहले ना जंगली ती, काटिया होर स्वभाव रे बरखलाप शोभले जैतुना ना कलम केरिया लाऊ, ता जूण ऐ स्वभाविक डाळी सी, आपणे तेई जैतुना ना कलम किबे नी केरिणी ।

### सारे इस्त्राइली री मुक्ति

25 ओ भाइयो, कौंइचे एण्डा नी लोडी हुआ कि तुसे आपणे आपा बे बडे बुद्धिमान समझले, तेबेता हांऊ नी चाहन्दा कि तुसे ई भेदा ना अनजान रोहा, कि जेबे तक अन्यजाती पुरे ढंगा ना प्रवेश नी केरली, तेबे तेंइये इस्त्राइला रा एक हिस्सा एण्डा ऐ कठोर रोहणा । 26 होर एंडी तरहे सारे इस्त्राइला मुक्ति पाणी, जेण्डा लिखू सा, कि बचाणु आए सिख्योना ना एणा, होर अभक्ति के करणु आए याकुबा ना दूर केरने । 27 होर तिन्हा संघे मेरा ऐ वायदा सा, कि जेबे मु तिन्हा रे पाप दूर केरने । 28 तिन्हा शोभले समाचारा री तरफा ना ता तुसा रे दुश्मन होणा, पर छोट्टूऐदे होणे री बजह ना सो बापू-दादे रे प्यारे सी । 29 किबैकि परमेश्वर आपणे वरदान होर बुलाहटा ना कदी भी पिच्छे नेई होन्दा । 30 किबैकि जेण्डे तुसे पहले परमेश्वरा री आज्ञा नेई मनी, पर ऐबे आज्ञा नी मनगै री बजह ना तुसा पांधे दया हुई । 31 तेंडे तिन्हे भी ऐबे आज्ञा नी मनी कि जूण दया तुसा पांधे हुई सा, तिन्हा पांधे भी सो ऐ दया हुई लोडी । 32 किबैकि परमेश्वरे आज्ञा नी मनगै री बजह ना सेभ बन्द केरिया रखे कि परमेश्वर सेभी पांधे दया केरले ।

### परमेश्वरा री पूजा

33 ओहो, परमेश्वरा रा धन, बुद्धि, होर ज्ञान केतरे गहरे सी, तेई रे विचार कतरे बडे होर तेइरी बौता केन्डी सीधी सी । 34 प्रभु री बुधि बे कुण जाणी सका सा, या कुण तेइरा मंत्री बणु? 35 या कुणीये पहले परमेश्वरा बे किछ धिना कि तेइरे बदले तेइबे किछ मिलणा । 36 किबैकि तेइरी तरफा ना होर तेइरी बजह ना, होर तेइरी तेंइये सेभ किछ सा, तेइरी महिमा युग-युग हुई लोडी; आमीन ।

### परमेश्वरा री सेवा रा जीवन

12 तेबैता ओ भाइयो, हांऊ तुसा बे परमेश्वरा री दया याद कराईया तुसा ना विनती केरा सा, कि आपणै शरीरा बे जिंदा, होर पवित्र, होर जूण परमेश्वरा बे शोभला लागा सा बलिदान केरिया चढात; ऐ तुसा री आत्मिक सेवा सा । 2 होर ऐई संसारा बराबर मता बणदे, पर तसा री बुधि रे नऊऐ होणे री बजह ना तुसा रा चाल-चलन भी बदलुआ लोडी, जूणी बजह ना तुसा परमेश्वरे री शोभली होर पसन्द होर सिद्ध इच्छा ना पता लांदे रोहा । 3 किबैकि हांऊ तेई अनुग्रह ना जूण मुं पांधे हुआ सा, तुसा सेभी बे बोला सा, कि जेंडा समझे लोडी एता ना जादा कोई आपणै आपा बे जादा मता समझदे पर जेंडा हर कोई बे परमेश्वरे तेई रे मताबक बशाह धिना दा सा, तेंडा बुधि रे मताबक आपणै-आपा बे समझा । 4 किबैकि जेंडे आसा रे एकी शरीरा ना बोहु अंग सी, होर सेभी अंगा रा एक जें कौम नी आथी । 5 तेंडे आसे जूण बोहु सी, मसीह ना एक देह होइया, आपु ना एक दूजे रे अंग सी । 6 होर जेबे कि तेई अनुग्रह ना जूण आसा बे धिना सा, आसा बे अलग-अलग वरदान मिले सी, तेबे जूणी बे भविष्यद्वाणी रा वरदान मिलु सा, सो बशाह री बजह ना भविष्यद्वाणी ऐ केरला । 7 अगर सेवा करने रा वरदान मिलु सा ता सेवा करने ना लागी रोहला, होर कोई सिखाणु आ सा ता सिखाणै ना लाओ रोहला । 8 जूण उपदेशक सा, सो उपदेश देणे ना लागी रोहला, दान देणु आ भले

होइया दे, जूण अगुवाई केरा सा, जोशा संघे केरला, होर जूण दया केरा सा सो खुशी संघे केरला ।

9 प्यारा ना कोई कपट नी लोडी, बुराई ना नफरत केरा, भलाई केरने ना लागी रोहा । 10 भाई-चारे रे प्यारा ना एकी दूजे संघे प्यार रखा, आपु ना इज्जत केरने ना एकी दूजे ना आगे होआ । 11 मेहनत केरने ना आलसी मता बणदे, आत्मा ना भौरिया रोहा, प्रभु री सेवा केरदे रोहा । 12 आस रखिया खुश रोहा, कष्टा ना खुश रोहा, होर रोज प्रार्थना ना लागी रोहा । 13 पवित्र लौका बे जूणी चीजे री जरूरत सा, तिन्हे री मजद केरा, सेवा करने ना लागी रोहा । 14 आपणै दुःख देणु आए बे आशीष देआ, तिन्हा बे आशीष देआ श्राप मता देंदे । 15 खुशी मनाणु आए संघे खुशी मनात, रोणु आये संघे रोआ । 16 आपु ना एक जें मन रखा, घमण्ड मता केरदे, पर दीन लौका संघे संगती केरा, आपणी नजरी ना बुद्धिमान मता बणदे । 17 बुराई रे बदले बुराई मता केरदे, जूण गला सेभी लौका सामणै शोभली सा, तिन्हा गला री फिक्र केरा । 18 जौखे तेंई होई सका सा, तुसे आपणी तरफा ना सेभ माँणहु संघे मेल-जोल रखा । 19 ओ प्यारो, आपणा बदला मता लेंदे, पर झिक्का बे मौका देआ, किबैकि लिखू सा, बदला लेणा मेरा कौम सा, प्रभु बोला सा बदला लेणा मेरा कौम सा । 20 पर अगर तेरा दुश्मन भूखा सा, ता तेइबे रोटी खय्या, होर अगर प्यासा सा, ता तेई बे पाणी पय्या, किबैकि एण्डा केरने संघे तो तेइरे मुंडा पांधे ओगी रे अंगारे रा ढेर लाणा । 21 बुराई ना हार मता मन्दे पर बुराई बे भलाई केरिया जीता ।

### राज्य रै प्रति फर्ज

13 हर माँणहु आपणे प्रधान अधिकारी रे अधीन रोहा, किबैकि कोई भी अधिकार एण्डा नेई आथी जो परमेश्वरा री धीरे ना नेई आथी, होर जूण अधिकार सी, ते परमेश्वरा रे बणाएदें सी । 2 एण्डा केरने ना जो कोई इन्हा अधिकारा बे नेई मन्दा, सो परमेश्वरा रे बिधि-नियमा रा विरोध केरा सा, होर परमेश्वरा रा सामणा करणु आए बे सजा मिलणी । 3 किबैकि अधिकारी शोभले कौमा री तेंइए नेई, पर बुरे कौमा ना डराणै री तेंइए सी, होर अगर तू अधिकारी ना निडर रोहणा चाहा सा, ता शोभले कौम केर ता तेई भी तौभे शाबाशी देणी । 4 किबैकि सो तेरी भलाई री तेंइये परमेश्वरा रा सेवक सा, कि तेई री झिक्के रे मताबक बुरे कौम करणु आए बे दण्ड दे । 5 तेबेता अधीन रोहणा ना सिर्फ झिक्का री तेंइये बल्कि डौरा री तेंइये जरूरी सा, होर समझ भी ऐ गवाही देआ सा । 6 तेबेता कर (लगान) देआ, किबैकि सो परमेश्वरा रे सेवक सी, होर हमेशा ई कौमा ना लागी रोहा सी । 7 होर सेभी रा हक सेभी बे देआ, जूणीबे कर लोडी, तेई बे कर देआ, जूणी बे चंगी लोडी, तेई बे चंगी लोडी तेई बे चंगी देआ, जूणीना डौरना चाहिए, तेई ना डौरा, होर जूणीरी इज्जत केरनी चाहिए, तेइरी इज्जत केरा ।

### एकी दूजे रै प्रति फर्ज

8 आपु ना प्यार केरने बे छोडीया कोई रे कर्जदार मता बणदे, किबैकि जूण दूजे ना प्यार डाह सा, तेइए व्यवस्था पूरी केरी । 9 किबैकि ऐ कि व्यभिचार मता केरदे, जानी ना मता मारदे, चरी मता केरदे, लालच मता केरदे, होर अगर इन्हा बे छौडिया होर कोई भो आज्ञा होली ता तिन्हा रा निचौड ऐसा गला ना मिला सा, कि आपणै पडोसी संघे आपु बराबर प्यार केर । 10 प्यार पडोसी री कोई बुराई नेई केरदा, तेबेता प्यार रखणा व्यवस्था बे पूरा केरना सा । 11 होर बोक्ता बे हेरिया एण्डा ऐ केरा, ऐ तेबे कि ऐबे तुसा बे निन्जा ना उठणै रा बोक्त आऊ सा, किबैकि जूनी बोक्ते आसे बशाह केरु ती, तेई बोक्ते रे हिसाबा ना आसा रा उद्धार नेडे सा । 12 रात बडी हुई सा, होर धियाडा निकलणु आ सा, तेबेता ऐबे निहारे रे कौमा बे छौडिया पियाशे रे हथिय्यार बौना । 13 जेण्डा धियाडी बे ठीक होआ सा, तेंडे सीधे-सीधे कौम केरा, ना कि एश-परस्ती, शराब पिणा, ना व्यभिचार, ना दुग्बाजी, ना झगडे होर ना जलन । 14 पर प्रभु यीशु बे ला, होर शरीरे री इच्छा बे पूरी करने री कोशिश मता केरदे ।

### आपणै भाई पेन्धे दोष मता लांदै

**14** जूण बशाह ना कमजोर सी, तेई बे आपणी संगती ना रखा, पर तेई री गलती री चर्चा केरने री तेंइये नेई । 2 किबैकि एकी बे बशाह सा कि सेभ किछ खाणा ठीक सा, पर जूण बशाह केरने ना कमजोर सा, सो साग-भाजी ऐ कहा सा । 3 होर खाणु आए नी खाणु आए बे बुरा मत समझदे, होर नी खाणु आए खाणु आए पांधे दोष मता लांदै, किबैकि परमेश्वरे सो ग्रहण केरु सा । 4 तू कुण सा कि होरी रे सेवका पांधे दोष ला सा? तेई रा ठीक रोहणा या ठीक नेई रोहणा तेई रे स्वामी पांधे निर्भर केरा सा, बल्कि सो ठीक ऐ केरीणा, किबैकि प्रभु तेई बे ठीक रखी सका सा । 5 कोई ता एकी रोजा बे होरी रोजा ना शोभला मना सा, होर कोई सेभी रोजा बे एक जें मना सा, सेभ आपणै मना ना पक्का केरा । 6 जो कोई रोजा बे मना सा, सो प्रभु री तेंइये मना सा, जो कहा सा ता प्रभु री तेंइये कहा सा, किबैकि सो परमेश्वरा रा धन्याबाद केरा सा, होर जो नेई खांदा, सोभि प्रभु री तेंइये नेई खांदा होर परमेश्वरा रा धन्याबाद केरा सा । 7 किबैकि आसा मौन्डे ना ता कोई आपणै तेंइये जिया सा, ना कोई आपणै तेंइये मौरा सा । 8 किबैकि अगर आसे जिन्दे सी, ता प्रभु रे तेंइये जिन्दे सी, होर अगर मौरा सी, ता प्रभु री तेंइये मौरा सी, ऐबे आसे चाहे जिन्दे रोहले या मौरले आसे प्रभु रे सी । 9 किबैकि मसीह ऐसा बजह ना मौरिया जिंदा हुआ, कि सो मुंएदे होर जिन्दे दुई रा प्रभु सा । 10 तू आपणै भाई पांधे दोष किबे ला सा? या तू किबे आपणै भाई बे घटिया समझा सा? आसा सेभी परमेश्वरा रे न्याय केरने री जगह ना खडे होणा सा । 11 किबैकि लिखू सा, कि प्रभु बोला सा कि मेरे जीवने री कसम मुं सामणै हर एक जानु टिकणा, होर हर एक जीभा परमेश्वरा रा अंगीकार केरना । 12 आसा सेभी परमेश्वरा बे आपणा-आपणा लेखा देणा ।

### आपणै भाई री तेंइये पीछे होणै रा कारण नेई बणना

13 ऐबे आगे ना आसे एकी दूजे पांधे दोष नी लाणा पर तुसे ऐ गल पक्की केरा कि ऐबे कोई भी आपणै भाई सामणै ठेस या ठोकरा री बजह नी बणला । 14 मुम्बे पता सा, होर प्रभु यीशु ना मुम्बे पक्का हुआ सा, कि कोई भी चीज आपणै आपा ना अशुद्ध नी होदी, पर जो कोई तेसा चीजा बे अशुद्ध मना सा, तेई री तेंइये अशुद्ध सा । 15 अगर तेरा भाई तेरे खाणै संघे नराज होआ सा, ता तू प्यारा री रीती ना नी चलदा, जूणी रे तेंइये मसीह मुंआ तेई बे तू आपणै खाणै री बजह संघे नाश मत केरदा 16 ऐबे तुसे री भलाई री कोई निन्दा नी हुई लोडी । 17 किबैकि परमेश्वरा रा राज्य खाणा पिणा नेई पर धर्म होर मिलणा होर सो खुशी सा । 18 जूण पवित्र आत्मा ना होआ सा होर जो कोई ऐसा रीती ना मसीह री सेवा केरा सा, सो परमेश्वरा बे शोभला लगा सा, होर लौका भी तेई बे मना सी । 19 ऐबे आसा तिन्हा गल्ला री कोशीश केरनी, जूणी ना एकी दूजे ना मेल मिलाप होर सुधार हो । 20 खाणै पीछे परमेश्वरा रे कौम मता बगाडदे, सेभ किछ शुद्ध ता सा, पर तेई माँणहु री तेंइये बुरा सा, जूणी बे एण्डा खाणै री बजह ना ठोकर लागा सा । 21 शोभला ता ऐ सा, कि ना तू मित खालाहोर ना शराब पिला, होर ना कोई एण्डा कौम केरे, जूणी बजह ना तेरा भाई ठोकर खाला या नराज होला । 22 जूण तेरा बशाह सा, तेई बे परमेश्वरा रे सामणै आपणै मना ना रख, धन्य सो सा जूण तेसा गल्ला ना, जूणीबे सो ठीक बुझा सा, आपणै आपा बे दोषी नी होणे देंदा । 23 पर जूण शक केरिया खा सा, सो दण्डे रा भागी हुआ, सो पक्का होर शोभला सोचिया नी खांदा, होर जे किछ बशाह ना नेई, सो पाप सा ।

### दूजै री तरक्की केरा

**15** होर आसा बे लोडी कि जूण आसे बलवान सी, ते तिन्हा बे जूण बशाह ना कमजोर सी उत्साह देआ, बल्कि आपणै- आपा बे खुश मता केरदे । 2 आसा बे आपणै पड़ोसी री भलाई होर तरकी री तेंइये हमेशा त्यार रौहणा चाहिये 3 किबैकि मसीह आपणै- आपा बे खुश नी ती केरदा, पर जेण्डा लिखू सा, कि तेरे निंदा केरणु आए री निंदा मुं पांधे आई 4 जेतरी गल्ला पैहलै ना लिखी सी, तै सारी आसरी शिक्षा री तेंइये लिखी सी, कि आसै बडे मजे ना होर पवित्र शास्त्रा रे बशाह री बजह ना आश रखले । 5 धीरज होर

शान्ति देणु आ परमेश्वर तुसा बे ऐ वरदान कि मसीह यीशु रे मताबक आपु ना एक मन होईया रोहा । 6 कि तुसे एक मन होर एकी रागा ना परमेश्वरे री स्तुति केरा ।

### सेभी री तेंइये सुसमाचार

7 ऐबे, जेण्डा मसीहरे परमेश्वरे री महिमा री तेंइये, तुसे ग्रहण केरे, तेंडे तुसे भी एकी दुजे बै ग्रहण केरा । 8 तैबे ता हाँऊ बोला सा कि जै वायदे बापू-दादे संघे केरे ती, तिन्हा बे पक्का केरने री तेंइये मसीह, परमेश्वरे री सच्चाई बे साबित केरने री तेंइये, खतना केरुएंदे लोका रा सेवक बणु । 9 होर अन्यजाती भी दया री बजह ना परमेश्वरे री स्तुति केरले, जेण्डा लिखू सा, कि मुं जाति-जाति ना तेरा धन्याबाद केरना, होर तेरे नाँ रे भजन लाणै । 10 तैबे बोलू सा, हे जाति-जाति रे सैभी लोको, तेईरी प्रजा संघे खुशी केरा । 11 होर तैबे, हे जाति-जाति रे लोको प्रभु री जय-जयकार केरा, हे राज्य-राज्य रे सेभी लोको तेईरी तारीफ केरा । 12 होर तेबे यशयाह बोला सा, यिश्तै रे वंशा ना एक जड़ निकलना, होर अन्यजाति राजा होणे री तेंइये खडे होणा, तेई पांधे अन्यजाती रे लोका आश डाहणी । 13 परमेश्वर जूण आश देणु आ सा, तुसा बे बशाह केरने ना सेभी तरह री खुशी होर शान्ति ना भौरला, कि पवित्र आत्मा री सामर्था ना तुसेरी आश बढ़दी रोहली ।

### हिम्मती संघे लिखणै रा कारण

14 हे मेरे भाइयो, मुम्बे आपु भी तुसा ऐ बारे ना पता सा, कि तुसे भी आपणै-आपा ना भलाई ना भौरुएदे सी होर प्रभु रे ज्ञाना ना भी भौरुएदे सी, होर एकी दूजे बे समझाई सका सी । 15 तेबे भी मैं तुसा बै याद दिलाणै री तेंइये कोईचै-कोईचै बडी हिम्मत केरिया लिखू सा, ऐ ता तेई अनुग्रह री बजह ना हुआ सा, जूण परमेश्वरे मुम्बे धिना सा । 16 कि हाँऊ अन्यजाती री तेंइये मसीह यीशु रा सेवक बणीया, परमेश्वरे रे सुसमाचारे री सेवा बडे याजका बराबर केरणु, ताकि अन्यजाती री प्रार्थना, पवित्र आत्मा ना पवित्र केरिया ग्रहण योग्य लोडी हुई । 17 होर तिन्हा गल्ला रे बारे ना जूण परमेश्वरा ना सम्बन्ध रखा सी, हाँऊ मसीह यीशु ना घमण्ड केरी सका सा । 18 किबैकि तिन्हा गल्ला बे छोडिया मुम्बे होर कोई गल्ला रे बारे ना बोलणै री हिम्मत नेई होन्दी, जूण मसीहे अन्यजाति री अधीनता री तेंइये वचन, कर्म 19 होर चिन्हा होर नोखे कौमा री सामर्था ना, होर पवित्र आत्मा री सामर्था ना केरे, ओखे तक कि मैं यरुश्लेमा ना लेइया चारे पासे होर इल्लुरिकुमा तक मसीह रे सुसमाचारा रा पूरा-पूरा प्रचार केरु । 20 पर मेरे मना री इच्छा ऐ सा, कि जोखे-जोखे मसीह रा नाँ नेई पुजू, तौखे सुसमाचार शणानु, एण्डा नी हुआ लोडी कि होरी री नीऊआ पांधे घौर बणानु । 21 पर जेण्डा लिखू सा, तेंडा हुआ लोडी, कि जूणी आगे मसीह रा सुसमाचार नेई पुजू सा, तिन्हा ऐ हेरना होर जूणीऐ नेई शुणु सा तिन्हा शुणना ।

### पौलुसा री रोम जाणै री तरकीब

22 ऐसा बजह ना हाँऊ घडी- घडी तुसा आगे ऐणै ना रोहु । 23 पर ऐबे मुम्बे इन्हा देशा ना कोम केरने री तेंइये होर जगह नेई रोही, होर बोहु बोर्षा ना मुम्बे तुसा आगे ऐणै री इच्छा सा । 24 होर जेबे मुं स्पेना बे जाणा ता तुसा आगे होइया जाणा किबैकि मुम्बे आश सा कि टेसा यात्रा ना तुसा संघे मुलाकात केरणु, होर तुसा री संगती ना जेबे मेरा मन भौरला, ता तुसे किछ दूर आगे तेंइ मुम्बे छोडीया एजा । 25 पर ऐबे ता पवित्र लोका री सेवा केरने री तेंइये यरुश्लेमा बे चोलू सा । 26 किबैकी कि मकिदुनिया होर अखया रे लोका बे ऐ शोभला लागा, कि यरुश्लेमा रे पवित्र लोका रे कंगाला री तेंइये किछ दान देले । 27 सोभला ता लागा, पर ते तिन्हा रे कर्जदार भी सी, किबैकि अगर अन्यजाति तिन्हा री आत्मिक गल्ला ना शामल हुए, ता तिन्हा रा भी फर्ज सा कि शारीरिक गल्ला ना तिन्हे री सेवा केरा 28 तैबे मुं ये कौम पूरा केरिया होर तिन्हा बै ये चन्दा देईया तुसा आगे होईया इसपानिया बै जाणा । 29 होर मुम्बे पता सा, कि जेबे मुं तुसा आगे ऐणा, ता मसीह री पूरी आशीषा संघे ऐणा । 30 होर ओ भाइयो, हाँऊ तुसा बे यीशु मसीह रा जूण आसा रा प्रभु सा, होर पवित्र आत्मा री याद दिलाईया, तुसा ना प्रार्थना केरा सा, कि मेरे तेंइये

प्रार्थना करने न लागी रोहा । 31 कि हाँऊ यहूदिया रे अविश्वासी लोका ना बचिया रोहणु, होर मेरी ऐ सेवा जूण यरुश्लेमा री तेंइये सा, पवित्र लोका बे शोभली लागी लोड़ी । 32 होर हाँऊ परमेश्वरा री इच्छा सेंघे तुसा आगे एजिया, तुसा सेंघे आराम पानु । 33 शान्ति रा परमेश्वर तुसा सेंघे रोहू लोड़ी, आमीन ।

### व्यक्तिगत अभिवादन

16 हाँऊ तुसा ना फिबे री, जूण आसा री बहण होर किखिया री कलीसिया री सेवा केरनु आई सा, प्रार्थना केरा सा । 2 कि तुसे जेण्डा पवित्र लोका वे लोड़ी, तेसा बे प्रभु ना ग्रहण केरा, होर जूणीगल्ला ना भी तेसा बे तुसा सेंघे कौम होला, ता तेसारी मजद केरा, किबैकि सो बोहु लोका री होर बल्कि मेरी भी भला केरनु आई हुई सा । 3 प्रिसका होर अक्विला बे जूण मेरे सेंघी सी, नमस्कार । 4 तिन्हे मेरे प्राण बचाणै री तेंइये आपु आगे हुए ती, होर हाँऊ केहला नी बल्कि अन्यजाति री सारी कलीसिया भी तिन्हा रा धन्याबाद केरा सा । 5 होर तेसा कलीसिया बे भी नमस्कार जूण तिन्हा रे घौरा ना सा । मेरे प्यारे इपेनितुस बे जूण मसीह ना आसिया रा पेहला बशाह केरणु आ सा नमस्कार । 6 मरियमा बे जूणी तेसे तुसा री तेंइये बोहु मेहनत केरी, नमस्कार । 7 अम्पलियातुस होर युनियासा बे जूण मेरे रिश्तेदार सी, होर मुं सेंघे जेला बे नौठे ती, होर प्रेरिता ना बड़े नाँ आए ती, होर मुं ना पेहले मसीह ना ती, नमस्कार । 8 अम्प्लियातुसा बे, जूण प्रभु ना मेरा प्यारा सा, नमस्कार । 9 ए उरवानुसा बे, जूण मसीह ना आसा रा साथी सा, होर मेरे प्यारे इस्तखुसा बे नमस्कार । 10 बे जूण मसीह ना शोभला निकता, नमस्कार । अरिस्तुबुलुस रे टबरा बे नमस्कार । 11 मेरे रिश्तेदार हिरोदियोना बे नमस्कार । नरकिस्सुसा रे टबरा बे जूण लोका प्रभु ना सी तिन्हा बे नमस्कार । 12 नुफेना होर नुफेसा बे जूण प्रभु ना मेहनत केरा सा तेसा बे नमस्कार । प्रिया पिरसिसा बे जूणीएँ प्रभु ना बोहु मेहनत केरी सा नमस्कार । 13 रुफुस बे जूण प्रभु रा छाँटूआदा सा, होर तेइरी आम्मा बे जूण मेरी भी आम्मा सा, दुई बे नमस्कार । 14 अंसुकृतुस होर फिलगोन होर हिर्मेस होर पत्रुबास होर तिन्हा सेंघले भाई लोका बे नमस्कार । 15 फिलुलुगुस होर युलिया होर निर्युस होर तेइरी बोबा, होर उलुम्पास होर तेई सेंघले सेभी

पवित्र लोका बे नमस्कार । 16 आपु ना पवित्र चुम्मा देइया नमस्कार केरा । तुसा बे मसीह री सारी कलीसिया री तरफा ना नमस्कार ।

### आखरी सलाह

17 ऐबे हे भाइयो हाँऊ तुसा ना प्रार्थना केरा सा, कि जूण शिक्षा तुसा बे मिली सा एता ना अलाबा अगर कोई लोका, फुट पाणे, होर ठोकर खाणै ना कारण होआ सा, तिन्हा बे हेरदे रोहा होर तिन्हा लोका ना दूर रोहा । 18 किबैकि एण्डे लोका प्रभु मसीह री नेई, बल्कि आपणै पेटा री सेवा केरा सी, होर मीठी-मीठी गल्ला केरिया सीधे साधे होर भोले माँणहु बे भड़का सी । 19 तुसा री आज्ञा मनणु आई गल्ला री चर्चा सरे ना फैली सा, तेबेता हाँऊ तुसा रे बारे ना खुशी मना सा, पर हाँऊ ऐ चाहा सा, कि तुसे भलाई री तेंइये बुद्धिमान, पर बुराई री तेंइये भोले बणीया रोहा, 20 शान्ति रे परमेश्वरा बड़ी छेके शैतान तुसा रे पैरा हेठे केरना, आसा रे प्रभु यीशु रा अनुग्रह तुसा पांधे हुआ लोड़ी । 21 तीमुथियुस मेरे साथी रा, होर लुकियुस होर यासोन होर सोसिपत्रुस मेरे रिश्तेदारा रा तुसा बे नमस्कार । 22 हाँऊ जूण चिड्डी लिखणु आए तिरतियुसा रा प्रभु ना उसा बे नमस्कार । 23 गयुसा रा जूण मेरा होर कलीसिया री हेर-शुण केरा सा तेइरा तुसा बे नमस्कार, इरास्तुस जूण शहरा रा भंडारी सा, होर भाई क्वारतुसा रा, तुसा बे नमस्कार । 24 आसा रे प्रभु यीशु रा अनुग्रह तुसा पांधे हुआ लोड़ी ।

### परमेश्वरा री पूजा

25 ऐबे ता तुसा बे मेरे सुसमाचार मतलब यीशु मसीह रे प्रचार रे बारे ना मजबूत केरी सका सा, तेई भेदा रे मताबक जूण शुरू ना बंद ती । 26 पर ऐबे खुलिया हमेशा रोहणु आए परमेश्वरा री आज्ञा ना भविष्यद्वक्ता री क्ताबा री बजह ना सेभी जाति रे लोका बे दसु, कि ते बशाह केरिया आज्ञा मनणु आए बणले । 27 तेई नौखे बुद्धिमान परमेश्वरा री यीशु मसीह री बजह ना हमेशा महिमा हॉंदी रोहे । आमीन ।

# 1 कुरिन्थियों

## परिचय

पौलुसे कुरिन्थुस नगरा न एक कलीसिया बीणाई ती। तेथा न मसीह जीवन होर बिश्वासा रै बारे न कई मुश्कलात पैदा हुई। तिन्हा मुश्कलाता बै खत्म करने री तैइये कुन्थी रै नाँ पौलुसा री पैहली चिठी लिखी ती। तेई बौक्त कुन्थी यूनान रा एक अंतराष्ट्रीय नगर ती। जो रोमी साम्राज्य रै आखया राज्य री राजधानी ती। सौ आपणै व्यापार होर शोभली संस्कृति होर कई किस्मे रै धर्मा री तैइये मशहूर ती। पर सौ आपणी अनेकता री तैइये बदनाम ती। चेले रा खास चिंता रा बिषय ती कलीसिया न बंटवारा, गलत कौम, ब्याह होर बिचारा रै बारे न सवाल, कलीसिया रा प्रबंध, पवित्र आत्मा रेर दान, होर मुंये दे न जिन्दा होणा। पौलुस आपणी गहरी नजरा न ये दसा सा कि सुसमाचारा न रै दुआरा इन्हा प्रश्ना समाधान केँडै होई सका सा। अध्याय 13 में पौलुस दसा सा कि परमेशवरा रै लोका बै मिले वरदाना मौँझे सेभी न बडा वरदान प्यार सा। ये कताबा रा सेभी न मशहूर अध्याय सा।

रूपरेखा

परिचय 1:1-9

कलीसिया न दलबंदी 1:10-4-21

अच्छाई होर परिवारा रा जीवन 5:1- 7:40

मसीही होर मूर्तिपूजक 8:1-11:1

कलीसिया रा जीवन होर आराधना 11:2-14;40

मसीही यीशु होर विश्वासी रा जिन्दे होणा 15:1-58

यहूदिया रै मसीही री तैइये दान 16:1-4

व्यक्तिगत बिषय होर उपसंहार 16 :5-24

## अभिवादन

1 आसरै भाई सोस्थिनेसा सेंघे पौलुसे री धिरै न, जो परमेश्वरै आपणी इच्छै रै मुताबिक यीशु मसीह रा प्रेरित बणनै री तैइये चुनू सा, 2 कुरिन्थुसे न स्थित परमेश्वरै री कलीसियै रै नाँ न; जे यीशु मसीह न पवित्र केरुए, जो पवित्र बणनै री तैइये तिन्हा सेंघे चुनै सी। जो हर जेगा न आसरै होर तिन्हरै प्रभु यीशु मसीह रा नाँ पुकारदै रोहा सी।

## मसीह न आशीष

3 आसरै परमपितै री धिरै न होर आसरै प्रभु यीशु री धिरै न, तुसा सैभी बै अनुग्रह होर शाँति मिली लोड़ी। 4 तुसाबै प्रभु यीशु न जे अनुग्रह मिलू सा, तेथे री तैइये हाँऊ तुसरी तरफा न परमेश्वरा रा सदा धन्यवाद केरा सा। 5 किबैकि तुसै मसीह यीशु न हर गैला न, सारै वचन होर ज्ञाना न धनी केरुए सी। 6 ताकि मसीह री गवाही तुसा न पक्की निकूली। 7 औखै तक कि तुसा न कौसी वरदाने री घटी नी आँथी होर तुसै आसरै प्रभु यीशु रै प्रगट होणै री गैला केरदे रोहा। 8 तेई तुसै अन्ता तक दृढ़ केरनै ताकि तुसै आसरै प्रभु यीशु मसीह रै रोजा न निर्दोष ठहरलै। 9 परमेश्वर सच्चा सा, जुणियै तुसै आपणै बेटै आसरै प्रभु यीशु मसीह री संगती न शाधूदा सा।

## मण्डली न फूट

10 हे भाइयो, हाँऊ आपणै प्रभु यीशु मसीह रै नाँ न तुसा हागै विनती केरा सा कि तुसै सैभिये एकै गल बोला होर तुसा न फूट नी लोड़ी, बल्कि एक मन होइया मिलिया रोहा। 11 किबैकि हे मेरै भाइयो, खलोए रै घराने रै लोकै मुँभे तुसरै बारे न दसू सा कि तुसा न झगडै होँदै लागै सी। 12 मेरै बोलणै रा मतलब ऐ सा कि, तुसा न कोई ता आपू बै पौलुसा रा होर कोई अपुल्लोसा होर कोई मसीह रा बोला सा। 13 कि मसीह बाँडुआ सा? कि पौलु तुसरी

तैइये कूसा पँधे चढ़ाउआ? या तुसाबै पौलुसे रै नाँ रा बपतिस्मा मिलू?

14 हाँऊ परमेश्वरा रा धन्यवाद केरा सा कि, क्रिस्पुस होर गयुस छौड़िया में तुसा मुँझे कौसी बै बपतिस्मा नी धिना। 15 कोइछे ऐण्डा नी लोड़ी हुआ कि कोई बोलला कि तुसाबै मेरै नाँ रा बपतिस्मा मिलू। 16 होर हाँ, मैं स्तिफनुसे रै घराने बै बी बपतिस्मा धिना, इन्हा छौड़िया हाँऊ नी जाँणदा कि मैं होर कौसी बै बपतिस्मा धिना। 17 किबैकि मसीहै हाँऊ बपतिस्मा देणै री तैइये नी, बल्कि सुसमाचार शुणाणै री तैइये भेजू सा होर ऐ बी शब्दै रै ज्ञाने मुताबिक नी, कि मसीह रा कूस ब्यर्थ ठहरला।

## मसीह परमेश्वरा रा ज्ञान होर शक्ति सा

18 किबैकि कूसे री कथा नाश होणू आलै री तैइये मूर्खता 19 किबैकि पवित्रशास्त्रा न लिखू सा, मुँ ज्ञानवाना रा ज्ञान नष्ट केरना होर समझदारै री समझ तुच्छ केरनी। 20 कौखै रोहू ज्ञानी? कौखै रोहू शास्त्री? कौखै रोहू ई सँसारा रा फकडवाद? कि परमेश्वरै सँसारा रा ज्ञान मूर्खता नी ठहराई? 21 किबैकि जैबै परमेश्वरै रै ज्ञाने रै मुताबिक सँसार आपणी बुद्धि सेंघे परमेश्वरा बै नी पछियाणी सकू ता, परमेश्वरा बै ऐ शोभला लागा कि, ई प्रचारै री मूर्खता रै द्वारा भरोसा केरनू आलै बै मुक्ति देला। 22 यहूदी ता चिन्ह मुँगा सी होर यूनानी ज्ञाना बै तोपदै रोहा सी। 23 पर आसै ता कूसा पँधे चढ़ाएँ मसीह रा प्रचार केरा सी, जो यहूदी री तैइये ठोकरै री वजहा होर गैर यहूदी री तैइये मूर्खता सा। 24 पर जुणा भरोसा केरा सी, तिन्हरी तैइये मसीह परमेश्वरै री सामर्थ होर परमेश्वरा रा ज्ञान सा। 25 किबैकि परमेश्वरै री मूर्खता माँणहु रै ज्ञाना न ज़ादा ज्ञानवान सा होर परमेश्वरै री निर्बलता माणहु रै बला न ज़ादा बलवान सा। 26 हे भाइयो, आपणै शाधिणै रै बारे न ता सोचा कि न शरीरै रै मुताबिक बोहू ज्ञानवान होर न बोहू सामर्थी होर न बोहू कुलीन शाधिणै, 27 पर, परमेश्वरै सँसारै रै मूर्ख चुनै कि ज्ञानवाना बै शर्मिदा केरलै, 28 होर परमेश्वरै सँसारै रै नीच, तुच्छ होर जे आँथी बी नी ते चुनै ताकि जो सी, तिन्हा बै ब्यर्थ ठहरालै। 29 ताकि कोई बी प्राणी परमेश्वरा सामने घमण्ड

नी केरला । 30 पर, तेही री धिरें न तुसै मसीह यीशु न सी, जो परमेश्वर धिरें न आसरी तैइयै धर्म, पवित्रता होर छुटकारै री तैइयै ज्ञान ठहरु, 31 ताकि जैण्डा पवित्रशास्त्रा न लिखू सा, तैण्डाए होला, “जुण घमण्ड केरला सौ प्रभु न घमण्ड केरला ।”

### कुसा न मुण्डे मसीह रै बारे न समाचार

2 होर ऐ भाइयो, जैबै हाँऊ परमेश्वर रा भेत शुणादै तूसा हागे आऊ, ता वचन या ज्ञाना बै शुणादै नैई आऊ 2 किबैकि मैं ऐ पक्का केरुदा ती, कि तूसरै मौँझे यीशु मसीह, पर कुसा पांधे चढाऊँदै मसीह बै छोडिया होर कोई गल्ला बै नैई जाणनु । 3 होर हाँऊ कमजोर होर डौरा संघे, होर बड़े कौमदै हूरे तूसा संघे रौह । 4 होर मेरे वचन, होर मेरे प्रचारान न ज्ञाने री लालच देनु आळी गल्ला नैई अथी; पर आत्मा होर शक्ति रा प्रमाण ती 5 तैबै कि तूसरा बशाह माणहू रै ज्ञाना पांधे नैई, पर परमेश्वर री शक्ति पांधे हुआ लोड़ी ।

### परमेश्वर रा ज्ञान

6 फिरि भी जो लोका आत्मा न मजबूत सी तिन्हा बै आसै ज्ञान शुणा सी :पर ऐई दुनिया रा होर दुनिया रै नाश हाणु आळै राजे रा ज्ञान नैई । 7 पर आसै परमेश्वर रा सौ गुप्त ज्ञान, गुप्त रीति न दसा सी, जो परमेश्वर दुनिया न पहलै आसरी महिमा री तकर ठहराहुन्दा सा । 8 जो ऐयी दुनिया रै राजे मौँझे कोई नैई जाणु, किबैकि अगर जाणदै, ता महिमामय प्रभु बै कुसा पांधे नैई चढादै । 9 पर जैडा लिखुंदा सा, कि जो औँछीए नैई हेरु, होर कोने नैई शुणु, होर जो गल्ला माणहू रै मन्ना न नैई अथी, जो परमेश्वर आपणै प्यार डाहणु आळै री तकर तियार केरी सा । 10 पर परमेश्वर तिन्हा बै आपणै आत्मा रै दवारा आसा पांधे जाहिर केरु; किबैकि आत्मा सेभ गल्ला, मतलब परमेश्वर री गहरी गल्ला भी परखा सा । 11 माणहू मौँझे कृण कोई माणहू री गल्ला बुझा सा, केवल माणहू री आत्मा जो तेई न सा? तैडे ही परमेश्वर री गल्ला भी कोई नैई जाणदा, केवल परमेश्वर री आत्मा । 12 पर आसै दुनिया री आत्मा नैई, पर सौ आत्मा पाई सा, जो परमेश्वर री तरफा न सा, कि आसै तिन्हा गल्ला बै बुझे, जूण परमेश्वर आसा बै धिन्नी सा । 13 जुणी बै आसै माणहू रै ज्ञाना री सिखाउन्दी गल्ला न नैई, पर आत्मा री सिखाउन्दी गल्ला न, आत्मिक गल्ला आत्मिक गल्ला संघे मिलाई मिलाईया शणा सी । 14 पर संसारिक माणहू परमेश्वर री आत्मा री गल्ला नैई आपनांदा, किबैकि सौ तेई री नजरान न मूर्ख री गल्ला सा, होर न सौ तिन्हा बै जाणी सका सा किबैकि तिन्हा री परख आत्मिक रीति न होआ सा । 15 आत्मिक माणहू सेभ किछ परखा सा, पर तेई बै कोई परखी नैई सकदा । 16 किबैकि प्रभु रा मन कुणीए जाणु सा, कि तेईबै सिखाए? पर आसा न मसीह रा मन सा

### मण्डली न विभाजन

3 हे भाईयो, हाँऊ तूसा संघे एंडी तरह गल्ला नेइ केरी सकदा, जैडे आत्मिक लोका संघे; पर जैडे संसारिक लोका संघे, होर तिन्हा संघे जो मसीह न बचे सी 2 मैं तूसा बै दूध पिआऊ, नाज नैई खियाऊ; किबैकि तूसै तेई बै खाई नैई सकदै ती; पर ऐबै तकर भी खाई नैई खाई सका सी । 3 किबैकि ऐबै तकर तूसे संसारिक सी, तैबै कि तुसा न जेबै जलस होर लडाई सा, कि तुसै सांसारिक नैई? होर माणहू री रीति न नैई चलदै? 4 . किबैकि जैबै एक बोला सा, हाँऊ पौलुसा रा सा, “ होर दूजा, “ हाँऊ अपुल्लोस रा सा, “ तैबै कि तूसै माणहू नैई? \* 5 अपुल्लोस की सा? होर पौलुस की सा? केवल नौकर, जूणीरे जरिये तूसे बशाह केरु, जैडा सेभी बे प्रभु ऐ धिन्ना सा । 6 मैं लाऊ, अपुल्लोसे पाणी धिन्ना, पर परमेश्वर बढाऊ । 7 तेबे न ता लाणु आला किछ सा, होर न पाणी देणु आला, पर परमेश्वर जो बढाणु आला सा । 8 लाणु आला होर, पाणी देणु आला दूरे एके सी; पर सेभ माहणु आपणी मेहनता रे मुताबिक मजदूरी पा सा । 9 किबेकी आसे परमेश्वर रे सेंधी सी; तूसे परमेश्वर रे छेत होर परमेश्वर री रचना सी । 10 परमेश्वर रे तेई अनुग्रह रे द्वारा, जो मुन्बे धिन्नु सा, मैं बुद्धिमान मिस्त्री साँई नीव रखी, होर दूजा तेई पंधे रद्दा डाह सा; पर सेभ माहणु होशियार रौहा, कि सौ तेई पेन्ध केंडा रद्दा डाह सा । 11 . किबैकि तेई नीव बै छोडिया जो पौड़ी सा, होर यीशु मसीह सा कोई दूजा नीव

नैई पाई सकदा । 12 . अगर कोई ऐई नीव पांधे सुन्ना या चांदी या कीमती पात्थर या लाकड़ या घाह रा रद्दा रखा सा । 13 ता सेभी रा कौम सामणै एणा; किबैकि सौ धियाडा तेई बै दसला, तैबै कि औँघी संघे जाहिर होणा, होर सौ औँघ हर एकी रा कौम परेखली कि सौ कैन्डा सा । 14 जूणी रा कौम तेई पांधे बैणुदा पैका होला, सौ मजदूरी पाला । 15 अगर कोई रा कौम फुकी ला, ता तेई बै नुकसान होणा, पर सौ आपू बचला मगर फुकदै – फुकदै । 16 कि तूसै नैई जाणदै कि तूसै परमेश्वर रा मंदिर \* हो, होर परमेश्वर री आत्मा तूसा न रौहा सा? 17 अगर कोई परमेश्वर रै मंदिरा बै नाश केरला ता परमेश्वर तेई बै नाश केरला; किबैकि परमेश्वर रा मंदिर पवित्र सा, होर सौ तूसै सी । 18 कोई आपणै आपा बै धोरखा न देआ : अगर तुसा मौँझे कोई ऐई दुनिया न आपणै आपा बै ज्ञानी बुझे, ता कि मूर्ख बैणै कि ज्ञानी हो । 19 किबैकि ऐई दुनिया रा ज्ञान परमेश्वर रै नेइ मूर्खता है, जैडा लिखुन्दा सा, “ सौ ज्ञानी बै तिन्हरी चलाकी संघे फसा सा, “ \* 20 होर फिरि, “प्रभु ज्ञानी रै बिचारा बै जाणा सा, कि सौ बेकार सी ।” 21 तैबै कि माणहू पांधे कोई घमण्ड मता केरदै, किबैकि सेभ किछ तूसरा सा । 22 . कि पौलुस, कि अपुल्लोस, कि कैफा, कि दुनिया, कि जीवन, कि मरण, कि एणुआळा, कि होणुआळा, सेभ किछ तूसरा सा, 23 होर तूसै मसीह रै सी, होर मसीह परमेश्वर रा सा ॥

### मसीह रे चले

4 . माणहू आसा बै मसीह रै नौकर होर परमेश्वर रै मन्ने री गल्ला बुझे । 2 भिरी औँखे भण्डारी न भी ऐ गल हेरिया सा, कि सौ बशाह रै काबिल हो । 3 पर मेरी नजरान न ऐ बड़ी औँछी गल सा, कि तूसै या माणहू रा कोई न्याय केरणु आळा मुन्बै परेखे, किबैकी हाँऊ आपूये आपणै आपा बै नैई परेखी सकदा । 4 किबैकि मेरा मन मुन्बै कोई भी गल्ला न दोषी नैई ठहरांदा, पर ऐता न हाँऊ दोषी नैई ठहरदा, किबैकि मेरा परेखणु आळा प्रभु सा । 5 तैबै जैबै तकर प्रभु न आऊ, बौक्ता न पहलै कोई भी कौमा रा न्याय मता केरदै : सौ ऐ न्याहरें न गोजूहोन्दी गल्ला प्याशें न रिहाला, होर मन्ना रै गल्ला बै जाहिर केरला, तैबै परमेश्वर रै तरफा न हर ऐकि री तारीफ होली । 6 ऐ भाईयो, मैं इना गल्ला पांधे तुसरी. तैईए आपणी होर अपुल्लोस री चर्चा, उदाहरण देईया केरी सा, तैबै कि तूसै आसरे जरिये ऐ सीखा कि लिखुहोंदै न आगे नैई जाणा, होर एकी रै तरफा न होर दूजै रै वरोधा न घमण्ड नैई केरणा । 7 किबैकि तौ न होर दूजे न कृण भेद केरा सा? होर तौ हागे कि सा जो तें (दूजे न ) नैई पाऊ? होर जैबै तकर तें (दूजे न) पाऊ सा, ता एंडा घमण्ड किबै केरा सा कि मना किच्छ नैई मिलू? 8 तूसै ता रोजै सी, तूसै अमीर सी, तूसै आसरे बगैर राज केरु; पर ऐ शोभला होदा कि तूसै राज्य केरदै कि आसै भी तूसा संघे राज केरले । 9 . मेरी समझा न परमेश्वर आसा चले बै सेभी न बाद तिन्हा लोका रै बराबर ठहराऊ सा जिन्हें मौँऊती री आज्ञा हुई सा; किबैकि असे दुनिया होर स्वर्गदूत माणहू री तैईए एक तमाशा बैणे । 10 आसै मसीह री तकर मूर्ख सा, पर तूसै मसीह न बुद्धिमान सी; आसै कमजोर सी, पर तूसै बुद्धिमान सी, । तूसै आदर पा सी, पर आसै निरादर होआ सी । 11 आसै ऐई बौक्ता तकर भूखे शोखे होर नंगे ती, होर मार खा ती, होर औरू पौरु घुमा ती; 12 होर आपणै हौथा लाईया कौम केरिया मेहनत केरा सी \* लोका आसा बै बुरा बोला सी, आसै आशीष देआ सी; ते तंग केरा सी, आसै सहन केरा सी । 13 . सौ बदनाम केरा सी, आसै बिनती केरा सी :आसै औँज तक दुनिया रा कूड़ा होर सेभ चीजा री घरोड़ा रै बराबर ठहरै ।

### चेताऊनी

14 हाँऊ तूसा बै शर्मिदा केरने री तकर ये गल्ला नैई लिखदा, पर आपणै प्यारे बचे जणीया तूसा बै दसा सा । 15 . किबैकि अगर मसीह न तुसरै सीखाणु आळै दस हजार भी होले, तैबै भी तुसरै बापू बौहू नैई अथी; तैबै कि हाँऊ मसीह यीशु न सुसमाचार रै दवारा हाँऊ तूसरा बापू सा । 16 तैबै हाँऊ तुसा संघे प्रार्थना केरा सा कि मुं साँई चोला । 17 तैबै हाँऊ तीमुथियुस बै जो प्रभु न मेरा प्यारा होर बिश्वासा रै काविल शौहरु सा, तूसा हागे भेजू सा । 18 कतरे ता एन्डै नराज हुए, मना मुं तुसा आगे ऐणा ही नैई । 19 प्रभु चाहला ता मुं तूसा आगे छेके ऐणा, होर तिन्हा नराज हुएन्दे गल्ला बै ने, होर इ

20 किबैकी परमेश्वर रा राज्य गल्ला न नेई, पर समर्था न सा। 21 तुसे की चाहा सी कि हाँऊ शौठे लेईया तुसा आगे एनु या प्यार या नप्रता री आत्मा संघे?

### मण्डली न कुकर्म

5 औखे तकर शुणणै न आऊ सा, कि तुसा मौन्झे व्यभिचार होआ सा, मगर एण्डा जो अविशावासी मौन्झे भी नि होन्दा, कि एक माहणु आपणे बापू री लाड़ी बे डाह सा। 2 होर तुसे दुःख ता नेई केरदे, जूनीन एण्डा केरणु आला तूसा मौन्झे न खोले. पर घमण्ड केरा सी। 3 हाँऊ ता शरीरा री रीती न दूर ती, पर आत्मा री रीती न तूसा संघे होईया, मना तुसा संघे होईया एण्डे कौम केरणु आलै रे बारे न ये हुक्म धिन्ना सा। 4 कि जैबे तूसै, होर मेरी आत्मा, आसरे प्रभु यीशु री समर्था संघे कट्टे होला, ता एण्डा माहणु, आसरे प्रभु यीशु रे नाँ पेंधे। 5 शरीरा रे नाशा री तेंईये शैताना बे देणा, ताकि तेई री आत्मा प्रभु यीशु मसीह रे ध्याडे न उद्यार पाला। 6 तुसरा घमण्ड केरना ठीक नेई; कि तुसे नेइ जाणदैं, कि थोड़ा जेंई मलेड़ा पूरे आटे बै खट्टा केरा सा। 7 पराणै खमीरा बे खोलिया, आपणै आपा बे शुद्ध केरा: कि नऊँआ गुन्दुदा आटा बणा; ताकि तूसे अखमीरी होले, किबैकी आसरा भी फसह जो मसीह सा, बलिदान हुआ 8 एजा आसा मेले न खुशी मनाणी, न ता पराणै खमीरा संघे, न बुराई होर दुष्टता रे खमीरा संघे, पर सीधाई होर सच्चाई री अखमीरी रोटी संघे। 9 में आपणी चिड्डी न तूसा बै लिखू सा, कि व्यभिचारि री संगती मता केरदे। 10 ये नेई, कि तुसे बिलकुल दुनिया रे व्यभिचारी, लालची, होर न्ह्यारा केरनु आळै, होर मूर्तिपूजा केरनु आलै री संगती मता केरदे; किबैकी ऐंढी दशा न तुसा बै दुनिया न निकलना पौड़ा सा। 11 मेरा बोलणै रा मतलब सा कि; अगर कोई भाई व्यभिचारी, लालची, मूर्तिपूजा केरनु आलै, गाली देनु आळै, शराब पिनु आळै, न्यारा केरनु आळै, होले ता तिन्हरी संगती मता केरदे; पर एंढे माहणु संघे बेशिया रोटी भी मता खांदे। 12 किबैकी मुम्बे बाहर आळै रा फैसला केरने न कि कौम? तूसै कि भीतर आळै रा फैसला नेई केरदे? 13 किबैकी बाहर आलै रा न्याय परमेश्वर केरा सा: तेबे तेई बुरे कौम केरनु आळै बे आपणै मौन्झा न खोला।

### मसीह न मुकदमेबाजी

6 कि तुस्सा मौंजै कौसी बै एंडी हिम्मत सा की जैबै एकी होरी न लड़ाई होली ता, फैसला केने री तक बुरै लौका आगै जालै, खरै माहू आगै नी जाल्ले? 2 कि तुस्से नी जाणदैं कि धर्मी लोका दुनिया रा फैसला केना? तैबे जैबे तुस्सा दुनिया रा न्याय केरना सा ता तुस्सा होच्छे न होच्छे लड़ाई रा फैसला केरने रै लाइक नी होणा? 3 कि तुस्से नी जाणदैं कि आसा स्वर्ग दूता रा फैसला केरना? तैबे कि दुनिया री गल्ला री गल्ला रा फैसला नी केरना? 4 अगर तुस्सा दुनिया री गल्ला रा फैसला केरना होला, तैबे कि ते बशाणै जो कलीसिया न किच्छे नी समझी जांदे? 5 हाऊ तुस्सा बै शर्मिदा केरने री तक ऐन्डा बोला सा। कि सच्चे तुसा मौन्जे न एन्डा बुद्धिमान नी मिलणा, जो आपणै भाई रा फैसला केरी सकला। 6 तुस्सा न भाई-भाई मौन्जे न मुकदमा होआ सा, होर सौभी अविश्वासी लोका रै सामने। 7 पर सच्चे तुसा न बडा दोष ता ऐ सा कि आपू न मुकदमा केरा सी। जुल्म किबे नी सौहन्दे। आपणा घाटा किबे नी सौहन्दे। 8 पर तुसे ता आपु गलत फैसला केरा सी होर नुकसान केरा सी, होर सो भी आपणै भाई रा। 9 कि तुस्से नी जाणदैं कि गलत फैसला केनू आले लोका परमेश्वर रै राज्या रै लुआद नी होणा? धोखा मता खाए; ना व्यभिचारी, ना मूर्तिपूजा केरनु आले, ना परस्त्रिगामी, ना लुचै, पुरुषगामी, 10 होर ना चोर, ना लालची, ना पिणुआला, ना गाली देणू आले, ना बुरा केनू आले परमेश्वर रै राज्ये रै लुआद नी होणा। 11 सारी चिजा मेरी तेइए शोभली ता सी, पर सेभ चिजा खरे री तक नी आथी, सारी चिजा मेरी तक शोभली सी, पर मुं कौसी गल्ला रा गुलाम नी बणना।

### शरीर परमेश्वर री महिमा री तेंईये सा

12 सारी चिजा मेरी तेइए शोभली ता सी, पर सेभ चिजा खरे री तक नी आथी, सारी चिजा मेरी तक शोभली सी, पर मुं कौसी गल्ला रा गुलाम नी बणना। 13 खाणै री तक पेट, होर पेट खाणै री तेइयें सा, पर परमेश्वर ऐ भी

होर सोभी नाश केने। पर शरीर व्यभिचारे री तेइए नी, पर प्रभु री तेइयें सा, होर प्रभु शरीर री तेइयें सा। 14 परमेश्वर आपणी शक्ति संघे यीशु मसीह जिन्दा केरु, होर आसै भी जिन्दा केरने 15 कि तुस्से नी जाणदैं कि तुस्सा रा शरीर मसीह रा अंग सा? ता कि मुं मसीह रा अंग व्यभिचारा रा अंग बणाणा? कदी भी नेई। 16 कि तूसै नी जाणदैं, जो कोई वेश्या री संगत केरा सा, सौ तेसा संघे एक शरीर होआ सा? किबैकी लिखु सा: "तिन्हा दुई एक शरीर होणा।" 17 होर जो यीशु मसीह री संगता न रोआ सी, ता सौ तेई संघे एक आत्मा होआ सा। 18 व्यभिचारा न बचिया रोआ; जेतरे होर पाप माहू केरा सा ते शरीरा न बाहर सी, पर व्यभिचार केनू आला आपणै शरीरा रै खिलाफ पाप केरा सा। 19 कि तुस्से नी जाणदैं, कि तुसारा शरीर पवित्र आत्मा रा मन्दिर सा, जो तुस्सा न बसु होंदा सा होर तुस्सा बै परमेश्वर री तरफा न मिलू सा; होर तुसरा शरीर आपणा नी आथी? 20 किबैकी किमत देइया लेई रै सी, तैबे तुसे आपणै शरीरा संघे परमेश्वर री महिमा केरा।

### ब्याह रै बारे न सवाल

7 तिन्हां गल्ला रै बारे न जो तुस्से लिखी सी, सो शोभला सा कि मर्द बेटडी बै नी छुन्गला। 2 पर व्यभिचारे रै डौरा न हर एक मर्द री लाड़ी, होर हर एक बेटडी रा लाड़ा हुआ लोड़ी 3 लाड़ा आपणी लाड़ी रा हक्क पूरा केरला; होर तेंडे लाड़ी भी आपणै लाड़ै रा हक्क पूरा केरली। 4 लाड़ी रा आपणै शरीरा पेंदे कोई ह क नी आथी पर तेसे रै लाड़ै रा हक्क सा; होर तेंडाए लाड़ै रा भी आपणै शरीरा पेंदे कोई हक्क नी आथी, पर लाड़ी रा सा। 5 एकी होरी न आंगी मता रौहे, पर किछ वोकता री तक आपू न सलाह केरलै कि प्रार्थना री तक बौक्त मिलला, होर फिरि कठे रौई त, ऐन्डा नी लोड़ी हुआ कि तुसरे नी सौहणै री वजह न शैतान तुसबे परखला। 6 पर हाँऊ जो ऐ बोला सा सो अर्जा सा ना कि हुक्म। 7 हाँऊ ऐ चाहा सा कि जेंडा हाउ सा तैन्डै सारे माहू होले; पर हर एकी बै परमेश्वर री ओरा न जरूरी-जरूरी बरदान मिलै सी; कुणी बै कुणी ढंगा रा होर कुणी बै कुणी ढंगा रा। 8 पर हाँऊ बिहा नी केरु होंदी होर बिधवा बेटडी रै बारे न बोला सा तिन्हा री तक ऐन्डा रौहणा ठीक सा, जैन्डा हाउ सा 9 अगर तुस्से सयम नी केरी सकदे ता विया केरा, किबैकी बिया केरना गलत कौम केरने न खरा सा। 10 जुणी रा बिया हुई रा सा, तिन्हा बै हाँऊ नी पर प्रभु आज्ञा देआ सा कि लाड़ी आपणै लाड़ै नअलग नी होली। 11 होर अगर अलग भी होली ता, बिना बियाह केरी या रौहले या आपणै लाड़ै संघे होरी घेरे मिलिया रौही होर ना लाड़ा आपणी लाड़ी बै छोड़ला। 12 होरी बै प्रभू नी, पर हाउ बोला सा, अगर कोई भाई री लाड़ी भशाह नी डाहन्दी होली होर तेई संघे रौहणै न खुश सा ता आपणा लाड़ा हेरी छोड़दे। 13 होर जूणी बेटडी रा लाड़ा भशाह नी डाहन्दा होला ता, सो आपणै लाड़ै नी छोड़ली। 14 किबैकी ऐन्डा लाड़ा जो भशाह नी रखदा, सो बेटडी री बजाह न पवित्र बणु, होर ऐन्डी लाड़ी जो भशा नी रखदी, लाड़े री बजाह न पवित्र बणणा सा; नी ता तुस्सरै शुरु-शोरी आले पवित्र बणणे, पर ऐबे ता पवित्र सी। 15 पर जो मर्द बिश्वास नी रखदा, अगर सो आगी होला, ता आगी होणे देया, ऐसा दशा न कोई भाई या बहण बधना नी, पर परमेश्वर आसे मेल-मिलापा री तेईए शाधि रे सी। 16 किबैकी है बेटडी, तु कि जांणा सा, कि तु आपणे लाडे उद्धार केरी सका सा, हे मर्द, तु कि जांणा सा कि तु आपणी लाड़ी रा उद्धार केरी सका सा।

### परमेश्वर री इच्छा मुताबिक चैला

17 पर जैन्डा प्रभुए सेभी बे बोड़ु सा, होर परमेश्वर सभे शाधे सी; तेन्डा ही सो चलला होर हाउ सब क्लीसियाह न तेन्डा ही ठहरा सा। 18 जो खतना करु हुदा शाधू होला, सो खतना रहित नी बणला: पर जो खतनारहित शाधीरा रा होला, ता सो खतना नी कराला। 19 ना ता खतना किछ सा, हो ना खतनारहित किछ सा पर परमेश्वर रा हुक्म मनणा ही सब किछ सा। 20 हर माँहणु जुणी दशा न शाधु सा, तेथा न ही रोहला। 21 अगर तू दास होणे री दशा न शाधू सा ता तु फिकर मौत केरे; पर अगर तु आजाद होई सका सा, ता तेन्डाए कौम केर। 22 किबैकी जो दासे री दशा न शाधू सा, सो प्रभु री तरफा न आजाद केरु होंदा सा। होर तेंडै आजाद होणे री दशा न शाधू सा

सौ मसीह रा दास सा । 23 तुसे किमती देईया लेई रै सी, माहू रै दास मता बणे । 24 ओ भाइयो, जो कोई जुणी दशान शाधू सा, सौ तेसा दशान प्रभु संघे रौहला ।

### कुंवारी होर विधवा रै बारे न सवाल

25 कुआरी शोहरी रै बारे न प्रभु रा कोई हुक्म मुम्बे नी मिलु, पर बशा लाइक होणे री तक जेन्डी दया प्रभुए मुं पांटे केरी सा, तौइ री बझन हाउ तुसा बै शिक्षा देआ सा । 26 मेरी समझा न ऐ खरा सा, कि औज काल दुखे री बजह न, माहू जेंडा सा तेन्डाए रौहला । 27 अगर तेरी लाडी सा, ता तेसा न अलग होणे री कोशिश मती केरदा, होर अगर तेरी लाडी नी आथी, ता आपु बे लाडी मोत तौपे । 28 अगर तु वियाह बी केरला, ता पाप नी आथी, होर अगर कुवारी रा वियाह होला ता पाप नी आथी; पर एन्डे लोका बे शारीरिक दुःख होणा सा, होर हाउ बचणा चाहा सा । 29 हे भाइयो, हाउ तुस्सा बे ऐ बोला सा, कि बोक्त कम करु सा, तेबे लोडी की जुणी रै लाडी सा, ते एन्डे होल जेंडे कि तिन्नारे लाडी नी आथी । 30 होर रोणु आले एन्डे होले, मन्ना जेंडे रौंटे नी; होर खुशी मनाणु आले एन्डे खुश होले, कि जेंडे कि खुश होले, जेंडे कि होर मोल लेणु आळै ऐंटे हो, जेंडे तिन्हा आगै किछ नि आथी । 31 होर ऐई संसारा सेघे बर्ताब केरणु आले एन्डे होले, कि ऐई संसारे रै नी होले, किबेकी ऐई संसारे री रीति होर बर्ताब बदलदे रोहा सी । 32 ता हाउ चाहा सा, कि तुस्सा बे फिक्र नी होली: वियाह नी केरु हुन्दा मर्द प्रभु री गल्ला री फिक्री केरदा रोहा सा, कि प्रभु बे केंडी तरह खुश केरला । 33 पर वियाह केरु हुन्दा माहणु संसारे री गल्ला री फिक्र केरा सा, कि आपणी लाडी बे केंडी तरह खुश रखला 34 वियाह केरु हुन्दी होर कुआरी शोरी न फरक सा: कुआरी शोरी प्रभु री फिक्रान रोहा सा, कि सो आपणे शरीरा होर आत्मा न तिन्ना दुई न पवित्र होले, पर वियाह केरु हुन्दी संसारे री फिक्र केरा सा, कि आपणे लाडे बे कंडे तरह खुश रखली । 35 ऐ गल्ल हाउ तुस्सेरे खरे री तेईरे बोला सा, ना कि तुस्सा बे फसाणे री तेईरे, पर ऐथा री तक कि जेंडा शोभला सा, तेन्डा केरु लोडी, कि तुस्से एक मन्न होइया प्रभु री सेवा केरदे रोहले । 36 होर अगर ऐ समझला, कि आपणी तेसा कुआरी रा हक मारदा लागा सा, जुणी री जुआनी ढोलदी लागी सा, होर ऐ जरूरी सा कि, जेंडा चाहले, तेन्डा केरले, ऐथा न पाप नी आथी, सो तेस्सरा वियाह होणे देला । 37 जो मन्ना न पक्के रोहा सी, होर तेई बे जरूरत ना हो, पर आपणी मर्जी पूरी केरने रा हक रखा सा, होर आपणे मन्ना न पका सोची रा होला, कि सो आपणी कुआरी शोरी बे कुआरी ढाहला, सो खरा केरा सा । 38 जेबे सो आपणी कुआरी शोहरी रा वियाह केरा सा सो खरा केरा सा, होर जो नी केरदा सो होर भी खरा केरा सा । 39 जेबे तक कोई बेटडी रा लाडा जिन्दा सा, तेबे तक तेई सेघे जुडी हुन्दी सा, पर अगर तेस्सरा लाडा मौरला ता जुणी सेघे चाहली वियाह केरी सका सा, सिर्फ प्रभु रै लोका मौझे 40 पर झेंडी सा तेन्डी रौहली, ता मेरी सोचा न होर भी खरा सा; हाऊ समझा सा कि परमेश्वरे रा आत्मा मुं न भी सा ।

### मूर्ति बै चढाऊ हुन्दा भोज

8 ऐबे मूर्ति रे सामने चढाऊ हुन्दी चिजा रे बारे न आसे जाणा सी, कि आसा सेभी बे ज्ञान सा: ज्ञान घमण्ड पैदा केरा सा, पर प्रेमा संघे उन्नति होआ सा । 2 अगर कोई समझला, कि हाँऊ किछ जाणा सा, ता जेंडा जाणु लोडी ती तेन्डा ऐबे तक नी जाणदा । 3 कोई परमेश्वरा सेघे झुरी केरा सा, ता परमेश्वर तेई बे पंचाणा सा । 4 ता मूर्ति रे सामने चढाऊ हुन्दी चिजा बे खाणे रै बारे न तुस्से जाणा सी, कि मूर्त ऐई संसारा न किछ चीज नी आथी, होर ऐकी परमेश्वरा बे छोडिया होर कोई नी ओथी । 5 आसमाना मौझे होर धोरती पेंदे बोहु सारे ईश्वर सी, (जेंडा कि बोहु सारे ईश्वर होर प्रभु सी) । 6 पर आसरै नेड ता ऐके परमेश्वर सा: मतलब पिता जुणी तरफा न सब चिजा सी, होर आसे भी तेई रै सी । 7 पर सेभी बे ऐ ज्ञान नी आथी; पर केतरे लोका मूर्ति रे सामने किछ समझिया बली चढाऊ हुन्दी चीज समझिया खा सी होर किछ चीज समझिया खा सी, होर तिन्नेरी समझ कमजोर होणे री बजा न तिन्ना बे अशुद्ध केरा सा 8 खाणा-पिणा आसा बै परमेश्वरा हागे नी नेई

सकदा, अगर आसे नि खाले, ता आसरा किछ नुकसान नी होणा, होर खाले ता आसरा किछ फाईदा भी नी आथी । 9 पर सतर्क रोहा, कि इन्डा नी लोडी हुआ, कि तुस्सेरी आज्ञादी कमजोर माहणु री तेईरे कोई ठोकरा री बजाह नी लोडी हुई । 10 किबेकी कोई तुस्सा ज्ञानी माहणु बे मूर्ति रै मन्दिरा न रोटी खान्दा हेरला, होर सो कमजोर माहणु होला, ता तेई री बुद्धि न मुरते रै सामने बली केरु हुन्दी चिजा बे खाणे री हिम्मत नी होणी 11 ऐन्डी तरह तेरे ज्ञाना री बजा न सो कमजोर भाई जुणी तेईरे मसीह मौरु सा, तेई नाश होणा 12 ऐन्डी तरह तुस्से आपणे भाई रै विरुधा न पाप केरा सा, होर तेईरी कमजोर बुद्धि बे देणे री बजा न 13 ऐथा तरह अगर रोटी मेरे भाई बे ठोकर खिया सा, ता हाउ कोसी रीतिपे भी मांस नी खाणु, ऐन्डा नी लोडी हुआ कि हाउ आपणे भाई री तेईरे ठोकरा री बजा बणला ।

### चले रै अधिकार होर कर्तव्य

9 कि हाउ आजाद नी आथी? कि हाउ प्रेरित नी आथी? कि में यीशु बे जो आसा रा प्रभु सा, नी हेरु? कि तुस्से प्रभु न मेरे बणाऊ हुंदे नी आथी? 2 अगर हाउ होरी री तक प्रेरित नी, पर तुसरी तक ता सा; किबेकी तुसे प्रभु न मेरी प्रेरिताई री छाप सी । 3 जो मुम्बे परखा सी, तिन्हरी तक मेरा ऐ जबाब सा । 4 कि आसा बै खाणे पिणै रा हक नी आथी? 5 कि आसा बै ऐ हक नी आथी, कि कोई मसीह बेहणी संघे वियाह केरिया तेसरी तक फिरला, जेन्डा होर प्रेरित होर प्रभु रै भाई होर कैफा केरा सी? 6 कि मुम्बे होर बरनबासा बै हक नी कि कमाई केरना छोड़लै । 7 कोई कदी आपणा खर्चा केरिया सिपाई रा कौम केरा सा? कुण दाखे रा बगीचा लाईया तेथा रा फौल नी खाला? कुण सा जो भेड़े री पौहरा केरिया तिन्हा रा दूध नी पीन्दा? 8 कि हाउ ऐ गल्ला माहू री रीति न बोला सा? 9 कि धर्मशास्त्र न नी लिखु होंदा सा? किबेकी मुसे री धर्मशास्त्रा न लिखु होंदा सा, " कि खौल फेरदी घेरे बोल्दा रा मुंह हेरी बोन्दा : कि परमेश्वर बोल्दे री फिकर केरा सा? कि जरूरी केरिया आसरी फिकर केरा सा? 10 हाँ, आसरी तके लिखु सा, किबेकी ठीक सा, कि बाहू आला आशा संघे बाहला, होर मॉडणु आला हिस्सेदार होणे री आशा न मॉडदा रौहला । 11 जैबे कि आसे तुसरी तक आत्मिक चिजा रखी सा तैबे कि ऐ बडी गल सा, कि तुसरी शरीरे री चिजे री फसल काटलै । 12 जैबे होरी रा हक तुसा पांटे ऐ हक सा ता कि आसरा एता न जादा नी होणा? पर आसा ऐ हक कौमा न नी लाऊ; पर सेभ किछ सौहा सी, कि आसरी द्वारा मसीह रा शुभ समाचारा री किछ रोक नी होली । 13 कि तुसे नी जाणदै कि जो पवित्र चीजे री सेवा केरा सी, ते मंदिरा न खा सी; होर जो बेदी री सेवा केरा सी : तेआ बेदी संघे भागी होआ सी? 14 ऐन्डी तरह प्रभुऐ भी ठहराउ, कि जो माहू शुभ समाचार शूणा सी, तिन्हरी जिन्दी शुभ समाचारा सान्ही होली। 15 पर में इन्हा न कोई भी गल्ला कौमा न नी लाई, होर में ता ऐ गल्ला तैबे नी लिखी, कि मेरी तक ऐन्डा केरु लोडी, किबेकी एता न ता मेरा मौरना खरा सा : कि कोई मेरा घमंड बेकार ठहरालै। 16 होर अगर हाउ शुभ समाचार शूणा सा, ता मेरा किछ घमण्ड नी; किबेकी ऐ ता मेरे तेईरे जरूरी सा, होर अगर हाउ सुसमाचार नी शूणाणु, ता मुं पेंदे बढुआ लागली । 17 किबेकी अगर हाउ आपणी मर्जी न बोला सा, ता मजदूरी मुबे मिलणी सा, होर अगर हाउ आपणी मर्जी न नी केरदा ता, तेबे भी भण्डारी री जिमेदारी ता मुबे धीनी री सा । 18 ता सो मेरी कुण जेई मजबूरी सा? ऐ सा कि शुभ समाचार सुणाणै न मसीह रा शुभ समाचार मुफ्त न शूणाणा; औखै तक कि शुभ समाचारा न जो मेरा हक सा सो मुं पूरी रीति न कौम न लाणा। 19 किबेकी सेभी न आजाद होणे न बाद भी हाँऊ सेभी रा दास बणु सा; कि बोउ लोका बै प्रभु न आणनु 20 हाँऊ यहूदिये री तक यहूदिया बणु कि यहूदिये बै आणनु, जो लोका पवित्र विधि रै अधीन सी, तिन्ही री तक हाँऊ भी धर्म विधि रै अधीन नी होणे न बाद भी धर्म विधि रै हुआ, कि जो लोका धर्म विधि रै अधीन सी प्रभु न आणनु । 21 धर्म विधि रै (जो परमेश्वरा री धर्म विधि ही रै नी पर मसीह री धर्म विधि रै आधीन सा ) हाउ धर्म विधि बे नी मन्त्रणु आला बणु कि जो नी मन्त्रदे तिन्ना बे प्रभु हागे खिचिया आणलु । 22 हाउ कमजोर री तक कमजोर बणु, कि कमजोर बै प्रभु न आणनु, हाँऊ सेभी माहणु सब किछी बणु सा, कि केंडी

भी तरह कोसी ऐकी माहणु रा उद्धार केरला । 23 होर हाँऊ सेब किछ सुसमाचारै री तेईए केरा सा, कि होरी सेघे तिन्नारा सैघी बणलु ।

### मसीह न दौड़

24 कि तुस्से नी जाणदे, कि दौउडी न ता सब दौउडा सी, पर इनाम एके ही नेया सा तुस्से एन्डे दौउडी कि, इनाम जितलै । 25 होर हर एक ताकतवर जो सभी तरह न धीरज केरा सा, ते ता एक नाश होणु आले मुंकटा री तेईए ऐतरा किछ केरा सी, पर आसे ता तेई मुंकटा री तेईए केरा सी, जो नाश नी होणा । 26 तेबे हाँऊ ता ऐन्डी तरह दौउडा सा, पर भटकणे री तेईए नी, हाँऊ भी ऐन्डी तरह मुक्के सेघै लडा सा, पर तेई साही नी जौ कि बागरी बे मारदा होर बागरी न लडा सा । 27 पर हाँऊ आपणे शरीरा बे मारा-कुटा सा, होर आपणे काबू न ला सा; ऐन्डा लोडी हुआ कि हाउ होरी बे प्रचार केरीया आपु गलत होणु ।

### इसरायली रै इतिहासा रै बारे न चेताऊनी

10 हो भाइयो, हाउ नी चाहन्दा, कि तुस्से ऐसा गल्ला न न्जाण रौहलै, कि आसरे बुजुरी बादला हेठे ती, होर सेभ रै सेभ स्मुद्रे रै बीचा न पार हुए । 2 होर सेभिए बादला न, होर स्मुन्द्रा न, मूसा रा बसिस्मा लेऊ । 3 होर सेभिए एके आत्मिक रोटी खाई । 4 होर सेभिए एके आत्मिक पाणी पिऊ, किबैकि ते तेसा आत्मिक टोली न पिया ती जो तिन्हा संघे-संघे चौला ती; होर सो टोली मसीह ती । 5 पर परमेश्वर तिन्हा सेभी न खुश नी हुआ, तैबै ते बौणा न मुएं । 6 ऐ गल्ला आसरी तक उदाहरण बणी, कि तिन्हे लालच केरु, तेंदे आसे भी बुरी चिजा रा लालच नी केरना । 7 होर ना तुसे मुर्ति पूजा केनू आले बणा; जेंडे तिन्हा न केतरे बणे ती, जेंडा लिखु होन्दा सा, कि लोका खादे पिन्न्दे बेशे, होर खेल्दै कुददै उठै । 8 होर ना आसा व्यभिचार केरना; जेन्डा कि तिन्हा मौझ न केतरे माहणुऐ ऐन्डा केरु: तेबे ते ऐकी रोजा न तेऐई हजार लोका मुऐ । 9 होर प्रभु बे मौता परखे; जेंडा कि तिन्हा मौझे केरते लोके केरु, होर ते किडे नाश केरे । 10 होर ना तुस्से कुडकुडाऐ, जेन्डे कि तिन्हा मौझे केतरे लोका कुडकुडाऐ, होर नाश केरणु आले ते नाश केरे । 11 पर ऐ सब गल्ला, जो तिन्हा पेंदे पौड़ी, उदाहरणे री रीति पांदे ती : होर ते आसरी चेतावनी री तक जो संसारे री आखरी बौकता न लिखी सी । 12 तेबे जो समझा सा, कि हाउ मजबूत सा, कि कोइंचे झौडू नी लोडी । 13 तुसे कोई ऐन्डी परिक्षा न नी लोडी पौडे, जो माल्लु रै सौंछे न बाहर सा; होर परमेश्वर सच्चा सा : तेई तुस्से शक्ति न बाहर परिक्षा न नी पौडने देणे, पर परिक्षा संघे बाहर भी खोलणे, कि तुस्से सौही भी सक्रै ।

### मूर्तिपूजा रै बारे न चेतावनी

14 तेसा वजह ना, ओ मेरे प्यारो मुर्ति पूजा न बचिया रौआ 15 हाँऊ ज्ञानी जाणीया, तुसा बै बोला सा; जो हाँऊ बोला सा, तेईबै तुसे परखा । 16 सो धन्यवादा रा कटोरा, जुणी पान्दे आसे धन्यावाद केरा सी, कि मसीह रै लोऊ री सहभागी नेई? सो रोटी जुणी बै आसे चोडा सी, कि सो मसीह री देहा री सहभागिता नी अथी? 17 तेबे, कि आसे भी ऐकि रोटी सी तेबे आसे जो बोहु सी, ऐके शरीर सी, किबेकी आसे सब तेईरी(प्रभु भोजा री रोटी न) ऐके रोटी न भागी होआ सी । 18 तिन्हा इस्त्राएला रै लोका बे हेरा: जो शरीरा रै अनुसार ता इस्त्राएसी सी, कि ते वेदी आगे बलिदान केरु हुन्दी चीजा बे नी खान्दे? 19 तेबे हाँऊ बोला सा की मूर्ती आगे चड़ाऊ हुन्दा बलिदान किछ सा, कि मुरत किछ सा? 20 किछ नी आथी, पर ऐ कि, होरा लोका बलिदान केरा सी, ते परमेश्वर री तेईए नी, पर दुष्टआत्मा री तेईए बलिदान केरा सी: होर हाउ नी चाहदा, कि तुस्से दुष्टआत्मा रै सेघी होले । 21 तुस्से प्रभु रै कटोरे, होर दुष्टआत्मा रै कटोरे दुई न केठे नी पिई सकदे! तुस्से प्रभु री मेजा न होर दुष्टआत्मा री मेजा न, तिन्हा दुई न भागी नी होई सकदे । 22 कि आसे प्रभु बे झिक चका सी? कि आसे तेई न शक्तिमान सी?

### सेभ किच्छ परमेश्वर री महिमा री तेईए

23 सब चिजा मेरे तेईए ठीक ता सी, पर सब खरे री तेईए नी आथि: सब चिजा मेरी तेईए खेरी ता सी, पर सब चिजा उन्नति री तेईए नी आथी । 24 कोई आपणे खरे कोमा बे नी, पर होरी रै खरे कोमा बे बी तोपला । 25 जो किछ कसाई हागे बिका सा, तेथा बे खाई होर आपणी समझी रै मुताबिक किछ मौती पूछी । 26 किबेकी पूरी धोरती पेंदे प्रभुन री भरपूरी सा । 27 अगर कोई तुस्सा बे अविश्वाशी न नेउता देला ता, होर तुस्से जाणा चाहले, ता जो किछ तुस्सा सामने रखले ता तेथा बे खाई: होर आपणी समझा री बजा न किछ मौती पुछे । 28 अगर कोई तुस्सा बे बोलला, ऐ ता मुर्ति रे सामने चड़ाऊ हुन्दी चीज सा, ता तेई दसणु आले री बजा न, होर समझी रे मुताबिक मौती खाई । 29 मेरा मतलब तुस्सारी समझ नी, पर होरी तेईरा, भला, पर मेरी आजादी होरी री समझा रै मुताबिक किबे परखले? 30 अगर हाँऊ धन्यावाद केरी या भागी होआ सा, ता जुणी पेंदे हाउ धन्यवाद केरा सा, तेई री बजा न मेरी किबे होआ सा? 31 तेबे चाहे तुस्से खाले, चाहे पिया, चाहे जे किछ केरले, सेभ किछ परमेश्वर री महिमा री तेईए केरा । 32 तुस्से ना यहूदी, ना यूनानी, होर ना परमेश्वर री कलीसिया री तक ठोकरा बणा । 33 जेन्डा हाँऊ भी सभी गला न खुश रखा सा, होर आपणा नि पर भोऊ लोका रा लाभ तोप सा, कि ते उध्दार पालै ।

11 तुसे मु साई चाल चला जेन्डा हाँऊ मसीह री चाल चला सा ।

### बेटडी बै प्रार्थना न मुंडी खटणै रै बारे न

2 होर भाईयो, हाँऊ तुसारी सराहाणा केरा सा, कि सेभी गल्ला ना तुस्से मुन्बे याद केरले: जो व्यवहार मैं तुस्सा बै धिनै सी तिन्हा बै अपना । 3 हाँऊ ऐ चाहा सा कि तुसे ऐ जाणा हर एक मर्दा री मुंडी मसीह सा: होर बेटडी री मुंडी मर्द सा: होर मसीह री मुंड परमेश्वर सा 4 जो मर्द आपणा मुंड खोटिया प्रार्थना केरा सा या भविष्यवाणी केरा सा, सौ मर्द आपणी मुंडी रा अपमान केरा सा । 5 पर जो बेटडी खुले मुंडे प्रार्थना केरली या भविष्यवाणी केरली ता, सौ आपणी मुंडी रा अपमान केरा सा, किबेकी सौ ता गंझी होणे रै बराबर सा । 6 अगर बेटडी आपणी मुंडी नी खोतली, ता आपणे बाल भी काटली, अगर बेटडी तेईए बाल काटणे शर्मा री गल सा, ता सौ आपणी मुंडी खोतली । 7 होर मर्द बै आपणा शिर खोटणा ठीक नी आथि, किबेकी सौ परमेश्वर रा स्वरूप होर महिमा सा, पर बेटडी मर्दा री महिमा सा । 8 किबेकी मर्द बेटडी न नी हुआ, पर बेटडी मर्दा न हुई सा । 9 होर मर्द बेटडी री तेईए बणाऊ सा, होर बेटडी मर्दा री तेईए बणाई सा । 10 तेबे स्वर्गदुते री बजाह न बेटडी बे खरा सा, आपणे शिरा पेंदे हक रखली । 11 तेबे भी प्रभु न ता बेटडी बगेर मर्द होर ना मर्द बगेर बेटडी किछ सा । 12 किबेकी जेंडी बेटडी मर्दा न सा, तेन्डे ही मर्द बेटडी न सा; पर सेभ चिजा परमेश्वर री सी । 13 तुस्से आपु सोची सका सी, कि बेटडी बे खुले शिर परमेश्वर ना प्रार्थना केरना शोभा देया सा? 14 कि तुस्से स्वाभाविक रीति न नी जाणदे, कि अगर मर्द लओमा चोडा रखला, ता तेईरी तेईए सो अपमान सा । 15 पर जो बेटडी लोमे बाल रखा सा; ता ऐ तेसा बे शोभा देया सा किबेकी तेस्सा बे बाल शिर खोटणे री तेईए धीनी रे सी । 16 पर अगर कोई बेहस केरना चाहला, ता सौ ऐ जाणला कि न आसरी होर न परमेश्वर री कलीसिया री एंडी रीति सा ॥

### प्रभु भोजा रै बारे न

17 पर ऐ हुक्म देन्दे घेरे, हाँऊ तुस्सा बे नी सरादा, किबे की तुस्से रै क्वठे होणे कोई भलाई नी होदी, पर नुकसान होआ सा । 18 किबेकी पहले ता हाँऊ शुणा सा, कि तुस्से कलीसिया न केवठे होआ सी, ता तुस्सा न फुट होआ सा होर हाँऊ किछ-किछ महेसुस भी केरा सा । 19 किबेकी विधोही भी तुस्सा न जरुर होणे, तेबे जो लोका तुसा मौझे न खरे निकली रे सी, ते सामने होणे । 20 ता तुस्से जो एकी जगा कड़े होआ सी ता तुस्से प्रभु भोज खाणै री तेईए नी पर । 21 किबेकी खाणे न पहले ही खा सी, होर कोई ता भूखे रोहे सी, होर किछ ता होआ सी । 22 किबे खाणे पिणे री तेईए घोर नी आथि, तुस्से परमेश्वर री कलीसिया बे किछ नी समझदे, होर जुणी आगे नी आथि तिन्हा बे

तुस्से शर्मिदा केरा सी? कि ऐसा गल्ला न हाँऊ तुस्सा बे सराहणु? हाँऊ सरहणा नी केरदा।<sup>23</sup> किबेकी ऐ गल मुम्बे प्रभु न मिली सा, होर मैं तुस्सा बे धीनी सा; कि जुणी राती प्रभु यीशु पकड़ ती रोटी चेकी।<sup>24</sup> होर धन्यवाद केरी या रोटी चोड़ी, होर बोलु; कि ऐ मेरा शरीर सा, जो तुस्से री तेईरे सा: मेरी यादी न ऐन्डा केरदे रोही।<sup>25</sup> तेबे गराह न बाद यीशुए कटोरा भी चेकु, होर बोलु; ऐ कटोरा मेरे खुने री नाँई वाचा सा: जेबे केबरे भी पीले ता, ता मेरी यादी न ऐन्डे केरदे रोही।<sup>26</sup> किबेकी जेबे केदी ऐ रोटी खाले, होर ऐई कटोरे न पिले, ता प्रभु री मोऊती बे कि जेबे तक सौ नी ऐला, प्रचार केरा सी।<sup>27</sup> तेबे जो कोई गलत रीति न प्रभु री रोटी खाले, या तेईरे कटोरे न पिला, सौ प्रभु रै शरीरा रा होर खुने रा गुनेगार होणा।<sup>28</sup> तेबे माहणु आपणे आपु बे परखला होर तेबे न बाद ऐन्डी तरह ऐसा रोटी न खाई, होर ऐई कटोरे न पिई।<sup>29</sup> किबेकी जो कोई खांदे पिंदे घेरे प्रभु रै शरीरा बे नी पहचान्दा ता, सौ ऐथा खाणे होर पिणे न आपु पेंघे दण्ड आणा सा।<sup>30</sup> ऐथा बजान न तुस्सा मौझे बोहु सारे कमजोर होर बीमार सी, होर बोहु सारे ता मुंऐ भी सी।<sup>31</sup> अगर आसे आपणे आपु बे परखले, ता दण्ड नी मिलणा।<sup>32</sup> पर प्रभु आसे बे दण्ड देईया आसेरी ताड़णा केरा सा, कि आसे संसारा संघे दोषी नी होले।<sup>33</sup> तेबे, हे आसे सब भाई, जेबे तुस्से खाणे री तेईरे क्वठे होआ सी, ता ऐकी री तेईरे रुके केरा।<sup>34</sup> अगर कोई भूखा सा, ता आपणे घोरा खाला कि जूणी री बजा तुस्सरा केवठे होणा दण्डा री बजा नी बणणी: होर बची हुदी गल्ला हाँऊऐजिया ठीक केरनु॥

### आत्मिक वरदान

**12** हे सब भाई, हाँऊ नी चाहदा कि तुस्से आत्मिक वरदाने रे बारे न नजाण रोहले।<sup>2</sup> तुस्से जाँणा सी, कि जेबे तुस्से अन्यजाती ती, ता गूंगी मुरते रै पीछे जेडे चला ती तेंन्डे चला सी।<sup>3</sup> तेबे हाँऊ तुस्सा बे सावधान केरा सा कि जो कोई परमेश्वर री अगुआई न बोला सा, सौ नी बोलदा कि यीशु श्रापित सा; होर ना कोई बिना पवित्र आत्मा न ऐन्डा नी बोली सकदा कि यीशु ही प्रभु सा॥<sup>4</sup> वरदान ता कई प्रकारे रै सी, पर आत्मा ऐके सा।<sup>5</sup> होर सेवा भी कई प्रकारे री सा, पर प्रभु ऐके सा।<sup>6</sup> होर प्रभावशाली कोम कई प्रकारे रै सी, पर परमेश्वर ऐके सा, जो सभी न सेभ प्रकारा रा प्रभाव उत्पन केरा सा।<sup>7</sup> पर सभी रै फाईदा देणे री तेईरे सेभी बे आत्मा रा प्रकाश धिनु सा।<sup>8</sup> किबेकी ऐकी बे आत्मा री तरफा न बुद्धि री गल्ला धीनी सा; होर दूजे बे तेसा आत्मा रै दुआरा ज्ञाना री गल्ला।<sup>9</sup> होर कोसी बे तेसा आत्मा न विश्वास रा; होर कोसी बे तेसा आत्मा न चंगा केरने रा वरदान धिनु सा।<sup>10</sup> ता कोसी बे कोम केरने री शक्ति; होर कोसी बे भविष्यवाणी री; होर कोसी बे आत्मा री परख, होर कोसी बे कई प्रकारे री भाषा रा; होर कोसी बे भाषा रा अर्थ देसणे रा।<sup>11</sup> पर ऐ सब शक्तिशाली कौम सौऐ पवित्र आत्मा कराई सका सा, होर जुणी बे जो चाहा सा बोंडिया देया सा।

### एके शरीर कई आँग

<sup>12</sup> किबेकी शरीर ता ऐके सा होर अंग ता बोहु सारे सी, होर ऐकी शरीरा रै सेभ अंग होणे पेंदे भी सेभ मिलिया ऐके शरीर सा, तेन्डी तेरह मसीह भी सा।<sup>13</sup> किबेकी आसे सभीऐ कि यहूदीऐ, कि यूनानीऐ, कि दास, कि आजाद ऐकी आत्मा रै दुआरा ऐक शरीर होणे री तेईरे बतिस्मा लेऊ सा, होर आसा सेभी बे ऐके आत्मा पियाई रा सा।<sup>14</sup> किबेकी शरीरा न ऐके अंग नी, पर बोहु सारे सी।<sup>15</sup> अगर टांग बोलली हौथ नी आथि, तेबे कि शरीरा रा नी, तेबे कि सौ ऐसा बजा न शरीरा रा नी आथि? <sup>16</sup> होर कौन बोलला; कि हाँऊ ओछी नी आथी, तेबे कि शरीरा नी आथी, तेबे कि सौ ऐसा बजा न शरीरा नी आथि? <sup>17</sup> अगर सारा शरीर ओछी ही होली ता शुणना कोखे न होणा ती? अगर सारा शरीर कौन होन्दा ता सूंघना ओखे न ती? <sup>18</sup> पर सचे परमेश्वरे सेभ अंग आपणी मर्जी रे मुताबिक ऐक-ऐक केरिया शरीरा न रखी रे सी।<sup>19</sup> अगर ते सब ऐके ही अंग हौंदे, ता शरीर कोखे होन्दा? <sup>20</sup> पर ऐबे अंग ता बोहु सी, पर शरीर ऐके सा।<sup>21</sup> ओछी होथा बे नी बोली सकदी, कि मुम्बे तेरा किछ कोम नी, होर ना मुडी टाँगा बे नी बोली सकदी, कि मुम्बे तेरी जरूर नी।<sup>22</sup> पर

शरीरे रै ते अंग जुण होरी न कमजोर हेरिया सी, ते बोहु ही जरूरी सी।<sup>23</sup> होर शरीरे रै जुणी अंग बे आसे आदरे योग्य नी समझदे तिन्ना बे आसे जादा आदर केरा सी; होर आसेरे शोभले नी लागणु आले अंग होर भी शोभले होआ सी।<sup>24</sup> तेबे भी आसेरे शोभले अंग बे कोई जरूरत नी, पर परमेश्वरे शरीर ऐन्डा बणाई रा सा, कि जुण अंग कमजोर ती सौऐ बोहु खास बणु।<sup>25</sup> कि शरीरा न झगडा नी होला, पर अंग ऐकी होरी री फिक्र केरले।<sup>26</sup> तेबे अगर एक अंग दुख पा सा, ता सब अंग दुख पा सी, होर अगर ऐकी अंगे री सराहना होआ सा, ता तेई संघे सेभ अंग खुशी मन्ना सी।<sup>27</sup> तेन्डी तरह तुस्से भी मिलिया मसीही रा शरीर सी, होर लग-लग तेई रै अंग सी।<sup>28</sup> होर परमेश्वरे कलीसिया न अलग-अलग माहणु नियुक्त केरी रै सी; पेहले प्रेरित, दूजे भविष्यवक्ता, त्रिजे शिक्षक, होर सामर्थ रै कोम केरनु आले, होर बीमारी बे ठीक केरनु आले, होर दया केरनु आले, होर प्रधान, होर केई प्रकारे री भाषा बोलणु आले।<sup>29</sup> कि सबे प्रेरित सी? कि सेबे भविष्यवक्ता सी? कि सेबे शिक्षा देणु आले सी? कि सेबे सामर्थ रै कोम केरणु आले सी? <sup>30</sup> कि सेभी बे ठीक केरने रा वरदान मिलु सा? कि सेबे लग-लग भाषा बोला सी? कि सेभे अनुवाद केरा सी? <sup>31</sup> तुस्से बड़े न बड़े वरदाने री धुना न रोहा सी! पर हाँऊ तुस्सा बे होर भी सेभी न शोभला रस्ता दसा सा।

### प्यार- सेभी न खरी बौत सा

**13** अगर हाँऊ माहणु, होर स्वर्गदुते री गल्ला बोलणु, होर झुरी नी केरनु, ता हाँऊ उनठणादा पीतल, होर झंझणादी झंझरी सा।<sup>2</sup> होर अगर हाँऊ भविष्यवाणी केरनु, होर सेभ रहस्या होर सभी तरह रै ज्ञाना बे समझनु, होर मुम्बे ओखे तक बशाह होला, कि हाँऊ जोता बे हटाला, पर झुरी नी केरनु, ता हाँऊ किछ भी नी आथि।<sup>3</sup> अगर हाँऊ आपणी पूरी जाँएदात (दौलत) गरीबा बे खियानु, या आपणा शरीर फुकणे री तेईरे देंनु, होर झुरी नी केरनु, ता मुम्बे किछ भी फाईदा नी अथि।<sup>4</sup> झुरी (प्यार) धीरजवान सा; होर कृपालु सा, प्यार डाह नी केरदा; प्यार आपणी बड़ाई नी केरदा, होर फुलदा नी।<sup>5</sup> सौ बुरी चाल नी चलदा, सौ आपणी भलाई नी चाहदा, गुस्सा नी मन्दा।<sup>6</sup> बुरे कोमा न खुश नी होन्दा, पर सचाई न खुश होआ सा।<sup>7</sup> सौ सेभ गल्ला सौहा सा, सौ सेभी गल्ला रा बशाह केरा सा, सभी गल्ला री आशा केरा सा, सेभी गल्ला न धीरज रखा सा।<sup>8</sup> प्यार केदी खत्म नी होदा; भविष्यवाणी ता खत्म होणी, भाषा होली ता ते भी खत्म होदी रोहणा; ज्ञान होला ता सौभी खत्म होणा प्यार केदी खत्म नी होदा; भविष्यवाणी ता खत्म होणी, भाषा होली ता ते भी खत्म होदी रोहणा; ज्ञान होला ता सौभी खत्म होणा।<sup>9</sup> किबेकी आसरा ज्ञान अधुरा रा सा, होर आसेरी भविष्यवाणी अधूरी सी।<sup>10</sup> पर जेबे सर्वसिद्ध ऐणा, ता अधुरा खत्म होणा।<sup>11</sup> जेबे हाँऊ शोरु ऐ ती, ता हाँऊ शोरु साही बोला ती, होर शोरु साही मन ती शोरु साही समझ ती; पर ऐबे स्याणा हुआ सा, ता शोरु साही गल्ला छोडी धीनी।<sup>12</sup> ऐबे आसा बे शीशे न धुधला जी हेरिया सा, पर तेई बोक्ते आमने सामने हेरना सा, ऐई बोक्ते मेरा ज्ञान अधुरा सा; पर तेई बोक्ते पूरी तरह पहिचानणे, जेन्डा हाँऊ पहिचानु सा।<sup>13</sup> पर ऐबे बंशाह, आशा, प्यार ऐ त्राहे स्थाई(जरूरी) सी, पर ईन्ना सभी न प्यार बड़ा सा।

### भविष्यवाणी होर अन्य भाषा रै बरदान

**14** प्यारा रै पीछे चला, होर आत्मिक वरदाने री धुना न रोहा खास केरिया ऐ, कि भविष्यवाणी केरा।<sup>2</sup> किबेकी जो अन्य भाषा न गल्ला केरा सा; सौ माहणु न नी, पर परमेश्वरा संघे गल्ला केरा सा; ऐसा बजा न कोई समझदा नी; किबेकी ते गुप्त गल्ला आत्मा न होइया बोला सा।<sup>3</sup> पर जो भविष्यवाणी केरा सा, सौ माहणु उन्नति री तेईरे, होर शिक्षा देणे री तेईरे, होर शान्ति री तेईरे बोला सा।<sup>4</sup> जो अन्य भाषा बोला सा, सौ आपणी उन्नति केरा सा; पर जो भविष्यवाणी केरा सा, सौ कलीसिया री उन्नति केरा सा।<sup>5</sup> हाँऊ चाहा सा, कि तुस्से अन्य भाषा न गल केरा, पर ज्यादातर ऐ चाहा सा कि भविष्यवाणी केरा: किबेकी अगर अन्य भाषा बोलणु आले कलीसिया न तेथा रा मतलब नी दसदे (अनुवाद केरना) ता भविष्यवाणी केरणु आले तेई न ठीक सा।<sup>6</sup> तैबे हे मेरे सब भाई, अगर हाँऊ तुस्सा आगै ऐजिया अन्य-

अन्य भाषा बोलणु, होर प्रकाश न, या ज्ञान, या भविष्यवाणी, या उपदेश री गल्ला तुस्सा बे नी बोलणु, ता मुं तुस्सा बे कि फायदा होणा? 7 ऐन्डी तरह अगर मौरु हुन्दी चीजा भी, जुणी सुर निकला सी जेंडे कि बांसुरी, होर बीन, अगर तिन्ना रे सूरा रा भेद(मतलब) नी होन्दा ता जो फुकरा सी, सौं किंयै पहचाणणा ती? 8 अगर तुरही रा शब्द साफ नी होन्दा ता कुणी लड़ाई री तेईरे तयारी केरनी ती? 9 ऐन्डे तुस्से भी अगर साफ गल्ला नी केरले, ता जो किछ बोलदे ता सौं किंयै समझणा ती? तुस्से ता वागरी सेंघे गल्ला केरणु आले होणे। 10 संसारा न ता केतरी भी प्रकारे री भाषा होली, पर तिन्ना मौंझे न कोई भी बिना मतलबे री कोई भी नी होणी। 11 तेबैअगर हाँऊ कोसी भाषा रा अर्थ नी समझनु, ता बोलणु आले री नजरी न हाँऊ परदेशी होणा; होर मेरी नजरी न ते परदेशी होणे। 12 तैबे तुस्से भी आत्मिक वरदाने री खोजा न रोहा सी, ता ऐन्डी कोशिश केरा, कि तुसे वरदाने री उन्नति न कलीसिया री उन्नति री तेईरे हुआ लोड़ी। 13 ऐसा बजा न जो अन्य भाषा बोलला, ता सौं ऐ प्रार्थना केरला, कि तेथा रा मतलब भी देसी सकला। 14 तैबे जेबे हाँऊ अन्य भाषा न प्रार्थना केरणु, ता मेरी आत्मा प्रार्थना केरा सा, पर मेरी बुद्धि कोम नी केरदी। 15 तैबे कि केरना सा मुं आत्मा न भी पार्थना केरनी; होर बुद्धि भी प्रार्थना केरनी, मुं आत्मा न गाणा, होर बुद्धि न भी गाणा। 16 नी ता जेबे तु आत्मा न ही धन्यवाद केरला, तेबे फिरी जो अज्ञानी सा तेरे धन्यवाद पेंदे आमीन केंडे बोलणा? किबेकी सौं ता जाणंदा नी, तु की बोलदा लागा सा? 17 तु ता खरी तरह धन्यवाद केरा सा, पर दूजे री उन्नति नी होन्दी। 18 हाँऊ आपणे परमेश्वरे रा धन्यवाद केरा सा, कि हाँऊ तुसा सेभी न ज्यादा अन्य-अन्य भाषा न बोला सा। 19 पर कलीसिया न अन्य भाषा दस हजार गल्ला बोलणे न ऐ मुबे होर भी शोभला लागा सा, कि होरी बे बुद्धि न पोंजे गल्ला बोलणु। 20 हे मेरे सब भाई, तुस्से समझा न शुरु मन्ता बणे: तेबे भी बुरे री तेईरे शोर रोहा, पर समझा न सयाणे बणा। 21 व्यवस्थान न लिखु सा, कि प्रभु बोला सा; हाँऊ अन्य भाषा बोलणु आले रै दुआरा, होर होरी रै मुंऐ दुआरा इना लोका सेघे गल्ला केरनी तेबे भी इन्ना मेरी नी शुणणी। 22 ता अन्य भाषा विश्वाशी लोका री तेईरे नी, पर अविश्वासी लोका री तेईरे ऐक चिन्ह सा; होर भविष्यवाणी अविश्वासी लोका री तेईरे नी आधि पर विश्वासी लोका री तेईरे ऐक चिन्ह सा 23 तेबे जेबे कलीसिया ऐकी जगा कठे होआ सी, होर सेभ रै सेभ अन्य-अन्य भाषा बोलले, होर अनपढ़ या अविश्वासी लोका आन्द्रे ऐले ता तेबे तिन्ना तुस्सा वे पागल नी बोलणा? 24 तेबे अगर सेभ भविष्यवाणी केरदे लागले, होर कोई अविश्वासी या अनपढ़ माहणु आन्द्रे ऐला, ता सेभी सौं तिन्ना गलत ठराणा होर परखणा। 25 होर तेई रै मना रा भेद प्रगट केरना, होर तेबे तेई आपणा मुंह झुकिया परमेश्वरा बे प्रणाम केरना, होर मनणा, कि सचे परमेश्वर तुस्सा मौंझे सा।

### शोभले तरीके न आराधना

26 तेबे कि केरु लोड़ी? जेबे तुस्से कठे होआ सी, ता ऐकि दूजे रै मन्ना न भजन, या उपदेश, या अन्य भाषा, या शिक्षा रा प्रकाश, या अन्य भाषा रा अर्थ दसणा रोहा सा: सेभ किछ आत्मिक उन्नति री तेईरे हुआ लोड़ी। 27 अगर अन्य भाषा न गल केरनी होली, ता दुई, या बोहु हो ता तराई जण बारी-बारी बोलले, होर एक माहणु मतलब दसला। 28 अगर मतलब(अनुवाद) दसणु आला नी होला, ता अन्य भाषा बोलणु आले कलीसिया न चुप रोहले, होर मना न, होर परमेश्वरा न गल्ला केरला। 29 होर भविष्यवाणी केरनु आले न दुई या तराई बोलले, होर लोका तिन्ना रै वचना बे परखले। 30 अगर कोई होरी पेंदे जो बेशी रा सा, किछ ईश्वरा रा प्रकाश होला, ता पहला चुप होला। 31 किबेकी तुस्से ऐक-ऐक केरीया भविष्यवाणी केरी सका सी कि सब सिखले, होर सब शान्ति पाले। 32 होर भविष्यवाणी केरणु आले री आत्मा तिन्ना रै बशाह न सा। 33 किबेकी परमेश्वरे गडबडी रा नी, पर शान्ति रा कर्ता सा; जेंडा कि सेभ पवित्र लोके री कलीसिया न सा। 34 बेटडी कलीसिया री सभा न चुप रोहली, किबेकी तिन्हा बे गल्ला केरने रा हुक्म नी आधि, पर आधीन रोहणे रा हुक्म सा: जेंडा व्यवस्था न लिखु भी सा। 35 होर अगर ते किछ सीखणा चाहा सी, ता घोरा आपणे लाडे न पुछली, किबेकी बेटडी रा कलीसिया न गल्ला केरना शर्म री गल सा। 36 कि परमेश्वरे रा वचन तुस्सा

मौंझे न निकलू सा? या फिरी तुस्सा तक केले पूजी रा सा? 37 अगर कोई माहणु आपणे आपु बे भविष्यवाणी केरनु आला या आत्मिक जन समझला, ता ऐ जाणला, कि जो किछ गल्ला में तुस्सा बे लिखी सी, ते प्रभु रै हुक्म सी। 38 पर अगर कोई नी जाणला, ता नी जाणला। 39 ता हे मेरे भाई, भुश्यवाणी केरने री धुना न रोहा होर अन्य भाषा बोलणे न मन्ना मोता केरा। 40 पर सारी गल्ला शान्ति सेंघे होर क्रमानुसार सही तरीके सेंघे केरले।

### मसीह रा जिन्दा होणा

15 हे भाईयो, हाँऊ तुस्सा बे सोऐ सुसमाचार दसा सा जो पेहले शुणाई रा सा, जुणी रा तुस्से अंगीकार भी केरी रा ती होर जुणी न तुस्से मजबूत (स्थिर) भी सी। 2 तेथा रै दुआरा तुस्सा रा उधार भी हुआ सा, अगर सौं सुसमाचार जो में तुस्सा बे शुणाई रा ती याद रखा सी; नी ता तुस्सरा बशाह केरना बेकार हुआ। 3 तेबे में सेभी न पेहले तुस्सा बे ऐ गल पजाई सा, जो मुंबे पूजी ती, कि पवित्र शास्त्रा रै मुताविक यीशु मसीह आसरे पापे री तैईरे मुंआ सा। 4 होर जमीना न पौथा ती; होर पवित्र शास्त्रा रै मुताविक त्रीजे रोज जिन्दा हुआ सा। 5 होर कैफा बै तेबे तोखे बारहा जणा बे हेरुआ ती। 6 फिरी पौंज शोऊ न ज्यादा सेभी भाई बे ऐकी बारी न हेरुआ ती, जुणी मौंझे न बोहु सारे हाजी तक जिन्दे सी पर केतरे मुंऐ सी। 7 फिरी यकुबा बे हेरुऐ ती तेबे सेभ प्रेरिता बे हेरुआ ती। 8 होर सेभी न बाद मुन्बे भी हेरुआ ती, जो कि मना अधूरे रोजे रा जोमु हुंदा सा। 9 किबेकी हाँऊ प्रेरिता मौंझे न सेभी न होछा सा, होर प्रेरित बोलणे रै लाईक भी नी आधि, किबेकी में परमेश्वरे री कलीसिया बे दुःख धिनु ती होर सताए ती। 10 पर हाँऊ जो किछ भी सा, परमेश्वरे रै अनुग्रह न बणु सा: होर तिन्हा रा अनुग्रह जो मुं पेंदे हुआ सा, सौं बेकार नी हुआ सा पर मैं तिन्हा सेभी न ज्यादा मेहनत भी केरी सा: तेबे भी ऐ मेरी तरफा न नी हुआ पर परमेश्वरे रै अनुग्रह न हुआ जो मुं पेंधे सा। 11 तेबे चाहे हाँऊ सा, चाहे ते सी, आसे ऐ प्रचार केरा सी, होर ऐथा पेंदे तुस्से बशाह भी केरु सा।

### आसरा मुंऐदे न जिन्दा होणा

12 जेबे कि मसीही रा ऐ प्रचार केरा सी, कि सौं मुंऐ हुंदै न ज़िन्दा हुआ सा, ता तुस्सा मौंझे न केतरे किबे बोला सी, कि मुंऐ हुंदै रा ज़िन्दा(पुनरुत्थान) आधिऐ नी। 13 अगर मुंऐ हुंदै रा ज़ी उठना नी आधि, ता मसीह भी जिन्दा नी हुआ। 14 होर अगर मसीह भी जिन्दा न हुआ, ता आसरा प्रचार केरना बेकार सा; होर तुस्सरा बशाह केरना भी बेकार सा। 15 होर आसे परमेश्वरे रै झूठे गवाह हुऐ सी; किबकी आसे परमेश्वरे बारे न धीनी ती कि तिन्ने मसीह मुंऐ हुंदै न जिन्दा केरी रा सा, जेबेकी नी जिन्दा केरी रा सा, अगर मुंऐ हुंदै न जिन्दा नी उठदा। 16 होर अगर मुर्दे नी जिन्दा हांड़े, ता मसीह भी जिन्दे नी होणा ती। 17 होर अगर मसीह नी जिन्दा उठदा, ता तुस्सरा बशाह केरना बेकार ती; होर तुस्से हाजी तक आपणे (पापा) बुरे कोमा न फंसी रै होणे ती। 18 पर जो मसीह न सूती रै (मुंऐ) सी, ते भी नाश हुऐ। 19 अगर आसे ऐसा जिन्दगी न केले मसीह न बशाह रखा सी ता आसे सेभी माहणु न अभागे सी। 20 पर सचे यीशु मुंऐ हुंदै न जिन्दे उठी रा सी, होर जो सूती रै सी, तिन्हा मोझे न पेहला फ़ोल हुआ। 21 किबेकी जेबे ऐकि माहणु रै दुआरा मोऊत आई; ता माहणु रै दुआरा मुंऐ हुंदै न जिन्दा होणा भी आऊ। 22 होर जेंडे आदमा न मोरा सी, तेंडे ही मसीह न सब जिन्दे होणे सी। 23 पर सेभी आपणी-आपणी बारी न; पेहला फ़ोल मसीह; फिरी मसीही रै आणे पेंदे तिन्नेरे लोका जिन्दे होणा। 24 ऐथा न बाद अंत होणा; तेई बोक्त यीशु आपणी सारी प्रधानता होर आपणा सारा अधिकार होर सार्मथा रा अंत केरीया राज्य पिता परमेश्वरे रै हाँथा न सौंपणा सा। 25 किबेकी जेबे तक कि सौं बेरी बे आपणे टाँगे रै तोले हेठे नी केरला, तेबे तक तेई रा राज्य केरना जरूरी सा। 26 सेभी न लाशट बेरी जो नाश केरना सा सौं मौऊत सा। 27 किबेकी परमेश्वरे सेभ किछ तेई रै टागा हेठे केरी रा सा, पर जेबे सौं बोला सा कि सब किछ तेई रै आधीन न केरी रा सा ता प्रगट सा, कि जुणीऐ सब किछ तेई रै आधीन केरु सा, सौं आपु आगी सा। 28 होर सब किछ तेई रै आधीन होणा, ता पुत्र आपु भी तेई रै आधीन होणा सा जुणीऐ सब किछ तेई रै आधीन केरु सा; ताकि सभ न

परमेश्वर ही सेभ किछ होला । 29 नी ता लोका मुई होंदे री तेईरे बसिस्मा लिया सी, तिन्ना कि केरना? जेबे कि मुर्दे ता जिन्दे नी होंदे ता फिरी किबे तिन्ना री तेईरे बसिस्मा लेया सा? 30 होर आसे भी किबे हर बोक्त मुश्किला न पोडदे रोहा सी । 31 हे मेरे सेभ भाई, मुम्बे तेई घमण्डे री शपत जो आसरे प्रभु यीशु मसीह न मैं तुस्सेरे बारे न केरी री ती, कि हाँऊ हर रोज मौरा सा । 32 अगर हाँऊ माहणु री तरह इफिसुसा न वोणे रै गोरु सँघे लड्डू, ता तेबे मुबे कि फायदा हुआ? अगर मुर्दे नी जिन्दे होणा, ता ऐजा, खाआ-पिया, किबेकी काल ता मौरणा ऐ सा । 33 धोखा मौता खाए, बुरी संगत शोभले माहणु बे भी बिगाडी देया सा । 34 धर्म केरने री तेईरे उठ होर पाप मौत केरे; किबेकी केतरे ऐन्डे सी जो परमेश्वरा बे नी जाणदे, हाँऊ तुस्सा बे शर्मिदा केरने री तेईरे ऐन्डा बोला सा ।

### जिन्दे होणें न बाद शरीर

35 ऐबे कोई ऐन्डा पूछणा, कि मुर्दे केन्डी तरहा जिन्दे होआ सी, होर कैँडे शरीरा सँघे ऐजा सी? 36 हे मुख, जो किछ तु बोला सा, जेबे तक सौ मौरला नी तेबे तक जिन्दे नी होणा । 37 होर जो तु बाहा सा, ऐ सौ शरीर नी आधि जो पैदा होणु आली सा, पर निरा दाणा सा, सो चाहे गेहूं रा होला, चाहे कोई होरी नांजे रा होला। 38 पर पेमेश्वर तिन्ना बे आपणी मर्जी रै मुताबिक शरीर देया सा; होर हर ऐक बेजे बे तेइरी खास शरीर देया सा । 39 सेबे शरीर ऐके जेई नी आधि, पर माहणु रा शरीर अलग सा; गोरु रा अलग जेई सा; होर चीडू चकारु रा अलग जेई सा; होर मौँछी रा शरीर अलग जेई सा । 40 होर आत्मिक (स्वर्गीय) शरीर भी सा, होर संसारीक शरीर भी सा: पर स्वर्गे रै शरीरा रा प्रकाश अलग सा, होर संसारीक शरीरा रा अलग सा । 41 सुरजा रा तेज हौर सा, चाँन्दा रा तेज हौर सा, होर सेभी तारे रा तेज हौर सा, (किबेकी ऐके तारे न दूजे तारे रा प्रकाशा न अंतर सा)। 42 मुई हुँदै रा जिन्दा होणा भी ऐन्डा सा । शरीर नाशमान दशा न मौरा सा, होर अविनाशी रूपा न जिन्दा होइया उठा सा । 43 तेई बे अनादरा सँघे बाहा सी, होर तेजा सेघे जिन्दा होआ सा; कमजोरी सेघे बाहा सी; होर शक्ति सेघे जिन्दा होआ सा । 44 संसारिक शरीरा मौरा सा, होर आत्मिक शरीर जिन्दा होआ सा: जेबे कि संसारिक शरीर होआ सा, ता आत्मिक शरीर भी सा । 45 ऐन्डाए लिखु भी सा, कि पेहला माहणु, अर्थात आदम, जिन्दा माहणु बणु होर बाहदा रा आदम, जिन्दगी देणु आला परमात्मा (आत्मा) बणु । 46 पर पेहले आत्मिक नी ती, पर स्वाभाविक ती, तेथा न बाद आत्मिक हुआ । 47 पेहला माहणु धोरती रै माँटे रा बणाऊ ती; दूजा माहणु स्वर्गा रा ती । 48 जेंडा सौ माँटे रा ती तेंन्डे हौरा भी माँटे रै सी; होर जेंडा सौ स्वर्गा रा सा, तेंन्डे हौरा भी स्वर्गा रै सी । 49 होर जेंडा आसे तेई रा रूप धारण केरु सा जो माँटे रा सा, तेंड आसा तेई स्वर्गीय रा रूप भी धारण केरना सा ॥ 50 हे मेरे सेभ भाई बहण, हाँऊ तुस्सा बे बोला सा कि मांस होर खुन परमेश्वरा रै राज्य रै अधिकारी नी होई सकदे, होर ना विनाश अविनाशी रा अधिकारी नी होई सकदा । 51 हेरा, हाउ तुस्सा बै भेदा री गल्ला दस्सा सा: कि आसा सेभी ता नी सोणा, पर सेभी रा रूप बदलणा सा । 52 होर ऐन्डा घड़ी भरा न, ओछी बन्द केरदे ही लाशटे री तुरही फुकरदे ही होणा सा: किबेकी तुरही फुकरणी सा होर मुर्दे अविनाशी रूपा न जिन्दे होणा, होर आसरा रूप बदलना सा । 53 किबेकी जरूरी सा कि नाशमान शरीर अविनाशी शरीरा बे लाला, होर मौरु हुदा शरीर अमरता बे लाला । 54 होर जेबे ऐ नाशमान शरीर अविनाशी शरीरा बे लाई छेक्का, होर ऐ मौरु हुंदा शरीर अमरता बे लाई छेक्का ता, तेबे सौ वचन जो लिखु सा पूरा होणा : जय मौउत निगली सा । 55 हे मौऊत तेरी जय कोखे रोही? हे मौऊत तेरा डंक कोखे रोहु? 56 मौउती रा डंक ता पाप सा, होर पापे री ताकत

व्यवस्था सा । 57 पर परमेश्वरे रा धन्यवाद सा कि, जो आसरे प्रभु यीशु मसीह रै दुआरा आसा बे जयवंत केरा सा । 58 तैबे हे मेरे भाई बहन, मजबूत होर स्थिर रोहा, होर प्रभु यीशु रै कोमा न बढदे रोहा, किबेकी ऐ जाणा सी, कि तुस्सरीमेहनत प्रभु न व्यर्थ नी आधि ॥

### विश्वासी री तेंइये दान

16 ऐबे तुस्सा बे दान देणे रै बारे न जो पवित्र लोका री तेईरे केरा सी, जेंडा हुक्म में गलतियों री कलीसिया बे धिनु ती, तेन्डाए तुस्सै भी केरा । 2 हप्पते रै पेहले रोज तुस्सा मौँझे न सेभ कोई आपणी कमाई रै मताबक किछ आपु आगे बचाईया रखले, कि जेबे हाँऊ ऐणु ता तेबे चन्दा कद्दा केरना नी लोडी पोऊ । 3 होर जेबे हाँऊ ऐला, ता जुणी बै तुस्सा चाहले तिन्ना बे चिठ्ठी भेजी देणी, कि तुस्सरा दान यरुशलैमा न पझेरिया देले । 4 अगर मेरा भी जाणा ठीक होला, ता तिन्हा मु सेंघे जाणा ।

### पौलूसा री योजना

5 होर मुं मकिदुनिया होइया तुस्सा आगे ऐणा किबेकी मुम्बे मकिदुनिया होइया ता जाणाए सा । 6 पर सही सा कि तुस्सा आगे रुकणु होर पूरा हिऊँद महिना तुस्सा आगे काटणु, तेबे जोखे भी मुं जाणा होला, तिसे धीरे तुस्से मुम्बे पझेरिया देईत् । 7 किबेकी ऐबे हाँऊ तुस्सा न रस्ते न नी मिलणा चाहदा; पर मुंबे बशाह सा, कि अगर प्रभु चाहला ता किछ बोकते डोळी मुं तुस्सा सेंघे रोहणा । 8 पर मुं पंतिकुस्त तक इफिसुसा न रोहणा । 9 किबेकी मेरी तेईरे एक बडा होर कोमा(उपयोगी) रा दुराजा खोलू सा, होर दुशमन बोहु सी ॥ 10 अगर तीमुथियुस ऐला, ता हेरी, कि सौ तुस्सा आगे निडर रोहला; किबेकी सौ मुं साही प्रभु रा कौम केरा सा । 11 तेबे कोई तुस्सा बे कमजोर(तुच्छ) नी समझला, पर तेई बे शोभली तरह इस धीरे पझेरिया देई, कि मुं आगे आऊ लोडी; किबेकी हाँऊ तेई रा इंतजार केरदा लागा सा, कि सौ मेरे सेभ भाई सेंघे ऐला । 12 होर भाई अपुल्लोसा सेंघे में बोहु विनती केरी सा कि सेभे भाई सेंघे जाला; पर तेईरे ऐई बोक्त जाणने री किछ भी इच्छा नी केरी, पर जेबे मौका पाला, तेबे ऐजी जाणा ।

### आखरी शब्द होर आदेश

13 जागदे रोहा, बशाह न मजबूत रोहा, मर्दा साही मजबूत बणा, ताकतवर बणा । 14 जो किछ केरा सी प्यारा सेंघे केरा ॥ 15 हे मेरे भाई बहण तुस्से स्तिफनास रै खान्दाना बे जाणा सी, कि ते आख्या देशा रै पेहले फ़ोल सी, होर पवित्र लोका री सेवा केरने री तेंइरे तयार रोहा सी । 16 तेबे हाँऊ तुस्सा न विनती केरा सा कि ऐन्डे माहणु रै आधीन रोहा, पर सेभे जो ऐई कोमा न मेंहनत केरा सी होर सेंघी सी । 17 होर हाँऊ स्तिफनास होर फुरतूनातुसा होर अखईकुसे रै ऐणे न खुश सा, किबेकी तिन्हे तुस्सरी कमी घटी पूरी केरी ती । 18 होर तिन्हे मेरी हौर तुस्सेरी आत्मा बे चैन धिनु सा तैबे तुस्से तिन्हरी शुणा होर मना ॥ 19 आसिया री कलीसिया री तरफा न तुस्सा बे नमशकार; अक्विला हौर प्रिसकाला रा हौर तिन्ना रै घौर री कलीसिया बे भी तुस्सा बे प्रभु न बोहु-बोहु नमशकार । 20 तुस्सा सेभी भाई बेहणी बे नमशकार: पवित्र चुमे सेंघे आपु न नमशकार केरा । 21 मुम्बे पौलुसे रा आपणे हौथे लिखु हुदा नमशकार: अगर कोई प्रभु सेंघे झुरी नी केरदा ता सौ शापित सा । 22 आसरा प्रभु यीशु ऐणु आला सा । 23 प्रभु यीशु रा अनुग्रह तुस्सा पैंधे होन्दा लोडी रोहु । 24 मेरी झुरी प्रभु यीशु न तुस्सा सेभी सेंघे लोडी रोही आमीन ॥

## 2 कुरिन्थियों

### परिचय

कुन्थीं रै नाँ पौलुसा री दूजी चिट्ठी पौलुस होर कुन्थीं री कलीसिया मॉझे कड़ूये रिश्ते रै बारे न लिखी ती। मण्डली रै किच्छ लोके पौलुसा रै बरोधा न कई दोष लाये ती, पर सौ मेल-मिलापा री आपणी इच्छा बै दर्शा सा, पर जेबे ऐंढा होआ सा ता सौ आपणी बड़ी खुशी बै प्रगट केरा सा। एसा चिट्ठी रै पैहले भागा न पौलुस कुन्थीं मण्डली संघे आपणै रिश्ते रै बारे न बचार केरा सा, होर तिन्हा बै ये भी समझा सा कि तेईये किबै मण्डली न बेइजती होर बरोध केरने जेँडा व्यवहार केरु, होर फिरि आपणी खुशी बै प्रगट केरा सा कि तेईरी कठोरता रा नतीजा पछतावा होर मेल-मिलाप हुआ। तैबे सो कलीसिया न, यहूदीया रै गरीब मसीही री तेईये उद्धतापूर्वक दान देणै रा आग्रह केरा सा। आखरी अध्याय न पौलुस कुन्थीं रै किच्छ लोका रै बरोधा न आपणै आपा बै प्रेरित बोलिया समर्थन केरा सा, जुणीया आपणै आपा बै सच्चा होणै रा दर्जा धिनु ती, जेबै कि लोकै पौलुसा बै झूठा प्रेरित सा बोलिया झूठा दोष लाऊ ती।

रूप रेखा

परिचय 1:1-11

पौलुस होर कुन्थीं री कलीसिया 1:12-7:16

यहूदीया रै मसीही री तेईये दान 8:1-9:15

पौलुस दुआरा प्रेरिता रै रूपाने आपणै अधिकरा रा समर्थन 10:1-13:10

### अभिवादन

1 पौलुसे री तरफा न जो परमेश्वरे री मर्जी न यीशु मसिह रा प्रेरित सा, होर भाई तीमुथियुसे री तरफा न जो परमेश्वरे री तेसा कलीसिया रै नाऊ जो कुरुन्थुसा न सी; होर सारे अखया रै सब पवित्र लोका रै नाँ लिखी सा। 2 आसरे पिता परमेश्वर होर प्रभु यीशु री तरफा न तुस्सा बे अनुग्रह होर शान्ति लोड़ी मिलदी रोही।

### परमेश्वरा रा धन्यवाद

3 आसरे प्रभु यीशु मसीह रै पिता परमेश्वरै रा धन्यवाद सा, जो दया रा पिता सा, होर सेभी प्रकारे री शान्ति रा परमेश्वर सा। 4 सौ आसरे सेभी दुखा न शान्ति देया सा; ताकि आसे तेस्सा शान्ति री बजा जो परमेश्वर आसा बे देया सा, तिन्ना बे भी शान्ति देई सकले, जो कई प्रकारे रै दुखा न पोड़ी रै सी। 5 किबेकी जेँडे मसीह रै दुःख आसा बे बोहु होआ सी, तेँडे ही आसरी शान्ति भी मसीह न बोहु होआ सा। 6 अगर आसे दुःख पा सी, ता ऐ तुस्सै री शान्ति होर उध्दार पाणे री तेईऐ सा अगर शान्ति पा सी, ता ऐ तुस्सै री शान्ति पाणे री तेईऐ सा; जुणी रै प्रभावा संघे तुस्से दुःखा बे धीरजा संघे सौहा सी, जुणी बे आसे भी सौहा सी। 7 होर आसरा बशाह तुस्सा रै बारे न पक्का सा; किबेकी आसे जाणा सी, कि तुस्से जेँडे आसरे दुःखा न, तेँडे शान्ति भी सहभागि सी। 8 हे आसरे भाई बहण, आसे नी चाह्दे कि तुस्से आसरे दुःखा रै बारे न न्जाण रोहले, जो आसिया देशा न आसा पेंदे पौडू ती, कि ऐन्डे भारी बौझे संघे दबु हुन्दै ती, जो आसरे री सौहणै न बाहरे ती, औखे तक कि आसे आपणी जिन्दगी न हौथ भी धोए ती। 9 आसे आपणे मन्ना न समझी लेऊ ती, कि आसा पेंदे मौउती रा हुक्म हुई रा सा कि आसे आपणा बशा नी रखले, पर परमेश्वर जो मुऐ हुन्दे बे जिन्दा केरा सा। 10 तेईऐ आसे ऐसा बड़ी मौउती न बचाए, होर तेई पैन्दे आसारा बशा सा, कि सौ आसा बे आगे भी बचांदा रोहला। 11 होर तुस्से भी मिलिझुलिया प्रार्थना न आसरी मददत केरले, कि जो वरदान बोहु लोका रै दुआरा आसा बे मिलु सा, तेथा री बजह बोहु लोका आसरी तरफा न धन्यवाद केरले।

### पौलुसा री योजना न बदलाव

12 किबेकी आसारा आपणे दिमागे री ऐसा गवाही पेंदे घमण्ड केरा सी, कि संसारा न होर खास केरीया तुस्सरे बीचा न आसरा चरित्र परमेश्वरे रै लायक होर पवित्र होर सच्चाई साही ती, जो शरीरा रै ज्ञाना संघे नी, पर परमेश्वरे रै अनुग्रहा संघे ती। 13 आसे तुस्सा बे होर किछ नि लिखदे, केवल सौ केलेह जो तुस्से पौडा सी होर मन्ना सी, होर मुबे बशाह सा, कि तुस्सा अंता तक मन्दे रौहणा। 14 जेँडा तुस्सा मॉझे केतरे मन्ना सी, कि आसे तुस्सरे घमण्डे री बजा सी; तेँडे तुस्सा भी जेबे यीशु मसीह ऐणा तेई धियाडे न आसरी तेईऐ घमण्डे री बजा बणणा ॥ 15 होर ऐई बशाह हाँऊ चाहा ती कि पेहले तुस्सा हागे ऐनु; कि तुस्सा बे एक होर दान मिला। 16 होर तुस्सा हागे न होइया मकिदुनिया बे जानू होर फिरि मकिदुनिया न तुस्सा हागे ऐनु, होर तुस्से मुबे यहूदीया रै किछ दूर तक पहुचाईया देले। 17 तेबे में जो ऐ मर्जी केरी ती ता में कि चंचलता रिहाई? कि जो हाँऊ केरना चाहा सा कि सौ शरीरा रै मुताबिक केरना चाहा सा, कि हाउ गला केरने न हाँ, री हाँ भी केरणु; होर ना, री ना भी केरणु? 18 परमेश्वर विश्वावास सा, कि आसरे ते वचन जो तुस्से बे बोलु ती कि हाँ होर ना दुई बे पाई नी सकदे। 19 किबेकी परमेश्वरे रा शौरु यीशु मसीह जुणीरा आसे भी मतलब में होर सिलवानुसे होर तीमुथियुसे रै दुआरा तुस्सा मॉझे प्राचार केरु ती; तेथा हाँ होर नाह दुऐ नी ती; पर, तेथा न हाँ री हाँ हुई। 20 किबेकी परमेश्वरे री जेतरी भी प्रतिज्ञा सी, ते सब तेई न हाँ संघे सी: तेबे तिन्ना रै दुआरा आमीन भी हुई, कि आसरे दुआरा परमेश्वरे री महिमा होली। 21 होर जो आसा बे तुस्सा संघे मसीह न मजबूत केरा सा, होर जुणीऐ आसारा अभिषेक केरु सौए परमेश्वर सा। 22 जुणीऐ आसा पेंदे छाप भी लाई सा होर बदले न आसारे मन्ना न आत्मा भी धीनी सा। 23 हाँऊ आपु बे परमेश्वरे रा गवाह बोला सा, कि हाउ हाजी डोई तक कुरिन्थुसा न तेबे नी आऊ, किबेकी मुबे तुस्सा पेंदे तरस ऐजा ती। 24 ऐन्डा नी, कि आसे तुस्सा पेंदे बशाह रै बारे न प्रभुता केरना चाहा सी; पर तुस्सा संघे खुशी न संघी भी सी किबेकी तुस्से बशा संघे ही पक्के रोहा सी।

2 मैं आपणे मन्ना न ऐ सोचिया रखी ती कि फिरि तुस्सा हागे दुःखी होइया नी ऐनु। 2 अगर हाँऊ तुस्सा बे दुःखी केरनु, ता मुबे खुशी

देनुआले कुण होणा, सौहे केले जूण में दुःखी केरीरा? 3 होर में ऐ गल्ला तुस्सा बे तेबे लिखी सा, कि कोइंचे ऐन्डा नी लोडी हुआ; कि जुणी बे मेरे ऐणे न खुशी मिलणी, हाँऊ तिन्हा न दुःखी होणु; किबेकी मुबे तुस्सा सेभी पेंदे ऐसा गल्ला रा भरोसा सा, कि जो मेरी खुशी सा, सौऐ तुस्सा सेभी री भी सा। 4 बे दुःखा न, होर मन्ना रै दुःखा न, हाँऊ तुस्सा री तेईऐ बोहु रोई-रोईया लिखा सा, तेथा री तेईऐ नी, कि तुस्से दुःखी होले, पर ऐथा री तेईऐ कि तुस्से तेई बेड़े प्यारा बे जाणले, जो मुबे तुस्सा सेघे सा।

### पापी बे माफी

5 अगर कोई ऐ दुःखी केरी रै सी, ता मुबे नी पर (कि तेई सेघे बोहु सरख्ती नी केरनु) किछ ता तुस्से भी दुःखी केरी रै सी। 6 ऐन्डे माहणु री तेईऐ जो सजा सेभी भाईऐ धीनी सा, सौ सज सा। 7 तेबे ऐथा न खरा सा कि तेई बे माफ केरले, होर शान्ति देले, ऐन्डा नी लोडी हुआ कि सौ माहणु दुःखा न पोड़ीया रोहला। 8 ऐसा बजा न हाँऊ तुस्सा न विनती केरा सा, कि तुस्से आपणी झुरी रा सबूत देआ 9 किबेकी में तेबे भी लिखु ती, कि तुस्सा बे प्रेरखणु, कि सेभी गल्ला बे मनणे री तेईऐ त्यार होले, कि नी। 10 जुणी रा तुस्से किछ माफ केरा सी ता तेई बे हाउ भी माफ केरा सा, किबेकी में भी किछ माफ केरु सा, अगर केरी रा होला, ता तुस्सारी बजाह न मसीहे री जगा न होइया माफ केरु सा। 11 कि दुष्ट शैताना रा आसा पेंदे दाव नी चलला, किबेकी आसे तेई री बुरी चाला न अनजान नी आथि।

### त्रोआस न पौलूसा री व्याकुलता

12 होर जेबे हाँऊ मसीह रा सुसमाचार, शुणाणे री तेईऐ त्रोआसा न आऊ, होर प्रभुऐ मेरी तेईऐ एक दुआर खोली धिनु। 13 ता मेरे मन्ना न चेन नी मिलु, किबेकी में आपणा भाई तीतुस नी मिलु, ता तिन्ना न विदा केरिया हाँऊ मकिदुनिया बे नौठा।

### मसीह न जीत

14 पर परमेश्वरे रा धन्यवाद हो, जो मसीही न आसा बे हमेशा जय री खुशी(उत्सव) न चला सा, होर आपणे ज्ञाना री खुशबु आसरे दुआरा सेभी जगा फैला सा। 15 किबेकी आसे परमेश्वरे रै नेड उध्दार पाणु आले, होर नाश होणु आले न, दुई तेईऐ मसीही री खुशबु (सुगन्ध) सी। 16 केतरे लोका री तेईऐ मौउती री नेड मौउती री गन्ध, होर केतरे लोका री तेईऐ जिन्दगी री नेड जीणे री खुशबु, होर इन्ना गल्ला रै लायक कुण सा? 17 किबेकी आसे तिन्ना बोहु लोका साही नी, जो परमेश्वरे रै वचना न मिलावट केरा सी; पर मन्ना री सच्चाई सेघे, होर परमेश्वरे री तरफा न परमेश्वरे री उपस्थिति समझीया मसीह न बोला सी।

### नंऊई वाचा रै दास

3 कि आसे फिरी भी आपणी तारीफ बोलदे रोहणा? कि आसा बे केतरे लोका साही सिफारिशे रै चिठी तुस्सा हागे आणणे पोऐ कि तुस्सा न लेणे सी? 2 आसरी चिठी ता तुस्से सी, जो तुस्सा रै दिला न लिखु हुन्दी सा, होर तेथा बे सेभे माहणु पहचाणा सी होर पोड़ा सी। 3 ऐ प्रगट सा, कि तुस्से मसीहा री चिठी सी, जुणी बे आसे सेवका साही लिखा सी; होर जौ स्याही सेघे नी लिखदे; पर जिन्दे परमेश्वरे री आत्मा सेघे पाथरे री तख्ती(पटिया) पेंदे नी, पर दिले री मांस रूपी पटिया पेंदे लिखु सा। 4 आसे मसीहे रै दुआरा परमेश्वरे पेंदे ऐन्डाए बशाह रखा सी। 5 ऐन्डा नी, कि आसे आपणे आपु बे ऐथा लायक समझा सी, कि आपणी तरफा न कोसी गल्ला रा विचार केरी सकले; पर आसरी योग्यता परमेश्वरे री तरफा न सा। 6 जुणीऐ आसे नौऊइ वाचा रै सेवक होणे रै लायक भी बणाणे सा, बोलणे रै सेवक नी पर आत्मा रै; किबेकी बोलणा(शब्द) मारा सा, पर आत्मा जिन्दा केरा सा। 7 होर मौऊती रा ऐ वादा जुणी रै अश्रर पाथरा पेंदे खोणीया लिखी रै ती, ओखे तक शक्तिशाली हुई, कि मूसा रै मुंहा पेंदे जो प्याशे साही चमकदा लागी रा ती तेथा री बजाह न जो कम होदा रोहा ती, इस्राएली लोका तेई रै मुंहा बे हेरी नी सकदे ती। 8 ता आत्मा रा वादा होर भी शक्तिशाली किबे नी होणा?

9 किबेकी जेबे दोष लाणु आला वादा शक्तिशाली ती, ता धर्मी केरणु आला वादा होर भी जादा शक्तिशाली किबे नी होणा? 10 होर जो शक्तिशाली ती, सोभी तेसा शक्ति री बजा न जो तेथा भी ज्यादा शक्तिशाली ती, किछ शक्तिशाली नी हुरे। 11 किबेकी जेबे कोई जो घटदा जा ती शक्तिशाली ती, ता सो जो पक्का रोहला; होर भी ज्यादा शक्तिशाली किबे नी होणा? 12 ता ऐन्डा बशा रखिया आसे हिमती सेघे बोला सी। 13 होर मूसा साही नी, जुणीऐ आपणे मुंहा पेंदे परदा पाऊ ती कि इस्राएली तेसा कम होणु आली चिजा रै फरक नी हेरलो। 14 पर ते मुख (मतीमन्द) बणे सी, किबेकी औजा तक पुराणे नियमा बे पोड़दे बोक्त तिन्ना रै दिला न भी सोऐ पर्दा पोड़ी रोहा सा; पर सौ मसीह न खुला होआ सा। 15 होर औजा तक जेबे केबे भी मूसा री किताब पोड़ा सी, ता तिन्ना रै दिला पेंदे पर्दा पोड़ीया रोहा ती। 16 पर जेबे भी तिन्ना रा मन प्रभु धीरे फिराला, ता तेबे सो पर्दा फटे हटणा। 17 प्रभु ता आत्मा सा: होर जोखे कोखे प्रभु रा आत्मा सा ता तोखे आज्ञादी सा। 18 पर जेबे आसे सेभी रै खुले मुंहा सेघे प्रभु री शक्ति रा प्रकाश ऐन्डा प्रगट होआ सा, जेन्डी तरहा शीशे न, ता प्रभु री तरफा न जो आत्मा सा, आसे तेसा शक्तिशाली रूपाने थोड़ा-थोड़ा केरिया बदलते) होदे रोहा सी।

### मट्टे रै भांडे न धन

4 1 तेबे जेबे आसा पेंदे ऐन्डी दया हुई सा, कि आसा बे ऐ सेवा मिली सा, तेबे ता आसे हिम्मत नी छोडदे। 2 पर आसरे शर्मनाक कौम छोडी धिने सी, होर ना चलाकी सेघे चला सी, होर परमेश्वरे रै वचना न मिलावट नी केरदे, पर सच्चाई बे प्रगट केरा सी, परमेश्वरे रै सामने सेभी माहणु रै दिमागा न आपणी भलाई बे बशा सी। 3 अगर आसरे सुस्मचारा पेंदे कोई पर्दा पोड़ी सा, ता ऐ नाश होणु आले री तेईऐ पोड़ु सा। 4 होर तिन्ना जो विश्वास नी केरणु आले री तेईऐ, जुणी री बुद्धि ऐई संसारा रै ईश्वरे काणी केरी सा, कि मसीह जो परमेश्वरे रा दूजा रूप सा, प्रभु रै शक्तिशाली सुसमाचारा रा प्याशा तिन्ना पेंदे नेई चमकला। 5 किबेकी आसे आपणे नेई, पर मसीह यीशु रा प्रचार केरा सी, कि सौ प्रभु सा, होर आपणे बारे न ऐ बोला सी कि आसे यीशु मसीह री बजा न तुस्सेरे सेवक सी। 6 किबेकी परमेश्वर ही सा, जुणीऐ बोलु, कि न्यारे न प्याशा चमकला; कि परमेश्वरे री महिमा री पचाहणे रा प्याशा यीशु मसीही रै मुंहा न प्रकाशमान होला। 7 पर आसा हागे ऐ दोलत माटे रै भान्डे न रखणे धीनी सा, कि ऐ बडी शक्ति आसारी तरफा न नी, पर परमेश्वरे री तरफा न सा। 8 आसे चौऊ पासे न दुःख तकलीफ ता भोगा सी, पर दुःखा न पोड़ीया नी रोहदे; न्यारा ता सा पर निराश नी होदे। 9 सताए ता जा सी; पर त्यागे नी जादे; शोटा ता सी, पर नाश नी होदे। 10 आसे यीशु मसीहा री मौउती बे आपणे शरीरा न हर बोक्त सेघे लेईया फिरा सी; कि यीशु री जिन्दगी भी आसरे शरीरा न प्रगट होली। 11 किबेकी आसे जिन्दे जी हमेशा यीशु री बजा न मौऊती रै होथा न धीनी हुँदै सी कि यीशु री जिन्दगी भी आसरे मौरु हुँदै शरीरा न प्रगट होआ सा। 12 तेबे मौऊत ता आसा पेंदे प्रभाव पा सा होर जिन्दगी तुस्सा पेंदे। 13 होर आसा न सौहे बशाहा री आत्मा सा, (जुणी रै बारे न लिखु हुंदा सा, कि में बशा केरु, तेबे हाउ बोला सा) आसे भी बशा केरा सी, तेबे ता बोला सी। 14 किबेकी आसे जाणा सी, जुणीऐ प्रभु यीशु जिन्दा केरु सा, सौऐ आसा बे भी प्रभु यीशु रै सेघी समझिया जिन्दे केरने, होर तुस्सा सामने पेश भी केरने। 15 किबेकी सब चिजा तुस्सेरी तेईऐ सी, कि अनुग्रह बोहु लोके रै दुआरा ज्यादा होईया परमेश्वरे री महिमा री तेईऐ धन्यवाद भी भडाले। 16 तेबे आसे हिम्मत नेई चोडदे; जेबेकी आसरा बारी माहणु रा शरीर भी नाश होआ सा, तेबे भी आसरा आंधरे रा माहणु हर रोज नोऊआ होन्दा जा सा। 17 किबेकी आसरा घड़ी भरे रा दुःख सा दुःख आसरी तेईऐ बोहु जरूरी सा होर हमेशा महिमा पेंदा केरदा जा सा। 18 होर आसे ता हेरी हुन्दी चिजा बे नेई पर नी हेरी हुन्दी चिजा बे हेरदे रोहा सी, किबेकी हेरी हुन्दी चिजा थोड़े रोजे री सी, पर नी हेरी हुन्दी चिजा हमेशा बेणीया रोहा सी।

### आसरा स्वर्गीय घोर

5 किवेकी आसे जांणा सी, कि जेबे आसारा धोरती पेंदे रा ऐ डेरे रा ऐ घोर जुणी न आसे रोहा सी गिराणा सा ता आसा बे परमेश्वरे री तरफा न स्वर्ग पेंदे आसा बे एक ऐन्डा घोर मिलणा, जो हौथा सेधे नी बणी रा होणा पर हमेशा रा घोर सा। 2 ऐथा न ता आसे दाह सौहा सी, होर बड़ी इच्छा रखा सी; कि आपणे स्वर्ग रें घोर बे लाणा चाहा सी। 3 कि तेथा रें लाणे सेधे आसे कदी नागे नी होले। 4 हौर आसे ऐई डेरे न रोहदे घेरे दुःखा रे बौझा बे सौहदे रोहा सी, किवेकी आसे नी खोलणा, पर लाणा चाहा सी, ताकि सो जो मरणहार शरीर सा अमरता न डूबणा। 5 हौर जुणीऐ आसे ऐसा गल्ला री तेईऐ तयार केरी रें सी सौ परमेश्वर सा, जुणीऐ आसा बे बदले न आत्मा धीनी रा सा। 6 ता आसे हमेशा हिम्मत रखा सी हौर ऐ जांणा सी; कि जेबे तक आसे शरीरा न रोहा सी, तेबे तक प्रभु न अलग सी। 7 किवेकी आसे रूपरंगा बे हेरिया नी, पर विश्वासा सेधे चला सी। 8 तेबे आसे हिम्मत रखा सी, हौर शरीरा न अलग होइया प्रभु सेधे रोहणा हौर भी खरा समझा सी। 9 ऐसा बजा न आसे मन्ना री खुशी सा, कि चाहे सैधे रोहले, चाहे अलग रोहले पर आसे तेई बे खरे लागले। 10 किवेकी जरूरी सा, कि आसा सेभी रा हाल मसीह रें न्याय सिहांसना सामने खुलिणा सा, कि सेभे माहणु आपणे-आपणे खेरे माडे कोमे रा बदला जो तेईऐ शरीरा न केरी रें सी पाले।

### परमेश्वरा संघे मेल मिलाप

11 ता प्रभु रा डोर मनिया आसे लोका बे समझा सी हौर परमेश्वरा आसरा हाल जांणा सा; होर मेरा बशा ऐ सा, कि तुस्सा पेंदे भी प्रगट हुआ होला। 12 आसे तेबे भी आपणी बड़ाई नी केरदे पर आसे आपणे बारे न तुस्सा बे घमण्ड केरने रा मौका देया सी, कि तुस्से तिन्ना बे उतर देई सकले, जो मना पेंदे नी, पर दिखाबटी गल्ला पेंदे घमण्ड केरा सी। 13 अगर आसे बेसुध सी, ता परमेश्वरे री तेईऐ; होर चोकन्या सा, ता तुस्सा री तेईऐ सा। 14 किवेकी मसीही रा प्यार आसा बे विवश केरा सा; जेबे कि आसे ऐ समझा सी, कि जेबे एक सेभी री तेईऐ मुआ ता सेभे मुऐ। 15 हौर सौ ऐन्डी तरह सेभी री तेईऐ मुआ, कि जो जिन्दे सी, ते आगे बे आपणी तेईऐ नई जिले पर तेई री तेईऐ जिले जो तिन्ना री तेईऐ मुआ होर फिरी जिन्दा हुआ सा।

### मसीह न नऊँई सृष्टि

16 ता ऐबे न फेटे आसा कोई माहणु बे शरीरा रें मुताविक नी समझणा, होर अगर आसे ता मसीहा बे भी शरीरा रें मुताविक जांणा सी, पर ऐबे न लेकर ऐन्डा नी जांणणा। 17 ता अगर कोई मसीह न सा ता सौ नोई सृष्टि सा: पूराणी गल्ला खत्म हुई सा; हेरा, ते सब नोऊँई हुई सा। 18 हौर सब गल्ला परमेश्वरे री तरफा न सी, जुणीऐ मसीही रें दुआरा आपु सेधे आसारा मेल-मिलाप कराऊ सा, होर मेल-मिलापे री सेवा आसा बे धीनी सा। 19 मतलब परमेश्वरे मसीह न होइया आपु सेधे संसारा रा मेल-मिलाप केरु सा, होर तिन्ना री गलती रा दोष तिन्ना पेंदे नई लाऊ परमेश्वरे आसा बे मेल-मिलापा रा वचन आसा बे सम्भालणे बे धिनु सा। 20 ता आसे मसीह रें राजदूत सी; मना परमेश्वर आसारे दुआरा समझा सा: आसे मसीही री तरफा न विनती केरा सी, कि परमेश्वरा सेधे मेल-मिलाप केरा। 21 जो बुराई बे नंजाण सा, सौ तेईऐ आसरी तेईऐ पाप गिणाणु सा, कि आसे तेई न होइया परमेश्वरे री धार्मिकता बणले।

6 हौर आसे जो तेई रें सैघी सी ऐ भी समझा सी, कि परमेश्वरे रा अनुग्रह जो तुस्सा पेंदे हुआ सा, बेकार मौता रोहणे घात 2 किवेकी सौ ता बोला सा, कि आपणी सराहणा रें बोक्त में ता तुस्सेरी शुणी, होर मुक्ति रें धियाडे में तुस्सेरी मददत केरी: हेरा, ऐबे सौ खुशी रा मौका सा; हेरा, ऐबे मुक्ति रा धियाडा सा। 3 आसे कोसी गल्ला न कोसी बे भी ठोकर खाणे रा मौका नी देन्दे, कि आसारी सेवा पेंदे कोई दोष नी लाला। 4 पर सेभी गल्ला न परमेश्वरे रें सेवक होणे रें नाते आपणे शोभले गुणा बे प्रगट केरा सी, बड़े धीरजा सेधे, दुःखा न, मजबूती सेधे, कलेशा न। 5 कोडे खाणे न, जेल होणे न, हुल्लडो न, जागदे रोहणे न, बर्त्त केरने न। 6 पवित्रता न, ज्ञाना न, धीरजा

न, कृपालु बणणे न, पवित्र आत्मा न। 7 सेच्ची झुरी न, सच्चे वचना न, परमेश्वरे री शक्ति न; धार्मिकता रें हथियारा सेधे जो आसरे जो आसरे दाऐ, बाऐ सी। 8 ईज्रती न होर बेस्ती न, बदनाम होर शोभला नाम, जेंडे भडकाणु आले साही लागा सी पर सेच्चे सी। 9 नी जाणणु आले साही सी; पर तेबे भी प्रसिध्द सी; मौरु हुँदें साही सी हौर हेरा जिन्दे सी; मार खाणु आले साही सी पर जानी न मारीदे नी। 10 दुःख केरणु आले साही सी, पर हमेशा खुशी मना सी, गरीबा साही सी, पर बोहु लोका बे धनवान बना सी, ऐन्डे सी कि आसा हाग्गे किछे नी आथि पर तेबे भी सब किछ रखा सी। 11 हे कुरुथियो, आसे तुस्सा सेधे खुले होइया गल्ला केरी सी, आसरा दिल तुस्सारी तेईऐ खुला सा। 12 तुस्सेरी तेईऐ आसारे मन्ना न किछ सन्देह नी आथि, पर तुस्सा रें मन्ना न सन्देह सा। 13 पर आपणे बाल-बच्चे समझिया तुस्सा बे बोला सा, कि तुस्से भी तेई रें बदले न आपणा दिल खोला।

### विश्वासी होर अविश्वासी

14 अविश्वासी साही असमान जुए न मौता जुडा, किवेकी धार्मिकता हौर अधर्मा रा कि मेल जोल? या फिरी प्याशे होर नहारे री कि संगत? 15 होर मसीह रा बलियाल सेधे कि लगाव? या विश्वासी सेधे अविश्वासी रा कि नाता? 16 हौर मुक्ति सेधे परमेश्वरे रा मन्दिरा सेधे कि नाता? किवेकी आसे ता जिन्दे परमेश्वरे रा मन्दिरा सी; जेंडा परमेश्वरे बोलु सा कि मुं तिन्ना न रोहणा होर तिन्ना न चले फिरे केरना; होर हाऊ तिन्ना रा परमेश्वर होणा, हौर ते मेरी प्रजा होणी। 17 तेबे प्रभु बोला सा, कि तिन्ना मौझे न निकला होर अलग रोहात; हौर अशुद्ध चिजा बे मौता छूगे, तेबे मुं तुस्से ग्रहण केरने। 18 होर तुस्सरा पिता हाऊ होणा, होर तुस्से मेरे बेटे होर बेटी होणे: ऐ सर्वशक्तिमान प्रभु परमेश्वरे रा वचन सा।

7 ता मेरे प्यारो जेबे आसा बे ऐ प्रतिज्ञा मिली सा, ता ऐजा, आसे आपणे आपु बे शरीर होर आत्में री सारी कमजोरी (बुराई) न शुद्ध केरले, होर परमेश्वरे रा डोर रखा होर पवित्रता बे सिद्ध केरा।

### पौलुसे री खुशी

2 आसा बे आपणे दिला न जगा देया: आसे कोसी सेधे अन्याय नी केरु, ना कोसी रा किछ बिगाडू, होर ना कोई ठगु। 3 हाऊ तुस्सा बे दोषी बनाणे री तेईऐ ऐन्डा नी बोलदा: किवेकी में ऐन्डा पेहले ही केरी छेकू सा, कि तुस्से आसारे दिला न ऐन्डे बसी रें सी कि आसे तुस्सारी तेईऐ मौरने जीणे री तेईऐ तयार सी। 4 हाऊ तुस्सा सेधे बड़ी हिन्ती सेधे बोलदा लागा सा; मुबे तुस्सा पेंदे बड़ा घमण्ड सा: हाऊ शान्ति सेधे भोरुआ सा; आपणे सारे दुःखा न हाऊ खुशी सेधे भरपुर रोहा सा। 5 किवेकी जेबे आसे मकिदुनिया न आए, तेबे भी आसरे शरीरा बे चैन नी मिलु, पर आसे चौऊ पासे न दुःख पा सी; बाहरे झगडे ती; आन्दरे भयंकर (भूरी) गल्ला ती। 6 तेबे भी कमजोर माहणु बे शान्ति देणु आले परमेश्वरे तितुसे रें ऐणे न आसा बे शान्ति धीनी सा। 7 होर ना आसा बे केले पर तेई री तेसा शान्ति न भी, जो तेई बे तुस्सारी तरफा न मिली ती; हौर तेईऐ तुस्सेरी इच्छा, हौर तुस्सेरे दुःख होर मेरी तेईऐ तुसेरी मगन होणे (धुना) रा समाचार आसा बे शुणाणु, जुणी सेधे मुबे होर भी खुशी मिली। 8 किवेकी कि में तुस्से आपणी पत्री सेधे दुःखी केरे, पर तेथा न पछताऊ नी जेडा पेहले पछताऊ ती किवेकी में हेरु सा, कि तेसा पत्री सेधे तुस्से दुःखी ता हुऐ पर सौ दुःख थोड़ी देरी री तेईऐ ती। 9 ऐबे हाड खुश सा पर ऐथा री तेईऐ नी कि तुस्सा बे दुःख हुआ पर ऐथ री तेईऐ कि तुस्से तेई दुःखा री बजा न आपणा मन फेरु, किवेकी तुस्सा दुःख परमेश्वरे री तरफ न ती, कि आसारी तरफा न तुस्सा बे कोई गल्ले रा कष्ट नी होला। 10 किवेकी परमेश्वर री मर्जी रें मुताविक जो दुःख होआ सा सौ ऐन्डा पछताप पैदा केरा सा जुणी रा परिणाम उद्धार सा होर जुणी सेधे पछताणा नी पोडदा: पर संसारीक दुःख मौऊत पैदा केरा सा। 11 ता हेरा, ऐसा गल्ला न कि तुस्से बे परमेश्वरे री भक्ति न दुःख हुआ तुस्सा न केतरी इच्छा होर उत्साह होर रिस, होर डोर, होर लालसा, होर धुन होर बदला लेणे री सोच पैदा हुई तुस्से सभी तरफा न सिद्ध बणीया, कि तुस्से ऐसा गल्ला न निर्दोष सी। 12 तेबे में जो तुस्सा हाग्गे लिखु ती, सौ तेई री बजा न नई लिखु, जुणीऐ अन्याय केरु, होर

ना तेई री बजा न जुणी पेंदे अन्याय केरु ती, पर तेबे कि तुस्सेरी लालसा जो आसारी तेईरे सा, सौ परमेश्वरे रै सामने तुस्सा पेंदे प्रगट हुआ।<sup>13</sup> तेबे आसा बे शान्ति हुई; होर आसेरी ऐसा शान्ति सेधे तितुसे री खुशी री बजा होर भी खुशी हुई किबेकी तेई रा जिऊ तुस्सा सेभी री बजा न हरा भरा हुआ सा।<sup>14</sup> अगर में तेई रै सामने तुस्सेरे बारे न किछ घमण्ड हिहाऊ, ता शर्मिदा नई हुआ, पर जेंडी आसे तुस्सा बे सब गल्ला सच-सच बोली ती, तेंडे ही आसरा तितुसा सामने घमण्ड रिहाणा सच हुआ।<sup>15</sup> होर जेबे तेई बे तुस्सा सभी री आज्ञाकारी होणे री यद् केरा सी, किबेकी तुस्से डोरदे होर कोमदे-कोमदे तेई सेधे मिले; ता तेई री झुरी तुस्सेरी तेईरे हौर बड़डी जा सा।<sup>16</sup> हाऊ खुशी (आनन्द) केरा सा, कि तुस्सेरी तरफा न मुबे सभी गल्ला न हिम्मत मिला सा।

### उदातापूर्वक दान देणा

8 ओ मेरे सभे भाई, आसे तुस्सा बे परमेश्वरे रै तेई अनुग्रहा रा सुसमाचार देया सी, जो मकिदुनिया री सारी कलीसिया न हुआ सा।<sup>2</sup> कि दुःख री बड़ी परिक्षा न तिन्नेरी बड़ी खुशी न होर बड़ी भारी गरीबी बड़ने सेधे तिन्ने री उदारता बोहु बड़ी सा।<sup>3</sup> होर तिन्ने रै बारे न मेरी ऐ गवाही सा, कि तिन्ने आपणी शक्ति सेधे पर शक्ति न भी ज्यादा मना सेधे धिनु।<sup>4</sup> होर ऐई दाने न होर पवित्र लोके री सेवा न भागी होणे होर अनुग्रहा रै बारे न आसे घड़ी-घड़ी बिनती केरी।<sup>5</sup> होर जेंडी आसे बशाह केरी ती, तेंड ही नी, पर तिन्ने प्रभु बे, फिरी परमेश्वरे री मर्जी सेधे आसा बे भी आपणी तेईरे धिनु सा।<sup>6</sup> तेबे आसे तितुस समझाऊ, कि जेंडा तेईरे पेहले शुरू करु ती, तेन्डे ही तुस्से रै बीचा न ऐई दाने रै कोमा बे पूरा भी केरा।<sup>7</sup> ता जेंडे सेभी गल्ला न अर्थात विश्वास, वचन, ज्ञान होर सेभी तराह रै यत्न, होर तेस्सा झुरी न, बोड़दे जा सी, तेंडे ही ऐई दाने रै कौमा न बोड़दे जा।<sup>8</sup> हाऊ हुक्मे री तरह ता नई, पर हौरी रै उत्साह सेधे तुस्से रै प्यारे री सच्चाई बे परखणे री तेईरे बोला सा।<sup>9</sup> तुस्से आसेरे प्रभु यीशु मसीहा रै अनुग्रहा बे जांगा सी, कि सौ धनी होइया भी आसेरी तेईरे गरीब बणु कि तेई रै गरीब होणे सेधे तुस्से धनी होले।<sup>10</sup> होर ऐसा गल्ला रै बारे न मेरा विचार ऐ सा, किबेकी ऐ तुस्सेरी तेईरे शोभला सा; जो ऐकी बोर्षा न ओरे न ऐ कौम केरने न, होर ऐसा गल्ला रै चाहणे न भी पेहले हुए।<sup>11</sup> ता ऐबे तुस्से ऐ कौम पूरा केरा; कि जेंडी मर्जी केरने बे तुस्से तयार ती, तेन्डा ही आपणी-आपणी कमाई रै अनुसार पूरा केरा।<sup>12</sup> किबेकी अगर हाऊ मन्ने री तयारी होली ता दान तेथा रै मुताविक ग्रहण होणा सा जो तेई हागे सा ना कि तेथा रै मुताविक कि जो तेई हागे नई आधि।<sup>13</sup> ऐन्डा नी कि हौरी बे चैन होर आपु बे दुःख मिलला।<sup>14</sup> पर बराबरी री सोचा न ऐई बोक्त तुस्सेरी बढ़ती तिन्नेरी घटती न कौम ऐली, ताकि तिन्नेरी बढ़ती भी तुस्सेरी घटती न कौम ऐली, कि बराबरी होली।<sup>15</sup> जेंडा लिखु सा, कि जुणीऐ बोहु केठा केरु तेईरा किछ बोहु नी निकलू होर जुणीऐ थोडा केठा केरु तेईरा किछ कम नी निकलू।

### तीतुस होर तेईरे सेंधी

16 होर परमेश्वरे रा धन्यवाद सा, जुणीऐ तुस्सेरी तेईरे तितुसे रै मन्ना न सोऐरे<sup>17</sup> कि तेईरे आसरा समझना मनु सा होर बोहु खुशी होइया सौ आपणी मर्जी सेधे तुस्सा हागे आऊ सा।<sup>18</sup> होर आसे तेई सेधे सौ भाई भेजू सा जुणी नाऊ सुसमाचार शुणाणे रै बारे सारी कलीसिया न मशहूर हुआ सा।<sup>19</sup> होर ऐतरा ही नी, पर सौ कलीसिया न नियुक्त भी केरु सा कि दाने रै कोमा री तेईरे आसा सेधे जाला होर आसे ऐ सेवा ऐथा री तेईरी केरा सी, कि प्रभु री महिमा होर आसेरे मन्ना री तयारी होली।<sup>20</sup> आसे ऐसा गल्ला न सावधान रोहा सी, कि ऐई उदारता रै कौमा रै बारे जुणी री सेवा आसे केरा सी, कोई आसा पेंदे दोष नी लाई सकला।<sup>21</sup> किबेकी जो गल्ला प्रभु रै ही केले नेड नी, पर माहणु री तेईरे भी खरी गल सा आसे तिन्ने री चिंता केरा सी।<sup>22</sup> होर आसे तेई सेधे आपणा भाई भेजी रा सा, जुण आसे घड़ी-घड़ी परखीया भी बोहु खुशी हेरु सा; पर ऐबे तेई रा तुस्सा पेंदे बशा सा, ऐसा बजा न सौ होर भी ज्यादा खुशी हुआ।<sup>23</sup> अगर कोई तितुसे रै बारे न पुछला, ता सौ मेरा साथी सा, होर तुस्सेरी तेईरे मेरा सेधी सा, होर अगर मेरे भाई रै बारे न पुछले, ता ते कलीसिया न भेजी हुँदै होर मसीहे री महिमा सी।<sup>24</sup> ता आपणी झुरी हौर

आसरा सौ घमण्ड जो तुस्सेरे बारे न सा कलीसिया रै सामने सावित(सिद्ध) केरिया रिहात ॥

### सेंधी मसीह री तेंडिये मजत

9 ऐबे तेसा सेवा रै बारे न जो पवित्र लोका री तेईरे केरा सी, मुबे तुस्सा बे लिखणा जरूरी नई आधि।<sup>2</sup> किबेकी केरा हाऊ तुस्से रै मन्ना री तयारी बे जाणा सा, जुणी री बजा न हाऊ मकिदुनिया रै सामने तुस्से रै बारे न घमण्ड सा, कि अखया रै लोका ऐकी बोषा न पौरे तयार हुए सी, हौर तुस्सेरी खुशीऐ होर भी बोहु लोका उत्साहित केरे सी।<sup>3</sup> पर में ऐ भाई तेबे भेजी रै सी, कि आसे जो घमण्ड केरु ती तुस्सेरे बारे, सौ ऐसा गल्ला न बेकार नी होला; पर जेन्डा में बोलु ती; तेंडे ही तुस्से तयार रोहा।<sup>4</sup> ऐन्डा नी होला, कि अगर कोई मुं सेधे ऐला, होर तुस्से तयार नी हुई होले, ता कि पता, ऐई बशा री बजाह न आसे (ऐ नी बोलदे कि तुस्से) शर्मिदा होले।<sup>5</sup> तेबे में ईन्ना भाई सेधे विनती केरना जरूरी समझू कि ते पहले तुस्सा हागे ऐले होर तुस्सेरी उदारता रा फ़ोल जुणी रै बारे न हाऊ पेहले न वचन देया केरा ती, कि तयार केरिया रखले, कि ऐ दबावा सेधे नी पर उदारता रै फ़ोला साही तयार होले।

### दान केंडै देणा

6 पर गल्ल ता ऐ सा, कि जो थोडा बाहा सा सौ थोड़ाऐ काटा भी सा; होर जो ज्यादा बाहा सा, सौ ज्यादा काटा।<sup>7</sup> हर ऐक जण जेंडा आपणे मन्ना न सोचिया रखा सा तेन्डाऐ दान केरी ना कि कुड़ी कुड़ीया, होर ना दबावा सेधे, किबेकी परमेश्वर खुशी सेधे देणु आले सेधे खुश रोहा सा।<sup>8</sup> होर परमेश्वरा तुस्सा पेंदे सेभी तराह अनुग्रह बहुतायता सेधे देई सका सा जुणी सेधे सेभी गल्ला न होर सेभी बोक्ता, न सब किछ, जो तुस्सा बे जरूरी होला, तुस्सा हागे रोहला, होर हर ऐक खरे कौमाँ री तेईरे तुस्सा हागे बोहु किछ होला।<sup>9</sup> जेन्डा लिखु सा, कि तेईरे बखेरु (बिखराया), तेईरे गरीवा बे दान धिना, तेई रा धर्म हमेशा बणी रोहणा।<sup>10</sup> ता सौ जो बाहणु आले रा बेजा, होर खाणे री तेईरे रोटी देया सा तेई तुस्सा बे बेजा देणा, होर तेई सौ फलवन्त केरना; होर तुस्सेरे धर्मा रा फ़ोल बड़ाणा।<sup>11</sup> कि तुस्से हर ऐक गल्ला न सेभी तरह री उदारता री तेईरे जो आसेरे दुआरा परमेश्वरे रा धन्यवाद केरव सी, धन्यवाद केरले।<sup>12</sup> किबेकी ऐसा सेवा बे पूरा केरने सेधे, पवित्र लोके री कमीघटी पूरा होआ सी, पर लोका री तरफा न परमेश्वरे रा बोहु-बोहु धन्यवाद होआ सा।<sup>13</sup> किबेकी ऐसा सेवा रा सबूत नैइया ते परमेश्वरे री महिमा प्रगट केरा सी, कि तुस्से मसीहा रै सुसमाचारा बे मनिया तेथा रै आधीन रोहा सी, होर तिन्ने री, होर सेभी री सहायता केरने री तेईरे उदारता सेधे प्रगट केरदे रोहा सी।<sup>14</sup> होर ते तुस्सेरी तेईरे प्रार्थना केरा सी; होर तेबे तुस्सा पेंदे परमेश्वरे रा बड़ा अनुग्रह सा, तुस्से री इच्छा केरदे रोहा सी।<sup>15</sup> परमेश्वरा वे तेईरे तेई दाना री तेईरे जो सीमा न बाहर सा, धन्यवाद केरा सी ॥

### पौलुस रा अधिकार

10 हाऊ सौहे पौलुस जो तुस्सा सामने दीन बणु सा, पर पीठी पीछे तुस्से री तरफ साहस केरा सा; तुस्सा बे मसीही री नम्रता, होर कोमलता री बजा न समझा सा।<sup>2</sup> हाऊ ऐ विनती केरा सा, कि तुस्सा सामने निडोर होइया साहस नी केरना पोड़दा; जेंडा हाऊ केतरे पेंदे जो आसा बे शरीरा रै अनुसार चलणु आले समझा ती, विरता हिहाणे रा विचार केरा सा।<sup>3</sup> किबेकी अगर आसे शरीरा न हौंडा फिरा सी, तेबे भी शरीरा रै मुताविक नी लडदे।<sup>4</sup> किबेकी आसेरी लडाई रै हथियार शरीरा रै मुताविक नी आधि, पर सेभी न ताकतवर झोंता बे भी शेटणे री तेईरे परमेश्वरेरी तरफा न शक्ति सा।<sup>5</sup> ता आसे सोच विचारा बे, होर सेभे ऊथडी गल्ला रै बे, जो परमेश्वरे री पहचाने रै विरोधा न उठा सा, खण्डन केरा सी, होर सेभी सोच विचर बे केद केरिया मसीहा रा हुक्म मनणु आला बना सी।<sup>6</sup> होर तयार रोहा सी कि जेबे तुस्सा रा हुक्म मनणा पूरा होला, ता सेभी हुक्म नी मनणु आले रा बदला लेले।<sup>7</sup> 7 तुस्से इन्ना गल्ला बे हेरा सी, जो ओछी रै सामने सी, अगर कोसी आपणे आपु पेंदे ऐन्डा बशा होला, कि हाऊ मसीहा रा सा, ता

सौ ऐभी जाणला, कि जेंडा सौ मसीहा रा सा, तेन्डे आसे भी सी । 8 किबेकी अगर हाउ तेई अधिकारे रै बारे न होर भी घमण्ड रिहानु ता, जो प्रभुऐ आसा तुस्से रै बिगाडने री तेईऐ नेई धिना सा, ता कि शर्मिदा नी होल । 9 ऐन्डा हाऊ तेबे बोला सा, कि पत्री रै दुआरा तुस्सा बे डराणु नी बणला । 10 किबेकी बोला सी, कि तेई री पत्रीया ता गम्भीर सी होर शक्तिशाली सी; पर हेरा सी, सौ ता शरीरा न कमजोर होर वक्तव्य न होल्का जाण पोडा सा । 11 ता जो ऐन्डा बोला सा, सौ ऐन्डी समझ रखला, कि जेंडा पीठी पीछे आसेरे वचन सी, तेंडे ही तुस्सारे सामने कौम भी होणे । 12 किबेकी आसा बे ऐन्डी हिम्मत नी कि आसे आपणे आपु बे तिन्ना मोझे न केतरे सेघे गिणीणा, या फिरी तिन्ना सेघे मिलिले, जो आपणी प्रशंसा केरा सा, होर आपणे आपु बे नापी तोलिया ऐकी होरी सेघे बराबरी केरीया मुख्र बणा सी । 13 आसे ता सीमा न बाहर केदी भी घमण्ड नी केरले, पर तेसा सीमा तक जो परमेश्वरे आसेरी तेईऐ ठहराई सा, होर तेथा न तुस्से भी आईरै सी होर तेथा रै मुताविक घमण्ड भी केरले । 14 किबेकी आसे आपणे आपु बे आपणी सीमा न बाहर बड़ाणा नी चाहदे, जेंडा कि तुस्सा तक पुझणे री दशा न हुआ ती, पर मसीहा रा सुसमाचार शुणादे गेरे तुस्सा हाम्गे पूजी रै ती । 15 होर आसे सीमा न बाहर हौरी रै परिक्षमा पेंदे घमण्ड नी केरदे; पर आसे आशा रखा सी, कि जेंडा-जेंडा तुस्सा रा बशाह बढदा रोहला तेन्डे-तेन्डे आसा आपणी सीमा रै मुताविक तुस्सेरी बजा न होर बडेदे रोह । 16 कि आसे तुस्सेरी सीमा न आगे सुसमाचार शुणाले, होर ऐन्डा नी कि आसे होरी री सीमा आन्दरे बणाई हुन्दे कौमा न घमण्ड केरले । 17 पर जो घमण्ड केरला, सौ प्रभु पेंदे घमण्ड केरला । 18 किबेकी जो आपणी बड़ाई केरा सा, सौ नैई, पर जुणीरी बड़ाई प्रभु केरा सा, सौ ग्रहण केरना सा ॥

### पौलुस होर झूठे चेले

11 अगर तुस्से मेरी थोड़ी मुख्रता सोहदे ता क्या ही शोभला होणा ती, हां, मेरी सौहा भी सी । 2 किबेकी हाऊ तुस्से रै बारे ईश्वरी धुन लाईया रोहा सा, तेबे कि में ऐकी माहणु सेघे तुस्सेरी गल्ल लाई सा, कि तुस्से पवित्र कुवारी साही मसीहा बे समर्पण केरणु । 3 पर हाऊ डोरा सा कि जेंडे कीडे आपणी चलाकी सेघे बेटडी (हव्वा) भडकाई, तेंडे ही तुस्से रै मन्ना री सीधाई होर पवित्रता सेघे जो मसीह सेघे होई लोडी ती कोईचे भ्रष्ट नी केरला । 4 अगर कोई तुस्सा हाम्गे ऐला, कोसी होरी यीशु रा प्रचार केरला, जुणी रा प्रचार आसे नई केरु: या फिरी कोई होर आत्मा तुस्सा बे मिलली; जो पहले न मिला ती; नी ता होर कोई सुसमाचार जुण तुस्से पहले नी मनु ती, ता तुस्सा रा सौहणा ठीक सा । 5 हाऊ ता समझा सा, कि हाऊ कौसी भी गल्ला न बेडे न बेडे प्ररिता न कम नेई आथि सा । 6 अगर हाऊ व्यक्तव्य न अनाडी सा, ता तेबे कि ज्ञाना नी; पर आसे सेभी गल्ला न सेभी पेंदे तुस्से री तेईऐ प्रगट केरु सा । 7 तेबे कि ऐथा न में कोई पाप केरु ; कि में तुस्सा बे परमेश्वरे रा सुसमाचार संतमेत शुणाऊ; होर आपणे आपु बे हौछा केरा सी, कि तुस्से बेडे बणले? 8 में हौरा कलीसिया लुटी किबेकी में तिन्ना न मजदूरी मौगी, ताकि तुस्सेरी सेवा केरनु । 9 होर जेबे तुस्सा सेघे ती, हौर मुबे घटी हुई, ता में कोसी पेंदे बोझ नी पाऊ, किबेकी भाईबंदुरे, मकिदुनिया न एजिया मेरी कमी घटी पूरी केरी: होर में आपणे आपु बे तुस्सा पेंदे भार पाणे न रुकु, होर रुकिया रोहणा । 10 अगर मसीहा री सच्चाई मुं न सा, ता अख्या देशा न कोई मुबे ऐई घमंडा न नी रोकला । 11 किजी री तेईऐ? कि तेबे कि हाऊ तुस्सा सेघे झुरी नी रखदा? परमेश्वर ऐ जांणा सा । 12 पर जो हाऊ बोला सा, सौहे हाऊ केरदे भी रोहणा; कि जो लोका मौका तौपा सी, तिन्ना बे बाजी मारने नेई देला, तेबे जुणी गल्ला ते घमण्ड केरा सी, तेथा न आसा साही निकले । 13 किबेकी ऐन्डे लोका झूठे प्ररित, होर धोखे रै कौम केरणु आले, होर मसीहा रै प्रेरिता रा रूप धारण केरणु आले सी । 14 होर ऐ अचम्भे री गल नई आथि किबेकी शैतान आपु भी ज्योतिमय स्वर्गदूते रा रूप धारण केरा सा । 15 ता तेई रै सेवक भी धर्मी सेवका रा रूप धारण केरले, ता किछ बड़ी गल्ल नी आथि पर तिन्ना रा अंत तिन्ने रै कौम रै मुताविक होणा ।

### चेले रै रूपा न पौलुसा रा दुःख

16 हाऊ फिरी भी बोला सा, कि कोई मुबे मुख्र नेई समझला, नेई ता मुख्र ही समझिया मेरी सौहा, ताकि थोड़ा झिह हाऊ भी घमण्ड केरणु । 17 ऐन्डा बेधडक घमण्ड बोलणे न जो किछ हाऊ बोला सा सौ प्रभु री तरफा न नेई पर मन्ना मुख्रता सेघे बोला सा । 18 जेबे कि बोहु लोका शरीरा रै मुताविक घमण्ड केरा सी, ता तेबे कि हाऊ भी घमण्ड केरणु । 19 तुस्से ता समझदार होईया भी खुशी सेघे मुख्र री सौहा सी । 20 किबेकी जेबे कोई तुस्सा बे दास बणा सा, या तुस्सा बे फसाई लेया सा, होर आपणे आपु बे बड़ा बणा सा, होर तुस्से रै मुंहा बे थप्पड मारा सा, ता तुस्से सौहा सी । 21 मेरा बोलणा अनादरे री रीति पेंदे सा, मन्ना कि आसे कमजोरा साही सी; पर जोस कोसी गल्ला कोई हिम्मत केरा सा (हाऊ मुख्रता बे बोला सा) ता हाऊ भी हिम्मत केरा सा । 22 तराई बार में (बेंतें) खाई; एक बार पत्थरवाह केरु; तराई बार जुणी जहाजा न हाऊ चेडी रा ती, चुटे; एक राती ध्याडी में समुन्द्रा न काटी । 23 तराई बार में (बेंतें) खाई; एक बार पत्थरवाह केरु; तराई बार जुणी जहाजा न हाऊ चेडी रा ती, चुटे; एक राती ध्याडी में समुन्द्रा न काटी । 24 पौज बार में यहूदी रै हौथा न उनताली-उनताली कोडे खाए सी 25 तराई बार में (बेंतें) खाई; एक बार पत्थरवाह केरु; तराई बार जुणी जहाजा न हाऊ चेडी रा ती, चुटे; एक राती ध्याडी में समुन्द्रा न काटी । 26 हाऊ घडी-घडी यात्रा न; नौइ रै जोखिमा न; डाकुऐ रै जोखिमा न; आपणे जाति आले रै जोखिमा न; अन्यजाति रै जोखिमा न; ग्रा रै जोखिमा न; जंगला रै जोखिमा न; समुन्द्रा रै जोखिमा न; झूठ बोलणु आले भाई रै बीचा न; 27 परिश्रम केरने होर कष्टा न; घडी-घडी जागदे रोहणे न; भूखे प्यासे न; घडी-घडी ब्रत केरने न; ठंडे न; खुले रोहणे न; 28 हौरी गल्ला छोडिया जुणी रा व्याख्या हाऊ नी केरदा सेभी कलीसिया री फिक्र मुबे हर रोज दबा सा । 29 कोसी री कमजोरी सेघे हाऊ कमजोर नी होन्दा? कोसी रै ठोकर खाणे न मेरा जिऊ नी दुःखदा? 30 अगर घमण्ड केरना जरूरी सा, ता हाऊ आपणी कमजोरी री गल्ला पेंदे केरनु । 31 पाभु यीशु रा परमेश्वरे होर पिता रा जो सदा धन्य सा, जांणा सा, कि हाऊ झूठ नी बोलदा । 32 दमिशका न अरितास राजे री तरफा न जो हाकिम ती, तेईऐ मुबे पकडने री तेईऐ दमिशकियो रै नगरा न पैरा लाईया रखी रा ती । 33 होर हाऊ टोकरे न खिड़की न होइया भीती बुने उतारु, होर तेई रै हौथा न बचीया निकलु ॥

### पौलुसा रा दिव्य दर्शन होर कमजोरी

12 तेबे भी घमण्ड केरना ता मेरी तेईऐ ठीक नी आथि पर तेबे भी केरना पोडा सा; ता हाऊ प्रभु रै धीनी हुँदे दर्शना रा होर प्रकाशे री चर्चा केरा सा । 2 हाऊ मसीहा न ऐकी माहणु बे जांणा सा; चौऊदा बोर्ष हुऐ कि ना जांणे शरीरा सेघे; ना जांणे शरीरा बेघेर, परमेश्वर जांणा सा, ऐन्डा माहणु तिरिजे स्वर्गा तक चकिया नेऊ सा । 3 हाऊ ऐन्डे माहणु बे जांणा सा ना जांणे शरीरा सेघे, ना जांणे शरीरा बेघेर परमेश्वर ही जांणा सा । 4 कि स्वर्गा लोका पेंदे चकिरा सा, होर ऐन्डी गल्ला शुणी जो बोलणे री नेई; हौर जोसा रा माहणु बे मुंहा पेंदे आणणा भी शोभला नेई आथि । 5 ऐन्डे माहणु पेन्डे मुं घमण्ड केरना, पर आपणे आपु री कमजोरी बे छोडीया, आपणे बारे न घमण्ड नेई केरणु । 6 किबेकी अगर हाऊ घमण्ड केरना भी चाहला ता मुख्र नी होला, किबेकी सच बोलणा साल; तेबे भी रुकि जा सा, तेबे भी रुकी जा सा, ऐन्डा नी होला, कि जेंडा कोई मुबे हेरा सा, या मुं न शुणा सा, मुबे तेई न ज्यादा समझला । 7 होर तेबे कि हाऊ प्रकाशना रै बोहु होणे री बजा न फुलला नी, मेरे शरीरा न एक कोणडा चुभाई रा सा अर्थात शेताने रा एक दूत जो मुबे घुसे मारला ताकि हाऊ फुलला नेई । 8 ऐथा रै बारे न में प्रभु सेघे तराई बार प्रार्थना केरी, कि ऐ मुन दूर होला । 9 होर तेईऐ मुबे बोलु, कि मेरा अनुग्रह तेरी तेईऐ बोहु सा; किबेकी मेरी शक्ति कमजोरी न सिद्ध होआ सा; तेबे हाऊ बड़ी खुशी सेघे आपणी कमजोरी पेंदे घमण्ड केरा सा, कि मसीहा री सामर्थ मुं पेंदे छाया केरदी रोहली । 10 ऐथा री बजा हाऊ मसीहा री तेईऐ कमजोर, होर निन्दा शुणने न; होर गरीवी न, होर कलेशा न; होर कष्टा न; खुश सा; किबेकी जेबे हाऊ कमजोर होआ सा, तेबे हाऊ बलबन्त होआ सा ।

## कुन्थी री तेंईये पौलसे री चिंता

11 हाऊ मुख ता बणु, पर तुस्से ही हे मुं न ऐ बरबस कराऊ सा: तुस्सा बे ता मेरी बड़ाई केरनी ती, किबेकी जेबेकी हाऊ किछ भी नी आथि, तेबे भी तिन्ना बेडे न बेडे प्रेरिता न भी कोसी गल्ला न कम नी आथि 12 प्रेरिता रै लक्षण (लक्षण) भी तुस्सारे रै बीचा न सेभी तराह रै धीरजा सेघे चिन्हा बे, होर अदभुत कोमा न, शक्ति रै कोमा सेघे हेरिले। 13 तुस्से कुणी जीह गल्ला न होरी कलीसिया न कम ती, पर ऐथा न कि मैं तुस्सा पेंदे आपणा भार नी पाऊ। मेरा ऐ झुलम माफ केरा। 14 हेरा, हाऊ त्रीजी बार तुस्सा हागे ऐणे बे त्यार सा, होर हाऊ तुस्सा पेंदे कोई भार नी रखणु; किबेकी हाऊ तुस्सेरी ढोलत नेई, पर हाऊ तुस्सा बे चाहा सा: किबेकी बाल-बच्चे बे आमा-बापू री तेईऐ धन कठा नी लोडी, पर आमा-बापू बे बाल-बच्चे री तेईऐ केठा केरु लोडी। 15 मुं तुस्से री आत्मा री तेईऐ बोहु धन खर्च केरना, ओखे तक कि आपु भी खर्च होई जानु: कि जेतारा ज्यादा झुरी हाउ तुस्सा सेघे रखा सा, तेतरी कम झुरी तुस्सा मुं सेघे रखणी? 16 ऐन्डा नी होई सकदा, कि हाऊ तुस्सा पेंदे बोझ नी पानु, पर चतुराई सेघे तुस्सा बे धोखा देईया फंसाए सी। 17 खरा, जुण में तुस्सा हागे भेजू, कि तिन्ना मोझे में कोसी रै दुआरा छल केरिया तुस्सा रा किछ नेऊ सा? 18 मैं तीतुस समझाईया तेई सेघे सौ भाई भेजू, कि तितुसे छल करिया तुस्सा न किछ नेऊ? कि आसे ऐकि आत्मा रै चलाए नी चल? कि ऐकि रस्ते पेंदे नुई चले? 19 तुस्से हाजी समझदे लागी रै होणे कि आसे तुस्सेरे सामने सारे उतर देदे रोहा सी, आसे ता परमेश्वरा बे मौजूद समझिया मसीहा न बोला सी, होर हे प्यारों, सेभे गल्ला तुस्सेरी उन्नति री तेईऐ बोला सी। 20 किबेकी डोरा सा, कि कोंइचे ऐन्डा नी लोडी हुआ, कि हाऊ ऐजिया जेंडा चाहा सा, तेन्डाऐ तुस्सा बे नी पानु; होर मुबे भी जेंडा तुस्से नी चाहदे तेन्डाऐ ही पानु, कि तुस्सा न झगडा, निंदा, गुसा, विरोध, ईर्ष्या, चुगली, घमण्ड होर लड़ाई होली। 21 होर मेरा परमेश्वर कोंइचे मेरे ओखे फिरी भी तुस्सा हागे ऐणे री तेईऐ मुं पेंदे दबाव पाले होर मुबे भी बोहु लोके री तेईऐ दुःख केरना पोडना, जुणीऐ पेहले पाप केरु ती, होर तेई गंदे कौमा न, होर लुचपना न, जो तिन्ने केरु, मन नी फिराऊ ॥

## आखरी चेताऊनी

13 एबे त्रीजी बार तुस्सा हागे ऐजा सा: दुई या तराई गवाह रै मुंहा न हर गल्ल ठराणी सी। 2 जेबे दुजी बार तुस्सा सेघे ती, ता तेंडे ही दुर रोहिया तिन्ना लोका सेघे जुणीऐ पेहले पाप केरु, होर सेभी लोका सेघे पेहले न बोला सा, कि अगर हाऊ फिरी भी ऐनु, ता नेई छोड़णे। 3 तुस्से ता ऐथा रा सबूत चाहा सी, कि मसीह मुं न बोला सा, जो तुस्से री तेईऐ कमजोर नेई आथि; पर तुस्सा न शक्तिशाली सा। 4 सौ कमजोर होणे री बजा कूसा पेंदे ता चड़ाऊ, पर तेबे भी परमेश्वरे री शक्ति सेघे जिन्दा सा, आसे भी ता तेई न कमजोर सी; पर परमेश्वरे री शक्ति सेघे जो तुस्सेरी तेईऐ सा, तेई सेघे जीणा भी। 5 आपणे आपु बे परखा, कि विश्वाशा न सी कि नेई; आपणे आपु बे परखा, कि तुस्से आपणे बारे न ऐ नी जाणदे, कि यीशु मसीह तुस्सा न सा नी ता तुस्से निक्कमे निकलदे। 6 पर मेरा बशाह सा, कि तुस्सा जाणना सा, कि आसे निकम्मे नी आथि। 7 होर आसे आपणे परमेश्वरा सेघे प्रार्थना केरनी सा, कि तुस्से कोई बुरे कौम नी केरले; ऐथा री तेईऐ नेई, कि आसे खरा हेरी सकले, पर ऐथा री तेईऐ कि तुस्से खरा कौम केरले, चाहे आसे निकम्मे भी होले। 8 किबेकी आसे सच्चाई रै विरोधा न किछ नेई केरी सकदे, पर सच्चाई री तेईऐ केरी सका सी। 9 जेबे आसे कमजोर सी, होर तुस्से शक्तिशाली होले, होर ऐ प्रार्थना भी केरा सी, कि तुस्से सिद्ध होन्दे जाले। 10 ऐथा री बजा न हाऊ तुस्सेरी पीठी पीछे ऐ गल्ला लिखा सी, कि हाजिर होईया मुबे तेई अधिकारा रै मुताविक जुण प्रभुऐ बिगाडने री तेईऐ नेई पर बणारी तेईऐ मुबे धिना सा, कि सेकती सेघे किछ केरना नी पोडला।

## अभिवादन

11 निदान, हे सेभे भाई, खुश रोहा; पक्का (सिद्ध) बणदे रोहा; हिम्मत रखा; मिली झूलीया रोहा, होर झुरी होर शान्ति रा दाता परमेश्वर तुस्सा सेघे होणा सा। 12 ऐकी हौरी बे पवित्र चूमा देईया नमस्ते केरा। 13 सेभे पवित्र लोका तुस्सा बे नमस्कार केरा सी। 14 प्रभु यीशु मसीहा रा अनुग्रह होर परमेश्वरे रा प्यार होर पवित्र आत्मा री सहभागिता तुस्सा सेभी सेघे होंदी रोहली ॥

# गलातियों

## परिचय

जैबे रै सुसमाचारा रा प्रचार होर प्रसार जो यहूदी नेई ती तिन्हा मौंझे शुरु करेने री तेंईये, तैबे प्रश्न उठू कि एक सच्चा मसीह होणै री तेंईये माहणु बै मूसा री व्यवस्था बै मैनणा जरूरी सा। पौलुस ये सुझाव देआ सा कि ये जरूरी नेई अथी। पौलुस बोला सा कि वास्तव न यीशु मसीह ही एकमात्र बिश्वास रा स्रोत सा। तेईरे दूआरा ही सेभी लोका रा परमेश्वरा सेंघे रिश्ता सुधरा सा, पर एशिया माइनर स्थाई एक रोमी राज्य न गलातिया री कलीसिया रै लोकै पौलुसा रा बरोध करू होर वायदा करू कि परमेश्वरा सेंघे सही रिश्ता बीनाणै री तेईये एक माहणु बै मूसा री व्यवस्था मैनणा जरूरी सा। गलाती रै नाँ न पौलुस प्रेरित री चिट्ठी तैबे लिखी ती कि लोका गलत शिक्षा न पौडिया भतकेंदे ती, तिन्हा री तेंईये बिश्वास होर व्यवहारा न वापस आणनै री तेंईये ती। पौलुस ये चिट्ठी री शुरुआत यीशु मसीह रा एक प्रेरित होणै रै आपणै अधिकारा रै समर्थन सेंघे केरा सा। सौ एसा गैल्ला पेन्धे जोर देआ सा कि एक प्रेरित होणै री तेंईये तेईरा शाधणा परमेश्वरा री धीरै न सा न कि माहणु री धी होर तेईरा उदेश्य खास कर जो यहूदी नेई अथी तिन्हा मौंझे सुसमाचार प्रचार केरना ती। फिर भी ये सुझाव देआ सा कि केवल बशाह रै दुआरा ही लोक रा परमेश्वरा सेंघे रिश्ता सुधरा सा। आखरी अध्याय न पौलुस ये दर्शा सा कि मसीह न विश्वासा रै नतीजे मुताबिक प्यारा रै दुआरा मसीही रै चरित्रा न असर पौडा सा।

रूपरेखा

भूमिका 1:1-10

प्रेरिता रै रूपा न पौलुसा रा अधिकार 1:11-2:21

परमेश्वरा रै अनुग्रह रा शुभ संदेश 3:1-4:31

मसीही न आजादी होर अधिकार 5:1-6:10

उपसंहार 6:11-18

## अभिवादन

1 पौलुसा री तरफा न जूण परमेश्वरा री इच्छा ना प्रभु यीशु रा प्रेरित सा, तिन्हा पवित्र होर मसीह यीशु न बशाह केरणु आलै लोका रे नाँ जूणा इफिसुसा ना री जगा न सी। 2 होर सारे भाई री धीरे ना, जूण मुं सेंघे सी, गलातिया री कलीसिया रे नाँ। 3 परमेश्वर पिता, होर आसा रे प्रभु यीशु मसीह री तरफा ना तुसा बे अनुग्रह होर शान्ति मिलदी रोहे। 4 तेइए आपणा-आप आसा री पापा री तेंईये धिना, ताकि आसा रे परमेश्वर होर पिता री इच्छा अनुसार आसा बे एई बर्तमान बुरे संसार ना बचाला। 5 तेइरी स्तुति होर तारीफ़ युगा-युगा ना हुई लोडी।

## कोई दूजा सुसमाचार नेई

6 हाँऊ हैरान होआ सा, कि जूणीए तुसे मसीह रे अनुग्रह ना शादे तेई ना तुसे एतरी छेके फिरिया होरी ए तरह रे सुसमाचारा पीछे जांदे। 7 पर सो दूजा कोई भी सुसमाचार नेई आथी, पर गल्ल ए सा कि केतरै लोका एण्डे सी जूण तुसा बे डरा सी, होर मसीह रे सुसमाचारा बे बगाड़ना चाह सी। 8 पर अगर आसे या स्वर्गा ना एजिया कोई स्वर्ग दूत भी तेई सुसमाचारा बे जूण आसे तुसा बे शणाऊ सा, कोई होर सुसमाचार शणाला, ता सो श्रापित होला। 9 जेडा आसे पहले बोलू सा, तेंडा हाँऊ भी बोला सा, कि तेई सुसमाचारा बे छोडिया जूण तुसे ग्रहण करू सा, अगर कोई होर सुसमाचार शणाला, ता श्रापित होला। 10 एबे हाँऊ माँणहु बे मणानू कि परमेश्वरा बे? हाँऊ कि माँणहु बे खुश केरणा चाह सा अगर हाँऊ माँणहु बे खुश कैरदा ता हाँऊ मसीह रा दास नी होंदा।

## पौलुस कैट्टे चेला बैणु

11 हे भाइयो, हाँऊ तुसा बे दसिया देआ सा, कि जूण सुसमाचार में शणाऊ सा सो माँणहु री तरफा ना नै आथी। 12 किबैकि सो मुम्बे माँणहु री तरफा ना नी मिलु, ना मुम्बे सिखाऊ, पर यीशु मसीह रे प्रकाशा ना मिलु सा। 13 यहूदी लोका मौन्झे जेबे मेरा चाल-चलन ती, तुसा बे पता सा, कि हाँऊ परमेश्वरा री कलीसिया बे बोहु परेशान केरा होर नाश केरा ती। 14 होर आपणी जाति ना जूण यहूदी ती होर मुं बराबर ती यहूदी मता ना बढ़दा रोहा ती होर आपणै बुजुर्गा रे व्यवहारा ना बड़ा उतेजित होआ ती। 15 पर परमेश्वरा री, जूणीए मेरी आमा रे पता ना हाँऊ रखु होर आपणै अनुग्रह ना शादू, 16 जैबे इच्छा हुई, कि आपणै बेटे यीशु बे मुं पांधे प्रगट केरे, कि हाँऊ अन्यजाती ना तेई रा सुसमाचार शणानू, तेबे मैं ना मांस ना खुना ना सलाह लेई। 17 ना यरुश्लेमा बे तिन्हा आगे नौठा जूण मुं ना पहले प्रेरित ती, पर अरब देशा बे नौठा, फिरी तौखे ना दमिश्का बे आऊ। 18 फिरी त्रा साला बाद हाँऊ कैफा ना मिलदा यरुश्लेमा बे नौठा, होर तेई आगे पन्दरा रोज रोहू। 19 होर तेइरी सामर्थ आसा री धीरे जूण बशाह करा सी, केतरी महान सा, तेइरी शक्ति रे प्रभाव अनुसार। 20 जूण गल्ला हाँऊ तुसा बे लिखा सा, हेरा, परमेश्वरा री उपस्थिति ना होइया बोला सा, कि ते गल्ला झूठी नेई। 21 एता ना बाद हाँऊ सुरिया होर किलकिया देशा बे आऊ। 22 पर यहूदिया री कलीसिया ना जूण मसीह ना ती, मेरी शक्क ता कदी भी नी ती हेरिदी। 23 पर ए शुणा ती, कि जूण आसा बे पहले दुःख देआ ती, एबे सो तेई धर्मा रा प्रचार केरा सा, जूणी बे पहले सो नाश केरा ती। 24 होर मेरे बारे ना परमेश्वरी री महिमा केरा ती।

## होरी चेले रै जरिये पौलुसा बै मान्यता

2 चौदा साला बाद हाँऊ भी बरनबासा सेंघे यरुश्लेमा बे नौठा, होर तीतुस भी सेंघे नेऊ। 2 होर मेरा जाणा परमेश्वरा धीरे ना हुआ, होर

जून सुसमाचार हाँऊ अन्यजाति ना प्रचार केरा सा, सो मैं तिन्हा बे दसु, होर केले ना तिन्हा बे जून बड़े समझा ती, ताकि एण्डा नी हुआ लोड़ी कि मेरी एई बोक्ते री या आगले बोक्ते री दौड़-धुप बेकार होली । 3 पर तीतुस भी जून मुं सेंघे ती होर जून यूनानी सा, खतना केरने बे मजबूर नी केरु । 4 होर ऐ तिन्हा झूठे भाई लोका री बजह ना हुआ, जून चोरी छिपिया ना आए ती, कि तेसा आजादी रा जून आसा बे मसीह ना मिली ती, भेद लेइया आसा बे गुलाम बणादें । 5 तिन्हा रे अधीन होणा आसे एक पल भी नी मनु, ऐ तेबे कि सुसमाचारे री सच्चाई तुसा ना बणीया रोहली । 6 फिरी जून लोका किच्छ बुझा ती, ( ते चाहे केँडे ती, मुम्बे एता ना कोई मतलब नेई, परमेश्वर कोई रा पक्षपात नेई कैरदा ) तिन्हा ना जून किछ बुझिया ती, मुम्बे तिन्हा ना किच्छ भी लाभ नी हुआ । 7 पर उल्टा जेबे तिन्हे हेरु, कि जेण्डा खतना केरुएदें लोका बे सुसमाचार शणाणें रा कौम पतरसा बे धिना सा, तेंडा बगैर खतना आए बे सुसमाचार शणाणें रा कौम मुम्बे धिनु सा । 8 ( किबैकि जूणीए पतरसा ना खतना केरुएदें लोका मौन्झे प्रेरिताई रा कौम बड़े प्रभाव ना कराऊ, तेइए मुं ना भी अन्यजाति मौन्झे बड़ा प्रभावशाली कौम कराऊ । 9 होर तिन्हे तेई अनुग्रह रा जून मुम्बे मिलु ती पता लाऊ, ता याकूब होर कैफा होर युहन्ने जून कलीसिया रे थोम्बे बुझिया ती, मुम्बे होर बरनबासा बे आपणा सीधा हौथ देइया आपु सेंघे केरे, कि आसे अन्यजाती आगे जाले, होर सो खतना केरुएदें लोका आगे । 10 सिर्फ ऐतरा बोलू कि आसे कंगाला री खबर ले, होर आपु भी हाँऊ एई कौम कैरने री कोशिश कैरदा लागा ती ।

### पौलुस द्वारा पतरसा रा बरोध

11 पर जैबे कैफा अन्ताकिया बे आऊ, ता मैं तेइरे मुंहा सामणें तेइरा सामणा केरु, किबैकि सो दोषी ठहरु ती । 12 किबैकि याकुबा री धीरे ना कैतरे लौका रे ऐणें ना पहले सो अन्यजाति सेंघे खा ती, पर जैबे ते आए, ता खतना केरुएदें लोका री डोरा री बजह ना तिन्हा ना दूर हुआ, होर कनारा कैरदा लागा । 13 होर तेई सेंघे बाकि यहुदिये भी कपट केरु, औखे तक कि बरनबास भी तेई रे कपटा ना पौडू । 14 पर जैबे मैं हेरु, कि ते सुसमाचारा री सच्चाई ना सीधे नी होण्डे लागे सी, ता मैं सेभी सामणें कैफा बे बोलू, कि जैबे तू यहूदी होइया अन्यजाति री चाल चला सा, होर यहूदी री नेई, ता तू अन्यजाति बे यहूदी री चाल चलणें बे किबे बोला सा ।

### बिश्वास द्वारा धर्मी होणा

15 आसे ता जन्मा ना यहूदी सी, होर पापी अन्यजाति मौन्झे ना नेई । 16 तेबे भी ऐ पता लाईया कि माँणहु व्यवस्था रे कौमा ना नेई, पर सिर्फ यीशु मसीह पांधे बशाह केरने ना धर्मी ठहरा सा, आसे ता आपु भी यीशु मसीह पांधे बशाह केरु, कि आसे व्यवस्था रे कौमा ना नेई, पर मसीह पांधे बशाह कैरने री बजह ना धर्मी ठहरे, सो तेबे कि व्यवस्था रे कौमा ना कोई भी माँणहु धर्मी नी ठहरी सकदा 17 आसे जून मसीह ना धर्मी ठहरना चाह सी, अगर अपु ऐ पापी निकते, ता मसीह कि पापा रा सेवक सा? कदी भी नेई । 18 अगर जै किच्छ मैं शैटू, होर भी तेई बे चका सा, ता आपणें आपा बे अपराधी बणा सा । 19 हाँऊ ता व्यवस्थारी बजह ना व्यवस्था री तेंइये मुंआ, कि परमेश्वरा री तेंइये जीनु । 20 हाँऊ ता मसीह सेंघे क्रूसा पांधे चढाऊंदा सा, होर ऐबे हाँऊ जिन्दा नेई रोहू, बल्कि मसीह मुं ना जिंदा सा, होर ऐबे हाँऊ जून शरीरा ना जिन्दा सा, ता सिर्फ तेई बशाह ना जिन्दा सा, जून परमेश्वरा रे बेटे पांधे सा, जूणीए मुं सेंघे प्यार केरु, होर मेरे तेंइये आपणा-आप भी धिना । 21 हाँऊ परमेश्वरा रे अनुग्रह बे बेकार नी बुझदा, किबैकि अगर व्यवस्था री बजह ना धार्मिकता हौदी, ता मसीह रा मौरना बेकार होणा ती ।

### कनून होर विश्वास

3 हे नासमझ गलातिया रैं माहणुओ, कुणीए तुस्से मोहिरैं सी? तुस्से री ता होच्छी रैं सामणें यीशु क्रूसा पेन्दे रिहाऊ ती । 2 हाँऊ तुस्सा न सिर्फ ऐत्रा जाणना चाह सा, तुस्से आत्मा बै, कि व्यवस्था रे कौमा न, कि बशाह रैं सुसमाचारा रैं दुआरा पाऊ सा? 3 तुस्से कि ऐतरे नासमझ हुऐ सी, कि आत्मा री रीती न शुरु केरिया ऐबे कि शरीरा री रीती ना खत्म केरना

चाहा सी? 4 तुस्से कि ऐतरा दुःख बिना मतलबे चेकु, पर तुस्सा रा दुःख चकणा कदी भी व्यर्थ नी होणा । 5 ता सौ जून तुसा बे आत्मा रा दान देआ सा, होर तुस्सा आंधरै समर्था रा कौम केरा सा, सो कि व्यवस्था रे कौमा न या बशाह रे सुसमाचारा री बजह न एण्डा केरा सी? 6 इब्राहिमैं ता परमेश्वरा पांधे बशाह केरु, होर सो तेई री तेंइये धार्मिकता गिणुई सा । 7 ता ऐ जाणिया रखा कि जून बशाह केरनु आले सी, सिर्फ तेरे इब्राहिमा री सन्तान सी । 8 होर पवित्र शास्त्रे पहले ही ऐ पता लाईया, कि परमेश्वरा अन्यजाति लोका बशाह री बजह न धर्मी ठहराणें, कि पहले न इब्राहिमा बै ऐ सुसमाचार शणाऊ, कि तौन सेभी जाति बै आशीष पाणी सा । 9 ता जून बशाह केरनु आले सी, तिन्हा विश्वासी इब्राहिमा सेंघे आशीष पाणी सा । 10 किबैकि जेतरे लोका व्यवस्था रे कौमा न बशाह रखा सी, ते सेभ श्रापारे अधीन सी, किबैकि लिखू सा कि जे कोई व्यवस्था री लिखी हुन्दी कताबा री गला बोलणे पक्का नेई रोहन्दा, सो श्रापित सा । 11 पर ऐ गल सामणें सा, कि व्यवस्था री बजह न परमेश्वरा आगे कोई भी धर्मी नेई ठहरदा किबैकि धर्मी माँणहु बशाह री बजह ना जिंदा रोहा सा । 12 पर व्यवस्था रा बशाह सेंघे कोई भी रिश्ता नेई, पर जून इन्हा बे मंना सा, तेई इन्हा री बजह न जिन्दे रोहणा । 13 मसीहे जून आसा री तेंइये श्रापित हुआ, होर आसा बे खरिदिया व्यवस्था रे श्रापना ना आजादी धीनी, किबैकि लिखु सा, जे कोई क्रूसा पांधे लटकाईया सा, सो श्रापित सा । 14 ऐ ऊँई री तेईए हुआ, कि इब्राहिमैं री आशीष मसीह री बजह न अन्यजाती तक पुजली, होर आसे बशाह री बजह न तेसा आत्मा बे पालें, जूणी रा वायदा हुआ सा ।

### कनून होर वायदा

15 हे भाइयो, हाँऊ माँणहु री रिती पांधे बोला सा, कि माँणहु रे वायदे भी जे पक्के होआ सी, ता न कोई तिन्हा बे टाला सी, न ता कोई तिन्हा ना किच्छ बढ़ा सी । 16 सारे वायदे इब्राहिमा बे धिनै ती, होर तेईरे वंशा बे धिनै ती, सो ऐ नी बोल्दा, कि सेभी वंशा बे, जेण्डा होरी लोका रे बारे ना बोला सा, पर जेण्डा ऐकि रे बारे ना, होर सो मसीह सा । 17 पर हाँऊ बोला सा, कि जे वायदे परमेश्वरे पहले ना पक्के केरे ती, तिन्हा बे व्यवस्था चार सौ तिह साला बाद नी टाई सकदी, कि सो वायदे बेकार होले । 18 किबैकि अगर आशीष व्यवस्था ना मिली सा, ता तेबे वायदे ना नेई, पर परमेश्वरे इब्राहिमा बे वायदे री बजह ना धीनी सा । 19 तेबे फिरी व्यवस्था कि रोही, सो ता पापा री बजह ना बादा ना धीनी, कि तेई वंशा रे ऐणें तक रोहली, जूणी रा वायदा केरु, होर सो स्वर्ग दूता री बजह ना एक जरिया ठहराऊ ती । 20 मध्यस्त ता दुई मौंझे होआ सा, पर परमेश्वर ऐके सा।

### कनूना रा उदेश्य

21 तेबे कि व्यवस्था परमेश्वरा रे बायदे रे बरखलाफ सा? कदी नेई, अगर एण्डी व्यवस्था धीनी हाँदी जून जीवन देई सका ती, ता सच ती कि धार्मिकता व्यवस्था धीरे ना होणा ती । 22 पर पवित्र शास्त्रे सारे पापा रे अधीन केरे, ताकि सो वायदा जूणी रा आधार यीशु मसीह पांधे बशाह केरना सा, बशाह केरनु आए पांधे सो वायदा पूरा हुआ लोड़ी । 23 पर बशाह केरने ना पेहले व्यवस्था री अधीनता ना आसा री रखवाली होआ ती, होर तेई बशाह रे ऐणें तकर जून प्रगट होणु आ ती, आसे तेई बंधना ना रोहे । 24 एण्डी तरहे व्यवस्था मसीह आगे पुजणें री तेंइये आसा री शिक्षक हुई सा, कि आसे बशाह केरिया धर्मी ठहरले । 25 पर जेबे बशाह आऊ ता, ऐबे आसे शिक्षका रे अधीन नेई रोहे । 26 किबैकि तुसे सेभ तेई बशाह केरने री बजह ना जून यीशु पांधे सा, परमेश्वरा री सन्तान सी । 27 होर तुसा मौन्झे जेतरे मसीह रा बपतिस्मा लेऊ सा, होर जूणीए मसीह ग्रहण केरु सा । 28 ऐबे ना कोई यहूदी रोहू, होर ना कोई यूनानी, ना कोई गुलाम, ना कोई आजाद, ना कोई मर्द, ना बेटड़ी, किबैकि तुसे सेभ मसीह ना एक हुऐ सी । 29 होर अगर तुसे मसीह रे सी, ता एब्राहिमा रे वंश होर वायदे रे मताबक वारिस भी सी ।

4 हाँऊ ऐ बोला सा, कि वारिस(हक्दार) जेबे तेंई शौरु सा, चाहे सौ सेभी चीजा रा मालक सा, तेबे भी तेई न होर नौकरा न कोई फर्क नी आथी । 2 पर बापू रे ठहराऊ हुदें बौक्ता तक सैभ किछ रक्षा केरनु आलें होर

भण्डारी रे हौथा न होआ सा । 3 तेंडे आसे भी, जेबे तक शौरु ती, ता दुनिया री पराणी शिक्षा रें वंशान होइआ गुलाम बणी हुन्दे ती । 4 पर जेबे बोक्त पुरा हुआ, ता तेबे परमेशवरे आपणा बेटा भेजू, जूण बेटडी न ज़नमु, होर व्यवस्था रे अधीन पैदा हुआ । 5 ताकि व्यवस्था रे अधीन लौका बे कीमती देईया छडाला, होर आसा बे लेपालक होणे रा आधिकार मिलला । 6 होर तुसे जूण बेटे सी, तेबे ता परमेशवरे आपणें बेटे री आत्मा, जूण हे अब्बा होर हे बापू बोलिया पुकारा सा, आसा रे दिव्ला ना भेजा सा । 7 तेबे ता ऐबे तू दास नेई, पर बेटा सा, होर जेबे बेटा हुआ, ता परमेश्वरा री बज़न ना वारिस भी हुआ ।

### गलातिया री मण्डली रें बारे न पौलुस री चिंता

8 भला, तेबे ता तुसे परमेश्वरा बे नी पछियाणीया तिन्हे रे दास ती, जूण स्वभावा न परमेशवरे नेई आँथी । 9 पर एबे जेबे तुसे परमेश्वर पछियाणु सा, बल्कि परमेशवरे तुसे पछियाणें सी, ता तेबे तिन्हा बेकार होर कमजोर शुरु ऋ शिक्षा धीरे बे किबे फिरा सी, तुसे कि भी तिन्हा रे गुलाम होणा चाह सी? 10 तुसे धियाडे होर महीने होर पक्के बोक्ता होर बोर्षा बे मना सी । 11 हाँऊ तुसा रे बारे ना डोरा सा, कि जूण मेहनत हाँऊ तुसा री तेंडए करा सा, सो बेकार नी लोडी हुई 12 हे भाइयो, हाँऊ तुसा न विनती केरा सा, तुसे मुं बराबर बणा, किबेकी हाँऊ भी तुसा बराबर हुआ ती, तुसे मेरा किछ नी बिगाडु । 13 पर तुसा बे पता सा कि शु-शुरु न मै कमजोर होणे री बजह ना, तुसा बे सुसमाचार शणाऊ । 14 होर तुसे मेरी शरीरे री दशा बे जूण तुसा री परीक्षा री बजह ती, बुरा नी मनु, ना तेई ना नफ़रत केरी, होर परमेश्वरा रे दूत मतलब मसीह बराबर हाँऊ भी ग्रहण केरु । 15 ता ऐबे सो तुसा री खुशी मनाणी कोखे नौठी? हाँऊ तुसा रा गुवाह सा कि अगर होई सका ती ता तुसे आपणी होछी भी खोलिया मुम्बे देणे बे त्यार ती । 16 ता एबे कि तुसा संघे सच्च बोलणे री बजह ना हाँऊ तुसा रा दुश्मन हुआ सा? 17 ते तुसा बे दोस्त बनाणा ता चाह सी, पर शोभले मना ना नेई, पर तुसा बे अलग केरना चाह सी, कि तुसे तिन्हा बे आपणें दोस्त बणाले । 18 पर ऐ भी शोभला सा, कि शोभली गल्ला ना हमेशा दोस्त बनाणें री कोशिश केरनी चाहिए, सिर्फ तेई बोक्ते केले नेई जेबे हाँऊ तुसा संघे होआ सा । 19 ओ मेरे बेटेओ, जेबे तक तुसा आंधरें मसीह रा रूप नी बणला, तेबे तक मुं तुसा री तेंडए भी बोहु दुःख कष्ट सहण केरने सी । 20 इच्छा ता ऐ होआ सा, कि ऐबे तुसा आगे एजिया होरी तरहे दूणनु, किबैकी तुसा रे बारे न मुम्बे शक सा ।

### सारा होर हाजिरा रा उदाहरण

21 तुसे जूण व्यवस्था रे अधीन होणा चाहा सी, मुं संघे दूणा, तुसे कि व्यवस्था री नी शुणदे? 22 ऐ लिखू सा, कि इब्राहीमा रे दुई बेटे हुए, एक दासी ना, होर एक लाडी ना हुआ । 23 पर जूण दासी न हुआ, सो शरीरा री रीती ना हुआ, पर जूण लाडी ना हुआ, सो वायदे रे मताबक हुआ । 24 इन्हा गल्ला न उदाहरण सी, ऐ बेटडी मना दुई वाचा सी, एक ता सीनै दौगा री, जूणी ना दास ऐ पैदा होआ सी, होर सो हाजिरा सा । 25 होर हाजिरा मना अरबा रा सीनै दौग सा, होर आधुनिक यरुशलेम तेई बराबर सा, किबैकि सो आपणें बेटे समेत गुलामा (दासत्व ) ना सा । 26 पर ऊझली यरुशलेम आजाद सा, होर सो आसा री आम्मा सा । 27 किबैकि लिखू सा, कि हे बांझ, तू जूणी बे पता ऐ नेई आथी खुशी मना, तू जूणी बे दाह नेई हौदी लेरा मारिया जय-जयकार केर, किबैकि छोडीदी बेटडी री सन्तान सुहागणें री संताना न बडी सा । 28 ओ भाइयो, आसे भी इसाहका बराबर वायदे री सन्तान सी । 29 होर जेंडा तेई बोक्ते शरीरा रे आनुसार पैदा हुआदां आत्मा रे आनुसार पैदा हुएदे बे परशान करा ती, तेंडा ऐ ऐबे भी होआ सा । 30 पर पवित्र शास्त्र कि बोला सा, दासी होर तेसा रे बेटे बे खोल, किबैकि दासी रा बेटा लाडी रे बेटे संघे हिस्सेदार नेई होई सकदा । 31 तेबैता ओ भाइयो, आसे दासी रे नेई, पर लाडी रे बेटे सी ।

### आजादी बै बचाईया रखा

5 मसीहे आजाद होणे री तेंडये आसे आजाद केरे सी, एता न मजबूत रोहा, होर गुलामी रे जुए न भी मता होण्डे । 2 हेरा, हाँऊ पौलुस तुसा बे बोला सा, कि अगर खतना सी, ता मसीह ना तुसा बे कोई फ़ायदा नेई । 3 तेबे भी हाँऊ खतना केरेदें लोक बे होशियार करा सा, कि तेई बे भी सारी व्यवस्था मनणी पोडी सा । 4 तुसे जूण व्यवस्था री बजह न धर्मी ठहरना चाह सी, मसीह न अलग होर अनुग्रह ना झोडीया पौडें सी । 5 किबैकि आत्मा री बजह ना, आसे बशाह ना आस होणू आई धर्मिकता री बौता न चैला सी । 6 मसीह यीशु न ना कोई खतना केरुएन्दे, होर न बिना खतने रे कोई फ़ायदा सा, पर बशाह रा जूण प्रेमा री बजह ना असर केरा सा । 7 तुसे ता भले चंगे ठोरा मारदे लागे ती, ऐबे कुणी गल्ले तुसे रोके सी, कि सच्चाई बे मौता मन्दे । 8 एंडी शिक्षा ता तुसा रे शादणु आये री तरफा न ता होई सकदी । 9 थोडा जें मलेडा पुरे पीठ बे मलेडा बणा सा । 10 हाँऊ प्रभु ना तुसा रे बारे न बशाह केरा सा, कि तुसा रा कोई होर विचार नी होला, तुसा बे जूण डरा सी चाहे कोई भी होला तिन्हा बे सज़ा जरूर मिलणा । 11 पर हे भाइयो, अगर हाँऊ ऐबे तक खतना रा प्रचार केरा सा, ता ऐबे तक मुम्बे किबे दुःख ऐ मिला सी, तेबे ता क्रूसा री ठोकरा रा कोई मतलब ऐ नेई आथी । 12 शोभला ती, कि जूण तुसा बे डावाडोल केरा सी, सो काटिया फेटे शेते होंदे । 13 हे भाइयो, तुसे आजाद होणे री तेंडए शादे सी एण्डा नी हुआ लोडी, कि ऐ आजादी शारीरिक कौमा री तेंडए अवसर पाली, बल्कि प्यारा संघे एकी-दूजे रे दास बणा । 14 किबैकि सारी व्यवस्था एकी ऐ गल्ला न पूरी होआ सा, कि तू आपणें पडोसी न आपु बराबर प्यार केर । 15 पर अगर तुसे एकी-दूजे बे दौदा संघे काटिया होर चिरिया खा सी, ता सावधान रोहा, कि एकी दूजे बे बर्बाद मता केरदे ।

### पवित्र आत्मा द्वारा चैलणा

16 पर हाँऊ बोला सा, कि आत्मा रे अनुसार चला, ता तुसे शरीरा री इच्छा कोई भी तरीके न पूरी नेई केरी सकदे । 17 किबैकि शरीर आत्मा रे विरोधा ना, होर आत्मा शरीरा रे विरोधा ना इच्छा करा सा, होर ऐ एकी-दूजे रे विरोधी सी, सो तेबे कि जे किच्छ तुसे केरना चाह सी सो तुसे नेई केरे । 18 अगर तुसे आत्मा री रीती न चला सी, ता व्यवस्था रे अधीन मता रौहदै । 19 शरीरा रे कौम ता प्रगत सी, मतलब व्यभिचार, बुरे कौम, लुचपन, 20 मूर्ति पूजा, जादू, दुश्मनी, झगडे, इर्ष्या, झिक्, बिरोध, फूट, विधर्म, 21 डाह, मतवालापन, लिलाक्रीडा, होर इन्हा संई होर भी बडे कौम सी, इन्हा रे बारे ना हाँऊ तुसा बे पहले न ओरु बोला सा, जेंडा पहले भी मैं बोलू, कि एन्डे-एन्डे कौम कर्नु आए परमेश्वरा रे राज्य रे वारिस नी होई सकदे । 22 पर आत्मा रे फ़ोल, प्रेम, आनन्द, मेल धीरज, 23 कृपा, भलाई, बशाह, नम्रता, होर संयम सा एण्डे कौमा रे विरोधा न ता कोई भी व्यवस्था नेई आँथी । 24 होर जूण यीशु मसीह ना सा, तिन्हे शरीर री सारी इच्छा होर लालच क्रूसा पांधे चड़ाये । 25 अगर आसे आत्मा री बजह न जिन्दे सी, ता आत्मा ना होडे भी । 26 आसे घमण्डी होइया एकी दूजे बे नेई छडे न एकी दूजे ना इर्ष्या करे ।

### एकी दूजे री मजत केरा

6 ओ भाइयो, अगर कोई माहणु गलती केरदा ढोकिया सा, ता तुसे जूण आत्मिक सी, प्यारा संघे तेई बे सम्भाला, होर आपु भी सावधान रोहा, कि तुसे भी परीक्षा ना नी पोडें लोडी । 2 तुसे एकी-दूजे रा भार चका, होर एंडी तरहे मसीह री व्यवस्था बे पूरी केरा । 3 किबैकि अगर कोई किच्छ भी नी होणे पांधे आपु बे किच्छ मना सा, ता आपणें आपा बे धोखा देआ सा । 4 पर हर एक आपणें कौमा बे परखे, तेबे होरी रे बारे ना नी पर आपु पांधे घमण्ड केरने रा मौका मिलणा । 5 किबैकि हर माणहु आपणा बोझ चकणा सा । 6 जूण वचना री शिक्षा पा सा, सो सेभ शोभली चीजा ना सिखाणु आए रा साथ दे । 7 धोखा मता खांदे, परमेश्वर मजाका ना उडाणें रा नेई आथी, किबैकि माणहु जे किच्छ बाह सा सो ऐ काटा सा । 8 किबैकि जो शरीरा री तेंडए बाह सा, सो शरीरा री बजह ना विनाशा री फ़सल काटा सा, होर जूण

आत्मा री तेंइए बाह सा, तेई आत्मा री बजह ना अनंत जीवना री फसल काटणी । 9 आसे शोभले कौम केरने न हिम्मत नी छोड़णी, किबैकि अगर आसे ढीले नी हुए, ता सही बोक्ता ना फसल काटणु आए बणना । 10 तेबेता जोखे तक मौका मिले सेभी संघे भलाई केरा, खास केरिया विश्वासी भाई लोका संघे ।

### आखरी चताऊनी होर अभिवादन

11 हेरा, मैं केतरे बडे-बडे अक्षरा ना आपणै हौंथे तुसा बे लिखू सा ।  
12 जेतरे लौका शारीरिक दिखाबा केरा सी, ते तुसा रा खतना करणै बे जोर देआ सी, सो तेबे कि मसीह रे क्रूसा री बजह ना तिन्हा पांधे दुःख नी आऊ

लोड़ी । 13 किबैकि खतना करणु आए आपु ता व्यवस्था ना नेई चलदे, पर तुसा रा खतना तेबे कराना चाह सी, कि तुसे री शारीरिक दशा पांधे घमण्ड केरे । 14 पर एण्डा नी हुआ लोड़ी कि हाँऊ कोई होरी गल्ला पांधे घमण्ड केरणु, सिर्फ आसा रे प्रभु यीशु रे क्रूसा पांधे रा, जुणी री बजह ना संसार मेरी नजरी न होर हाँऊ संसारा री नजरी ना क्रूसा पांधे चढ़ाऊ सा । 15 किबैकि ना खतना, ना बगैर खतने आए रा कोई मतलब सा, पर नऊई सृष्टि । 16 होर जेतरे इन्हा नियमा पांधे चला सी, तिन्हा पांधे होर परमेश्वरा रे इस्त्राइला पांधे शान्ति होर दया होंदी रोहे । 17 आगे बे कोई मुम्बे दुःख न दे, किबैकि हाँऊ यीशु रे जरख्मा बे आपणै शरीरा न लेइया फिरदा रोहा सा । 18 ओ भाइयो, आसारं प्रभु यीशु रा आनुग्रह तुसा री आत्मा संघे रोहू लोड़ी । आमीन ।

# इफिसियों

## परिचय

पौलुसे ये चिट्ठी फिलीपी लाई लगभग ई. सं. 60-61 न लिखी ती। तेई बौक्ता पौलुस आपुये जेला न बंद ती। पौलुसा रै बौक्त इफिसी रोमी सम्राज्य रे पूर्वा न एक मशहूर शहर ती। इफिसी एक मशहूर शहरा रा केंद्र ती, सेभी किरमि रै लोका तोखे रोहा ती, लग-लग जैगहा न आपणै -आपणै कौमा बै एजा केरा ती। पौलुस हर रोज जे- जे एजा केरा ती एकी पाठशाला न सिखा ती। तिन्हा मौंझे बौऊ लोकै विश्वास केरना शुरु केरु, होर किच्छ बौक्ता न एक मसीही मण्डली तयार हुई।  
इफिसी री तेईये नेई बल्कि औरै पौरे री कलीसिया री तेईये बी ऐ चिट्ठी लिखी ती, ऐंढा बौऊ बाईबल विद्वाना रा बिचार सा।

रूपरेखा

भूमिका 1:1,2

मसीह होर मण्डली 1:3-3:21

मसीह न नऊँआ जीवन 4:1- 6:20

उपसंहार 6:21-24

1 पौलुसा री तरफा न जूण परमेश्वरा री इच्छा ना प्रभु यीशु रा प्रेरित सा, तिन्हा पवित्र होर मसीह यीशु न बशाह केरणु आलै लोका रे नाँ जूणा इफिसुसा ना री जगा न सी।<sup>2</sup> आसा रे बापू परमेश्वर होर प्रभु यीशु मसीह री धीरे ना तुस्सा बै अनुग्रह (कृपा) होर शान्ति मिलदी रोहे।

### मसीह न आत्मिक आशीष

3 आसा रे प्रभु यीशु मसीह रे परमेश्वर होर बापू री जयजयकार होली, किबैकी तेइए आसा बै मसीह न ऐक होइया स्वर्गीय जगह ना हर तरह री आशीष धिन्नी री सा।<sup>4</sup> ऐथा न पेहले कि परमेश्वर दुनिया बै बणाला तेईये आसे छॉटे सी, कि आसे तेइरी नजरी न पवित्र होर बैकसुर होले। कि आसे तेइरे नेडे प्यारा ना पवित्र होर निर्दोष होले।<sup>5</sup> होर आपणी शौभली इच्छा रै मुताबिक आसे बै आपणी तेईये पैहले न ठहराए सी, कि यीशु मसीह जे केरु तेथा री बजा न आसे तेइरे गोद लेऊ हुन्दे शौहरु ठहरे।<sup>6</sup> कि तेइरे तेई अनुग्रह री महिमा री स्तुति हो, जूण तेइए आसा बै तेई रै प्यारै बेटे रै जरिये बिना किमतिये धिना।<sup>7</sup> आसा बै यीशु रै खुना रै दुआरा जौ तेईए कुस्सा पेन्दे बहाऊ तेथा री बझाह न पापा री क्षमा, परमेश्वर रै अनुग्रह रूपी धना रै मुताबक मिली सा।<sup>8</sup> जूण तेइए सारे ज्ञान होर समझा संघे आसा पांधे बोहु जादा केरु।<sup>9</sup> कि तेइए आपणी इच्छा रा भेद ऐंडी शौभली तरहे आसा बै दसु कि जूण तेइए आपणै आपा ना पक्की सोचिया रखुन्दा ती।<sup>10</sup> कि बोक्ते रे पुरे होणे रा एण्डा प्रबन्ध हो, कि जे किच्छ स्वर्गा न सा, होर जे किच्छ धौरती पांधे सा, सेभ किच्छ सो मसीह ना कडा केरेले।<sup>11</sup> मसीह न जूणी न आसे भी तेइरी इच्छा न जूण आपणी इच्छा रे मताबक सेभ किच्छ केरा सा, परमेश्वर आसे पहले न ओरु मसीह रे वारिस होणै री तेईय चुने सी।<sup>12</sup> कि आसे, जूणीए पेहले ना ओरु मसीह पांधे आश रखी ती, तेइरी महिमा री स्तुति री बजह होले।<sup>13</sup> होर तेई ना जेबे तुसे सच्चाई रा वचन शुणु, जूण तुसा रे उधारा रा सुसमाचार सा, होर जूणी पांधे तुसे बशाह केरु, वायदा केरेंदे पवित्र आत्मा री मोहर लागी।<sup>14</sup> सो तेइरे खरीदूँदे लोका रे छूटीकारे री तेइए आसारी मीरासा रा बयाना सा, कि तेइरी महिमा री स्तुति हो।

### पौलुस री प्रार्थना

<sup>15</sup> एता बजह ना, हाँऊ भी तेई बशाह रा समाचार शुणीया जूण तुसा लोका आंधरे प्रभु यीशु री तेइए सा, होर सेभी पवित्र लोका ना प्रगट सा।<sup>16</sup> तुसा री तेइए धन्यावाद केरना नेई छौडदा, होर आपणी प्रार्थना न तुसा बै याद केरदा रोहा सा।<sup>17</sup> कि आसा रे प्रभु यीशु रा परमेश्वर जूण महिमा रा बापू सा, तुसा बै आपणी पहचाना ना, ज्ञान होर प्रकाशा री आत्मा दे।<sup>18</sup> होर तुसा री मने री हौछी ज्योतिर्मय हो कि तुसा बै पता लागा लोडी कि तेइरे शादणै री कैन्डी आश होआ सा, होर पवित्र लोका ना तेइरी मीरासा री महिमा रा केन्डा धन होआ सा।<sup>19</sup> होर तेइरी सामर्थ आसा री धीरे जूण बशाह करा सी, केतरी महान सा, तेइरी शक्ति रे प्रभाव आनुसार।<sup>20</sup> जूण तेइए मसीह रे बारे ना केरु, कि तेइबे मुंएदें ना जिंदा केरिया स्वर्गीय स्थाना ना आपणै सीधे हौथे।<sup>21</sup> सेभ तरह री प्रधानता, होर अधिकार, होर सामर्थ, होर प्रभुता रे, होर हर-एक नाँ पांधे, जूण ना सिर्फ ऐई जुगा ना, पर ऐणु आलै जुगा न भी लेईणा, बशाऊ।<sup>22</sup> होर सेभ किच्छ तेइरी जोंधा हेठे केरु, होर सो सेभी चिजा पांधे शिरोमणि ठहराईया कलीसिया बै धिना।<sup>23</sup> ऐ तेइरा शरीर सा, होर तेइरी परिपूर्णता सा, जो सेभी ना सेभ किच्छ पुरा करा सा।

### मौऊती न जीवना धीरै

2 आपणै पिछले बौक्ता न तुसे आपणै तिन्हा अपराध होर पापा री बजहा न मुंएदे ती।<sup>2</sup> जूणी ना तुसे पहले संसारा री रीती न, होर आसमाने रै प्रधान अधिकारा रै मुताबक चला ती, मतलब तेई आत्मा रै मुताबक बुरे कौम केरा ती, जूण हाजी भी हुक्म नी मनणु आलै लोका मौन्झे कौम केरा सा।<sup>3</sup> इन्हा मौन्झे आसे सेभ भी पहले आपणै शरीरा री इच्छा आनुसार ध्याडे बिता ती, होर शरीरे री होर मने री इच्छा पूरी केरा ती, होर होरी लोका री तरह स्वभावा ना ऐ झीका री सन्तान ती।<sup>4</sup> पर परमेश्वर जूण दया रा धनी सा, आपणै तेई बडे प्यारा री बजह ना, जूणी री बजह ना तेइए आसा संघे प्यार केरु।<sup>5</sup> जेबे आसे अपराधा री बजह ना मुंए ती, तेबे आसे भी मसीह संघे जिन्दे केरे, (परमेश्वर री कृपा री बजह न तुस्सा रा उध्दार हुआ सा),<sup>6</sup> परमेश्वर मसीह यीशु न होईया तेई संघे जिन्दे हुऐ, होर स्वर्गीय स्थाना न तेई संघे बशाये सी।<sup>7</sup> कि सौ आपणी तेस्सा कृपा न जूण मसीह यीशु री

बजाह न आसा पांघे सा, ऐणु आलै बौक्ता ना आपणै अनुग्रह रा जूणी री कोई सीमा नी आथी धन रिहाऊ। 8 किबैकि परमेश्वरै रै अनुग्रह न बशाह री बजह न तुस्सा रा उध्दार हुआ सा, होर ऐ तुस्सा री धीरे न नेई, पर परमेश्वरा रा दान सा। 9 होर ना कौमा री बजह ना, ऐण्डा नेई हुआ लोड़ी कि कोई घमण्ड करे। 10 किबैकि आसे परमेश्वर रै आसा रै केरने री तेंइए त्यार करे। बणाऊँ हुन्दै खास लोका सी, होर मसीह यीशु न तिन्हा भले कौमा री तेंइए बणाए सी, जूण परमेश्वर पहले ना ओरु ते आसारै करने री तेईए त्यार करै सी।

### मसीह न एक

11 एथा बजह न याद केरा, तुसै जुण शारीरिक बजह ना अन्यजाति सी, ( होर जुण लोका शरीरा न हौथा न केरुएदें खतने री बजह न खतनेआलै बोलिया सी, ते तुसा बै बिना खतने रै बोला सी। 12 तुसै लोका तेई बोक्ते मसीह ना अलग होर इस्त्राइले री प्रजा रै जगह ना अलग करेदें, होर प्रतिज्ञा रै वायदे रै हकदार नेई ती, होर बगैर आश होर बगैर परमेश्वरा रै ती। 13 पर एबे मसीह न जूण पहले तुस्से दूर ती, मसीह रे खुना री बजह न नेडे सी। 14 किबैकि सौए आसा बे मिला सा, जूणी ऐ दुए एक करे, होर अलग केरणु आई दीवारा बे जूण मौन्झे ती, ढाली सा। 15 होर आपणै शरीरा न दुश्मनी मतलब सो व्यवस्था जूणी री आज्ञा बिधि री रीती पांघे ती, खत्म केरी, कि दुई री बजह ना एक नऊआ माँणहु पैदा केरिया मेल कराले। 16 होर क्रूसा पांघे दुश्मनी खत्म केरिया एता री बजह ना दुई बे एक शरीर बणाईया परमेश्वरा संघे मिलाए। 17 होर तेइए एजिया तुसे जूण दूर ती, होर ते जूण नेडे ती, दुई बे मेल-मिलापा रा सुसमाचार शणाऊ। 18 किबैकि तेइरी बजह ना आसा दुई री एकी आत्मा न बापू आगे पंहुच होआ सा 19 तेबे ता एबे तुसे विदेशी या मुसाफिर नेई रोहे, पवित्र लोका रे सेंघी स्वदेशी होर परमेश्वरा रे घराने रे हुए सी। 20 होर प्रेरित होर भविष्यद्वक्ता री नीवा पांघे जूणी रे कुणै रा पात्थर मसीह यीशु आपु सा, बनाए सी। 21 मसीह ना सारी रचना संघे मिलिया प्रभु ना एक पवित्र मंदर बणादें जा सा। 22 जूणी न तुस्सै भी आत्मा री बजह न परमेश्वरा रे रोहणै रा घोर होणे री तेंइए संघे-संघे बणाईया सी।

### होरी जाति न पौलुसे री सेवा

3 ऊँई री बजह न हाँऊ पौलुस जो तुस्सा अन्यजाति री तेंइए मसीह यीशु रा बन्धुआ सा। 2 अगर तुसे परमेश्वरा रे तेई अनुग्रह रे प्रबंधा रा समाचार शुणु सा, जूण तुस्सै री तेंइए मुम्बे धिना सा। 3 मतलब ऐ, कि सो भेद मुं पांघे ज्योति री बजह ना प्रगट हुआ, जेंडा मैं पहले पुरी तरह लिखीया रखीरा ती। 4 जूणी न पौढिया तुस्से पता लाई सका सी, कि हाँऊ मसीह रा भेद कोखे तक समझा सा। 5 जूण होरी-होरी बोक्ते ना माँणहु री संताना बे एण्डा नेई दसु ती, जेंडा कि आत्मा री बजह ना एबे तेइरे पवित्र प्रेरिता होर भविष्यद्वक्ता पांघे प्रगट करे सी। 6 मतलब ऐ, कि मसीह यीशु ना सुस्माचारे री बजह ना अन्यजाति लोका मीरासा न भागी, होर एकी ऐ शरीरा ना होर वायदे रे भागी सी। 7 होर हाँऊ परमेश्वर रे अनुग्रह रे तेई दाना रे मुतविक, जूण तेइरी सामर्था रे प्रभाव अनुसार मुम्बे धिना सा, तेई सुस्माचारे रा सेवक बणु। 8 मुं पांघे जूण सेभी पवित्र लोका न सेभी न होच्छा सा, ऐ अनुग्रह हुआ, कि हाँऊ अन्यजाति बे मसीह रे अपार धना रा सुसमाचार शुणानु। 9 होर सेभी पांघे ऐ गल प्रगट केरणु, कि तेई भेदा रा की प्रबंध सा, जूण सेभी रे बनाणु आले परमेश्वरे शुरु न छुपाईया रखु ती। 10 ताकि ऐबे कलीसिया री बजह ना, परमेश्वरा रा बोहु तरह रा ज्ञान तिन्हा प्रधाना होर अधिकारी पांघे जूण स्वर्गीय स्थाना न। 11 तेसा हमेशा रोहणु आई इच्छा अनुसार, जूण तेइए आसा रे यीशु मसीह पांघे केरी ती। 12 जूणी ना आसा बे तेई पांघे बशाह रखणै री हिम्मत होर बशाह री बजह ना नेडे ऐणै रा अधिकार सा। 13 तेबैता हाँऊ विनती केरा सा, कि जाए दुःख तुसा री तेंइए मुम्बे होंदे लागे सी, तिन्हा री बजह ना हिम्मत मता छौड़दे, किबैकि तिन्हा ना तुसा री महिमा सा।

### मसीह रा प्यार

14 हाँऊ एसा बजह ना बापू सामणै घुटने टेका सा, 15 जूणी ना स्वर्ग होर धौरती पांघे, हर एक घराने रा नाँ रखिया सा। 16 कि सो आपणी महिमा रे

धना रे अनुसार तुसा बे ऐ दान दे, कि तुसे तेइरी आत्मा ना आपणै आंधरै रे माँणहु ना सामर्थ पाइया बलवन्त होंदे जात। 17 होर बशाह री बजह ना मसीह तुसा रे दिला ना बसे कि तुसे प्यारा ना जड ढोकिया होर नीव पाइया, 18 सेभी पवित्र लोका संघे शोभली गल्ला बे समझणै री शक्ति पाले, कि तेइरी चौड़ाई, होर लम्बाई, होर उंचाई, होर गहराई केतरी सा। 19 होर मसीह रे तेई प्यारा बे जाणी सका सी जूण समझा ना पौरै सा, कि तुसे परमेश्वर री सारी भरपूरी तकर परिपूर्ण होआ। 20 ऐबे जूण एण्डा सामर्था सा, कि आसा री प्रार्थना होर आसा री समझा ना जादा कौम केरा सा, तेसा सामर्था रे अनुसार जो आसा ना कौम केरा सा, 21 कलीसिया ना, होर मसीह यीशु ना, तेइरी महिमा पीड़ी ना पीड़ी जुगा-जुगा तकर होंदी रोहे।

### मसीह रै शरीरा न एकता

4 ऐबे हाँऊ जूण प्रभु ना बोनुआ दा सा तुसा ना प्रार्थना केरा सा, कि जूणी बुलाहटा ना तुसे शादे ती, तेन्डी चाल चला। 2 मतलब सारी दीनता, होर नम्रता संघे, होर धीरज रखिया एकी-दूजे री गल्ला सहन केरा। 3 होर मेल-मिलाप रखिया आत्मा री एकता रखणै री कोशिश केरा। 4 एक ऐ शरीर सा, होर एक ऐ आत्मा, जेंडे तुसे जूण शादे ती आपणै शादणै पांघे एक ऐ आश सा। 5 एक ऐ प्रभु सा, एक ऐ बशाह, एक ऐ बपतिस्मा। 6 होर सेभी रा एक ऐ परमेश्वर होर बापू सा, जूण सेभी पांघे, होर सेभी मौन्झे, होर सेभी आंधरे सा। 7 पर आसा सेभी बे मसीह रे दाना रे अनुसार अनुग्रह मिलु सा। 8 तेबैता सो बोला सा, सो उथडै ना चडु, होर गुलामी बोनिया नेई, होर माँणहु बे दान धीने। 9 तेइरे चढने ना, होर कि मिला सा सिर्फ ऐ, कि सो धौरती हेठे री जगह ना भी उतरु ती। 10 होर जूण उतरु ऐ सो ऐ सा जूण सारे सर्गा ना भी झाँऊ उझे चडु, कि सेभ किच्छ पुरा करे 11 होर तेइए केतरे बे प्रेरित बणाईया, होर केतरे बे भविष्यद्वक्ता बणाईया, होर केतरे बे सुसमाचार शनाणु आए ठहराईया, होर केतरे बे हेर-शुण केरणु आए होर केतरे बे उपदेशक ठहराईया धीने। 12 जूणी ना पवित्र लोका सिद्ध होले, होर सेवा रा कौम हो, होर मसीह रा शरीर उन्नति पाला। 13 जेबे तकर कि आसे सेभ बशाह होर परमेश्वर रे बेटे री पहचाना ना एक नी होले, होर एक सिद्ध माँणहु नेई बणले, होर मसीह रे पुरे डील-डोला तकर नेई बदले। 14 ताकि आगे बे आसे शौरु नेई रौहले, जूण माँणहु री उग-बिद्या होर चलाकी न तिन्हा री भ्रमा री युक्ति होर उपदेशा री, हर एक तिन्हा री गल्ला पीछे ओरे-पोरे घमाईया सी। 15 बल्कि प्यारा ना सच्चाई ना होण्डदे-होण्डदे, सेभी गल्ला ना तेई ना जूण सिर सा, मतलब मसीह ना बढदे रोहा। 16 जूणी ना सारा शरीर हर एक जोड़ा री मजती संघे मिलिया, होर गठ-जोड़ केरिया तेई प्रभावा रे अनुसार जूण हर भागा रे परिणामा ना होआ सा, आपणै आपा बे बढ़ासा, कि शरीर प्यारा न बढ़दा रोहे

### मसीह न नऊँई जिन्दगी

17 तेबैता हाँऊ ऐ बोला सा, होर प्रभु ना तुसा बे सावधान केरा सा कि जेण्डे अन्यजाति लोका आपणै मना री बेकार रीती पांघे चला सी, तुसे ऐबे भी तेंडै मता चलदे। 18 किबैकि तिन्हे री बुधि निहयारी हुई सा, होर तेसा अज्ञानता री बजह ना जूण तिन्हा रे मना ना सा होर तिन्हे रे कठोर मना री बजह ना ते परमेश्वरा रे जीवना ना अलग करे सी। 19 होर ते शुन होइया बुरे कौमा ना पौंडे सी, कि सेभी तरह रे बुरे कौम लालचा संघे केरले। 20 पर तुसे मसीह री एण्डी शिक्षा नेई पाई। 21 बल्कि तुसे सच ना तेई री शुणी, होर जेण्डा यीशु ना सच्च सा, होर तेई न सिखाउदें भी सी। 22 कि तुसे पिछले चाल-चलना रे पराणे माँणहु बे जूण भरमाणु आई इच्छा अनुसार खत्म होन्दा रोहा सा, उतारिया शेटा। 23 होर आपणै मना रे आत्मिक स्वभावा ना नऊरे बणदे जा। 24 होर नऊरे माँणहु बे लात, जूण परमेश्वरा रे अनुसार सच्चाई री धार्मिकता, होर पवित्रता ना बणाऊदां सा। 25 एता बजह ना झूठ बोलणा छोड़ीया हर एक आपणै पड़ोसी संघे सच्च बोला, किबैकि आसे आपु ना एकी-दूजे रे अंग सी। 26 झिक ता केरा, पर पाप मता केरदे, धियाड़ा उडणै तक तुसा री झिक नेई लोड़ी रोही। 27 होर ना शैताना बे मौका देआ। 28 चोरी केरणु आ भी चोरी नेई करे, बल्कि शोभले कौम केरने री तेंइए आपणै हौथा

ना मेहनत करे, सो तेबे कि अगर कोई बे जरूरत होली ता तेई आगे देणें बे किच्छ होला । 29 कोई गंदी गल तुसा रे मुँहा ना नेई लोडी निकती, पर जरूरता रे मताबक सो ऐ जूण उन्नति री तेंइए शोभली सा, ताकि तेसा गला ना शुणनु आए पांधे अनुग्रह हो । 30 होर परमेश्वरा री आत्मा बे दुःख मता देंदे, जूणीना तुसा पांधे छुटकारे रे रोजा री तेंइये छाप धीनी सा । 31 सेभी तरह री कडवाहट, होर प्रकोप, होर झिक, होर कलह, होर निन्दा, सेभ बैरभाव समेत तुसा ना दूर करे लोडी । 32 पर एकी-दूजे पांधे कृपा, होर करुणामय बणा, होर जेण्डे परमेश्वरे मसीह ना तुसा रे सारे अपराध माफ़ करे, तेंडे तुसे भी एकी दूजे रे अपराध माफ़ करा ।

### पियाशे री सन्तान बेणना

5 तेबै प्यारे, शौहरू री साही परमेश्वरा पिछे चैलणु आळै बणा । 2 होर प्यारा न चला, जेंडे मसीहे भी आसा संघे प्यार करू, होर आसा री तेंइए आपणें आपा बे सुखदाई सुगंध बणीया परमेश्वरा सामणें भेंट केरिया बलिदान करू सा । 3 होर जेंडा पवित्र लोका री तेंइए शोभला सा, तेंडा तुस्सा न व्यभिचार, होर कोई भी तरह रे बुरे कौम, या लालचे री गल्ला तक नेई लोडी हुई । 4 होर ना शर्मिदा री, होर ना मूढता री गल्ला री, ना मजाके री, किबैकि ऐ गल्ला ठीक नी होन्दी, पर तुस्सा न हमेशा धन्याबाद ही शुणुआ लोडी । 5 किबैकि तुस्से जाणा सी, कि लोई व्यभिचारी, या अशुध्द माणहु, या लालची माणहु री, जूण मूर्ति पूजा रे बराबर सा, मसीह होर परमेश्वरा रे राज्य न मीरास नेई । 6 कोई तुस्सा बै बेकारा री गल्ला न धोखा नेई देला, किबैकि इन्हा गल्ला री बजह न परमेश्वरा री झिक आज्ञा नी मनणु आले लोका पांधे भडका सा । 7 तेबै ता तुसे तिन्हा रे सेंधी मौता बणदे । 8 किबैकि तुसे जूण पहले निहयारे न ती, पर ऐबे प्रभु न ज्योति सी, होर ऐबे ज्योति री सन्ताना साही चला । 9 किबैकि ज्योति रा फौल सेभी तरह री भलाई, होर धर्मिकता, होर सच्चाई सा ) । 10 होर ऐ पता लाई लेया, कि प्रभु बे कि शोभला लागा सा । 11 होर निहयारे रे नाशमान कौमा न हिस्सेदार मता बणदे, पर तिन्हा बै समझाए केरा । 12 किबैकि तिन्हा रे गुप्त कौमा री चर्चा केरना भी शर्मए री गल सा । 13 पर जेतरे कौमा री तेंइए समझाए केरा सी, तै सेभ ज्योति न प्रगट होआ सी, किबैकि जे सेभी किच्छा बे प्रगट केरा सा, सो ज्योति सा । 14 ऐसा बजह न सो बोला सा, ओ सोणु आलैओ जागा, होर मुंएदे न जिन्दे हो, ता मसीह री ज्योति तो पांधे चमकली । 15 तेबै ता ध्याना ना हेरा, कि केंडी चाल-चला सी, निर्बुधि लोक री साही नेई बल्कि बुद्धिमान लोका री साही चला । 16 होर मोके बे किमती समझा, किबैकि धियाडे बुरे सी । 17 ऐसा बजह न निर्बुधि मता होए, पर ध्याना लाईया समझा, कि प्रभु री इच्छा कि सा ? 18 होर दाखरसा न मतवाले मौता बणदे, किबैकि ऐता न लुचपन होआ सा, पर आत्मा न परिपूर्ण होदे जा । 19 होर आपु न भजन होर स्तुतिगान होर आत्मिक भजन गाए केरा, होर आपणें-आपणें मना न प्रभु रे सामणें गांदे होर कीर्तन केरदे रोहा । 20 होर हमेशा सेभी गल्ला री तेंइए आसारे प्रभु यीशु मसीह रै नाँ न परमेश्वर पिता रा धन्याबाद केरदे रोहा । 21 होर मसीहा रै डोरा ना एकी-दूजे रे अधीन रोहा ।

### लाड़ा होर लाड़ी

22 है लाड़ियो, आपणें-आपणें लाड़े रै एन्डे अधीन रोहा जेंडे प्रभु रै । 23 किबैकि लाड़ा लाड़ी रा मुंड सा, जेंडा कि मसीह कलीसिया रा मुंड सा, होर आपु ऐ शरीरा रा उद्धार कर्ता सा । 24 पर जेंडे कलीसिया मसीह रे अधीन सा, तेंडे लाड़ी भी हर गल्ला न आपणें-आपणें लाड़े रै अधीन रोहाली । 25 है सेभे लाड़े, आपणी-आपणी लाड़ी संघे प्यार केरा, जेंडा मसीहे भी कलीसिया संघे प्यार केरिया आपणी जांन भी कलीसिया बे धिनी । 26 कि तेस्सा बै वचना रै दुआरा, पाणी न नहाईया शुद्ध केरिया पवित्र बणाये । 27 होर तेसा बे एक एण्डी तेजस्वी कलीसिया बनाईया आपु आगे खडी करे, जूणी ना कोई दोष, ना झुर्री, ना कोई एण्डी चीज हो, बल्कि पवित्र होर निर्दोष हो । 28 एंडी तरह जरूरी सा, कि लाड़ा आपणी-आपणी लाड़ी संघे आपणें शरीरा बराबर प्यार केरे, जूण आपणी लाड़ी ना प्यार केरा सा, सो आपणें आपा ना प्यार करा सा । 29 किबैकि कोइए कड़ी भी आपणें शरीरा ना दुश्मनी

नेई केरी, बल्कि तेई रा पालन-पोषण केरा सा, जेंडा मसीह भी कलीसिया संघे करा सा । 30 तेबे कि आसे तेइरे शरीरा रे अंग सी । 31 एता बजह ना माणहु आपणें आम्मा-बापू बे छौड़िया आपणी लाड़ी संघे मिलिया रोहणा, होर तिन्हा एक तन होणा । 32 ऐ राज ता बडा सा, पर हाँऊ मसीह होर कलीसिया रे बारे ना बोला सा । 33 पर तुसा मौन्झे हर एक आपणी लाड़ी ना आपु बराबर प्यार रखेइत, हपर लाड़ी भी आपणें लाड़े री डोर बुझे ।

### आम्मा बापू होर बच्चे

6 है शौरुओ, प्रभु न आपणें- आपणें आमा-बापू रै आज्ञाकारी रोहा, किबैकि ऐ ठिक सा । 2 आपणी आमा होर बापू रा आदर केरा ( ऐ पहला हुक्म सा, जूणी संघे वायदा भी सा ) 3 कि तेरा भला होला, होर तू धौरती पांधे बोहु रोज जिंदा रोहेला । 4 होर ओ शौहरू आले ओ, आपणें शौहरू बे झिक मता दिलांदे, पर प्रभु री शिक्षा, होर चेतावनी देंई देईया तिन्हा रा पालन-पोषण केरा ।

### मालिक होर नौकर

5 है दासो, जूणा शरीरा रे मुताबिक ता तुस्सा रै स्वामी सी, आपणे मना री सिधाई सेघे डोरदे, होर कौम्दे, जेंडे मसीह री, तेंडे तिन्हा रा भी हुक्म मना । 6 होर माणहु बे खुश केरणु आले साही रिहाणें री तेंइये सेवा मता केरदे, पर मसीह रै दासा साही मना सेंघे परमेश्वरा री इच्छा पांधे चलदे रोहा । 7 होर तेस्सा सेवा बे माणहु री नेई, बल्कि प्रभु री सोचिया शोभले मना सेंघे केरा । 8 किबैकि तुस्सा बे पता सा, कि जे कोई जेंडा शोभला कौम केरा सा, चाहे दास होला, चाहे आजाद, प्रभु ना तेंडा ऐ मिलणा । 9 होर ओ स्वामियो, तुस्से भी धमकिया छौड़िया, तिन्हा संघे ऐण्डा व्यवहार केरा, कि तुस्सा बै पता सा कि तुसा रा होर तिन्हा रा दुई रा स्वामी स्वर्गा ना सा, होर सो कोई रा पक्ष नेई केरदा ।

### आत्मिक लड़ाई रै हथियार

10 ऊँई री तेंइये, प्रभु न होर तेई री शक्ति रै प्रभावा न मजबूत होंदे जा । 11 परमेश्वरा रै सारे हथियार बोहना, कि तुस्से शैताने री सारी युक्ति रा सामना केरने री तेंइए खडे रोही सके । 12 किबैकि आसा रा मल्लयुध्द मांस होर लोहू रा नेई आथी, बल्कि प्रधान होर अधिकारी संघे, होर ऐई संसारा रे निहयारे रे हाकमा संघे, होर तेई दुष्टा री सेना संघे सा जूण आकाशा ना सा । 13 तेबै ता परमेश्वरा रे सारे हथियार बोहना, कि तुस्से बुरे धियाडे न सामना केरी सकले, होर सेभ किच्छ पुरा केरिया खडे रोही सका सी । 14 जूण सच्चाई न आपणी कमर कशिया, धार्मिकता री झिल्म लाईया । 15 होर जाँघा ना मेल-मिलापा री तयारी रे बुट लाईया, 16 होर तिन्हा सेभी मौन्झे बशाह री ढाल लेइया मजबूत रोहाले ताकि तुस्से तेई दुष्टा रे औगी साही भौक्दे तिरा बे शेई सकले । 17 होर उधारा रा टोप, होर आत्मा री तलवार जूण परमेश्वरा रा वचन सा, लेआ । 18 होर हर बोक्ते होर हर तरह न आत्मा न प्रार्थना होर विनती केरदे रोहा, होर तेबे ता बीऊदे रोहा, कि सेभी पवित्र लोका री तेंइए लगातार प्रार्थना केरदे रोहा । 19 होर मेरे तेंइए भी, कि मुम्बे बोलदे बोक्त एन्डे वचन मिले, कि हाँऊ हिम्मत संघे सुसमाचारा रा भेद देसणु, जूणी री तेंइए हाँऊ शागली न बोनहुन्दा राजदूत सा । 20 होर ऐ भी कि हाँऊ तेई रे बारे न जेंडा कि मुम्बे लोडी हिम्मती संघे बोलणु ।

### आखरी अभिवादन

21 होर तुखिकुस जूण प्यारा भाई होर प्रभु न बशाह रै काबल सेवक सा तेई एजिया तुस्सा वे सेभ गल्ला दसणी, कि तुस्सा बे भी पता लागला कि हाँऊ केन्डी तरह रोहा सा । 22 सौ मैं तुस्सा हांगे तेबे भेजू सा, कि तुस्से आसा री दशा जाणले, होर सौ तुस्सा रे मना बे शान्ति देला । 23 परमेश्वर बापू होर यीशु मसीह री तरफा न भाई लोका बे शान्ति होर बशाह संघे प्रेम मिलला । 24 जूण आसारे प्रभु यीशु संघे सच्चा प्यार रखा सी, तिन्हा सेभी पांधे अनुग्रह होन्दा रोहला ।

# फिलिप्पियों

## परिचय

फिलिप्पी रैं नाँ पौलुस प्रेरित री चिठी यूरोपा न रौहणु आलै कलीसिया री तेंईये लिखी ती, एसा मण्डली री शुरुआत पौलुसे केरी ती, यए रोमी सम्राज्य मकिदुनिया न ती। ये चिठी तैबै लिखी ती जैबै पौलुस जेला न ती, तेई बौक्त पौलुस होरी मण्डली रैं बरोध होर फिलिप्पी रैं गलत शिक्षा रैं कारण दुखी ती। फिरि बी पौलुस ये चिठी खुशी होर गेहरे बिश्वास बुझिया लिखा सा।

रूप रेखा

भूमिका 1:1-11

पौलुस री आपणी हालत 1:12-23

मसीह न जीवन 1:27-2:18

तीमुथियुस होर इप्रफ्रुदितुस री तेंईये योजना 2:19-30

दुश्मन होर खतरे रैं बरोधा न चेतावनी 3:1-4:9

पौलुस होर तेईरे फिलिप्पी दोस्त 4:10-20

उपसंहार 4:21-23

**1** मसीह यीशु रे दास पौलुस होर तीमुथियुसे री तरफा ना सेभी पवित्र लोका रे नाँ, जूण मसीह ना होईया फिलीपी ना रोहा सी, अध्यक्ष होर सेवका समेत।<sup>2</sup> आसारे बापू परमेश्वर होर प्रभु यीशु मसीह री तरफा ना तुसा बे अनुग्रह होर शान्ति मिलदी रोहे।

### पौलुसे री प्रार्थना होर धन्यवाद

<sup>3</sup> हाँऊ जेबे-जेबे तुसा बे याद केरा सा, ता तेबे-तेबे परमेश्वरा रा धन्यावाद केरा सा।<sup>4</sup> होर जेबे भी तुसा सेभी री तेंईये प्रार्थना केरा सा, होर हमेशा खुश होईया प्रार्थना केरा सा।<sup>5</sup> किबैकि, कि तुसे पहले रोजा ना लेइया ओजा तक सुसमाचार बाँडणै ना मेरे साथी रोहे सी।<sup>6</sup> होर मुम्बे एसा गल्ला रा बशाह सा, कि जूणी ऐ तुसा मौन्झे शोभला कौम शुरु केरू सा, तेई सो यीशु मसीह रे धियाडे तक पुरा केरना।<sup>7</sup> सही सा, कि हाँऊ तुसा सेभी रे तेंइए एण्डा विचार केरणु किबैकि तुसे मेरे मना ना बसेदें सी, मेरी कैदा ना होर सुस्माचारा रे तेंइए जबाब होर सबूत देणै ना तुसे सेभ मुं सेंघे अनुग्रह ना सहभागी सी।<sup>8</sup> एता ना परमेश्वर मेरा गवाह सा, कि हाँऊ मसीह यीशु री तरह बशाह केरिया तुसा सेभी री इच्छा केरा सा।<sup>9</sup> होर हाँऊ ऐ प्रार्थना केरा सा, कि तुसारा प्यार, ज्ञान होर सेभी साही ना दिमाग भी बढ़दा रोहे।<sup>10</sup> ओखे तेंई कि तुसे शोभली ना शोभली गला बे प्रिय मना, होर मसीह रे धियाडे तक सच्चे बणीया रोहा, होर टोकर मता खांदे।<sup>11</sup> होर तेसा धार्मिकता रे फला ना जूण यीशु मसीह री बजह ना होआ सा, भौरदे जात, जूणी ना परमेश्वरे री महिमा होर स्तुति होंदी रोहे।

### पौलुस री कैदा न सुसमाचारा री बढ़ौतरी

<sup>12</sup> ओ भाइयो, हाँऊ तुसा बै दसणा चाहा सा, कि जे मुं पांधे बीती सा, तेसा बजह ना सुस्माचार ऐ बढु सा।<sup>13</sup> ओखे तक कि केसरी राज्य री सारी सेना होर बाकी सारे लोका ना ऐ ता प्रगट हुआ सा, कि हाँऊ मसीह री तेंइए कैद सा।<sup>14</sup> होर प्रभु ना जूण भाई सा, तिन्हा मौन्झे बोहु मेरे कैद होणे री बजह ना, हिम्मत सेंघे, परमेश्वरा रा वचन बेधड़क शनाणे री होर भी हिम्मत केरा सी।<sup>15</sup> केतरे ता जलन, होर झगड़े री बजह ना मसीह रा प्रचार केरा सी, होर केतरे शोभले मना ना।<sup>16</sup> एका ता ऐ सोचिया कि हाँऊ सुस्माचारा रा

जबाब देणे री तक ठहराऊ सा, प्यारा सेंघे प्रचार केरा सा।<sup>17</sup> होर कई एक ता सच्चे मने नेई पर विरोध केरिया मसीह री काहाणी शणा सी, ऐ सोचिया कि जेबे हाँऊ जेला ना सा ता मुम्बे होर कष्ट मिलला ॥<sup>18</sup> तेबे कि हुआ? सिर्फ ऐ, कि हर तरह ना चाहे बहाने ना, चाहे सच्चाई ना, मसीह री काहाणी शणाईया सा, होर हाँऊ एता ना खुश सा, होर मुं खुश रोहणा भी।

### जिन्दा रोहणा मसीह सा

<sup>19</sup> किबैकि मुम्बे पता सा, कि तुसे री प्रार्थना री बजह ना, होर यीशु मसीह रे पवित्र आत्मा री दाना री बजह ना, एता रा प्रतिफल मेरा उद्धार होला।<sup>20</sup> हाँऊ ता दिला ना इच्छा होर आशा रखा सा, कि मुम्बे कोई गला ना शर्म नी लोडी हुई, पर मेरी बडी हिम्मत री बजह ना मसीह री तारीफ मेरे शरीरा ना होंदी रोहे।<sup>21</sup> किबैकि मेरे तेंइए जिंदा रोहणा मसीह सा, होर मौरना फायदा सा।<sup>22</sup> होर अगर शरीरा ना जिंदा रोहणा ऐ मेरे कौमा री तेंइए फायदा सा, ता मुम्बे नी पता हाँऊ कुणी बे छांटणु।<sup>23</sup> हाँऊ ता दुई मौन्झे औधा लटकू सा, जिऊ ता केरा सा कि ओखे ना मसीह आगे जानू, किबैकि सो बोहु शोभला सा।<sup>24</sup> पर शरीरा ना तुसा री तेंइए रोहणा होर भी जरूरी सा।<sup>25</sup> तेबेता ता मुम्बे एता रा बशाह सा, होर मुम्बे पता सा कि मुं जिन्दे रोहणा, बल्कि तुसा सेंघे रोहणा कि तुसे बशाह ना बढ़दे रोहा होर तेई ना खुश रोहा।<sup>26</sup> होर जूण घमण्ड तुसे मेरे बारे ना करा सी, सो मेरे तुसा आगे भी ऐणै पांधे होर भी लोडी बढु।<sup>27</sup> सिर्फ ऐतरा केरा कि तुसा रा चाल-चलन मसीह रे सुसमाचारा रे योग्य हो, चाहे हाँऊ ऐजिया हेरणु, चाहे नेई भी ऐनु, तुसा रे बारे ना ऐ शुणनु, कि तुसे एकी ऐ आत्मा ना मजबूत सी, होर एक मन होईया सुसमाचारा रे बशाह री तेंइए मेहनत केरा सी।<sup>28</sup> होर कोई भी गला न दुश्मना ना नी डोरदे? ऐ तिन्हा री तेंइए विनाशा री निशाणी सा, होर तुसा री तेंइए उद्दारे री, होर ऐ परमेश्वरा री तरफा ना सा।<sup>29</sup> किबैकि मसीह री बजह ना तुसा पांधे ऐ अनुग्रह हुआ सा, कि ना सिर्फ तेई पांधे बशाह रखा, बल्कि पर तेई री तेंइये दुःख भी चक्का।<sup>30</sup> होर तुसा बे तेन्दी ऐ मेहनत केरनी सा, जेण्डा तुसे हाँऊ केरदा हेरू सा, होर ऐबे भी शुणा सी कि हाँऊ हाज़ी भी तेंडा ऐ कौम केरा सा।

मसीह री दीनता होर महानता

2 होर अगर मसीह न किच्छ शान्ति, होर प्यारा न बशाह होर आत्मा री हिस्सेदारी, होर किच्छ करुणा होर दया सा। 2 ता ऐबे मेरी ऐ खुशी पूरी केरा कि एक मन होईया रोहा होर ऐके प्यार, एक चित, होर एक विचार रखा। 3 विरोध होर झूठी तारिफा री तेंइए किच्छ मता केरदे पर दीनता न एकी-दूजे बे आपु न बड़िया समझा। 4 हर एक आपणें बारे न नेई, पर दूजे बे बारे न भी चिन्ता फिक्र केरला। 5 जेंडा मसीह यीशु रा स्वभाव ती तेंडा ऐ तुसा रा भी स्वभाव हो। 6 जूणीऐ परमेश्वरा रे बराबर होईया भी परमेश्वरा रे बराबर होणे बे आपु आगे रखणें री चीज नेई बुझी। 7 बल्कि आपणें आपा बे ऐन्डा शून्य केरु, होर दासा रा रूप धारण केरु, होर माँणहु रे बराबर हुआ। 8 होर माँणहु रें रूपा ना प्रगत होईया, आपणें आपा बे दीन केरु, होर ओखे तक आज्ञाकारी रोहू, कि कूसा री मौत भी सहन केरी। 9 ऐसा बजह न परमेश्वरे सौ सेभी न महान भी केरु, होर तेई बे सौ नाँ धिना जूण सेभी नाँ न उत्तम सा। 10 कि जूण स्वर्गा न होर धौरती पांधे होर जूण धौरती न बुने सी, ते सेभ यीशु रें नाँ पांधे घुटने टेकले। 11 होर परमेश्वरे री महिमा री तेंइए हर एक जीभ स्वीकार केरना कि यीशु मसीह ऐ प्रभु सा।

दुनिया न पियाशे सैंही चमका

12 ऐबे ओ मेरे प्यारो, जेंडे तुस्से हमेशा हुक्म मन्दे आए सी, तेंडे ऐबे ना सिर्फ मेरे सामणें बल्कि खास करिया मेरे दूर होंदे भी डोरदे होर कोन्दे आपणें-आपणें उध्दारा रें कौमा बे पुरा केरा। 13 किबैकि परमेश्वर ऐ सा जूणीऐ आपणी शोभली इच्छा संघे तुस्सा रे मना न इच्छा होर कौम, दुई गला रे केरने रा प्रभाव भौरु सा। 14 सेभ कौम बिना कुडकुड़ाऐ होर बिना बहस केरीया केरें केरा। 15 ताकि तुस्से निर्दोष होर भोले होईया टेडे होर हठीले लोक मौन्झे परमेश्वरा री निष्कलंक सन्तान बणीया रोहा, (जूणी मौन्झे तुस्से जीवना रा वचन लेईया भौकदे दीउये बराबर ऐई संसारा ना हेरिया सी। 16 कि मसीह ऐणें रे धियाडे ना मुम्बे घमण्ड केरने री बजह हो, कि ना मेरा दौड़ना होर ना मेरी मेहनत बेकार नौटा। 17 होर अगर मुम्बे बशाह रे बलिदाना ना होर सेवा ना आपणा खून भी बहाणा पौदू ता तेबे भी हाँऊ खुश सा, होर तुसा सेभी संघे खुशी मना सा। 18 होर तेंडे तुसे भी खुश रोहा, होर मुं संघे खुशी मणात।

तीमुथियुस होर इपफ्रुदितुस

19 मुम्बे प्रभु यीशु ना आश सा, कि हाँऊ तीमुथियुसा बे बडी छेके तुसा आगे भेजणु, ताकि तुसा रा हाल शुणीया मुम्बे शान्ति मिलली। 20 किबैकि मुं आगे एन्डे स्वभावा रा कोई नी आशी, जूण शुद्ध मने तुसा री चिंता केरला। 21 किबैकि सेभ आपणें स्वार्था री खोजा ना रोहा सी, ना कि यीशु मसीह री। 22 पर सो ता तुसे प्रेखु होर जाणु सा, कि जेंडा बेटा बापु संघे केरा सा, तेंडा ऐ तेंइए सुसमाचार बोंडणें ना मेरी मज्द केरी सा। 23 ऐबे मुम्बे बशाह सा, कि जेंडे मुम्बे पता लागला कि मेरी कि दशा सा, ता तेंडे मुं सो भेजणा। 24 होर मुम्बे प्रभु ना बशाह सा, कि मुं आपु भी छेके ऐणा। 25 पर मैं इपफ्रु दीतुस जूण मेरा भाई सा, होर सेंघी होर संघे रोहू आ होर तुसा रा दूत, होर जरूरी गल्ला मुं संघे रोहू आ सा, तुसा आगे भेजणा जरूरी सोचु। 26 किबैकि तेइरा मन तुसा सेभी ना लागता सी, तेबैता सो चिन्ता ना रोहा ती, किबैकि तुसे तेइरी बमारी रा हाल शुणु ती। 27 सो सचिये बिमार ता हुआ ती, ओखे तक कि मौरने पांधे ती, पर परमेश्वरे तेई पांधे दया केरी, होर सिर्फ तेई पांधे केले नेई, पर मुं पांधे भी, कि मुम्बे दुखा पांधे दुःख नी लोडी हुआ। 28 तेबैता मैं तेई भेजणें री पूरी कोशिश केरी कि तुसे भी तेई संघे मिलिया खुशी मना होर मेरा भी दुःख कम होला। 29 होर ऐबे तुसे तेई संघे प्रभु ना होईया बडी खुशी संघे मिलित, होर एण्डै रा आदर केरिये केरा। 30 किबैकि सो मसीह रे कौमा री तेंइए आपणें प्राण भी मुशकला ना पाइया मौरनु आ ती, ताकि जे कमी-घटी तुसारी तरफा ना मेरी सेवा ना हुई सा, तेसा कमी बे पूरी केरे।

सच्ची धार्मिकता

3 निदान, ओ मेरे भाइयो, प्रभु ना खुश रोहा, सो ऐ गल्ला फिरि भी लिखणें ना मुम्बे ता कोई कष्ट नेई होन्दा, होर एता ना तुसा री भलाई सा। 2 इन्हा कुते ना सावधान रोहा, तिन्हा बुरे कौम केरनु आए ना सावधान रोहा, तिन्हा लडाई झगडा केरणु आए ना सावधान रोहा। 3 किबैकि खतने आए ता आसे सी, जूण परमेश्वरे री आत्मा री अगुवाई ना उपासना केरा सी, होर मसीह यीशु पांधे घमण्ड केरा सी, होर शरीरा पांधे बशाह नेई रखदे। 4 पर हाँऊ ता शरीरा पांधे भी बशाह केरी सका सा, अगर कोई होरी बे भी शरीरा पांधे बशाह रखणें रा विचार सा, ता हाँऊ तेई ना भी जादा बशाह रखी सका सा। 5 ओतुए रोज मेरा खतना हुआ, इसराईला रे वंश होर विन्यामिना रे गोत्रा रा सा, इब्रानी रा इब्रानी सा, व्यवस्था रे बारे ना बोला ता हाँऊ फरीसी सा। 6 जोशा रे बारे ना बोला ता कलीसिया बे दुःख देणु आ, होर व्यवस्था री धार्मिकता ना बोला ता निर्दोष ती। 7 पर जूण-जूण गल्ला मेरे फ़ायदे री ती, सो ऐ मैं मसीह री बजह ना नुकसान देणु आई बुझी। 8 बल्कि हाँऊ आपणें प्रभु यीशु री ज्ञाने री उतमता री बजह ना सेभी गल्ला बे बेकार बुझा सा, जूणी री बजह ना मैं सेभी गल्ला ना नुकसान चकु, होर तिन्हा गल्ला बे कूडा बुझा सा, जूणी री बजह ना हाँऊ मसीह बे प्राप्त केरणु। 9 होर तेई ना बणीया रोहणु, ना कि आपणी तेसा धार्मिकता संघे, जूण व्यवस्था ना सा, बल्कि तेसा धर्मिकता संघे जूण मसीह ना बशाह केरने री बजह ना सा, होर परमेश्वरा पांधे बशाह केरने री बजह ना मिला सा। 10 होर हाँऊ तेइबे होर तेई री मृत्युंजय री सामर्था बे, होर तेई संघे दुःखा ना सहभागी होणें री तकलिफा बे जाणनु, होर तेइरी मौती री समानता बे प्राप्त केरणु। 11 ताकि हाँऊ कोई भी तरीके ना मुंऐदें न जिन्दे होणे री जगह तकूर पूजणु।

नशाणी धीरे आगें दौड़ना

12 ऐ मतलब नेई, कि मुम्बे मिलु, या सिद्ध हुआ सा, पर तेसा चिजा बे ढोकणें री तेंइए दौड़दा लागता सा, जूणी री तेंइए मसीह यीशुऐ हाँऊ ढोकू ती। 13 ओ भाइयो, मेरी इच्छा ऐ नेई कि मैं ढोकू, सिर्फ एक ऐ कौम केरा सा, कि जूण गल्ला पीछे बिती, तिन्हा बे छौड़िया, आगली गल्ला धीरे बढ़िया, 14 नशाणें धीरे बे दौड़ लानू, ताकि सो ईनाम पानु, जूण री तेंइए परमेश्वरे हाँऊ मसीह यीशु ना झाँऊ शादू सा। 15 तैबे आसा मौन्झे जेतरे शुद्ध सी, ऐ विचार रखे, होर अगर कोई गल्ला ना तुसा रा कोई होर विचार होला, ता परमेश्वरा सो भी तुसा पांधे प्रगत केरना। 16 ऐबे जोखे तकूर आसे पूजे सी, एता अनुसार होण्डदे रोहले। 17 ओ भाइयो, तुसे सेभ मिलिया मु सेंई चाल चला, होर तिन्हा बे पछियाणीया रखा, जूण एण्डी रीती पांधे चला सी जूणी रा उदाहरण तुसे आसा न हेरा सी। 18 किबैकि बोहु लोका एंडी चाल चला सी, जूणी री चर्चा में तुसा संघे घडी-घडी केरी सा, हाजी भी रौई-रौइया बोला सा, कि ते आपणी चाल-चलना ना मसीह रे दुश्मन सी। 19 तिन्हा रा अंत विनाश सा, तिन्हा रा ईश्वर पेट सा, ते आपणी शर्मा री गल्ला पांधे घमण्ड केरा सी, होर एसा धौरती री चिजा पांधे मन लाईया रखा सी। 20 पर आसा रा देश ता स्वर्गा ना सा, होर आसे प्रभु यीशु रे स्वर्गा ना ऐणें री बाट जोहा सी। 21 तेई आपणी शक्ति रे तेई प्रभावा री बजह ना जूणी री बजह ना सो सारी चिजा बे आपणें वशा ना केरी सका सा, आसा रे दीन-हिन शरीरा रा रूप बदलिया आपणी महिमा रे शरीरा रे अनुकूल बणाई देला।

व्यवहारिक निर्देश

4 तेबे ता ओ मेरे प्यारे भाइयो, जूणी लोका ना मेरा जिऊ लागी रोहा सा जूण मेरी खुशी होर मेरे मुक्त सी, ओ मेरे प्यारे भाइयो, प्रभु ना एण्डी तरहे बणीया रोहा। 2 हाँऊ युओदिया बे भी समझा सा, सुन्तुखे बे भी, कि प्रभु ना एक मन रोहा। 3 होर हे सच्चे सेंघी, हाँऊ तो ना प्रार्थना केरा सा, कि तू तिन्हा बेटडी री मज्द केर, किबैकि इन्हें मुं संघे सुसमाचार फेलाणें ना, क्लेमंस होर मेरे तिन्ह सेंघी संघे मेहनत केरी सा, जूणी रे नाँ जीवने री कताबा ना लिखे सी। 4 प्रभु ना हमेशा खुश रोहा, हाँऊ भी बोला सा खुश रोहा। 5 तुसे री कोमलता सेभी माँणहु पांधे प्रगत हो, प्रभु नेडे सा। 6 कोई भी गला

री फिकर मता केरदे, पर हर गल्ला न तुसा रे निवेदन, प्रार्थना होर विनती री बजह ना धन्यवाद सेंघे परमेश्वरा सामणें उपस्थित केरी लोड़ी । 7 तेबे परमेशवरे री शान्ति जूण समझा ना बाहरे सा, तुसा रे दिला ना होर तुसा रे विचारा बे मसीह यीशु ना सुरक्षित रखली । 8 निदान ओ भाइयो, जूण-जूण गल्ला सच्ची, होर जूण-जूण गल्ला आदरारे योग्या सा, होर जे-जे गल्ला उचित सी, होर जे-जे गल्ला पवित्र सी, होर जे-जे गल्ला सुहावनी सी, होर जे-जे गल्ला सुहावनी सा, होर जे-जे गल्ला मना बे शोभली लगा सी, होर जूण सद्गुण होर प्रशंसा री गल्ला सी, सिर्फ तिन्हा पान्धे ध्यान देआ केरा । 9 जूण गल्ला तुसे मुं ना सीखी, होर ग्रहण केरी सा, होर शुणी, होर मुं ना हेरि सा, तिन्हा रा पालन केरै केरा, तेबे परमेश्वरा जूण शान्ति रा सोता सा, तेई तुसा सेंघे रोहणा ।

### दाना री तेंईये धन्यवाद

10 हाँऊ प्रभु ना बड़ा खुश सा कि तुसा रा विचार मेरे बारे ना एतरे रोजा बाद भी बदलुआ सा, तुसा बे पक्का पहले भी ऐ विचार ती, पर तुसा बे मौका नेई मिलु । 11 ऐ नेई कि हाँऊ आपणी कमी री बजह ना ऐ बोला सा, किबैकि मैं ऐ सिखु सा कि जूणी दशा ना सा, होर एता ना संतोष केरा सा । 12 हाँऊ दीन होणा भी जाणा सा, होर बढ़ना भी जाणा सा, हर गल्ला ना होर हर दशा ना मैं रोजणा, भूखे रोहणा, होर बढ़ना-घटणा सिखु सा । 13 जूण मुम्बे सेभी

गल्ला ना सामर्थ देआ सा, तेई ना हाँऊ सेभ किच्छ केरी सका सा । 14 तेबे भी तुसे भला केरु, कि मेरे दुखा ना मेरे सेंघी बणै। 15 होर ओ फिलिप्पियो, तुसा बे आपु भी पता सा कि सुस्माचारा रे शुरूआता ना जेबे हाँऊ मकिदुनिया ना नौठा ता तेबे तुसा 16 एण्डी तरहे जेबे हाँऊ थिस्सलुनिके ना ती, तेबे भी तुसे एकी बार नेई बल्कि दुई बारी मुम्बे किच्छ भेजू ती 17 ऐ नेई कि हाँऊ दान चाह सा, पर हाँऊ एक एण्डा फ़ोळ चाह सा, जूण तुसा रे फ़ायदे री तेंइए बढ़दा रोहे । 18 मुं आगे सेभ किच्छ सा, जूण चिजा तुसे इपफ़ुदितुसा रे हौथा ना भेजी ती, तिन्हा बे पाइया हाँऊ तृप्त हुआ, सो ता सुगंध होर ग्रहण केरन योग्या बलिदान सा, जूण परमेश्वरा बे शोभला लाग़ा सा 19 होर मेरा परमेश्वर भी आपणै तेई धना रे अनुसार जूण मसीह यीशु ना सा, तुसा री हर घटी कमी बे पुरा केरला । 20 आसा रे बापू होर परमेशवरे री महिमा हमेशा होंदी रोहे। आमीन ।

### आखरी नमस्कार

21 हर पवित्र माँणहु बे जूण मसीह यीशु ना सा, नमस्ते बोला, जूणा भाई लोका मुं सेंघे सी तिन्हे भी नमस्ते लाई सा । 22 सेभ पवित्र लोका जूण केसरे रे घराने रे सी, तुसा सेभी बे नमस्ते बोला सी । 23 आसा रे प्रभु यीशु रा अनुग्रह तुसा री आत्मा ना होन्दा रोहे ।

# कुलुस्सियों

## परिचय

कुलिस्सिये रै नाँ पौलुस प्रेरित री चिट्ठी एशिया माइनर कुलुस्से नाँ रै नगर री मण्डली बै लिखी ती, जो इफिसुस नगरा न ती। ई नगरा री स्थापना पौलुसे नेई केरी ती पर ऐ तेई जैगहा न ती जुणीना अधिकार पौलुस आपणै कौन्हा पेन्धे महसूस केरा ती, जैदा कि आसे पौलुसा बै एक रोमी सम्राज्य रै एक प्रान्त, अख्या री राजधानी इफीसुस न मसीही सेवका बै भेजदे पा सी। पौलुसा बै ऐ पता लागा ती कि कुलुस्से री मण्डली न किच्छ गलत शिक्षा देणु आळै ती जे एसा गैन्ना पेन्धे जोर देआ ती परमेश्वरा बै जाणणै होर पुरा उद्धार प्राप्त केरने री तेईये एक माहणु बै किच्छ " आत्मिक अगुवे होर अधिकारी "री उपासना केरना जरूरी ती। एता संघे शिक्षक ये बोला ती कि किच्छ खास धर्म विधि बै मनणा, जैदैं खतना केरना, होर खाणै रै बारे न, होर बौऊ कठोर नियमा रा पालन केरना जरूरी ती। पौलुसे एसा शिक्षा रा बरोध केरने री तेईये, सच्चे मसीह रै संदेशा संघे ये चिट्ठी लिखा ती।

रूपरेखा

भूमिका 1:1-8

मसीह रा स्वभाव होर कौम 1:9-2:19

मसीह न नऊँआ जीवन 2:20-4:6

उपसंहार 4:7-18

## अभिवादन

1 पौलुसे री धिरे न, जूण परमेश्वरा री तरफा न मसीह यीशु रा प्रेरित सा, होर भाई तिमथियुसे री धिरे ए न, 2 मसीह न तिन्हा पवित्र होर बशाह केरणु आए लोका रै नाँ जूण कुलुस्से ना रोहा सी, आसा रै बापू परमेश्वरे री तरफा न तुसा बे अनुग्रह होर शान्ति मिल्दी रोहे।

## धन्यवाद री प्रार्थना

3 आसे ता तुस्सा री तेईये रोज प्रार्थना केरिया, आपणै प्रभु यीशु रे पिता परमेश्वरा रा धन्यावाद केरा सी। 4 किबैकि आसे शुणु सा, कि तुस्से मसीह यीशु पांघे बशाह केरा सी, होर सेभी पवित्र लोका संघे प्यार रखा सी। 5 तेसा आश केरु हुन्दीं चिजा री तेईए जूण स्वर्गा न आसा री तेईए रखी सा, जूणी रै बारे न तुस्से तेई सुसमाचारा री सच्चाई बै वचना न शुणा सी, 6 जूण तुसा आगे पुजू सा, होए जेण्डा संसारा न फोल भी आणा सा, होर बढ़दा रोहा सा, मतलब जूणी रोजा न फेटे तुस्से सो शुणु, होर सच्चाई ना परमेश्वरे रा अनुग्रह पछियाणु सा, तुस्सा आंधरे भी ऐण्डा ऐ केरा सा। 7 तेई री ऐ शिक्षा तुसे आसा रै प्यारे संघी इपक्रास ना मिली, जूण आसा री तेईए मसीह रा विश्वासयोग्य सेवक सा। 8 तेईए ता तुसा रा प्यार जूण आत्मा ना सा, आसा पांघे प्रगट केरु। 9 तेबेता जूणी ध्याडे ना आसे ऐ शुणु सा, ता आसे लगातार तुसा री तेईए प्रार्थना केरने होर विनती केरना नेई विसरदे कि तुसे सारे आत्मिक ज्ञान होर समझा संघे परमेश्वरे री इच्छा री पछियाणा ना परिपूर्ण होंदे जात्। 10 ताकि तुसा रा चाल-चलन प्रभु रे योग्य हो, होर सो हर तरह ना खुश हो, होर तुसा न हर तरह रे शोभले कौमा रे फोळ लोड़ी लागे, होर परमेश्वरे री पछियाणा ना बढ़दे रोहा। 11 होर तेई री महिमा री शक्ति अनुसार सेभी तरह री सामर्था री बजह ना बलवन्त होंदे जा, ओखे तक कि खुशी संघे हर तरह ना धीरज होर शं शीलता रिहाई सका। 12 होर बापू रा धन्यावाद केरदे रोहा, जुणीऐ आसे एन्डे योग्य बणाये कि प्याशे ना पवित्र लोका संघे शामिल होई सका सी। 13 तेईए आसे निहयारे रे वशा न खोलिया आपणै प्यारे बेटे रे राज्य न प्रवेश कराऊ सा। 14 जूणी न आसा बे छुटकारा मतलब पापा री माफी मिला सा।

## मसीह री महानता होर तेईरे कौम

15 सो ता अदृश्य परमेश्वरे रा रूप होर सारे संसारा न पहिलौठा सा। 16 किबैकि तेई न सेभी चिजा री सृष्टि हुई, स्वर्गे री होली चाहे धौरती पांघे री, हेरुईदीं चाहे नई हेरुईदीं, कि सिहासन, कि प्रभुता, कि प्रधानता, कि अधिकार, सारी चिजा तेई रे द्वारा होर तेइरी तेईए बणाईदी सा। 17 होर सो ऐ सेभी चिजा ना पहला सा, होर सारी चिजा तेई ना स्थिर रोहा सा। 18 होर सो ऐ शरीर मतलब कलीसिया रा मुंड सा, सो ऐ शुरू सा, होर मुंऐदें ना जिन्दे होणु आए ना भी पहला सा कि सेभी गला ना सो प्रधान ठहरला। 19 किबैकि बापू री खुशी ऊई ना सा, कि तेई ना सारी परिपूर्णता वास केरे। 20 होर तेई रे कूसी पांघे बहाऐदें खुना री बजह ना मेल-मिलाप केरिया, सेभी चिजा रा तेई री बजह ना मेल-मिलाप केरे चाहे सो स्वर्गे री होली चाहे धौरती पांघे री। 21 होर ऐबे तेईए यीशु रे शारीरिक शरीरा ना मौती री बजह ना तुसा रा मेल-मिलाप केरु, जूण आसे पहले बाहरे खोले ती, होर बुरे कौमा री बजह मने रे बैरी ती। 22 ताकि तुसा बे आपणै सामणै पवित्र होर निष्कलंक, होर निर्दोष बनाईया परमेश्वरा आगे खड़े केरने। 23 अगर तुस्से आपणै बशाह री नीवा न पक्के बणीया रोहले, होर तेई सुस्माचारे री आश जूण तुसे शुणु सा नेई छोडले, जूणी रा प्रचार आसमाना हेठे सारी सृष्टि ना हुआ सा, जूणी रा हाँऊ पौलुस सेवक बणु सा।

## मण्डली रा दास - पौलुस

24 ऐबे हाँऊ तिन्हा दुखा री बजह ना आनन्द करा सा, जूण तुसा री तेईए चक्का सा, होर मसीह रें दुखा री कमी तेई रे शरीरा री तेईए मतलब कलीसिया री तेईए, आपणै शरीरा ना पूरी केरिया देआ सा। 25 जूणी रा हाँऊ परमेश्वरे रे तेई इंतजामा रे अनुसार सेवक बणु, जूण तुसा री तेईए सेवक बणु, ताकि हाँऊ परमेश्वरे रे वचना रा पुरा-पुरा प्रचार केरणु। 26 मतलब कि तेई भेदा बे जूण बौक होर पीढी ना गुप्त ती, पर ऐबे तेइरे तिन्हा पवित्र लोका पांघे प्रगट हुआ सा। 27 जूणी पांघे परमेश्वरे प्रगट केरना चाहु, कि इन्ना जाती न तेई भेदा री कीमत की सा? होर सो ऐ सा, कि मसीह जूण महिमा री आश सा तुस्सा आंधरें रोहा सा। 28 जूणी रा प्रचार केरिया आसे सेभी माणहु बै ऐ दसा

सी, होर सारा ज्ञान हर एक माँणहु बे सिखा सी, कि आसे हर माँणहु बे मसीह ना सिध केरिया परमेश्वर आगे खड़ा केरले।<sup>29</sup> ऊँई बजह ना हाँऊ तेई री तेसा शक्ति अनुसार जूण मुं आंधरै सामर्था सेंघे कौम केरा सा, तन-मन लाईया मेहनत भी करा सा।

2 हाँऊ चाह सा कि तुसा बे ऐ पता लोड़ी, कि तुस्सा बे होर तिन्हा बे जूण लोदिकिया न सी, होर तिन्हा सेभी री तेंइए जूणीये मेरी शारीरिक शक्क नी हेरिंदी, हाँऊ केन्डी मेहनत केरा सा।<sup>2</sup> ताकि तिन्हा रे मना ना शान्ति हो होर सो एकी दूजे ना प्यारा सेंघे रोहले, होर सो पूरी समझा रा धन प्राप्त केरले, होर परमेश्वर बापू रे भेदा बे मतलब प्रभु यीशु बे पछियाणी सकले।<sup>3</sup> जूणी ना बुद्धि होर ज्ञाने रे सारे भंडार छिपेंदे सी।<sup>4</sup> ऐ हाँऊ तुसा बे तेबे बोला सा, कि कोई भी माँणहु तुसा बे मीठी-मीठी गला केरिया धोखा ना दे।<sup>5</sup> अगर हाँऊ शरीरा न तुसा न दूर सा, तेबे भी आत्मा रे भाव ना तुसा रे नेडे सा, होर तुसा री बिधि- नियमा अनुसार चरित्र होर मसीह पांधे तुसा रे पक्के बशाह हेरिया मुम्बे बडी खुशी होआ सा।

### मसीह न भरपूरी री जिन्दगी

6 ऐबे जेंडे तुसे मसीह यीशु प्रभु केरिया ग्रहण केरु सा, तेंडे तेई ना होण्डदे रोहा।<sup>7</sup> होर तेई ना जड़ पकड़दे, होर बढ़दे रोहा, होर जेंडे तुसे सिखाऊएदें सी, तेंडे बशाह ना मजबूत होंदे रोहा, बोहु धन्याबाद केरदे रोहा।<sup>8</sup> सावधान रोहा कि कोई तुसा बे तेई तत्व ज्ञान होर बेकारा रे धोखे री बजह ना भड़काले, जूण माणहु रे रीती रुआज होर संसारे री शुरु री शिक्षा रे अनुसार सा, पर मसीह रे अनुसार नेई।<sup>9</sup> किबैकि तेई ना परमेश्वरे री सारी परिपूर्णता शरीरा सेंघे रोहा सा।<sup>10</sup> होर तुसे भी तेई ना भरपूर हुए सी, जूण सारी प्रधानता होर अधिकारा रा शिरोमणि सा।<sup>11</sup> तेई ना तुसा रा एण्डा खतना हुआ सा, जूण हाँथा ना नै होन्दा. मतलब कि मसीह रा खतना जूणी ना शारीरिक देह उतारिया शेटा सी।<sup>12</sup> होर तेई सेंघे बपतिस्मे ना पौथूरे, होर तेई ना परमेश्वरे री सामर्था ना बशाह करिये, जूणीये सो मुंएदें ना जिंदा केरु, तेई सेंघे जिन्दे भी हुए।<sup>13</sup> होर तेइए तुसे भी, जूण आपणै अपराध, होर आपणै शरीरे री खतने री दशा ना मुंएदें ती, तेई सेंघे जिन्दे केरे, होर आसा रे सारे पाप माफ़ केरे।<sup>14</sup> होर बिधि रा सो लेख जूण आसा रे नाँ पांधे, होर आसा रे विरोधा ना ती खत्म केरु, होर तेई बे कूसा पांधे कीला सेंघे लटकाईया सामणै ना दूर केरु सा।<sup>15</sup> होर तेइए प्रधानता होर अधिकार आपु पांधे ना उतारिया तिन्हा रा खुला तमाशा बणाऊ, होर कूसा री बजह ना तिन्हा पांधे जय-जयकारे री आवाज शणाई।<sup>16</sup> तेबैता खाणै-पिणै या जाच या नऊरे चाँद या शब्दा रे बारे ना तुसा रा कोई फेसला ना केरे।<sup>17</sup> किबैकि ऐ सेभ ऐणु आई गला री परछाई सा, पर मूल चिजा ता मसीह री सा।<sup>18</sup> कोई माँणहु दीनता होर स्वर्गदुते री पूजा केरिये तुसा बे दौड़े रे प्रतिफला ना बंचित ना केरे, एण्डा माँणहु हेरिंदी गला ना लागी रोहा सा, होर आपणी शारीरिक समझा ना बेकार फुलदा रोहा सा।<sup>19</sup> होर शिरोमणि बे ढोकिया नी रोहन्दा, जूणी री बजह ना सारी देह जोड़ा-जोड़ा ना पालन-पोषण पाइया होर सेंघे कठ होईया, परमेश्वरे री धिरे ना बढ़दी रोहा सा।

### मसीह सेंघे मौरना होर जीणा

20 जेबे कि तुसे मसीह रे मुताबक संसारे री शुरु री शिक्षा रे अनुसार मुंएदें सी, ता तेबे भी तिन्हा बराबर जीवन जिया सी जूण संसारा ना सी? माँणहु री आज्ञा होर शिक्षा रे मुताबक,<sup>21</sup> एंडी बिधि रे वशा ना किबे रोहा सी, कि ऐ नी छुंगणा, ऐ नी खाणा, होर ओखे हौथ नी लाणा।<sup>22</sup> किबैकि इन्हा चिजा कौमा ऐदें-ऐदें नाश होणा। किबैकि ऐ माँणहु री आज्ञा होर शिक्षा अनुसार सा।<sup>23</sup> इन्हा बिधि ना आपणी इच्छा अनुसार बनाई दी भक्ति, होर दीनता, होर शरीरा रे अनुसार ज्ञाना रा नाँ ता सा, पर शरीरे री इच्छा रोकिया इन्हा ना किच्छ भी फायदा नेई होंदा।

3 ऐबे जेबे तुस्से मसीह सेंघे जिन्दे केरे सी, ता स्वर्गीय चिजा री तलाशा न रोहा, जौखे मसीह विराजमान सा, होर परमेश्वरे रे सीधे हौथे बैठा सा।<sup>2</sup> धौरती री चिजा पांधे नेई पर स्वर्गा री चिजा पांधे ध्यान लाईया रखा।<sup>3</sup> किबैकि तुस्से ता मुंए, होर तुस्सा रा जीवन मसीह सेंघे परमेश्वर ना गोजू

हुन्दा सा।<sup>4</sup> जेबे मसीह आसा रा जीवन सा, प्रगट होला, ता तेबे तुसा भी मसीह न महिमा सेंघे प्रगट होणा।

### पुराणी जिन्दगी होर नऊँई जिन्दगी

5 तेबै ता आपणै तिन्हा अंगा बे खत्म केरा, जूण धौरती पांधे सी, मतलब व्यभिचार, अशुध्दता, दुष्कामना, बुरी लालसा, लालचा बै जौ कि मूर्ति पूजा रै बराबर सा।<sup>6</sup> ऐसा बजह सेंघे परमेश्वरे री झिक आज्ञा नी मनणु आले पांधे भड़का सा।<sup>7</sup> होर तुस्सै भी, जेबे इन्हा बुरे कौमा न जिन्दगी जिया ती, ता ऊँई अनुसार ऐ चला ती।<sup>8</sup> पर ऐबे तुस्से भी इन्हा सेभी बे मतलब झिक, रोष, बैरभाव, निन्दा होर मुँहा न गाली बकणा छोड़ा।<sup>9</sup> एकी-दूजे ना झूठ बोलणा छोड़ा, किबैकि तुसे पराणी जिन्दगी तेसा रे कौमा सेंघे उतारिया शेटी सा।<sup>10</sup> होर नऊरे माँणहु बणै सी, जूण आपणै बनाणु आले रे रूपा रे अनुसार ज्ञान प्राप्त केरने री तेंइए नऊआ बणदा रोहा सा।<sup>11</sup> तिन्हा मौन्झे न ता कोई यूनानी रोहू, ना यहूदी, ना खतने आले, ना बिना खतने आले, ना जंगली, ना स्कुती, ना गुलाम होर ना आज्ञा, सिर्फ मसीह जूण सेभी ना सेभ किच्छ सा।<sup>12</sup> तेबैता परमेश्वरे रे छांटू हुन्दे लोके री तरह, जूणा पवित्र होर प्यारे सी, बडी करुणा, होर भलाई, होर दीनता, होर नम्रता, होर सहनशीलता धारण केरा।<sup>13</sup> अगर कोसी बे कोई पांधे दोष लाणे री बजह होली, ता एकी दूजे री सहन केरा, होर एकी दूजे रे अपराध माफ़ केरा: जेंडे प्रभुऐ तुस्सा रे अपराध माफ़ केरे, तेंडे तुस्से भी माफ़ केरा।<sup>14</sup> होर इन्हा सेभी पांधे प्यारा बे जूण सिध्दता रा कटिबन्ध सा बोनिया रखा।<sup>15</sup> होर मसीह री शान्ति जूणी री तेंइए तुस्से एक शरीर होईया शाधै भी सी, तुस्सै रे दिला न राज्य केरला, होर तुस्से धन्याबाद देणु आले बणा।<sup>16</sup> मसीह रे वचना बै आपणै दिला न बोहु बसणै देआ, होर सिध्द ज्ञाना सेंघे एकी दूजे बे सिखात, होर सचेत केरा, होर आपणै-आपणै मना न अनुग्रह सेंघे परमेश्वरे री तेंइए भजन होर स्तुतिगान होर आत्मिक गीत गात।<sup>17</sup> होर वचना ना या कौमा ना जे किच्छ भी करा सेभ प्रभु यीशु रे नाँ ना केरा, होर तेईरे द्वारा परमेश्वर बापू रा धन्याबाद केरा।

### व्यक्तिगत सम्बन्ध नऊँई जिन्दगी न

18 है लाड़ीयो, जेण्डा प्रभु न ठीक सा, तेंडा आपणै-आपणै लाड़े रे अधीन रोहा।<sup>19</sup> है लाड़ेयो, आपणी-आपणी लाड़ी सेंघे झुरी रखा, होर तिन्हा सेंघे झिक मता केरदे।<sup>20</sup> है शौहरुऔ, आपणै-आपणै आमा-बापु रै हुक्मा रा पालन केरा, किबैकि परमेश्वर ऐथा सेंघे खुश होआ सा।<sup>21</sup> है बाल बच्चे आले ओ, आपणै शौरु बे तंग मौता केरदे, एण्डा नेई लोड़ी हुआ कि तिन्हा री हिम्मत खत्म होली।<sup>22</sup> ओ सेवको, शरीरा ना जूण तुसा रे मालक सी, सेभी गला न तिन्हे री आज्ञा मने केरा, माँणहु बे खुश केरने री तेंइए रिहाणै री तेंइए नी, बल्कि मने री सिधाई होर परमेश्वरे रे डौरा न होईया सेवा केरा।<sup>23</sup> होर जौ किच्छ तुस्से केरा सी, तन- मना सेंघे केरा, ऐ सोचिया कि माँणहु री तेंइए नेई बल्कि प्रभु री तेंइए केरा सा।<sup>24</sup> किबैकि तुस्सा बै पता सा कि ऐता रे बदले तुस्सा बे प्रभु न फौल मिलणा, तुस्से प्रभु मसीह री सेवा केरा सी।<sup>25</sup> किबैकि जो बुरा केरा सा, तेई आपणी बुराई रा फौल पाणा, तौखे कोई रा पक्षपात नेई।

4 हे स्वामियों, आपणै-आपणै दासा सेंघे न्याय होर ठीक-ठीक व्यवहार केरा, ऐ समझिया कि उझे स्वर्गा न तुस्सा रा भी एक स्वामी सा।

### किच्छ आदता री तेंइये सलाह

2 प्रार्थना न लागी रोहा, होर धन्याबादा सेंघे तेई न जांगदे रोहा।<sup>3</sup> होर ऐथा सेंघे-सेंघे आसा री तेंइए भी प्रार्थना केरदे रोहा, कि परमेश्वर वचन शनाणै री तेंइये आसा बे ऐण्डा दुआर खोलला, कि आसे मसीह रे तेई भेदा बे प्रगट केरी सकेले जूणी री बजह न हाँऊ जेला न सा।<sup>4</sup> होर हाँऊ तेई बे ऐण्डा प्रगट केरणु जेडा मुम्बे केरना ठीक सा।<sup>5</sup> बोक्ता बे कीमती समझिया बाहरे आले सेंघे बडी बुध्दिमानी सेंघे व्यबार केरा।<sup>6</sup> तुस्सा रा वचन हमेशा अनुग्रह सेंघे होर साफ़ सुथरा हो, कि तुस्सा बे हर माहणु बे सही तरीके न जबाब देणा आऊ लोड़ी।

## आखरी अभिवादन

7 प्यारे भाई होर बशाह रे काबल सेवक, तुखिकुस, जूण प्रभु न मेरा साथी सा, मेरी सारी गल्ला तुस्सा बे दसला । 8 सौ मैं तेबे तुस्सा हागगे भेजू सा, कि तुस्सा बे आसा रा हाल पता लोडी होर सौ तुस्सा रे दिला बै शान्ति देला । 9 होर तेई सेंघे उनेसिमस भी भेजू सा, जूण बशाह केरने रै लायक होर प्यारा भाई सा होर तुस्सा मौन्झे न सा, इन्हा तुस्सा बे ओखली सारी गल्ला दसणी । 10 अरिस्तरकुस जूण मुं सेंघे केदी भी सा, होर मरकुस जो बरनबासा रा भाई सा (जूणी रे बारे न तुस्से हुक्म पाऊ कि अगर सौ तुस्सा हागगे ऐला, ता तेई सेंघे शोभली तरहे व्यबहार करित), 11 होर यीशु जो युस्तुस बोलिया सा, तुसा बे नमस्कार बोला सा। खतना केरेंदे लोका न सिर्फ ऐ परमेशवरे रे राज्य री तेंइए मेरे साथी होर मेरी शान्ति री बजह सी । 12 इपफ्रास जूण तुस्सा मौन्झे

न सा, होर मसीह यीशु रा दास सा, तुस्सा बे नमस्कार बोला सा होर हमेशा तुस्सा री तेंइए प्रार्थना केरा सा, ताकि तुस्से सिध्द होईया परमेशवरे रे पुरे बशाह ना होइया पक्के बणीया रोहा । 13 हाऊ तेई रा गवाह सा, कि सो तुसा री तेंइए होर लौदीकिया होर पुलिस आलै री तेंइए बडी कोशिश केरदा रोहा सा । 14 प्यारे वेद्य लुका होर देमासा रा तुसा बे नमस्कार । 15 लौदीकिया रे भाई बे होर नुम्फास होर तिन्हे रे घौरा री कलीसिया बे नमस्कार बोलीत । 16 होर जेबे ऐ चिठ्ठी तुस्सा रे ओखे पोढ़ीया खत्म होली, ता ऐण्डा केरित लौदीकिया री कलीसिया न भी पोढ़ीत, होर जूण चिठ्ठी लोदिकिया न एली तेस्सा बै तुस्से पोढ़ीत 17 फिरि अखिप्पुसा बे बोलीत, कि जै सेवा प्रभु न तोभे धीनी सा, तेस्सा सेवा बै सावधानी सेंघे पूरी केरी । 18 मुं (पौलुसे रा ) आपणै हौथे न लिखु हुन्दा नमस्कार मेरी होथकड़ी बे याद रखित; तुस्सा पांधे अनुग्रह होन्दा रोह ला, आमीन ।

# 1 थिस्सलुनीकियों

थिस्सलुनीकियों परिचय रोमी साम्राज्य न एक प्रान्त ती, तिन्हा मौन्झे एक मकिदुनिया नाँ रा एक देश ती होर थिस्सलुनिके नगर तेई री राजधानी ती। फिलिप्पी नगरा रा एणै न बाद पौलुसे औखे एक मण्डली बणाई। औखे भी, तेबरे यहूदीये बरोध शुरु केरु। जे गैर यहूदी न पौलुस मसीही रै संदेश रै बारे न दैसा ती, तेथा न मिश केरा ती, किबैकि ये गैर यहूदी धर्मा न दिलचस्पी रखा ती। तैबै पौलुसा बै थिस्सलुनिके छोड़ना पौऊ होर तैबै सौ बिरिया बै नौठा, जैबै सौ कुन्थी पूजु, तैबै पौलुसा बै तेईरे सैँधी होर तीमुथियुस रै जरिये व्यक्तिगत रूपा न थिस्सलुनिके रै मण्डली री दशा रै बारे न समाचार मिलु।

ये समाचार शुणीया थिस्सलुनीके रै नाँ न पौलुस प्रेरित री पैहली चिठी तौखलै मसीही लोका बै उत्साहित केरने री तैँइये लिखी सा। सौ तिन्हरे विश्वास होर प्यारा रै बारे न समाचारा री तैँइये धन्यवाद देआ सा। सौ तिन्हा बै आपणी जिन्दगी रै बारे न याद दिला सा जो तेई तिन्हा संघे बिताये ती। तैबै सौ तिन्हा बै मसीह रै बारे न दबारा एणै रै बारे न सवाला रा जवाब देआ सा जो मण्डली न हुए ती। सवाल ये ती: कि एक विश्वासी, जो मसीही रै दबारा एणै न पैहले ही मौरा सा, तेई जीवना न भागी होणा जो तेईरे एणै न मीलणु आळा सा? मसीही दबारा केबै एणा? पौलुस तिन्हा बै ये दसा सा कि मसीही तेई बौगत एणा जैबै तूसै मसीही री दबारा एणै री आशा पेन्धे इन्तजार केरदे लागै सी, चुपचाप आपणै कौमा न लागी रौहा।

रूप रेखा

भूमिका 1:1

धन्यवाद होर स्तुति 1:2-3:13

मसीही रै आचार-व्यवहार रै बारे न उपदेश 4:1-12

मसीही रै दबारा एणै रै बारे न शिक्षा 4:13-5:11

आखरी उपदेश 5:12-22

उपसंहार 5:23-28

## अभिवादन

1 पौलुस होर सिलवानुस होर तिमिथियुसै री धिरे न थिस्सलुनीकिये री कलीसिये रै नाँ न जो परमेश्वर बापू होर प्रभु यीशु मसीह न सी, अनुग्रह होर शान्ति तुसाबै मिलदी लोड़ी रौही।

## थिस्सलुनिकिये रा बशाह

2 आसै आपणी प्रार्थना न तुसाबै याद केरा सी होर हमेशा तुस्सा सैँधी रै बारे न परमेश्वरा रा धन्यवाद केरा सी।<sup>3</sup> होर आपणै परमेश्वर बापू सामनै तुस्से रै विश्वासै रै कोम, प्रेमै री मेहनत, होर आसरे प्रभु यीशु न आशै री धीरता बै लगातार याद केरा सी।<sup>4</sup> होर हे भाइयो, परमेश्वरै रै प्यारै लोको आसै जाणा सी कि तुस्सै चुनु हुन्दै सी।<sup>5</sup> किबैकि आसरा सुसमाचार तुस्सा हागै न केवल वचना मात्र, बल्कि सामर्थ होर पवित्र आत्मा होर बड़ै निश्चय सैँधे पूजु सा, जैण्डा तुसै जाणा सी कि आसै तुसरी तैँइयै तुसा ना कैण्डै बैणै ती।<sup>6</sup> होर तुसै बड़ै क्लेशा ना पवित्र आत्मै रै आनन्दा सैँधे वचना बै मैनिया आसरी होर प्रभु री चाल चैलदै लागै।<sup>7</sup> औरखै तक कि मकिदुनिया होर अखायै रै सैँधी विश्वासी री तैँइयै तुसै आदर्श बैणै।<sup>8</sup> किबैकि तुसरै औरखै ना केवल मकिदुनिया होर अखाया ना प्रभु रा वचन नी शुणाऊ बल्कि परमेश्वरा पैंधे जो तुसरा विश्वास सा तेथे री चर्चा हर जैगा ना एण्डी फैली कि आसा बै बोलणै री जरूरत नी आँथी।<sup>9</sup> किबैकि ते आपू आसरे बारे ना बोला सी कि तुस्सा हागै आसरा एणा कैण्डा हुआ, किबैकि तुस्सै मुरता न परमेश्वरा धिरे बै फिरै ताकि जिन्दे होर सैँधे परमेश्वरै री सेवा केरलै।<sup>10</sup> होर तेईरै बेटै री स्वर्गा न एणै री गैला केरदै रौहलै, जुण कि तेईयै मूरै न जिन्दा केरु यानिकी यीशु री जो आसा बै एणु आलै प्रकोपा न बचा सा।

## पौलुसा रा प्रचारा रा कौम

2 हे भाइयो तुसै आपू जाणा सी कि आसरा तुसा हागै एणा व्यर्थ नी हुआ।<sup>2</sup> वरन तुसै आपू जाणा सी कि पैहिलै पहल फिलिपि ना दुःख चेकणै होर उपद्रव सौहणै सैँधे बी आसरे परमेश्वरै आसा बै एण्डी हिमत धिनी

कि आसै परमेश्वरा रा सुसमाचार विरोध होंदै बी तुसाबै शुणालै।<sup>3</sup> किबैकि आसरा उपदेश भ्रम नी आँथी होर न अशुद्धता होर छला सैँधे आँथी।<sup>4</sup> पर जैण्डा परमेश्वरै आसै एथा लायक समझै होर सुसमाचार सौंपू, आसै तैण्डाए दैसा सी होर ऊँई ना आसै माहू बै नी बल्कि परमेश्वरा बै जो आसरे मैना बै जाँचा सा खुश केरा सी।<sup>5</sup> किबैकि तुसै जाणा सी कि आसै चापलूसी री गैला नी ती केरदै होर ना लोभे री तैँइयै बहाना नी ती बणादै परमेश्वर गवाह सा।<sup>6</sup> होर जैबै कि आसै मसीह रै प्रेरित होणै री वजहा ना तुसा पैंधे बोझ पाई सका ती, पर तैबै बी आसै माहू रा आदर नी ती चाँहदै, न तुसा ना होर न कौसी होरी ना।<sup>7</sup> पर जैण्डै आमा आपणै बालका रा पालण पोषण केरा सा, तैण्डाए आसै बी तुसा बिचै रौहिया नम्र स्वभाव रिहाऊ सा।<sup>8</sup> होर तैण्डाए आसै तुसरी लालसा केरिया न केवल परमेश्वरा रा सुसमाचार, बल्कि आपणै प्राण बी तुसाबै देणै बै त्यार ती किबैकि तुसै आसरे प्यारै हुए ती।<sup>9</sup> किबैकि हे भाइयो, तसै आसरी मेहनत होर कष्टा बै याद रेखा सी कि आसै रात ध्याड कोम धन्धा केरिया तुसाबै परमेश्वरै रै वचना रा प्रचार केरु कि तुसा पैंधे कौसी किस्मा रा भार नी लोड़ी पौडू।<sup>10</sup> तुसै आपू गवाह सी होर परमेश्वर बी कि तुसरै बिचा ना जो विश्वास रेखा सी, आसै कैण्डी पवित्रता होर धार्मिकता होर निर्दोषता ना रौहै।<sup>11</sup> जैण्डा तुसै जाणा सी कि जैण्डा बापू आपणै बालका सैँधे वर्ताव केरा सा, तैण्डाए आसै बी तुसा ना हर एकी बै उपदेश केरा ती, शान्ति दैआ ती होर समझा ती।<sup>12</sup> कि तुसारा चाल-चलन परमेश्वरा लायक होला, जुण तुसाबै आपणै राज्य होर महिमा ना शाधा सा।<sup>13</sup> एबै आसै बी परमेश्वरा रा लगातार धन्यवाद केरा सी कि जैबै आसै लाइया परमेश्वरै रै वचना रा सुसमाचार तुसा हागै पूजु ता तुसै स माहू रा नी बल्कि परमेश्वरा रा वचन समझिया ग्रहण केरु होर स तुसा विश्वास रेखणु आलै ना प्रभावशाली सा।<sup>14</sup> कि तुसै हे भाइयो, परमेश्वरै री तिन्हा कलीसिये री चाल चैलदै लागै जो यहूदिया ना मसीह यीशु ना सी, किबैकि तुसै बी आपणै लोका ना तैण्डाए दुःख पाऊ जैण्डा तिन्हा बै यहूदिया ना मिलू ती।<sup>15</sup> जुणियै प्रभु यीशु होर भविष्यवक्ता मारै होर आसै बी सताए, परमेश्वर तिन्हा ना खुश नी आँथी होर ते सैँधी माहू रा विरोध केरा सी।<sup>16</sup> होर ते अन्यजाति सैँधे तिन्हरै उद्धारै री गैला केरनै ना रोका सी कि हमेशा आपणै पापा रा नाप नापदै रौहलै, पर तिन्हा पैंधे भयानक प्रकोप पुजु सा।

### कलीसिया संघे मिलणै री इच्छा

17 हे भाइयो, जैबे आसै थोड़ी देरै री तैइयै मना ना नी पर प्रगटा ना तुसा ना दूर हुए ती ता आसै बड़ी लालसा संघे तुसरा मुँह हेरने री तैइयै होर बी जादा कोशिश केरी । 18 ऐबे आसै यानिकी में पौलुसै एक बार नी बल्कि दुई बार तुसा हागै एणा चाहू पर शैतान आसा बै रोकदा रौहू । 19 भला आसरी आशा, आनन्द होर बड़ाई रा मुकट की सा? कि आसरी प्रभु यीशु सामनै तेइरै एणै रै बौगतै तुसै नी होणै? 20 आसरी बड़ाई होर आनन्द तुसै ता सी ।

### तिमुथियुसा रा भेजणा

3 ऐबे जैबे आसरी होर नी रौहूआ ता आसै ऐ ठहराऊ कि एथेन्सा ना केल्है रौहलै । 2 होर आसै तिमथियुस जो मसीह रै सुसमाचारा न आसरा भाई होर परमेश्वरा रा सेवक सा भेजू कि तुसाबै स्थिर केरला होर तुसरै विश्वासै रै बारै न तुसाबै समझाला । 3 कि कोई इन्हा दुःखै री वजहा ना भटकला नी, किबैकि तुस्सै आपु जाणा सी कि आसै इन्हरी तैइयै ठहराउ हुन्दै सी । 4 किबैकि पैहिलै बी जैबे आसै तुसरै ओखै ती ता तुस्सै बोला ती कि आसा बै दुःख चेकणा पौडना होर ऐण्डाए हुआ होर तुस्सै जाणा भी सी । 5 एसा वजहा ना जैबे मेरै नी रौहूआ ता तुसरै विश्वासा रा हाल जाणनै री तैइयै भेजू कि ऐण्डा नी लोड़ी हुआ कि जाँच केरनू आलै तुसरी जाँच केरी होली होर आसरी मेहनत बेकार होली ।

### तीमुथियुस द्वारा समाचार मिलणा

6 पर ऐबे तिमथियुसै तुसा हागै ना एजिया तुसरै विश्वास हो प्रेमा रा सुसमाचार शुणाऊ होर एसा गैलै रै बारै ना बी दैसू कि तुसै हमेशा प्रेमा संघे आसा बै याद केरा सी होर आसा बै हेरने री लालसा रैखा सी, जैण्डा कि आसै बी तुसाबै हेरने री । 7 ऐबे हे भाइयो, आसै आपणै सारै दुःख होर क्लेशा ना तुसरै विश्वासा ना तुसरै बारै ना शान्ति पाई । 8 किबैकि ऐबे अगर तुसै प्रभु ना स्थिर रौहलै ता आसै जिन्दै सी । 9 होर जैण्डा आनन्द आसा बै तुसरी वजहा न आपणै परमेश्वरा सामनै सा, तेथे रै बदलै तुसरै बारै ना आसै कौसरी तेइयै परमेश्वरा रा धन्यवाद केरलै? 10 आसै रात ध्याड बड़ी प्रार्थना केरा सी कि तुसरा मुँह हेरलै होर तुसरै विश्वासै री कमी पूरी केरलै । 11 ऐबे आसरा परमेश्वर बापू होर प्रभु यीशु तुसरै ओखै एणै री तैइयै आसरी अगुवाई केरला । 12 होर प्रभु ऐण्डा केरला कि, जैण्डा आसै तुस्सा संघे झुरी रैखा सी, तैण्डाए तुस्सैरी झुरी बी आपु ना लोड़ी रौही होर सैभी माहू संघे बदलै होर उन्नति केरदा जाला । 13 ताकि सौ तुस्सैरे मना बै स्थिर केरला कि, जैबे आसरा प्रभु यीशु आपणै सैभी पवित्र लोका संघे ऐला ता ते आसरी परमेश्वर बापू सामनै पवित्रता न निर्दोष ठहरलै ।

### जीवन जो परमेश्वरा बै खुश रखे

4 हे भाइयो, आसै तुसा हागै विनती केरा सी होर तुसाबै प्रभु यीशु ना समझा सी कि जैण्डा तुसै आसा ना शोभली चाल चैलणा सीखू होर परमेश्वरा बै खुश केरना सीखू सा होर तुसै चैला बी सी, तैण्डाए होर बी बढ़दै जात् । 2 किबैकि तुसै जाणा सी कि, आसै प्रभु यीशु री तरफा ना तुसाबै कुणा-कुणा आज्ञा पजाई? 3 किबैकि परमेश्वरै री इच्छा ऐ सा कि तुसै पवित्र बैणलै यानिकी, व्यभिचारा ना बचिया रौहलै । 4 होर तुसा ना हर एक पवित्रता होर आदरा संघे आपणै औट्टे बै प्राप्त केरना जाणलै । 5 होर ऐ कोम आपणी इच्छा संघे नी होर न तिन्हा ज्ञाति साही आँथी जो परमेश्वरा बै नी जाणदी । 6 एसा गैला ना कोई आपणै भाई बै नी टगला होर न तेई पँधे दाँव चलाला किबैकि प्रभु इन्हा सैभी गैला रा बदला लेणू आला सा, जैण्डा कि आसै तुसाबै पैहिले बोलू होर याद बी दिलाई । 7 7 किबैकि परमेश्वरै आसै अशुद्ध हाणै री तैइयै नी बल्कि पवित्र हाणै री तैइयै शाधै सी । 8 एस कारण जो तुच्छ जाणा सा स माहू बै नी पर परमेश्वरा बै तुच्छ जाणा सा, जुण आपणी पवित्र आत्मा तुसाबै देआ सा । 9 पर भाईचारे री झुरी रै बारै ना ऐ जरूरी नी आँथी कि हाँऊ तुसा हागै किछ लिखनू, किबैकि आपु ना प्रेम रैखणा तुसै परमेश्वरा ना आपे सीखू सा । 10 होर सारै मकिदुनियै रै सैभी भाई संघे ऐण्डा केरा बी

सी, पर हे भाइयो आसै तुसाबै समझा सी कि होर बी बढ़दै जात् । 11 होर जैण्डा आसै तुसाबै आज्ञा धिनी सा, तैण्डाए चुपचाप रौहणै होर आपणा-आपणा कोम काज केरने होर आपणै-आपणै हाँथे लाइया कमौणै री कोशिश केरा, 12 कि बाहरलै संघे शोभला वताव केरलै होर तुसाबै कौसी चीजै री कमी नी होली ।

### यीशु रा दबारा एणा

13 हे भाइयो, आसै नी चाँहदै कि तुसै तिन्हरै बारै ना जो सोआ सी अज्ञान रौहलै, ऐण्डा नि लोड़ी हुआ कि होरा साही तुसै बी शोग केरलै जुणिबै आशा नी । 14 किबैकि अगर आसै मना सी कि, यीशु मुँआ होर जिन्दा बी हुआ ता, तैण्डाए परमेश्वरा ते बी जो यीशु ना सुतै सी, तेही संघे नेणै । 15 किबैकि आसै प्रभु रै वचनै रै मुताबिक तुसाबै ऐ बोला सी कि, आसै जो जिन्दै सी होर प्रभु रै एणै तक बचिया रौहलै ता सुतैदे ना कदी बी आगै नी बढ़ना । 16 किबैकि प्रभु आपु स्वर्गा ना उतरना, तेई बौगतै ललकार होर प्रधान स्वर्गदूता रा शब्द शुणिना होर परमेश्वरै री तुरही फुकरिनी होर जुणा प्रभु ना मूँए सी तिन्हा पैहिलै जिन्दै होणा । 17 तैबे आसै जो जिन्दै सी होर बैचै सी तिन्हा संघे स्वर्गा ना चैकिणा कि बागरी ना प्रभु न मिललै होर एसा रीतियै आसा हमेशा प्रभु संघे रौहणा । 18 इन्हा गैला संघे एकी दुजै बै शान्ति देदै रौहा ।

### परमेश्वरै रै दबारा एणै री तैइये तयार

5 पर हे भाइयो, ऊँई री कोई जरूररी नी कि बौगत होर कालै रै बारै ना तुसरी तैइयै किछ लिखलै । 2 किबैकि तुसै आपु ठीक जाणा सी कि जैण्डा चोर राती एजा सा, तैण्डाए प्रभु रा ध्याडा एणू आला सा । 3 जैबे लोका बोलदै होणै कि, ठीक सी होर किछ डोर नी आँथी, ता तिन्हा पँधे एकदम विनाश पौडना, जैण्डा कि सुजदी बेटडी पँधे पीडा होर तिन्हा कौसी रीतियै नी बचणा । 4 पर हे भाइयो, तुसै ता निहारै ना नी आँथी कि स ध्याडा चोरा साही तुसा पँधे एजिया पौडला । 5 किबैकि, तुसै सैभै ज्योति री सन्तान सी होर ध्याडै री सन्तान सी । आसै न ता राती रै होर न निहारै री सन्तान आँथी । 6 ऐबे आसा होरा साही सोदँ नी रौहणा, पर जागदै रौहणा होर होशियार रौहणा । 7 किबैकि जुणा सोआ सी तै राती बै सोआ सी होर जुणा मतवालै होआ सी ते राती बै मतवालै होआ सी । 8 पर आसै ता ध्याडके सी । विश्वास होर प्रेमै री झिलमा लाइया होर उद्धारै रै टोप लाइया होशियार रौहा । 9 किबैकि परमेश्वरै आसै झिकै री तैइयै नी बल्कि एथै री तक ठहराए कि आसै आपणै प्रभु यीशु मसीह रै द्वारा उद्धार प्राप्त केरलै । 10 सौ आसरी तैइयै ऊँई री तक मूँआ कि आसै चाहै जागदै होलै या सोदँ होलै, सैभै मिलिया तेइरी तैइयै जौलै । 11 एसा वजहा ना एकी दुजै बै शान्ति देआ होर एकी दुजै री उन्नति रा कारण बैणा, तुसै ऐण्डा केरा बी सी ।

### कलीसिया बै उपदेश

12 हे भाइयो, आसै तुसा हागै विनती केरा सी कि, जो तुसा ना मेहनत केरा सी होर प्रभु ना तुसरै अगुवै सी होर तुसाबै शिक्षा देआ सी, तिन्हरी मैना । 13 होर तिन्हरै कोमै री वजहा ना प्रेमा संघे तिन्हा बै बोहू आदरै रै लायक समझा, आपु ना मेल-मिलाणा ना रौहा । 14 हे भाइयो, आसै तुसाबै समझा सी कि जो ठीक चाल नी चैलदै, तिन्हा बै समझात् होर डोरनू आलै बै हिमत देआत् । कमजोर माहू बै सँभाला होर सैभी बै सहनशीलता रिहात् । 15 होशियार, कोई कौसी संघे बुराई रै बदलै बुराई नी केरला, बल्कि हमेशा भलाई केरने री तैइयै तयार रौहा । आपु सैभी ना बी भलाई री इच्छा रैखा । 16 हमेशा आनन्दित रौहा । 17 लगातार प्रार्थना ना लागी रौहा । 18 हर गैला ना प्रभु रा धन्यवाद केरा । तुसरी तैइयै मसीह यीशु ना परमेश्वरै री ऐण्डी इच्छा सा । 19 आत्मा बै मता बुझाँदै । 20 20 भविष्यवाणी बै तुच्छ मता जाणदै । 21 सैभी गैला बै परखा, जो शोभली सी तिन्हा बै दौकिया रैखा । 22 सैभी किस्मै री बुराई ना बैचिया रौहा ।

## आशीर्वाद

<sup>23</sup> शान्ति रा परमेश्वर आपू तुसाबै पवित्र केरला; होर तुसरी आत्मा, प्राण होर देह आसरै प्रभु यीशु मसीह रै एणै तक पूरै-पूरै निर्दोष होर सुरक्षित रौहलै

। <sup>24</sup> तुसरा शाधणु आला सैचा सा होर तेई ऐण्ढाए केरना । <sup>25</sup> हे भाइयो, आसरी तैइयै प्रार्थना केरा । <sup>26</sup> सैभी भाई रा आदरा सैघै स्वागत केरा । <sup>27</sup> हाँऊ तुसाबै प्रभु री कसम देआ सा कि ऐ पत्री सैभी भाई बै पौढिया शुणाइली । <sup>28</sup> आसरै प्रभु यीशु मसीह रा अनुग्रह तुसा पैंधै होंदा रौहला ।

## 2 थिस्सलुनीकियों

थिस्सलुनीकियों री मण्डली रै बारे न जानकारी

मसीही रै दबारा एणै रै बारे न उलझना रै कारण थिस्सलुनीकी री मण्डली न गड़बड़ी री स्थिति पैदा हुई सा। थिस्सलुनीकी रै नाँ पौलुसा री दूजी चिट्ठी एसा बिचारा पेन्धे कि प्रभु रा एणै रा ध्याड़ा पैहले आऊ सा, ये बिचार केरने री तेंईये लिखी सा। पौलुस ऐ दसा सा कि मसीही रै एणै न पैहले बड़ीभारी दुष्टता होर बुराई होणी। ऐ शैताना री अधिकारा न होणा जुणी बै "पापा रा बेटा बोला सी" जो मसीही रा बिरोधी होणा। पौलुस औरै एक जरूरी गैल्ला पेन्धे जोर देआ साकि सारे दुःख होर कष्ट होन्दै भी तेईरै चले बै आपणै वशाह न मजबूत होणा चिहिए, आपणी कमाई री तेंईये कौम केरदे रौहणा चिहिए जैदा कि पौलुस आपणै संघी संघे केरा ती, होर भलाई केरने न लागी रौहणा चिहिए।

रूप-रेखा

भूमिका 1:1,2

स्तुति होर प्रशंसा 1:3-12

मसीही रै दबारा एणै रै बारे न शिक्षा 2::1-17

मसीही रै आचार -व्यवहार रै बारे न उपदेश 3:1-15

उपसंहार 3:16-18

### अभिवादन

1 पौलुस, सिलवानुस होर तिमुथियुसै री तरफा ना थिस्सलुनीकियै री कलीसियै रै नाँ ना, जो आसरे परमेश्वर बापू होर प्रभु यीशु मसीह ना सी, 2 आसरे परमेश्वर बापू होर प्रभु यीशु मसीह ना तुसाबै अनुग्रह होर शान्ति मिलदी लोड़ी रौही।

### न्याय रा ध्याड़ा

3 हे भाइयो, तुसरै बारे ना आसा बै हर बौगतै परमेश्वरा रा धनयवाद केरना चाहिए होर ऐ सही बी सा कि, तुसरा विश्वास बढ़दा जा सा होर तुसरा प्रेम आपू ना बढ़दा जा सा। 4 औरै तक कि तुसै परमेश्वरै री कलीसिया ना तुसरै बारे ना घमण्ड केरा सी कि जेतरे दुःख कष्ट तुसै सौहा सी, तिन्हा सैभी ना तुसरा धीरज होर विश्वास प्रगट होआ सा। 5 ऐ परमेश्वरै रै सैचै न्याय रा स्पष्ट सबूत सा कि, तुसै परमेश्वरै रै राज्य रै लायक ठहरलै, जुणि री तेंईयै तुसै दुःख बी सौहा सी। 6 किबैकि परमेश्वरा रा न्याय ऐ सा कि जुणा तुसाबै दुःख देआ सी, तिन्हाबै बदलै ना दुःख देला। 7 होर तुसाबै जो दुःख सौहा सी, आसा सेंघे चैन देला, तेई बौगतै जैबै कि प्रभु यीशु आपणै सामर्थी दूता सेंघे धधकदी औगी ना प्रगट होला। 8 होर जो परमेश्वरा बै नी पछियाणद होर आसरे प्रभु यीशु रै सुसमाचारा बै नी मैनदै, तिन्हा ना बदला लेणा। 9 तिन्हा प्रभु रै सामने तेइरी शक्ति ना दूर होइया अनन्त विनाशा री सजा पाणी। 10 ऐ तेई ध्याड़े ना होणै बै, जैबै स आपणै पवित्र लोका ना महिमा पाणै होर सैभी विश्वास केरनू आलै ना हैरानी रा हो, किबैकि तुसै आसरी गवाही पैंधे विश्वास केरू। 11 आसै हमेशा तुसरी तेंईयै प्रार्थना बी केरा सी कि, आसरा परमेश्वर तुसाबै एसा बुलाहटा लायक समझला होर भलाई री हर एक इच्छा होर विश्वासै रै हर एकी कोमा बै सामर्थी सेंघे पूरा केरला, 12 कि आसरे परमेश्वर होर प्रभु यीशु मसीह रै अनुग्रह रै मुताबिक आसरे प्रभु यीशु मसीह रा नाँ तुसा ना महिमा पाला होर तुसै तेइना।

### पापा रा माहणु मतलब नाशा रा बेटा

2 हे भाइयो, ऐबै आसै प्रभु यीशु मसीह रै एणै होर तेई हागै कठा होणै रै बारे ना तुसा हागै विनती केरा सी। 2 कि कौसी बी आत्मा, वचन या पत्री रै द्वारा जो कि आसरी तरफा ना होली, ऐ समझिया कि प्रभु रा ध्याड़ा पुजू सा, तुसरा मन अचानक अस्थिर नी होला होर न तुसै घबरालै। 3 कौसी बी रीतियै कोई रै धोखे ना हेरीत् एन्दै किबैकि तेई ध्याड़े नी एणा जैबै तक कि धर्मा रा त्याग नी होला होर स पापा रा पुरुष अर्थात् विनाशा रा बेटा पैदा नी होला। 4 जो विरोध केरा सा होर आपणै आपू बै परमेश्वरा ना बड़ा ठहरा सा औरै तक कि स परमेश्वरै रै मन्दिरा ना बेशिया आपणै आपू बै परमेश्वर प्रगट केरा सा। 5 कि तुसाबै याद नी कि जैबै हाँऊ तुसरै औरै आऊ ता तुसाबै इन्हा गैला बोला ती? 6 होर ऐबै तुसै तेसा चीजा बै ज्ञाणा सी जो तेइबै रोकदी लागी सा कि स आपणै बौगता ना प्रगट होला। 7 किबैकि अधर्मा रा भेद ऐबै बी कोम केरदा जा सा, पर हाजी बी एक रोकणु आला सा होर जैबै तक स दूर नी होला तेई रोकिया रौहणा। 8 तैबै तेई अधर्मा प्रगट होणा होर प्रभु यीशु स आपणै मुँहै लाइया फुकरिया मारना होर आपणै एणै री शक्ति सेंघे भस्म केरना। 9 तेई अधर्मा रा एणा शैतानै रै कोमै रै मुताबिक सैभी किस्मै री झूठी सामर्थ, चिन्ह होर अद्भुत कोमा सेंघे, 10 होर नाश होणु आलै री तेंईयै अधर्मा रै सैभी किस्मै रै धोखे सेंघे होणा, किबैकि तिन्हा सचाई रा प्रेम ग्रहण नी केरू, जुणियै कि तिन्हा उद्धार होंदा। 11 होर एसा वजहा ना परमेश्वरा तिन्हा ना एक भटकाणु आली सामर्थ भेजणी ताकि ते झूठै री प्रतीति केरलै। 12 होर जेतरे लोका सत्य री प्रतीति नी केरदैं, वरन् अधर्मा ना खुश होआ सी सैभी सजा पाणी।

### मजबूत बणीया रौहा

13 पर हे भाइयो होर प्रभु रै प्रिय लोको, लोड़ी ता ती कि आसै तुसरै बारे ना हमेशा परमेश्वरा रा धनयवाद केरदैं रौहलै कि परमेश्वरै तुसै आदि ना चुनै कि आत्मै रै द्वारा पवित्र बैणिया होर सत्य री प्रतीति केरिया उद्धार पालै। 14 जौसरी तेंईयै तेइयै तुसै आसरे सुसमाचारै रै द्वारा शाधै कि आसरे प्रभु यीशु मसीह री महिमा बै प्राप्त केरलै। 15 हे भाइयो, जो-जो गैला तुसै की

वचन, की पत्री रै द्वारा आसा ना सीखी सी, तिन्हा बै डोकिया रखा  
 16 आसरा प्रभु यीशु मसीह होर आसरा परमेश्वर जुणियै आसा सेंधै झुरी रैखी  
 होर अनुग्रह ना हमेशै री शान्ति होर उत्तम आशा धिनी सा, 17 तुसरै मना बै  
 शान्ति देला होर तुसाबै हर एक शोभलै कोमा ना होर वचना ना दृढ़ केरला ।

### आसारी तेंइये प्रार्थना

3 हे भाइयो, आसरी तेंइयै प्रार्थना केरदै रौहा कि, प्रभु रा वचन ऐण्डी  
 छेकै फैलला होर महिमा पाला ज़ैण्ढा तुसा ना हुआ । 2 होर आसै टेढे  
 होर दुष्ट माहू ना बैचिया रौहलै किबैकि हर एकी ना विश्वास नी आँथी । 3 पर  
 प्रभु सचा सा, तेई तुसै पैकै रूपा ना स्थिर केरनै होर तेई दुष्टा ना बचाइया  
 रैखणै । 4 होर आसा बै प्रभु ना तुसा पेंधै भरोसा सा कि जो-जो आज्ञा आसै  
 तुसाबै देआ सी, तिन्हा बै तुसै मैना सी होर मैनदै बी रौहणा । 5 परमेश्वरा रा  
 प्रेम होर मसीह रै धीरजा ना प्रभु तुसरै मनै री अगुवाई केरला ।

### कौम केरने रा उतरदायित्व

6 हे भाइयो, आसै तुसाबै आपणै प्रभु यीशु मसीह रै नाँ ना आज्ञा देआ सी  
 कि हर एक ऐण्ढै भाई ना अलग रौहा, जो गलत चाल चैला सा होर जो शिक्षा  
 तेइयै आसा ना पाई सा तेथै रै मुताबिक नी केरदा । 7 किबैकि तुसै आपू  
 जाणा सी कि कौस रीतियै आसा साही चाल चैलणी, किबैकि आसै तुसा

बिचै गलत चालियै नी चैलै, 8 होर कौसी री रोटी मुफ्त नी खाई, पर मेहनत  
 होर कष्टा ना कोम-धन्धा केरा ती कि तुसा कौसी पेंधै बोझ नी होला । 9 ऐ नी  
 कि आसा बै हक नी आँथी पर एथै री तक कि आपणै आपू बै तुसरी तेंइयै  
 आदर्श ठहरालै कि तुसै आसा साही चाल चैललै । 10 होर जैबै आसा तुसरै  
 आँखै ती, तैबै बी ऐ आज्ञा तुसाबै देआ ती कि अगर कोई कोम नी केरना  
 चाहला ता रोटी बी नी खाला । 11 आसै शुणा सी कि केतरै लोका तुसरै बिचा  
 ना गलत चाल चैला सी होर किछ कोम नी केरदै पर होरी रै कोमा ना हौथ पा  
 सी । 12 ऐण्ढै लोका बै आसै प्रभु यीशु मसीह रै नाँ ना आज्ञा देआ सी होर  
 समझा सी कि चुपचाप कोम केरिया आपणी रोटी खालै । 13 होर तुसै हे  
 भाइयो, भलाई केरनै ना हिमत मता छौड़दै । 14 अगर कोई आसरी एसा पत्री  
 री गैला बै नी मैनला ता तेई पेंधै नजर रैखा होर तेइरी संगति मता केरदै,  
 जुणियै कि स शर्मिदा होला । 15 तैबै बी तेइबै बेइरी मता समझाँदै पर समझाँदै  
 रौहा ।

### आखरी नमस्कार

16 ऐबै प्रभु जो शान्ति रा सोता सा आपू तुसाबै हमेशा हर किस्मै री शान्ति  
 देला, प्रभु तुसा सेंधै रौहला । 17 हाँऊ पौलुस आपणै हौथै नमस्कार लिखा  
 सा । हर पत्री ना मेरा ऐ चिन्ह सा । हाँऊ एसा रीतियै लिखा सा । 18 आसरै  
 प्रभु यीशु मसीह रा अनुग्रह तुसा सैभी पेंधै हाँदा रौहला ।

# 1 तीमुथियुस

## भूमिका

तीमुथियुस एक युवा मसीही ती, जो एशिया माईनर रा रौहणु आळा ती होर यहूदी आमा होर यूनानी बापू रा बेटा ती | सौ पौलुसा रै प्रचारा रै कौमा न तेईरा सँघी होर सहायक बैणु ती | तीमुथियुसा रै नौ री पैहली चिठी त्राई खास गैला रै बारे न लिखी ती | सेभी न पैहले, ये चिठी मण्डली न झूठी शिक्षा रै बिरोधा न एक चेताऊनी सा | सौ शिक्षा जो यहूदी होर गैर यहूदी दुई री ती कि ऐ दुनिया बुरी सा होर एक माहणु खास गुप्त ज्ञान होर किच्छ रीती रिवाज, जैठे किच्छ खाणै री चीजा होर ब्याह नेई केरना रै द्वारा ही मुक्ति मिली सका सा | एसा चिठी न मण्डली रै प्रबंध होर आराधना रै बारे न जानकारी भी सा | होर सँघे तेईरी आदता रै बारे न भी दैसु सा जो मण्डली रै अगुवे होर मण्डली रीमजत करणु आळै री तँईये जरूरी सा | आखरी न पौलुसा बै ये सलाह धित्री सा कि सौ कैदी तैरह एक शोभले मसीह रा दास बणी सका सा, होर विश्वासी रै झुंडा रै प्रति कि जिम्मेबारी सा |

रूप-रेखा

भूमिका 1:1,2

कलीसिया होर एथा रै अगुवे रै बारे न जानकारी 1:3-3:16

तीमुथियुसा बै तेईरे कौमै रै बारे न जानकारी 4:1-6:21

## अभिवादन

1 पौलुसै री धीरे ना जे आसरै उद्धारकर्ता परमेश्वर होर आसरी आशै री जैगा मसी यीशु री आज्ञा ना मसीह यीशु रा प्रेरित सा, तीमुथियुसै रै नौ ना जो मेरा सँघा बेटा सा, 2 पिता परमेश्वर होर आसरै प्रभु यीशु मसीह ना तौभै अनुग्रह, दया होर शान्ति मिलदी लोड़ी रोही |

## झूठी शिक्षा रै विरुद्ध चेताऊनी

3 जेण्डा मैं मकिदुनिया बै जाँदी घेरै तौभै समझाऊ ती कि इफीसुसा ना रौहिया केतरै बै आज्ञा देला कि होरी किस्मै री शिक्षा हेरी देंदा, 4 होर तिन्हा ऐण्डी कहाणी होर अनन्त वँशावली पँधै मन हेरी लाँदा जुणियै कि वहस होआ सा होर परमेश्वरै रै तेई प्रबन्धै रै मुताबिक नी आँधी, जो विश्वासा सँघे सम्बन्ध रैखा सी, तैण्डाए भी बोला सा | 5 आज्ञा रा साराँश ऐ सा कि शुद्ध मैने होर शोभलै वचारा सँघे होर निष्कपट विश्वासा सँघे प्रेम पैदा होला | 6 इन्हा छौड़िया केतरै लोका बकवासा धिरा बै फिरिया भटकै सी, 7 ते व्यवस्था रे जाणणु आलै बणना चाहा सी पर जो गैला दृढता ना बोला सी तिन्हा बै समझदै बी नी आँधी | 8 पर आसै ज्ञाणा सी कि अगर कोई व्यवस्था बै व्यवस्थै री रीति ना कोमा ना आणला ता स भली सा | 9 ऐ जाणिया कि व्यवस्था धर्मी माहू री तँईये नी बल्कि अधर्मी, नरँकुश, भक्तिहीन, पापी, अपवित्र होर अशुद्ध, आमा-बापू बै घात केरनू आलै, हत्यारै, 10 व्यभिचारी, पुरुषगामी, माहू बेचणू आलै, झूठे होर झूठी कसम खाणू आलै होर खरै उपदेशै रै विरोधी री तँईये ठहराई सा | 11 ऐ परमधन्य परमेश्वरै री महिमै रै तेई सुसमाचारै रै मुताबिक सा जो मुँभै सौंपू सा |

## अनुग्रह री तँईये धन्यवाद

12 होर हाँऊ आपणै प्रभु यीशु मसीह रा जुणियै मुँभै सामर्थ धिनी सा धन्यवाद केरा सा कि तेईये हाँऊ विश्वासयोग्य समझिया आपणी सेवै री तँईये ठहराऊ | 13 हाँऊ ता पैहिलै निन्दा केरनू आला, सताणू आला होर अन्धेर केरनू आला ती, तैबै बी मुँ पँधै दया हुई किबैकि मैं अविश्वासै री दशा ना बगैर समझै ए कोम केरै ती, 14 होर आसरै प्रभु रा अनुग्रह तेई विश्वास होर

प्रेमा सँघे जो मसीह यीशु ना सा बहुतायता ना हुआ | 15 ऐ गैल सँघी सा होर हर किस्मा ना मैने लायक सा कि, मसीह यीशु पापी रा उद्धार केरनै री तँईये सँसारा ना आऊ, जुणिना कि सैभी ना बड़ा पापी हाँऊ सा | 16 पर मुँ पँधै एथै री तक दया हुई कि मुँ सैभी ना बड़ै पापी ना यीशु मसीह आपणी सहनशीलता रिहाला कि जुणा लोका तेई पँधै अनंत जिन्दगी री तँईये विश्वास केरलै, तिन्हरी तँईये हाँऊ एक आदर्श बणनू | 17 ऐबै सनातन राजा, अविनाशी अनदखै अद्वैत परमेश्वर रा आदर होर महिमा युग-युग होंदी रौहली | आमीन | 18 हे पुत्र तीमुथियुस, तिन्हा भविष्यवाणी रै मुताबिक जो पैहिलै तेरे बारे ना केरुईदी ती हाँऊ ऐ आज्ञा सौंपा सा कि तू तिन्हरे मुताबिक शोभली लड़ाई लड़दा रोहला, 19 होर विश्वास होर तेसा अच्छी बुद्धि बै थामिया रोहला जुणियै दूर केरनै री वजहा ना केतरै लोका रा विश्वास रूपी जहाज डुबू | 20 तिन्हा मुँझै ना इमिनियुस होर सिकन्दर सी जे मैं शैताना बै सौंपै कि ते निन्दा केरना नी सीखलै |

## आराधना रै बारे न निर्देश

2 ऐबै हाँऊ सैभी ना पैहिलै ऐ आदेश देआ सा कि, विमती होर प्रार्थना, निवेदन होर धन्यवाद सैभी माहू री तँईये केरिलै | 2 राजै होर सैभी बड़ै औहदै आलै रै सामनै आसै आराम होर चैना सँघे सारी भक्ति होर गम्भीरता सँघे जिन्दगी बितालै | ऐ आसरै उद्धारकर्ता परमेश्वर बै शोभला लागा सा | 3 ऐ आसरै परमेश्वर बै शोभला लागा सा | 4 सौ ऐ चाहा सा कि, सैभी माहू रा उद्धार होला होर ते सचाई बै शोभली तैरहा पछियाणलै | 5 किबैकि एकै परमेश्वर सा होर परमेश्वर होर माहू रै बिचा ना बी एकै बिचवई सा अर्थात् यीशु मसीह जो माहू सा | 6 जुणियै कि आपणै आपू बै सैभी रै छुटकारै री कीमती री तँईये धिना, ताकि ठीक बौगता ना तेईरी गवाही देइली | 7 हाँऊ सच बोला सा, झूठ नी बोलदा | हाँऊ एई उदेश्य ना प्रचारक, प्रेरित होर अन्यजाति री तँईये विश्वास होर सचाई रा उपदेशक ठहराउआ सा | 8 हाँऊ चाहा सा कि हर एक जैगा ना पुरुष बगैर झिकै होर पवित्र हौथ जेकिया प्रार्थना केरलै | 9 होर बेटडी बी शर्मा सँघे होर सँयमा सँघे सुहावनै झिकडै लाइया आपू बै सँवारली, न कि बाल गुँधणै, सुनै होर मोतियै लाइया होर कीमती झिकडै लाइया बल्कि भलै कोमै लाइया आपू बै सँवारली | 10 किबैकि परमेश्वरै री भक्ति ग्रहण केरनू आली बेटडी बै ऐ सही सा, 11 होर

बेटड़ी बें चुपचाप पूरी अधीनता ना सीखणा चाहिए । 12 होर हाँऊ बोला सा कि, बेटड़ी न उपदेश केरली होर न मर्दा पैधें आजा चलाली, पर चुपचाप रौहली, 13 किबैकि आदम पैहिलै होर तेइना बाद हव्वा बणाउई । 14 आदम बहकाउआ नी बल्कि हव्वा बहकावै ना एजिया अपराधिणी हुई । 15 तैबै बी बचै पैदा केरनै रें द्वारा उद्धार पाणा, अगर ते संयमा सेंधें विश्वास, प्रेम होर पवित्रता ना स्थिर रौहली ।

### मण्डली न मुख्य

3 ऐ गैल सच सा कि जुण अध्यक्ष होणा चाहा सा ता स भलै कोमै री इच्छा केरा सा । 2 अध्यक्ष निर्दोष एकी लाडी रा लाडा, संयमी, सुशील, सभ्य, पाहुणचारै केरनु आला होर सिखाणै ना निपुण होला । 3 पियक्कड़ या मारपीट केरनु आला नी लोडी वरनु कोमल लोडी होर न झगड़ालू होर न लोभी होला । 4 आपणै घौरा रा शोभला प्रबन्ध केरा होला होर शोहरू आलै बें सारी गम्भीरता ना अधीन रैखा सा । 5 जैबै कोई आपणै घौरा रा शोभला प्रबन्ध केरना नी ज्ञाणदा ता तेई परमेश्वरै री कलीसियै री की रखवाली केरनी । 6 सौ नोंऊआ चेला नी होला, ऐण्डा नी लोडी हुआ कि स घमण्ड केरिया शैताना साही सजा पाला । 7 होर बाहरी लोका ना तेइरा सुनाम होला ऐण्डा नी लोडी हुआ कि निन्दित होइया शैतानै रें फन्दै ना फसला ।

### मण्डली न दास

8 तैण्डाए सेवका बें बी गम्भीर होणा चाहिए । दो रेंगी, पियक्कड़ होर नीच कमाई रें लोभी नी लोडी । 9 पर विश्वासै रें भेदा बें शुद्ध विवेका ना सुरक्षित रैखलै । 10 होर ए बी पैहिलै परखिलै, तैबै अगर निर्दोष निकतै ता सेवका रा कोम केरलै । 11 एसा रीतिये बेटड़ी बें बी गम्भीर होणा चाहिए । दोष लागू आली नी लोडी पर सचेत होर विश्वासयोग्य होली । 12 सेवक एकी लाडी रें लाडै होलै होर शोहरूआलै होर आपणै घौरा रा अच्छा प्रबन्ध केरना जाणा होला । 13 किबैकि जो सेवका कोम शोभली तैरहा केरी सका सी, ते आपणी तैइयै शोभला ओह्दा होर तेई विश्वासा ना जो मसीह यीशु पैधें सा, बड़ी हिमत प्राप्त केरा सा ।

### बड़ी गुप्त गैल

14 हाँऊ त हागै झकै एणै री आशा रैखिया बी इन्हा गैला तौभै एथै री तक लिखा सा, 15 कि सगर मेरै एणै ना देर हुई ता तू जाणा कि परमेश्वरा रा घौर, जो जिन्दै परमेश्वरै री कलीसिया सा होर जो सचाई रा थोबा होर नीव सा, तेथा ना केण्डा वर्ताव केरना चाहिए । 16 होर एथा ना कोई शक नी कि भक्ति रा भेद गम्भीर सा अर्थात् स जो शरीरा ना प्रगट हुआ, आत्मा ना धर्मा ठहरू, स्वर्गदूता ना हेरूआ, अन्यजाति ना तेइरा प्रचार हुआ, संसारा ना तेइ पैधें विश्वास केरुआ होर महिमा ना उझै चकुआ ।

### झूठी शिखा देणु आळै

4 पर आत्मा स्पष्ट रूपा ना बोला सा कि, एणू आलै बौगता ना केतरै लोका भरमाणू आली आत्मा होर दुष्ट आत्मै री शिक्षा ना मन लाइया विश्वासा ना बहकणा । 2 ऐ तिन्हा झूठै माळू रें कपटै री वजहा ना होणा, जुणि री बुद्धि भौकदै लोहै लाइया दागुई दी सा । 3 जे ब्याह केरनै ना रोकलै होर खाणै री चीजा ना दूर रौहणै री आज्ञा देलै, जो परमेश्वरै एथै री तक बणाए कि विश्वासी होर सचाई बें पछियाणनु आलै तिन्हा बें धनयवादा सेंधें खालै, 4 किबैकि परमेश्वरै बणाई दी सारी चीजा शोभली सी होर कोई बी चीज अस्वीकार केरनै लायक नी आँथी पर ऐ कि धनयवादा सेंधें खाइली । 5 किबैकि ए परमेश्वरै रें वचन होर प्रार्थना सेंधें शुद्ध होआ सी ।

### मसीह यीशु रा शोभला दास

6 अगर तू सैभी भाई बें इन्हा गैलै री याद दिलाँदा रौहला ता मसीह यीशु रें सेवक ठहरना होर विश्वास होर तेई शोभलै उपदेशै री गैला ना, जे तू मैनदा

आऊ सा तेरा पालण पोषण होंदा रौहणा । 7 पर अशुद्ध होर बूढ़ी कहाणी ना अलग रौह होर भक्ति री तैइयै आपणा साधन केर । 8 किबैकि देही री साधना ना कम फायदा होआ सा पर भक्ति सैभी गैलै री तैइयै फायदैमँद सा किबैकि ई बौगतै रें होर एणू आली जिन्दी री प्रतिज्ञा बी एथै री तैइयै सा, 9 होर ऐ गैल सच सा होर हर तरफा ना मैनणै लायक सा । 10 किबैकि आसै मेहनत होर कोशिश एथै री तैइयै केरा सी कि, आसरी आशा तेई जिन्दै परमेश्वरा पैधें सा, जो सैभी माळू रा होर खास केरिया विश्वासी रा उद्धार केरनु आला सा । 11 इन्हा गैलै रा आदेश केर होर सिखाँदा रौह । 12 कोई तेरी जवानी बें तुच्छ नी समझला, पर वचन, चाल-चलन, प्रेम, विश्वास होर पवित्रता ना विश्वासी री तैइयै आदर्श बेण । 13 जैबै तक हाँऊ नी एणू तैबै तक वचन पौढ़नै, उपदेश होर सिखाणै ना लागी रौह । 14 तेई वरदाना ना जो तो ना सा होर भविष्यवाणी रें द्वारा प्रचीनै रें हौथ रैखणै रें बौगतै तौभै मिलू ती, शान्त मत रौहदा । 15 तिन्हा गैला बें सोचदा रौह, ताकि तेरी उन्नति सैभी पैधें प्रगट होली । आपणी होर आपणै उपदेशै री चौकसी रख । 16 इन्हा गैला पैधें स्थिर रौह किबैकि अगर ऐण्डा केरदा रौहला ता त आपणै होर आपणै शुणनु आलै री तैइयै उद्दारा रा कारण होणा ।

### बिश्वासी री तैइयै मण्डली री जिम्मेबारी

5 कौसी बुजुर्गा बें मत डाँटदा पर तेइबै बापू जाणिया समझा होर जवाना बें भाई जाणिया, बूढ़ी बेटड़ी बें आमा जाणिया, 2 होर जवान बेटड़ी बें पूरी पवित्रता सेंधें बेहण जाणिया समझा । 3 जो विधवा सी तिन्हरा आदर केर, 4 होर अगर कौसी विधवै रें शोहरू आलै होर नातीपोतै होलै ता ते पैहिलै आपणै घरानै सेंधें भक्ति रा वर्ताव केरना होर आपणै आमा-बापू बें तिन्हरा हक देणा सीखलै किबैकि ऐ परमेश्वरा बें शोभला लागा सा । 5 जो सैचियै विधवा सा होर तेसरा कोई नी आँथी सौ परमेश्वरा पैधें आशा रैखा सा होर रात ध्याड विनती होर प्रार्थना ना लागी रौहा सा । 6 पर जो भोगविलासा पौडी सौ जिन्दै जीउए मुँई सा । 7 इन्हा गैलै रा भी आदेश देआ केर ताकि तै निर्दोष रौहली । 8 पर, अगर कोई आपणी होर खास केरिया आपणै घरानै री चिन्ता नी केरदा ता स विश्वासा ना मुकरुआ सा होर अविश्वासी ना बी बुरा बेंणु सा । 9 तेसा विधवा रा नाँ लिखिला जो शौठ बौर्षा ना कम नी होली होर एकी लाडै री लाडी रौहीदी होली, 10 होर भलै कोमा ना सुनाम रौहीदी होली, जुणियै बचै रा पालण पोषण केरुदा होला, पाहुणै री सेवा केरीदी होली, पवित्र लोकै री जोंघा धोई दी होली, दुःखी री मजत केरी दी होली होर भलै कोमा ना मन लाऊ दा होला । 11 पर जुआन विधवै रें नाँ हेरी लिखदा किबैकि जैबै ते मसीह रा विरोध केरिया सूखविलासा ना पौडा सी ता ब्याह केरना चाहा सी, 12 होर दोषी ठहरा सी किबैकि तिन्हा आपणा पैहिला विश्वास छौडू सा । 13 होर एथा सेंधें घौरा धिरै फिरिया आलसी होणा सीखा सी । केवल आलसी नी, बकबक केरदी रौहा सी होर दुजै रें कोमा ना हौथ बी पा सी होर अनुचित गैला बी बोला सी । 14 हाँऊ चाहा सा कि जुआन विधवा ब्याह केरली होर बचै पैदा केरली होर घौर सँभालली होर कौसी विरोधी बें बदनाम केरनै रा मौका नी देली । 15 किबैकि कई एका बहकिया शैतानै रें पिछै हुई सी । 16 अगर कौसी विश्वासिनी रें ओखै विधवा होली ता सौहै तिन्हरी सेवा केरली कि कलीसिया पैधें बोझ नी होला ताकि सौ तिन्हरी मजत केरी सकली जे सैचियै विधवा सी । 17 जुणा प्राचीन अच्छा प्रबन्ध केरा सी, खास केरिया ते जो वचन शुणाणै होर सिखाणै ना मेहनत केरा सी, तिन्हा बें दुगणै आदरै रें लायक समझा । 18 किबैकि पवित्र शास्त्र बोला सा कि हौणू आलै बौल्दा रा मुँह कदी नी बोनाणा किबैकि मजदूर आपणी मजदूरी रा हकदार सा । 19 कोई दोष प्राचीना पैधें लाइला ता बगैर दूई या त्रा गवाही रें मत शुणदा । 20 पाप केरनु आलै बें सैभी सामने समझा ताकि होरा लोका बी जौरलै । 21 परमेश्वर होर मसीह यीशु होर चुनै दै स्वर्गदूता बें मौजूद जाणिया हाँऊ तौभै चेतावनी देआ सा कि तू मन खोलिया इन्हा गैला बें मानै केर होर कोई कोमा ना पक्षपात मत केरदा । 22 छेकै कोसी पेन्धे हौथ नी रैखणा होर दुजै रें पापा ना भागी नी होणा । आपणै आपू बें पवित्र बणाइया रख । 23 भविष्य न केवल पाणी पिणु आळै मता रौहदें, पर आपणै पेटा होर आपणै बार-बार बमार होणै री तैइयै थोडा-थोडा दाखरस भी इस्तेमाल केर ।

24 केतरै माहणु रै पाप सामणै एजा सी, होर न्याय री तैईये पैहलै पूजा सी .होर केतरै पीछे न एजा सी | 25 तैँढाये केतरै शोभले कौम भी प्रगट होआ सी, होर जुण एंढे नेई होंदे, ते भी गोजुई नेई सकदे

6 जेतरै दास जूँआ हेठै सी ते आपणै-आपणै स्वामी बै बड़ै आदरै रै लायक जाणलै ताकि परमेश्वरै रै नाँ री होर उपदेशै री निन्दा नी होली, 2 होर जुणि रै स्वामी विश्वासी सी इन्हा ते भाई होणै री वजहा ना तुच्छ नी जाणलै, वरन तिन्हरी होर बी सेवा केरलै किबैकि एथा ना फायदा चेकणु आलै विश्वासी होर प्रेमी सी । इन्हा गैला रा उपदेश देंदा रौह होर समझादा रौह ।

### झूठी शिक्षा होर धना रा लालच

3 अगर कोई होर उपदेश देआ सा होर खैरी गैला बै अर्थात् आसरै प्रभु यीशु मसीह री गैला बै होर तेई उपदेशा बै नी मैनदा जो भक्ति रै मुताबिक सा, 4 ता सौ घमण्डी हुआ सा होर किछ नी जाणदा । तेइबै वहस केरनै होर शब्दा पैँधै वहस केरनै री बिमारी सा, जुणियै लाइया, दुःख होर झगड़ै होर निन्दै री गैला होर बुरै-बुरै शक होआ सी । 5 तिन्हा माहू ना बेकार झगड़ै पैदा होआ सी । जुणि री बुद्धि री बिगड़ी सा होर सचाई ना फिरै सी जो ऐ समझा सी कि भक्ति कमाई रा दुआर सा । 6 पर भक्ति ना सन्तुष्ट होणा बड़ी कमाई सा । 7 किबैकि आसै न ता सँसारा ना किछ आणू सा होर न किछ नेई सकदै । 8 अगर आसै हागै खाणै होर लाणै बै सा ता इन्हा ना सन्तुष्ट होणा चाहिए । 9 पर जुणा धनी होणा चाहा सी, ते ऐण्ठी परीक्षा होर फन्दै होर बोहू सारै बेकार होर नुकसान देणू आली इच्छा ना फसा सी जो माहू बै बगाड़ा सी होर विनाशै रै समुद्रा ना डुबा सी । 10 किबैकि ढैबुए रा लोभ सैभी किस्मै री बुराई

री जढ सा, जुणिबै प्राप्त केरनै री कोशिश केरदै केतरै लोकै विश्वासा ना भटकिया कई किस्मै रै दुःखा ना डूबै ।

### तिमथियुसा बै व्यक्तिगत आदेश

11 पर हे परमेश्वरै रै जन, तू इन्हा गैला ना भैग होर धर्म, भक्ति, विश्वास, प्रेम, धीरज होर नम्रता रा पिछा केर । 12 विश्वासै री शोभली कुशती लैड होर तेई अनन्त जीवना बै धारण केर जुणि री तैँइयै तू शाधुआ होर बोहू गवाही रै सामनै ठीक रितियै अँगीकार केरु ती । 13 हाँऊ तौभै परमेश्वर जो सैभी बै जिन्दा रैखा सा होर मसीह यीशु बै गवाह केरिया जुणियै पुन्तियुस पिलातुसा सामनै अँगीकार केरु, ऐ आज्ञा देआ सा, 14 कि तू आसरै प्रभु यीशु मसीह रै प्रगट होणै तक एसा आज्ञा बै निष्कलँक होर निर्दोष रैख । 15 जे तेई ठीक बौगता ना रिहाणी, जो परमधन्य, एक अधिपति होर राजै रा राजा सा होर प्रभु रा प्रभु सा । 16 होर अमरता सिर्फ तेइरी सा होर अगम्य ज्योति ना रौहा सा होर न स कौसी माहूए हेरु होर न कदी हेरी सकदै: तेइरी प्रतिष्ठा होर राज्य जुगा-जुगा तक रौहणा ।आमीन । 17 एई सँसारै रै धनवाना बै आज्ञा दै कि ते घमण्डी नी होलै होर चँचल धना पैँधै आशा नी रैखलै, पर परमेश्वरा पैँधै आशा रैखलै, जो आसरै सुखै री तैँइयै सैभ किछ बहुतायता ना देआ सा । 18 होर भलाई केरलै होर भले कोमा ना धनी बैणलै होर उधार होर मजती देणै बै तयार रौहलै, 19 होर आगै री तैँइयै एक शोभली नीव रैखलै कि सैची जिन्दगी बै वशा ना केरलै । 20 हे तिमथियुस, एसा धरोहरै री रखवाली केर होर जुणि ज्ञाना बै ज्ञान बोलणा भूल सा, तेथै रै अशुद्ध बकवासा ना होर विरोधै री गैला ना दूर रौह । 21 केतरै ता एई ज्ञाना बै अँगीकार केरिया विश्वासा ना भटकै सी । तुसा पैँधै अनुग्रह होदा रौहला ।

## 2 तीमुथियुस

### परिचय

तिमुथियुस रै नाँ न पौलुस प्रेरित री दूजी चिट्ठी, पौलुस रै एक जुआन संघी होर सहायका रै रूपा न कौम केरणु आळै तीमुथियुसा बै पौलुस री व्यक्तिगत सलाह सा। एथा रा खास विषय सा धीरज। तीमुथियुसा बै ये सलाह धिनी सा कि सताव होर विरोध होदेआ भी सौ विश्वास योग्यता सेंघे यीशु मसीह री गवाई देदा रौहे, होर एक शिक्षक होर प्रचारका रै रूपा न आपणै कर्तब्य रा पालन केरदे रौहे।

तिमुथियुसा बै खास रूपा न "मुखता होर बिना मतलबा रै झगड़े" न उलझने सेंघे पैदा खतरे रै बारे न चेताऊनी धिनी सा। एथा सेंघे किच्छ फायदा नेई होन्दा पर ऐ शुणणै आळै री तैइये नाशा रा कारण होआ सा।

इन्हा सेभी न, तिमिथियुसा बै लेखके आपणी जिन्दगी होर उदेश्य -तिन्हरे विश्वास, सहनशीलता, प्यार धीरज होर सताव रै बौगत दुःखा रै उदाहरणा बै याद दिला सी।

रूप-रेखा

भूमिका 1:1,2

प्रशंसा होर उपदेश 1:3-2:13

सलाह होर चेताऊनी 2:14- 4:5

पौलुस री आपणी हालत 4:6-18

उपसंहार 4:19 -22

### अभिवादन

1 पौलुस री तरफा ना जो जिन्दगी री प्रतिज्ञै रै मुताबिक मसीह यीशु ना सा, परमेश्वर री इच्छा ना मसीह यीशु रा प्रेरित सा, 2 प्रिय बेटै तिमिथियुस रै नाँ, परमेश्वर बापू होर आसरे प्रभु यीशु मसीह री धिरे ना तौभै अनुग्रह, दया होर शान्ति मिलदी रौहली।

### धन्यवाद देणा होर उत्साहित केरना

3 जुणि परमेश्वर री सेवा हाँऊ दादू- बा री रीति पैंधे खैरी बुद्धि सेंघे केरा सा, तेइरा धन्यवाद हो कि आपणी प्रार्थना न तौभै लगातार याद केरा सा, 4 होर तैरै औछू री सुधि केरिया रात ध्याड हाँऊ तौभै मिलणै री लालसा रैखा सा कि खुशियै भौरिनु। 5 मुँभै तैरै निष्कपट विश्वास री याद एजा सा, जो पैहिलै तेरी नानी लोइसा होर तेरी आमा यूनीका ना ती होर मुँभै बशाह हुआ कि त ना बी सा। 6 एसा वजहा ना हाँऊ तौभै याद दिला सा कि तू परमेश्वर रै तेई वरदाना बै, जो मेरै हौथ रैखणै रै द्वारा तौभै मिलू सा चमका, 7 किबैकि परमेश्वर आसा बै डौरे नी बल्कि, सामर्थ, प्रेम होर सहनशीलतै री आत्मा धिनी सा। 8 आसरे प्रभु री गवाही ना होर मुँ ना जो तेइरा कैदी सा, शर्मिन्दा मत् पर परमेश्वर री तेसा सामर्थ रै मुताबिक सुसमाचारै री तैइये मुँ सेंघे दुःख चैक। 9 जुणियै आसरा उद्धार केरु होर पवित्र बुलाहटा सेंघे शाधै होर ऐ आसरे कोमै रै मुताबिक नी, पर आपणी मनसा होर तेई अनुग्रह रै मुताबिक जे मसीह यीशु ना हमेशा आसा पैंधे हुआ सा। 10 पर ऐबै आसरे उद्धारकर्ता मसीह यीशु रै प्रगट होणै रै द्वारा प्रकाशित हुआ, जुणियै मोऊती रा नाश केरु होर जिन्दगी होर अमरता तेई सुसमाचारै रै द्वारा प्रकाशमान केरी। 11 जुणि री तैइयै हाँऊ प्रचारक, प्रेरित होर उपदेशक बी ठहरु। 12 एसा वजहा ना हाँऊ इन्हा दुःखा बै बी चैका सा पर शर्मिन्दा नी किबैकि जुणि री हाँऊ प्रतीति केरा सा, जाणा सा, होर मुँभै बशाह सा कि स मेरी धरोहरै री तेई ध्याडै तक रखवाली केरी सका सा। 13 जे खरी गैला तँ मुँ ना शुणी, तिन्हा बै तेई विश्वास होर प्रेमा सेंघे जो मसीह यीशु ना सा आपणा

आदर्श बणाइया रैख, 14 होर पवित्र आत्मै रै द्वारा जो आसा ना बौसू सा, एसा शोभली धरोहरै री रखवाली केर। 15 तू जाणा सा कि आसिया ना रोहणू आलै सैभै मुँ ना फिरै सी, जुणि ना फूगिलुस होर हिरमुगिनेस सी।

16 उनेसिफुरुस रै घरानै पैंधे प्रभु दया केरला किबैकि तेइयै बोहू बार मेरा ज़ीऊ ठँडा केरु होर मेरी ज़ज़ीरा ना शर्मिन्दा नी हुआ। 17 पर जैबै स रोम देशा बै आऊ ता बड़ी कोशिश सेंघे तोपिया मुँ सेंघै भेंट केरी। 18 प्रभु केरला कि तेई ध्याडै ना तेई पैंधे प्रभु री दया होली होर जे-जे सेवा तेइयै इफिसुसा ना केरी सी, तिन्हा बै बी तू भलि-भाँति जाणा सा।

### यीशु मसीह री आज्ञाकारी सैना

2 होर जे गैला तँ बोहू गवाही सामनै मुँ ना शुणी सी, तिन्हा विश्वासी भाई बै सौप जुणा कि होरी बै बी सिखाणै रै लायक सी। 2 मसीह यीशु रै शोभलै योद्धा साही मुँ सेंघे दुःख चैक। 3 जैबै कोई योद्धा लड़ाई बै जा सा कि स आपणै भर्ती केरनु आलै बै खुश केरला, आपणै आपू बै संसारै रै कोमा ना नी फसाँदा। 4 अखाडै ना अगर कोई विधि रै मुताबिक नी लड़दा ता तेइबै मुकट नी मिलदा। 5 अखाडै ना अगर कोई विधि रै मुताबिक नी लड़दा ता तेइबै मुकट नी मिलदा। 6 जो गृहस्थ मेहनत केरा सा, फ़ौला रा अँश पैहिलै तेइबै मिलणा चाहिए। 7 जे हाँऊ बोला सा तेथा पैंधे ध्यान दै होर प्रभु तौभै सैभी गैलै री समझ देणी। 8 यीशु मसीह बै याद रैख, जो दाऊद रै वंशा ना हुआ होर मुँएदै ना जिन्दा हुआ होर ऐ मेरै सुसमाचारै रै मुताबिक सा। 9 जुणि री तैइयै हाँऊ कुकर्मा साही दुःख चैका सा, औखै तक कि कैद बी सा, पर परमेश्वर रा वचन कैद नी आँथी। 10 एसा वजहा ना हाँऊ चुनुएदैं लोकै री तैइयै सैभकिछ सौहा सा कि ते बी तेई उद्धारा बै जो मसीह यीशु ना सा, अनन्त महिमा सेंघे पालै। 11 ऐ गैल सच सा कि अगर आसै तेई सेंघे मुँए सी ता तेई सेंगै जिन्दै बी होणा। 12 अगर आसै धीरजा सेंघे सौहदैं रौहलै ता तेई सेंघे राज़ बी केरना, अगर आसै तेइरा नाँह केरलै ता तेई बी आसरा नाँह केरना। 13 अगर आसै अविश्वासी बी होलै ता स विश्वासयोग्य बैणी रोहा सा किबैकि सौ आपू आपणा नाँह नी केरी सकदा।

### शोभला कौम केरणु आळा माहणु

14 इन्हा गैलै री तिन्हा बै याद दिला होर प्रभु सामनै चिता कि शब्दा पेंधे तर्क-वितर्क नी केरलै, जुणियै किछ फायदा नी होदा वरन् शुणनू आलै बिगड़ा सी । 15 आपणै आपू बै परमेश्वरा रा ग्रहणयोग्य होर ऐण्डा कोम केरनू आला ठहराणै री कोशिश केर, जे शर्मिदा नी होला होर जे सचाई रै वचना बै ठीक रीतियै कोमा ना आणना जाणा होला । 16 पर अशुद्ध बकवासा ना बचिया रौह, किबैकि ऐण्डै लोका होर बी अभक्ति ना बढदै जाणा 17 होर तिन्हरा वचन चौकै दै घावा साही फैलदै जाणा, हुमिनयुस होर फिलेतुस तिन्हा ना सी । 18 जो ऐण्डा बोलिया कि पुनरुत्थान हुआ सा सचाई ना भटकै सी होर केतरै रै विश्वास बै उल्ट-पुल्ट केरा सी । 19 तैबै बी परमेश्वरै री पैकी नीव बैणी रौहा सा होर तेसा पेंधे ऐ छाप लागी सा कि प्रभु आपणै बै पछ्याणा सा होर जे कोई प्रभु रा नाँ लेआ सा, स अधर्मा ना बचिया रौहा सा । 20 बडै घौरा ना सुनै चाँदी रै केल्ली नी बल्कि काठ होर माटै रै बी भाँडै होआ सी । कोई-कोई आदरै रै होर कोई-कोई अनादरै री तैइयै । 21 अगर कोई आपणै आपू बै इन्है लाइया शुद्ध केरला ता तेई आदरै रै भाँडै होर पवित्र ठहरना होर स्वामी रै कोमा ऐणा होर हर भलै कोमै री तैइयै त्यार रौहणा । 22 जुआनी री इच्छा ना भैग होर जुणा शुद्ध मैने प्रभु रा नाँ लेआ सी, तिन्हा सेंधे धर्म, विश्वास, प्रेम होर मेल-मिलापा रा पिछा केर, 23 पर मूर्खता होर अज्ञानै री वहसा ना अलग रौह किबैकि तू जाणा सा कि तेथा ना झगडै होआ सी । 24 होर प्रभु रै दासा बै झगडालू नी होण चाहिए पर सैभि सेंधे कोमल, शिक्षा ना निपुण होर सहनशील होणा चाहिए । 25 होर विरोधी बै नम्रता सेंधे समझाला, शायद परमेश्वर तिन्हा बै मन फेरनै रा मौका देला कि ते बी सचाई बै पछियाणलै, 26 होर एथै रै द्वारा तेइरी इच्छा पूरी केरनै री तैइयै सचेत होइया शैतानै रै फन्दै ना छुटलै ।

### आखरी ध्याडे न पाप

3 पर ऐ जाणिया रैख कि आखिरी रोजा ना मुश्किल बौगत एणै । 2 किबैकि माळू स्वार्थी, लोभी, डींगमार, घमण्डी, निन्दक, आमा बापू री आज्ञा टालणू आलै, अपवित्र, 3 दयारहित, क्षमारहित, दोष लागू आलै, असँयमी, कठोर, भलै रै बेइरी, 4 विश्वासघाती, ढीठ होर परमेश्वरै रै नी बल्कि सुखविलासा बै चाहणू आलै होणै । 5 तिन्हा भक्ति रा भेष धारण ता केरना पर तुई री शक्ति नी मैनणी, ऐण्डे माळू ना दूर रौह । 6 इन्हा ना ते लोका सी जे घौरा ना दबै पाँव घुसा सी होर छिछोरी बेटडी बै वशा ना केरा सी जे पापा ना डूबी सी होर हर किस्मै री इच्छै रै वशा ना सी, 7 होर हमेशा सिखदी रौहा सी पर सचाई री पछिआण तक कदी नी पुजदी । 8 होर जैण्डा यन्त्रेस होर यन्त्रेसै मूसा रा वरोध केरू ती, तैण्डाए ए बी सचाई रा विरोध केरा सी । ए ता ऐण्डे माळू सी जुणि री बुद्धि भ्रष्ट हुई सा होर ते विश्वासै रै बारै ना नकमै सी । 9 पर ते ऊई ना आगै नी बेडी सकदै किबैकि जैण्डी तिन्हरी अज्ञानता सैभी माळू पेंधे प्रगट हुई ती तैण्डी इन्हरी बी होणी ।

### तिमथियुसा बै खास आदेश

10 पर तै उपदेश, चाल-चलन, विश्वास, सहनशीलता, प्रेम, धीरज होर सताइणै ना होर दुःख चेरणै ना मेरा सँघ धिना, 11 होर ऐण्डे दुःखा ना बी जो अन्ताकिया होर इकुनियुम होर लुस्रा ना मूँ पेंधे पौडै ती होर दुःखा ना बी जो मँ चेरै सी, पर प्रभुए हाँऊ तिन्हा सैभी ना छुड़ाऊ । 12 पर जेतरै मसी यीशु

ना भक्ति सेंधे जिन्दगी बितालै तिन्हा सैभी सताइणा, 13 होर दुष्ट होर बहकाणू आलै होर धौकै देणू आलै बिगड़दै जाणा । 14 पर तू इन्हा गैला पेंधे जो तै सीखी सी, ऐण्डा जाणिया दूढ रौह कि, तै ते कुणि लोका ना सीखी ती, 15 होर बालकपना ना लेइया पवित्र शास्त्र तेरा जाणुआ सा, जे तौभै मसीह पेंधे विश्वास केरिया उद्धार प्राप्त केरनै री तैइयै बुद्धिमान बनाई सका सा । 16 पूरा पवित्र शास्त्र परमेश्वरै री प्रेरणा सेंधे बणाउआ सा होर उपदेश, समझाणै होर सुधारणै होर धर्म री शिक्षे री तैइयै फायदमँद सा, 17 ताकि परमेश्वरा रा जन सिद्ध बणला होर हर एक भलै कोमै री तैइयै त्यार होला ।

4 परमेश्वर होर मसीह यीशु बै गवाह केरिया, जुणि जिन्दै होर मूँपेदे रा न्याय केरना, तेई होर तेइरै प्रगट होणै होर राज्य री याद दिलाइया हाँऊ तौभै आदेश देआ सा, 2 कि तू वचना बै प्रचार केर होर हर बौगतै त्यार रौह । सैभी किस्मै री सहनशीलता होर शिक्षा सेंधे डाँट होर समझा, 3 किबैकि ऐण्डा बौगत एणा कि लोके रै खरा उपदेश नी सौहिणा पर कोनै री खुजली री वजहा ना आपणी इच्छै रै मुताबिक आपणी तैइयै बोहू उपदेशक कटा केरनै, 4 होर आपणै कोन सचाई ना फेरिया कथा-कहाणी धिरा बै लागै । 5 पर तू सैभी गैला ना होशियार रौह, दुःख चेर, सुसमाचारै रै प्रचारा रा कोम केर होर आपणी सेवा बै पूरी केर, 6 किबैकि हाँऊ अर्घा साही पेरिया सा होर मेरै कूच केरनै रा बौगत आऊ सा । 7 मँ शोभली कुशती लडी सा, मँ आपणी दौड पूरी केरी सा, मँ विश्वासै री रखवाली केरी सा । 8 भविष्य ना मेरी तैइयै धर्मा रा सौ मुकट रैखू सा, जो प्रभुए, जो धर्मी होर न्यायी सा मुँभै तेई ध्याडै ना देणा होर मुँभै केल्ली नी बल्कि तिन्हा सैभी बै बी जो तेइरै प्रगट होणै बै प्रिय जाणा सी ।

### व्यक्तिगत संदेश

9 मूँ हागै छेकै एणै री कोशिश केर । 10 किबैकि देमासै सँसारा बै प्रिय जाणिया हाँऊ छौडू सा होर थिस्सलुनीकै बै नौठा सा होर क्रेंसकेंस गलातिया बै होर तीतुस दलमतिया बै नौठा सा । 11 केवल लूका मूँ सेंधे सा, मरकुसा बै सेंधे आण किबैकि सेवा केरनै री तैइयै सौ मेरै कोमा रा सा । 12 तुखिकुस मँ इफिसुसा बै भेजू सा । 13 जे बागा मँ त्रोआसा ना करपुसै औखै छौडू सा, जेबै तू एला ता तेइबै होर कताबा बै खास केरिया चर्मपत्रा बै पका आणी । 14 सिकन्दर ठठेरै मूँ सेंधे बोहू बुराई केरी सी । प्रभु तेइरै कोमै रै मुताबिक तेइबै बदला देणा । 15 तू बी तेइना होशियार रौह किबैकि तेइए आसरी गैला रा बडा विरोध केरू । 16 मेरी पैहिली जवाब देही रै बौगतै कोसियै मेरा सँघ नी धिना, बल्कि हाँऊ सैभिये छोडी धिना, भला होदा कि तिन्हा बै एथा रा लेखा देणा पौडला । 17 पर प्रभु मेरा सहायक रौहू होर सामर्थ धिनी ताकि मेरै द्वारा पूरा-पूरा प्रचार होला होर सैभै जाति शुणली कि हाँऊ ता शेरै रै मुँहा ना छुड़ाउआ सा । 18 होर प्रभु हाँऊ हर एकी बुरे कोमा ना छुड़ाणा होर आपणै स्वर्ग राज्य ना उद्धार केरिया पजाणा । तेही री महिमा युग-युग होंदी रौहली । आमीन ।

### आखरी अभिवादन

19 प्रिसका होर अक्विला बै होर उनेसिफुरुसै रै घराने बै नमस्कार । 20 इरास्तुस कुरिन्थुसा ना रौहू होर त्रुफिमस मँ मीलेतुसा ना बीमार छौडू सा । 21 सर्दी ना पैहिलै एणै री कोशिश केर । यूबलुस होर पूदेंस, लीनुस होर क्लौदिया होर सैभी भाई रा तौभै नमस्कार । 22 प्रभु तेरी आत्मा सेंधे रौहला । तुसा पेंधे अनुग्रह होंदा रौहला ।

# तीतुस

तीतुसा रै नाँ न पौलुस प्रेरिता री पैहली चिठी

## भूमिका

तीतुस एक गैर मसीह ती, जो पौलुसा संघे प्रचारा रै कौमा न तेईरा संघी होर सहायक बेणु ती। तीतुसा रै नाँ न पौलुस प्रेरिता री चिठी क्रेते न रौहिया पौलु सा रै जुआन संघी बै लिखी सा, जुणी बै तौखे मण्डली री देख रेखा री तेईये छौडु ती। ऐ चिठी त्राई जरूरी चीजा बै दर्शा सा। पैहली, तीतुसा बै ऐ याद दिलाई सा कि मण्डली रै अगुवे रा चरित्र कैदा होणा चिहिए, खासकर बौहु सारे क्रेता लोका रै बुरे चरित्रा बै हरिया बोलू सा। दूजी तीतुसा बै ऐ सलाह धिनी सा कि कलिसिया न झुन्डा बै कैंडी शिक्षा देणी, मतलब खापरै माहणु, खपरी बेटडी, जुआन मर्द होर नोकर। त्रीजी, लेखक तीतुसा बै मसीही रै व्यवहारा रै बारे न सलाह देआ सा, खासकर शांति होर मिलिया रौहणै री तेईये; होर नफरत लड़ाई झगड़ा होर मण्डली न गलत शिक्षा न बचणै री तेईये बोलू सा।

रूप-रेखा

भूमिका 1:1-4

मण्डली रै अगुवे 1:5-16

मण्डली न कई झुन्डा रै कर्तब्य 2:1-15

उपदेश होर चेताऊनी 3:1-11

उपसंहार 3:12 -15

## अभिवादन

1 पौलुसा री तरफा न जो परमेश्वरा रा दास सा होर यीशु मसीह रा चेला सा, परमेश्वरा रै चुनेदैं लोका रा बशाह, होर तेसा सच्चाई होर भक्ति रै मुताबिक सा। 2 तेसा अनंत जिन्दगी री आशा पेन्धे, जूणी री प्रतिज्ञा परमेश्वरे जो झूठ नेई बोली सकदा हमेशा न केरी सा। 3 पर ठीक बौक्ता पेंधे आपणै वचना रै मुताबिक परचारा रै द्वारा प्रगट केरु, जो आसरे उद्धारकर्ता परमेश्वरा रै हुकमा रै मुताबिक मुम्बे धिनु सा। 4 तीतुसा रै नाँ जो बशाह री सहभागिता रै मुताबिक बचारा न मेरा सचा बेटा सा, परमेश्वर पिता होर आसरे उधारकर्ता मसीह यीशु री तरफा न तौभे ली नुग्रह होर शांति मिलदी रौहे।

## क्रेते न तीतुस रा कौम

5 में तैबे तू क्रेता न छौडू की तू बची हुन्दी गल्ला रा सुधार केरे, होर मेरे हुक्मा रै मुताबिक शहरा - शहरा जाईया चेले बै नियुक्त केरला। 6 जो निर्दोष होर एकी लाडी रै लाडा होले, जुणी रै शौहरू आळै बिश्वासी होले, होर जुणी न गलत कौमा रा दोष नेई होला। 7 किबेकी मुखया बै परमेश्वरे रा भण्डारी होणे री तेईए निर्दोष हुआ लोडी; ना हठी, ना झिक केरनुआला, ना पिणु आला, ना मारनु आला, होर ना बुरे कौमा रा लोभी। 8 पर पाहुणचारी केरनु आला, खरे रा चाहणु आला, सैहन केरनुआला, न्याय केरनुआला, पवित्र होर आपणे आपु बे बशा न केरनुआला। 9 होर विश्वासयोग्य वचना पेन्दे जो धर्मा उपदेशा रै मुताबिक सा, मजबुत रौहा; कि खरी शिक्षा सैघे उपदेश देले; होर बैहस केरनु आले रा मुह भी बन्द केरी सकले। 10 किबेकि बोहु लोका बिना मतलबे रै बैहस केरनुआले होर धौखा देणु आले सी; खास केरिया खतना केरनुआले रै मौझे न। 11 इन्ना रा मुह बन्द केरु लोडी: ऐ लोका बुरी कमाई री तेईए गलत गल्ला सिखाईया घोरै रै घोर बिगाडे सी। 12 तिन्ना मौझे न एक माहणु जौ तिन्ना रा भविष्यवणी केरनुआला सा; बोला सा, कि क्रेती लोका

हमेशा झुठे, दुष्ट गौरु होर आलसी पेटु होआ सी। 13 ए गवाही सेचि सा, तेबे तिन्ना बे सखती सैघे चताऊणी देया केर, कि ते विश्वासा न पके होले। 14 होर ते यहुदिया री कथा काणी न होर तिन्ना रै हुक्मा पेन्दे मना ला सी, जे सच्चाई न भटकी जा सी। 15 शुद्ध महाणु री तेईए सब चिजा शुद्ध सी, पर अशुद्ध होर अविश्वसी री तेईए किछ भी शुद्ध नेई आधि: पर तिन्ना री बुद्धि होर विचार दुए अशुद्ध सी। 16 ते बोला सी, कि आसे परमेश्वरा बे जाणा सी: पर आपणे कौमा न तेई रा इन्कार केरा सी, किबेकी ते गन्दे होर हुक्म नी मनणु आले सी: होर कोई शौणले कौमा रै लायक नी आथी।

## चाल चलन री तेईये खरी शिक्षा

2 पर तु ऐणडी गल्ला बोले केर, जे खरी शिक्षा रै लायक सी। 2 मतलब खापरै मर्द, हौशियार होर गम्भीर हौर संयमी होले, होर तिन्ना न विश्वास होर प्रेमा न होर धिरजा न पके होले। 3 ऐण्डे तराह खापरी बेटडी रा चाल चलन भी पवित्र लोका साही होला, दोष लागु आली नेई; पर शौभली गल्ला सिखाणु आली होली। 4 ताकि ते जुआन बेटडी बै चताऊणी देन्दी रौहली, कि आपणे लाडे होर बाल बच्चे सैघे झुरी रखली। 5 होर संयमी, पतिव्रता, घौरा रा कौम काज केरनु आली, खरी होर आपणे आपणे लाडे रै आधीन रौहणु आली, कि परमेश्वरे रै वचना री निन्दा नेई लोडी हुई। 6 ऐण्डी तरहा तू जुआन मर्धा बै बी समझा कि ते संयमी होलै। 7 सेभी गल्ला न आपणे आपु बै खरे कौमे रा नमुना बणा: तेरी शिक्षा शौभली हौर गम्भीर 8 होर ऐण्डा खरा हुआ लोडी, कि कोई बुरा नेई बोली सकला; जुणी सैघे कोई विरोधी आसा पेन्दे दोष लागे रा मौका नी पाईया शर्मिन्दा होला। 9 नौकरा बे समझा की सौ आपणे-आपणे मालिका रै आधीन रौहित, हौर सेभी गल्ला न तिन्ना बे खुश रखले, होर उलटा जवाप नी देले। 10 चोरी चलाकी मौता केरे; पर सेभी गल्ला न पुरे विश्वासी निकले, कि ते सेभी गल्ला न आसारे उद्धारकर्ता परमेश्वरे री शिक्षा बे शौभा देला। 11 किबेकि परमेश्वरे रा अनुग्रह प्रगट सा, जे सेभी माहणु री मुक्ति री बजा सा। 12 हौर आसा बे याद दिला सा, कि आसे

अभक्ति होर संसारे री अभिलाषा न मन फेरिया ऐई युगा न संयमी होर धर्मा सेघे भक्ति री जिनदगी बिताले । <sup>13</sup> होर तेस्सा धन्य अशा री अर्थात आपणे महान परमेश्वरे होर उद्धारकर्ता यीशु मसिहा री महीमा रै प्रगट होणे रा इन्तजार केरदे रोहा सी । <sup>14</sup> जुणिए कि आसारी तेईए आपणा बलिदन केरु, कि आसाबे सेभी प्रकारे रै अधर्मा ना छुडाल, होर शुद्ध केरिया आपणी तेईए एक जाति बणाले जौ खरे-खरे कौमा न सरगर्म होली ॥ <sup>15</sup> पुरे अधिकरा सेघे इन्ना गल्ला बोलित होर समझाई होर सिखानदे रौहित: कोई तुस्से तुच्छ नी लोड़ी बुझे ॥

### मसीही चाल -चलन

**3** लोका बै याद केराई, कि हाकिम होर मुखिया रै अधिन रौहीत, होर तिन्ने रै हुक्म मनीत, होर हर एक खरे कौमे री तेईए त्यार रौहित । <sup>2</sup> कौसी बै बदनाम मौति केरित; झगडा केरनु आले नी होले: पर शौभली आदती आले होले, होर सेभी माहणु सैघे बेडे प्यारा सैघे रौहले । <sup>3</sup> किबेकि आसे भी पेहले, निर्बुद्धि, होर हुक्म नी मनणु आले, होर गलतफैमी न पौडु हुन्दे ती, होर रांग रंगे री अभिलाषा न होर सुख विलासे री गुलामी न ती, होर बैरभावा, होर <sup>4</sup> पर जेबे आसारै उद्धारकर्ता परमेश्वरे री क्रिपा, होर माहणु पेन्दे तेईरा प्यार प्रगट हुआ । <sup>5</sup> ता तेईए आसारा उद्धार केरु: होर ऐ धर्मा रै कौमा रै मुताबिक नेई, जौ आसे आपु केरे सी, पर आपणी दया रै मुताबिक सा, नौआ जन्म, होर पवित्र आत्मा रै दुआरा नौऊंआं बणाणे रै दुआरा हुआ सा ।

<sup>6</sup> जुण तेईए आसारै उद्धारकर्ता यीशु मसिहा रै दुआरा आसा पेन्दे बोहु बड़ी आशीष धिनी री सा । <sup>7</sup> जुणी री बजा न आसे तेई रै अनुग्रहा सेघे धर्मी बणीया, हमेशा री जिन्दगी री आशा रै मुतबिक पुत्र अधिकरी बणे । <sup>8</sup> ऐ गल सच सा, होर हाऊ चाहा सा, कि तु इन्ना गल्ला रै बारे न हिम्मती सैघे बोलले तेबे कि जुणा परमेश्वरा बै मन्ना सी, ते खरे-खरे कौमा न लागी रौहाणे न ध्यान रखा सी: ऐ गल्ला खरी, होर माहणु रै फाईदे री सी । <sup>9</sup> पर मुखता री बैहसा न, होर खान्दाना रै, होर बैर विरोध, होर तिन्ना झगडे न, जौ कनुन रै बारे न बचिया रौहे; किबेकि ते निष्फल होर बेकार सी । <sup>10</sup> कौसी पाखंडी बै ऐक दुई बार समझाई बुझाईया तेई न आंगी रौहे । <sup>11</sup> ऐ जाणीया कि ऐंढा माहणु भटकन्दा सा, होर आपणे आपा बै दोषी मनिया पाप केरदा रौहा सा ।

### व्यक्तिगत आदेश होर अभिवादन

<sup>12</sup> जैबै हाँऊ तौ आगे अरतिमास या तूरखिकुसा बै भेजनु, ता मुंह हागै निकुपुलिस एणे री कोशिश केरीत: किबेकी मैं तोखे सर्दी न रौहणै री सोची सा । <sup>13</sup> जेनास सथापना केरणु आळै होर अप्पुलोसा बै कोशिश केरिया आगे पजेरित, किबेकी तिन्हा बै कोई चीजा री कमी नेई हुई लोड़ी । <sup>14</sup> होर आसरे लोका जरूरता बै पूरा केरने री तैईये शोभले कौमा न लागी रौहणा सीखे, ता बिना कौमें मता रौहदे । <sup>15</sup> मेरे सेभी सेंघी रा तौबे नमस्कार होर जे बिश्वासा रै बजाह न आसा सेंघे झुरी रखा सी, तिन्हा बै नमस्कार । तुसा सेभी पेंधे अनुग्रह होन्दा रौहला ।

# फिलेमोन

## भूमिका

फिलेमोन एक खास मसीही ती, कुलुस्से री मण्डली रा सदस्या होर उनेसिमुस नाँ रा एक नोकरा रा स्वामी ती । ऐ नोकर आपणै स्वामी रै तौखे न भैगु ती, होर फिरि कैदी तैरहा पौलुसा न भेट हुई, जो तेई बौगत जेला न ती । पौलुसा रै जरिये, उनेसिमुस एक मसीही बैणु । फिलेमोना रै नाँ पौलुस प्रेरिता री चिह्नी फिलेमोना संघे ऐ बिनती केरा सा कि सौ आपणै दासा संघे फिरि मेल-मिलाप केर, जुणी बै पौलुस फिरि तिन्हा आगै भेजदा लाग़ा सा, होर न केवल एक माफ़ केरेदे नोकरा रै रूपा न पर एक मसीही भाई रै रूपा न तिन्हरा स्वागत केरे ।

रूप-रेखा

भूमिका 1-3

फिलेमोना री प्रशंसा 4-7

उनेसिमुस री तेईये बिनती 8-22

उपसंहार 23-25

## अभिवादन

1 पौलुसा री तरफा न जो यीशु मसीह रा कैदी सा, होर भाई तीमुथियुसा री तरफा न आसरै प्यारे सेंघी फिलेमोन । 2 होर बैहण अफकीया, होर आसरै सेंघी योद्धा आरखिप्पुस होर फिलेमोना रै घौरा री मण्डली रै नाँ । 3 आसरै बापू परमेश्वर होर प्रभु यीशु मसीह री तरफा न अनुग्रह होर शान्ति तूसा बै मिल्दी रौहे ।

## फिलेमोन रा प्यार होर बशाह

4 हाँऊ हमेशा परमेश्वरा रा धन्यवाद केरा सा होर आप्णी प्रार्थना न भी तौभे याद केरा सा । 5 किबैकि हाँऊ तेरे तेई प्यार होर बशाह री चर्चा शुणा सा जे सेभ पवित्र लोका सेंघे होर प्रभु यीशु पेंधै सा । 6 हाँऊ प्रार्थना केरा सा कि बशाह न तेरआ शामिल होणा, तुसरी सेभ भलाई री पछियाणा न, मसीह री तेईये शक्तिशाली होला । 7 किबेकी हे भाई मुम्बे तेरे प्यारा न बड़ा आनन्द होर शांति मिली, तैबै कि तेरे द्वारा पवित्र लोका रै मन हौरै भरे हुए सी ।

## उनेसिमुस री तेईये प्रार्थना

8 तैबै अगर मुम्बै मसीह न बड़ी हिम्मत सा कि जो गैल ठीक सा, तेईरा हुक्म तौभे देनू । 9 तैबैबी मुम्बै खापरै पौलुसा बै जो एबै बी मसीह यीशु री तेईये कैदी सा, ऐ होर बी बड़ा शोभला लाग़ा सा कि प्यारा सेंघे प्रार्थना केरण । 10 हाँऊ आपणै शौहरू ऊनेसिमुसा री तेईये, जूण मुं न पैदा हूआ सा, जैबै हाँऊ कैदा न ती, तौ सेंघे प्रार्थना केरा सा । 11 सौ ता पैहलै कोई कौमा रा नेई ती, पर एबै आसरै होर तूसरै बड़े कौमा रा सा । 12 तेईबै मतलब जे मेरे

दिला रा टुकड़ा सा, मैं तूसा हागै बापस भेजुन्दा सा । 13 तेईबै हाँऊ आपू सेंघे रखणा चाहा ती कि सौ तेरी तरफा न कैदा न जो शुभसंदेशा रा कारण सा, मेरी सेवा केरला । 14 पर मैं तुसरी इच्छा बगैर किच्छ बी केरणा नेई चाहू, कि तूसरी ये दया जबरदस्ती नेई पर खुशी सेंघे होली । 15 किबैकि कि पता सौ तूसा न किच्छ रोजा री तेईये तैबै अलग हुआ कि हमेशा तूसरै नेड़ रौहे । 16 पर एबै न लेईया नोकरा सेंई नेई वरना नोकरा न भी ठीक, मतलब भाई रै बराबर रौहे, जो मेरा ता खास प्याराऐ सा, पर एबै देह न होर प्रभु न भी, तेरा भी खास प्यारा होला । 17 तैबै अगर तू मुम्बे आपणा सेंघी बूझा सा, ता तेईबै ऐंढे अपनात् जैंढे मुम्बै । 18 अगर तेईये तेरा किच्छ नुकसान केरुदा सा, कि तेरा किच्छ लेऊदा सा, ता मेरे नाँ पेंधै लिखीत् । 19 हाँऊ पौलुस आपणै हौथा सेंघे लिखा सा कि हाँऊ आपूये भौरा सा, होर बोलणै री कोई जरूरत नेई मेरा कर्ज जो तौ पेंधै सा सौ तू ही सा । 20 हे भाई, ऐ खुशी मुम्बै प्रभु न तेरी तरफा न मिले । मसीह न मेरे जीऊ बै हौरा भरा केर । 21 हाँऊ तेरे आज्ञाकारी होणै रा भरोसा रखिया तौभे लिखा सा, ऐ जाणा सा कि जे किच्छ हाँऊ बोला सा, तू तेई न बी जादा केरला । 22 होर ऐ बी कि मेरी तेईये रौहणै री जगहा तैयार रखा । मुम्बै आशा सा कि प्रार्थना रै जरिये हाँऊ तूसा बै देणा ।

## अंतिम अभिवादन

23 ईपफ्रास जे मसीह यीशु न तूसा सेंघे कैदी सा, 24 होर मरकुस होर अरिस्तर्खुस होर देमास होर लूका जे मुं सेंघे सी, तिन्हरा तौभे नमस्कार । 25 आसरै प्रभु यीशु मसीह रा अनुग्रह तुसरी आत्मा पेंधै होन्दा रौहे । आमीन ।

# इब्रानियों

## परमेश्वर रा वचन, बेटे द्वारा

1 पैहलकें जुगा ना परमेश्वर दादू-बा सेंधें थोड़ा-थोड़ा करिया भान्ति-भान्ति ना भविष्यवक्तें रै जरियें गैला केइया, 2 इन्हा रोजै रै अन्ता ना बेटें रै जरियें गैला केरी, जुग तेइयें सारी चीजा रा वारिस ठहराऊ सा होर तेही रै जरियें परमेवरें सारी सृष्टि बनाई सा । 3 स परमेश्वरें रै प्याशें होर तेइयें तत्वे री छाप सा होर स आपणी चीजा बै आपणी शक्ति रै वचना सेंधें सम्भाला सा । स पापा बै धोइया उथड़ी जैगा ना महिमामय परमेश्वरें री दैहिणी धिरें जाइया बेटा, 4 हो स्वर्गदूता ना तेतरें उतम ठहरू, जेतारा तेइयें तिन्हा ना बड़ें औधें रा वारिस होइया यतम नाँ पाऊ ।

## परमेश्वर रा बेटे री महानता

5 किबैकि स्वर्गदूता ना कुणीबै तेइयें बोलू कि तू मेरा बेटा सा, औज तू मूँ ना पैदा हुआ सा? होर ऐ कि मूँ तेइरें बापू होणा होर तेई मेरें बेटें होणा? 6 होर जैबै जेठे शिरें बै दुनिया ना आणा सा ता बोला सा कि, परमेश्वरें रै सारें स्वर्गदूत तेइबै जे महाराज केरलें, 7 होर स्वर्गदूतें रै बारें ना बोला सा कि, स आपणें दूता बै बागर होर आपणें सेवका बै भौकदी औग बना सा । 8 पर बेटें बै बोला सा, हे परमेश्वर तेरा सिंहासन जुगा-जुगा तक रौहणा । तेरें राज्य रा न्याय सदा अटल रौहणा । 9 तें धर्मा सेंधें झुरी रैखी होर अधर्मा सेंधें बेइर । एसा वजहा ना तेरें परमेश्वरें तेरें सेंधी ना जादा खुशी रै तेलें लाइया तेरा अभिषेक केरू, 10 होर ऐ बोलू कि, हे प्रभु शुरु ना तें धोरती री मनियाद पाई होर स्वर्ग तेरें हौथें री कारीगिरी सा । 11 तिन्हा ता नाश होणा पर त बणी रौहणा होर तिन्हा झिकडे साही पराणें होणा, 12 होर त ते चादरा साही लपेटणें । तिन्हा झिकडे साही बदलिणा पर तू सदा सौहें सा होर तेरी बोर्षा रा अन्त नी होणा, 13 होर स्वर्गदूता ना कुणीबै तेइयें बोलू कि, तू मेरी दैहिणी धिरें बेश, जाँ तक कि हाँऊ तेरें बेइरी बै तेरी जोंधें री पोटडी नी बणानू? 14 कि ते सारी सेवा टहल केरनू आली आत्मा नी, जे कि उद्धार पाणू आलें री तैणियें भेजिया सी कि ते तिन्हरी सेवा केरली ।

## महान उद्धार

2 ऐबें ऐ जरूरी सा कि जे गैला आसैं शुणी सी तिन्हा पेंधें होर बी मन लालें कि आसैं बहकिया तिन्हा ना दूर नी जालें । 2 किबैकि जे वचन स्वर्गदूतें बोलू ती, जैबै स स्थिर रौहू होर हर एक अपराध होर परमेश्वरें री गैला नी मैनणू आलें बै तेथा रा ठीक-ठीक बदला मिलू । 3 ता आसैं एतरें बड़ें उद्धार किहां बेची सका सी जौसरी चर्चा पैहिलें प्रभु रै द्वारा हुई होर शुणू आलें रै जरियें आसा बै तसली हुई, 4 होर परमेश्वर बी आपणी इच्छें रै मुताबिक हर किस्में रै चिन्ह चमत्कार होर पवित्र आत्में रै बाँडणें रै जरियें एसा गैलें री गवाही देंदा रौहू ।

## आसरा उद्धारकर्ता

5 तेइयें एणू आला संसार जौसरी चर्चा आसैं केरदें लागें सी, स्वर्गदूतें रै अधीन नी केरू । 6 बल्कि कौसियें ऐ गवाही धिनी कि माहू की सा कि तू तेइरी सुधि लेआ सा? या माहू रा बेटा की सा कि तू तेई पेंधें दृष्टि केरा सा । 7 तें स स्वर्गदूता ना थोड़ा जेही कम केरू । तें तेई पेंधें महिमा रा मुकट रखू होर तेइबै आपणें हौथें रै कोमा पेंधें अधिकार धिना । 8 तें सबकिछ तेइरी जोंघा हेठें केरू । ऐबें जैबै कि तेइयें सबकिछ तेइरें अधीन केरू पर आसैं

हाजी तक सबकिछ तेइरें अधीन नी हेरदें । 9 पर आसैं यीशु बै जे स्वर्गदूता थोड़ा जेही कम केरूआ ती, मोउती रै दुःख चकणें री वजहा ना महिमा होर आदरा रा मुकट लाइया हेरा सी ताकि परमेश्वरें रै अनुग्रहा ना हरेक माहू री तेंइयें मोउती रा स्वाद चैखलें । 10 किबैकि जौसरी तेंइयें सबकिछ सा होर जौसरें द्वारा सबकिछ सा तेइबै ऐ शोभला लागा कि जैबै स बोहू बेटें बै महिमा ना पजाला ता, तिन्हरें उद्धार कर्ता बै दुःख चकणें रै द्वारा सिद्ध केरला । 11 किबैकि पवित्र केरनू आला होर जे पवित्र केरिया सी ते एकी मूलें रै सी, एसा वजहा ना स तिन्हा बै भाई बोलणें ना नी शर्मिन्दा । 12 पर बोला सा कि, मूँ तेरा नाँ आपणें भाई बै शुणाणा, सभै रै बिचा ना मूँ तेरा भजन गाणा । 13 होर जे शोहरू परमेश्वरें मुंभै धिनै सी मूँ तिन्हा समेत तेई पेंधें भरोसा रखणा । 14 ऐबें जैबै कि शोहरू लोहू होर माँसैं रै सहभागी सी ता स आपू बी तिन्हा साही तिन्हरा सहभागी हुआ, ताकि मोऊती रै द्वारा तेइबै मोऊती पेंधें शक्ति मिली ती कि शैताना बै नकमा केरला । 15 ताकि जे मोऊती री डौरा ना फसैं ती तिन्हा बै छुड़ाला । 16 किबैकि स स्वर्गदूता बै नी बल्कि इब्राहिमै रै वंशा बै सम्भाला सा । 17 ऐबें तेइबै लोडी ती कि स सैभी गैला ना आपणें भाई साही बणदा ताकि स तिन्हा गैला ना जे परमेश्वर सेंधें सम्बन्ध रैखा सी, एक दयालू होर भरोसैं लायक महापुजारी बणला ताकि लोकें रै पापे री तेंइयें प्रायश्चित केरला । 18 किबैकि जैबै तेइयें परीक्षे री दशा ना दुःख चकू ता, तिन्हरी बी मजत केरी सका सा जुणी री परीक्षा होआ सा ।

## यीशु मूसा न महान

3 ऐबें हे पवित्र भाइयो तुसैं जे स्वर्गीय बुलाहटा ना सहभागी सी, तेई प्रेरित होर महापुजारी यीशु पेंधें ध्यान केरा । 2 जे आपणें नियुक्त केरनू आलें री तेंइयें भरोसैं लायक ती, जैण्डा कि मूसा बी तेइरें सारें घराने ना भरोसैं लायक ती । 3 किबैकि स मूसा ना एतरा जादा महिमै रै लायक समझू सा, जेतारा कि घौरा बणाणू आला घौरा ना जादा आदर रैखा सा । 4 किबैकि हर एकी घौरा बणाणू आला होआ सा पर जुणियें सबकिछ बणाऊ सा स परमेश्वर सा । 5 मूसा ता तेइरें सारें घौरा ना सेवका साही भरोसैं लायक रौहू ताकि जे गैला होणू आली सी तिन्हरी गवाही देला । 6 पर यीशु बेटें साही तेइरें घौरा रा अधिकारी सा होर तेइरा घोर आसैं सी अगर आसैं हौंसलें सेंधें आपणी आशैं रै घमण्डा पेंधें अन्ता तक स्थिर रौहालें ।

## विश्वास न केरणू आळें री तेंइये चेताऊनी

7 ऐबें पवित्र आत्मा जे बोला सा अगर औज तुसैं तेईरा शब्द शुणलें, 8 ता आपणें मैना बै कठोर मता केरदें जैण्डा कि झिक घाणें रै बौगता ना होर परीक्षे रै रोजें बोणा ना केरू ती । 9 जौखें तुसरें दादू-बा ऐ हाँऊ जौचिया परखू होर चाही बोर्षा तक मेरें कोम हेरें । 10 एसा वजहा ना हाँऊ तेई बौगतें रै लोका ना रुठा रौहू होर बोलू कि, इन्हरें मन सदा भटकदें रौहा सी होर इन्हें मेरी बौता नी पछियाणी । 11 तैबें मैं झिका सेंधें कसम खाई कि ते मेरें रामें रै ध्याडें ना नी एजी सकदें । 12 हे भाइयो, होशियार रौहात् कि तुसा ना ऐण्डा बुरा होर अविश्वासी मन नी होला, जे परमेश्वर ना दूर हटलें । 13 बल्कि जौस रोजा तक औजका रोज बोला सी, हर रोज एकी होरी बै समझाँदें रौहा, ऐण्डा नी लोडी हुआ कि, तुसा ना कोई माहू पापे रै धोखें ना एजिया कठोर होला । 14 किबैकि आसैं मसीह सेंधें सहभागी हुए सी । अगर आसैं पैहिलें भरोसैं पेंधें अनशता तक दृढता ना स्थिर रौहलें । 15 जैण्डा बोलू सा कि, अगर औज तुसैं तेइरा शब्द शुणलें ता आपणें मना बै कठोर मता केरदें, जैण्डा कि झिक

द्याणें रें बोगता ना केरु ती । 16 भला कुणी माहूरे शुणिया झिक द्याई? कि तिन्हा सैभी लोकें नी जे मूसै मिस्रा ना कौडें ती? 17 होर स चाही बौर्षा तक कुणी लोका ना रूठा रौहू? कि तिन्हा ना नी, जुणियै पाप केरु होर तिन्हरी लाशा बोणा ना पौडी रौही? 18 होर तेइयें कुणी ना कसम खाई कि तुसरें मेरें रैमै रें ध्याडें ना नी एजिणा? सिर्फ तिन्हा ना जुणियै प्रभु री आज्ञा नी मैनी? 19 एबै आसै हेरा सी कि ते अविश्वासै री वजहा ना प्रवेश नी केरी सकै ।

### परमेश्वरा रें लोका री तेंइये राम

4 जैबै कि तेइरें रामें रें ध्याडें ना प्रवेश केरनै री प्रतिज्ञा हाजी तक सा ता आसा बै डौरना चाहिए, ऐण्डा नी लोडी हुआ कि तुसा ना कोई बी माहू तेइना अनजान रौहला । 2 किबैकि आसा बै तिन्हा साही सुसमाचार शुणाऊ सा, पर शुणें दै वचना ना तिन्हा बै किछ लाभ नी हुआ किबैकि वचन शुणनू आलें रें मना ना ठीक रीतियै नी बेठा । 3 होर आसै जुणियै विश्वास केरु सा, तेई रामें रें ध्याडें ना प्रवेश केरा सी, जैण्डा तेइयें बोलू, कि में आपणी झिका ना कसम खाई कि ते मेरें रामें रें ध्याडें ना प्रवेश नी केरी सकदै, जैबै कि जगतै री उत्पति रें बोगता ना लेइया तेइरें कोम पूरें हुऐ ती । 4 किबैकि सौतुऐ रोजै रें बारें ना तेइयें ऐ बोलू सा, कि परमेश्वरें सौतुऐ रोजै आपणें कोमा रा निपटारा केरिया राम केरु, 5 होर सैभी जैगा ऐ बोला सा कि ते मेरें रामें रें ध्याडें ना प्रवेश नी केरी सकदै । 6 ता जैबै ऐ गल बाकी सा कि रामें रें ध्याडें ना प्रवेश केरनू आलें होरा केतरें सी होर जुणियै तेइरा सुसमाचार पैहिलें शुणाऊ ती । तिन्है परमेश्वरें री आज्ञा नी मैनणै री वजहा ना तेथा ना प्रवेश नी केरु । 7 ता तैबै स कुणी रोजा बै खास ठहराइया एतरें रोजा बाद दाऊदें री कताबा ना औजका रोज बोला सा, जैण्डा पैहिलें बोलूआ ती कि, अगर औज तुसै तेइरा शब्द शुणलें ता आपणें मना बै कठोर मता केरदै, 8 होर अगर यहोशुऐ तिन्हा ना रामें रें ध्याडें ना प्रवेश कराऊ ती ता तेथा ना बाद दूजै रोजै री चर्चा नी ती होंदी । 9 एबै जाणि लेआ कि परमेश्वरें रें लोकै री तेंइयें सब्ता रा रोज बाकी सा, 10 किबैकि जुणियै तेइरें रामें रें रोजा ना प्रवेश केरु सा, तेइयें बी परमेश्वरा साही आपणें कोम पूरें केरिया राम केरु सा । 11 एबै आसा बी तेई रामें रें रोजा ना प्रवेश केरनै री कोशिश केरनी, ऐण्डा नी लोडी हुआ कि कोई माहू तिन्हा साही आज्ञा नी मैनणै री वजहा ना पापा ना पौडला । 12 किबैकि परमेश्वरा रा वचन जिन्दा, प्रबल होर हर एक दोधारी तलवारी ना बी जादा चोखा सा होर जीव, आत्मा, गोंठै-गोंठै बै होर गुदै-गुदै बै अलग केरिया आर-पार बिन्हा सा होर मैने रें विचारा जाँचा सा । 13 होर सृष्टि री कोई चीज तेइना छिपी दी नी आँधी बल्कि जौसा ना आसा बै कोम सा, तेई सामनै सैभै चीजा खुली होर बेपरदा सी ।

### सैभी न बडा पुजारी

14 जैबै आसरा एतरा बडा महायाजक सा जे स्वर्ग होइया नौठा सा, यानिकी परमेश्वरा रा बेटा यीशु ता एजा, आसा आपणा विश्वास पक्का रखणा । 15 किबैकि आसरा महायाजक ऐण्डा नी आँधी, जे कमजोरी ना आसा सेंधें दुःखी नी होई सकदा, बल्कि तेइरी सैभी गैला ना परख ता हुई पर स निष्पाप निकता । 16 एबै एजा, ताकि आसै अनुग्रहै रें सिंहासना सामनै हौंसलै रखिया चैललै कि आसा पेंधें दया होली होर अनुग्रह पालें जे जरूरती रें बोगतै आसरी मजत केरला ।

5 हर एक महापुजारी माहू ना लेइया सा होर माहू री तेंइयें जे गैला परमेश्वरें सेंधें सम्बन्ध रेखा सी तिन्हरें बारें ना भेट होर पापै री बलि चढाणें री तेंइयें ठहराइया सा । 2 होर स अज्ञानी होर भूलै भटकै सेंधें नर्मि सेंधें व्यवहार केरी सका सा किबैकि स आपू बी कमजोर सा, 3 होर एबै तेइरी तेंइयें ऐ जरूरी होआ सा कि जैण्डा स लोकै री तेंइयें पाप बलि चढा सा, तैण्डा आपणी तेंइयें बी चढाला । 4 होर ऐ आदरा रा औहदा कोई आपू नी लेंदा, जैबै तक कि हारुना साही कोई परमेश्वरा धिरें ना नी ठहराइदा । 5 तैण्डाए मसीहै बी महापुजारी बणनै री बडाई आपू नी लेई पर तेइबै परमेश्वरें धिनी, जुणियै तेइयें बोलू ती कि, तू मेरा बेटा सा, औज मैं तू पैदा केरु सा । 6 स दूजी जैगा ना बी बोला सा, तू मलिकिसिदकै री रीति पेंधें हमेशै री तेंइयें पुजारी सा । 7 तेइयें आपणी देही ना रौहणें रें ध्याडें ना पुकारी-पुकारिया होर

औहू शेटिआ परमेश्वरा हागै प्रार्थना केरी जो कि तेइबै मोऊती ना बचाई सका ती पर भक्ति री वजहा ना तेइरी प्रार्थना परमेश्वरें शुणी । 8 होर बेटा होदें बी तेइयें दुःख चैकिया परमेश्वरें री आज्ञा मैनणी ईखी । 9 होर सिद्ध बैणिया आपणें सैभी आज्ञा मैनणू आलें री तेंइयें हमेशै री तेंइयें उद्धारै री वजहा बणू । 10 होर तेइबै परमेश्वरा धिरें ना मलिकिसिदकै री रीति पेंधें महापुजारी रा औहदा मिलू ।

### विश्वासा न पीछे होणें रा नतीजा

11 एथें रें बारें ना आसा बोहू गैला बोलणी सी जौसरा समझणा बी मुश्किल सा किबैकि तुसै जोरा सेंधें शुणदै लागै सी । 12 बौगतै रें मुताबिक ता तुसाबै गुरु होणा चाहिए ती, तैबै बी ऐ जरूरी सा कि, कोई तुसाबै परमेश्वरें रें वचनै री शिक्षा दुजी घेरें सिखाला होर ऐण्डै हुऐ सी कि तुसाबै नाजै रें बदलें हाजी तक दूध लोडी । 13 किबैकि दूध पीणू आलें बचें बै धमै री पछियाण नी होंदी किबैकि स बालक सा । 14 पर नाज स्याणै री तेंइयें सा जौसरें हर एक अंग भ्यास केरदै-केरदै भलें बुरें ना भेद केरनै री तेंइयें पैके हुऐ सी ।

6 एबै एजा मसीह री शुरुआती शिक्षा छौडिया आसा सिद्ध होणें री तेंइयें आगै बढदै जाणा होर मूँऐदै कोमा ना मन फेरिया परमेश्वरा पेंधें विश्वास केरना, 2 होर बपतिस्मै, होथ रखणें होर मूँऐदै रें जिन्दै होणा होर अन्तिम न्याय री नीव दबारा नी पाणी, 3 होर अगर परमेश्वरें चाहू ता आसा ऐण्डाए केरना । 4 किबैकि जुणियै एक बार ज्योति पाई सा, जुणियै स्वर्गा रा स्वाद चखू सा होर पवित्र आत्मै रें भागी हुऐ सी, 5 होर परमेश्वरें रें उतम वचना रा होर एणू आलें जुगै री शक्ति रा स्वाद चखू सा, 6 ते अगर भटकी बी जालें ता तिन्हरें मैना बै फेरनै री तेंइयें नोऊँआ बणाणा अनहोना सा, किबैकि ते परमेश्वरें रें बेटें बै आपणी तेंइयें कूसी पेंधें चढा सी होर प्रगटा ना तेई पेंधें कलंक ला सी 7 किबैकि जुण धीरती बार-बार गाशें रें पाणी बै पीई-पीइया जुणी लोकै री तेंइयें बाहिया सा होर तिन्हरें कोमै री शाग-सब्जी बै पैदा केरा सा स धीरती परमेश्वरा ना आशीष पा सा । 8 अगर स जिंदा झोकड पैदा केरा सा ता स नकमी होर श्रापित होआ सा होर तेसरा अन्त फुकिया सा । 9 हे प्रियो, भला आसै इन्हा गैला बै बोला सी पर तैबै बी तुसरें बारें ना एथा ना शोभली होर उद्धार देणू आली गैला रा भरोसा केरा सी । 10 किबैकि परमेश्वर अन्यायी नी आँधी, कि तुसरें कोम होर तुसरी झुरी बै बिसरला जे तुसै तेइरें नाँ री तेंइयें एसा रीतिये रिहाई कि पवित्र लोकै री सेवा केरी होर केरदै बी लागै सी । 11 पर आसै बोहू चाहा सी कि तुसा ना हर एक माहू अन्ता तक पूरी आशै री तेंइयें ऐण्डी कोशिश केरदा रौहला । 12 ताकि तुसै आलसी नी होलें बल्कि तिन्हरी मैनलें जो विश्वास होर पक्की मजबूती सेंधें परमेश्वरें री प्रतिज्ञै रें हकदार होआ सी,

### परमेश्वरा रा पक्का वायदा

13 होर परमेश्वरा बै जैबै इब्राहिमा बै प्रप्रतिज्ञा देंदी घेरें कसम खाणें री तेंइयें आपू ना बडा होर कोई नी मिलू, तैबै परमेश्वरें आपणी कसम खाइया बोलू, 14 मूँ सैचिऐ तौभै बोहू आशीष देणी होर तेरी सन्ताना बै बढाँदै जाणा । 15 ऐ इब्राहिमै आपणें मना ना धीरज रखिया परमेश्वरें रें वायदै री गैला प्राप्त केरी । 16 माहू ता आपू ना कौसी बडै री कसम खा सी होर तिन्हरा हर एक वहसा रा फैसला कसमा सेंधें पक्का होआ सा । 17 तैबै परमेश्वरें जो प्रतिज्ञै रें हकदार सी, तिन्हा पेंधें साफ रीतिऐ प्रगट केरना चाहू कि तेइरी मनसा बदली नी सकदी ता आपू री कसम खाई । 18 ताकि परमेश्वरा रा झूठा ठहरना जो अनहोना सा, आसरा हौंसला बणी रौहला कि जो आसै परमेश्वरें री शरण लेणें री तेंइयें दौडदै लागै सी कि जो आशा सामनै रेखी सा तेसा बै प्राप्त केरलें । 19 सौ आशा आसरे प्राणै री तेंइयें एक ऐण्डा लँगर सा जो पका सा होर परदै भीतरें तक पुजा सा । 20 जौखै यीशु मलिकिसिदकै री रीति पेंधें हमेशै री तेंइयें महायाजक बणिया आसरी तेंइयें अगुवै रें रुपा ना प्रवेश हुआ सा ।

### मलिकिसिदक नाँ रा पुजारी

7 ए मिलिकिसिदक शालोमा रा राजा होर परमप्रधान परमेश्वरा रा हमेशा याजक बैणी रोहा ती । जैबे इब्राहीम राजे बै मारिया वापस जाँदा लागा ती ता एइरे तेई सँघे भेंट केरिया तेइबे आशीष धिनी । 2 एइबे इब्राहीमै सारी चीजा रा दसवाँश बी धिना । ए आपणै नाँ रै मतलबै रै मुताबिक धर्मा रा राजा होर शालोम यानिकी शांति रा राजा सा । 3 जौसरा न बापू, न आमा, न वंशावली आँथी, जौसरै न ता ध्याडै री शुरुआत आँथी न जिनंदगी रा अन्त पर परमेश्वरै रै बेटै रै समान ठहरू । 4 एबै एथा पँधे ध्यान केरा कि स केतरा महान ती, जौसबै कि इब्राहीमै शोभलै न शोभलै मालै री लूटा रा दशवाँस धिना । 5 लेवी री सन्ताना ना जे पुजारी रा औहदा पा सी, तिन्हा बै हुकम मिलू सा कि ते आपणै भाई ना व्यवस्थै रै मुताबिक दशवाँस लेलै । ते चाहे इब्राहीमै री देही ना किबै नी जन्मै दै होलै । 6 पर एइयै तिन्हा ना बी दशवाँस लेऊ जौ इब्राहीमै री वंशावली रै नी ती आँथी होर जुणीबै परमेश्वरा रा वायदा मिलू ती तेइबे आशीष धिनी । 7 होर तेथा ना कोई शक नी आँथी कि होछा बडै ना आशीष पा सा । 8 होर औखै ता मौरनू आलै माहू दशवाँ लेआ सी पर तौखे सौहै लेआ सा जौसरी गवाही देइया सा कि स जिन्दा सा । 9 ता आसै ए बी बोली सका सी कि लेवियै जौ कि दशवाँस लेआ सा, इब्राहीमै रै द्वारा दशवाँस धिना । 10 किबैकि जौस बोगतै मलिकिसिदके तेइरै बापू सँघे भेंट केरी तेई बोगतै स आपणै बापू री देही ना ती ।

### मलिकिसिदक जैदा दूजा पुजारी

11 अगर लेवीय पुजारी औहदें रै द्वारा सिद्धि होई सका सा ता, मलिकिसिदके री रीति पँधे होरी पुजारी बै खडै होणै री की जरूरत ती कि स हारुनै री रीति रा कहलाला । 12 किबैकि जैबे पुजारी रा औहदा बदलिया सा ता व्यवस्था रा बदलणा बी जरूरी सा । 13 किबैकि जौसरै बारै ना ए गैला बोलिआ सी कि ए होरी गोत्रा रा सा, जुणी गोत्रा ना कौसियै वेदी री सेवा नी केरी, 14 ता ए प्रगट सा कि आसरा प्रभु रा प्रकटीकरण यहूदै रै गोत्रा ना हुआ सा होर एई गोत्रै रै बारै ना मूसै कोई चर्चा नी केरी । 15 होर जैबे मलिकिसिदके रै समान एक होर याजक पैदा होणू आला ती । 16 जौ शरीरै री व्यवस्थै रै मुताबिक नी बल्कि अविनाशी जिंदगी री सामर्थ्य रै मुताबिक नियुक्त होला, त आसरा दावा होर बी स्पष्ट रूपा ना प्रगट हुआ । 17 किबैकि तेइरै बारै ना ए गवाही देउई सा कि, “तू मलिकिसिदके री रीति पँधे जुगा-जुगा तक पुजारी सा । 18 पैहली आज्ञा कमजोर होर सफल नी होणै री वजहा ना खत्म हुई । 19 होर तेसरी जैगा ना ऐण्डी उतम आशा रखुई सा जौसरै द्वारा आसै परमेश्वरै रै नेड जाई सका सी । 20 होर एथै री तक कि मसीहै री नियुक्ति शपथी बगैर नी हुई । 21 किबैकि ते ता बगैर शपथियै याजक ठहराउए पर ए शपथी सँघे तेई री धिरै ना नियुक्त केरुआ जुणियै तेइरै बारै ना बोलू कि प्रभुए शपथ खाई होर तेई तेइना नी पछताइणा कि तू जुगा-जुगा तक याजक सा । 22 एबे यीशु एक उतम वायदै रा चिन्ह ठहरू । 23 ते ता बोह सारै याजक बणदै आऐ, एथै री वजहा ए ती कि मोऊत तिन्हा बै रौहणै नी ती देदी । 24 पर ए युग-युग रोहा सा, एसा वजहा ना तेइरा याजक पद अटल सा । 25 जे तेइरै द्वारा परमेश्वरा हागै एजा सी स तिन्हरा पूरा-पूरा उद्धार केरी सका सा किबैकि स तिन्हरी तँइयै बिनती केरनै री तँइयै सदा जिदा सा । 26 ऐण्ढा महायाजक आसै लायक ती जौ पवित्र, निष्कपट, निर्मल होर पापी ना अलग होर स्वर्गा नी बी उथड़ा केरुआ दा होला । 27 होर तेइबै तिन्हा महायाजका साही पैहलै आपणै पापै री तँइयै होर तँबै लोकै रै पापै री तँइयै बलिदान चढ़ाणै री जरूरत नी आँथी किबैकि तेइयै आपणै आपा बै बलिदान चढ़ाइया स एकै बार निपटाऊ । 28 किबैकि व्यवस्था ता कमजोर माहू बै महायाजक नियुक्त केरा सा पर तेसा शपथी रा वचन जे व्यवस्था ना बाद खाई, तेई बेटै बै नियुक्त केरा सा जौ जुगै-जुगै री तँइयै सिद्ध केरुआ सा ।

### यीशु आसरा बडा पुजारी

8 एबै जे गैला आसै बोलदै लागै सी तिन्हा ना सैभी ना बडी गल ए सा कि आसरा ऐण्ढा महायाजक सा जौ स्वर्गा पँधे महिमामान परमेश्वरै रै

सिंहासनै रै दैहिणै जाइया बेटा । 2 होर पवित्र जैगा होर तेई सँघे तोम्बू रा सेवक हुआ जौ कौसी माहूरे नी बल्कि प्रभुए खडा केरु ती । 3 किबैकि हर एक महायाजक भेंट होर बलिदान चढ़ाणै री तँइयै ठहराइया सा, एसा कारण ए जरूरी सा कि एई हागै बी चढ़ाणै री तँइयै किछ होला । 4 होर अगर स धौरती पँधे होंदा ता कदी याजक नी ती होंदा कि व्यवस्थै रै मुताबिक भेंट चढ़ाणू आलै ता सी । 5 जौ स्वर्गै री चीजै री सेवा केरा सी जैण्ढा कि जैबे मूसा तोम्बू बणाणू आला ती ता तेइबै चिताऊणी मिली कि हेर, जे नमूना तौभै दौगा पँधे रिहाऊ ती सबकिछ तेइरै मुताबिक बणाई । 6 पर तेइबै तिन्हरी सेविकाई ना बढकर मिली किबैकि स होर बी उतम वायदै रा मध्यस्थ ठहरू, जे होर उतम वायदै रै सहारै बोनूईदी सा । 7 किबैकि अगर स पैहिला वायदा निर्दोष होंदा ता दुजै वायदै री तँइयै मौका नी ती तोपिणा । 8 पर स तिन्हा पँधे दोष लाइया बोला सा, कि प्रभु बोला सा, हेरा ते ध्याडै एजा सी कि मूँ इस्राइलै रै घरानै होर यहूदै रै घरानै सँघे नोऊँआ वायदा बोनणा । 9 ए तेई वायदै साही नी होणा जौ मँ तिन्हरै दादू-बा सँघे केरु ती । जैबै मँ ते होथ दौकिआ मिस्र देशा ना खोलिआ आणै किबैकि ते मेरै वायदै पँधे पैकै नी रोहै होर मँ तिन्हरी सुधि नी लेई । प्रभु ऐण्ढा बोला सा । 10 प्रभु भी बोला सा, कि जे वायदा मूँ तिन्हा ध्याडै ना बाद इस्राइलै रै घरानै सँघे बोनणा स ए सा कि, मूँ तिन्हरा परमेश्वर ठहरना होर तिन्हा मेरै लोका ठहरना । 11 होर हर एकी आपणै देशै रै लोका बै होर आपणै भाई बै ए शिक्षा नी देणी कि तू प्रभु बै पछियाण किबैकि होछै ना लेइआ बडै तक सैभी लोका मेरै बारै ना जाणना । 12 किबैकि हाँऊ तिन्हरै अधर्मै रै बारै ना दयावन्त सा होर तिन्हरै पाप दबारा याद नी केरनै । 13 नोऊँए वायदै री स्थापना बाद तेइयै पैहिला वायदा पराणा ठहराऊ होर जे चीज पराणी होआ सा तेसरा मिटणा जरूरी सा ।

### धौरती रै तम्बू न सेवा

9 तेई पैहिलै वायदै ना भी सेवा केरनै रै गियम ती होर ऐण्ढा पवित्र स्थान जे एई सँसारा रा ती, 2 यानिकी, एक तोम्बू बणाउ, पैहिलै तोम्बू ना दीवट, मेज होर भेंट केरुईदी रोटी ती होर तेइबै पवित्र स्थान बोला सी । 3 होर दुजै तोम्बू पिछै स तोम्बू ती जुणियै परम पवित्र स्थान बोला सी । 4 तेई तोम्बू ना सुनै री धूपदानी होर चोहू पासै सुनै लाइआ मेढुआ दा वायदै रा सँदूक ती होर एथा ना मत्रै लाइआ भौरुआ दा सुनै रा मर्तबान होर हारुन पुजारी री छडी ती जुणी ना फूल-फ़ौल आऐ ती होर वायदै री पौटी ती, 5 होर तेथा पँधे तेजमय करुब ती होर तिन्हे प्रायश्चित्तै रै खौटणा पँधे छॉव केरी ती । इन्हरा एक-एक केरिआ बखान केरनै रा हाजी बोगत नी आँथी । 6 जैबै ए चीजा एसा रीतिए तयार हुई तँबै पैहिलै तोम्बू ना ता पुजारी हर बोगतै सेवै रै कोम निभा सी, 7 पर दुजै तोम्बू ना केवल महापुजारी सालै री एक बार जा सी होर लोहू बगैर नी जाँदा जुणीबै कि स आपणी होर लोकै री भूल चुकै री तँइयै चढ़ा सा । 8 एथै लाइया पवित्र आत्मा ए रिहा सा कि जैबै तक पैहिला तोम्बू खडा सा तँबै तक पवित्र जैगा री बौत प्रगट नी हुई । 9 होर ए तोम्बू ता औजके बोगतै री तँइयै एक उदाहरण सा जुणी ना ऐण्डी भेंट होर बलिदान चढ़ाइया सी जुणियै कि अराधना केरनू आलै रै विवेक सिद्ध नी होई सकदै । 10 किबैकि ते केवल खाणै-पीणै री चीजा होर भाँति-भाँति रै शारीरिक विधि रै नियम सी जौ सुधारै रै बोगता तक नियुक्त केरुए सी ।

### मसीह रै खूना री शक्ति

11 पर जैबै मसीह एणू आली शोभली-शोभली चीजा रा महापुजारी होइआ आऊ ता तेइयै होर बी बडै-बडै होर सिद्ध तोम्बू ना होइया जौ कि हौथा रा बैणू दा नी आँथी, 12 बौकरै होर बौछू रै लोहू रै द्वारा नी बल्कि आपणै लोहू रै द्वारा एकै बार पवित्र जैगा प्रवेश केरु होर हमेशै री तँइयै छुटकारा पाऊ । 13 किबैकि जैबै बौकरै होर बौल्दा रा लोहू होर कलोरै री छार अपवित्र लोका पँधे छिड़कणै सँघे स देही बै पवित्र केरा सा, 14 ता मसीह रा लोहू जुणियै कि आपणै आपू बै सत्य री आत्मा रै द्वारा परमेश्वरा सामनै निर्दोष चढ़ाऊ, तुसरै मैना बै तुसरै मूँएदै कोमा ना तुसाबै शुद्ध केरी सका सा ताकि तुसै जिदै परमेश्वरै सेवा केरलै । 15 होर एसा वजहा ना स नोऊँए वायदै रा मध्यस्थ सा

ताकि तेसा मोऊती रै द्वारा जो पैहिले वायदै रै बौगतै अपराधा ना छुटकारा पाणै री तैइयै हुई, ताकि लोका वायदै रै मुताबिक हमेशै री मीरास प्राप्त करलै । 16 किबैकि जोखै वायदा बोनुआ सा तौखै वायदै बोनुआ आलै री मोऊत समझणा बी जरूरी सा । 17 किबैकि ऐण्डा वायदा मौरनै सँधे पका होआ सा होर जैबै तक वायदै बोनुआ आला जिन्दा रौहा सा तैबै तक वायदा किछ कोमा रा नी होदा । 18 पैहिला वायदा भी बगैर लोहू रै नी बोनुआ । 19 किबैकि जैबै मूसै सैभी लोका बै व्यवस्थै री हर एक आज्ञा शुणुई ता तेइयै बौछू होर बौकरै रै लोहू लेइया, पाणी होर लाल ऊन जूबा सँधे तेसा कताबा पैधे होर सैभी लोका पैधे छिड़कू, 20 होर बोलू, “ए तेई वायदै रा लोहू सा जौसरा आदेश परमेश्वरै तुसरी तैइयै धिना सा । 21 होर एसा रीतियै तेइयै तोम्बू होर सेवै रै सारै समाना पैधे लोहू छिड़कू । 22 होर व्यवस्थै रै मुताबिक सारी चीजा लोहू सँधे शुद्ध करिआ सी होर बगैर लोहू रै माफी नी होदी ।

### मसीह रै बलि द्वारा पापा री माफी

23 ए जरूरी सा कि स्वर्गै री चीजा रा प्रतिरूप इन्हरै द्वारा शुद्ध करिआ, पर स्वर्गै री चीजा आपू इन्हा ना उतम बलिदाना सँधे शुद्ध करिली । 24 किबैकि मसीहै हौथै रै बणाउए दै सच्चै पवित्र स्थाना ना प्रवेश नी करू बल्कि स्वर्गा ना प्रवेश करू ताकि आसरी तैइयै स्वर्गा ना परमेश्वरा सामनै हेरिआ । 25 ऐण्डा नी ओंथी कि स बार-बार आपू बै चढ़ाला जैण्डा कि महायाजक हर बौषा ना दूजै रा लोहू लेइया पवित्र जैगा ना प्रवेश केरा सा । 26 नी ता संसार बणनै ना लेइआ तेइबै बार-बार दुःख चेकणा पौडू ती पर ऐबै जुगै रै अन्ता ना स एक बार प्रगट हुआ ताकि आपणी बलि देइआ पापा बै दूर करला । 27 होर जैण्डा कि माहू री तैइयै एक बार मौरना होर तेथा ना बाद न्याय रा होणा नियुक्त सा । 28 तैण्डाए मसीह बी बोहू रै पाप चेकणै री तैइयै एक बार बलिदान हुआ होर लोका तेइरी गैला केरा सी कि तिन्हरै उद्धारै री तैइयै दुजी बार बगैर पापै रै हेरिना ।

### चोखा बलिदान

10 किबैकि व्यवस्था जुणि ना कि एणू आली शोभली चीजै री छाप सा पर तुन्हरा असली रूप नी एसा वजहा ना तिन्हा एकी किस्मै रै बलिदानै लाइया जो हर बौषा ना चढ़ाइया सी ते परमेश्वरा भेटी एणू आलै बै सिद्ध नी केरी सकदै, 2 नी ता तिन्हा बलिदाना रा चढ़ना बन्द होणा ती, किबैकि जैबै सेवा करनू आलै एकै बार शुद्ध होदें ता तैबै तिन्हरी सोचा ते पापी नी ती ठहराणै । 3 पर तिन्हरै द्वारा हर साल पापै री याद होदी रौहा सा । 4 किबैकि ऐ होई नी सकदा कि बौदा रा लोहू होर बौकरै रा लोहू पापा बै दूर करला । 5 एसा वजहा ना स संसार ना एणै रै बौगता ना बोला सा कि बलिदान होर भेंट तै नी चाही पर मेरी तैइयै एक देह तयार केरी, 6 होम बलि होर पाप बलि ना तू खुशु नी हुआ । 7 तैबै मैं बोलू, हेर हाँऊ आऊ सा ताकि हे परमेश्वर तेरी इच्छा पूरी करनू । 8 उझै ता स बोला सा कि तै न ता बलिदान, भेंट, होम-बलि होर पाप बलि चाही होर न तिन्हा ना खुश हुआ जैबैकि ए बलिदान व्यवस्थै रै मुताबिक चढ़ाइया सी । 9 तैबै ऐ बी बोला सा कि हेर, हाँऊ आऊ सा, ताकि तेरी इच्छा पूरी करनू । स पैहिलै बै चैका सा ताकि दूजै बै नियुक्त करला । 10 तेसा इच्छा ना आसै यीशु मसीहै री देही रै एकी बार बलिदान चढ़ाणै सँधे पवित्र करेए सी । 11 होर हर एक याजक ता खडै होइया हर रोज सेवा केरा सा होर एकी किस्मै रै बलिदान बार-बार चढ़ा सा जे कि पापा बै दूर नी केरी सकदै । 12 पर ऐ माहू ता पापै रै बदलै हमेशै री तैइयै एकै बलिदान चढ़ाइया परमेश्वरै री दैहिणी धिरै जाइया बेठा । 13 होर तेही बौगता ना एसा गैलै री याद केरदा रौहा सा कि तेइरै बेइरी तेइरी जोंघा हेठली पीढी बणली । 14 किबैकि तेइयै एकी चढ़ावै रै द्वारा जे पवित्र करिया सी ते हमेशै री तैइयै सिद्ध केरै सी । 15 होर पवित्र आत्मा बी आसा बै ऐ गवाही देआ सा, किबैकि तेइयै पैहिलै बोलू ती, 16 कि प्रभु बोला सा, कि जे वायदा मूँ तिन्हा ध्याडै ना बाद तिन्हा सँधे बोनुआ स ऐ सा कि, मूँ आपणी व्यवस्था तिनरै दिला ना लिखणी होर मूँ ते तिनरी समझा ना पाणी । 17 तैबै स ऐ बोला सा कि, मूँ तिनरै पाप होर अधमै रै कोम कदी बी याद नी केरनै, 18 होर जैबै इनरै पाप माफ हुए सी ता तैबै पापा रा बलिदान नी रौहू ।

### परमेश्वरा रै नेड जाणा

19 हे भाइयो, जैबै कि आसा बै यीशु रै लोहू रै द्वारा तेसा नोउँई होर जिंदी बौतै आधे पवित्र जैगा बै जाणै रा हाँसला आऊ सा, 20 जो तेइयै आपणै शरीरा ना होइया आसरी तैइयै अभिषेक करू सा, 21 होर एथै री तक कि आसरा ऐण्डा महानू याजक सा जो परमेश्वरै रै घोरा रा अधिकारी सा । 22 ता एजा, आसा सच्चै मनै होर पूरै विश्वासा सँधे दोष दूर केरनै री तैइयै दिला पैधे छिड़काव लेइया होर देही बै शुद्ध पाणियै धोइया परमेश्वरै रै नेड जाणा, 23 होर आपणी आशै रै स्वीकारा बै मजबूती सँधे थामिया रौहलै, किबैकिजुणियै वायदा करू सा स सच्चा सा । 24 प्यार होर भलै कोमा बै उकसाणै री तैइयै एकी दूजै री चिन्ता केरा, 25 होर एकी होरी सँधे कठा होणा मता छोडदें, जैण्डा कि केतरै री रीत सा, पर एकी होरी बै समझाँदें रौहा होर जैण्डे-जैण्डे तुसै तेई ध्याडै बै नेड एन्दै हेरलै तैण्डे-तैण्डे होर बी जादा मिलदें जुलदें रौहा । 26 किबैकि सच्चाई री पछियाण केरनै ना बाद अगर आसै जाणि-बुझिया पाप केरदें रौहलै ता पापै री तैइयै तैबै कोई बलिदान नी ओंथी । 27 हाँ एक भयानक सजा होर ओगी रा सेक बाकी सा जुणी कि विरोधी भस्म केरनै । 28 जैबै कि मूसै री धर्मविधि बै नी मनणू आला दूई या त्रा माहू री गवाही पैधे बगैर दया रै मारिया सा, 29 ता सोचा कि जुणियै परमेश्वरा रा बेटा जोंघा हेटै रौंदू होर जुणी वायदै रै लोहू रै द्वारा स पवित्र ठहराऊ ती स अपवित्र जाणू होर अनुग्रह री आत्मा रा अपमान करू तेइबै केतरी भयानक सजा मिलणी । 30 किबैकि आसै तेइबै जाणा सी जुणियै बोलू, बदला लेणा मेरा कोम सा, मूँ बदला लेणा होर तैबै ऐ कि प्रभु आपणै लोका रा न्याय केरना । 31 जिन्दै परमेश्वरै रै हौथा ना पौडना केतरी भयानक गल सा । 32 पर तिन्हा पैहिलै ध्याडै बै याद केरा, जुणी ध्याडै ना तुसै प्रभु री सच्चाई जाणिया दुःखै रै बड़ै झमेलै ना स्थिर रौहै । 33 किछ ता तुसै निन्दा होर क्लेश सौहदै-सौहदै तमाशा बणै होर किछ तुसै तिन्हरै साँझी हुए जुणी री दुर्दशा करिया ती । 34 किबैकि तुसै कैदी रै दुःखा ना दुःखी हुए होर आपणी संपत्ति ऐ जाणिया खुशी सँधे लुटणै धिनी कि तुसा हागै होर बी उतम होर हमेशा ठहरनू आली संपत्ति सा । 35 ऐबै आपणा हाँसला मता छोडदें किबैकि तेथा रा इनाम बड़ा सा । 36 किबैकि तुसरा धीरज रखणा जरूरी सा ताकि परमेश्वरै री इच्छा पूरी करिया तुसै वायदै तेई फौला बै प्राप्त करलै । 37 किबैकि बौगत थोडा रौहू सा जैबै कि एणू आलै एणा होर तेई देरी नी केरनी । 38 होर मेरै धर्मो माहू विश्वासा सँधे जिन्दै रौहणा होर अगर स पिछै हटला ता मेरा मन तेई ना खुश नी होणा । 39 पर आसै हटणू आलै नी ओंथी कि नाश होलै, बल्कि विश्वास केरनू आलै सी कि प्राणा बै बचालै ।

### विश्वाससा रै उदाहरण

11 विश्वास आशा करुइदी चीजा रा होर मन देखी चीजा रा सबूत सा । 2 किबैकि एथै रै बारै ना प्राचीनै री शोभली गवाही धिनी । 3 विश्वास करिया आसै जाणा सी कि सारी सृष्टि री रचना परमेश्वरै रै वचनै रै द्वारा हुई सा । ऐण्डा नी ओंथी कि जेकिछ हेरनै ना एजा सा स हेरुइदी चीजा ना बणू दा होला । 4 विश्वासा सँधे हाबिलै परमेश्वरै री तैइयै आपणै भाई कैना ना उतम बलिदान चढ़ाऊ होर तेथै री वजहा ना तेइरै धर्मो होणै री गवाही बी धिनुई । किबैकि परमेश्वरै तेइरै बलिदानै रै बारै ना गवाही धिनी होर तेइरै द्वारा स मौरनै पैधे हाजी बी गैला केरा सा । 5 विश्वासा सँधे हनोक स्वर्गा बै चैकूआ कि स मोऊती बै नी हेरला, होर तेइरा पैता नी चैलू किबैकि परमेश्वरै स चैकू ती होर तेइरै चैकिणै ना पैहिलै तेइरी गवाही धिनुई कि तेइयै परमेश्वर खुश करू सा, 6 होर विश्वासा बगैर परमेश्वरा बै खुश केरना अनहोना सा किबैकि परमेश्वरा हागै एणू आलै बै ऐ विश्वास केरना जरूरी सा कि परमेश्वर सा होर आपणै तोपणू आलै बै इनाम देआ सा । 7 विश्वासा सँधे नूहै तिन्हा गैलै रै बारै ना जो तेई बौगतै हेरिदी नी ती ओंथी चितौनी पाइया भक्ति सँधे आपणै घरानै रै बचावै री तैइयै जहाज बणाऊ होर तेथै रै दशवारा तेइयै संसार दोषी ठहराऊ होर तेई धर्मा रा वारिस ठहरू जो विश्वास केरनै सँधे होआ सा । 8 विश्वासा सँधे इब्राहीम जैबै शाधुआ ता परमेश्वरै री आज्ञा मैनिया ऐण्डी जैगा बै निकता जो परमेश्वर तेईबै देणू आला ती होर ऐ नी ती जाणदा ती कि हाँऊ

कोखें बै चोलू सा तैबै बी निकता । 9 विश्वासा सेंधे तेइये वायदै केरुएदै पराए देशा ना रौहिया इसहाक होर याकूबा समेत जो तेई सेंधे तेई वायदै रै वारिस ती तोम्बू ना रौहै । 10 किबैकि स पैकी मनियादी आलै तेई नगरै री गैला केरदा रौहा ती जौसरा बणाणू आला परमेश्वर सा । 11 विश्वासा सेंधे सारा ना री बेटडिये बूढ़ी होइया बी परमेश्वरा ना गर्भ धारण केरनै री शक्ति पाई किबैकि तेसै वायदै केरनू आला परमेश्वर सञ्जा ज्ञाणू ती । 12 ऐसा वजहा ना एकी माळू ना जो मूँएदै साही ती, आसमानै रै तारै होर समुद्रै रै बालू साही अनगिनत वँश पैदा हुऐ । 13 ऐ सारै विश्वासै री दशा ना मूँए होर इन्हा बै वायदै री चीजा नी मिली, पर तिन्हा बै दूरा ना हेरिया खुश हुऐ होर मैनु कि आसै पृथ्वी ना परदेशी सी । 14 जो ऐण्डी गैला केरा सी, ते प्रगट केरा सी कि ते स्वदेशै री खोजा ना सी, 15 होर जुणी देशा ना ते निकलिया आए ती अगर तेथै री याद केरदै ता तिन्हा हागै वापस ज्ञाणै रा मौका ती । 16 पर ते उतम स्वर्गीय देशै रै अभिलाषी सी । एसा वजहा ना परमेश्वर तिन्हरै परमेश्वर कहलाणे ना नी शर्मिदा । परमेवरै तिन्हरै तैइयै एक नगर तयार केरु सा । 17 विश्वासा सेंधे इब्राहीमै परीक्षै रै बौगतै इसहाकै रा बलिदान चढ़ारु, जुणियै कि वायदै सच मैने ती । 18 होर जुणि बै कि ऐ बोलू ती कि इसहाका ना तेरा वँश कहलाइणा, स आपणै इकलौतै बै चढ़ाँदा लागा । 19 किबैकि तेइयै वचार केरु कि परमेश्वर सामर्थी सा कि तेई ऐ मूँएदै ना जिन्दा केरना होर तिन्हा ना उदाहरणै री रीति पेंधे स तेइबै भी मिलू । 20 विश्वासा सेंधे इसहाकै याकूब होर एसावा बै एणू आली गैलै रै बारै ना आशीष धिनी । 21 विश्वासा सेंधे याकूबै मोरदी घेरै युसुफै रै दुही बेटै बै आशीष धिनी होर आपणै शोठै रा सहारा लेइया परमेश्वरा बै दण्डवत केरु । 22 विश्वासा सेंधे युसुफै जैबै स मौरनू आला ती ता इस्त्राइलै री सन्तान निकलणै री चर्चा केरी होर आपणै हाडकै रै बारै ना आज्ञा धिनी । 23 विश्वासा सेंधे मूसै रै आमा-बापुए स पैदा होणै ना बाद त्रा महीनै तक छुपाइया रैखू किबैकि तिन्है हेरु कि बालक खुबसूरत सा, होर ते राजै रै हुकमा ना नी डारै । 24 विश्वास ही से मूसै स्याणै होइया फिरौनै री बेटी रा बेटा कहलाणे ना नाँह केरु । 25 किबैकि तेइबै पापा ना सुख भोगणे ना परमेश्वरै रै लोका सेंधे दुःख भोगणा शोभला होर उतम लागा । 26 होर मसीह री वजहा ना निन्दित होणा, मिस्रै रै भण्डारा ना बड़ा धन समझू किबैकि तेइरी औँछी फौल पाणै धिरे लागी ती । 27 विश्वासा सेंधे स राजै री झिका ना नी डोरु होर मिस्र देश छोडू, किबैकि स अनदेखै परमेश्वरा बै हेरिया दूढ रौह । 28 विश्वासा सेंधे तेइयै फसह होर लोहू छिडकणै री विधि मैनी कि पैहलौतै रा नाश केरनू आला इस्त्राइलि पेंधे हाय नी पाला । 29 विश्वासा सेंधे तिन्है लाल समुद्र ऐण्डा पार केरु जैण्डा कि ते शुकी धौरती पेंधे चैलै होलै होर जैबै मिस्रै रै लोकै तेई समुद्रा बै पार केरनै री सोची ता ते डूबै । 30 विश्वासा सेंधे जैबै तिन्है यरीहो री शारपनाह रै सौत रोजा तक चकर पूरै केरै ता स ढौई । 31 जैबै राहाब वैशयै विश्वास केरु ता स आज्ञा नी मैनु आलै सेंधे नाश नी हुई किबैकि तेसै भेदियै ठीक ढँगा ना रैखै ती । 32 ऐबै होर की बोलणू? किबैकि बौगत नी रौह कि गिदोना रा, बराका रा, समसूना रा, यिफतह रा, दाऊदा रा होर शमुएला रा होर भविष्यवक्तै रै बारै ना दसदा जानू । 33 इन्है विश्वासा सेंधे राज्य ज़ीतै, धर्म रै कोम केरै, वायदै री चीजा प्राप्त केरी होर शेरै रै मुँह बन्द केरै । 34 ओगी री झोल ठण्डी केरी, तलवारी री धारी ना बचै, लड़ाई ना वीर निकतै होर विदेशी रै फौजी मारिआ भगाए । 35 बेटडिये आपणै मूँएदै दबारा जिन्दै पाए । केतरै ता मार खौँदै-खौँदै मूँए होर छूटणा नी चाहू किबैकि ते उतम पुनरूत्थानै रै भागी होणा चाहा ती । 36 कई रा ठठा उड़ाऊ, कई कोडै लाइआ मारै होर कई बोनुइआ कैदा ना पौडिया परखुऐ । 37 कई पाथरै मारै, कई आरै लाइआ च़ीरै, तलवारिऐ लाइआ मारै । ते कंगाली ना दुःख भोगदै-भोगदै भेड होर बौकरी रै खोलडै लाइया औँरै-पौरै फिरदै रौहै, 38 होर बोणा ना, रूआडा ना, ढौगा ना होर धौरती री दरारा ना भटकै । 39 सँसार तिन्त्रै लायक नी ती औँथी होर विश्वासै रै द्वारा इन्हा सैभी रै बारै ना शोभली गवाही देउई पर तैबै बी तिन्हा बै वायदै री चीजा नी मिली, 40 किबैकि परमेश्वरै आसरी तैइयै पैहिलै ना लेइया एक उतम गल ठहराई कि ते आसरै बगैर सिद्धता बै नी पुजलै ।

### परमेश्वर बापू द्वारा सजा

12 एस कारण जैबै गवाही रै बडे बादलै आसे घेरै सी ता एजा, ताकि आसे हर एक रोकणु आली चीजा बै होर उलझाणु आलै पापा बै दूर केरिआ जो दौड आसा दौडनी तेसा बै बडे धीरजा सेंधे दौडलै, 2 होर विश्वासा सेंधे सिद्ध केरनू आलै यीशु पेंधे ध्यान रैखलै जुणियै तेसा खुशी री तैइयै जो तेई सामनै रैखी ती, शर्मै री किछ चिन्ता नी केरिआ क्रूसा रा दुःख सौहू होर परमेश्वरै री दैहिणी धिरे जाइया बेटा । 3 ऐबै तेई पेंधे ध्यान केरा, जुणियै आपणै विरोधा ना पापी री एतरी वहस सहन केरी ताकि तुसै निराश होइया हॉसला नी छोडलै । 4 तुसै पापा सेंधे एतरै नी लडै कि तुसरा लोहू बहू होला, 5 होर जो उपदेश तुसा बै बेटै साही देइया सा तुसै स बिसरु, कि ओ मेरै बेटैआ, तू प्रभु री ताडना बै हल्की गल मत ज्ञाणदा होर जैबै स तौभै घुडकला ता हॉसला मत छोडदा, 6 किबैकि प्रभु जुणी सेंधे झुरी केरा सा तेइरी ताडना बी केरा सा होर जुणी बै बेटा बणा सा तेइरै कोडै बी ला सा । 7 तुसै दुःखा बै ताडना समझिया सौहा । परमेश्वर तुसा बै बेटै जाणिया तुसा सेंधे बर्ताव केरा सा । स कुण जेही बेटा सा जौसरी ताडना बापू नी केरदा? 8 अगर स ताडना जौसरै सैभै भागी होआ सी, तुसरी नी हुई ता तुसै बेटै नी बल्कि व्यभिचारै री सन्तान ठहरै । 9 फिरी जैबै आसरे शरीरिक बापू बी आसरी ताडना केरा ती, तैबै जिन्दै रहणै री तैइयै आसरी तैइयै ऐ जरूरी नी औँथी कि आसै आपणै आत्मिक बापू रै जादा अधीन रौहलै । 10 ते ता आपणी-आपणी समझै रै मुताबिक थोडे ध्याडै री तैइयै ताडना देआ ती पर ऐ ता आसरे फायदै री तैइयै आसरी ताडना केरा सा कि आसै बी तेइरी पवित्रता रै सहभागी होलै, 11 होर वर्तमान बौगता ना हर ताडना खुशी री नी पर दुःखै री हेरिया सा, तैबै बी जो तेसा ताडना सौँहदै-सौँहदै पैकै हुऐ सी, पिछा ना तिन्हा बै सुःख चैना सेंधे धर्मा रा इनाम मिला सा ।

### उपदेश होर चेताऊनी

12 ऐबै ढीलै हौथा बै होर कमजोर घुटनै बै सीधै केरा, 13 होर आपणी जोंघे री तैइयै सीधी बौता बणात् कि लँगडा भटकू नी लोडी पर भला चंगा होला । 14 सैभी सेंधे मेल-मिलाप रखणै होर तेसा पवित्रता रै खोजी बणा जौसरै बगैर कोई बी प्रभु बै नी हेरी सकदा, 15 होर ध्याना सेंधे हेरदै रौहा, ऐण्डा नी लोडी हुआ कि कोई प्रभु रै अनुग्रहा ना वँचित रौहला, या कोई कडवी जड निकलिया कष्ट देली होर तेसरी वजहा ना बोहू सारै लोका अशुद्ध होलै । 16 ऐण्डा नी लोडी हुआ कि कोई व्यभिचारी होर एसावा साही अधर्मी होला, जुणियै कि एकी बौगतै री रोटी रै बदलै आपणै पैहलौतै होणै रा भाग बेचू । 17 तुसै जाणा ता सी कि बाहदा ना तेइयै आशीष पाणी ता चाही पर स अयोग्य गिणुआ होर रोई-रोइया बी तेइबै मन फिराणै रा मौका नी मिलू । 18 तुसै तेई ढौगा हागै जुणियै छुँगी सका ती होर औगियै लाइया प्याशा ती, काले बादल होर निहारै, बागर-बयानै हागै, 19 होर तुरही री छेडा हागै होर ऐण्डे शब्द बोलणू हागै नी आए, जौसरै शुणनू आलै बिनती केरी कि ऐबै आसा सेंधे होर गैला नी केरिली, 20 किबैकि ते तेसा आज्ञा बै नी सौही सकै कि, अगर कोई पशु बी तेई ढौगा बै छुँगला ता स पाथरै मारना, 21 होर स दर्शन ऐण्डा डराउणा ती कि मूसै बोलू, हॉऊ बोहू डौरा सा होर कोमा सा । 22 पर तुसै सिच्योनै रै ढौगा हागै होर जिन्दै परमेश्वरै रै नगर यरूशलेमा हागै, 23 होर लाखों स्वर्गदूत होर तिन्हा पैहलौतै री सधारण सभा होर कलीसिया जुणी रै नाँ स्वर्गा ना लिखुऐ सी, सैभी रा न्याय केरनू आलै परमेश्वरा हागै, सिद्ध केरुएदै धर्मी री आत्मा, 24 होर नौँऊऐ वायदै रै मध्यस्थ यीशु होर छिडकावै रै लोहू हागै आए सी जो हाबिलै रै लोहू ना उतम गैला केरा सा । 25 सावधान रौहा, तेई बोलणु आलै ना मुँह मता फेरदै किबैकि ते लोका जैबै धौरती पेंधे चिताउणी देणु आलै ना नी बचै ता तुसा स्रगा ना चिताउणी देणु आलै ना मुँह फेरिया किबै बचना? 26 तेई बौगतै ता तेइरै शब्दै धौरती हिलाई, पर ऐबै तेइयै ऐ प्रतिज्ञा केरी सा कि एक बार भी मूँ धौरती केलही नी बल्कि आसमान बी हिलाणा । 27 होर ऐ गैल "एक बार भी" एसा गैला बै प्रगट केरा सा कि जो चीजा हिलाइया सी, ते बणाऊदी होणै री वजहा ना खत्म होणी ताकि जो चीजा हिलाईदी नी ते बची रौहली । 28 एस कारण आसा जो राज्य

अटल सा तेइबे प्राप्त केरया स अनुग्रह होथा ना नी जाणै देणा जौसरी वजहा ना आसै भक्ति होर भय सँघे परमेश्वरै री ऐण्डी अराधना केरी सका सी जुणी ना परमेश्वर खुश होआ सा । 29 किबैकि आसरा परमेश्वर भस्म केरनू आली आँग सा ।

### मसीही जिन्दगी जीणै रा आदेश

**13** भाईचारै रा प्यार बैणी लोडी रौह । 2 पाहुणचारी केरना हेरीत् बिसरदै किबैकि एथै रै द्वारा केतरै लोकै अनजानै स्वर्गदूतै री पाहुणचारी केरी । 3 कैदी री ऐण्डी सुधि लेआ कि, मैना तुसै बी तिन्हा सँघे कैद सी । जुणि सँघे बुरा वर्ताब केरिया सा, तिन्हरी बी ऐण्ढे सकझिया सुधि लेआ कि आसरी बी देह सा । 4 व्याह सँभी ना आदरै री गल समझुई लोडी होर बिछौना निष्कलक लोडी रौह किबैकि परमेश्वरा व्यभिचारी होर, होरी बेटडी पिछे भैगणु आलै रा न्याय केरना । 5 तुसरा स्वभावा ना लालच नी लोडी होर जेकिछ तुसा हागै सा, तुसै तेई ना खुश रौहा, किबैकि परमेश्वरै आपू बोलू सा, मूँ तुसै कदी नी छोड़णनै होर ना त्यागणै । 6 ऐबै आसै बेधड़क होइया बोला सी, प्रभु मेरा सहायक सा, मूँ नी डौरना, माहू मेरा की केरी सका सा? 7 जे तुसरै अगुवै ती होर जुणिये तुसाबै परमेश्वरा रा वचन शुणाऊ, तिन्हा बै याद रेखा होर ध्यान केरिया तिन्हरे चाल-चलना रा अन्त हेरिया तिन्हरे विश्वासै रै अनुसार चला । 8 यीशु मसीह काल, औज होर जुगा-जुगा तक एक सा । 9 कई किस्मै रै होर, ओपरै उपदेशा ना मता भरमाईदै, किबैकि मैने रै अनुग्रह ना पैके रौहणा भला सा, न कि तिन्हा खाणै री चीजा ना, जुणिये लाइया कि औजा तक कौसी बै किछ फायदा नी हुआ । 10 आसरी एक ऐण्डी वेदी सा, जुणी पँधै ना खाणै रा हक तिन्हा लोका बै नी आँधी जो तोम्बू री सेवा केरा सी, 11 किबैकि जुणी पशु रा लोहू महापुजारी पाप बलि री तैइयै पवित्र जैगा बै नेआ सा, तिन्हरी देह छावनी बाहरै फुका सी । 12 एसा

वजहा ना यीशुए बी लोका बै आपणै लोहू सँघे पवित्र केरने री तैइयै यरुशलैमै रै फाटका बाहरै दुःख चेकू । 13 ऐबै एजा, तेइरी निन्दा आपू पँधै लेइया छावनी बाहरै तेई हागबै चलदै । 14 किबैकि आँखै आसरा सदा स्थिर रौहणू आला नगर नी आँधी, बल्कि आसै एक एणू आलै नगरै री खोजा ना सी । 15 एसा वजहा ना तेइरै द्वारा स्तूतिरूपी बलिदान, तिन्हा होंठा फल जो तेइरै नाँ रा अँगीकार केरा सी, परमेश्वरै री तैइयै सदा चढ़ाँदै रौहणा । 16 पर भलाई केरना होर उदारता मता बिसरदै, किबैकि परमेश्वर ऐण्ढे बलिदाना ना खुश होआ सा । 17 आपणै अगुवै री मैना होर तिन्हरे अधीन रौहा, किबैकि ते तिन्हा साही तुसरै प्राणै री तैइयै जागदै रौहा सी, जुणिबै लेखा देणा पौडा सा कि ते एई कोमा बै खुशी सँघे केरलै न कि ठण्डै शाह लेइया, किबैकि एसा दशा ना तुसाबै किछ फायदा नी होणा । 18 आसरी तैइयै प्रार्थना केरदै रौहा, किबैकि आसा बै भरोसा सा कि, आसरी सोच शुद्ध सा होर आसै सँभी गैला ना शोभली चाल चलणा चाह सी, 19 होर ऐण्ढा केरने री तैइयै हाँऊ तुसाबै होर बी समझा सा कि, हाँऊ छेकै तुसा हागै भी एनू । 20 ऐबै शान्ति देणू आला परमेश्वर जो आसरै प्रभु यीशु बै जो भेड़ा रा महान् रखवाला सा, सदै रै वायदै रै लोहू रै गुणा सँघे मूँदे ना जिन्दै केरिया आणू कि, 21 तुसाबै हर एक भली गैला ना सिद्ध केरला, कि तुसै तेइरी इच्छा बै पूरी केरलै होर जेकिछ तेइबै शोभला लागा सा, तेथा बै यीशु मसीह रै द्वारा आसा ना पैदा केरला, जौसरी बड़ाई जुगा-जुगा तक होंदी रौहली । आमीन॥ 22 हे भाइयो, हाँऊ तुसा हागै बिनती केरा सा कि, इन्हा उपदेशै री गैला बै सहन केरा, किबैकि मै तुसाबै बोहू होछे केरिया लिखू सा । 23 तुसै ऐ जाणलै कि तीमुथियुस आसरा भाई छूटू सा होर अगर स छेके एला ता मूँ तेई सँघे तुसा सँघे भेंट केरनी । 24 आपणै सँभी अगुवै होर सँभी पवित्र लोका बै नमस्कार बोला । इतालियै रै लोका बी तुसाबै नमस्कार बोला सी । 25 तुसा सँभी पँधै अनुग्रह होंदा रौहला । आमीन॥

# याकूब

## परिचय

याकूबै री पत्री व्यवहारिक निर्देशा रा एक संग्रह सा, जो सारे संसारा न तितर बितर होईया रौहणु आळै परमेश्वरै लोकै री तैईये लिखू सा। लेखक मसीह होर चाल चलनै री तैईये व्यवहारिक ज्ञान होर निर्देशा बै व्यक्त करने री तैईये कई खास शब्दा रा इस्तेमाल केरा सा। सौ अलग - अलग मसीही नजरिये पैंधे बिचार केरा सा, जैदैं कि अमीरी, गरीबी, परीक्षा, चाल चलन, पक्षपात, चाल चलन, विश्वास होर कर्म, जीभा रा इस्तेमाल, बुद्धिमानी लडाई झगडा, घमंड होर दिनता, होरी पेन्धे दोष लाणा, डींग मारना, धीरज रखणा होर प्रार्थना केरना। ये पत्री मसीयता रा पालन केरने होर बिश्वास सेंधे केरने रै महत्वा पेन्धे जोर देआ सा।

रूप रेखा

- 1 भूमिका 1:1
2. विश्वास होर बुद्धिमान 1:2-8
3. गरीबी होर धन दौलत 1:9-11
4. परख होर प्रलोभन 1:12-18
5. शुणना होर केरना 1:19-27
6. पक्षपातै रै खिलाप चेतावनी 2:1-13
7. बिश्वास होर कर्म 2:14-26
8. मसीह होर तेईरी जीभ 3:1-18
9. मसीह होर संसार 4:5-6
- अलग-अलग निर्देश 5:7-20

## अभिवादन

- 1 परमेश्वरै रै होर प्रभु यीशु मसीह रै दास याकूबै री तरफा न तिन्हा बारा गोत्रा बै जो तितर-बितर होईया रौहा सी, नमस्कार पुजला।

## विश्वास होर बुद्धिमान

2 हे मेरै भाइयो, जैबै तुसै कई किस्मै री परीक्षा न पौडलै, ऊँई बै पूरी खुशी री गैल समझा, 3 ऐ जाणिया कि तुसरै विश्वासै रै जाँचिणै सेंधे धीरज पैदा होआ सा, 4 पर धीरजा बै आपणा कोम केरनै देआ कि तुसै पूरै सिद्ध होलै होर तुसा न कौसी किस्मै री कमी नी रौहली। 5 पर अगर तुसा न कौसी बै बुद्धि री घटी सा ता, परमेश्वरा न मुँगा, जो बगैर उलाहनै रै सेभी बै उदारता न देआ सा होर तेइबै परमेश्वरा देणी। 6 पर विश्वासा सेंधे मुँगलै होर शक नी केरलै, किबैकि शक केरनू आला समुद्रै री लहरी रै समान सा जो बागरी सेंधे बौहा होर उछला सा। 7 ऐण्ढा माहू ऐ नी बुझला कि मुँभे प्रभु न किछ मिलणा। 8 सौ माहू दुचिता सा होर सारी गैला न चँचल सा।

## गरीबी होर अमीरी

9 दीन भाई आपणै बड़े औहदे पैंधे घमण्ड केरला, 10 होर धनवान आपणी नीच दशा पैंधे, किबैकि तेई गाह रै फूला साही जान्दै रौहणा, 11 किबैकि सूरज निकलदै कड़ा धूपा पौडा सा, होर गाह बै शकौआ सा, होर तेथा रा फूल शुका सा, होर तेइरी शोभा जान्दी रौहा सा, तेथा साही धनवाना बी आपणी बौतै चैलदै-चैलदै धूडे न मिलणा।

## परख होर लालच

12 धन्य सा सौ माणूह जो परीक्षा न स्थिर रौहा सा किबैकि तेई खरै निकलिया जिन्दगी रा मुकट पाणा, जौसरी प्रतिज्ञा प्रभुऐ आपणै प्रेम केरनू आलै बै धिनी सा। 13 जैबै कौसिरी परीक्षा होली ता सौ ऐ नी बोलला कि मेरी परीक्षा परमेश्वरा धिरै न होआ सा, किबैकि न ता बुरी गैला सेंधे परमेश्वरै री परीक्षा होंदी, न सौ कौसी री परीक्षा आपू केरदा। 14 बल्कि हर एक माहू आपणी इच्छा न फसिया परीक्षा न पौडा सा 15 तैबै इच्छा गर्भवती होईया पापा बै जन्म देआ सा, होर पाप मोऊती बै पैदा केरा सा। 16 हे मेरे प्रिय भाइयो, धोखा मता खोंदै। 17 किबैकि हर एक वरदान होर हर एक उतम दान परमेश्वरा धिरै न मिला सा, जुणी न ना ता कोई बदलाव होई सकदा होर न अदल-बदलै री वजहा न तेथा पैंधे कोई छाँव पौडदी। 18 तेइयै आपणी इच्छा न आसै सचाई रै वचनै लाइया पैदा केरै ताकि आसै तेइयै बणाइदी चिजा न पैहिलै फ़ौल होलै

## शुणना होर केरना

19 हे मेरे प्रिय भाइयो, एसा गैला बै तुसै जाणा सी। हर एक माहू शुणनै री तैइयै त्यार, बोलणै न धीर होर झिक केरनै न धिमा होला, 20 किबैकि माहू री झिक परमेश्वरै रै धर्मा रा निर्वाह नी केरी सकदी। 21 ऐबै सारी मलीनता होर बढ़दै बैर भावा बै दूर केरिया तेई वचना बै नम्रता सेंधे ग्रहण केरा, जो दिला न बाहुआ सा होर जो तुसरै प्राणा रा उद्धार केरी सका सा 22 पर वचना पैंधे चैलणू आलै बैणा, सिर्फ शुणनू आलै केल्ली नी, जो आपू बै धोखा देआ सी। 23 किबैकि जो कोई वचना बै शुणनू आला होला होर तैथै रै मुताबिक नी चलदा, सौ तेई माहू साही सा, जो आपणा स्वभाविक मुँह शीशै न हेरा सा। 24 सौ आपणै मुँह हेरिया जा सा, होर तुरन्त बिसरा सा कि हाँऊ कैण्ढा ती।

25 पर जो माहू आजादी री सिद्ध व्यवस्था पैंधै ध्यान केरदा रौहा सा, तेई आपणै कोमा न आशीष पाणी किबैकि सौ शुणिया तैण्दाए कोम केरा सा । 26 अगर कोई आपू बै भक्त समझला होर आपणी जिभा बै आपणै वशा न नी रखदा, पर आपणै दिला बै धोखा देआ सा, तेइरी भक्ति बेकार सा । 27 आसरे परमेश्वर बापू रै सामनै शुद्ध होर निर्मल भक्ति ऐ सा, कि अनाथ होर विधवै रै दुःखा न तिन्हरी सुधि लेलै होर आपणै आपू बै संसार न निष्कलक रखलै ।

### भेदभाव रै बरोधा न चेताऊनी

2 हे मेरै भाइयो, आसरे महिमामय प्रभु यीशु मसीह रा विश्वास तुसा न पक्षपाता सेंधै नी लोडी हुआ, 2 किबैकि अगर एक मर्द सुनै रै छल्लै होर शोभलै झिकडै लाइया तुसरी सभा न एला होर एक कँगाल बी मैलै कुचलै झिकडै लाइया एला, 3 होर तुसै तेई शोभलै झिकडै आलै रा मुँह हेरिया बोललै कि, तू तौखै शोभली जैगा न बेश होर तेई कँगाला बै बोललै कि तू औखै खड़ा रोह या मेरी जोंघे री पौटडी हागै बेश । 4 कि तुसै आपू न भेदभाव नी केरु होर बुरै विचारै न्याय केरनु आलै नी ठहरै? 5 हे मेरै प्यारै भाइयो शुणा, कि परमेश्वरै एई संसारै रै कँगाल नी चुनै कि विश्वास न धर्मि होर तेई राज्य रै हकदार होलै, जौसरी प्रतिज्ञा परमेश्वरै तिन्हा सेंधै केरी सा, जो तेई सेंधै प्रेम रखा सी? 6 पर तुसै तेई कँगाला रा अपमान केरु; कि धनी लोका तुसा पैंधै अत्याचार नी केरदै, होर कि ते तुसाबै कचहरी बै घशीटिया नी नेंदै? 7 कि ते तेई उत्तम नॉ री निन्दा नी केरदै, जौसरे तुसै कहलाइया सी? 8 तैबै बी अगर तुसै पवित्र शास्त्रै रै एई वचनै रै मुताबिक कि, तू आपणै पड़ोसी सेंधै आपू साही झुरी रख, सैंचियै तेई राज्य री व्यवस्था बै पूरी केरा सी ता शोभला केरा सी । 9 पर अगर तुसै पक्षपात केरा सी ता पाप केरा सी होर व्यवस्था तुसाबै दोषी ठहरा सा । 10 किबैकि जो कोई सारी व्यवस्था रा पालन केरा सा, पर एकी गैला न भूल केरा सा ता सौ सैंभी गैला न दोषी ठहरु । 11 जुणियै ऐ बोलु कि, तू व्यभिचार हेरी केरदा, तेइयै ऐ बी बोलु कि, तू हत्या हेरी केरदा, पर तै व्यभिचार ता नी केरु पर हत्या केरी ता तैबै बी तू व्यवस्थै रै खिलाफ चैलणू आला ठहरु । 12 तुसै तिन्हा लोका साही वचन बोला होर कोम बी केरा, जुणि रा न्याय आजादी री व्यवस्थै रै मुताबिक होणा । 13 किबैकि जुणियै दया नी केरी, तिन्हरा न्याय बगैर दया रै होणा । दया न्याय पैंधै जयवन्त होआ सा ।

### बशाह होर कोम

14 हे मेरै भाइयो, अगर कोई बोलला कि मुँभै विश्वास सा पर सौ कोम नेई केरदा ता तेथा न की फायदा? कि ऐण्डा विश्वास कदी तेइरा उद्धार केरी सका सा? 15 अगर कोई भाई या बहण नॉ होलै होर तिन्हा बै हर रोज भोजनै री कमी होली, 16 होर तुसा न कोई तिन्हा बै बोलला, ठीक तैरहै जात, तुसै गरम होर तृप्त रौहा, पर जो चीजा देही री तैइयै जरूरी सी तिन्हा तिना बै नी देलै ता की फायदा? 17 तैण्दाए विश्वास बी अगर कोमै रै मुताबिक नी होला, ता आपणै स्वभावा न मुँआ सा । 18 वरन् कोई बोली सका सा, कि तौभै विश्वास सा होर हाँऊ कर्म केरा सा, तू मुँभै आपणा विश्वास कर्मा बगैर रिहा होर मुँ आपणा विश्वास आपणै कर्मै रै द्वारा तौभै रिहाणा । 19 तौभै विश्वास सा कि एकै परमेश्वर सा, तू शोभला केरा सा, दुष्टात्मा बी विश्वास रखा सी होर कोमा सी । 20 पर हे नक्रमे माहूआ कि तू ऐ बी नी जाणदा कि कर्मा बगैर विश्वास बेकार सा? 21 जैबै आसरे बापू इब्राहीमै आपणा बेटा इसहाक वेदी पैंधै चढाऊ ता कि, सौ कर्मै लाइया धर्मि नी ठहरु । 22 तै हेरु कि विश्वासै तेइरै कोमा सेंधै मिलिया प्रभाव नी पाऊ होर कर्मै लाइया विश्वास सिद्ध हुआ, 23 होर पवित्र शास्त्रा रा ऐ वचन पूरा हुआ कि इब्राहीमै परमेश्वरै री प्रतीति केरी होर ऐ तेइरी तैइयै धर्मि गिणुआ 24 एबै तुसै हेरु कि माहू केवल विश्वासै लाइया केल्ली नी, बल्कि कर्मै लाइया बी धर्मि ठहरा सा । 25 तैण्दाए राहाब वेश्या बी जैबै तेसै दूत आपणै घौरा न उतारै होर दुजी बौतै विदा केरै ता कि कर्मै लाइया धर्मि नी ठहरि? 26 जैण्डे देह आत्मा बगैर मुँई सा, तैण्दाए विश्वास बी कर्म बगैर मुँआ सा ।

### जीभा बै वशा न केरना

3 हे मेरै भाइयो, तुसा न बोहू उपदेशक मता बैणा, किबैकि जाणा सी कि, आसै उपदेशक होर बी दोषी ठहरना । 2 किबैकि आसै बोहू बार भूल केरा सी, जुण वचना न नी भूलदा, सौहै ता सिद्ध माहू सा होर सारी देही पैंधै बी काबू पाई सका सा । 3 जैबै आसै आपणै वशा केरनै री तैइयै घोडै रै मुँहा न लगाम ला सी ता आसै तिन्हरी सारी देही बै बी फेरी सका । 4 हेरा, जहाज बी ऐतरै बडै होआ सी होर प्रचंड बागरी न तिन्हा बै चला सी, तैबै बी एक होछी जेही पतवारा सेंधै माँझी री इच्छै रै मुताबिक घुमाइया सी । 5 तैण्दाए जिभ बी एक होछा जेही अँग सा होर बडी-बडी डींग मारा सा, हेरा, थोडी जेही औगियै केतरै बडै बोणा न औग लागा सा । 6 जिभ बी एक औग सा होर आसरे देही न अधर्मा रा एक लोक सा होर सारी देही पैंधै कलक ला सा होर जिन्दगी न औग ला सा होर नरक कुण्डै री औगी न भौकदी रौहा सा । 7 किबैकि हर किस्मै रै बोणकै पशु, पक्षी, रंगणु आलै ज़ीऊ होर पाणी रै ज़ीऊ ता माहू रै वशा न होई सका सी होर हुऐ दै बी सी । 8 पर जिभा बै कोई बी माणूह वशा न नी केरी सकदा । सौ एक ऐण्डी बला सा जो कदी नी रुकदी, सौ प्राणा बै नाश केरनु आलै ज़हरै लाइया भौरुइदी सा । 9 एसाए जिभै लाइया आसै प्रभु होर परमेश्वर बापू री स्तुति केरा सी होर, एसा जिभै लाइया आसै महु बै जो परमेश्वरै रै स्वरूपा न पैदा हुऐ सी श्राप देआ सी । 10 एकी मुँहा न धन्यवाद होर श्राप निकला सी । 11 हे मेरै भाइयो, ऐण्डा नी होणा चाहिए । 12 कि एकी पाणी रै स्त्रोता न मीठा होर खारा पाणी निकला सा? हे मेरै भाइयो, कि अँजीरै रै बूटै न जैतून या दाखै री लूडी न अँजीर लागी सका सी? तैण्दाए खारै पाणी रै सोतै न मीठा पाणी नी निकली सकदा ।

### स्वर्गा रा ज्ञान

13 होर ऊँई न कोई शक नी कि भक्ति रा भेद गम्भीर सा अर्थात् सौ जो शरीरा न प्रगत हुआ, आत्मा न धर्मि ठहरु, स्वर्गदूता न हेरुआ, अन्यजाति न तेइरा प्रचार हुआ, संसार न तेइ पैंधै विश्वास केरुआ होर महिमा ना उझै च़ेकुआ । 14 पर अगर तुसै आपणै-आपणै मना न कडवाहट होर विरोध रैखा सी ता सचाई रै विरोधा ना घमण्ड हेरीत् केरदै होर न झूठ हेरीत् बोलदै । 15 ऐ सौ ज्ञान नी आँथी, जो स्वर्गा न उतरा सा, वरन् संसारिक, शारीरिक होर शैतानी सा । 16 किबैकि जौखै डाह होर विरोध होआ सा, तौखै बखेडा होर हर किस्मै रै बुरै कोम होआ सी । 17 पर जे ज्ञान स्वर्गा न एजा सा सौ पैहिलै ता पवित्र होआ सा, तैबै मिलनसार, कोमल, नम्र, दया, शोभलै फ़ौला न लादुआ दा, पक्षपात होर कपट रहित होआ सा । 18 होर मेलमिलाप करणू आलै री तैइयै धार्मिकता रा फ़ौल मेल-मिलापा सेंधै बाहिया सा ।

### संसार न दोस्ती

4 तुसा न लड़ाई झगडै कौखना आपे? कि तिन्हा सुख विलासा न नेई आपे जो तुसरै अँगा न लड़ा भिड़ा सी? 2 तुसै लालसा रखा सी होर तुसाबै मिलदा नी, तुसै हत्या होर डाह केरा सी होर किछ प्राप्त नी केरी सकदै । तुसै लड़ा झगडा सी होर तुसाबै एथै री तक नी मिलदा कि मुँगदै नी । 3 तुसा मुँगा ता सी पर मिलदा नी, कि बुरी इच्छा सेंधै मुँगा सी, ताकि आपणै भोग विलासा न उडालै । 4 हे व्यभिचार केरनु आली बेटडियो, कि तुसै नी ज़ाणदी, कि संसार सेंधै दोस्ती केरनी परमेश्वरा सेंधै बैर केरना सा? जो कोई संसारा रा मित्र होणा चाहा सा, सौ आपणै आपू बै परमेश्वरा रा बैरी बणा सा । 5 कि तुसै ऐ समझा सी कि, पवित्र शास्त्र बेकार बोला सा? जे आत्मा तेइयै आसा भीतरै बसाई सा, कि सौ आत्मा ऐण्डी लालसा केरा सा जौसरा प्रतिफल डाह सा? 6 सौ ता होर बी अनुग्रह देआ सा, ऊँई वजहा न ऐ लिखू सा कि, परमेश्वर घमण्डी रा विरोध केरा सा, पर दीन लोका पैंधै अनुग्रह केरा सा । 7 परमेश्वरै रै अधीन होआ होर शैताना रा सामना केरा, ता तेई तुसा हागै न भैगणा । 8 परमेश्वरा हागै एजा, ता तेई बी तुसा भेटी एणा । हे पापियो, आपणै हौथ शुद्ध केरा होर हे दुचितै लोको, आपणै दिला बै शुद्ध केरा । 9 दुःखी होआ होर शोग केरा होर रोआ, तुसरा हौसणा शोगा न होर तुसरी

खुशी उदासी न बदलली । 10 प्रभु सामने दीन बैणा, ता तेई तुसे शिरोमणि बणाणै ।

### भाई पेन्धे दोष लाणा

11 हे भाइयो, एकी दुजे री बदनामी मता केरदै । जुण आपणै भाई री बदनामी केरा सा या आपणै भाई पैधे दोष ला सा, सौ व्यवस्थे री बदनामी केरा सा होर व्यवस्था पैधे दोष ला सा, ता तू व्यवस्थे रै मुताबिक चैलणू आला नी ऑथी पर तेथा पैधे हाकिम ठहरू । 12 व्यवस्था देणू आला होर हाकिम एकै सा, जुणिबै बचाणै होर नाश केरनै री सामर्थ सा, तू कुण सा, जो आपणै पड़ोसी पैधे दोष ला सा?

### घमंडा रै बरोधा न चेताऊनी

13 तुसे जो ऐ बोला सी, कि औज या काल आसा होरी नगरा न जाइया एक बौर्ष बिताणा होर व्यपार केरिया फायदा चैकणा, 14 होर ऐ नी ज्ञाणदै कि काल की होणा, शुणा, तुसरी जिनंदगी सा की? तुसे ता मैना तुसे ता भापै रै समान सी, जो थोडी देर हेरिया सा फिरी राहिया सा । 15 एथे रै उल्टै तुसाबै ऐ बोलणा चाहिऐ कि अगर प्रभुऐ चाहू ता आसा जिनंदे रौहणा होर ऐ या सौ कोम बी केरना । 16 पर ऐबै तुसे आपणी डींगा पैधे घमण्ड केरा सी । ऐण्डा सैभै घमण्ड बुरा होआ सा । 17 जो भलाई केरना ज्ञाणा सा, होर नी केरदा, तेइरी तैइयै ऐ पाप सा ।

### अमीर माहणु बे चेताऊनी

5 हे धनवानो शुणा, तुसे आपणै एणू आलै दुःखा पैधे रोआ । 2 तुसरा धन बिगडू होर झिकडै कीडै खाऐ । 3 तुसरै सुनै-चाँदी न काई लागी सा, होर तेसा काई तुसा पैधे गवाही देणी होर औगी साही तुसरा मांस खाणा । तुसे अन्तिम युगा न धन कटा केरू सा । 4 हेरा, जुणि मजदूरै तुसरै छेत काटे, तिन्हरी सौ मजदूरी तुसे धोखे न रेखी सा, चिलाँदी लागी सा, होर काटणू आलै री दुहाई सेनै रै प्रभु रै कोना तक पुजी सा । 5 तुसे धौरती न भोग-विलासा न लागी रौहै होर बड़ा सुख भोगू, तुसे आपणै दिला रा पालण पोषण केरिया एई रोजे री तैइयै मोटा ताजा केरू सा । 6 तुसे धर्मो दोषी ठहराइया मारू, सौ तुसरा सामना नी केरदा ।

### दुःखा सौहणा

7 हे भाइयो, प्रभु रै एणै तक धीरज रेखा, हेरा, किसान धौरती रै बोहू किमती फौलै री आशा रेखिया पैहिली होर अन्तिम बर्षा होणै तक धीरज रेखा सा । 8 तुसे बी धीरज रेखा, होर आपणै दिला बै दृढ केरा, किबैकि प्रभु रा शुभ आगमन नेड सा । 9 हे भाइयो एकी दुजे पैधे दोष मता लौदै ताकि तुसे बी दोषी नी ठहरलै, हेरा हाकिम दुआरा पैधे खड़ा सा । 10 हे भाइयो, जुणि भविष्यवक्तै प्रभु रै नाँ न गैला केरी, तिन्हा बै दुःख चैकणै होर धीरज रेखणै रा एक आदर्श समझा । 11 हेरा, आसै धीरज रेखणु आलै बै धन्य बोला सी, तुसे अय्युबै रै धिरजै रै बारै न ता शुणू सा, होर प्रभु री तरफा न जो तेइरा प्रतिफल हुआ तेइबै बी ज्ञाणा सी, जुणियै कि प्रभु री बडी करुणा होर दया प्रगट होआ सा । 12 पर हे मेरै भाइयो, सैभी न खरी गैल ऐ सा कि, कसमा हेरीतू खाँदै, न स्वर्गे री, न धौरती री, न कौसी होरी चीजै री, पर तुसरी गैला बिलकुल सही होर सैची होली कि तुसे सजे लायक नी ठहरलै ।

### प्रार्थना री शक्ति

13 अगर तुसा न कोई दुःखी होला ता सौ प्रार्थना केरला, अगर खुश होला ता सौ स्तूति रै भजन गाला । 14 अगर कोई तुसा न रोगी होला ता सौ कलीसिये रै प्राचीना बै शाधला होर ते प्रभु रै नाँ न तेई पैधे तेल मौलिया तेइरी तैइयै प्रार्थना केरलै । 15 होर विश्वासै री प्रार्थनै री वजहा न रोगी बचणा होर प्रभु सौ चैकिया खड़ा केरना होर अगर तेइयै पाप बी केरदै होलै ता तिन्हरी बी क्षमा होणी । 16 तुसे आपू न एकी दुजे रै सामने आपणै पापा बै मैना होर एकी दुजे री तैइयै प्रार्थना केरा कि तुसे ठीक होलै । धर्मो माहू री प्रार्थनै लाइया बोहू किछ होई सका सा । 17 एलिय्याह बी ता आसा साही दुःख भोगी माहू ती, होर तेइयै गिडगिडाइया प्रार्थना केरी कि गाश नी एला, होर साढे त्रा बौर्षा तक धौरती पैधे गाश नी आऊ । 18 फिरी तेइयै प्रार्थना केरी ता आसमाना न गाश आऊ होर धौरती फलवन्त हुई । 19 हे मेरे भाइयो अगर तुसा न कोई सचाई री बौता न भटकला होर कोई तेइबै फेरिया आणला ता, 20 सौ ऐ ज्ञाणला कि जो कोई भटकै दै पापी बै फेरिया आणला, सौ एकी प्राणा बै मोऊती न बचा सा होर बोहू पापा पैधे परदा पा सा ।

# 1 पतरस

## परिचय

पतरसै री पैहली पत्री मसीह रै नाँ न लिखी ती, जुणी बै "परमेश्वरारै चुनैदे लोका बोला सी, जुणा एशिया मार्इनरी रै सारे उतरी एशिया न तितर-बितर होईया रौहदे लागे ती । एसा पत्री रा खास उदेश्य पौढनु आळै बै उत्साहित केरना सा, जुणा कि आपणै विश्वासै री बजाह न दुःख होर सताव झेलदे लागे सी । एसा कताबा बै लिखणु आळा यीशु मसीह रै सुसमाचारै री याद दिला सी, किबैकि यीशु री मौऊत, द्वारा जिन्दा होणा होर दबारा एणै रा वायदा तिन्हा बै आश देआ सा । किबैकि तिन्हरा दुःख सोहणा तिन्हरे बिश्वासै री होर सच्चाई री परख सा होर यीशु मसीह रै प्रगट होणै संघे तिन्हा बै एथा रा प्रतिफल मिलणा । लिखणु आळ तिन्हा मसीह लोका बै ऐ संदेश देआ सा कि, ते एन्दी जिन्दगी जीलै, जैदैं मसीह लोका सी ।

## रूप रेखा

भूमिका 1:1-2

परमेश्वरै री उद्धारै री याद दिलाणा 1:3-12

पवित्र जिन्दगी री तेंइये उपदेश 1:13 2:10

दुःखै रै बौगते मसीह लोके री जिम्मेबारी 2:11-4:19

मसीही लोकै री दिनता होर सेवा 5:1-11

उपसंहार 5:12-14

## अभिवादन

1 पतरसै री तरफा न जो यीशु मसीह रा प्रेरित सा, तिन्हा परदेशी रै नाँ न, जो पुन्तुस, गलातिया, कप्पदुकिया, आसिया होर बियुनिया ना तितर-बितर होइया रौहा सी, 2 होर परमेश्वर बापू रै भविष्य रै ज्ञानै रै मुताबिक आत्मै रै पवित्र केरनै रै द्वारा आज्ञा मैनणै होर यीशु मसीह रै लोहू छिडकणै री तेंइये चुनुरे सी, तुसाबै बोहू अनुग्रह होर शान्ति मिलदी रौहली ।

## एक जिन्दी आशा

3 आसै प्रभु यीशु मसीह होर परमेश्वर बापू रा धन्यवाद, जुणियै यीशु मसीह रै मूँएदे न जिन्दै होणै रै द्वारा आपणी बड़ी दया न आसा बै एक जिन्दी आशै री तेंइये नोऊँआ जन्म धिना । 4 अर्थात् एक अविनशी होर निर्मल होर अजर मीरासै री तेंइये 5 जो तुसरी तेंइये स्वर्ग न रैखी सा, जुणि री रक्षा परमेश्वरै री सामर्थियै विश्वासै रै द्वारा तेई उद्धारै री तेंइये जो एणू आलै बौगता न प्रगट होणू आली सा केरिया सा 6 होर एसा वजहा न तुसै मगन होआ सी, जैबैकि आज्ञा तक किछ रोजै री तेंइये कई किस्मै री परीक्षै री वजहा न दुःखा न सी, 7 होर ऐ एथै री तक सा कि तुसरा जाँचुआ दा विश्वास, जो औगी न ताउदै नाश होणू आलै सुनै न जादा कीमती सा, यीशु मसीह रै प्रगट होणै पेंधै प्रशँसा, महिमा होर आदरा रा कारण ठहरला । 8 तेई सेंधै तुसै बगैर हेरै प्रेम रैखा सी होर ऐबै ता तेई पेंधै बगैर हेरै विश्वास केरिया एण्डे खुश होर मगन होआ सी, जो दैसणै न बाहरै सा होर महिमा सेंधै भौरूआदा सा, 9 होर आपणै विश्वासा रा प्रतिफल, अर्थात् आत्मा रा उद्धार प्राप्त केरा सी । 10 एई उद्धारै रै बारै न तिन्हा भविष्यवक्तै बोहू ढूँढ-ढाँढ होर जाँच पड़ताल केरी, जुणियै तेई अनुग्रह रै बारै न जो तुसा पेंधै होणू आला सा, भविष्यवाणी केरी ती । 11 तिन्है एसा गैलै री खोज केरी कि मसीह री आत्मा जो तिन्हा न ती होर पेंहिलै न मसीह रै दुःखै री होर तेथा न बाद होणू आली महिमै री गवाही देआ ती, सौँ कुणि होर केण्डै बौगता धिरै इशारा केरा ती । 12 तिन्हा पेंधै ऐ प्रगट केरुआ कि ते आपणी नी बल्कि तुसरी सेवै री तेंइये गैला केरा ती, जुणि रा समाचार ऐबै तुसाबै तिन्हरे द्वारा मिलू, जुणियै पवित्र आत्मै रै द्वारा जो स्वर्ग न भेजुआ; तुसाबै सुसमाचार शुणाऊ होर इन्हा गैला बै ध्याना सेंधै हेरनै री स्वर्गदूत बी लालसा रखा सी ।

## पवित्र जिन्दगी जीणै री बुलाहट

13 एसा वजहा न आपणी-आपणी बुद्धि री कमर बोनिया होर सचेत रौहिया तेई अनुग्रह री पूरी आशा रैखा, जो यीशु मसीह रै प्रगट होणै रै बौगते तुसाबै मिलणू आला सा । 14 होर आज्ञाकारी बालका साही आपणी अज्ञानतै रै बौगते री पराणी इच्छै रै समान मता बैणदै । 15 पर जैण्डा तुसरा शाधणु आला पवित्र सा, तैण्डै तुसै बी आपणी सारी चाल-चलना न पवित्र बैणा । 16 किबैकि ऐ लिखुआ सा कि, पवित्र बैणा, किबैकि हाँबी पवित्र सा, 17 होर जैबै तक तुसै हे बापू बोलिया तेई हागै प्रार्थना केरा सी, जो बगैर पक्षपातै रै हर एकी रै कोमै रै मुताबिक न्याय केरा सा ता, आपणै परदेशी होणै रा बौगत डौरा सेंधै बिता । 18 किबैकि तुसै ज्ञाणा सी कि नक्कमा चाल-चलण जो दादू-बा नौरै चैलदा आऊ सा, तेथा न तुसरा छुटकारा सुनै चाँदी अर्थात् नाशमान चीजै लाइया नी हुआ । 19 पर निर्दोष होर निष्कलंक मेन्ने अर्थात् मसीह रै कीमती लोहू रै द्वारा हुआ । 20 तेइरा ज्ञान ता संसार बैणनै न पैहिलै न ज्ञाणुआ ती पर ऐबै अन्तिम युगा न तुसरी तेंइये प्रगट हुआ । 21 जो तेइरै द्वारा तेई परमेश्वर पेंधै विश्वास केरा सी, जुणियै सौँ मूँएदे न जिन्दा केरु होर महिमा धिनी कि तुसरा विश्वास होर आशा परमेश्वर पेंधै होली । 22 जैबै कि तुसै भाईचारै रै निष्कपट प्रेमा सेंधै, सच्चाई रै मैनणै सेंधै, आपणै मन पवित्र केरै सी ता, तन मन लाइया एकी दुजै सेंधै बोहू प्रेम रैखा । 23 किबैकि तुसै नाशमान नी, पर अविनाशी बेजै लाइया परमेश्वरै रै जिन्दै होर सदा ठहरनू आलै वचनै रै द्वारा नोऊँआ जन्म पाऊ सा ।

24 किबैकि हर एक प्राणी गाह रै समान सा, होर तेइरी सारी शोभा गाह रै फूला साही सा, गाह शुका सा होर फूल बी शुक्रिया शौद्धा सा ।

25 पर प्रभु रा वचन जुगा-जुगा तक स्थिर रौहा सा, होर ऐ सुसमाचारा रा वचन सा जो तुसाबै शुणाऊ ती ।

## जिन्दा पाथर होर पवित्र प्रजा

2 ऐबै सैभी किस्मा रा बैरभाव, छल-कपट, डाह होर बदनामी बै दूर केरिया, 2 नोऊँए जन्मै दै बैचै साही निर्मल आत्मिक दूधै री लालसा केरा, ताकि तेइरै द्वारा उद्धार पाणै री तेंइये बढदै जालै । 3 अगर तुसै प्रभु री कृपा रा स्वाद चखू सा । 4 तेइ हागै एजिया, जो माळुरे ता नक्कमा ठहराऊ, पर परमेश्वर सामने चुनुआदा होर बोहू कीमती जिन्दा पाथर सा । 5 तुसै बी

आपू जिनंदै पाथरा साही आत्मिक घोर बणदें जा सी, कि याजका रा पवित्र समाज बणिया ऐण्डे आत्मिक बलिदान चढालें, जो मसीह यीशु रें द्वारा परमेश्वरा सामनें ग्रहण योग्य सी । 6 एसा वजहा न पवित्र शास्त्रा न बी आऊ सा कि हेरा, हाँऊ सिय्योना न कुणें रा चुनुआ दा पाथर रखा सा, होर जो तेई पेंधे विश्वास केरला तेई कोसी रीतिये शर्मिन्दा नी होणा । 7 तुसरी तेंइयें जो विश्वास केरा सी, सौ ता बोहु कीमती सा, पर जो विश्वास नी केरदें तिन्हरी तेंइयें जो पाथर राजमिस्त्रियें नक्कमा ठहराऊ ती सौहें कुणें रा पाथर गिणुआ, 8 होर ठेसा लागणें होर ठोकर खाणें री चटान हुआ सा, किबैकि ते ता वचना बै नी मैनिया ठोकर खा सी, होर ऊँई री तेंइय ठहराए बी सी । 9 पर तुसै एक चुनुआ दा वंश होर राज-पदधारी होर याजका रा समाज, पवित्र लोका होर परमेश्वरें री आपणी प्रजा सी, कि जुणियें तुसै निहारें न आपणी नौखीज्योति न शाधें सी, तेइरें गुण प्रगट केरा । 10 तुसै पैहिलें ता किछ बी नी ती आँधी, पर ऐबे परमेश्वरें री प्रजा सी, तुसा पेंधे दया नी ती हुई ती, पर ऐबे दया हुई सा ।

### मसीह लोकें री जिम्मेबारी

11 हे प्रियो, हाँऊ तुसा हागें बिनती केरा सा, कि तुसै आपणें आपा बै परदेशी होर यात्री जाणिया तेई सँसारे री इच्छा न जो आत्मा सेंधें युद्ध केरा सी, बचिया रौहा । 12 अन्यजाति न तुसरा चाल चलन भला होला, एथें री तक कि जुणि-जुणि गैला न ते तुसाबै कुकर्मी जाणिया बदनाम केरा सी, ते तुसरें भले कोम हेरिया तिन्हरी वजहा न कृपा दृष्टि रें रोजा न परमेश्वरें री महिमा केरलें

### परमेश्वरें रें दास

13 प्रभु री तेंइयें माहुरे ठहराए दै हर एकी प्रबन्धें रें अधीन रौहा होर राजें रें बी, किबैकि स सेंभी पेंधे प्रधान सा, 14 होर हाकिमै रें, किबैकि ते कुकर्मी बै सजा देणें होर सुकर्मी री प्रशंसै री तेंइयें तेइरें भेजुए सी, 15 किबैकि परमेश्वरें री ऐ इच्छा सा, कि तुसै भलें कोमै केरिया निर्बुद्धि लोकें री अज्ञानतें री गैला बै बन्द केरलें, 16 होर आपणें आपू बै आजाद जाणा, पर आपणी एसा आजादी बै बुराई री तेंइयें आड मता बणादें, पर आपणें आपू बै परमेश्वरा रा दास समाझिया चैला । 17 सेंभी रा आदर केरा, भाई सेंधें प्रेम रैखा, परमेश्वरा न डौरा, राजें री इज्जत केरा ।

### मसीह आसरा आदर्श सा

18 हे सेवको, हर प्रकारें रें भय सेंधें आपणें स्वामी रें अधीन रौहा, न केवल भलें होर नम्रें रें बल्कि बुरें रें बी, 19 किबैकि अगर कोई परमेश्वरा रा विचार केरिया अन्याय न दुःख चेका सा ता, सौ सुहावना सा । 20 किबैकि अगर तें अपराध केरिया मुकें खाए होर धीरज रैखू ता, तेथा न की प्रशंसै री गैल सा? पर अगर भलें कोम केरिया दुःख चेका सी होर धीरज रैखा सी ता, ऐ परमेश्वरा बै शोभला लागा,सा 21 होर तुसै एथें री तेंइयें शाधुए बी सी, किबैकि मसीहें बी तुसरी तेंइयें दुःख चेकिया तुसाबै एक आदर्श धिना सा, कि तुसै बी तेइरें निशाणा पेंधे चैललें । 22 तेइयें न ता पाप केरू होर न तेइरें मुँहा न धोखें री कोई गैल निकती । 23 सौ गाली शुणिया गाई नी ती देंदा, होर दुःख चेकिया कोई बै बी धमकी नी ती देंदा, पर आपणें आपू बै सेंचें न्यायी रें हौथान न सौपा ती । 24 सौ आपू आसरे पापा बै आपणी देही पेंधे चैकिया कूसा पेंधे चढू, कि आसै पापे री तेंइयें मौरिया धार्मिकतें री तेंइयें जिनंदगी बितालें, तेइरें मार खाणें सेंधे तुसै ठीक हुए । 25 किबैकि तुसै भटकी दी भेडा साही ती, पर ऐबे आपणें प्राणें रें रखवालें होर अध्यक्ष धिरे फिरे सी ।

### लाडा होर लाडी रें बारे न

3 हे पत्नियो, तुसै बी आपणें लाडें रें अधीन रौहा । 2 अगर इन्हा न कोई ऐण्डी होली जो वचना बै नी मैनदें होलें, तैबे बी तुसरी डौरा सेंघली पवित्र चाल चलना बै हेरिया आपणी-आपणी लाडी री चाल चलनै री वजहा न खिंचिलें, 3 होर तुसरा श्रृंगार दिखावटी नी होला, अर्थात् बाल गुँधणा होर सुनै रें गहनै या भाँति-भाँति रें झिकडें लागें, 4 बल्कि तुसरा छुपू दा होर गुप्त

मनुष्यत्व, नम्रता होर मनै री दीनतै री अविनाशी सजावटा न सजिया रौहली, किबैकि परमेश्वरें री नजरी न ऊँई रा बडा मोल सा, 5 होर पैहिलें काला न पवित्र बेटडी बी, जो परमेश्वरा पेंधे आशा रैखा ती, आपणें आपू बै एसा रीतियें सँवारा ती होर आपणें-आपणें लाडें रें अधीन रौहा ती । 6 जैण्डी सारा इब्रहीमै री आज्ञा न रौहा ती होर तेइबै स्वामी बोला ती, तुसै बी अगर भलाई केरली होर कौसी किस्मै री डौरा न नी डौरली ता तुसै बी तेइरी बेटी ठहरनी । 7 तैण्ढाए हे लाडेंओ, तुसै बी समझदारी न आपणी लाडी सेंधें जिनंदगी गुजारा, होर बेटडी बै कमजोर जाणिया तेसरा आदर केरा, ऐ समझिया कि आसै दुहें जिनंदगी रें वरदानें रें वारिस सी, कि तुसरी प्रार्थना नी रूकली ।

### भलाई केरने री बजाह न सताव

8 तुसै सेंभियें एक मन, कृपामय, भाईचारे री प्रीति रैखणु आलें, करुणामय होर नम्र बैणा । 9 बुराई रें बदलें बुराई मता केरदें, होर गाई रें बदलें गाई मता देंदें, बल्कि आशीष दैआ, किबैकि तुसै आशीष रें वारिस होणें री तेंइयें शाधुए सी । 10 किबैकि जो जिनंदगी री आशा रैखा सा, होर शोभलें ध्याडें हेरना चाहा सा, सौ आपणी जिभा बै बुराई न होर आपणें होंटा बै धोखें री गैला केरने ना रोकला । 11 सौ बुराई रा सँघ छौडला होर भलाई केरला, सौ मेलमिलापा बै तोपला होर तेथें री कोशिश न रौहला, 12 किबैकि प्रभु री ओछी धर्म पेंधे लागी दी रौहा सी, होर तेइरें कोन तिन्हरी प्रार्थना धिरे, पर प्रभु बुराई केरनू आलें रें खिलाफ रौहा सा । 13 अगर तुसै भलाई केरने बै त्यार रौहा सी ता, तुसरा बुरा केरनू आला कुण सा? 14 होर अगर तुसै धर्म री वजहा न दुःख चेकलें ता तुसै धन्य सी, पर तिन्हरें डराणें न मता डौरदें । 15 पर मसीह बै प्रभु जाणिया आपणें-आपणें मैना न पवित्र समझा होर जो कोई तुसा न तुसरी आशें रें बारें न पुछला ता जवाब देणें री तेंइयें त्यार रौहा, पर नम्रता सेंधें, 16 होर आपणी सोचा बै शुद्ध रैखा कि जुणि गैला न ते तुसरें मसीह चाल चलना न ते अपमान केरा सी, शर्मिन्दा होलें । 17 किबैकि अगर परमेश्वरें री ऐण्डी इच्छा होली कि तुसै भलाई केरने री वजहा न दुःख चेकलें ता ऐ बुराई केरने री वजहा न दुःख चेकणें न भला सा । 18 किबैकि मसीहें बी अधर्मी री तेंइयें होर धर्मियें पापी री वजहा न एक बार दुःख चैकू ताकि आसा बै परमेश्वरा हागें पजाला । सौ शरीरा न ता घात केरुआ पर आत्मा न जिनंदगा केरुआ । 19 तेथा न तेइयें ज़ाइया कैदी आत्मा बै बी प्रचार केरु । 20 जुणियें तेई बीतें बौगता न आज्ञा नी मैनी, जैबे परमेश्वर नुहें रें रोजा न धीरज रैखिया ठहरी रौह होर सौ जहाज बणदा लागा ती जुणि न बेशिया थोडें लोक अर्थात् ओठ माहू पाणी रें द्वारा बचें । 21 होर तेई पाणी रा दृष्टांत बी अर्थात् बपतिस्मा, यीशु मसीह रें जिनंदै होणें रें द्वारा ऐबे तुसाबै बचा सा । एथा रा मतलब शरीरा रा मैल धोणा नी आँधी, पर शुद्ध विवेका सेंधें परमेश्वरें रें वशा न होणा सा । 22 सौ स्वर्गा न ज़ाइया परमेश्वरें री दैहिणी धिरे बेटा होर स्वर्गदूत, अधिकारी होर सामर्थी तेइरें अधीन केरुए सी ।

### बदली दी जिनंदगी

4 जैबे कि मसीहें शरीरा न होइया दुःख चैकू ता तुसै बी तेसा मनसा बै धारण केरिया हथियार बोना, किबैकि जुणियें शरीरा न दुःख चैकू सौ पापा न छुटू सा । 2 ताकि भविष्य न आपणी शारीरिक जिनंदगी माहू री इच्छें रें मुताबिक नी बल्कि परमेश्वरें री इच्छें रें मुताबिक जीलें । 3 किबैकि अन्यजाति री इच्छें रें मुताबिक कोम केरने सेंधें होर लुचपनै री बुरी इच्छा, मतवालापन, लीलाक्रीडा, पियकडपन होर घृणित मूर्ति पूजा न आसै जो बौगत बिताऊ, सौ बडा भारी सा । 4 एथा न ते हैरान होआ सी कि, तुसै बोहू लचपना ना तिन्हरा सँघ नी देंदें होर तैबे ते बुरा भला बोला सी । 5 पर तिन्हा तेइबे, जो जिनंदै होर मूँएदें रा न्याय केरने री तेंइयें त्यार सा, लेखा देणा 6 किबैकि मूँएदें बै बी सुसमाचार एथें री तक शुणाउआ ती कि, शरीरा न तिन्हरा न्याय माहू रें मुताबिक होला, पर आत्मा न परमेश्वरें रें मुताबिक जिनंदै रौहलें ।

### मसीह रै भले भण्डारी

7 सैभी गैला रा अन्त तुरन्त होणु आला सा, ऐबे सँयमी होइया प्रार्थना केरने री तैइयै सचेत रौहा 8 होर सैभी न खरी गैल ऐ सा कि, एकी दुजै सँघे होर बी जादा प्रेम रेखा, किबैकि प्रेम बोहू सारै पापा बै खोटा सा । 9 कुडकुडाए बगैर एकी दुजै री पाहुणचारी केरा । 10 जुणिबै जे वरदान मिलू सा, सौ तैइबै परमेश्वरै रै अनुग्रह रै भलै भण्डारी साही एकी दुजै री सेवा न लाला । 11 अगर कोई बोलला ता ऐण्डा बोलला कि मैना परमेश्वरै रा वचन सा, अगर कोई सेवा केरला ता तेसा शक्ति सँघे केरला जो परमेश्वर देआ सा कि सैभी गैला न यीशु मसीह रै द्वारा परमेश्वरै री महिमा प्रगट होली । महिमा होर राज्य युग-युग तेही रै सी । आमीन ।

### मसीह रै दुखा न भागी होणा

12 हे प्रियो, जो दुःखे री औग तुसरै परखिणै री तैइयै तुसा न भडकी सा, एथे लाइया ऐ समझिया हेरान मता होंदै कि कोई नोखी गैल तुसा पँधे बीतदी लागी सा । 13 पर जैण्डै-जैण्डै मसीह रै दुःखा न सहभागी होआ सी, खुशी मनात् कि, तेइरी महिमै रै प्रगट होणै रै बोगतै बी तुसै खश होर मगन रोहलै । 14 अगर मसीह रै नाँ री तैइयै तुसरी निन्दा केरिया सा ता धन्य सी, किबैकि महिमै री आत्मा, जो परमेश्वरै री आत्मा सा, तुसा पँधे छाँव केरा सा । 15 तुसा न कोई माहू हत्यारा, चोर, कुकर्मी या पराए कोमा न हौथ पाणै री वजहा न दुःख नी पाला । 16 पर अगर मसीह होणै री वजहा न दुःख पा सा ता शर्मिदा हेरी होंदा, पर एसा गैलै री तैइयै परमेश्वरै री महिमा केरला । 17 किबैकि बौगत आऊ सा कि, पैहिलै परमेश्वरै रै लोका रा न्याय केरिला, होर जैबै न्याय री शुरुआत आसा न होणी ता तिन्हरा की होणा जो परमेश्वरै रै सुसमाचारा बै नी मैनदै? 18 होर अगर धर्मी माहू बडी मुश्किला सँघे उद्धार पाणा ता, भक्तिहीन होर पापी रा की ठिकाणा । 19 ऐबै जो परमेश्वरै री इच्छे रै मुताबिक दुःख चेका सी, ते भलाई केरदै आपणै-आपणै प्राणा बै विश्वासयोग्य सृजनहारै रै हौथा न सौंपलै ।

### प्राचीन होर नौऊजवाना बै संदेश

5 तुसा न जो प्राचीन सी हाँऊ तिन्हा साही प्राचीन होर मसीह रै दुःखा रा गवाह होर प्रगट होणु आली महिमा न सहभागी होइया तिन्हा बै ऐ समझा सा, 2 कि परमेश्वरै रै तैइ छुण्डै री जे तुसरै बिचा न सा रखवाली केरा होर ऐ दवाब न नी बल्कि परमेश्वरै री इच्छे रै मुताबिक खुशी सँघे होर, नीच कमाई री तैइयै नी पर मन लाइया केरा । 3 होर जे लोका तुसाबै सौंपुऐ सी, तिन्हा पँधे अधिकार मता जताँदै, बल्कि छुण्डै री तैइयै आदर्श बैणा । 4 होर जैबै प्रधान रखवाला प्रगट होला ता तुसाबै महिमा रा मुकट मिलणा जो मुरझाणु आला नी आँथी । 5 हे नवयुवको, तुसै बी प्राचीनै रै अधीन रौहा वरन तुसै सैभियै एकी दुजै री सेवै री तैइयै दीन होइया त्यार रौहा, किबैकि परमेश्वर घमण्डी रा सामना केरा सा पर दीन माहू पँधे अनुग्रह केरा सा । 6 परमेश्वरै रै बलवान हौथा हेठै दीनता न रौहा कि सौ तुसाबै ठीक बौगता न बढ़ाला । 7 होर आपणी सारी चिंता परमेश्वरा पँधे छौड़ा किबैकि तेइबै तुसरा ध्यान सा । 8 होशियार रौहा होर जागदै रौहा किबैकि तुसरा विरोधी शैतान प्रिंजणू आलै शेरा साही एसा खोजा न रौहा सा कि कुणी बै मारिया खाला । 9 विश्वासा न दृढ होइया होर ऐ जाणिया तेइरा सामना केरा कि तुसरै भाई जो संसारा न सी, ऐण्डै दुःख भोगदै लागदै सी । 10 परमेश्वरा जो सारै अनुग्रह रा दाता सा, जुणियै तुसै मसीह न अनन्त महिमै री तैइयै शाधे सी, तुसरै थोड़ी देर दुःख चेकणै न बाद आपू तुसै सिद्ध, स्थिर होर बलवन्त केरने । 11 तेही रा राज्य युग-युग रोहला । आमीन॥

### आखरी अविवादन

12 में सिलवानुसै रै हौथे जुणिबै हाँऊ विश्वासी भाई समझा सा, थोड़ै जेही लिखिया तौभै समझाऊ सा होर ऐ गवाही धिनी सा कि परमेश्वरा रा सैचा अनुग्रह ऐ सा कि एथा न स्थिर रौहा । 13 बाबुला न जे तुसा साही चुनुऐ दै लोका सी, ते होर मेरा बेटा मरकुस तुसाबै नमस्कार बोला सी । 14 प्रेमा सँघे एकी दुजै बै नमस्कार केरा । तुसा सैभी बै जो मसीह न होलै शान्ति मिलदी रोहली ।

## 2 पतरस

### परिचय

पतरसै ए दूजी पत्री शुरुआती मसीह लोकै रै एक बड़ै समुदाय रै नाँ न लखी ती । एसा पत्री रा खास विषय झूठी गैला सिखाणू आळै होर तिन्हे बुरी शिक्षा रै बूरे असरै रै खिलाप संघर्ष केरना सा । इन्हा समस्या रा उतर परमेश्वर होर प्रभु यीशु मसीह रै सच्चै ज्ञाना न बैणी रौहणे न मिला सा, सौ ज्ञान जो तिन्हा लोका न मिला सा, जुणिये कि यीशु मसीह आपणी ओछिये हेरु होर तेईरी शिक्षा आपणै कौने शुणी । लेखक खास केरिया तिन्हा लोका रै बारे न चिंता केरा सा, जे ये दावा केरा सी कि मसीही दबारा नेई एणा । लेखक बोला सा कि एण्डा लाग़ा सा लाग़दा कि मसीह रै एणै न देर होंदी लाग़ी सा, पर असल गैल ए सा कि, परमेश्वर नेई चाहन्दा कि कोई नाश होला, बल्कि परमेश्वर एण्डा चाहा सा कि सेभी बै पापा न मन फिराणै रा मोका मिलला ।

### रूप-रेखा

भूमिका 1:1-2

मसीही बुलाहट 1:3-21

झूठी गैला सिखाणू आळै 2:1-22

मसीह रै एणै रै बारै न 3:1-18

### अभिवादन

1 शमोन पतरसै री तरफा न जो मसीह यीशु रा दास होर प्रेरित सा, तिन्हा लोकै रै नाँ न जुणिये आसरे परमेश्वर होर उद्धारकर्ता यीशु मसीह री धार्मिकता न आसा साही कीमती विश्वास प्राप्त केरु सा । 2 परमेश्वर होर आसरे प्रभु यीशु मसीह री पछियाणै रै द्वारा अनुग्रह होर शान्ति बोहू रीतिये तुसा न बढदी ज़ाली,

### ईश्वरीय बुलाहट होर चुनाव

3 किबैकि तेईरी ईश्वरीय सामर्थिये सबकिछ जे ज़िन्दगी होर भक्ति न सम्बन्ध रखा सा, आसा बै तेईरी पछियाणै रै द्वारा धिना सा, जुणिये आसै आपणी महिमा होर शोभलै गुणै रै मुताबिक शाधै सी । 4 जुणिये द्वारा तेइये कीमती होर बोहू बड़ी प्रतिज्ञा धिनी सी, ताकि इन्है रै द्वारा तुसै तेसा सड़ाहटा न छुटिया जो संसारा न बुरी इच्छा सँधै होआ सा, ईश्वरीय स्वभावै रै सहभागी होलै, 5 होर एसा वजहा न तुसै सेभी प्रकारै री कोशिश केरिया आपणै विश्वासा पँधै सद्गुण होर सद्गुणा पँधै समझ, 6 समझा पँधै सँयम, होर सँयमा पँधै धीरज, होर धीरजा पँधै भक्ति, 7 भक्ति पँधै भाईचारे री प्रीति, होर भाईचारे री प्रीति पँधै प्रेम बढाँदै जा । 8 किबैकि अगर ए गैला तुसा न बैणी रौहली होर बढदी ज़ाली ता तुसै प्रभु यीशु बै पछियाणनै न नक्रमे होर निष्फल नी होणै देणै । 9 होर जुणिना ए गैला नी, सौ काणा सा, होर तेइना धुँधला हेरिया सा, होर आपणै पिछलै पापा न शुद्ध होणै बै भूलिया बेठा सा । 10 एसा वजहा न हे भाइयो, आपणै शाधिणै होर चुनिणै बै सिद्ध केरने री तँइये कोशिश केरा, किबैकि अगर एण्डा केरलै ता तुसा कदी ठोकर नी खाणी । 11 बल्कि एसा रीतिये तुसा आसरे प्रभु होर उद्धारकर्ता यीशु मसीह रै अनन्त राज्य न प्रवेश केरना ।

### पतरसा रा आखरी बौगत

12 ऐबे ज़ैबै कि तुसै इन्हा गैला बै ज़ाणा सी, होर तुसाबै सँचै वचन मिलै सी, तिन्हा न बणी रौहा सी, तैबै बी मूँ तुसाबै इन्हा गैलै री याद दिलाँणै री तँइये त्यार रौहणा । 13 होर हाँऊ ए आपणी तँइये सही समझा सा कि ज़ैबै तक हाँऊ एई डेरै न सा, तैबै तक मूँ तुसाबै याद दिलाँदै रौहणा । 14 किबैकि हाँऊ ए ज़ाणा सा कि, मसीह रै वचने रै मुताबिक मेरै डेरै रै ढाईणै रा बौगत छेकै एणू आला सा । 15 ऐबे मूँ एण्डी कोशिश केरनी कि मेरै ज़ाणे न बाद तुसै इन्हा गैला बै हमेशा याद केरी सकलै ।

### मसीह री महिमा रै ओच्छी न हेरे गवाह

16 किबैकि ज़ैबै आसै तुसाबै आपणै प्रभु यीशु मसीह री सामर्था रा होर एणै रा समाचार धिना ती ता, गढ़ी दी कहाणी पँधै विश्वास नी केरु, बल्कि आसै आपू तेइरा प्रताप हेरु ती, 17 कि तेइये परमेश्वर बापू न तेई बौगतै आदर होर महिमा पाई, ज़ैबै प्रतापमय महिमा न ए आकाशवाणी हुई कि, ए मेरा प्रिय बेटा सा जुणि न हाँऊ खुश सा, 18 होर ज़ैबै आसै तेई सँधै पवित्र दौगा पँधै खडै ती ता, स्वर्गा न ए वाणी एन्दी शुणी, 19 होर आसा हागै जो भविष्यवक्ता रा वचन सा, सौ एसा घटना न मजबूत ठहरु सा होर तुसै ए शोभला केरा सी कि जो ए समझिया तेई पँधै ध्यान केरा सी कि सौ एक दीया सा जो निहारी ज़ैगा न तेई बौगता तक प्याशा केरा सा, ज़ैबै तक कि दोत नी होली होर दोतका तारा तुसरै दिला न नी चमकला । 20 पर पैहिलै ए ज़ाणि लेआ कि पवित्र शास्त्रै री कोई बी भविष्यवाणी कौसी री आपणी विचारधारे रै मुताबिक पूरी नी होंदी, 21 किबैकि कोई बी भविष्यवाणी माहू री इच्छा न कदी नी हुई, पर भक्तजन पवित्र आत्मा न होइया परमेश्वरा धिरै ना बोला ती

### झूठे शिक्षक

2 ज़ैण्डे तिन्हा लोका न झूठे भविष्यवक्ता ती, तैण्डारे तुसा न बी झूठे उपदेशक होणै, जुणि नाश केरनु आलै पाखण्डा रा छुपिया छुपिया उद्घाटण केरना होर तेई स्वामी रा, जुणिये ते मोल लेऐ सी नाँह केरना होर आपणै आपा बै ते विनाशा न पा सी । 2 होर बोहू सारै तिन्हा साही लुचपन केरना, जुणि री वजहा न सचाई री निन्दा केरनी, 3 होर तिन्हा लोभै री गैला केरिया तुसै आपणै फायदै रै कारण बणाणै, होर जुणि सज़ा रा आदेश तिन्हा पँधै पैहिलै न हुआ सा, तेसरे एणै न किछ बी देर नी आँथी होर तिन्हरा विनाश ऊँघदा नी, 4 किबैकि ज़ैबै परमेश्वरै ते पाप केरनु आलै स्वर्गदूत नी छौडै होर नरक कुण्डा न पाऐ ताकि न्याय रै रोज़ा तक बन्दी रौहलै, 5 होर पैहिलै ज़ुगा रा संसार बी नी छौडू, बल्कि भक्तिहीन संसारा पँधै महा जलप्रलय भेजिया धर्मै रै प्रचारक नूहा समेत औठ माहू बचाऐ, 6 होर सदोम होर अमोरा नगरा बै विनाशा री एण्डी सज़ा धिनी कि ते भस्म केरै, ताकि एणू आलै भक्तिहीन लोकै री शिक्षै री तँइये एक उदाहरण बैणलै, 7 होर अधर्मी लूता बै जो अधर्मी रै चाल चलना न बोहू दुःखी ती छुटकारा धिना । 8 किबैकि सौ तिन्हरै बिचा न रौहदै होर तिन्हरै अधर्मै रै कोमा बै हेरिया होर शुणिया हर रोज आपणै मना बै दुःखी केरा ती, 9 प्रभु आपणै भक्ता बै परीक्षा न कौढणा होर अधर्मी बै न्याय रै रोज़ा तक सज़ै री दशा न रैखणा बी ज़ाणा सा । 10 खास केरिया तिन्हाबै जो शरीरै री अशुद्ध इच्छै रै मुताबिक चैला सी

होर प्रभुता बै तुच्छ जाणा सी, ते ढीठ होर हठी सी होर बड़ै ओहदैं आलै बै बुरा भला बोलणै न नी डौरदैं । 11 तैबै बी स्वर्गदूत जो शक्ति होर सामर्था न तिन्हा न बड़ै सी, प्रभु रै सामनै तिन्हा बै बुरा भला बोलिया दोष नी लाँदैं । 12 पर ए लोका निर्बुद्धि पशु रै समान सी, जो ढौकिणै होर नाश होणै री तैइयै पैदा हुऐ सी होर जुणि गैला बै जाणदैं नी, तिन्हरै बारै न होरी बै बुरा भला बोला सी, तिन्हा आपणी सड़ाहटा न सढ़ना । 13 होरी रा बुरा केरनै रै बदलै तिन्हरा बुरा होणा । तिन्हा बै दिन-ध्याड़ै भोग-विलास केरना शोभला लागा सा, ऐ कलक होर दोष सा, जैबै ते तुसा सेंघे खा-पीआ सी ता आपणी तरफा न प्रेम भोज केरिया भोग-विलास केरा सी । 14 तिन्हरी औछी न व्यभिचार बौसू सा होर ते पाप केरै बगैर रूकी नी सकदैं; ते चंचल मनै रै लोका बै बहका सी, तिन्हरै मना बै लोभ केरनै रा भ्यास हुआ सा, ते शैतानै री सन्तान सी । 15 ते सीधी बौता बै छोड़िया भटके सी होर बओरै रै बेटै बिलामै री बौता न चैला सी, जुणियै कि अधमै री मजदूरी प्रिय जाणी । 16 पर तेइरै अपराधै रै बारै न उलाहना धिनुई, ओखै तक कि अबोल गधियै माहू री बोली न सौ भविष्यवक्ता तेइरै बावलैपना न रोक् । 17 ए लोका अन्धै कुऐ होर ब्यानै लाइया उड़ाऐ दै बादल सी, तिन्हरी तैइयै अनन्त अन्धकार ठहराऊ सा । 18 ते घमण्डै री बेकार गैला केरिया लुचपनै रै कोमै लाइया तिन्हा लोका बै शारीरिक इच्छा न फसा सी जो भटके दै न हाजी निकलदैं लागै सी । 19 ते तिन्हा बै आज्ञाद होणै री प्रतिज्ञा देआ सी, पर आपू सड़ाहटै रै दास सी, किबैकि जो माहू जुणि न हारू सा, सौ तेइरा दास बणू सा, 20 होर जैबै ते प्रभु होर उद्धारकर्ता यीशु मसीह री पछियाणै री वजहा न संसारै री कई किस्मै री अशुद्धता न बचिया निकतै, होर भी तेथा न फसिया हारै ता, तिन्हरी पिछली दशा पैहिली दशा न बी बुरी हुई सा । 21 किबैकि धर्म री बौता बै नी जाणना तिन्हरी तैइयै भला होंदा कि ते तेसा पवित्र आज्ञा न फिरदैं, जो तिन्हा बै सोंपी ती । तिन्हा पैधै ऐ कहावत ठीक बेहा सा, 22 कि कुता आपणी छँइटी धिरा बै होर धोउईदी सूअरनी चिकरा न लेटणै री तैइयै भी जा सा ।

### प्रभु रै एणै रा ध्याड़ा

3 हे प्रियो, ऐबै हाँऊ तुसाबै ऐ दूजी पत्री लिखा सा, होर दुही न याद दिलाइया तुसरै शुद्ध मना बै उभारा सा, 2 कि तुसै तिन्हा गैला बै जो पवित्र भविष्यवक्तै पैहिलै न बोली सी, होर प्रभु होर उद्धारकर्तै री तेसा आज्ञा बै याद केरलै, जो तुसरै प्रेरितै रै द्वारा धिनुई ती, 3 होर ऐ पैहिलै जाणा कि अन्तिम रोजा न हँसी ठठा केरनू आलै एणा, जुणि आपणी इच्छै रै मुताबिक

चैलणा, 4 होर बोलणा, तेइरै एणै री प्रतिज्ञा कौखै नौठी? किबैकि जैबै न दादू-बा सुतै सी, सबकिछ तैण्ढाए सा जैण्ढा सृष्टि रै शुरुआता न ती । 5 तिन्है तां जाणि बुझिया ऐ बिसरू कि परमेश्वरै रै वचनै रै द्वारा आसमान पैहिलैकाला नौरु वर्तमान सा, होर धौरती बी पाणी न बैणी होर पाणी न स्थिर सा । 6 इन्हा वचनै रै द्वारा तेई जुगा रा संसार पाणी न डुबिया नाश हुआ । 7 पर वर्तमान काला रा आसमान होर धौरती तेही वचनै रै द्वारा रैखुए सी कि, ते फुकिलै होर ते भक्तिहीन माहू रै न्याय होर नाश होणै रै रोजा तक ऐण्डै रैखिणै । 8 हे प्रियो, ऐ एक गैल तुसा न छिपी नी रौहली कि, प्रभु रै ओखै एक रोज हज़ार बौष रै बराबर सा होर हज़ार बौष एक रोजै रै बराबर सा । 9 प्रभु आपणी प्रतिज्ञै रै बारै न देर नी केरदा, जैण्ढा देर कई लोका समझा सी, पर तुसरै बारै न धीरज रखा सा, होर नी चाँहदा कि कोई नाश होला, बल्कि सैभी बै मन फेरनै रा मौका मिलला, 10 पर प्रभु रा रोज चोरा साही एणा, तेई ध्याड़ै न आसमान बड़ी हड़हड़ाहटै शब्दा सेंघे ज़ान्दे रौहणा होर सारी धातु तौतै होइया पिघलणी, होर धौरती होर तेथा पैधलै कोम फुकिणै । 11 जैबै ए च़ीजा एसा रीतियै पिघलणू आली सी ता, तुसाबै पवित्र चाल-चलण होर भक्ति ना केण्डै माहू होणा चाहिऐ, 12 होर परमेश्वरै रै तेई ध्याड़ै री गैला केरदैं रौहणा चाहिऐ होर तेइरै छेकै एणै री तैइयै 13 पर तेइरी प्रतिज्ञै रै मुताबिक आसा एक नोऊँऐ आसमान होर नोऊँई धौरती री आशा हेरा सी, जुणि न धार्मिकता रौहणी ।

### जागदैं होर प्रार्थना केरदैं रौहा

14 हे प्रियो, जैबै तक तुसै इन्हा गैलै री आशा रैखा सी ता, कोशिश केरा कि तुसै शान्ति न तेई सामनै निष्कलक होर निर्दोष ठहरलै । 15 होर आसरै प्रभु रै धीरजा बै उद्धार समझा, जैण्ढा आसरै भाई पौलुसै बी तेई ज्ञानै रै मुताबिक जो तेइबै मिलू ती, तुसाबै लिखू सा । 16 तैण्ढाए तेइयै आपणी सैभी पत्री न बी इन्हा गैलै री चर्चा केरी सा, जुणिना केतरी गैला ऐण्डि सी जुणि बै समझणा मुश्किल सा होर अनपढ़ होर चंचल लोका तिन्हरै अर्था बै पवित्र शास्त्रै री होरी गैला साही बढाई-चढाइया आपणै नाशा रा कारण बणा सी । 17 ऐबै हे भाइयो, पैहिलै न इन्हा गैला बै जाणिया होशियार रौहात, ताकि अधर्मै रै भ्रमा न फसिया आपणी स्थिरता बै आपणै हौथै खोलै नी । 18 पर आसरै प्रभु होर उद्धारकर्ता यीशु मसीह रै अनुग्रह होर पछियाणा न बढदैं जा । तेही री महिमा ऐबै होली होर जुगा-जुगा तक होंदी रौहली । आमीन॥

# 1 यूहन्ना

## परिचय

यूहन्ना री पैहली चिट्ठी रै दुई खास उदेश्य सी: (1 ) आपणै चले बै परमेश्वर होर तेईरै बेटे यीशु मसीह, संघे जिन्दगी बिताणै री तेंईये उत्साहित केरना, होर (2) तिन्हा बै झूठी शिक्षा रा पालन केरने, जुणी न ये सहभागीता बर्बाद होणी एथा रै बिरोध चेताऊणी देणी । एसा झूठी शिक्षा रै बिचारा पेन्धे आधारित ती कि बुराई ओजकाल के जमाने न एणै नतीजा सा, होर तैबै यीशु, परमेश्वरा रा बेटा, बास्तव न एक माहणु रा बेटा नेई होई सकदा । इन्हा चले रा मतलब ती कि मुक्ति पाणै री तेंईये एक माहणु बै एसा संसारा रै जीवना न जुडीदी गैल्ला न मुक्त होणा होला; हो ये भी सिखा ती कि नैतिकता होर आपणै भाई संघे प्यार रखणै जैदी गैल्ला न कोई रिश्ता नेई अथी ।

एसा शिक्षा रै बारे न लिखणुआळा स्पष्ट बोला सा कि यीशु मसीह वास्तव न एक माँहणु ती होर सौ एसा गैल्ला पेन्धे जोर देआ सा कि ते जुण यीशु मसीह पेन्धे बशाह केरा सी होर परमेश्वरा संघे प्यार केरा सी, सचिये आपू न एकी दूजै संघे प्यार रखा ।

## रूप-रेखा

भूमिका 1:1-4

पियाशा होर निहारा 1:5\_2:29

परमेश्वरा री सन्तान होर शैताना री सन्तान 3:1-24

सच होर झूठ 4:1-6

प्यारा रा फर्ज 4:7-21

जीता रा बशाह 5:1-21

## जीवन रा वचन

1 तेसा जिन्दगी रे वचना रे बारे न जो शुरुआता न ती, जो आसे शुणु, होर जुण आसे आपणी औछी संघे हेरु, मतलब जो आसे ध्याना संघे हेरु; होर हौथा संघे छुनु- 2 ये जिन्दगी प्रगट हुई, होर आसे सौ हेरु, होर आसे तेइरी गवाई देआ सी, होर तुसा बे तेसा हमेशा री जिन्दगी रा सुसमाचार देआ सी, जो बापू संघे ती, होर आसा पेन्धे प्रगट हुआ । 3 जो किच्छ आसे हेरु होर शुणु सा तेथा रा तूसा बै बी देआ सी, ऊई री तेंईये कि तूसै भी आसे रै संघी सी; होर आसरा मेल -मिलाप बापू संघे, होर तेईरै बेटे यीशु मसीह संघे सा । 4 होर ये गैल्ला आसे एथा री तेंईये लिखी सा, कि आसरी खुशी पूरी होली ।

## पियाशे न चलणा

5 जो समाचार आसे तेई न शुणु होर तूसा बै शणा सी, सौ ऐ सा; कि परमेश्वर प्यशा सा होर तेईन किच्छ भी न्याहरा नि आथि । 6 अगर असै बोललै, कि तेई संघे आसरा मेलमिलाप सा, होर फिरि न्याहरै न चललै, ता तैबै आसे झूठे सी; होर सच्चाई पेन्धे नेई चलदे; 7 पर अगर जेँडा सौ प्याशै न सा, तेंडेये आसे भी प्याशे न चललै, ता आसे एकी दूजै न मेलमिलाप रखा सी; होर तेईरै बेटे यीशु रा खून आसा रै सेभ पापा बै शुद्ध केरा सी । 8 अगर आसै बोललै, कि आसे किछ भी पाप नेऊ केरु ता आसै आपणै आपा बै धोखा देआ सी; होर आसा न सच्चाई नि आथि 9 अगर आसै आपणै पापा बै मनलै ता सौ आसरै पापा बै माफ केरने, होर आसरी सेभ बुराई बै शुद्ध केरने बै बिश्वासयोग्य होर अधर्मी सा 10 अगर बोललै कि आसै पाप नि केरु ता तेईबै झूठा ठहरा सी, होर तेईरा वचन आसा न नेई आथि ।

## मसीह आसरी मजत केरनु आळा

2 हे मेरै शोहरुओ, हाँऊ इन्हा गेला बै तुसरी तेंईये एथै री तक लागा सा लिखदा कि तुसै पाप नी केरलै होर अगर कोई पाप केरलै ता परमेश्वरा हागै एक सहायक सा, “धार्मिक यीशु मसीह।” 2 होर सौहै आसरै पापा रा प्रायश्चित सा केवल आसरै केल्ही नी बल्कि सारी दुनियै रै लोकै रै पापा रा बी। 3 आसै तेइरी आज्ञा बै मैनलै ता एथा ना आसा जाणना कि आसै यीशु बै

जाणा सी। 4 जो कोई ऐ बोला सा कि हाँऊ तेइबै जाणा सा होर तेइरी आज्ञा बै नी मैनला सौ झूठा सा होर तेइना सच्चाई नी आँथी। 5 पर जो तेइरै वचना पेंधे चलला, तेई पेंधे परमेश्वरा रा प्रेम सचमुच सिद्ध हुआ सा एथा न ऐ पता चैला सा कि आसै तेई ना सी 6 अगर कोई बोला सा कि हाँऊ तेइना बणी रौहा सा ता तेइरी तेंईये ऐ जरूरी सा कि आपू बी तैण्डाए चलला जैण्डा यीशु चैला ती।

## नंऊई आज्ञा

7 हे प्रियो, हाँऊ तुसाबै कोई नोऊँई आज्ञा नी लिखदा, पर पराणी आज्ञा जो तुसाबै शुरु ना मिली सा; ऐ पराणी आज्ञा सौ वचन सा, जो तुसै शुणु सा। 8 तैबै बी हाँऊ तुसाबै नोऊँई आज्ञा लिखा सा होर ऐ तुसा न होर बी सच्ची ठहरा सा किबैकि निहारा मिटदा जा सा होर सच्चाई रा प्याशा चमकदा लागा सा। 9 जुण ऐण्डा बोला सा कि हाँऊ प्याशै ना सा होर आपणै भाई संघे बैर रखा सा, सौ हाज्जी तक निहारै ना सा। 10 जुण आपणै भाई संघे झुरी रखा सा सौ प्याशै ना सा होर ठोकर नी खाई सकदा। 11 पर, जुण आपणै भाई संघे बैर रखा सा, सौ निहारै ना सा होर निहारै न चला सा होर ऐ नी जाँणदा कि कौखै चोलू सा, किबैकि निहारै तेइरी औछी काणी केरी सी। 12 हे शोहरुओ, हाँऊ तुसाबै एथै री तक लिखा सा कि तेइरै नाँ ना तुसरै पाप माफ हुऐ। 13 हे बजुर्गो, हाँऊ तुसाबै एथै री तक लिखा सा कि जो शुरु ना लेइया सा तुसैई तेइबै जाणा सी, हे जवानो हाँऊ तुसाबै एथै री तक लिखा सा कि तुसै तेई दुष्टा पेंधे जय पाई सा, हे शोहरुओ, मैं तुसा बै एथै री तक लिखू सा कि तुसै परमेश्वर पिता बै जाणा सी 14 हे बजुर्गो, मैं तुसाबै एथै री तक लिखू सा कि जो शुरु न सा तुसै सौ जाणू सा, हे जवानो, मैं तुसरी तेंईये एथै री तक लिखू कि तुसै मजबूत होलै होर परमेश्वरा रा वचन तुसा न बणी रौहला होर तुसै तेई दुष्टा पेंधे जय पाई सा।

## दुनिया न झूरी नेई केरनी

15. तूसै ना ता दुनिया न होर ना ही दुनिया री चीज ना झूरी डाह, अगर कोई दुनिया ना झूरी डाह सा, ता तेई ना बापू रा प्यार नेई आँथि। 16 किबैकि जे किच्छ दुनिया ना सा, मतलब शरीर री अभिलाषा होर ओछी री अभिलाशा होर कमाई रा घमण्ड, सौ बापू री तरफा ना नेई सा पर दुनिया री

तरफा ना सा। 17 दुनिया होर दुनिया री इच्छा सेभ दूए खत्म होणी सा .पर जो परमेश्वर री इच्छा पांघे चला सा सौ हमेशा बणीया रौहणा।

### मसीह बरोधी

18 हे शौहरूओ, ये अंतिम बौक्त सा ; होर तूसै शुणुदा सा कि मसीह रा बरोधी ऐणु आळा सा, तुई रै अनुसार ऐबै भी बौऊ मसीह रै बरोधी खँडे हुएँदे सी ; ऊँई ना आसा बुझणा कि ये अंतिम बौक्त सा। 19 सौ निकते ता आसा मौँझे ना, पर आसा मौँझे नि ती अथि . किबैकि अगर आसा मौँझलै होले, ता आसा संघे रौंहदै ; पर निकते तैबै कि ये जाहिर हो कि सौ सेभ आसा मौँझलै नि ती अथि। 20 पर तूसरा ता तेई पवित्रा संघे अभिषेक हुआ सा, होर तूसै सेभ किछ जाणा सी। 21 मैं तुसा बै तैबै नेई लिखू कि तूसै सचाई बै नेई जाणदै, पर तैबै कि तूसै जाणा सी, होर तैबै कि झूठ, सचा री तरफा ना नेई। 22 झूठा कुण सा ? केवल सौ ऐ जूण यीशु रै मसीह होणै रा नां केरा सा ; होर मसीह रा बरोधी सौ ऐ सा, जो बापू होर शौहरू रा नां (इन्कार) केरा सा। 23 जो कोई शौहरू रा नां केरा सा तेई हागे बापू भी नेई: जो शौहरू बै मना सा, तेई हागे बापू भी सा। 24 जे किछ तूसै शुरू ना शुणुदा सा, तुई पांघे तूसै चलदै रौहा; जे तूसै शुरू ना शुणु सा, अगर सौ तुसा ना बणीया रौहु ता तूसै भी बापू ना बणीया रौहणा। 25 होर जूणीरी तेईरे (प्रभु यीशुऐ ) आसा संघे वायदा केरू सा कि सौ ऐ हमेशा रा जीवन सा 26 यूहन्ना बोला सा मैं तुसा बै ऐ गल्ला तैबै लिखी सा, जो तुसा बै भरमा सी 27 पर तुसा रा सौ अभिषेक जो तेई री तरफा ना केरूदा सा, तुसा ना बणिया रौहा सा ; होर तुसा बै ऊँई रा मतलब नेई कि कोई तूसा बै सिखाए, वरना जँडा सौ अभिषेक जो तेईरी तरफा ना केरूदा सा तुसा बै सेभ गल्ला सिखा सा, होर ऐ सच सा झूठ नही ; होर जँडा प्रभु यीशुऐ सीखऊँदा सा तँडा ऐ तुसा भी तेई ना बणिया रौहा।

### परमेश्वरे री सन्तान

28 तैबै हे शौहरूओ, तेईना बणिया रौहा जैबे सौ जाहिर होला ता आसा बै हौंसला हो, होर आसे तेई रै ऐणे पांघे तेईरे सामणे शर्मिदा ना हो 29 अगर तूसै जाणा सी कि सौ दरमि सा, ता ऐ भी जाणा सी कि जो कोई धर्मा रा कौम केरा सा सौ तेई ना पैदा हुआ सा।

### एकी दूजै री झूरी केरा

3 हेरा, बापूऐ आसा संघे कैन्डी झूरी डाही कि आसे परमेश्वरा रै टैवर कहलाए ; होर आसे सी भी।\*ऐई कारण दुनिया आसा बै नेई जाणदी, किबैकि दुनिया रै लोके भी प्रभु यीशु बै नेई जाणु। 2 . हे प्यारो ऐबै आसे परमेश्वरा रै टैवरिये सी, होर हाजी तक ये जाहिर नेई हुआ कि आसे कि किच्छ होलै !ऐतरा जाणा सी कि जैबै प्रभु यीशु प्रकट होला ता आसे तेई रै बराबर होणा, किबैकि तेईबै तँडाऐ हेरणा जँडा सौ सा। 3 होर जो कोई प्रभु यीशु पांघे ये आशा डाह सा, सौ आपणै आपा बै तँडाऐ पबित्र केरा सा जँडा सौ सा 4 जो कोई पाप केरा सा, सौ कानूना रा बरोध केरा सा ;होर पापा बै कनूना रा बरोध सा

### परमेश्वरा रै सामणे हिम्मत

5 तूसै जाणा सी कि सौ तैबै आऊ कि आसा रै पापा बै खत्म केरे ; होर तेईरे जीवना ना कोई पाप नेई अथि। 6 होर जो कोई प्रभुयीशु ना बणीया रौहा सा, सौ पाप नेई केरदा: जो कोई पाप केरा सा तेइए सौ ना भाळुदा सा होर ना तेईबै जाणा सा 7 शौहरूओ, कोई रै भरमाणे ना मता ऐन्दै । जो धर्मा रै कौम केरा सा, सौ ऐ तेईरे बराबर धर्मी सा 8 जो कोई पापा रै कौम केरा सा शैताना री त्रफा ना सा । परमेश्वरा रा बेटा तैबै आऊ कि शैताना रा कौम नाश केरे

9 जो कोई परमेश्वरा ना पैदा हुआ सा सौ पाप नेई केरदा ; किबैकि तेईरा बेजा तेईन बणीया रौहा सा, होर सौ पाप केरी ही नेई सकदा किबैकि सौ परमेश्वरा ना पैदा हुआ सा 10 ऊँई लाईया ही परमेश्वरा रै टैबर होर शैताना रै टैबर बूझा सी ; जो कोई धर्मा रै कौम नेई केरदा सौ परमेश्वरा संघे, होर ना जुण आपणै भाई संघे झूरी डाह सा 11 किबैकि जो समाचार तूसै शुरू ना शुणु

सा, सौ ये सा कि आसे एकी दूजै संघे झूरी डाहलै ; 12 . होर तूसै केना रै बराबर मता बणदै जो तेई दुष्टा संघे ती, जुणीये आपणै भाई बै मारू ती ।\*होर तेईबै किबै मारू ? तैबै तेईरे कौम बुरै ती, होर तेईरे भाई रै कौम धर्मे रै ती।

13 हे भाईयो, अगर दुनिया तूसै संघे बैर डाहली ता तूसै हैरान मता होंदै।

14 आसै जाणा सी कि आसै मृत्यु ना पार होईया जीवना ना पुजै सी ; किबैकि आसै भाई संघे झूरी डाह सी । जो झूरी नेई डाहदा सौ मृत्यु री दशा ना रौहा सा। 15 जो कोई आपणै भाई संघे-संघे बैर डाह सा, सौ हत्यारा सा; तूसै जाणा सी कि कोई हत्यारे ना हमेशा रा जीवन नेई रौंहदा 16 आसै प्यार तैबै जाणु कि तेईये आसा री तेईरे आपणा प्राण धिन्ना, होर आसा बै भी लोड़ी कि आपणै भाई री तेईये आपणा प्राण दे। 17 पर जो कोई हागे दुनिया रा धन हो सौ आपणै भाई बै गरीब जाणीया, तेई पांघे तरस नेई खान्दा हो, ता तेई हागे परमेश्वरा रा प्यार कँडी तरह बणीया रौहणा 18 हे शौहरूओ, आसै वचन होर जीभा संघे ही नेई, पर कौम होर सचाई रै जरिये भी झूरी डाहलै 19 ऊँई संघे ही आसै जाणलै कि आसै सचाई रै सी ;होर जुणी गल्ला ना आसरा मन आसा बै दोष देला, तेईरे बारे ना तेईरे समणे आपणै- आपणै मना बै तसली देई सकलै, 20 किबैकि परमेश्वर आसा रै मना ना बडा सा, होर सेभ किछ जाणा सा। 21 हे प्यारो, अगर आसा रा मन आसा बै दोष ना दे, ता आसा बै परमेश्वरा रै सामणे हौंसला होआ सा, 22 होर जे किच्छ आसै मुँगा सी, सौ आसा बै तेई ना मिला सा, किबैकि आसै तेई री आज्ञा बै मना सी होर जो तेई बै शोभला लागा सा सौ ऐ केरा सा। 23 परमेश्वरा री आज्ञा ऐ सा कि आसै तेई रै बेटे यीशु मसीह रै ना पांघे बशाह केरलै, होर जँडी तेईरे आसा बै आज्ञा धिन्नी सा तेईरे अनुसार आपू ना झूरी डाहलै। 24 जो तेई री आज्ञा बै मना सा, सौ तेई ना होर तेई तिन्हा ना बणीया रौहणा: होर तेता न, मतलब तेई आत्मा ना जो तेईऐ आसा बै धिन्नी सा, आसै जाणा सी कि सौ आत्मा आसा

### आत्मा बै परेखा

4 हे प्यारो, हर एक आत्मा बै प्यार मता केरदै, वरनाआत्मा बै परेखा कि सौ परमेश्वरा री तरफा ना सा कि नेई ; किबैकि बौऊ झूठे भविष्यवाणी केरणु आळै दुनिया ना निकतै सी। 2 परमेशवरै री आत्मा तूसै एंडी तरह पहचाणी सका सी: जो आत्मा ऐ मना सा कि यीशु मसीह माणहू रा रूप लेयिआ आऊ सा सौ परमेश्वरा री तरफा ना सा, 3 होर जो आत्मा यीशु बै नेई मन्दी, सौ परमेश्वरा री तरफा ना नेई अथी ; होर सौ ऐ ता मसीह वरोधी आत्मा सा, जूणीरै बारे ना शुणुदा सा कि सौ ऐणुआळा सा, होर सौ ऐबै भी दुनिया ना सा। 4 हे शौहरूओ, तूसै परमेश्वरा रै सी, होर तूसै तिन्हा ना जीतू सा ; किबैकि जो तुसा ना सा सौ तेई ना जो ऐई संसारा न बडा सा। 5 तै दुनिया रै सी,ऐई कारण तैआ दुनिया री गल्ला केरा सी, होर दुनिया तिन्हरी शुणा सी। 6 आसै परमेश्वरा रै सी । जो परमेश्वरा बै जाणा सा, सौ आसरी शुणा सा; होर जो परमेश्वरा बै नेई जाणदा सौ आसरी नेई शुणदा । ऐई कारण आसै सचाई री आत्मा होर भरमाणै आळै री आत्मा बै पहचाणी सका सी।

### परमेश्वर प्रेम सा

7 हे प्यारो, आसै आपू न झूरी डाहे ; किबैकि झूरी परमेश्वरा न सा, जो कोई झूरी डाह सा, सौ परमेश्वरा ना पैदा हुआ सा होर परमेश्वरा बै जाणा सा। 8 जो झूरी नेई डाहन्दा सौ परमेश्वरा बै नेई जाणदा, किबैकि परमेश्वर झूरी सा। 9 जो झूरी परमेश्वर आसा संघे डाह सा, सौ ऊँई लाईया ये जाहिर हुआ कि परमेश्वरे आपणा इकलौता बेटा दुनिया ना भेजू कि आसै तेईरे जरिये जीवन पाले 10 झूरी ऊँई ना नेई अथी कि आसै परमेश्वरा संघे झूरी केरी, पर ऊँई ना सा कि तेईरे आसा संघे झूरी डाही होर आसा रै पापे माफी री तेईरे आपणा बेटा भेजू। 11 हे प्यारो, जैबै परमेश्वरे आसा संघे ऐन्डी झूरी डाही कि आसा बै भी आपू ना झूरी डाहणी चाहिए। 12 पर परमेश्वर कैदी कोईरे नेई हेरू ; अगर आसै आपू ना झूरी डाहलै, तान परमेशवर आसा ना बणीया रौहा सा होर तेईरा प्यार आसा ना जाहिर हुआ सा। 13 तैबै आसै जाणा सी कि आसै परमेश्वरा ना बणीया रौहा सी, होर सौ आसा न; किबैकि तेईये आपणी आत्मा मौँझे आसा बै धिन्नी सा। 14 आसै हेरू भी सा कि होर गवाई देते हैं कि बापूऐ शौहरू बै दुनिया रा मुक्तिदाता केरिया भेजू सा। 15 . जो कोई ये मन्ना सा कि

यीशु परमेश्वर रा बेटा सा, परमेश्वर तेई न बणीया रौहा सा, होसार सौ परमेश्वर न। 16 जो झूरी परमेश्वर आसा सेंघें डाह सा, सौ आसैं जाणु सा होर आसा बै तेईरा बशाह सा। परमेश्वर झूरी सा, जो झूरी न बणीया रौहा सा, सौ परमेश्वर न बणीया रौहा सा, होर परमेश्वर तेई न बणीया रौहा सा। 17 ऊँई सेंघे ही झूरी आसा न जाहिर हुई सा कि न्याय रैं रोज आसा बै हौंसला हो; किबैकि जैन्डा सौ सा तैन्डे ही दुनिया न आसैं भी सी। 18 प्यारा न डौर नेई हौन्दा, वरना सच्चा प्यार डौरा बै दूर केरा सा; किबै कि डौरा रा नाता सजा सेंघे होआ सा, 19 होर जो डौरा सा सौ प्यारा न सच्चा नेई बैणु। आसैं तैबै प्यार केरा सी, कि पहलै तेईये आसा सेंघे प्यार केरु। 20 अगर कोई बोले, “ हाँऊ परमेश्वर सेंघे झूरी डाह सा, ” होर आपणै भाई सेंघे दुश्मनी डाह सा सौ झूठा सा; किबैकि जो आपणै भाई सेंघे जुणीये सौ हेरु सा, प्यार नेई केरदा, ता सौ परमेश्वर सेंघे भी जुणीये सौ हेरुदा नेई प्यार नेई डाही सकदा। 21 जुणीना आसा बै ये आज्ञा मिलीदी सा कि जो कोई परमेश्वर सेंघे प्यार डाह सा सौ आपणै भाई सेंघे भी प्यार डाहै।

### दुनिया पेन्धे जीत हासिल केरनी

5 जूणीरा ये बशाह सा कि यीशु ही मसीह सा, जो परमेश्वर न पैदा हुआ सा; होर जो कोई पैदा करणु आळै सेंघे झूरी डाह सा, सौ तेई सेंघे भी झूरी डाह सा जो तेई न पैदा हुआ सा। 2 जैबै आसैं परमेश्वर सेंघे प्यार डाह सी, होर परमेश्वर री आज्ञा मन्ना सी, ता ऊँई न बुझा सी कि आसैं परमेश्वर रैं टैबरा सेंघे झूरी डाह सी। 3 किबैकि परमेश्वर सेंघे झूरी डाहणा ये सा कि आसैं तेईरी आज्ञा बै मनलै; होर तेईरी आज्ञा मुश्किल नेई अथि। 4 किबैकि जे किच्छ परमेश्वर न पैदा हुआ सा, सौ दुनिया पांधे जीत पा सा; होर जो जीत जूणीना दुनिया बै जीत मिला सा आसर बशाह सा। 5 दुनिया न जीत पाणु आळा कुण सा? मतलब सौ जूणीरा ये बशाह सा कि यीशु, परमेश्वर रा बेटा सा।

### यीशु मसीह रैं बारे न गवाही

6 येई सा सौ जो पाणी होर लोहू रे जरिये आऊ ती, मतलब यीशु मसीह: सौ न कि पाणी रे जरिये मतलब पाणी होर लोहू दुये रे जरिये आऊ ती। 7 होर जो गवाही देआ सा, सौ आत्मा सा; किबैकि आत्मा सच्चाई सा।

8 गवाई देणुआळै त्रा सी, आत्मा, पाणी होर लोहू; होर त्राए एकी गला पांधे राजी सी। 9 जैबै आसैं माणहु री गवाई मन्ना सी, ता परमेश्वर री गवाई ता तेई न बडी सा; होर परमेश्वर री गवाही ऐ सा कि तेईए आपणै शौहरु रैं बारे न गवाई धिन्नी सा। 10 जो परमेश्वर रैं शौहरु पांधे बशाह केरा सी सौ आपु न गवाई डाह सा। जूणीये परमेश्वर पांधे बशाह नेई केरु तेईये सौ झूठा ठहराऊ, किबैकि तेईये तेसा गवाई पांधे बशाह नेई केरु जो परमेश्वर आपणै शौहरु रैं बारे न धिन्नी दी सा। 11 होर सौ गवाई ऐ सा कि परमेश्वर आसा बै हमेशा रा जीवन धिन्ना सा, होर ये जीवन तेई रैं शौहरु न सा। 12 जुणी हागे शौहरु सा, तेई हागे जीवन सा, होर जुणी हागे परमेश्वर रा शौहरु नेई अथि, तेई हागे जीवन भी नेई अथि।

### हमेशा री जिन्दगी

13 यूहन्ना बोला सा, मैं तुसा बै, जो परमेश्वर रैं शौहरु रे नाँ पांधे बशाह केरा सी, तैबै लिखा सा कि तूसे बुझा कि हमेशा रा जीवन तूसा रा सा। 14 होर आसैं तेईरैं सामणें आसा बै ये हौंसला होआ सा, सौ ये सा; कि अगर आसैं तेई री इच्छा रैं मुताबिक किच्छ मौंगा सी, सौ आसरी शुणा सा 15 जैबै आसैं बुझा सी कि जे किच्छ आसैं प्रभु यीशु न मुंगा सी सौ आसरी शुणा सा, ता ये भी बुझा सी कि जे किच्छ आसैं तेई न मुंगु, सौ पाऊ सा। 16 अगर कोई आपणै भाई बै एंडा पाप केरदा हेरु जूणी रा फौळ मौऊत नि अथि, ता प्रार्थना केरलै, होर परमेश्वर तेई बै तिन्हा री तेईये, जिन्हें एंडा पाप केरु सा जूणी रा फौळ मौऊत नि अथि, जीवन देला। पाप एंडा भी होआ सा जूणीरा फौळ मौऊत सा; ऊँई रैं बारे न हाँऊ पार्थना केरने री तकर नेई बोलदा। 17 सेभी तरह रा अधर्म ता पाप सा पर एंडा पाप भी सा जूणी रा फौल मौऊत नेई अथि। 18 आसैं जाणा सी कि जो कोई परमेश्वर न पैदा हुआ सा, सौ पाप नेई केरदा; तेई बै प्रभु बचाईया डाह सा, होर दुष्ट तेई बै छुई नेई सकदा। 19 आसैं बूझा सी कि आसैं परमेश्वर री तरफा न सी, होर सारी दुनिया तेई दुष्टा रैं वशा न सा 20 आसैं ये जाणा सी कि परमेश्वर रा शौहरु आऊ सा होर तेईये आसा बै समझ धिन्नी सा कि आसैं तेई सच्चाई बै पहचाणे; होर आसैं तेईन जो सच सा, मतलब तेईरैं बेटे यीशु मसीह न रौहा सी। सच्चा परमेश्वर होर हमेशा रा जीवन ऐ सा। 21 हे शौहरुओ, आपणै आपा बै मूर्ति न बचाईया डाहत।

## 2 यूहन्ना

परचय

यूहनै री दुजी पत्री अगुवै चुनी दी बेटड़ी होर तेसरै बैचै रै नाँ न लिखी ती, जौसरा मतलब सा, एक स्थानीय कलीसिया होर तेसरै सदस्य । एसा पत्री रा संदेश सा, एकी होरी सँघे झुरी रखणा होर झूठ गैला सिखाणू आळै रै खिलाफ चेतावनी ।

रूप-रेखा

भूमिका 1:1-3

झूरी री प्राथमिकता 1:4-6

झूठे धमनयमै रै खिलाफ चेतावनी 1:7-11

उपसंहार 1:12-13

### अभिवादन

1 पराणै बजुर्गा तरफा ना तेसा चुनी हुई बेटड़ी होर तेसा रै शौहरू रै नाँ, जुणी सँघे हाँऊ सची झुरी डाह सा, होर हाँऊ केलाह नेई पर तै सेभे भी झुरी डाह सी जुणा सचाई बै जाणा सी, 2 सौ सचाई जो आसा ना पक्की रौहा सा होर जिदगी भर आसा सँघे हमेशा रौहा सा, 3 पिता परमेश्वर होर पिता रै बेटे यीशु मसीह री तरफा ना अनुग्रह होर दया होर शान्ति, सचाई हमेशा आसा सँघे रौहणी ।

### सचाई होर प्यार

4 हाँऊ बौऊ खुश हुआ कि मैं तेरे किछ शौहरू हेरे जो तेरी आज्ञा पांधे चोला सी, जो आसा रै बापू री तरफा ना मिलीदी ती, सचाई पांधे चलदै हेरू 5 ऐबै हे बेटड़ी हाँऊ तौबे कोई नौऊई आज्ञा नी, पर सौऐ आज्ञा जो शुरु ना आसा आगे ती, लिखा सा होर तुसा सँघे बिनती कर सा कि एकी होरि सँघे झुरी रखा । 6 होर झुरी ऐ सा कि आसे प्रभु यीशु री आज्ञा पांधे चले; ऐ सौ ऐ आज्ञा सा जुण तुसै शुरु ना शुणी सा, होर तुसा बै ऊँई पांधे चलणा भी

जरूरी सा । 7 किबैकि बोहु ऐंडे भरमाणु आळे दुनिया ना पैदा हुएंदे सी, जुण ऐ नेई मंनदै कि यीशु मसीह माणहु रा रूप लेईया आऊ; भरमाणुआळे होर प्रभु यीशु रा वरोध करणु आळै ऐ लोका सी 8 आपणै बारे ना चुस्त रौहा, कि जो मेहनत आसे केरीदी सा सौ हेरित खत्म केरदै, मगर तुई रा पूरा फौळ लोडी मिलु । 9 जो कोई प्रभु यीशु री शिक्षा ना आगे बढ़ा सा होर तुई ना बणीया नेई रौहदा, तेई हागे परमेश्वर नेई, जो कोई प्रभु यीशु री शिक्षा ना मजबूत रौहा सा, तेई हागे बापू भी सा होर बेटा भी । 10 अगर कोई तुसा हागे आए होर प्रभु यीशु मसीह री शिक्षा ना दे, तिन्हा बै ना ता आपणै घौरा ऐणे देणा होर ना नमस्ते केरनी । 11 किबैकि जो कोई ऐंडे लोका बै नमस्ते केरा सा, सौ तिन्हरै बुरै कोमा ना सँघी होआ सा ।

### आखरी अभिवादन

12 यहुन्ने कलीसिया बै बोलु मुम्बै तुसा बै बौऊ गल्ला लिखणी सा, पर कागज होर स्याही न नेई लिखणा चाहन्दा, पर आशा सा कि तुसा हागे ऐनु होर आमणे-समणे बेशिया तुसा सँघे गल्ला दूणनु, जुणी सँघे तुसा रा मन खुश हो । 13 तुसरी चुनीदी बेहणी रै शौहरू तुसा बै नमस्ते केरा सी ।

## 3 यूहन्ना

परिचय

यूहन्ना री त्रीजी चिठ्ठी पुरोहिता री तरफा न मंडली रै अक अगुवे, ग्युसा बै लिखीदी ती | लेखक ग्युसा री तैबै प्रशंसा केरा सा, किबैकि सौ दूजै मसीही री बड़ी मजत केरा सा, संघे दियुत्रिफेस नाँ रा एक माहणु बै सावधान रौहणै री चेताऊणी देआ सा |

रूप रेखा

परिचय 1-4

ग्युसा री तारीफ 5-8

दियुत्रिफेस रा बरोध केरना 9-10

दिमेत्रियुसा री सराऊती केरनी 11-12

अंत 13-15

### अभिवादन

1 मूँ बजुर्गे री तरफा न तेई प्रिय ग्युसै रै नाँ न जुणि सँघे हाँऊ सच्चा प्रेम केरा सा । 2 हे प्रिय, मेरी ऐ प्रार्थना सा कि जैण्डी तू आत्मिक उन्नति केरदा लागे सा, तैण्डी तू हर गैला न उन्नति केरला होर भला चँगा रौहला । 3 किबैकि जैबै सैभी भाइयै एजिया तेरी तेसा सच्चाई रै बारै न गवाही धिनी, जुणि पँधे तू सचिऐ चला सा ता हाँऊ बड़ा खुश हुआ । 4 मुम्भै एथा न बड़ी होर खुशी नी आँथी कि हाँऊ शुणनू कि मेरै शोहरू आलै सच्चाई पँधे चला सी ।

### ग्युसै री प्रशंसा

5 हे प्रिय, जेकिछ तू इन्हा भाई सँघे केरा सा जो परदेशी बी सी, तेइबै विश्वासी साही केरा 6 तिन्है मण्डली सामनै तेरे प्रेमै री गवाही धिनी ती; अगर तू तिन्हा बै तेसा रीतिऐ विदा केरला जौस रीतिऐ परमेश्वरै रै लोकै री तैइयै सही सा, ता शोभला होणा । 7 किबैकी ते तेई नाँ री तैइयै निकता सी होर अन्यजाती ना किछ नी लेंदें । 8 एँडै माहणु रा स्वागत केरु लोड़ी, जुणी सँघे आसै बी सच्चाई रै पक्षा न तिन्हा सँघे होलै ।

### दियुत्रिफेस होर दिमेत्रियुस

9 में मण्डली री तैइयै किछ लिखू ती, पर दियुत्रिफेस जो तिन्हा ना बड़ा बणना चाहा सा, आसा बै ग्रहण नी केरदा । 10 जैबै हाँऊ ऐनू ता मूँ तेइरै कोमै री जो स केरदा लागे सा, सुधि दिलाणी कि, स आसरे बारै न बुरी-बुरी गला बका सा होर एथा न सन्तुष्ट नी होदा होर आपू विश्वासी भाई बै ग्रहण नी केरदा होर जो ग्रहण केरना चाहा सी तिन्हा बै नाँह केरा सा होर मण्डली ना खोला सा । 11 हे प्रिय, बुराई बै नी पर भलाई बै मैना, जुण भलाई केरा सा स परमेश्वरै री तरफा न सा पर जो बुराई केरा सा तेइयै परमेश्वर नी हेरु । 12 देमेत्रियुसै रै बारै ना सँभियै, बल्कि सच्चाइयै बी आपू गवाही धिनी होर आसै बी गवाही देआ सी होर तू ज़ाणा सा कि आसरी गवाही सची सा ।

### अंतिम अभिवादन

13 मूँ तौभे बोहू किछ लिखणा ती, पर स्याही होर कलमा सँघे लिखणा नी चाँहदा । 14 पर मुंभे आशा सा कि तौ सँघे छेकै मिलणू । तैबै आसा आमनै-सामनै गलबात केरनी, 15 तौभे शान्ति मिलदी लोड़ी रौही । औखलै सँघी तौभे नमस्कार केरा सी, होर तौखलै सँघी बै नाँ लेइया नमस्कार बोली ।

# यहूदा

## यहूदा री चिड्डी

### भूमिका

यहूदा री चिड्डी झूठी शिक्षा देणु आळें रें बरोधा न लिखी ती, किबेकि ते विश्वासी होणें रा दावा केरा ती । एसा होळी चिड्डी रा विषय पतरसा री दूजी चिड्डी रें बराबर सा, एथा न लेखक आपणें पौदणु आळें बै उत्साहित केरा सा कि "तेई बशाह री तेईये पूरी कोशिश केरा ।"

रूप -रेखा

भूमिका 1,2

झूठे शिक्षा देणु आळें रा चरित्र, शिक्षा होर अंत 3-16

विश्वासा न बणीया रौहणें री चेताऊणी 17-23

आशीषा रा वचन 24,25

1 यहूदै री तरफा ना जो यीशु मसीह रा दास होर याकूबा रा भाई सा, तिन्हा शाधुऐ दै रें नाँ ना जो परमेशवर बापू ना प्यारें होर यीशु मसीह री तेंइयें सुरक्षित सी, 2 दया होर शान्ति होर प्रेम बहुतायता ना मिलदा लोडी रौह ।

3 हे प्रियो, जैबे हाँऊ तुसाबै तेई उद्धारें रें बारें ना बडी मेहनती सेंघे कोशिश केरदा लागा ती जुणि ना आसै सैभे सहभागी सी, ता में तुसाबै ऐ समझाणा जरूरी जाणु कि तेई विश्वासे री तेंइयें पूरी कोशिश केरा जो पवित्र लोका बै एकै बार साँपू ती । 4 किबेकि केतरें ऐण्टे माहू एजिया आसा ना मिले सी जुणियें लाइया एसा सजै रें बारें ना पराणें बौगता ना पैहिलें लिखुआ ती; ए भक्तिहीन सी होर आसरे परमेश्वरें रें अनुग्रह बै लुपना ना बदला सी होर आसरे अद्वैत स्वामी होर प्रभु यीशु मसीह रा नाह केरा सी । 5 पर अगर तुसै सैभें गैला एकै बार जाणी सी ता तैबे बी हाँऊ तुसाबै याद दिलाणा चाहा सा कि प्रभुऐ एकी कुला बै मिस्र देशा ना छुड़ाणें ना बाद विश्वास नी केरनु आलें नाश करै । 6 फिरी जैबे जुणि स्वर्गदूतें आपणा औहदा स्थिर नी रैखु, तेइयें ते बी भयानक रोजें रें न्यायें री तेंइयें अन्धकारा ना जो सदाकालें री तेंइयें सा बन्धना ना रैखें सी । 7 जुणि रीतियें सदोम होर अमोरा होर तिन्हा और-पौरलें नगर जुणा इन्हा साही व्यभिचारी हुऐ ती, पराए शरीरें रें पिछें लागें ती, अनन्त सजा ना पौडिया दृष्टान्त ठहरें सी । 8 तेसा रीतियें ए सुपनै हेरनु आलें बी आपणें-आपणें शरीरा बै शुद्ध केरा सी होर प्रभुता बै तुच्छ जाणा सी होर बडें औहदें आलें बै बुरा भला बोला सी 9 पर प्रधान स्वर्गदूत मीकाइलें जैबे शैताना सेंघे मूसा भविष्यवक्ते री लाशें रें बारें ना वहस केरी ता तेइबे बुरा भला बोलिया दोष लागें री हिम्मत नी केरी बल्कि ऐ बोलु, प्रभु तौभें डाँटला । 10 पर ए लोका जुणि गैला बै नी जाणदें, तिन्हा बै बुरा भला बोला सी, पर जुणि गैला बै नासमझ पशु साही स्वभावा ना जाणा सी, तथा ना आपणें-आपू बै नाश केरा सी । 11 तिन्हा पेंधें हाया कि ते कैने री चाल चैलें होर मजदूरी री तेंइयें बिलाम राजे साही भ्रष्ट हुऐ सी होर कोरह साही विरोध केरिया नाश हुऐ सी 12 ए तुसरी प्रेम सभा ना तुसा सेंघें खाँदें पिंदें समुद्रा ना छुपी दी चटाना

साही सी होर बेधड़क आपणा पेट भौरनु आलें रखवालें सी, ते बगैर पाणी रें बादल सी जुणिवै बागर उड़ाइया नेआ सा, पतझड़ा साही बगैर फ़ौलें रें बुटें सी जो कि दूई बार मूँऐ दै सी होर जलाडें ना उखडें सी । 13 ए समुद्रें री प्रचंड हिलकोरा सी जो आपणी शर्मा रा शेफ उछाला सी, ए डाँवाडोल तारें सी जुणि री तेंइयें दाकाल तक घोर निहारा रैखू सा । 14 होर हनोकें बी जो आदमें री सौतुई पीढी ना ती, इन्हरें बारें ना ऐ भविष्यवाणी केरी कि हेरा, प्रभु आपणें लाखों स्वर्गदूता सेंघें आऊ, 15 कि सैभी रा न्याय केरला होर सैभी भक्तिहीना बै तिन्हरी आभक्ति रें सैभी कोमें रें बारें ना, जो पापियें तेइरें खिलाफ बोली सी दोषी ठहराला । 16 ए ता असंतुष्ट, कुडकुड़ाणु आलें होर आपणी इच्छें रें मुताबिक चैला सी होर आपणें मुँहे घमण्डें री गैला बोला सी होर ते फायदें री तेंइयें मुँह हेरी बडाई केरा सी ।

17 पर हे प्रियो, तुसै तिन्हा गैला बै याद रैखा, जो आसरे प्रभु यीशु मसीहें रें प्रेरितें पैहिलें बोली सी । 18 ते तुसाबै बोला ती कि, पिछलें रोजा ना ऐण्डा टटा केरनु आलें होणें, जुणि आपणी अभक्ति री इच्छें रें मुताबिक चैलणा 19 ए ता ते सी जो फूट पा सी, ए शारीरिक लोका सी जुणि ना आत्मा नी आँधी । 20 पर हे प्रियो, तसै आपणें अति पवित्र विश्वासा ना आपणी उन्नति केरदें होर पवित्र आत्मा ना प्रार्थना केरदें, 21 आपणें आपू बै परमेश्वरें री झुरी ना बणाइया रैखा होर अनन्त जिन्दगी री तेंइयें आसरे प्रभु यीशु मसीह री दया री आशा हेरदें रौहा, 22 होर तिन्हा पेंधें जो शका ना सी दया केरा । 23 होर बोहू बै आगी ना झपटिया खोला होर बोहू पेंधें भय सेंघें दया केरा, वरनु तेई झिकडें ना बी घृणा केरा जो शरीरें री वजहा ना कलंकित हुआ सा ।

24 ऐबें जुण तुसाबै ठोकर खाणें ना बचाई सका सा होर आपणी महिमै री भरपूरी सामनै मगन होर निर्दोष केरिया खड़ा केरी सका सा, 25 तेई अद्वैत परमेश्वर आसरे उद्धारकर्तें रें महिमा होर गौरव होर पराक्रम होर आधिकार, आसरे प्रभु यीशु मसीहें रें द्वारा ज़ैण्डा सनातन काला ना लेइया सा, ऐबें बी लोडी हुआ होर जुग-जुग लोडी रौह । आमीन॥

# प्रकाशित वाक्य

## परिचय

यहूने ये भविष्यवाणी री गैला एन्टै बौगता लिखी ती, जैबै मसीह लोका तिन्हरे यीशु पेंधे भरोसा करने री बजहा न तंग लाये ती करने | यहूना एसा कताबा रै जरिये तिन्हा लोका बै आशा होर होंसला देणा चाहा सा, कि ते येई दुखा रै बौगतै विश्वासयोग्य बैणी रौहलै | एसा कताबा न भविष्यवाणी री गैला, होर दर्शन सी, जो तेई बौगता रै मसीह लोका बै समझ आई ती | पर होरी लोका री तेईये ये एक भेद रौहु | एसा कतबबा रा खास विषय सा परमेश्वर प्रभु यीशु मसीह रै जरिये आपणै सारे दुश्मन जुणी न शैतान भी शामिल सा, हमेशा री तेईये हराणा होर जैबै ये जीत पुरी होली, तैबै परमेश्वरा आपणै विश्वासयोग्य लोका नउँए आसमान होर नऊँई धौरती री आशीषा संघे भौरनै |

रूपरेखा

भूमिका 1 :1-8

शुरुआती दर्शन होर सौत कलीसिया बै चिठी 1:9- 3:22

सौत मुहरे लाईया बन्द चर्मपत्र 4:1-8:1

सौत तुरही 8:2- 11:19

अजगर होर दूई पशु 12:1 -13:18

दर्शन 14:1-15:8

परमेश्वर रै झीकै रै सौत कटोरे 16:1-21

बैबीलोना रा नाश, पशु झूठे भविष्यवक्ता होर शैताना री हार 17:1-20:10

आखरी न्याय 20:11-15

नऊँआ आसमान होर नऊँई धौरती, नऊँआ यरुश्लेमा 21:1-22:5

उपसंहार 22:6-21

1 यीशु मसीह री भविष्यवाणी री ए वचन परमेश्वरै तेइबै एथै री तक धिनै कि स आपणै भक्ता बै तिन्हा गैला बै रिहाला जुणी रा होणा जरूरी सा होर तेइयै आपणै स्वर्गदूत भेजिया आपणै भक्त यूहन्ना बै दैसू । 2 जुणियै परमेश्वरै रै वचन, यीशु मसीह री गवाही होर जेकिछ तेइयै हेरू ती तेथै री गवाही धिनी । 3 धन्य सा सौ जुण एसा भविष्यवाणी रै वचना बै पौढा सा होर ते जुणा शुणा सी होर एथा ना लिखी दी गैला बै मैना सी किबैकि बौगत नेड आऊ सा ।

### सौत कलीसिया रा अभिवादन

4 यूहन्ना री धिरै ना आसियै री सौत कलीसियै रै नाँ ना: तेइरी तरफा ना जो सा, जो ती होर जुण एणू आला सा, होर तिन्हा सौत आत्मै री तरफा ना जो परमेश्वरा सामनै सी, 5 होर यीशु मसीह री तरफा ना जो विश्वासयोग्य सा होर मूँएदें ना जिन्दै होणू आलै ना पैहिला सा, होर धौरती रै राजै रा हाकिम सा, तुसाबै अनुग्रह होर शान्ति मिलदी रौहली, जुण आसा सेंधे झुरी रैखा सा होर जुणियै आसै आपणै लोहुए लाइया पापा ना छुडाए सी, 6 होर आसै एक राज्य होर परमेश्वरै रै पुजारी बी बणाए, तेई री महिमा होर पराक्रम जुगा-जुगा तक लोड़ी रौहू । आमीन॥ 7 हेरा स बादला सेंधे एणू आला सा होर हर एकी औछी स हेरना, बल्कि जुणियै स बिन्हु ती तिन्हा बी स हेरना होर धौरती रै सैभी कुलै रै लोका तेइरी वजहा ना छाती पिटणी । हाँ । आमीन॥ 8 प्रभु परमेश्वर, जो सा, जुण ती होर जुण एणू आला सा, जो सर्वशक्तिमान सा, ए बोला सा कि, हाँऊ अल्फा होर ओमेगा सा ।

### यहुन्ना बै मसीह रा दर्शन

9 तुसरा भाई हाँऊ, जो यीशु यूहन्ना रै दुःख, राज्य होर धीरजा ना तुसरा सहभागी सा, परमेश्वरै रै वचन होर यीशु री गवाही री वजहा ना पतमुस नाँ रै टापू ना ती 10 कि हाँऊ प्रभु रै रोजा ना आत्मा ना आऊ होर आपू पिछे तुरही रा एक बड़ा शब्द ऐण्डा बोलदै शुणू 11 कि जेकिछ तू हेरा सा तेई कताबा ना लिखिया इफिसुस, स्मुरना, पिरगमुन, थूआतीरा, सरदीस, फिलेदिलफिया होर लौदीकिया, इन्हा सौत कलीसिया बै भेज, 12 होर जो मूँ सेंधे बोलदा लागा ती मँ तेई हेरनै री तेइयै आपणा मुँह फेरू होर पिछे घूमिया मँ सुनै री सौत दीवटा हेरी । 13 तिन्हा दीवटा बिचै मँ माहू रै बेटै साही एक मर्द हेरू जुणियै जोंघा तक झिकडै लाए ती होर छाती पेंधे सुनहला पटा बोनू ती । 14 तेइरी मुँडी रै शराल ऊना साही शेतै बल्कि पालै साही शेतै ती होर औछी औगी री झाई साही ती । 15 तेइरी जोंघा भटी ना तपाउए दै उतम पीतला साही ती होर तेइरा शब्द बोहू पाणी री छेडा साही ती । 16 सौ आपणै दैहिणै हौथा ना सौत तारै लेइया ती, होर तेइरै मुँहा ना चोखी दुधारी तलवार निकला ती, होर तेइरा मुँह ऐण्डा चमकदा लागा ती जैण्डा कडकदै धुपै ना सूरज चमका सा । 17 जेबै मँ स हेरू, ता हाँऊ मुदें साही तेइरी जोंघा पेंधे पीडू । तेइयै मूँ पेंधे आपणा दैहिणै हौथ रैखिया ऐ बोलू, डौरदा मत, हाँऊ पैहिला होर अन्तिम होर जिन्दा सा । 18 मूँआ ती होर ऐबै हेर हाँऊ जुगा-जुगा तक जिन्दा सा, मोऊती होर अधोलोकै री चाबी मूँ हागे सी । हाँऊ 19 जे गैला तँ हेरी सी, होर जे गैला होंदी लागी सी, होर जे गैला एथा ना बाद होणू आली सी तिन्हा सैभी बै लिख । 20 यानिकी, तिन्हा सौत तारै रा भेद जो तँ मेरे दहिणै हौथा ना हेरै ती, होर तिन्हा सौत सुनै री दीवटा रा भेद: ते सौत तारै सौत कलीसियै रै दूत सी होर ते सौत दीवट सौत कलीसिया सी ।

### इफिसुसै री कलीसिया बै संदेश

2 इफिसुसै री कलीसियै रै दूता बै ऐण्डा लिख कि, जुण सौत तारै बै आपणै हौथा ना लेइया सा, होर सुने री सौत दीवटै रै बिचा ना फिरा सा, स ए बोला सा कि, 2 हाँऊ तेरै कोम, मेहनत होर तेरै धीरजा बै ज़ाणा सा, होर ऐ बी कि तू बुरै लोका बै ता हेरी नी सकदा, होर जुणा आपणै-आपू बै प्रेरित बोला सी पर आँथी नी, ते तै परखणै सँधै झूठे पाए, 3 होर तू धीरज रखा सा, होर मेरी तैइयै दुःख चेकदै-चेकदै थकू नी 4 पर मूँ तेरै खिलाफ ऐ बोलणा सा कि तै आपणा पैहिलै साही प्रेम छौडू सा । 5 याद केर कि तू कौखना शौद्ध होर मन फिरा होर पैहिलै साही कोम केर, होर अगर तै मन नी फेरू ता मूँ त हाँगे एजिया तेसा ज़ैगा ना स दीवट हटाणा । 6 पर हाँ, त ना ऐ गैल ता सा कि, तू निकुलइ रै कोमा ना घुणा केरा सा, जौस ना हाँबी घुणा केरा सा । 7 जौसरै कोन सी, स शुणला कि आत्मा कलीसिया बै की बोला सा, जो जय पाला मूँ तेइबै जिन्दगी रै बूटै रा फौल खाणै बै देणा जो परमेश्वरै रै स्वर्गलोका ना सा ।

### समुरनै री कलीसिया बै संदेश

8 होर समुरनै री कलीसियै रै दूता बै ऐ लिख कि, जो पैहिला होर अन्तिम सा, जो मूँआ ती ऐबै जिन्दा हुआ सा, स ए बोला सा कि, 9 हाँऊ तेरै दुःख होर तेरी दरिद्रता बै ज़ाणा सा, पर तू सेठ सा, जुणा लोका आपणै-आपू बै यहूदी बोला सी होर आँथी नी, पर शैतानै री सभा सी, तिन्हरी निन्दा बै बी ज़ाणा सा । 10 जे दुःख तौभै झेलणै पौडनै तिन्हा ना मत डौरदा: किबैकि शैतान तुसा ना केतरै बै ता जेला ना पाणू आला सा कि तुसै परखिलै, होर तुसाबै दस रोज़ा तक दुःख चेकणा पौडू, प्राण देणै तक विश्वासी रौह, ता मूँ तौभै जिन्दगी रा मुकुट देणा । 11 जौसरै कोन होले ता स शुणला कि आत्मा कलीसिया बै की बोला सा, जुण जय पाला तेइबै तेसा दुजी मोऊती ना नुकसान नी पुजणा । 12 होर पिरगमुनै री कलीसियै रै दूता बै लिख कि; जौस हाँगे दूईधारी होर चोखी तलवार सा स ए बोला सा कि, 13 हाँऊ ऐ ता ज़ाणा सा कि तू तौखै रौहा सा जौखै शैताना रा सिंहासन सा, होर मेरै नाँ ना स्थिर रौहा सा होर मूँ पँधै विश्वास केरनै ना तिन्हा ध्याडै ना बी पिछै नी हटू जुणि ना मेरा विश्वासयोग्य सँधी अन्तिपास तुसा ना तेसा ज़ैगा ना घात केरुआ जौखै शैतान रौहा सा । 14 पर मूँ तेरै खिलाफ किछ केरनी सी, किबैकि तेरै औखै केतरै ता ऐण्डै सी जो बिलामे री शिक्षा बै मैना सी, जुणियै बालाका बै इस्राइली रै आगै ठोकरा रा कारण रखणा सिखाऊ कि ते मूरता हाँगे बलि केरुईदी चीजा बै खालै होर व्यभिचार केरलै । 15 तैण्डै लोका तेरै औखै बोहू सी जो निकुलई री शिक्षा बै मैना सी । 16 सँधै लडिना । ऐबै तू आपणै मैना बै इन्हा बुरै कोमा फेर, नी ता मूँ त हाँगे झेकै एजिया आपणै मुँहै री तलवारिए सँधै तिन्हा 17 जौसरै कोन सी, स शुणला कि आत्मा कलीसिया सँधै की बोला सा, जुण जय पाला तेइबै मूँ गुप्त मन्ना देणा होर तेइबै एक शैता पाथर बी देणा होर तेई पाथरा पँधै एक नाँ बी लिखू दा होणा । तेई नाँ बै कोई होर नी जाणी सकदा ।

### थुआतीरै री कलीसिया बै संदेश

18 थुआतीरै री कलीसियै रै दूता बै ऐण्डा लिख कि, परमेश्वरा रा बेटा जौसरी औछी औगी री झाई साही सी होर ज़ाँघा उतम पितला साही सी, सौ ऐ बोला सा कि, 19 हाँऊ तेरै कोमा बै, तेरी झुरी बै, भरोसे बै, तेरी सेवा बै होर तेरै धीरजा बै ज़ाणा सा होर ऐ बी कि तेरै पिछलै कोम पैहिलै ना ज़ादा सी । 20 मूँ तेरै पर खिलाफ ऐ बोलणा सा कि, तू तेसा बेटडी इजेबेला बै रौहणै देआ सा जो आपणै- आपू बै भविष्यवक्तन बोला सा होर मेरै भक्ता बै व्यभिचार केरने होर मूरती हाँगे बलिदान केरुईदी चीजा खाणै बै सिखाइया भरमा सा । 21 मँ तेसा बै मन फिराणै रा मौका धिना, पर स आपणै व्यभिचारा ना मन फिराणा नी चाँहदी । 22 हाँऊ तेसा बै माँजै पँधै पा सा होर जो तेसा सँधै व्यभिचार केरा सी, अगर ते बी तेसरै व्यभिचारै रै कोमा ना मन नी फेरलै ता ते मूँ दुःखा ना पाणै 23 मूँ तेसरै शोहरू मारनै होर तैबै सैभी कलीसिया ज़ाणना कि हृदय होर मना बै जाँचणू आला हाँऊ सा: होर मूँ तिन्हा हर एकी

ना तिन्हरै कोमै रै मुताबिक बदला लेणा । 24 पर तुसै थुआतीरै रै बाकी लोका बै, जो एसा शिक्षा बै नी मैनदै होर शैतानै री गैला बै नी मैनदै कि, मूँ तुसा पँधै होर बोझ नी पाणा । 25 पर जे तुसा हाँगे सा तेथा बै मेरै एणै तक सभाइया रख । 26 जुण जय पाला होर मेरै कोमा बै मेरै मुताबिक निभणै तक केरदा रौहला मूँ तेइबै हर एकी ज़ाति पँधै अधिकार देणा । 27 तेई राजै साही पूरै आधिकारा सँधै तिन्हा पँधै राज केरना, ज़ैण्डै कि खमारै रै माटै रै भाण्डै चूर-चूर होआ सी, मँ बी ऐण्डा अधिकार आपणै बापू ना पाऊ सा । 28 होर मूँ तेइबै झिश्का तारा देणा । 29 जौसरै कोन सी स शुणला कि आत्मा कलीसिया बै की बोला सा ।

### सरदीसै री कलीसिया बै संदेश

3 सरदीसै री कलीसियै रै दूता बै लिख कि, जौस हाँगे परमेश्वरै री सौत आत्मा होर सौत तारै सी स ए बोला सा कि, हाँऊ तेरै कोमा बै ज़ाणा सा, तू जिन्दा ता सा पर सा मूँआ दा । 2 ज़ागदा रौह होर जे चीजा बाकी रौही सी होर जे मिटणू आली ती तिन्हा बै पैकी केर, किबैकि मँ तेरै कोई बी कोम आपणै परमेश्वरा सामनै पूरै नी हेरै । 3 ऐबै ध्यान केर कि तै कौस रीतियै शिक्षा प्राप्त केरी होर शुणी ती, तेसा शिक्षै रै मुताबिक चैल होर आपणै मैना बै बुरै कोमा ना फेर । अगर तू ज़ागदा नी रौहला ता मूँ चोरा साही एणा होर त कदी बी नी ज़ाणना कि मूँ कौस घडियै तौ पँधै एणा । 4 ऐबै ध्यान केर कि तै कौस रीतियै शिक्षा प्राप्त केरी होर शुणी ती, तेसा शिक्षै रै मुताबिक चैल होर आपणै मैना बै बुरै कोमा ना फेर । अगर तू ज़ागदा नी रौहला ता मूँ चोरा साही एणा होर त कदी बी नी ज़ाणना कि मूँ कौस घडियै त पँधै एणा । 5 जुण जय पाला तेइरै एसा रीतियै शैतै झिकडै लाणै होर मूँ तेइरा नाँ जिन्दगी री कताबा ना कौसी बी रीतियै नी काटणा, बल्कि तेइरा नाँ आपणै बापू होर तेइरै स्वर्गदूता सामनै मैनाणा । 6 जौसरै कोन सी स शुणला कि आत्मा कलीसिया बै की बोला सा ।

### फिल्दिलफिया बै संदेश

7 फलेदिलफियै री कलीसियै रै दूता बै लिख कि, जो पवित्र होर सच्चा सा होर जुण दाऊदै री कुँजी रैखा सा, जौसरै कोलुऐदै बै कोई बन्द नी केरी सकदा होर बन्द केरुऐदै बै खोली नी सकदा, सौ ऐ बोला सा कि, 8 हाँऊ तेरै कोमा बै ज़ाणा सा, हेर मँ तौ सामनै एक द्वार खोलू सा जुणिबै कोई बन्द नी केरी सकदा कि, तेरी सामर्थ थोड़ी सा होर तै मेरै वचन मैने सी होर मेरै नाँ रा नाँह नी केरू । 9 हेर, मूँ शैतानै री सभा केरनू आलै तेरै वशा ना केरनै । जो यहूदी बैणिया बेटै सी पर आँथी नी, पर झूठ बोला सी, हेर, मूँ ऐण्डा केरना कि तिन्हा एजिया तौभै दण्डवत केरना होर ऐ ज़ाणना कि मँ तौ सँधै झुरी रैखी सा । 10 तै मेरै धीरजै रै वचन थामिया रैखै सी । मूँ बी तू परीक्षै रै तेई बौगतै बचाइया रखणा जो धौरती पँधै रौहणू आलै बै परखणै री तैइयै एणू आला सा । 11 हाँऊ झेकै एणू आला सा । जेकिछ त हाँगे सा तेइबै थामिया रख कि कोई तेरै मुकटा बै नी चटरला । 12 रा नाँ जे मेरै परमेश्वरा हाँगे ना स्वर्गा ना उतरनू आला जुण जय पाला स मूँ आपणै परमेश्वरै रै मन्दिरा ना एक थोम्बा बणाणा होर तेई कदी बी बाहरे नी निकूणा । मूँ आपणै परमेश्वरा रा नाँ, आपणै परमेश्वरै रै नगर, नोऊँरे यरुशलैमा सा होर आपणा नाँ तेई पँधै लिखणा । 13 जौसरै कोन सी स शुणला कि आत्मा कलीसियै बै की बोला सा,

### लौदीकिया बै संदेश

14 जौसरै कोन सी स शुणला कि आत्मा कलीसियै बै की बोला सा, 15 कि हाँऊ तेरै कोमा बै ज़ाणा सा कि तू ना ता उँडा सा होर ना गर्म: भला होंदा कि तू उँडा या गर्म होंदा । 16 तू गुनगुना सा, होर ना उँडा, ना गर्म, हाँऊ तौभै आपणै मुँहै लाइया उल्टी केरनै पँधै सा । 17 तू जे बोला सा कि हाँऊ सेठ सा होर धनवान हुआ सा होर मुँभै कौसी चीजै री कमी नी आँथी होर ऐ नी ज़ाणदा कि तू अभागा, तुच्छ, काणा होर नंगा सा । 18 हाँऊ तौभै सम्मति देआ सा कि औगी ना तपाउआ दा सुना मूँ ना मोल ले कि सेठ बणला होर शैतै झिकडै ले कि तिन्हा लाइया तौभै नंगे होणै री शर्म नी होली होर आपणी

औछी ना लाणै बै काजअ ले कि तू हेरदा लागला । 19 हाँऊ जुणि-जुणि सेंधे झुरी रेखा सा तिन्हा सैभी बै उलाहना होर ताडना देआ सा । एबै सरगर्म हो होर मना बै फेर । 20 हेर, हाँऊ दुआरा पेंधे खैडै होइया खटरखाटा सा अगर कोई मेरै शब्द शुणिया दुआर खोलला ता मूँ तेई हागै भीतरै एजिया तेई सेंधे रोटी खाणी होर तेई मूँ सेंधे । 21 जण जय पाला मूँ स आपू सेंधे आपणै सिंहासना पेंधे बशाणा, जैण्डा कि हाँबी जय पाइया आपणै बापू सेंधे तेइरै सिंहासना पेंधे बेठा । 22 जौसरै कोन सी स शुणला कि आत्मा कलीसिया बै की बोला सा ।

### स्वर्गा न आराधना

4 इन्हा गैला ना बाद जैबे में नजर पाई ता की हेरा सा कि, स्वर्गा ना एक दुआर खुलू सा होर जुण में पैहिली तुरही री आवाजा साही आपू सेंधे गैला केरदा शुणू ती, सौहै बोला सा कि, ओखे उझै एज होर मूँ ते गैला तौभे रिहाणी जौसरा इन्हा गैला ना बाद पूरा होणा जरूरी सा 2 होर तुरन्त हाँऊ आत्मा ना आऊ होर की हेरा सा कि एक सिंहासन स्वर्गा ना रखू सा होर तेई सिंहासना पेंधे कोई बेठा सा, 3 होर जो तेथा पेंधे बेठा सा स यशब होर मानिका साही हेरिया सा होर तेई सिंहासनै रै चोहू पासै एक मेघधनुष हेरिया सा 4 होर तेई सिंहासनै रै चोहू पासै चौऊबी सिंहासन सी होर इन्हा सिंहासना पेंधे चौऊबी पराणिये शेतै झिकडै लाइया बेठे सी होर तिन्हरी मुँडी पेंधे सुनै रै मुकट सी । 5 होर तेई सिंहासना ना बजड़ाह होर गूँजणै री छेड़ निकला सा होर सिंहासना सामनै ओगी रै सौत दीउण भौकदै लागै सी । ए परमेश्वरै री सौत आत्मा सी । 6 होर तेई सिंहासना सामनै मैना बलौऊरै रै समान शीशै साही समुद्र सा होर सिंहासनै रै बिचा ना होर सिंहासनै रै चोहू पासै चार प्राणी सी जौसरै आगै-पिछै औछी सी । 7 पैहिला प्राणी सिंहे रै समान सा होर दुजै प्राणी रा मुँह बौछू साही सा, त्रीजै प्राणी रा मुँह माहू साही सा होर चोउथा प्राणी उडदै बाजा साही सा । 8 होर चोहू प्राणी रै छौह-छौह पँख सी होर चोहू पासै होर भीतरै औछी सी होर ते रात ध्याड बगैर बशाँ केरै एण्डा बोलदै रौहा सी कि, पवित्र, पवित्र, पवित्र प्रभु परमेश्वर, सर्वशक्तिमान जो ती होर जो सा होर जो एणू आला सा । 9 होर जैबे ते प्राणी तेइरी जो सिंहासना पेंधे बेठ सा होर युग-युग जिन्दा सा, महिमा होर आदर होर धन्यवाद केरलै । 10 तैबे चौऊबी पराणिये सिंहासना पेंधे बेशणू आलै सामनै जो युग-युग जिन्दा सा प्रणाम केरना होर आपणै-आपणै मुकट सिंहासना सामनै एण्डा बोलदै-बोलदै रेखणै, 11 कि आसरे प्रभु होर परमेश्वर तू महिमा, आदर होर सामर्थ्य रै योग्य सा किबैकि तैं सारी चीजा बणाई होर ते तेरी इच्छे रै मुताबक ती होर बणाउई ।

### मुहरबन्द कताब होर मेम्ना

5 होर जुण सिंहासना पेंधे बेठा ती में तेइरै दैहिणै हौथा ना एक कताब हेरी जो भीतरै बाहरै लिखुईदी ती होर स सौत मोहर लाइया बन्द केरुईदी ती । 2 तैबे में एक बलवान स्वर्गदूत हेरु जो जोरा सेंधे ए प्रचार केरा ती कि एसा कताबा खोलणै होर तेसरी मोहरी चोड़नै रै लायक कुण सा? 3 होर ना स्वर्गा ना, ना धौरती पेंधे, ना धौरती हेठै तेसा कताबै रै खोलणै होर तेसा पेंधे नजर पाणै रै लायक नी निकता 4 होर हाँऊ रौदा लाग़ा किबैकि तेसा कताबा खोलनै होर तेसा पेंधे नजर पाणै रै लायक कोई नी मिलू । 5 तैबे तिन्हा पराणिये ना एकिये मुँभे बोलू, मत रौदा, हेर, यहूदै रै गोत्रा रा सिंह जो दाऊदा रा मूल सा, तेसा कताबा खोलणै होर तेसरी सौत मोहरा चोड़नै री तैइयै जयवन्त हुआ सा । 6 होर में तेई सिंहासन होर तिन्हा चार प्राणिये रै बिचा ना मैना एक वध केरुआदा मेम्ना खड़ा हेरु । तेइरै सौत शींग होर सौत औछी ती । ए परमेश्वरै री सौत आत्मा सी जो सारी पृथ्वी पेंधे भेजी सी । 7 तेइयै एजिया जो सिंहासना पेंधे बेठा सा तेइरै दैहिणै हौथा ना सौ कताब लेई । 8 होर जैबे तेइयै कताब लेई ता ते चारै प्राणी होर चौऊबी पराणिये तेई मेम्नै सामनै टुँबडै पौडै होर हर एकी रै हौथा ना वीणा होर धूपे लाइया भौरुएदै सुनै रै कटोरै ती, ए पवित्र लोकै री प्रार्थना सी । 9 होर ते नोऊँआ गाणा गाँदै लागै कि, तू एसा कताबा लेणै होर तेसरी मोहरा चोड़नै रै लायक सा किबैकि तैं बलि होइया आपणै लोहुरे लाइया हर एक कुल, भाषा, लोका

होर जाति ना परमेश्वरै री तैइयै लोका मोल लेऐ सी 10 होर ते आसरे परमेश्वरै री तैइयै एक राज्य होर याजक बणाऐ होर ते धौरती पेंधे राज केरा सी । 11 होर जैबे में हेरु, ता तेई सिंहासन होर तिन्हा प्राणिये होर प्राचीनै रै चोहू पासै बोहू सारै स्वर्गदूता रा शब्द शुणू, जौसरी गिनती लाखों होर करोड़ै री ती । 12 होर ते जोरा सेंधे बोला ती कि, बलि केरुआदा मेम्ना सामर्थ, धन, ज्ञान, शक्ति, आदर, महिमा होर धन्यवादै रै लायक सा । 13 फिरी में स्वर्गा ना, धौरती ना, धौरती हेठै होर समुद्रै री सारी बणाउईदी चीजा बै होर सबकिछ जो इन्हा ना सा ऐ बोलदै शुणै कि, जो सिंहासना पेंधे बेठा सा तेइरा होर मेम्नै रा धन्यवाद, आदर, महिमा होर राज्य युग-युग लोड़ी रौहू 14 होर चारै प्राणिये आमीन बोलू होर प्राचीनै टुँबडै पौडिये दण्डवत केरु ।

### सौत मोहरा रा खोलणा

6 तैबे में हेरु कि, मेम्नै तिन्हा सौत मोहरा ना एक खोली होर तिन्हा चार प्राणी ना एकी ना प्रिंजणै साही आवाज शुणुई कि एज, 2 होर में नजर पाई होर हेरा, एक शेता घोड़ा सा होर तेई पेंधे बेठा दा धनुष पाइया सा होर तेइबै एक मुकट धिनुआ होर स जयकार केरदै-केरदै निकता कि होर बी जय पाला । 3 होर जैबे तेइयै दुजी मोहर खोली ता में दूजा प्राणी एण्डा बोलदा शुणू कि, एज । 4 तैबे एक होर घोड़ा निकता जो लाल रंगा रा ती । तेइरै सवारा बै ऐ अधिकार धिनुआ कि धौरती पैधाना ना मेल चकला ताकि लोका एकी होरी रा वध केरलै होर तेइबै एक बड़ी तलवार धिनुई । 5 होर जैबे तेइयै त्रीजी मोहर खोली ता में त्रीजा प्राणी एण्डा बोलदै शुणू कि, एज: होर में नजर पाई होर हेरा एक कालै रंगा रा घोड़ा सा 6 होर में तिन्हा चार प्राणी रै बिचा ना एक शब्द एण्डा बोलदा शुणू कि, दीनारा रा सेर भर गेहूँ होर दीनारा रा सेर जव, होर तेल होर दाखरसा रा नुकसान हेरी केरदा । 7 होर जैबे तेइयै चोउथी मोहर खोली ता में चोउथे प्राणी रा शब्द एण्डा बोलदै शुणू कि, एज । 8 होर में नजर पाई होर हेरा, एक पीउऐ रंगा रा घोड़ा सा होर तेइरै सवारा रा नाँ मोऊत सा: होर अधोलोक तेइरै पिछै-पिछै सा होर तिन्हा बै चोउथे हिस्से पेंधे ऐ हक धिना कि, तलवार, अकाल, मरी होर धौरती रै बोणकै पशुए लाइया लोका बै मारलै । 9 होर जैबे तेइयै पंजुई मोहर खोली ता में वेदी हेठै ते प्राणी हेरै जो परमेश्वरै रै वचनै रै कारण होर तेथै री गवाही रै कारण वध केरुएदै ती, 10 होर तिन्हे जोरा सेंधे पुकारिया बोलू, हे सैचै होर पवित्र स्वामी, त कदी तक न्याय नी केरना? होर धौरती ना रौहणू आलै ना आसरे लोहू रा बदला कदी तक नी लेणा, 11 होर तिन्हा ना हर एकी बै शेतै झिकडै धिनै होर तिन्हा बै बोलू, थोडी देर होर बशाँ केरा, जैबे तक कि तुसरै सैगी दास, भाई होर, जो तुसा साही वध होणू आलै सी तिन्हरी बी गिनती पूरी नी होली । 12 होर जैबे तेइयै छौहुई मोहर खोली ता में हेरु कि एक बड़ा भुँईडोल हुआ होर सूरज कम्बला साही काला होर जोथ लोहू साही हुई । 13 होर आसमानै रै तारै धौरती पेंधे एण्डे शौदँ जैण्डे कि बागर-ब्यानै होणै सेंधे अँजिरे रै बूटै ना काचै फ़ौल शौदा सी । 14 होर आसमान एण्डा सरकू जैण्डा पत्र लपेटिया सरका सा होर हर एक पहाड़, टापू आपणी-आपणी जैगा ना हिलै । 15 होर धौरती रै राजै, प्रधान, सरदार होर धनवान, सामर्थी लोक, हर एक गुलाम होर हर एक आजाद दौगै री खोहा ना होर चटाना ना जाइया गोझुरे । 16 होर दौग होर चटाना बै बोलदै लागै कि, एजा आसा पेंधे पौडा होर आसा बै तेइरै मुँहा ना जो सिंहासना पेंधे बेठा सा होर मेम्नै रै प्रकोपा ना छुपात् । 17 किबैकि तिन्हरै प्रकोपा रा भयानक रोज आऊ सा एबै कुण ठहरी सका सा?

### इसाएली रै 1,44,000 लोका

7 एथा ना बाद में धौरती रै चोहू कुणै पेंधे चार स्वर्गदूत खडै हेरै, तिन्हे धौरती री चारै बागरी थामी ती ताकि धौरती या समुद्र या कौसी बूटै पेंधे बागर नी चैलली । 2 तैबे में एक होर स्वर्गदूत जिन्दै परमेश्वरै री मोहर लेइया पूरबा धिरै ना झँऊँ एंदा हेरु तेइयै तिन्हा चार स्वर्गदूता बै जुणिबै धौरती होर समुद्रा रा नुकसान केरनै रा हक धिना ती, जोरा सेंधे बोलू 3 जैबे तक आसै परमेश्वरै रै दासै रै मौथे ना मोहर नी लालै, तैबे तक धौरती, समुद्र होर बूटै रा नुकसान हेरीत् केरदै । 4 होर जुणी पेंधे मोहर लाई में तिन्हरी गिनती शुणी कि इस्राइलै री सन्तानै रै सैभी गोत्रा ना एक लाख चौआलीस

हजारा पैंधे मोहर धिनी । 5 यहूदै रै गोत्रा ना बारा हजारा पैंधे मोहर धिनी, रुबेनै रै गोत्रा ना बारा हजारा पैंधे, गादै रै गोत्रा ना बारा हजारा पैंधे । 6 आशेरै रै गोत्रा ना बारा हजारा पैंधे, मनशिशै रै गोत्रा ना बारा हजारा पैंधे 7 शमोनै रै गोत्रा ना बारा हजारा पैंधे, लेवी रै गोत्रा ना बारा हजारा पैंधे, इस्साकारै रै गोत्रा ना बारा हजारा पैंधे । 8 जबूलनै रै गोत्रा ना बारा हजारा पैंधे, युसुफै रै गोत्रा ना बारा हजारा पैंधे होर बिन्यामीनै रै गित्रा ना बारा हजारा पैंधे मोहर धिनी ।

### एक बड़ी भीड़

9 एथा ना बाद में नजर पाई होर हेरा, हर एक जाति होर कुल होर लोका होर भाषा ना एक बड़ी भीड़ जुणिबै कोई गिणी नी सकदा ती शेतै झिकडै लाइया होर आपणै हौथा ना खजुरै री डाई लेइया सिंहासनै रै सामनै होर मेन्नै रै सामनै खड़ी ती । 10 होर जोरा सैंधे पुकारिया बोला सा कि, उद्धारै री तैइयै आसरै परमेश्वरा रा जो सिंहासना पैंधे बेटा सा होर मेन्नै री जय-जयकार हो, 11 होर सारै स्वर्गदूत तेई सिंहासन, प्राचीन होर चार प्राणी रै चोहू पासै खडै सी, तैबै ते सिंहासना सामनै टुंबडै पौडै होर परमेश्वरा बें दण्डवत केरिया बोलू, आमीन 12 आसरै परमेश्वरै री स्तूति होर महिमा होर ज्ञान होर धन्यवाद होर आदर होर सामर्थ होर शक्ति युग-युग बणी लोडी रौही । आमीन । 13 एथा पैंधे प्राचीना ना एकियै मुंभे बोलू, ए शेतै झिकडै लाइया कुणा सी होर कौखना आए सी? 14 में तेइबे बोलू, हेवामी तूहै ज्ञाणा सा; तेइयै मुंभे बोलू, ए ते सी जो तेई बडै दुःखाना निकलिया आए सी । इन्है आपणै-आपणै झिकडै मेन्नै रै लोहू ना धोइया शेतै केरै सी 15 एसा वजहा ना ते परमेश्वरै रै सिंहासना सामनै सी होर तेइरै मन्दिरा ना रात-ध्याड तेइरी सेवा केरा सी होर जो सिंहासना पैंधे बेटा सा तेई तिन्हा पैंधे आपणा तोम्बू तानणा । 16 तिन्हा तैभै भूखै होर शोखै नी होणा होर तिन्हा पैंधे न धूपा होर ना कोई तपन पौडनी । 17 किबैकि जो मेन्ना सिंहासना बिचै सा तेई तिन्हरी रखवाली केरनी होर ते जिन्दगी रै सोतै हागै नेह्लै होर परमेश्वरा तिन्हरेँ औछू टुशाणै ।

### सौतूई तुरही होर सुने रा धूपदान

8 होर जैबे तेइयै सौतूई मोहर खोली ता स्वर्गा ना औधी घड़ी तक सन्नाटा पौडू । 2 होर में ते सौत स्वर्गदूत जो परमेश्वरा सामनै खडै रौहा सी हेरै होर तिन्हाबे सौत तुरही धिनी । 3 तैबै एक होर स्वर्गदूत सुनै रा धूपदान लेइया आऊ होर वेदी हागै खडा हुआ होर तेइबे बोहू धूप धिना कि सब पवित्र लोकै री प्रार्थना सैंधे तेसा सोनहली वेदी पैंधे जो सिंहासना सामनै सा चढाला । 4 होर तेई धुपा रा धुँआ पवित्र लोकै री प्रार्थना समेत स्वर्गदूतै रै हौथै परमेश्वरा सामनै पुजू । 5 होर स्वर्गदूतै धूपदान लेइया तेथा ना वेदी री औग भौरी होर धौरती पैंधे पाई होर गर्जन, छेड, बजड़ाह होर जौजरी होंदी लागी ।

### सौत तुरही

6 होर ते सौत स्वर्गदूत जुणी हागै सौत तुरही सी ते फुकरनै री तैइयै त्यार हुऐ । 7 पैहिलै स्वर्गदूतै तुरही फुकरी होर लोहू ना मिले दै शौरु होर औग पैदा हुई होर धौरती पैंधे पाई होर धौरती रा एक तिहाई हिस्सा फुकुआ होर सारा होरा गाह बी फुकुआ । 8 दुजै स्वर्गदूतै तुरही फुकरी ता मैना औगी साही भौकदा एक बड़ा पहाड समुद्रा ना पाऊ होर समुद्रा रा एक तिहाई हिस्सा लोहू बैणू । 9 होर समुद्रै री एक तिहाई बणाईदी चीजा जो जिन्दी ती ते मुँई होर एक तिहाई जहाज नष्ट हुआ । 10 होर त्रीजे स्वर्गदूतै तुरही फुकरी होर एक बड़ा तारा जो मशाला साही भौका ती, स्वर्गा ना चुट्ट होर नौई रै एक तिहाई हिस्सै पैंधे होर पाणी रै सोतै पैंधे एजिया पौडू, 11 होर तेई तारै रा नाँ नागदौना सा होर एक तिहाई पाणी नागदौनै साही कडवा हुआ होर बोहू सारै माहू तेई पाणी रै कडवै होणै सैंधे मुँरे । 12 होर चोउथे स्वर्गदूतै तुरही फुकरी होर सूरजै री एक तिहाई, जोथे री एक तिहाई होर तारै री एक तिहाई पैंधे आपती आई, औखै तक कि तिन्हरा एक तिहाई अँग निहारा हुआ होर ध्याडकी एक तिहाई ना प्याशा नी रौहू होर तैण्डाए राती बै बी । 13 होर जैबे में फिरी हेरू ता आसमानै रै बिचा ना एक उकाब उडदा होर ऐण्डा बोलदा

शुणू कि, तिन्हा त्रा स्वर्गदूतै री तुरही रै शब्दै रै कारण जौसरा फुकरना हाजी बाकी सा, धौरती ना रौहणू आलै पैंधे हाए! हाय! हाय!

9 होर जैबे पौजुऐ स्वर्गदूतै तुरही फुकरी ता मैं स्वर्गा ना एक तारा धौरती बै शौददा हेरू होर तेइबे अथाह कुण्डै री कुँजी धिनी, 2 होर तेइयै अथाह कुण्ड खोलू होर कुण्डा ना बड़ी भटी साही धुआँ उटू होर कुण्डै रै धुएँ लाइया सूरज होर बागर निहारी हुई । 3 होर तेई धुएँ ना धौरती पैंधे टिडी निकती होर तिन्हा बै धौरती रै बिचू साही शक्ति धिनी, 4 होर तिन्हा बै बोलू कि, न धौरती रै गाह बै, न कौसी हरियाली बै, न कौसी बूटै रा नुकसान केरदै, सिर्फ तिन्हा माहू बै जौसरै मौथे पैंधे परमेश्वरै री मोहर नी आँधी । 5 तिन्हा टिडी बै माहू बै मारनै रा ता नी, पर पौज महीनै तक लोका बै पीडा देणै रा हक धिना होर तिन्हरी पीडा ऐण्ठी ती जैण्डा कि बिचू रै डँक मारनै सैंधे माहू बै दाह होआ सा 6 तिन्हा ध्याडै ना माहू मोऊत तोपणी, पर तिन्हा बै मोऊत नी मिलणी होर मौरनै री इच्छा रैखणी, पर मोऊत तेइना भैगणा । 7 होर तिन्हा टिडी रा आकार लडाई बै त्यार केरुऐदे घोडै साही ती होर तिन्हरी मुँडी पैंधे मैना सुनै रै मुकट ती होर तिन्हरेँ मुँह माहू साही ती । 8 होर तिन्हरा चोढा बेटडी साही ती होर दोंद शंरा साही ती । 9 होर ते लोहै री झिलम लाइया ती होर तिन्हरेँ पँखे री छेद रौथ होर लडाई ना दौड़नू आलै बोहू घोडै साही ती 10 होर तिन्हरी पूँछ बिचू साही ती होर तिन्हा ना उँक ती । तिन्हरी पूँछ ना माहू बै पौज महीनै तक दुःख पजाणै री सामर्थ ती । 11 अथाह कुण्डा रा दूत तिन्हा पैंधे राजा ती । तेइरा नाँ इब्रानी भाषा ना अबदोन होर यूनानी भाषा ना अपुल्लयोन सा । 12 पैहली मुसीबत बीती हेरा ऐबै एथा बाद ना दूई मुसीबता होर होणू आली सी । 13 होर जैबे छौहुरे स्वर्गदूतै तुरही फुकरी ता जो सुनै री वेदी परमेश्वरै रै सिंहासना सामनै सा तेथै रै शींगा ना मैं ऐण्डा शब्द शुणू, 14 मैना कोई छौहुरे स्वर्गदूता बै जौस हागै तुरही ती बोलदा लागा सा कि, तिन्हा चार स्वर्गदूता बै खोल जो फुरात नाँ री बड़ी नौई हागै बोनुरे सी 15 होर ते चारै दूत खोलै जो तेसा घड़ी, ध्याड, महीनै होर बौषे री तैइयै माहू रा एक तिहाई हिस्सा मारनै री तैइयै त्यार केरुऐदे ती । 16 होर फोऊजी रै सवारै री गिनती बीह करोड ती । मैं तिन्हरी गिनती शुणी । 17 होर मुंभे घोडै होर तिन्हरेँ सवार ऐण्डे हेरुऐ जौसरी झिलमा औगी साही होर धूम्रकान्त होर गन्धका साही ती । तिन्हा घोडै री मुण्डी शेरै री मुण्डी साही ती होर तिन्हरेँ मुँहा ना औग, धुँआ होर गन्धक निकला ती 18 इन्हा त्रा मरी यानिकी, औग, धुँए होर गन्धक जो तिन्हरेँ मुँहा ना निकला ती तेथै लाइया माहू रा एक तिहाई हिस्सा मारुआ । 19 किबैकि तिन्हा घोडै री सामर्थ तिन्हरेँ मुँहा ना होर पूँछा ना ती किबैकि तिन्हरी पूँछ कीडै साही ती होर तिन्हा पूँछे री मुण्डी बी ती होर एथे लाइया ते लोका बै दुःख देआ ती । 20 होर बाकी माहू जो तिन्हा मरी सैंधे नी ती मुँरे, आपणै हौथे रै कोमा ना मन नी फिराऊ कि चेट्ट री, सुनै, चाँदी, पीतल, पाथर होर लकडै री मूरती री पूजा नी केरलै जो न ता हेरी सकदी, न शुणी सकदी, न चैली सकदी । 21 होर जो खून, टोणा, व्यभिचार होर चोरी तिन्है केरी ती तिन्हा ना मन नी फिराऊ ।

### स्वर्गदूत होर होछी कताब

10 तैबे मैं एक होर बलवान स्वर्गदूत बादल ओढिया स्वर्गा ना उतरदा हेरू । तेइरी मुण्डी पैंधे मेघधनुष ती होर तेइरा मुँह सूरजा साही होर तेइरी जोंघा औगी रै थाम्बे साही ती । 2 होर तेइरै हौथा ना एक होछी जेही खुली कताब ती । तेइयै आपणी दैहिणी जोंघ समुद्रा ना होर बाँउई जोंघ धौरती पैंधे रैखी । 3 होर ऐण्ठी जोरा सैंधे चिलाऊ जैण्डा कि शेर ग्रीजा सा होर जैबे स चिलाऊ ता ग्रीजणै रै सौत शब्द शुणुऐ 4 होर जैबे सौत शब्द शुणुऐ ता हाँऊ लिखदा ती होर मैं स्वर्गा ना ऐ शब्द शुणू कि, जो गैला ग्रीजणै रै सौत शब्दा ना शुणी सी, तिन्हा बै गुप्त रख होर लिखदा मत । 5 होर जुण स्वर्गदूत मैं समुद्र होर धौरती ना खडा हेरू ती, तेइयै आपणा दैहिणा हौथ स्वर्गा धिरा बै चैकू । 6 होर जुणी युग-युग ज़िदै रौहणा जुणियै स्वर्ग होर जेकिछ तेथा ना सा, धौरत होर जेकिछ एथा ना सा, समुद्र होर जेकिछ एथा ना सा बणाऊ तेही री कसम खाइया बोलू, ऐबै ता होर देर नी होणी । 7 बरना सौतुऐ स्वर्गदूतै रै शब्द देणै रै ध्याडै ना जैबे स तुरही फुकरनू आला होला ता

परमेश्वर रा गुप्त मनोरथ तेई सुसमाचारै रै मुताबिक जो तेइयै आपणै दास भविष्यवक्ता बै धिना पूरा होणा, 8 होर जो शब्द देणू आला मैं स्वर्गा ना बोलदा शुणू ती, सौ भी मूँ सेंधे गैला केरदा लागा कि, जा जो स्वर्गदूत समुद्र होर धौरती पेंधे खडा सा, तेइरै हौथै री खुली कताब ले, 9 होर मैं स्वर्गदूता हागै जाइया बोलू, एसा होछी कताब मुँभे दे, होर तेइयै मुँभे बोलू, लैहू एसा बै खा होर एसा तेरा पेट कडवा ता केरना पर तेरै मुँहा ना मखीरा साही मीठी लागणी । 10 मैं स होछी कताब तेई स्वर्गदूता हागै ना लेई होर खाई । स मेरै मुँहा ना मखीरा साही मीठी ता लागी पर जैबै मैं स खाई ता मेरा पेट कडुआ हुआ । 11 तैबै मुँभे ऐ बोलू कि, त बोहू सारै लोका बै, जाति बै, भाषा होर राजै पेंधे भी भविष्यवाणी केरनी पौई ।

### दुई गवाह

11 होर मुँभे लोगडी साही एक सरकण्डा धिना होर कौंसियै बोलू, उठ परमेश्वर रा मन्दिर, वेदी होर तेथा ना भजन केरनू आलै बै नाप । 2 होर मन्दिरा रा बाहरी आँगन छोडी दे, तेइबै मत नापदा किबैकि स अनयजाति बै धिना सा, होर तिन्हा पवित्र नगर ब्यालीस महीनै तक रौदणा 3 होर मूँ आपणै दूई गवाही बै अधिकार देणा कि ते टाट ओढिया एक हजार दूई शौऊ शौऊ रोजा तक भविष्यवाणी केरलै । 4 ए तेही जैतूनै रै दूई बूटै होर दूई दीवट सी जो धौरती रै प्रभु सामनै खडे रौहा सी, 5 होर अगर कोई तिन्हा बै नुकसान पजाणा चाहा सा ता तिन्हरै मुँहा ना आँग निकलिया तिन्हरै बेइरी बै भस्म केरा सा, होर अगर तिन्हा बै नुकसान पजाणा चाहला ता पक्का ते एसा रीतियै मारिनै । 6 इन्हा बै हक सा कि आसमाना बै बन्द केरलै कि तिन्हरी भविष्यवाणी रै रोजा ना गाश नी एला, होर तिन्हा बै हक सा कि ते सारै पाणी बै लोहू बणालै होर जैबै-जैबै चाहलै तैबै-तैबै धौरती पेंधे मुसीबत आणलै । 7 जैबै ते गवाही देलै ता तेई पशु जो अथाह कुण्डा ना निकुणा, तेई तिन्हा सेंधे लडिया ते जीतणै होर ते मारनै । 8 तिन्हरी लाश तेई बडै नगरै रै चौका ना पौडी रौहणी जुणिबै कि आत्मिक रीति ना सदोम होर मिसर बोला सी, जौखै तिन्हा प्रभु भी कूसा पेंधे चढाऊ ती । 9 होर सैभी जाति, कुल होर भाषै रै लोका साद्वै त्रा रोजा तक तिन्हरी लाश हेरदै रौहणा होर तिन्हरी लाश कब्रा ना नी रखणै देणी । 10 होर धौरती ना रौहणू आलै तिन्हरै मारनै सेंधे खुश होर मगन होणा होर एकी दूजै बै भेंट भेजणी किबैकि इन्है दूई भविष्यवक्तै धौरती ना रौहणू आलै सताए ती । 11 साद्वै त्रा रोजा बाद परमेश्वर धिरै ना जिन्दगी री आत्मा तिन्हा ना बेठी होर ते आपणी जोंघै रै बलै खडे हुऐ होर तिन्हा हेरनू आलै पेंधे बडी डौर पौई । 12 होर तिन्हा ना स्वर्गा ना एक बडा शब्द शुणूआ कि, ओखै उझै एजा; एण्डा शुणिया ते बादलै री सवारी होइया आपणै बेइरी रै हेरदै-हेरदै स्वर्गा पेंधे चैद्वै 13 तैबै तेसा घडी एक बडा भुँइडोल हुआ होर नगरा रा दसवाँ हिस्सा ढोऊ होर तेई भुँइडोला सेंधे सौत हजार माहू मूँ होर बैचै दै ते माहू डौरै होर स्वर्गै रै परमेश्वरै री महिमा केरी 14 दूजी बिपति बीती हेरा त्रीजी विपति झेके एणू आली सा ।

### सौतूई तुरही

15 होर जौबै सौतुऐ दूतै तरही फुकरी ता स्वर्गा ना एथै रै बारै न बडै-बडे शब्द होंदैं लागै कि संसारा रा राज्य आसरे प्रभु रा होर तेइरै मसीह रा हुआ । 16 होर तेई जुगा-जुगा तक राज केरना होर जे चौऊबी प्राणी परमेश्वर सामनै आपणै-आपणै सिंहासन पेंधे बेठै ती टुँबडै पौडिया परमेश्वर बै दण्डवत केरिया, 17 एण्डा बोलदै लागै कि, हे सर्वशक्तिमान परमेश्वर जो सा, जो ती आसै तेरा धन्यवाद केरा सी कि तैं आपणी बडी सामर्थ्य रै कोमै लाइया राज केरु सा 18 होर अनयजातियै विरोध केरु होर तेरा प्रकोप एजिया पौडू होर स बगत आऊ सा कि मूँऐदै रा न्याय केरिला होर तेरै दास भविष्यवक्ता होर पवित्र लोका बै होर तिन्हा हौँछे-बडै बै जो तेरै नाँ ना डौरा सी तिन्हा बै बदला देइला होर धौरती बै बिगाड़नू आलै नष्ट केरिलै । 19 होर परमेश्वर रा मन्दिर जो स्वर्गा ना सा स खोलुआ होर तेइरै मन्दिरा ना तेइरै वायदै रा सन्दूक हेरुआ होर बजड़ाह, शब्द, गर्जन होर भुँइडोल हुऐ होर बडै-बडे शौरू पौडे ।

### बेटडी होर अजगर

12 तैबै स्वर्गा ना एक बडा चिन्ह हेरुआ यानिकी, एक बेटडी जो सूरज ओढिया ती होर जौथ तेसरी जोंघा हेठै ती होर तेसरी मुण्डी पेंधे बारा तारै रा मुकट ती । 2 होर स सुजदी रौही होर चिला ती किबैकि तेसा बै सुजणै री दाह लागी ती होर सौ बचै पैदा केरनै री पीडा ना ती । 3 तैबै एक होर चिन्ह स्वर्गा ना हेरुआ होर हेरा, एक बडा लाल अजगर जौसरी सौत मुण्डी होर दस शींग ती होर तेइरी मुण्डी पेंधे सौत राजमुकट ती । 4 होर तेइरी लँगटियै तारै रा एक तिहाई हिस्सा खिंचिया धौरती पेंधे पाऊ होर सौ अजगर तेसा बचै पैदा केरनू आली बेटडी सामनै खडा हुआ कि जैबै सौ बचै बै पैदा केरली ता तेई बचै बै खाला । 5 आला ती, होर तेसरा बचा एकदम परमेश्वर होर तेइरै सिंहासन सामनै चैकिया पजाउआ । 6 होर स बेटडी तेई जंगला बै भैगी जौखै परमेश्वरै तेसरी तेंइयै जैगा त्यार केरी ती कि तौखै स एक हजार दूई शौऊ शौऊ बौर्षा तक धाचिली । 7 तैबै स्वर्गा ना लडाई हुई । मीकाइल होर तेइरै स्वर्गदूत अजगरा सेंधे लैडदै निकतै । अजगर होर तेइरै दूत तिन्हा सेंधे लडे, 8 पर ते प्रबल नी हुऐ होर स्वर्गा ना तिन्हरी तेंइयै जैगा नी रौही । 9 होर स पराणा कीडा जुणिबै इबलीस होर शैतान बोला सी होर सारै संसारा रा भरमाणू आला सा, स धौरती पेंधे गिराऊ होर तेइरै दूत बी तेई सेंधे गिराए । 10 तैबै मैं स्वर्गा ना एण्डा बडा शब्द एण्डा शुणू कि, एबै आसरे परमेश्वर रा उद्धार, सामर्थ, राज्य होर तेइरै मसीह रा अधिकार प्रगट हुआ सा किबैकि आसरे भाई पेंधे दोष लागू आला, जो रात-ध्याड आसरे परमेश्वर सामनै तिन्हा पेंधे दोष ला ती सौ गिराउआ । 11 पेंधे जयवन्त हुऐ होर तिन्है आपणै प्राण प्रिय नी जाणै, ओखै तक कि तिन्है मोऊत बी सौही । 12 एसा वजहा ना, हे स्वर्गो होर तिन्हा ना रौहणू आलै ओ मगन होआ, हे धौरती होर समुद्र तुसा पेंधे हाय! किबैकि शैतान बडी झिका सेंधे तुसा हागै उतरु सा, किबैकि स जाणा सा कि तेइरा बौगत थोडाए बाकी सा । 13 होर जैबै अजगरै हेरु कि हाँऊ धौरती पेंधे बै गिराउआ सा ता तेइयै सौ बेटडी जुणियै बेटा पैदा केरु ती सताई । 14 होर तेसा बेटडी बै उकाब चिडू साही दूई पँखा धिनै कि स कीडै सामनै ना उडिया जंगला ना तेसा जैगा ना पुजली जौखै स बौगत होर बोहू बौगत होर औधा बौगता तक धाचिली । 15 होर कीडै तेसा बेटडी पिछै आपणै मुँहै लाइया नौई साही पाणी बहाऊ कि तेसा बेटडी बै शूँगला । 16 पर धौरतियै तेसा बेटडी री सहायता केरी होर आपणा मुँह खोलिया सौ नौई जो अजगरै आपणै मुँहै बहाई ती पीई । 17 होर अजगर तेसा बेटडी बै झिकुआ होर तेसरी बैची दी लुआदी सेंधे जो परमेश्वरै री आज्ञा बै मैना सी होर यीशु री गवाही देणै पेंधे स्थिर सी लैडदा नौठा । 18 होर सौ समुद्रै रै रेता पेंधे जाइया खडा हुआ ।

### दुई पशु

13 फिरी मैं समुद्रा ना एक पशु बाहरै एण्डा हेरु । तेइरै दस शींग ती होर सौत मुण्डी ती होर आपणै शींगा पेंधे तेइयै दस राजशाही मुकट लाए ती । तेइरी मुण्डी पेंधे दुष्ट नाँ लिखुऐदे ती 2 मैं जो पशु हेरु ती सौ चीतै साही ती । तेइरी जोंघा भालू री जोंघा साही ती होर तेइरा मुँह शेरै रै मुँहा साही ती । तेई अजगरै आपणी शक्ति, सिंहासन होर सारा अधिकार तेइबै धिना । 3 मैं हेरु कि तेइरी एक मुण्डी एण्डी लागी ती हेरिदी जैण्डा कि तेई पेंधे कोई गहरा जखम लागा दा होला पर, तेइरा सौ जखम भौरुआदा ती । सारा संसार हैरान होइया तेई पशु पिछै हुआ । 4 होर ते तेई अजगरा बै पूजदै लागै किबैकि तेइयै आपणा सारा अधिकार तेई पशु बै धिना ती । ते तेई पशु री बी उपासना केरिया बोलदै लागै, एई पशु साही कुण सा? होर एण्डा कुण सा जो एई सेंधे लडी सकला 5 तेइबै ऐ अनुमति धिनी कि सौ घमन्ड होर निन्दै लाइया भौरुऐदै शब्द बोलणै बै आपणै मुँहा बै इस्तैमाल केरला । तेइबै ब्यालीस महीनै तक आपणी शक्ति रा प्रयोग केरनै रा अधिकार धिना । 6 तेइयै परमेश्वरै री निन्दा केरनी शुरु केरी । सौ परमेश्वरै रै नाँ होर तेइरै मन्दिर होर जो स्वर्गा ना रौहा सी तिन्हरी निन्दा केरदा लागी । 7 परमेश्वरै रै संता सेंधे लडाई केरनै होर तिन्हा बै हराणै री अनुमति तेइबै धिनी होर हर वंश, हर जाति, हर परिवार-समूह, हर भाषा, होर हर देशा पेंधे तेइबै अधिकार धिना । 8 धौरती

ना रौहणू आलै तिन्हा सैभी तेई पशु री उपासना केरनी, जौसरै नाँ तेई मेम्ने री जिन्दगी री कताबा ना सँसारै रै शुरु ना लेइया नी लिखैदै, जौसरा बलिदान केरिना जरूरी सा । 9 अगर कौसी रै कोन सी ता सौ शुणला: 10 बन्दी घौरा ना बन्द होणा जौसरी नीत बैणी सा तेई पक्का बन्दी होणा । अगर कोई तलवारियै लाइया मारला ता तेई बी तेसा तलवारियै लाइया मारिना । पवित्र लोका रा धीरज होर विश्वास एथा ना सा । 11 एथा ना बाद में एक होर पशु धौरती ना निकलदा हेरु । तेइरै मेम्ने साही दूई शींग ती होर सौ अजगरा साही बोला ती । 12 होर ऐ तेई पैहिलै पशु रा सारा अधिकार तेई सामनै कोमा ना आणा ती होर धौरती होर धौरती ना रौहणू आलै ना तेई पशु री जौसरा प्राण घातक घाव ठीक हुआ ती पुजा केरा ती । 13 होर बड़ै-बड़ै चिन्ह रिहा ती, औखै तक कि माहू रै सामनै स्वर्गा ना धौरती बै औग बरसा ती । 14 तिन्हा चिन्है री वजहा ना जुणिबै तेई पशु सामनै रिहाणै रा अधिकार तेइबै धिना ती, सौ धौरती ना रौहणू आलै बै ऐण्डै तैरहै बहका ती कि धौरती ना रौहणू अलै बै बोला ती कि, जुणी पशु रै तलवार लागी ती सौ ज़ीऊ सा, तेइरी मूरत बना । 15 होर तेइबै तेसा मूरता ना प्राण पाणै रा अधिकार धिना कि, पशु री मूरत बोलदी लागली होर जेतरे लोका तेसा पशु री मूरतै री पूजा नी केरलै तिन्हा बै मारला । 16 तेइयै होछे बड़ै, सेठ होर कंगाल, आजाद होर गुलाम सैभी रै दैहिणै हौथा ना या तिन्हैरै मोथै ना एक-एक छाप कराई । 17 ताकि तेई छौडिया जुणी पैंधे छाप यानिकी तेई पशु रा नाँ या तेई रै नाँ रा अँक होला, कोई होर लेन-देन नी केरी सकला । 18 ज्ञान एथा ना सा, जौस हागै बुद्धि सा स एई पशु रै अँका बै जोड़ला, किबैकि माहू रा अँक सा, होर तेइरा अँक छौह शौऊ छियासठ सा ।

### मेम्ने होर तेइरे लोका

14 तैबै में नजर पाई होर हेरा, सौ मेम्ना सिय्योन ढौगा पैंधे खड़ा सा होर तेई सैंधे एक लाख चौआलीस हजार माहू सी, जौसरै मोथै ना तेइरा होर तेइरै बापू रा नाँ लिखुआ सा । 2 होर स्वर्गा ना मूँ ना ऐण्डा शब्द शुणुआ, जो बोहू पाणी री छेड़ा साही ती होर जो शब्द में शुणू सौ ऐण्डा ती कि ज़ैण्डै कोई वीणा बजाणू आलै वीणा बजाँदें लागैदें होलें । 3 ते सिंहासना सामनै होर चारै प्राणी होर प्राचीना सामनै ऐ नोऊँआ गाणा गाँदें लागै ती, होर तिन्हा एक लाख चौआलीस हजार माहू बै छौडिया जो मोल लेउए दै ती, कोई तेई गाणै बै सीखी नी ती सकदा । 4 ए ते सी जो बेटडी सैंधे अशुद्ध नी हुए पर कुँआरै सी । ए ते सी कि जौखै मेम्ना जा सा ते तेई पिछे होआ सी । ए ता परमेश्वरै री तैँइयै पैहिलै फ़ौल होणै री तैँइयै माहू ना मोल लेउए दै सी । 5 होर तिन्हैरै मुँहा ना कदी बी झूठ गैला नी ती निकलदी । ते निर्दोष सी ।

### त्राई स्वर्गदूत

6 फिरी में एक होर स्वर्गदूत आसमानै रै बिचा ना उड़दा हेरु, जौस हागै धौरती ना रौहणू आलै री हर एक जाति, कुल, भाषा होर लोका बै शुणाणै री तैँइयै सनातन सुसमाचार ती । 7 होर तेइयै बड़ै शब्दा सैंधे बोलू, परमेश्वरा ना डौरा होर तेइरी महिमा केरा किबैकि तेइरै न्याय केरनै रा बौगत आऊ सा होर तेइरा भजन केरा, जुणियै स्वर्ग, पृथ्वी, समुद्र होर पाणी रै सोतै बनाए । 8 तैबै एथा ना बाद एक होर स्वर्गदूत ऐण्डा बोलदें-बोलदें आऊ कि, स बड़ा बाबुल जुणियै आपणै व्यभिचारै री मदिरा सैभी जाति बै प्याई सौढौऊ । 9 इन्हा बाद एक होर स्वर्गदूत ऐण्डा बोलदें-बोलदें आऊ कि जुण तेई पशु होर तेइरी मूरतै री पूजा केरला होर आपणै मोथै या हौथा ना तेइरी छाप लाला, 10 ता तेई परमेश्वरै री झिकै री मदिरा पीणी पौई होर पवित्र स्वर्गदूतै रै सामनै होर मेम्ने सामनै औगी होर गन्धके री पीडा ना पौडना । 11 होर तिन्हरी पीडा रा धुँआ जुगा-जुगा तक उठदा रौहणा होर जुणा तेई पशु होर तेइरी मूरतै री पूजा केरा सी होर जुणा तेई पशु रै नाँ री छाप लेआ सी, तिन्हा बै रात ध्याड चैन नी मिलणा । 12 पवित्र लोकै री सहनशीलता एथा ना सा कि जो परमेश्वरै री आज्ञा बै मैना सी होर यीशु पैंधे भरुसा रैखा सी । 13 होर में स्वर्गा ना ऐ शब्द शुणू कि लिख, जो मुरदै प्रभु ना मौरा सी, ते औजा ना धनय सी, आत्मा बोला सा, किबैकि तिन्हा आपणी मेहनती ना बशाँ पाणा होर तिन्हैरै कोम तिन्हा सैंधे होआ सी ।

### कटनी

14 में नजर पाई होर हेरा एक प्याशा बादल सा होर तेई बादला पैंधे माहू रै बेटे साही कोई बेटा सा, जौसरी मुण्डी पैंधे सुने रा मुकट सा होर हौथा ना चोखी दाची सा । 15 फिरी एकी होरी स्वर्गदूतै मन्दिरा ना निकलिया जो बादला पैंधे बेटा सा तेइबै ज़ोरा सैंधे पुकारिया बोलू कि, आपणी दाचियै लाइया कटनी केर किबैकि कटनी रा बौगत आऊ सा कि धौरती री खेती पौकी सा । 16 जो बादला पैंधे बेटा ती तेइयै आपणी दाची धौरती पैंधे लाई होर धौरती री कटनी केरुई । 17 तैबै एक होर स्वर्गदूत तेई मन्दिरा ना निकता जो स्वर्गा ना सा, तेई हागै बी चोखी दाची ती । 18 फिरी एक होर स्वर्गदूत जुणिबै औगी पैंधे अधिकार सा, वेदी ना निकता होर जुणि हागै चोखी दाची सा तेइबै ज़ोरा सैंधे बोलू, आपणी चोखी दाचियै लाइया धौरती री दाखलतै रै गुछे काट किबैकि तेसरी दाख पौकी सा । 19 होर तेई स्वर्गदूतै धौरती पैंधे आपणी दाची पाई होर धौरती री दाखलता रा फ़ौल काटिया आपणै परमेश्वरै रै प्रकोपै रै बड़ै रसै रै कुण्डा ना पाए । 20 होर नगरा बाहरै तेई रसै रै कुण्डा दाख पिशुए होर रसकुण्डा ना एतरा लोहू निकता कि घोड़े री लगामा तक पुजू होर शौऊ कोसा तक बौह ।

### आखरी बिपदा सेंधे

15 फिरी में स्वर्गा ना एक होर अद्भुत चिन्ह हेरु यानिकी, सौत स्वर्गदूत जुणि हागै पिछली सौत विपदा ती, किबैकि तिन्हैरै होणै ना बाद परमेश्वरै रै प्रकोपा रा अन्त सा । 2 होर में औगी ना मिलै दै शीशै साही समुद्र हेरु होर जो तेई पशु पैंधे होर तेइरी मूरता पैंधे होर तेइरै नाँ रै अँका पैंधे जयवन्त हुए ती, ते तेई शीशै रै समुद्रा भेटी परमेश्वरै री वीणा लेइया खैडै हेरै । 3 होर ते परमेश्वरै रै दास मूसा रा गाणा होर मेम्ने रा गाणा लाइया बोला ती कि, हे सर्वशक्तिमान प्रभु तेरे कोम बड़े होर अदभुत सी, हे जुगै-जुगै रै राजैआ तेरी चाल ठीक होर सँचची सा । 4 हे प्रभु तौ ना कुणी नी डौरना? होर तेरै नाँ री महिमा नी केरनी? किबैकि केवल तू पवित्र सा होर सारी जाति एजिया तौ सामनै दण्डवत् केरना, किबैकि तेरै न्याय रै कोम प्रगट हुए सी । 5 होर एथा ना बाद में हेरु कि स्वर्गा ना गुआही रै तोम्बू रा मन्दिर खोलुआ । 6 होर ते सौत स्वर्गदूत जुणि हागै सौत विपदा ती, शुद्ध होर चमकदार मणी लाइया छाती पैंधे सुनहरै पटै बोनिया मन्दिरा ना निकतै । 7 होर तिन्हा चार प्राणी ना एकियै तिन्हा सौत स्वर्गदूता बै युग-युग जिन्दै परमेश्वरै रै प्रकोपै रै सौत कटोरै धिनै । 8 होर परमेश्वरै री महिमा होर तेइरी सामर्थे री वजहा ना मन्दिर धुँए लाइया भौरुआ होर जैबै तक तिन्हा सौत स्वर्गदूतै री सौत विपदा खत्म नी हुई तैबै तक मन्दिरा बै कोई बी नि जाई सकू ।

### परमेश्वरै री झिका रै सौत कटोरै

16 फिरी में स्वर्गा ना एक होर अद्भुत चिन्ह हेरु यानिकी, सौत स्वर्गदूत जुणि हागै पिछली सौत विपदा ती, किबैकि तिन्हैरै होणै ना बाद परमेश्वरै रै प्रकोपा रा अन्त सा । 2 तैबै पैहिलै स्वर्गदूतै जाइया आपणा कटोरा धौरती पैंधे परु होर तिन्हा माहू रै जुणि पैंधे पशु री छाप ती, होर जुणा तेसा मूरतै री पूजा केरा ती, तिन्हैरै एकी किस्मा रा बुरा होर दुःख देणू आला दुःखणा निकता । 3 होर दूजै स्वर्गदूतै आपणा कटोरा समुद्रा ना परु होर स मूँएदै रै लोहू साही बणू होर समुद्रै रै हर एक जीऊ मूँए । 4 होर त्रीजै आपणा कटोरा नौई होर पाणी रै स्रोता ना परु होर ते लोहू बणै । 5 होर एथा ना बाद में हेरु कि स्वर्गा ना गुआही रै तोम्बू रा मन्दिर खोलुआ । 6 होर ते सौत स्वर्गदूत जुणि हागै सौत विपदा ती, शुद्ध होर चमकदार मणी लाइया छाती पैंधे सुनहरै पटै बोनिया मन्दिरा ना निकतै । 7 होर तिन्हा चार प्राणी ना एकियै तिन्हा सौत स्वर्गदूता बै युग-युग जिन्दै परमेश्वरै रै प्रकोपै रै सौत कटोरै धिनै । 8 होर परमेश्वरै री महिमा होर तेइरी सामर्थे री वजहा ना मन्दिर धुँए लाइया भौरुआ होर जैबै तक तिन्हा सौत स्वर्गदूतै री सौत विपदा खत्म नी हुई तैबै तक मन्दिरा बै कोई बी नि जाई सकू । 9 होर माहू बड़ै सैंके लाइया झडासुरे होर परमेश्वरै रै नाँ री जौसबै इन्हा विपदा पैंधे अधिकार सा, निन्दा केरी होर तेइरी महिमा केरनै री तैँइयै मन नी फेरु । 10 होर पोज़ुए आपणा

कटोरा तेई पशु पैंधे पेरु होर तेइरै राज्य ना निहारा हुआ होर लोका पीड़ै री वजहा ना आपणी-आपणी जिभ चापदै लागै । 11 होर आपणी पीड़ै री वजहा ना होर दुःखणै री वजहा ना स्वर्गै रै परमेश्वरै री निन्दा केरी होर आपणै-आपणै कोमा ना मन नी फेरु । 12 छौउरे स्वर्गदूतै आपणा कटोरा बडी नौई फुराता पैंधे पेरु होर तेसरा पाणी शुकू ताकि पूर्व दिशै रै राजै री तैइयै बौत त्यार होली । 13 होर मैं तेई अजरै रै मुँहा ना होर तेई पशु रै मुँहा ना होर तेई झूठै भविष्यवक्तै रै मुँहा ना त्रा दुष्टात्मा मँढकै रै रूपा ना निकलदी हेरी । 14 ए चिन्ह रिहाणु आली दुष्टात्मा सी, जो सारै सँसारै रै राजै हागै निकलिया एथै री तक ज़ा सी, कि तिन्हा बै सर्वशक्तिमान परमेश्वरै रै तेई बड़ै रोज़ै री लड़ाई री तैइयै कठा केरली । 15 हेर, हाँऊ घोरा साही एजा सा, धन्य सा स जो ज़ागवा रोहा सा होर आपणै झिकड़ै री चौकसी केरा सा कि नंगा नी फिरला होर लोका तेइरै नंगापन नी हेरलै । 16 होर तिन्है ते तेसा ज़ैगा ना कठा केरै जुणिबै इब्रानी भाषा ना हर-मगिदोन बोला सी । 17 होर सौतुरे आपणा कटोरा बागरी पैंधे पेरु होर मन्दिरै रै सिंहासना ना ऐ शब्द हुआ कि, बस हुआ । 18 तैबै बजड़ाह, शब्द होर ग़िज़णै री छेद हुई होर ऐण्डा बड़ा भुईडोल हुआ कि ज़ैबै लेइया धौरती ना माहू री उत्पति हुई, तैभै ना लेइया ऐण्डा बड़ा भुईडोल कैधियै नी हुआ । 19 होर तेई नगरै रै त्रा टुकड़ै हुऐ होर जाति-जाति रै नगर दौऐ होर बड़ै बाबुलै री याद परमेश्वरै रै ओखै हुई कि स आपणी झिकै री जलजलाहटै री मदिरा तेइबै पियाला । 20 होर हर एक टापू आपणी ज़ैगा ना हिलू होर ढोंगा रा पैता नी लागा । 21 होर आसमाना ना माहू पैंधे मूणै-मूणै रै ओलै पौडै किबैकि ऐ मुसीबत बड़ी भारी ती । लोकै ओलै री मुसीबतै री वजहा ना परमेश्वरै री निन्दा केरी ।

### बड़ी वेश्या

17 जुणी सौत स्वर्गदूता हागै सौत कटोरै ती तिन्हा न एकियै एज़िया मुँभे बोलू, औरु एज, मूँतौभै तेसा बड़ी वेश्या रा दण्ड रिहाणा जो बोहू पाणी पैंधे बेठी सा । 2 जुणि सैंधे धौरती रै राजै व्यभिचार केरु होर धौरती ना रोहणु आलै तेसरै व्यभिचारै री मदिरा पीइया मतवालै हुऐ । 3 तैबै तेइयै हाँऊ आत्मा ना जँगला बै नेऊ होर मैं किरमिजी रोंगै रै पशु पैंधे जो निन्दै रै नाँ लाइया छिपू ती होर जौसरी सौत मुँडी होर दस शींग ती एक बेटडी बेठी दी हेरी । 4 ऐ बेटडी बैजनी होर किरमिजी झिकड़ै लाइया ती होर सुनै, कीमती मणी होर मोतियै लाइया सज़ी ती होर तेसरै हाँथा ना सुनै रा एक कटोरा ती जो घुणित चीज़ै लाइया होर तेसरै व्यभिचारै री अशुद्ध चीज़ै लाइया भौरुआदा ती । 5 होर तेसरै मोथे पैंधे ऐ नाँ लिखू ती, “भेद बड़ा बाबुल धौरती री वेश्या होर घुणित चीज़ै री आमा ।” 6 होर मैं सौ बेटडी पवित्र लोकै रै लोहू होर यीशु रै गवाह रै लोहू पीइया मतवाली हेरी होर तेसा हेरिया हाँऊ हैरान हुआ । 7 तेई स्वर्गदूतै मुँभे बोलू, तू किबै हैरान हुआ? हाँऊ तौभै एसा बेटडी होर तेई पशु रा जौस पैंधे स सवार सा होर जौसरी सौत मुँडी होर दस शींग सी, भेद दसा सा । 8 जे पशु तँ हेरु, ऐ पैहिलै ती पर ऐबै नी आँथी होर अथाह कुण्डा ना निकलिया विनाशा ना पौडना होर धौरती ना रोहणु आलै जुणि रै नाँ सँसारै री उत्पति रै बौगता ना लेइया जिदगी री कताबा ना नी लिखुऐ एई पशु री दशा हेरिया अचँभा केरना कि पैहिलै ती होर ऐबै नी आँथी होर भी एणा । 9 तेसा बुद्धि री तैइयै जौस ना ज्ञान सा ऐ मौका सा, ते सौत मुँडी सौत पहाड़ सी जौस पैंधे स बेटडी बेठी सा । 10 होर ते सौत राजै बी सी, पोंज ता हुऐ होर एक आजी बी सा होर एक आजी तक आऊ नी होर ज़ैबै एला ता किछ बौगता तक तेइरा रोहणा बी जरूरी सा । 11 होर जे पशु पैहिलै ती होर ऐबै नी आँथी स आपू औतुआ सा होर तिन्हा सौता ना पैदा हुआ होर विनाशा ना पौडना । 12 होर जे दस शींग तँ हेरै ते दस राजै सी जुणियै आजी तक राज नी पाऊ पर तेई पशु सैंधे घड़ी भरै री तैइयै राजै साही अधिकार पाणा । 13 इन्हा सैभी एकी मेनै रै होणा होर आपणी-आपणी सामर्थ होर अधिकार तेई पशु बै देणा । 14 इन्हा मेन्ने सैंधे लैडना होर मेन्ने तिन्हा पैंधे जय पाणी किबैकि स प्रभु रा प्रभु होर राजै रा राजा सा होर जो शाधुरे सी, चुनै सी होर विश्वासी जो तेई सैंधे सी तिन्हा बी जय पाणी । 15 तैबै तेइयै मुँभे बोलू, जे पाणी तँ हेरु जुणि पैंधे वेश्या बेठी सा, ते लोका, भीड़, जाति होर भाषा सी । 16 होर जे दस शींग तँ हेरै, तिन्हा होर पशु तेसा वेश्या

सैंधे बैर रखणा होर सौ लाचार होर नंगी केरनी होर तेसरा माँस खाणा होर सौ ओगी ना फुकणी । 17 किबैकि परमेश्वरा तिन्हरै मैना ना ऐ पाणा कि ते तेसरी मनसा पूरी केरलै होर ज़ैबै तक परमेश्वरै रै वचन पूरै नी होलै तैबै तक एक मन होइया आपणा-आपणा राज्य पशु बै देलै । 18 होर सौ बेटडी जे तँ हेरी सा, सौ बड़ा नगर सा जो धौरती रै राजै पैंधे राज केरा सा ।

### बेबीलोना रा पतन

18 एथा ना बाद मैं एक स्वर्गदूत स्वर्गा ना उतरदा हेरु जौसरा बड़ा अधिकार ती होर धौरती तेइरी शक्ति सैंधे प्याशी हुई । 2 तेइयै ज़ोरा सैंधे पुकारिया बोलू, ढौऊ, बड़ा बाबुल ढौऊ होर दुष्टात्मै री रोहणै री ज़ैगा होर हर एक अशुद्ध आत्मा रा अडा होर एक अशुद्ध होर घुणित पक्षी रा आडा हुआ । 3 किबैकि तेसरै व्यभिचारै री भयानक मदिरै री वजहा ना सैंधै जाति गिरी होर धौरती रै राजै तेसा सैंधे व्यभिचार केरु होर धौरती रै व्यपारी तेसरै सुख-विलासै री वजहा ना धनवान हुऐ सी । 4 तैबै मैं स्वर्गा ना कौसी होरी रा शब्द शुणु कि, हे मेरै लोको, तेथा ना निकलिया एजा कि तुसै तेइरै पापा ना भागी नी होलै होर तेइरी विपदा ना कोई तुसा पैंधे नी लोड़ी पौई । 5 किबैकि तेइरै पाप स्वर्गा तक पुजै सी होर तेइरै अधर्म परमेश्वरा बै याद आए सी । 6 ज़ेण्डा तेइयै तुसाबै धिना सा, तैण्डाऐ तेइबै भौरा होर तेइरै कोमै रै मुताबक तेइबै दुगणा बदला दैआत् । जुणि कटोरै ना तेइयै भौरु सा तेथा ना ऐ तेइरी तैइयै दुगणा भौरा । नी आँथी होर शोगा ना कैदी नी पौडना । 7 जेतरी तेइयै आपणी सराउथी केरी होर सुख विलास केरु तेतरी तेइबै पीड़ा होर शोग दैआ, किबैकि स आपणै मैना ना बोला सा, हाँऊ राणी होइया बेठी सा, विधवा नी आँथी होर शोगा ना कैदी नी पौडना । 8 एसा वजहा ना एकी रोज़ा ना तेसा पैंधे विपदा एज़िया पौडनी यानिकी मोऊत, शोग होर अकाल होर सौ ओगी ना भस्म केरिनी किबैकि तेसरा न्याय केरनु आला प्रभु परमेश्वर शक्तिमान सा । 9 होर धौरती रै राजै जुणियै तेसा सैंधे व्यभिचार होर सुख विलास केरु, ज़ैबै ते तेसरै फुकिणै रा धूँआ हेरलै ता तेसरी तैइयै रोणा होर छाती पिटणी । 10 होर तेसरी पीड़ा ना डोरिया दूर खैडै होइया बोलणा, ओ बड़ै नगर बाबुल! हे दूढ नगर, हाय! हाय! घड़ी भरा ना तौभै सजा मिली सा । 11 होर धौरती रै व्यपारी तेसरी तैइयै रोणा होर कोमणा किबैकि ऐबै कोई तिन्हा माल मोल नी लेणा । 12 यानिकी सुना, चाँदी, रत्न, मोती होर मलमल, बैजनी, रेशमी होर किरमिजी झिकड़ै होर हर किस्मै रै सुगन्धित काठ होर हाथी रै दाँद री हर किस्मै री चीज़ा होर कीमती काठ, पीतल, लोहा होर सँगमरमेरै रै हर किस्मै रै भाँडे । 13 होर दालचीनी, मसालै, धूप, इत्र, लोबान, मदिरा, तेल, मैदा, गेहूँ, गाई-बौल्ड, भेड़ा-बौकरी, घोड़े, रौथ, गुलाम होर माहू रै प्राण । 14 ऐबै मेरै मन भावने फौल त हागै ना जाँदै रौहै होर स्वादिष्ट होर भडकीली चीज़ा त ना दूर हुई सी होर तिन्हा तौभै कैदी बी नी मिलणा । 15 इन्हा चीज़ै रै व्यपारी जो तेसरी वजहा ना धनवान हुऐ ती, तेसरी पीड़ा ना डोरिया दूर खैडै होणा होर रोइया कोमदै-कोमदै बोलणा, 16 हाय! हाय! ऐ बड़ा नगर जो मलमल, बैजनी होर किरमिजी झिकड़ै लाइया ती होर सुनै, रत्न होर मोतियै लाइया सज़ू ती, 17 घड़ी भरा ना तेइरा बड़ा भारी धन नाश हुआ होर हर एक माँझी, जलयात्री होर मल्लाह होर जेतरे बी समुद्रा ना कमौआ ती सैंधै दूर खैडै हुऐ । 18 होर तेसरै फुकिणै रा धूँआ हेरिया पुकारिया बोलणा, कुण जेही नगर एई बड़ै नगरै रै समान सा? 19 होर आपणी-आपणी मुँडी ना धूडा पाणा होर रोंदै-रोंदै होर कोमदै-कोमदै चिलाइया बोलणा कि, हाय! हाय! ऐ बड़ा नगर जुणी री सम्पति री वजहा ना समुद्रै रै सारै ज़हाजा आलै धनवान हुऐ ती, घड़ी भरा ना उजड़ू । 20 हे स्वर्ग होर पवित्र लोको, प्रेरितो होर भविष्यवक्तो, तेई पैंधे आपद केरा किबैकि परमेश्वरै न्याय केरिया तेइना तुसरा बदला लेऊ सा । 21 तैबै एकी बलवान स्वर्गदूतै एक बड़ी चैकि रै पाटै रै समान एक पाथर चैकू होर ऐण्डा बोलिया समुद्रा बै शेटू कि, बड़ा नगर बाबुल ऐण्डै बड़ै ज़ोरा सैंधे ढाइणा होर तैबै कैदी बी तेइरा पैता नी मिलणा । 22 होर वीणा बजाणु आलै होर बैउंसरी बजाणु आलै होर तुरही फुकरनु आलै रा शब्द त ना कैदी बी नी शुणिना । होर कौसी बी किस्मा रा कारीगीर तैबै कैदी त ना नी मिलणा होर चैकी चैलणै री छेद तैबै कैदी त ना नी शुणिना । 23 होर दीऐ रा प्याशा फिरी कैदी बी त ना नी चमकणा होर दुल्है-दुल्हनै री

आवाज त ना कैदी नी शुणिनी किबैकि तेरें व्यपारी धौरती रें प्रधान ती होर तेरें टोणें ना सैंभै जाति भरमाऊई ती । 24 होर भविष्यवक्ता होर पवित्र लोका होर धौरती पैंधे घात केरुएदें रा लोहू तेही ना मिलू ।

19 एथा ना बाद में स्वर्गा ना मैना बड़ी भीड़ जोरा सैंधे ऐण्डी बोलदी शुणि कि, हाल्लयाह उद्धार, महिमा होर सामर्थ आसरे परमेश्वरें री सा । 2 किबैकि तेइरें फैसलें सैंधे होर ठीक सी । तेइयें तेसा बड़ी वेश्या रा जो आपणें व्यभिचारा सैंधे धौरती बें भ्रष्ट केरा ती, न्याय केरु होर तेसा ना आपणें भक्तें रें लोहू रा बदला लेऊ सा । 3 तैंबै तिन्हें दुजि बार हाल्लयाह बोलू होर तेसरें फुकिणें रा धुँआ जुगा-जुगा तक उठदा रौहणा । 4 होर चौऊबी प्राचीन होर चोहू प्रणियें टुँबडें पौडिया परमेश्वरा बें दण्डवत केरु जो सिंहासना पैंधे बैठा ती होर बोलू, आमीन, हाल्लयाह ।

### मेम्ने रा ब्याह

5 होर सिंहासना ना एक शब्द निकता कि, हे आसरे परमेश्वरा ना डौरनू आलें होछे बडें सैंभी दासो, तुसैं सैंभियें तेइरी स्तूति केरा । 6 तैंबै में बड़ी भीड़ा साही बोहू पाणी रा होर ग्रीजणें रा बड़ा शब्द शुणू कि, हाल्लयाह, कि आसरा सर्वशक्तिमान प्रभु परमेश्वर राज केरा सा । 7 एजा आसा आनन्दित होर मगन होणा होर तेइरी स्तूति केरनी किबैकि मेम्ने रा ब्याह पुजू होर तेइरी लाडियें आपणी त्यारी केरी सा । 8 होर तेसाबें शुद्ध होर चमकदार म्हीन मलमल लागे रा हक धिना किबैकि तेई म्हीन मलमला रा अर्थ पवित्र लोके रें धर्में रें कोम सी । 9 होर तेइयें मुँभें बोलू, ऐ लिख कि, धन्य सी ते जो मेम्ने रें ब्याह री धामा बें शाधुए सी, तैंबै तेइयें भी मुँभें बोलू, ए वचन परमेश्वरें रें सैंधे वचन सी । 10 होर हाँऊ तेइबें दण्डवत केरने री तैंइयें तेइरी जोंघा पैंधे पौडू, होर तेइयें मुँभें बोलू, हेर, ऐण्ढा मत केरदा, हाँऊ तेरा होर तेरें सँधी भाई रा सँधी दास सा, जो यीशु री गवाही देणें ना पैंके सी । सिर्फ परमेश्वरा बें दण्डवत् केर, किबैकि यीशु री गवाही भविष्यवाणी री आत्मा सा ।

### शेतें घोड़े रा सवार

11 तैंबै में स्वर्ग खुलू दा हेरु होर हेरा सा कि एक शेता घोड़ा सा होर तेई पैंधे एक सवार सा, जो विश्वास योग्य होर सत्य सा होर सौ धर्मा सैंधे न्याय होर लड़ाई केरा सा । 12 तेइरी औछी औगी री झाई सी होर तेइरी मुण्डी पैंधे बोहू राजमुकट सी होर तेइरा एक नाँ लिखू सा जुणियें कि तेई छौडिया होर कोई नी जाणदा । 13 होर सौ लोहू छिडकू दै झिकडै लाइया सा होर तेइरा नाँ परमेश्वरा रा वचन सा । 14 होर स्वर्गें री सेना शेतें घोड़ें पैंधे सवार होर शेतें होर शुद्ध मलमल लाउएदें तेई पिछे-पिछे सी । 15 होर जाति-जाति बें मारने री तैंइयें तेइरें मुँहा ना चोखी तलवार निकला सा होर तेई लोहें रें राजदण्ड लेइया तिन्हा पैंधे राज केरना होर तेई सर्वशक्तिमान परमेश्वरें रें भयानक प्रकोपें रें जलजलाहटें री मदिरें रें कुण्डा ना दाख रौदणी । 16 होर तेइरें झिकडै होर जोंघा पैंधे ऐ नाँ लिखू सा,

राजें रा राजा होर प्रभु रा प्रभु । 17 तैंबै में एक स्वर्गदूत सूरजा पैंधे खड़ा हेरु होर तेइयें जोरा सैंधे पुकारिया आसमानें रें बिचा ना उडनू आलें सैंभी चिडू बें बोलू, एजा परमेश्वरें री बड़ी त्यारी री तैंइयें कठै होआ । 18 कि तुसैं राजें रा माँस, सरदारा रा माँस, शक्तिमान मर्दा रा माँस, घोड़ें रा, तिन्हरें सवारा, आजाद होर गुलाम होर होछे बडें सैंभी रा माँस खालै । 19 तैंबै में सौ पशु होर धौरती रें राजें होर तिन्हरी सेने रें घोड़ें रें सवार तेइरी सेना सैंधे लैडने री तैंइयें कैठा हेरें । 20 होर सौ पशु होर तेई सैंधे स झूठा भविष्यवक्ता ढौकुआ, जुणियें तेई सामने ऐण्ढे चमत्कार रिहाए ती । जुणियें लाइया तेइयें ते भरमाए, जुणियें तेई पशु री छाप लेई ती होर जुणा तेसा मूरती री पूजा केरा ती, ए दुहें जिन्दै जी तेसा औगी री झीला ना पाए जो गन्धकें लाइया भौका सा । 21 होर बैचें दै लोका तेई घोड़ें रें सवारें री तलवारियें लाइया जो तेइरें मुँहा ना निकला ती मारुए होर सैंभै चीडू तिन्हरें माँस खाइया रौजै

### हजार बौर्षा रा राज्य

20 तैंबै में एक स्वर्गदूत स्वर्गा ना उतरदा हेरु, जोसरें हौथा ना अथाह कुण्डे री कुँजी होर एक बड़ी जँजीर ती । 2 होर तेइयें सौ अजगर जो

इबलीस होर शैतान सा ढौकिया हज़ार बौर्षे री तैंइयें बोनू । 3 होर सौ अथाह कुण्डा ना बन्द केरु होर तेई पैंधे मोहर लाई कि सौ हज़ार बौर्षा पूरे होणें तक जाति-जाति रें लोका बें नी भरमाला । एथा बाद ऐ जरूरी सा कि सौ थोड़ी देरें री तैंइयें भी खोलिला । 4 तैंबै में सिंहासन हेरें होर तिन्हा पैंधे लोका बेठें होर तिन्हा बें न्याय केरने रा हक धिना होर तिन्हरी आत्मा बी हेरी जुणि री मुँडी यीशु री गवाही देणें री वजहा ना होर परमेश्वरें रें वचने री वजहा ना काटुई दी ती होर जुणियें न ता तेई पशु री होर न तेइरी मूरतें री पूजा केरी ती होर न तेइरी छाप आपणें मौथें पैंधे होर हौथा पैंधे लाई, ते जिन्दै होइया मसीहा सैंधे हज़ार बौर्षा तक राज केरदें रौहें । 5 होर जैंबे तक हज़ार बौर्षा पूरे नी हुऐ तैंबे तक मूँएदें जिन्दै नी हुऐ, पैहिला मृत्युस्थान सा । 6 धन्य होर पवित्र सा सौ जो ई पैहिलें पुनरुत्थाना रा भागी सा, ऐण्ढे पैंधे दूजी मोऊती रा किछ बी हक नी आँधी पर तिन्हा परमेश्वर होर मसीह रें याजक होणा होर तेई सैंधे हज़ार बौर्षा तक राज केरना ।

### शैताना रा विनाश

7 होर जैंबे हज़ार बौर्षा पूरे होलें ता शैतान कैदा ना छौडिना । 8 होर तिन्हा जाति बें जो धौरती रें चोहू पासैं होली जुणि री गिनती समुद्रे रें बालू बराबर होली, भरमाइया लड़ाई री तैंइयें कैठा केरने बें निकलणा । 9 होर तिन्हा सारी धौरती पैंधे फैलणा होर पवित्र लोकें री छानवी होर प्रिय नगर घेरने होर औगी स्वर्गा ना उतरिया ते भस्म केरनी 10 होर तिन्हा बें भरमाणू आला शैतान औगी होर गन्धकें री झीला ना जुणि ना सौ पशु होर झूठा भविष्यवक्ता बी होला, पाइणा होर तिन्हा युगा-युगा तक पीड़ा ना तड़फदें रौहणा ।

### बड़ा शेता सिंहासन होर आखरी न्याय

11 तैंबै में एक बड़ा शेता सिंहासन होर सौ, जुण तेथा पैंधे बैठा सा हेरु, जुणि सामने ना धौरती होर आसमान भेगें होर तिन्हरी तैंइयें जैगा नी मिली । 12 तैंबै में होछे बडें सैंभे मूँएदें सिंहासना सामने खडें हेरें होर कताबा खोलुई, होर तैंबे एक होर कताब खोलुई, होर एक होर कताब खोलुई यानिकी जिन्दगी री कताब, होर जैण्ढा तिन्हा कताबा ना लिखुआ दा ती, तिन्हा कोमें रें मुताबिक मूँएदें रा न्याय केरुआ । 13 होर समुद्रे ते मूँएदें जो तेथा ना ती धिने, होर मोऊती होर अधोलोकें ते मूँएदें जो तिन्हा ना ती धिने, होर तिन्हा हर एकी रा तिन्हरें कोमें रें मुताबिक न्याय केरुआ । 14 होर मोऊत होर अधोलोक बी औगी री झीला ना पाउए, ऐ औगी री झील दुजि मोऊत सा । 15 होर जुणि रा नाँ जिन्दगी री कता ना लिखुआ दा नी मिलू, सौ औगी री झीला ना पाउआ ।

### नऊँआ आसमान होर नऊँई धौरती

21 तैंबै में नऊँआ स्वर्ग होर नऊँई धौरत हेरी किबैकि पैहिला आसमान होर पैहिली धौरत जाँदी रौही होर समुद्र बी नी रौहु । 2 तैंबै में पवित्र नगर नऊँआ यरुशलम स्वर्गा ना परमेश्वरा हागें ना उतरदा हेरु होर सौ तेसा दुल्हना साही ती, जुणियें कि आपणें लाडें री तैंइयें श्रृंगार केरुदा सा । 3 तैंबै में सिंहासना ना कोई जोरा सैंधे ऐण्ढा बोलदा शुणू कि, हेर, परमेश्वरा रा डेरा माळू रें बिचा ना सा, तेई तिन्हा सैंधे डेरा केरना होर तिन्हा तेइरें लोका होणा होर परमेश्वरा आपू तिन्हा सैंधे रौहणा होर तिन्हरें परमेश्वर होणा । 4 होर तेई तिन्हरी औछी रें सब औछू दुशणें होर एथा ना बाद मोऊत नी रौहणी होर न शोग, न विलाप, न पीड़ा रौहणी, पैहिली गैला जाँदी रौही । 5 होर जो सिंहासना पैंधे बैठा ती तेइयें बोलू, हेर, हाँऊ सबकिछ नऊँआ केरा सा, तैंबे तेइयें बोलू कि लिख किबैकि ऐ वचन विश्वास योग्य होर सैंधे सी । 6 तैंबे तेइयें मुँभें बोलू, ए गैला पूरी हुई सी । हाँऊ अल्फा होर ओमेगा, आदि होर अन्त सा । मूँ शोखुएदें बें जिन्दगी रें पाणी रें सौतें ना सेतमेंत प्याणा । 7 जुण जय पाला तेई इन्हा चीजें रें वारिस होणा होर मूँ तेइरें परमेश्वर होणा होर तेई मेरें बेठें होणा । 8 पर डरपोक, अविश्वासी, धिनौने कोम केरनू आलें, हत्यारें, व्यभिचारी, टोणें केरनू आलें, मूर्ति री पूजा केरनू आलें होर सैंभी झूठे रा भाग तेसा झीला ना मिलणा जो औगी होर गन्धकें लाइया भौकदी रौहा सा, ऐ दुजि मोऊत सा ।

### नऊँआ यरुशलेम

9 जुणि सौत स्वर्गदूता हागै पिछली विपदै रै सौत कटोरै भोरुएदै ती तिन्हा ना एक मूँ हागै आऊ होर मूँ सेंघै गैला केरिया बोलू, औरू एज; मूँ तोभे मेम्ने री लाडी रिहाणी । 10 होर तेइयै हाँऊ आत्मा ना एकी उथडै दोगा पेंधा बै नेऊ होर पवित्र नगर यरुशलेम परमेश्वरा हागै ना स्वर्गा ना उतरदा रिहाऊ । 11 परमेश्वरै री महिमा तेइना ती होर तेइरा प्याशा कीमती पाथर यानिकी बिलौरा साही साफ ती । 12 होर तेइरी शारपनाह बड़ी उथडी ती होर तेइरै बारा फाटक होर फाटका ना बारा स्वर्गदूत ती होर तिन्हा पेंधै इस्राइली रै बारा गोत्रै रै नाँ लिखै ती । 13 पूर्वा धिरै त्रा फाटक, उतर दिशा धिरै त्रा फाटक, दक्षिणा धिरै त्रा फाटक होर पश्चिम दिशा धिरै त्रा फाटक ती । 14 नगरै री शारपनाह री बारा मनियादी ती होर तिन्हा पेंधै मेम्ने रै बारा प्रेरितै रै नाँ लिखै ती । 15 होर जो मूँ सेंघै गैला केरदा लागा ती, तेई हागै नगर होर तेइरै फाटक होर शारपनाह नापणै री तेंइयै सुनै रा एक गज ती । 16 होर सौ नगर चकोर ती होर सौ लोमा होर चौडा बराबर ती, होर तेइयै तेई गजै लाइया सौ नगर नापू ता, साढै सौत कोस निकला । सौ लोमा, चौडा होर उथडा बराबर ती । 17 होर तेइयै तेथै री शारपनाह माहूँ रै स्वर्गदूतै रै नाँ ना नापी ता एक शौऊ चौआलीस हौथ निकती । 18 होर तेसा शारपनाह रा ज़ोड यशबै रा ती होर नगर एण्डै चोखै सुनै रा ती जो साफ शीशै रै समान होला । 19 होर तेई नगरै री नीवा हर किस्मै रै कीमती पाथरै लाइया सँवारुईदी ती । पैहिली नीव यशबै रै ती, दुजी नीलमणि री, त्रीजी लालडी री होर चोऊथी मरकतै री ती । 20 पोंजुई गोमेदकै री, छौउई माणिक्य री, सौतुई पीतमणि री, औतुई परोजै री, नोउई पुखराजै री, दसवीं लहसणिए री, ग्यारवीं धूम्रकान्तै री होर बारवीं याकूतै री ती । 21 होर बारा फाटक बारा मोती रै ती । एक-एक फाटक एक-एक मोती रा बणू ती होर नगरै री सडक साफ शीशै साही चोखै सुनै री ती । 22 होर में तेथा ना कोई मन्दिर नी हेरू किबैकि सर्वशक्तिमान प्रभु परमेश्वर होर मेम्ना तेथै रै मन्दिर सी । 23 होर तेई नगरा ना सूरज होर जोथै रै प्याशै री कोई जरूरत नी आँथी किबैकि परमेश्वरै री शक्ति सेंघै तेथा ना प्याशा हाँदा लागा सा होर मेम्ना तेथा रा दीपक सा । 24 होर ज़ाति-ज़ाति रै लोका तेइरै प्याशै ना च़ैलणा फिरना होर धोरती रै राज़े आपणै-आपणै तेज़ा रा समान तेथा ना आणना । 25 होर तेइरै फाटक ध्याडी कदी बी बन्द नी होणै होर तौखै रात नी होणी । 26 होर लोका ज़ाति-ज़ाति रै तेज़ा रा समान होर विभव तेथा ना आणना । 27 होर तेथा ना कोई अपवित्र चीज़ होर घृणित कोम केरनु आलै, झूठी गैला बणाणू आलै कौसी रीतियै दाखिल नी होणा । केवल तिन्हा लोका दाखिल होणा ज़ास्रै नाँ मेम्ने री ज़िन्दगी री कताबा ना लिखुए सी ।

22 फिरी तेइयै मुँभे बलौरा साही झलकदी ज़िन्दगी रै पाणी री एक नौई रिहाई जो परमेश्वर होर मेम्ने रै सिंहासना न निकलिया तेई नगरै रै बिचा न बौहा ती । 2 नौई वारै होर पारै ज़िन्दगी रा बूटा ती । तेथा न बारा किस्मै रै फ़ौल लागा ती होर सौ हर म्हीनै फ़ौआ ती होर तेई बूटै रै पौचै लाइया ज़ाति-ज़ाति रै लोका ठीक होआ ती । 3 तैबै श्राप नी होणा होर परमेश्वर होर मेम्ने री सिंहासन तेई नगरा न होणा होर तेइरै भक्ता तेइरी सेवा

केरनी । 4 होर तेइरा मुँह हेरना होर तेइरा नाँ तिन्हरै मौथै पेंधै लिखुआदा होणा । 5 तैबै रात नी होणी होर तिन्हा बै दीए होर सूरजै रै प्याशै री जरूरत नी होणी, किबैकि प्रभु परमेश्वरा तिन्हा बै प्याशा देणा होर तिन्हा जुगा-जुगा तक राज़ केरना ।

### यीशु रा दबारा एणा

6 फिरी तेइयै मुँभे बोलू, ए गैला विश्वास योग्य होर सैची सी होर प्रभुए जो भविष्यवक्ता रा परमेश्वर सा, आपणा स्वर्गदूत एथै री तक भेजू कि आपणै भक्ता बै तिन्हा गैला बै रिहाला जो छेकै पूरी होणु आली सी । 7 हेर, हाँऊ छेकै एणू आला सा, धन्य सा सौ जुण एसा कताबै री भविष्यवाणी री गैला बै मैना सा 8 हाँऊ सौहै यूहन्ना सा, जो इन्हा गैला बै शुणा होर हेरा ती होर ज़ैबै में शुणू होर हेरू, ता जो स्वर्गदूत मुँभे इन्हा गैला बै रिहा ती, हाँऊ तेइबै दण्डवत् केरने री तेंइयै तेइरी ज़ोधा पेंधै पौडू । 9 तेइयै मुँभे बोलू, हेर, एण्डा मत केरदा किबैकि हाँऊ तेरा होर तेरै भाई भविष्यवक्ता होर एसा कताबै री गैला मैनणू आला सैघी भक्त सा, परमेश्वरा बै दण्डवत् केर । 10 तैबै तेइयै मुँभे बोलू, एसा कताबै री भविष्यवाणी री गैला बै बन्द मत केरदा किबैकि बौगत नेड सा । 11 जो अन्याय केरा सा सौ अन्याय केरदा रौहला होर जो मलीन सा सौ मलीन बैणी रौहला, जो धर्मी सा सौ धर्मी बैणी रौहला होर जो पवित्र सा सौ पवित्र बैणी रौहला । 12 हेर, हाँऊ छेकै एणू आला सा होर हर एकी रै कोमै रै मुताबक बदला देणै री तेंइयै प्रतिफल मूँ हागै सा । 13 हाँऊ अल्फा होर ओमेगा, पैहिला होर पिछला, आदि होर अन्त सा । 14 धन्य सी ते, जुणा आपणै झिकडै धोआ सी, किबैकि तिन्हा बै ज़िन्दगी रै बूटै हागै एणै रा अधिकार मिलणा होर तिन्हा फाटक होइया नगरा न प्रवेश होणा । 15 पर कुतै, टोणै, व्यभिचारी, हत्यारै, मूर्ति पूजा केरनु आलै होर झूठा बै चाहणू आलै होर बणाणू आलै बाहरै रौहणा । 16 में यीशुए आपणा स्वर्गदूत एथै री तक भेजू कि तुसरै आगै कलीसियै रै बारै न इन्हा गैलै री गवाही देला; हाँऊ दाऊदा रा मूल, वंश होर दोती च़मकणू आला तारा सा । 17 आत्मा होर दुल्हन दुहियै बोला सी, एज, होर शुणू आला बी बोलला कि एज, होर जुण शोखुआ सा सौ एला होर जुण कोई चाहला सौ ज़िन्दगी रा पाणी संतमेंत लेला ।

### उपसंहार

18 हाँऊ हर एकी बै जुण एसा कताबै री भविष्यवाणी री गैला शुणा सा, गवाही देआ सा कि, अगर कोई माहूँ इन्हा गैला न किछ बढ़ाला ता परमेश्वरा ते विपदा जो एसा कताबा न लिखी सी तेई पेंधै बढ़ाणी । 19 होर अगर कोई एसा कताबै री भविष्यवाणी गैला न किछ खोलला ता परमेश्वरा ज़िन्दगी रै तेई बूटै होर पवित्र नगरा न जुणि री चर्चा एसा कताबा न सा, तेइरा भाग खोलणा । 20 जुण इन्हा गैलै री गवाही देआ सा, सौ ऐ बोला सा, हाँ छेकै एणू आला सा । आमीन । हे प्रभु यीशु आ । । 21 प्रभु यीशु रा अनुग्रह पवित्र लोका सेंघै लोडी रौहू । आमीन॥